



11.1.91

H I

D I V I  
**T H O M A E**  
**A Q U I N A T I S**  
**D O C T O R I S A N G E L I C I**  
**O R D I N I S P R A E D I C A T O R U M**  
**O P E R A .**

M. 1. 91

E D I T I O A L T E R A V E N E T A  
ad plurima exempla comparata, & emendata.

A C C E D U N T

Vita, seu Elogium eius a IACOBO ECHARDO diligentissime concinnatum,  
& BERNARDI MARIAE DE RUBEIS in singula Opera  
Admonitiones praeviae.

T O M U S V I C E S I M U S T E R T I U S

completens reliquas supra c. SECUNDAE SECUNDAE PARTIS  
SUMMAE THEOLOGICAE quaestiones.



V E N E T I I S , M D C C L V I .

---

Cudebat SIMON OCCHI  
EX PRIVILEGIO EXCELLENTISSIMI SENATUS.





FR. JO. FRANC. BERNARDI MARIAE  
DE RUBEIS  
ORDINIS PRAEDICATORUM  
ADMONITIO PRAEIVIA

De integra Sancti Thomae immunitate a plagio, quo Theologica quadripartita Summa, ac Summa quædam Virtutum Alexandri Halensis, nimia confidentia ab eodem Aquinate surreptæ dicuntur, expilatæque, adversus Lucam Wadingum, & Joannem de la Haye.

C A P U T I

*Alexandrum Halensem a S. Thoma Aquinate expilatum, excogitarunt Lucas Vvadingus, & Joannes de la Haye. Nihil de Summa Halensis quadripartita adduci potest, quod ab Aquinate surreptum fuerit. Joannis Gerfonii locus castigatus, & expostus.*

I. **N**ondum plagii notam, quæ S. Thomam Aquinatem superiore in Dissertatione immunem pronuntiavimus, integre detergam, penitusque detritam, inquit. Convulsa fuerit difficultas, quæ Theologicam Summam Aquinatis ex Morali Speculo Vincentii Bellovacensis decerptam opponebat: adhuc fontes alios indicant Lucas Vvadingus, & Joannes de la Haye, ex quibus integras Quæstiones, plurimosque Articulos in suam Thomas derivaverit Summam Theologicam.

Vvadingus profert *Summam Virtutum*, nescio quam, ab Alexandro Halensi elucubratam, veluti *Summe* suæ *Theologicæ*, in quatuor partes distributa, Supplementum: quam noster Aquinas, dum simili operi concinnando operam daret, adhibuerit, desloraverit, expilarit, Ad annum M.cc.xlv. num. xxvii. edit. Rom. 1732. fol. sic habet ille: „Quod si quis opinionem præferre vellet rationi, (&) dicat, *Speculum Morale* alicuius esse posterioris & Vincentio, & Thoma auctoribus: nihil salvat, nec huic accrescit quod alteri surripitur: quia *Summam Virtutum* esse constat Alensis utroque antiquioris, estque ipsius Auctoris fide *Supplementum* 3. partis, juxta ea quæ promittit de *Virtutibus* 3. p. q. 26. q. 61. & 63. & nullibi nisi in *Summa Virtutum* exhibentur, cujus Auctor continuationem & ordinem ejus ad Terciam Partem primis verbis sic exprimit: *Habito ergo, inquit, de gratia gratum faciente & gratis data sermone, consequenter dicendum est de virtute.* “ Quo loco 1. permittit Vvadingus, ut opinio illa præferatur, quæ *Speculum Morale* fœtum existimat Auctoris & Vincentio Bellovacensi, & Thoma Aquinate posterioribus: quamquam non opinio, animadvertente Echardeo, prælata rationi dici debet, verum depulsis tenebris manifesta veritas, quæ rationis est regula. Superiorem Dissertationem nostram consule. 2. *Summam Virtutum* obtrudit, quam instar *Supplementi Tertiae Partis Summæ Theologicæ* compos-

fuerit Alexander de Hales, utroque, Bellovacensi, & Aquinate, antiquior: vita quippe mortali anno 1274. migravit Sanctus Thomas, non ante annum 1263. obiit Vicentius Bellovacensis, & anno 1245. jam ad plures abierat Alexander de Hales. 3. Hanc ergo Summa Virtutum, tot ante Aquinatis obitum annos ab Halensi scriptam, *verbotenus plene Secundae Secundae ipsius Aquinatis insertam*, Vvadingi sententia est, quam eodem loco numero superiore xxvi. confidentissime pronunciat.

Symbolam jam avert Joannes de la Haye in Vita Alexandri Halensis, quam praefixam ejusdem Alexandri Commentario in *Apocalypsim*, Parisini typi praestant anno 1647. Nihil haesitans adseverat ille, in Theologica Sancti Thomae Summa frequentius occurrere Scripturae sententias, Augustini aliorumque Doctorum Ecclesiae testimonia, rationes etiam, ac doctrinae fundamenta, & responsa, quae pariter in Theologica Summa Halensis reperiuntur, aut eadem, aut quasi eadem, quoad sensum, quoad substantiam, & aliquoties quoad verba, aut non valde dissimilia. Hanc Alexandri Halensis vitam videre, & expendere mihi non licuit: quae vero ex ipsa decerpta sunt, profert Natalis Alexander in Opuſculo de Titulo Praeceptoris S. Thomae, profert etiam Jacobus Echardus. Mens ergo Joannis de la Haye perspicue patet, non solum Summam Virtutum, quae Alexandro Halensi tribuitur, verum Theologicam etiam ejusdem Summam ab S. Thoma Aquinate expilatam fuisse, ut suam ipse Theologiae summam concinnaret.

II. Hanc primo loco subjeio exantini partem controversiae, quam videtur Joannes de la Haye induxisse. Plurima Thomam mutatum esse ex ipsius Halensis Theologica Summa, contendis? Id vero quomodo probas? Quia eadem, inquis, Scripturae loca, eadem testimonia Patrum, eademque doctrinae fundamenta in utriusque, Halensis antiquioris, & junioris Aquinatis, reperiuntur Summa. Appositissimum est Natalis Alexandri responsum loco superius citato: „scilicet Scripturam Sacram, ac Patres Doctor Angelicus aequae non pervolverat ac Halensis? Aequae admiranda vi ingenii objectiones non praevidebat? Numquid optima ratio, communis res non est? Si quid ponderis est in his Patris de la Haye ratiunculis, nullus erit Theologus, qui ab altero non sit dictendus accepisse: cum nemo sit, qui aliquibus Scripturae Sacrae, & Patrum testimoniis non utatur, quibus in iisdem controversiis usus est alter. Nemo, qui momenta graviora ab Haereticis objectari solita, vel trita in Scholis argumenta non diluat: propria quisque eruditione, ac methodo eadem tractans, discutiens, ac edisserens. Vagum istum argumentandi modum, elumbem dicas, & nugacissimum. Vagam utique, quae proferri solent responsa, non ea vi & efficacia praedita fateor, quae positam difficultatem elidant. Seligat Lahajus articulum quempiam ex Theologica Summa Halensi, qui cum pari Summae Divi Thomae articulo collatus idem appareat quoad sensum; quoad substantiam, & aliquoties quoad verba, aut non valde dissimilia. Quod optamus, factum jam ab Adversario. Articulus secundum quaestionis 100. partis primae S. Thomae conferendum proponit cum Articulo tertio Membri primi Quaestionis 95. partis secundae Theologiae Summae ipsius Halensis: quos adeo verbis, ac sententiis putat similes, ut alter ex altero decerptus fuerit; junioris nempe Thomae articulus ex articulo senioris Alexandri.

Propositam utriusque loci collationem recusare non licet. Utor ergo Romana Operum S. Thomae editione anno 1570. confecta sol. Utor etiam Quadripartitae Alexandri de Hales Theologiae Summae editionibus, Norimbergensi 1481. & 1482. f. & Veneta 1575. & 1576. apud Franciscum Franciscum f. Apprime conveniunt ambe, solo Quaestionum numero excepto,

# ADMONITIO PRAEVIA.

v

cepto, qui in editione Norimbergensi major est, minor in Veneta, prelo ut puto errante.

Apud S. Thomam.

Apud Halensem.

*Utrum pueri in statu innocentiae nati fuissent in iustitia confirmati.*

*Sequitur inquirere, utrum (liberi) essent heredes paternae iustitiae, quantum ad iustitiam confirmatam.*

Quam dilucide, concinnisque verbis propositus ab Aquinate status questionis! Obscurum, & implexum quis inficiabitur positum ab Halensi titulum? Quatuor opponit argumenta S. Thomas: quatuor etiam leguntur in Halensiu, quæ facile resolvi in sex possunt. Argumentum primum, quod ex auctoritate Gregorii Magni trahit Aquinas, in Alexandro desideratur: quæ sequuntur, longe differunt stylo, verbis, argumentationis modo.

1. „ Videtur, quod pueri in statu  
„ innocentiae nati fuissent in iustitia  
„ confirmati. Dicit enim Gregorius  
„ 4. Moral. (cap. 36. alias 31.) su-  
„ per illud Job, *Somno meo requie-*  
„ *scerem: Si parentem primum nulla*  
„ *putredo peccati corrumpere, nequa-*  
„ *quam ex se filios gehennae genera-*  
„ *ret: sed hi, qui nunc per Redem-*  
„ *pctorem salvandi sunt, soli ab illo*  
„ *electi nascerentur.* Ergo nascerentur  
„ omnes in iustitia confirmati.

2. „ Præterea Anselmus dicit in  
„ Libro, *Cur Deus homo* (cap.  
„ 18.) quod si primi parentes sic  
„ vixissent, ut tentati non peccassent,  
„ ita confirmarentur cum omni pro-  
„ pagine sua, ut ultra peccare non  
„ possent. Ergo pueri nascerentur in  
„ iustitia confirmati.

3. „ Præterea bonum est potentius,  
„ quam malum. Sed propter pec-

Apud Halensem post quatuor, vel sex memoratas objectiones, responsio sequitur, quæ argumento 2. a Thoma posito consona est. „ Ad hoc dicendum secundum Anselmum, quod si stetit primi parentes, genuissent filios heredes paternæ iustitiæ, quantum ad iustitiam confirmatam: sed hæc confirmatio esset quantum ad iustitiam originalem. Unde Anselmus libro 1. *Cur Deus homo* c. xvii. *Quamvis nondum propeherentur ad illam æqualitatem Angelorum, ad quam perventuri erant homines, cum perfectus erat numerus de illis assumendus; in illa tamen iustitia, in qua erant, videtur quod si vixissent, ut tentati non peccassent, ita confirmarentur cum omni propagine sua, ut ultra peccare non possent &c.*“

Apud Halensem obiectio, quæ primo loco posita est, ita procedit:  
Quia

„ catur primi hominis consecuta  
 „ est necessitas peccandi in his qui  
 „ nascuntur ex eo: ergo si primus  
 „ homo in iustitia perstitisset, deri-  
 „ varetur ad posteros necessitas ob-  
 „ servandi iustitiam.

4. „ Præterea Angelus adhaerens  
 „ Deo, aliis, peccantibus, statim  
 „ est in iustitia confirmatus, ut ul-  
 „ terius peccare non posset: ergo  
 „ similiter & homo, si tentationi  
 „ resistisset, confirmatus fuisset. Sed  
 „ qualis ipse fuit, tales alios gene-  
 „ rasset: ergo & filii confirmati in  
 „ iustitia nascerentur.

„ Quia malum non est potentius in  
 „ malum, quam bonum in bonum.  
 „ Sed Adam peccando transmisit pos-  
 „ teris necessitatem peccandi, sal-  
 „ tem venialiter: ergo videtur, quod  
 „ stans sive proficiens transmisisset  
 „ illis iustitiam confirmatam.

Ob. 2. „ Item Angeli stantes, sta-  
 „ tim confirmati sunt. Si ergo me-  
 „ ritum Adæ non fuisset minus,  
 „ quam meritum Angeli, quod pa-  
 „ tet per hoc quod non erat tantæ  
 „ fortitudinis: videtur quod ipse,  
 „ si stetit, statim esset confirma-  
 „ tus. Sed tales filios generasset,  
 „ qualis statim fuisset: ergo &c.

Verba, stylus, ac sententiæ nitor longe differunt: ipsumque, quod est  
 objectionis momentum, non idem apud utrumque. Pro hac quæstionis  
 parte, quæ *iustitiam confirmatam* filiorum spectat, pergit Halensis depromere  
 argumenta ex aliis: Anselmi verbis, & ex Philosophi auctoritate,  
 ac rationum fundamentis: quæ non habet Aquinas. Affert hic vero in  
 Argumento prolusorio, vulgo *Sed contra*, Augustini sententiam, qua sibi  
 viam paret ad quæstionem dirimendam: eodemque utitur testimonio Ha-  
 lensis, quod ipse demum deserit.

„ Sed contra: quod Augustinus  
 „ dicit 14. de Civitate Dei (c. 10.)  
 „ Tunc felix universa esset humana  
 „ societas, (sensum habes non lit-  
 „ teram,) si nec illi, scilicet primi  
 „ parentes, malum in posteros traji-  
 „ cerent: nec quispiam ex stirpe eo-  
 „ rum iniquitatem committeret, qua  
 „ damnationem reciperet. Ex quo da-  
 „ tur intelligi, quod etiam si primi  
 „ homines non peccassent, aliqui ex  
 „ eorum stirpe potuissent iniquitatem  
 „ committere: non ergo nascerentur  
 „ in iustitia confirmati.

Apud Halensem: „ Contra Au-  
 „ gust. xiiii. de Civitate capit x.  
 „ Quam felices erant (primi homi-  
 „ nes) & nullis agitabantur pertur-  
 „ bationis animorum, (&) nullis cor-  
 „ porum ledebantur incommodis! Tam  
 „ felix universa societas esset huma-  
 „ na, si nec illi malum, quod etiam  
 „ in posteros trajicerent (trajecerunt):  
 „ nec quispiam ex (eorum) stirpe  
 „ iniquitatem committeret, qua dam-  
 „ nationem reciperet. Ex hoc verbo  
 „ Augustini videtur, ad hoc quod  
 „ posteri primorum parentum stetit-  
 „ sent in prima felicitate, necesse  
 „ fuisse quod nec parentes eorum,  
 „ nec illi peccarent. Ex quo vide-  
 „ tur, quod si parentes stetitissent,  
 „ quod adhuc posteri peccare po-  
 „ tuissent: ergo poterant esse alieni  
 „ a paterna iustitia, & ita non esse  
 „ heredes iustitiæ confirmatæ.

Tum quæstionem dirimit Doctor Angelicus: *Respondendo dicendum*, in-  
 quiens, quod non videtur possibile, quod pueri in statu innocentie nasceren-  
 tur in iustitia confirmati. Hanc ille, quam delegit sententiam, solidissimis  
 argumentorum momentis probat, ac evincit: nihilve eorum, quæ disse-  
 rit,

rit, sive sensum, sive substantiam, sive verba species, apud Halensem reperitur. Imo Franciscanus Doctor post allatas objectiones, *Responsionem* pro agente parte subicit: in qua Anselmi sententiam superius allatam profert, additque Boetium, & Augustinum Libro 14. de Civitate Dei Cap. 1. ipsiusque demum Augustini testimonium ex eodem de Civitate Libro Cap. 10. desumptum sic interpretatur: *ut felix esset societas humana, si primi parentes non trajicerent malum in posteros: quia tunc nec aliquis de posteritate iniquitatem committeret. Quod autem, inquit, subditur, ( quæ damnationem reciperet, ) nota est expressio: quia omnis iniquitas in statu illo damnationem induceret.* Sensum inducit nempe, præposterum, & ab Augustini mente longe distitum. Adversa argumenta quatuor solvit Sanderus Thomas, ut sententiæ negantis veritas confirmetur, & elucescat: eademque, scilicet secundum, tertium, & quartum, ita solvere nititur Halensis, ut in problemate tamen sistat. Sed ipsæ demum solutiones disferunt apud utrumque & verbis, & sensu, & substantia.

„ Ad 2. dicendum, quod Anselmus hoc non dicit asserendo, sed „ opinando: quod patet ex ipso modo loquendi, *Videtur quod si vixissent.* “

„ Ad 3. dicendum, quod ratio ista non est efficax, quamvis per eam „ Anselmus motus fuisse videatur, „ ut ex ejus verbis apparet. Non enim sic per peccatum primi hominis ejus posteritatem necessitatem peccandi incurrunt, ut ad justitiam redire non possint: quod est tantum in damnatis. Unde nec ita necessitates non peccandi transmississet ad posteros, quod omnino peccare non possent: quod est tantum in Beatis. “

„ Ad 4. dicendum, quod non est „ simile de homine, & Angelo. „ Nam homo habet liberum arbitrium vertibile & ante electionem, & post: non autem Angelus, sicut supra dictum est (Q. 64. art. 3.) cum de Angelis ageretur. “

Apud Halensem: „ Sunt autem „ quidam, non acquiescentes sententiæ Anselmi, dicentes: quod „ semper geniti fuissent filii in statu illo in possibilitate peccandi; „ quod videtur sentire Hugo de S. Victore. “

Apud Halensem: „ Dicendum, „ quod necessitatem peccandi dupliciter potest intelligi aliquis habere, aut quod necesse habet in peccato permanere. Primo quidem modo reperitur necessitas in statu naturæ humanæ post lapsum: sed secundo modo, in statu ruinæ Angelicæ. Si quis recto intellectu velit arguere, ex hoc non habebit; quod Adam si obedivisset, necessitatem habuisset permanendi in justitia, sicut habent Angeli, qui non possunt labi: sed quod statu illo manente, necesse esset, ipsum in aliquod opus bonum & laudabile exire. Et hoc utique verum est, quia sicut status naturæ corruptæ ponit defectus, & deordinationes; sic status ille requiret rectas, & ordinatas operationes, & cogitationes, numquam enim homo in statu innocentie oriosus fuisset. “

Apud Halensem: „ Ad illud, „ quod objicitur de Angelis &c. dicendum, quod non est simile: & hoc diffusius habet explicari, cum agitur de irremediabilitate peccari Angelici. Sed nunc sufficit tantum dixisse, quod ratione „ no-

„ nobilitatis, & simplicitatis, & in-  
 „ corporeitatis, ac Deiformitatis na-  
 „ turæ Angelicæ, quæ nullum ha-  
 „ bebat retardans, & ratione status  
 „ merendi sunt præfixi, sicut ajunt  
 „ Damascenus, & Augustinus: Angelus  
 „ statim in primo conflictu fuit  
 „ confirmatus in bono, vel obstina-  
 „ tus in malo. Homo vero, quia  
 „ erat alterius conditionis, sicut per  
 „ demeritum non fuit in malo obstina-  
 „ tus, secundum quod patet, nec  
 „ in se, nec in posteris: sic non fuit  
 „ in bono confirmatus. Ideo non o-  
 „ portuit, ipsum iustitiam confirma-  
 „ tam in posteros transfudisse.

En utriusque Articuli diligentem collationem, quam tibi fisco, Lector humanissime. Articulum Thomæ ex Articulo Alexandri decerptum contendit Johannes de la Haye, *quoad sensum, quoad substantiam, & aliquantisper quoad verba, aut non valde dissimilia*. Nihil aliud colligi posse ajo ego, nisi eandem ab utroque, Halensi, & Aquinate, versari quaestionem: quod alii fecere ejus ævi Theologi. Non eadem occurrunt verba, nec *aliquantisper, nec non valde dissimilia*. Primum adversum argumentum cum responsione desideratur integrum in Halensi. Desunt etiam ejus, quæ *Corpus* vocari solet, *verba, sensus, substantia*. Tres alias objectiones fateor, si rem ipsam spectemus, easdem legi in utroque: at non idem apparet in utroque argumentationis momentum, neque solus ante Thomam easdem adhibuit Alexander. Suas uterque solutiones assert: quæ invicem collatæ longe differunt & verbis, & sensu, & substantia, Styli denique nitor ubique fulget in Articulo S. Thomæ: obscura sunt, & implexa omnia in Articulo Alexandri. Augustino duce, quaestionem solvit ac dirimit ille: Augustinum deserit iste, ac problematice differit. Animi candorem postulo & oculos, ut quisque judicet, Articulum Aquinatis dici non posse ex Halensis Articulo decerptum, expilatumque.

III. Judicium opponunt, quod inquit a Joanne Gersonio latum, Doctore Theologo, & Cancellario Parisiensi, iudice æquissimo. Epistola ab eo missa Lugdunum cuidam Fratri Minori anno 1420. In laudem Doctrinæ S. Bonaventuræ, prout Tomo I. editionis Antverpenfis, ut legitur, anno MDCCVI. curatæ f. col. 117. In qua hæc habentur: „ De qua „ (*doctrina Fratris Alexandri de Hales*) fertur respondisse *Sandus Thomæ*, dum inquireretur ab eo, quis esset optimus modus studendi Theologiæ: respondit, exercere se in uno Doctore præcipue. Dum ultra peteretur, quis esset talis Doctor: *Alexander de Ales*, inquit, Testor, „ me ita legisse pridem in Tractatu quodam de *Visione beata* contra Joannem XXII. Testantur scripta ejusdem Sancti Thomæ, maxime *Secundæ* „ *Secundæ*, quam intimum sibi fecerat & familiarem illum, quem laudabat, Doctorem Alexandrum. „ Gersonii locum, quem opponis, lego, perlego, pondero: idque unum extundi posse consentio, Halensis opera habuisse in pretio Aquinatem: seque ipsum ad Summæ Theologicæ opus elucubrandum comparantem, sicuti plurimos aliorum libros, ita Quadrupartitam Alexandri Summam evoluisse: reiectisque subtilitatibus minime Theologo dignis, doctrinam solidam, quam in Halensi deprehendere sibi videbatur Gersonius, ubique in sua Summa, maximeque in Parte *Secunda*

Secunda

*Secundae* partis, ut idem notat Auctor, consecratum esse. Eo namque loci Parisiensis Cancellarii scopus est, ut Lugdunensem Minoritam ab vehemementiore in subtilem Scotum studio retraheret, ipsumque induceret ad S. Bonaventuræ & Alexandri Halensis lectionem, quos eruditiores gravioresque Theologos existimabat. Ipsam epistolam consule.

Si quid amplius a Gersonio scriptum, imputatumque Aquinati plagium velint, id oppido est, quod a vero longissime aberrat: quod neque historiæ ab eodem Gersonio allatæ fide, neque ipsius Parisiensis Doctoris auctoritate satis fulciri potest. Verba illa, *De quo (Halensi) fertur respondisse S. Thomas*, historiæ veritatem multum elevant: utpote quæ rem vulgi rumore iactatam, non certam exploratamque, plerumque significant. Quis deinde fuerit Auctor ille Tractatus cuiusdam *De Visione Beata*, qui prædictam historiam narrare dicitur? Ignota ejus professio, ætas ignota, ac ignota demum occasio ob quam in Theologico Tractatu rem hanc inferuerit, fidem detrahare narrationi valent. Gesta præterea, dictaque Thomæ, diligentius perquisita, collegerunt, scriptoque mandata tradidere posteris Prolomæus de Luca, Guillelmus de Tocco, Nicolaus Trivetus, Bernardus Guidonis, plures alii: ejusdemque historiæ vola nulla apud eos, nullum vestigium.

Quod ipse Thomas *de optimo studendi modo* percontatus, responsum consiliumque dedisse fertur, *exercere se in uno Doctore præcipue*, refelli validissime potest ipsius Thomæ exemplo: quem peritissimum, maximeque versatum in multiplici librorum lectione, quotquot illi præstare esse poterant, ejus Opera perspicue evincunt. De lectionis copia in Aquinate, & inextausta industria, quam etiam commendat Jacobus Bruckerus, licet Sancto Doctori parum amicus, in Historia critica Philosophiæ, in alia mihi diligentius agendum Dissertatione.

Quid est vero, quod adhuc hæreamus? Si quid ab Alexandro accepit furripuitque Thomas, loca expilata digito monstrantur: impositusque liti, & controversiæ finis erit. Articulum tertium Membri primi Quæstionis 95. secundæ partis proponit Lahajus: ex quo suum Aquinas consecravit Articulum secundum Quæstionis 100. primæ partis. Jam utrumque numero superiore e regione Articulum ob oculos posuimus, ut diligens & accurata institui collatio posset. Quid inde vero consecutum? Oculos & animi candorem postulavimus, iterumque postulamus, ut quisque propria inspectione, proprioque experimento edoctus, ferat sententiam, nihil inter utrumque simile reperiri aut verbis, aut sensu, aut substantia. Haud me latet, alios quosdam ab eodem Lahajo articulos proponi conferendos: „at si gustum Lector habere voluerit, (fidens ac tutus loquor cum „Echardo,) utrumque & Thomam, & Halensem conferat: experieturque, quod non solum in aliis, sed & in his, quæ plane eadem asserere Lahajus audeat, ne lingulam quidem S. Thomæ, verbis totidem apud alios terum legi.“

## C A P U T I L

*Perperam, ac temere Summa quedam Virtutum, Halensi tributa, obtruditur, quam Thomas expilaverit. Ab eodem Halensi Commentarii in Sententiarum libros, abjudicantur. Itemque Summa, quæ Deuistoria vitiorum inscribitur.*

I. Discrimen fuerit, illudque latissimum, Theologicam Sancti Thomæ Summam inter, ac Quadripartitam Summam Alexandri de Hales, atque inter utriusque Articulos, & Quæstiones: nondum tamen integer

S. Tb. Oper. Tom. XXIII.

b

pla-

plagii, ac purus evincitur Aquinas. *Intelligit quippe Gerson*, ( inquit VVadingus ad An. 1245. num. 26. ) *Summam virtutum, scriptam ab Alensi, familiarem potissimum fuisse Sancto Thomae: ut quam verbotenus plene Secunde Secunde hujus insertam exceperit: illam nempe Summam Virtutum, quae ab Halensi elucubrata, veluti Supplementum Tertiae Parisi, Quadrupartitae Summae Theologicae, ipsius Auctoris fide, dicitur ( ut ipse addit VVadingus num. 27. ) juxta ea, quae promittit de Virtutibus eadem Tertia Parte, Quaestione 26. 61. & 68. & nullibi nisi in Summa Virtutum exhibentur. Superis gratias. Ultra satentem habemus VVadingum, nihil ab Aquinato nostro acceptum de Summa Quadrupartita Halensi. Aliud Opus ab eodem dicitur confectum Halensi, Summa virtutum inscriptum, quod verbotenus plene Secunde Secunde inseruis Thomas: quodve intellexerit loco citato Gersonius.*

Ad Cancellarii Parisiensis mentem quod attinet, non aliud ipsi obversatum fuisse Halensis opus, primum est intelligere, nisi quod vulgatissimum omniumque manibus criticissimum erat, *Theologicam nempe quadrupartitam Summam*. Favet Gersonianae Epistolae scopus, ut *Doctores isti duo, Alensis & Bonaventura, qui videbantur quasi sepulti cum illis, quorum non est memoria amplius, excitarentur in Scholis apud Fratres Minores: quo plane evincitur, Gersonii consilium fuisse, ut Bonaventurae Commentarios, aut Halensis Theologicum Quadrupartitum opus, in quibus gravem & solidam traditam doctrinam, commendabat, ipsi Fratres Minores amplecterentur. Non acquiescit VVadingus: intellectionemque a Gersonio putat, Summam quamdam Virtutum, quam ipse Halensis elucubraverit: indeque colligi posse arbitratur, hocce illud opus esse, quod spoliaverit Aquinas, suamque in Summam, maximeque Secundam Secundae, plene & verbotenus corraferit. Age vero: paucis finiri lis tota potest. In medium tandem aliquando haec Summa proferatur. Germanum Halensis foetum esse, probetur: diligens ejusdem instituat collatio cum Summa Divi Thomae, maximeque cum Secunda Secundae: proprioque experimento quisque deprehendat, num Summam illam Virtutum Operi suo Theologico verbotenus plene inseruerit Aquinas? Quid vero? Neque hactenus tam necessaria ab ullo inita est collatio: neque ipsa Virtutum Summa in medium prolata, ut eadem institui collatio queat.*

Donec utrumque praestetur, neque ipsa peragatur, liceat nobis aut scititiam credere praedictam Summam, aut foetum esse ejusdem Recentioris, si quidem usquam exstet. Hanc se vidisse nunquam, *Jubone fatetur VVadingus: nec vidit eam Joannes de la Haye. Petrus ipse de Alva, qui se Bibliothecas Europae omnes lustrasse jactat, nullibi suas in manus tam celebre venisse opus memorat. Exstat, inquit VVadingus, Tolosae MS. in Bibliotheca Fuxensi. „ Quis non expectarat (reponit Echardus, & ) dicturum passim in Bibliothecis Ordinis Minorum fervari? Aut saltem „ celebrem aliquam Europae Bibliothecarum, Vaticanam, Venetas, Patavinas, Florentinas, Regiam, & alias Parisienses, Anglicanas, Belgicas, Germanicas laudaturum? Sed (heu infelliciter!) nec in illis, nec „ in ipsa Fuxensi, quae tota in Colbertinam transiit, invenitur: nam nec „ in ea a se visam quis, aut ex ea ab aliquo subreptam meminit, aut „ conquestus est.*

*Esse desunt Codices Mss. (pergit suam VVadingus causam orare,) ea ipsis proditi Parisi 1509. & alibi. Viderit ergo eam Doctissimus Minorum Annalista, legerit, contuleritque cum Theologica Sancti Thomae Summa? Minime. Quomodo ergo & locum typorum, & annum indicet? Animadvertite, Lector humanissime, antiquis omnibus librorum Nomenclatoribus; Henrico Gandavensi, Trithemio, Gesnero, Simlero, Eysen-*

gre-



grenio, & omnium vetustissimo Nicolao Triveto in Chronico, hoc ignotum fuisse, quod obtruditur, Halensis opus. 2. Primum videri Possevinum, qui & Opus recenset, & anni 1509. editionem notat, sine locotyporum. 3. VVadingum esse, qui primus *Parifense* prelum addidit: typographumque demum legi *Joannem Parvi* in Gallica de origine Typographiae Historia Joannis de la Caille. Fama scilicet de Opere, deque Operis editione crevit eundo. 4. Possevinum excipientes, *Virtutum Summam* Halensi tribuisse, Bellarminum, Pitseum, & Miræum, neque Codicibus Mss. indicatis, neque editionibus. 5. VVadingi demum ipsissima verba a Labbeo excepta, & a Guillelmo Cave: ut tota demum ad unum Possevinum fides redigatur.

Hinc aut fictitium illud opus esse jam nemo non intelligit, aut falso tributum Alexandro Halensi, si quidem exstet. Dupini iudicium accipe in ejusdem Halensis elogio: *Je ne crois pas même qu'on lui doive attribuer la Somme des Vertus, imprimée à Paris l'an 1509.* Negotium facessit nullum Joannis de la Caille fides, qui sua in Typographiae Historia quamplurimos libros, non omnes a se visos, ipso teste, sed ex variis Bibliopolarum catalogis, qui ad nundinas mitti solent, descriptos recenset. Suppetias validiores non fert Possevinus, a quo suo in Apparatu lapsus plurimos pro humana infirmitate admissos notarunt Viri doctissimi. Commentarium in *Psalmos* adjudicavit primum Halensi, abjudicavitque doctior factus, ac germanum Hugonis de Sancto Charo sietum agnovit.

II. Fuerunt etiam, qui præter *Summam quadripartitam* tribuerunt Halensi Commentarium in *Sententiarum libros*. Sed utrumque unum esse, idemque opus, invide probat Natalis Alexander, collatione facta cum duobus Bibliothecæ Parisiensis Victorinæ Codicibus. Codex alter ipsam Halensis *Quadripartitam Summam* exhibet, ac præterea textum Magistri Sententiarum: in ejusque calce hæc habentur: *Primus liber Sententiarum, sive Summæ Theologiæ Domini Alexandri de Hales*; itemque *Tertius liber Sententiarum, seu Summæ Theologiæ, quem composuit Magister Alexander de Hales*. His Victorinis Codicibus addit *Sorbonicos*, aliosque Jacobus Echardus. Hinc compertum esse adnotat Natalis Alexander: „Commentarios in quatuor libros *Sententiarum*, „Lugduni sub nomine *Alexandri Aletensis* excusos anno 1515. ut refert Possevinus in Apparatu, alterius Auctoris sortum esse. “ Hanc se diligenter lustrasse & expendisse editionem, testatur Casimirus Oudinus: docetque, nihil aliud in ea præstari, nisi *Summam* ipsissimam *Quadripartitam* Halensis.

III. Fuit demum, qui germanum *Stetium* laudatæ Alexandri de Hales existimavit *Summam destructoriam vitiorum*, quæ Venetiis edita prostat anno 1582. 4. & antea Parisiis per Petrum Levet expensis Johannis Cohelens, præfati Levet, & Michaelis Morin, tertio idus Aprilis 1497. Ex hujus editionis vetustæ calce adnotationem profert Oudinus, quæ sic habet: „Insignis notabilisque compilatio, haud modicum cuique statui conserens, omne genus vitiorum suis cum speciebus clarissime evidenterque „eradicans, ob id non immerito *Destructoriam* nuncupata, a quodam *Alexandro nationis Anglicæ*, & ejusdæm Fabri lignarii filio, maximam ad „Ecclesiæ utilitatem anno Domini 1439. collecta. “ Animadvertite temporis notam, quæ præceps elidit eorum judicium, qui opus istud Halensi adjudicarunt, aut adjudicandum conjecere.

Quid? quod in eadem *Summa* ipse non raro citatur *S. Thomas*, & *Lysranus*, *Jacobus de Voragine*, *Joannes de Genua*, *Robertus Holkot*, *Ricardus Radulphi Armacanus*, quorum aliqui medietatem seculi quarte decime transgressi sunt. Addo verba, quæ Partis primæ Capite 1. de Peccato in communi habentur. *Peccatum isto modo sumptum dicitur nihil, ut dicit S. Thomas*

mas de Veritate Theologiae Libro 3. Capite 2. quod est nempe Opusculum falso tributum Aquinatio. Eadem Parte 1. Capite 5. locus adducitur ex ipsius Thomae Commentario in Sententiarum libros, & alibi ex ipsa Theologiae Summa. Mirum ergo non esset, aut fingi potuisse Summam quamdam Virtutum, quae Halensi tribueretur: aut ejus sortum existimari simile quodpiam opus, quod alius Auctor confecerit.

## CAPUT III.

*Virtutum Summam nusquam Halensis pollicitus est. Summae Theologicae Quadrupartitae examen instituitur. Eadem manca est, & imperfecta: colligiturque, Summam Virtutum non elucubrasse Halensem.*

I. **A**T Summam istam Virtutum elucubrasse Alexandrum de Hales, instar Supplementi ad Tertiam Summae Quadrupartitae Partem constat, (reponit VVadingus) juxta ea quae promissi de Virtutibus eodem Tertiae Parte Q. 26. Q. 61. & 68. Tria haec sub oculos habeo loca, quae indicantur. Factas ab Halensi pollicitationes lego, & expendo: promissam ab eo Virtutum Summam, ab ipsa Quadrupartita Summa diversam, instar Supplementi ad Tertiam Partem, pernego: ac ajo demum, promissa sua praestari ab Auctore, aliqua saltem, sin minus omnia, in eadem Summa Quadrupartita.

Verba, quae locis citatis habentur, in antecessum profero. Quaestiones 26. prologus est: Summa Theologicae disciplinae in duobus consistit, in „fide, & moribus. Expeditis inquisitionibus pertinentibus ad fidem, ut „de Redemptore; procedendum est ad inquisitiones pertinentes ad mo- „res. Ad informationem autem morum concurrunt necessario leges & praec- „cepta, ut ostendat debitum boni faciendi, & mali vitandi: gratia „& virtutes &c. ut praestantia facultatem faciendi, & vitandi. Prima in- „gitur pars inquisitionis moralis erit de legibus & praecceptis: secunda de „gratia, & virtutibus: tertia de donis, fructibus, & beatitudinibus. „Argumenta animadverte, de quibus acturum sese pollicetur Auctor. Fidem liberare suam incipit ipsa in Quaestione 26. quae tricesima sexta errante prelo numeratur, de Lege aeterna. Promissa pergit praestare Q. 27. de lege naturali: Q. 28. de lege Moysi generaliter: Q. 29. de praecceptis Decalogi in generali: Q. 30. de adoratione: Q. 31. de secundo praeccepto Decalogi: Q. 32. de tertio praeccepto Decalogi: Q. 33. de quarto praeccepto: Q. 34. de quinto praeccepto: Q. 35. de sexto praeccepto: Q. 36. de septimo praeccepto: Q. 37. de octavo praeccepto: Q. 38. de ultimis duobus praecceptis: Q. 39. de explanatione Decalogi. Q. 40. de legibus judicialibus, quantum ad personam judicis: Q. 41. de persona rei: Q. 42. de persona accusatoris: Q. 43. de testibus: Q. 44. de advocatis: Q. 45. de processu judiciali: Q. 46. de legibus permissionis: Q. 47. de legibus punitionis. Q. 48. de praecceptis judicialibus circa personas: Q. 49. de praecceptis judicialibus circa possessiones: Q. 50. de praecceptis judicialibus circa actiones: Q. 51. de decimis: Q. 52. de primitiis: Q. 53. de oblationibus: Q. 54. de caerimoniis in generali: Q. 55. de ratione caerimonialium &c. Q. 56. de numero & differentia caerimonialium: Q. 57. de observantia caerimoniarum circa immunditias: Q. 58. de viis Sacrificiorum legalium: Q. 59. de cessatione caerimonialium. Datz ab Halensi fidei partem plenissime expletam jam vides.

Quaestio sequitur 60. de lege & praecceptis Evangelii in generali. Prologum profero: „Consequens est, invocata Spiritus Sancti gratia, inquire- „re de lege & praecceptis Evangelii, cujus inquisitionis erit talis modus: „ut primo quatuor in generali de latrone & conditionibus legis Evange- „lii: deinde vero in speciali de praecceptis, & consiliis Evangelii. „In hac ipsa

Ipsa Quæstione 60. *de lege & præceptis Evangelii in generali* disferitur. Sexagesima prima sequitur Quæstio, quam secundo loco citat VVadingus, inscripta, *de lege Evangelii in speciali, ordinante primo motum irascibilem*. Quænam sint ab Halenti facta promissa, in Prologo continentur. Ejus accipe verba: „Expletis inquisitionibus *de lege Evangelii in generali*, „inquirendum est in speciali de sanctionibus legis Evangelii. Notandum „igitur, quod sicut in lege Moysi sunt leges circa opera necessitatis, quæ „sunt in præcepto, & circa opera supererogationis, quæ sunt in voto: „sic lex Evangelii continet duas partes, *præcepta* in operibus necessita- „tis, & *consilia* in operibus supererogationis. Primo igitur inquirendum e- „rit *de præceptis Evangelicis*, secundo *de consiliis*. Item sicut præcepta „legis Moysis in tres differentias distinguuntur, in præcepta moralia, „judicialia, & figuralia; ita præcepta Evangelii in tribus partibus con- „tinentur. Prima pars erat Moralium, secunda Judicialium, tertia Sa- „cramentalium. Ideo isto ordine erit *de præceptis Evangelicis* inquiren- „dum: primo *de præceptis moralibus*, secundo *de judicialibus*, tertio *de sacramentalibus*. Item præcepta moralia Evangelii dupliciter sunt: nam „quædam sunt *generalia* respectu omnium, ut ea quæ continentur in Ser- „mone Domini in Monte Matth. v. vi. & vii & Lucæ v. & vi. Quæ- „dam vero sunt *specialia* personarum prædientium, ut præcepta quæ dā- „tur Apostolis Matth. x. & Lucæ ix. & x. Primo igitur erit inquiren- „dum de generalibus, secundo de specialibus seu particularibus. Item „circa generalia præcepta procedet inquisitio secundum ordinem Evange- „licæ traditionis: in qua primo disponuntur præcepta *ad determinationem* „*faciendorum*, & *vitandorum*; consequenter *ad ordinandam intentionem* „*faciendorum*, & *vitandorum*. “ Hoc loco suprema duo capita, quæ „ad generalia legis Evangelicæ moralia præcepta spectant, pluribus quas in- „dicat, pollicetur se quæstionibus illustraturum Halensis: promissaque ex- „ponere argumenta incipit, in ipsa Quæstione 61. in qua agitur *de lege E-* „*vangeliæ, in speciali ordinante primo motum irascibilem*. Ad sequentes proce- „dit Auctor Quæstiones, 62. *de præcepto Evangelico ordinante motum concupi-* „*scibilem*. 63. *de præceptis Evangelii ordinantibus motum rationalem*, & *primo* „*de prohibitione jurationis illicitæ*. 64. *de præceptis patientiæ respectu tri-* „*plicis injuriæ*. 65. *de præcepto beneficentiæ, seu dationis*. 66. *de præcepto* „*matutini*. 67. *de præcepto Caritatis*.

Ad quæstionem 68. devenimus, quam tertio loco indicat VVadingus, æsi pollicetur Auctor in ea, se *Virtutum Summam* elucubraturum, tam- „quam *Supplementum* ad hanc Summæ suæ *Quadrupartitæ* tertiam Partem. „Titulus est, *de præceptis ordinantibus intentionem*. Hanc nimirum promi- „serat Halensis quæstionem in Prologo Quæstionis 61. *Item circa generalia* „*præcepta legis Evangelicæ*, inquires, procedet inquisitio secundum ordi- „nem Evangelicæ traditionis: in qua primo disponuntur præcepta *ad* „*determinationem* faciendorum & vitandorum, consequenter *ad ordinan-* „*dum intentionem* faciendorum & vitandorum: Matth. v. *Attendite, ne* „*justitiam vestram faciatis coram hominibus*. “ Ejusdem quæstionis 68. pro- „logum describo: „*Attendite, ne justitiam vestram faciatis coram homini-* „*bus, ut videamini ab eis*. Matth. v. Hic disponuntur præcepta *ad ordi-* „*nandam intentionem* faciendorum, & vitandorum. Ordinatur autem „tripliciter, quantum *ad rectitudinem*, quantum *ad simplicitatem*, & „quantum *ad discretionem* &c. “ Quæ sunt ejusdem quæstionis tria *Mem-* „*bra*, in alios Articulos tributa. In calce Articuli II. Membri III. hæc „habentur: & *hoc sufficit de præceptis*. Quæstio sequitur 69. *de Gratia ab-* „*solute considerata*. Hinc palam sit, compertumque, promissa varia, quæ „in Prologis quæstionum habentur, in hoc eodem Opere partim expleta „esse,

esse, non omnia desiderantur quippe *Quæstiones de præceptis Evangelii specialibus personarum præsentium, de judicialibus, deque consiliis*, de quibus peracturum se, pollicitus fuerat Halensis in Prologo quæstionis 60. & 61.

Sed hæc ejus promissa lege, & expende. Summæ alicujus *de Virtutibus*, quam instar *Supplementi* ad hanc tertiam partem pollicitus Halensis fuerit, nulla mentio occurrit in locis a Vvadingo indicatis, nullum vel levissimum vestigium. Varia in allatis Prologis habentur ejus promissa: promissæque illæ Quæstiones partim pertractantur ab Auctore, partim prætermisæ sunt, utpote aut morte prævento, aut aliis implicito occupationibus.

II. Neque solum indicatæ, sed aliæ plures in hoc Halensis opere laqueæ patent: ut mirum fuisset, doctum prudentemque Auctorem, prætermisiss illis, tempus in alio conficiendo Opere instar *Supplementi*, infumere voluisse. Verisimile fuerit-ne, Summæ suæ *Quadrupartitæ Supplementum* scripsisse Auctorem; qui potius ut idem opus continuaret & perficeret, ratio postulabat?

Quod ajo, diligenti demonstrandum est ejusdem *Quadrupartitæ Summæ* examine. De ipsa tertia Parte nondum subduco manum. Quæstionis 69. prologum accipe: „ Post tractatum de legibus & præceptis, quæ ad cognitionem cavendorum feruntur, & faciendorum; aggredientes inquisitionem de gratia & virtutibus, quæ conferunt ad eorumdem executionem, adiutorium divinæ gratiæ imploramus a Deo Patre & Domino Jesu Christo. “ Hanc *de gratia & virtutibus* pertractationem pollicetur Halensis in Prologo quæstionis sextæ supra vicesimam. Pergit ille in Prologo quæstionis 69. „ Modus autem inquisitionis erit, ut imprimis *separatim de gratia* disputantes, ad *virtutes* secundum Theologicam & veram acceptionem, *dona, fructus, beatitudines* ordine congruo procedamus. “ Acturum se *de donis* etiam, & *fructibus*, & *beatitudinibus* in citata Quæstione 26. promiserat.

Datam fidem liberat instituta Quæstione 69. *de gratia absolute considerata*. Q. 70. *de effectibus gratiæ*. Q. 71. *de cognitione gratiæ*. Quæstionis 72. prologus est: „ Inquisito *de gratia absolute*, inquirendum est de *gratia in comparatione*. Sciendum igitur, quod est gratia perficiens, & gratia reficiens: gratia sanitatis, & gratia curationis. Item gratia perficiens, & sanitatis spiritualis creat *virtutes, dona, fructus, & beatitudines*: gratia vero reficiens, seu curationis ægritudinis spiritualis, dat vim *Sacramentis evangelicis, quæ sunt medicinæ & remedia animarum*. De *Sacramentis* vero in parte alia (scilicet Quarta Summæ *Quadrupartitæ*) agendum est: *reliqua* vero præsentis sunt negotii. “ Itaque in ipsa Quæstione 72. *de gratia* differitur in *comparatione* ad virtutes, ad dona, ad fructus, ad beatitudines: Q. 73. *de gratia datis* data generatim: Q. 74. 75. 76. *de gratia gratis data homini propter se*, scilicet *de fide informi, de spe informi, de timore servili*: Q. 77. *de gratia gratis data ad honorem Dei, & utilitatem proximi*.

Hactenus *de gratia separatim* quæstiones agitavit Auctor, ut ipse in Prologo quæstionis 69. pollicitus fuerat. Tum se pertractaturum pollicetur ibidem *de virtutibus secundum Theologicam & veram acceptionem, donis, fructibus, & beatitudinibus*. At in opere Quæstio sequitur 78. *de Fide formata*: colligiturque ex Prologo, qui prægitur, desiderari Quæstionem *de virtutibus in genere*. Prologi verba sunt: „ Post tractatum *de virtutibus in genere*, inquirendum est de *speciebus virtutum* secundum præsignatam differentiam, (scilicet secundum Theologicam & veram acceptionem.) “ Lacunam patentem, & hiatus habes. Sequitur Pro-

logus, quo promissæ ab Auctore quæstiones *de speciebus virtutum* continentur: „ Et primo agetur de Virtutibus Theologicis, quæ sunt virtutes „ ad finem, ut *fides, spes, caritas* &c.: consequenter vero de *virtutibus „ cardinalibus*, quæ sunt de his quæ sunt ad finem, ut *prudencia, iustitia, fortitudo, temperantia*. Primo ergo quæretur *de fide*, secundo de *spe*, tertio de *caritate* &c.“ Agit Auctor dicta Quæstione 78. *de fide formata secundum rem*, & definitionem: Q. 79. *de objecto fidei*: Q. 80. *de subiecto fidei*: Q. 81. *de passionibus consequentibus fidem*: Q. 82. *de articulis fidei, & Symbolis*. Hæc hujusce Tertiæ Partis postrema quæstio est: unde quamplures alix, ab Halensi promissæ, desiderantur Quæstiones de *Spe, de Caritate, de virtutibus cardinalibus, de donis, de fructibus de beatitudinibus*.

Otiùm ac tempus habuerit idem Halensis, ut in studia incumberet, atque conscribendis quæstionibus operam daret: cur ergo patentes in sua *Quadrupartita Summa* hic & illic lacunas non expleverit, sed opus diversum instar *Supplementi* aggressus fuerit? Animadvertit in ea Prologi in Quæstionem 78. verba: *Post tractatum de Virtutibus in genere, inquirendum est de speciebus virtutum* &c. Nimirum consilium Auctoris erat, ut expeditis quæstionibus de gratia sanctificante, deque *gratia gratis data*; a Quæstione 69. ad Quæstionem inclusive septimam & septuagesimam; ad alias Quæstiones procederet *de virtutibus in genere* primum, deinde *de speciebus virtutum*. Tractatum *de virtutibus in genere* non scripsit ille: hinc factum, ut in Quæst. 78. in qua de eisdem *virtutibus in genere* agendum fuerat, inquisitio *de Fide formata* institueretur, quæ prima est *virtutum species*. Sed ea rursus animadvertit verba, a quibus exordiri *Summam Virtutum* adnotat Vvadingus: nempe, *Habito ergo de gratia gratum faciente, & gratis data sermone, consequenter dicendum est de Virtute*. Jam pronum erit conjicere, cuiusdam fortasse, qui prætermisam ab Halensi quæstionem *de Virtute in genere* observabat, incidisse in mentem, ut eo scripto Prologo modum indicaret, lacunas *Quadrupartite Summæ* explendi, quin illud tamen supplementum scriptum editumque umquam fuerit. Illud utique haud scripsit, aut scribere cogitavit Alexander de Hales.

Ad alias *Quadrupartite Summæ* partes, *Primam, Secundam, & Quartam* progredior, ut inito examine innotescat, num eas perfectas completasque elucubraverit Alexander de Hales, an imperfectas & abruptas lacunis reliquerit? Quo casu quærendum foret, an deficientes quæstiones in illa *Virtutum*, quæ obtruditur *Summa*, supplerit omnes Halensis, an aliquas? Primam Partem examine versò, eamque integram deprehendo. Agit ipsa de Deo uno, ejusque attributis, deque Sanctissima Trinitate: absolviturque in editione Norimbergensi 1481. 1482. s. qua utor, quæstionibus quatuor supra septuaginta.

Alterius partis Prologum profero: „ Completis Tractatibus de his, quæ „ pertinent ad *speculationem Dei*, qui est factor omnis creaturæ; sequitur „ Tractatus de his, quæ pertinent ad *considerationem creaturæ*. Et primo „ de his, quæ pertinent ad ipsam creaturam, in *quantum est creatura*: „ deinde de his, quæ pertinent ad *lapsum*, sive *deteriorationem ejusdem*: „ tertio sequitur Tractatus *de reparatione*.“ Duo priora, quæ proferuntur amplissima argumenta, in hac Secunda Parte institutis de more quæstionibus illustrantur.

Quæstiones porro numerantur novem supra nonaginta, quibus agit Auctor de creatura, in *quantum est creatura*. In centesima, quæ sequitur, incipit agere *de lapsu*, sive *deterioratione creaturæ*. Prologus est: „ Adjuvante gratia Jesu Christi, post considerationem eorum, quæ

„ per-

„pertinent ad creaturam, inquantum est creatura; procedendum est ad  
 „considerationem eorum, quae pertinent ad lapsum, sive ad deterioratio-  
 „nem ejusdem. Et quia deteriorativum creaturae est malum & peccatum,  
 „querendum est de malo & peccato &c. “ Malum ergo, peccatumque ge-  
 „neratim acceptum, tum singulas peccatorum species, ac vicia quaeque,  
 „confusito *Questionum*, & *Membrorum*, & *Articulorum* ordine servato, ex-  
 „ponit ac declarat. Postrema numeratur *Quaestio centesima octogesima nona*:  
 „ejusque ex Prologo compertum sit, mancam esse, & imperfectam hanc  
 „alteram *Quadrupartitae Summae* partem. Laudati prologi verba sunt: „Di-  
 „ctum est supra de criminibus, quae committuntur in Deum: consequen-  
 „ter dicendum est de his, quae committuntur in proximum. In quibusdam  
 „autem laeditur proximus in mente, ut scandalum: in quibusdam laeditur  
 „in corpore, sicut est homicidium, & quae sunt illius generis sicut, sunt  
 „duellum, & tirocinium. Aliquando vero laeditur in possessione, sicut est  
 „in rapina, & usura, & in fraudulento contractu, & furto. Primo autem  
 „dicendum est de scandalo. “ Quo de vitio, peccatoque in ipsa discri-  
 „tur *centesima octogesima nona* quaestione: aliamque desiderantur Quaestiones  
 „omnes, in quibus agendum fuerat de homicidio, duello, tirocinio, deque  
 „rapina, usura, fraudulento contractu, & furto.

Tertiam partem jam accurato versavimus examine, pluresque in ea  
 deprehendimus lacunas. Addendum est, prolixiorum primo loco Prolo-  
 gum occurrere: tum Quaestionem primam proponi cum Prologo brevi, in  
 quo ipsa Quaestio in *Membra*, & haec in *Articulos* dividuntur. Prologus  
 hujusmodi prolixior prostat nullus in prima parte, nec in altera. Utra-  
 que initium ab quaestione prima ducit, cui brevis alter praefigitur Prolo-  
 gus cum *Membrorum*, & *Articulorum* partitione. Hic non abs re fuerit,  
 si conjectemus, & hunc esse Theologicæ hujusce Summae quempiam dese-  
 ctum. Prolixiorum ipsum Prologum describo: „... Inquisitio igitur catho-  
 „lica de his, quae pertinent ad fidem, quadrupartita est. Prima pars  
 „pertinet ad cognitionem *Substantiae divinae Trinitatis*, & *unitatis*: se-  
 „cunda ad opera divinae conditionis: tertia ad personam Salvatoris in na-  
 „tura divinitatis, & natura humanitatis: quarta vero pertinet ad Sa-  
 „cramenta salutis, & opera futurae glorificationis. Pertractatis igitur dua-  
 „bus primis partibus, pertinentibus ad fidem conditoris; nunc acceden-  
 „dum est ad inquisitionem eorum, quae pertinent ad fidem Salvatoris. Et  
 „primo circa personam filii Dei, qui est caput nostrae salutis per assump-  
 „tionem nostrae humanitatis: deinde vero circa *Sacramenta nostrae salu-  
 „tis*, & opera glorificationis. “ ~~Ad quae nunc igitur tua gratia, hoc ordine~~  
 „prosequemur: primo de Incarnatione, & assumptione: secundo de concep-  
 „tione, & nativitate: tertio de gratia, scientia, & potestate ejus: quarto  
 „de merito, & voluntate: quinto de passione, & morte: sexto de descensu  
 „ad inferos, & resurrectione: septimo de ascensione ad caelos, & ad dexte-  
 „ram Patris sessione: octavo de adventu ad iudicium Dei & hominis Jesu  
 „Christi. “ Haec porro, quae ad hominis reparationem pertinent octo  
 „capita, quinque & viginti Quaestionibus enarrantur accuratissime ab Au-  
 „ctore. Quaestio sequitur 26. cujus examen, sequiorumque, tum hocce nu-  
 „mero, tum superiore initium est.

Quarta demum succedit pars, in qua, praetermissis Prologo prolixiore,  
 ab ipsa Quaestione prima initium sumitur. Brevi, qui praefigitur, Prolo-  
 go haec habentur: „Dictum est supra (Tertia Parte) de Redemptore,  
 „qui est per gratiam redemptor: nunc dicendum est de reparatione. Re-  
 „paratio autem, quaedam est per gratiam imperfectam: quaedam vero per  
 „gratiam perfectam, sive consummatam. Primo igitur tangitur de prima  
 „reparatione, secundo de secunda. Reparatio per gratiam imperfectam  
 „est

est illa, quæ sit *per gratiam Sacramentorum*, ad quam procedendum est. " Quæstiones numerantur quatuordecim supra centum: quibus late differit Halensis *de Sacramentis in genere*, deque Sacramentis *legis naturæ*, & *legis scriptæ* usque ad octavam exclusive quæstionem. Ipsa quæstione 8. agitur *de Sacramentis legis Evangelicæ in genere*: tum de Baptismo usque ad quæstionem 24.: de Confirmatione ad 29. de Eucharistia ad 54. Quæ sequuntur reliquæ Quæstiones infumuntur omnes in exponendo Sacramento *Pœnitentiæ*. Quæstionis 84. prologus est: „ Dicto de duabus „ partibus pœnitentiæ, scilicet *contritione*, & *confessione*; sequitur tertia pars, „ scilicet *de satisfactione*. Circa quam sic proceditur. Primo agitur *de „ satisfactione in communi*: secundo *in speciali*, scilicet de partibus illius; „ scilicet *oratione, jejuniis, & elemosyna*. " De hac satisfactionis parte, videlicet *elemosyna*, agit Auctor in postrema quartæ partis Quæstione: unde perspicue innoscitur, & hanc Partem quartam *Summæ Quadripartitæ* imperfectam esse, incompletamque. Desiderantur quippe Quæstiones *de Extrema unctione, de Ordine, de Matrimonio*: itemque desunt alix: *de operibus futuræ glorificationis*, de quibus in hac Parte quarta se pertractaturum, pollicentem habemus Halensem in prolixiore Prologo, qui Tertiæ Parti præfixus prostat.

III. Quænam sit Quadripartita Alexandri de Hales Theologica Summa, jam tenes Lector humanissime. Manca illa est, imperfecta: habentque lacunas plurimas Secunda, Tertia, & Quarta Pars. An fuerit verisimile, Halensem incompletum hoc Opus relinquere voluisse, operamque locasse suam, ut opus diversum sub titulo *Summæ Virtutum* elucubraret, ipsumque conficere tamquam *Supplementum* quoddam vellet? In ipsa Tertia Parte lacunæ duæ ingentes patent: altera post Quæstionem 68. ubi agendum Halensi fuerat *de præceptis Evangelii speciatim personarum præsentium, de præceptis ejusdem Evangelii judicialibus, deque consiliis*: altera post Quæstionem 82. quam juxta Auctoris promissa excipere Quæstiones debuerant *de spe formata, de caritate, de virtutibus cardinalibus, de donis, de fructibus, de beatitudinibus*. An lacunas istas omnes expleat Summa illa, quæ obtruditur, *de Virtutibus*? Cur ergo prima Prologi ejus verba describuntur, *Habito ergo de gratia gratum faciente, & gratis data sermone, consequenter dicendum est de Virtute*? Hæc alteram tantum, non priorem lacunam spectant. Nos porro doceant, quænam sint illæ Quæstiones, quæ in *Summæ Virtutum* pertractantur? An de virtutibus *secundum Theologicam & veram acceptionem*, ut ipse ait Halensis 3. par. quæst. 96. in Prologo? An etiam secundum Philosophicam acceptionem disserat? An argumenta illustret, quæ pertinent *ad dona, ad fructus, ad beatitudines*? An *de spe formata* disserat, deque *caritate Dei, & erga proximum*? An quæstiones *de fide formata*, quæ in *Summæ Quadripartitæ* Tertia parte numerantur 78. 79. 80. 81 & 82. prætermittat Auctor in sua *Virtutum Summa*, an eisdem novis curis pertractet? Hactenus vero hæc, & alia id genus frustra perquisita,

## CAPUT IV.

*Num Summa praedictae Theologicae lacunas expleverit Guillelmus de Melitona? Plagium omne ab Aquinate removetur. Hunc in Schola Alexandri Halensis auditorem fuisse, refellitur.*

**L.** **N**ondum satis. Morte praeventum Halensem reliquisse imperfectam *Summam Quadrartitam*, passim fatetur Vvadingus. Hæc insuper narrat ad Annum 1357. num. 8. ubi de Guillelmo de Melitona, Fratrum Minorum alumno, sermonem habet: „Guillelmus de Melitona, qui *Summam Theologicam Alexandri Halensis*, ob Auctoris mortem imperfectam, absolvit, ita hortante Alexandro (IV.) Pontifice, & scribente, anno I. sui Pontificatus (Christi 1255.) ad Franciæ Ministrum, ut hic Doctissimo Viro adjudicaret alios, qui in tanto opere ei adlaborarent.“

Diploma Pontificium, quod Vvadingus non profert in lucem, inventum a se in Sorbona ad caput ejusdem Codicis *Summae Alensis*, luci publicæ tradidit Jacobus Echardus in Adnotationibus ad Elogium Sancti Thomæ. Excerpta nonnulla hoc loco describo. *Alexander Episcopus Servus Servorum Dei, Dilecto Filio Ministro Fratrum Ordinis Minorum in Francia, salutem & Apostolicam benedictionem.* Quadrartitam *Summam Halensis* præconio exornat Pontifex: „Laboriosi operis sanctum aggredientem do propositum super Questionibus Theologicis, utiliore utique, quam prolixam molitus est *Summam*, profectibus in lege Domini studere volentium compendiosius profuturam.“ Sed illam, inquit, imperfectam ab Auctore relictam, utpote morte prævento: „Deo ejusdem Fratris (Alexandri de Hales) laboribus finem, antequam suscepti Operis diem tam perficeret, imponente.... perfectæ pietatis imperfectus mansit labor.“ Hinc laudato Ministro injungit: „ut de consilio discretorum Fratrum studentium, ad perfectionem ejusdem *Summae*, necessarios pro numero & idoneos pro merito convocet Parisius.... fratres: quibus ex parte nostra (ait) in remissionem injungas peccaminum, & ad suorum cumulum meritorum, ut Dilecto Filio Fratri *Guillelmo de Melitona*, huic sollicitudini deputato, sedulo assistentes, ipsumque ac se mutuo adjuvantes, sine dilationis dispendio, prædictæ *Summae* opus fideliter exequantur. Datum Anagninæ v. Kal. Augusti, Pontificatus nostri anno II.“ idest die 28. Julii, anno ~~vulgaris~~ 1256. cum Alexander IV. electus in Pontificem fuisset die 21. Decembris 1254. Aut diversum est Diploma Pontificium, quod anno 1. Pontificatus datum memorat Vvadingus, aut errat certe in Diplomatis anno efferendo,

II. *Ut perfecit opus*, (verba sunt Vvadingi loco citato,) a septuaginta duobus Magistris Parisiensibus commendatum, & sigillis apposis commprobatum, Pontifex etiam suo Diplomate confirmavit. Opus esset, ut documentis in medium prolati hæc innotescerent, quæ narrat Doctissimus Minorum Annalista. Interim vero testatur, quadrartitam Halensis Theologicam *Summam* a Guillelmo de Melitona, & confodalibus perfectam fuisse, absolutam, suppletamque; & hocce supplementum a Magistris Parisiensibus comprobatum, confirmatumque a Pontifice. Res ita fuit. Jam sequitur, *Summam* illam *Virtutum*, quam instar *Supplementi Tertie Partis* consecrerit ipse Halensis, adhibitam fuisse a Guillelmo de Melitona, eamque totam inter questiones ejusdem Tertie Partis repositam. Si namque eam elucubraverit instar *Supplementi* Halensis, cur insuper eandem habere, ac prætermittere voluisset Melitona? Quod si in eadem *Summa* tertia

par-



parte contineatur inserta *Summa* illa *Virtutum*; cur *Secundam* partem suæ *Secundæ* non acceperit Thomas ex ipsa *Quadrupartita Summa*, ut ais, sed ex *Summa Virtutum*? Perinde foret & *Summam* eandem proferre, ac *Tertiæ* prædictæ partis *Quæstiones* designare, ut plagium Divi Thomæ evinceretur. At neutrum hæcenus præstitum, nec præstari umquam poterit.

Atqui vero *Summa* eadem *Quadrupartita* typis prodijt numquam perfecta, & absoluta: patentibusque lacunis, quas indicavimus, abruptæ prostant editiones, quæ hæcenus curatæ sunt anno 1481. & 1482. & anno 1575. & 1576. & demum anno 1622. prima Norimbergensis, altera Veneta, ac tertia Colonienfis. Hinc argumentum redit, quod evincit, fictitium opus esse illam *Virtutum Summam*, quæ ab Halensi instar *Supplementi Tertiæ Partis* elucubrata dicitur. Si namque otium fuerit ipsi, quod in scribendis libris infumeret, ipsam sine dubio *Summa Quadrupartita* seriem huiusmodi, & abruptam continuasset, & explevisset: novum opus, diversumque molitus non esset. Quod postremo, si alicubi aut typis editum, aut manuscriptum reperiat, in lucem proferri postulam, ut cum *Summa Theologica* Sancti Thomæ, ejusque potissimum *Secundæ Secundæ* conferatur. Nondum comparuit illud, neque poterit umquam exhiberi, nisi fortasse eo audaciter processerit quispiam, ut ipsam *Secundam Secundæ* Sancti Thomæ verbotenus describat, eamque sub Doctoris Halensis nomine, appposito *Summa Virtutum* titulo, edi curet.

Sive ergo mancæ & imperfectæ *Quadrupartitæ Summæ* Halensis absolverit Guillelmus de Melitona, sive injunctum perficere non potuerit supplementum; de plagio accusari Thomas Aquinas, nisi per summam injuriam, non potest. Casimirus Oudinus in elogio ipsius Melitonæ ad Annum 1240. sic habet: „ Illud autem Guillelmi de Melitona *Supplementum*, cum impressum est cum ipsa *Summa* (quadrupartita) seu Commentario Alexandri Halensis, Lugduni annis 1515. & 1516. Tomis 4. in 4. apud „ Antonium Koberger, ut in *Alexandro Halensi* supra diximus. “ Animadvertionem ejus, quæ in Elogio Alexandri Halensis legitur, integram profero: „ In Bibliotheca Sancti Germani de Pratis Parisiensis, ob suas „ antiquas editiones celebri, habetur hæc editio facta Lugduni anno 1515. „ & anno 1516. apud Antonium Koberger: eaque est ipsa *Summa* sub nomine „ *Alexandri Halensis* sapius impressa, ut Norimbergæ 1482. fol. Venetiis 1576. „ fol. Coloniz 1622. unde patet evidenter, nec manuscriptum inveniri *Commentarium* in quatuor libros *Sententiarum* Alexandri Halensis, nec impressum ullibi, quod ab ipsa ejus *Summa* (quadrupartita) distinctum „ probari possit. “ Sorbonici quidem, & Victorini Codices Parisienses adservantur, in quibus ipsa *Quadrupartita Summa* exhibetur, ac præterea *Textus Magistri Sententiarum*. An istud solum fuerit supplementum, quod Melitona confecerit?

Eidem Melitonæ, conjectatur Natalis Alexander tribuendam potius fore *Summam Virtutum*, si quidem uspiam eadem exstet, quam Alexandro de Hales: indeque verisimilius esse colligit, Guillelmum de Melitona *Summam Virtutum* accepisse ex *Secundæ Secundæ* Sancti Thomæ, quam istum ex illo quidpiam mutuatum esse. Neutrum conjecerim ego. *Summæ* suæ tres partes, Primam, Secundam, & quæ *Secundæ Secundæ* appellari solet, scripsit Aquinas tempore hujus Pontificis (Clementis IV. ad *Summum Pontificatum* die 5. Februarii anno 1265. electi,) & sequentis vacationis, ad annum usque 1271. quo Gregorius X. cum absens foret, electus fuit die 1. Septembris, vel etiam usque ad annum infangentem 1272. quo diademate sacro die 27. Martii redimitus est, ut Prolomæus Lucensis diserte notat. Atqui vero Guillelmum de Melitona ante annum

1248. floruisse, vitæque mortali migrasse circa annum 1260. documenta docent, quæ afferunt Vvadingus, & Echardus. Viro suæ ætatis clarissimò postillas sive Commentarios tribuit Possévinus in *Pentateuchum*, in *duodecim Prophetas*, in *Epistolam ad Hebræos*, ac *Sermones in Evangelia*. Commentationes in *Cantica Canticorum*, & *super Ecclesiasticum* addit Echardus, qui Virum celeberrimum restituendum Ordini Fratrum Minorum lubens agnoscit, & candide fatetur. Postillas denique Casimirus Oudinus addit in *Ecclesiastem*, & in *Sapientiam Salomonis*. At *Virtutum Summam*, de qua agimus, nemo unus est, qui pro Melitonæ sætu habuerit.

Quæ demum omnia, totidem validissima puto argumenta, ut fictitia demum evincatur eadem *numma virtutum*. Cæteroque vero in germano Opere suo, scilicet in *Summa Quadripartita*, tametsi manco & incompleto, de pluribus egisse virtutibus Alexandrum de Hales, certo constat ex illo Quæstionum elencho, quem hætenus data occasione dedimus. Differis quippe de *fide informi*, deque *fide formata*, de *spe informi*, de *timore servili*, de *scandalo*, de *oratione*, de *jejunio*. Easdem movet, versatque Thomas quæstiones in Secunda Secundæ, Quæst. 1. de *Fide*, Quæst. 17. de *Spe*, Quæst. 19. de *Timore*, Quæst. 32. de *eleemosyna*, Quæst. 43. de *scandalo*, Quæst. 83. de *Oratione*, Quæst. 147. de *jejunio*. Utroque in Auctore si prædictæ diligentius conferantur Quæstiones, nihil sane in Thoma deprehenditur, quod *verbatenus* corrasum fuerit ex Halensi: ipsæque Quæstiones neque resolutione, neque rationibus, neque argumentis, neque responsionibus, neque demum stylo conveniunt.

III. Dispensum operæ postremo loco non fuerit, si decantatam illam nostri Sanctissimi Aquinatis disciplinam sub Alexandri Halensis Magisterio paucis expendam. *Nescio quid hoc opprobrii secum ferat*, (ait Vvadingus ad Annum MCCXLIV. numero xxiv.) *Divum Thomam Halensis discipulum fuisse*? Nihil neque nos contumeliosum, & injurium Sancto Thomæ Aquinati in hac cum ipso Vvadingo videmus, quæ sub Halensi Magistro disciplina decantatur. Quæstionem facti versamus, in qua veritas querenda est, ne in errorem veritati injurium minus consulti, imprudentesque incidamus.

*Suspensa ad ejus ( Halensis ) memoriam ab antiquo Tabelle, ( pergit Clarissimus Minorum Annalista, ) hoc inter reliqua inscribitur distinctio:*

*Quo duce præmonitus in prælia Divus Aquinas,  
Quotquot & usque legis fortius arma gerunt.*

*Hoc ipsum præfert ejusdem Doctoris imago quadam vetustate exesa, ad introitum Capituli Conventus Parisiensis depicta, in qua Divus Bonaventura, ac Sanctus Thomas docentes Magistri verba excipiunt. Scilicet & fabulas canunt parietes. Epitaphium Halensis primo ejus lapidi sepulchrali inscriptum, mutilum hætenus editum, integrum profert Jacobus Echardus, descriptum ex Codice MS. seculi tertiidecimi in Bibliotheca Sorbonica adservato fol. magn. membran. qui est altera pars Summæ Quadripartitæ Halensis. Verba sunt: „ In tumba, quæ de directo distat per unam tumbam ab introitu chori Ecclesiæ FF. Minorum Parisius, hæc scribuntur. „ In tabernaculo capitis Imaginis sculptæ in dicta tumba scribitur: *Hic jacet Frater Alexander de Hales, qui obiit anno Domini MCCXLV. XII.* „ *Kalendas Septembris*. In circuitu dictæ tumbæ scribuntur in versus: „ *Gloria Doctorum, decus & flos Philosophorum &c.* „ ut apud Vvadingum. In his carminibus tirocinii ab Aquinate positi sub Magistro Halensi mentio nulla: unde evincitur, tum aliam superiorem elegiam ad mu-*

murum appensam, tum imaginem ad introitum Capituli depictam, novitias esse, ut infert Echardus, antiquis incognitas, nulliusque momenti.

Quod sumi solet ex chronographia Halensis, & Thomæ argumentum, his eludere verbis VVadingus nititur num. xxviii. „ Nam & Parisios „ studiorum gratia missum fuisse præclarum juvenem, non est ambigen- „ dum. Nec ita mature inde profectus; sed postquam in Curiam accessi- „ tus, oblatam Cassinensis Monasterii administrationem renuit, & clam „ Curia dilapsus aufugit primum Coloniam, ut Auditor est Cantipratensis, „ qui tum vixit, & Thomam cognovit. Potuit ergo Alexandrum audi- „ visse, quamvis Parisiis degit, illo superstiti. Nec refert, si diu, si pa- „ rum, modo in Scholis discendi studio, Alexandrum conveniens audi- „ vit. „ Plura sunt animadversione digna. Ac primo verba illa, *Nec re- „ fert si diu, si parum*, mihi videntur VVadingum exhibere proingenii acu- „ mine subdubitantem de illa Aquinatis sub Halensi Magistro disciplina. Cur enim eam decantari oportuisset, tamen si probari & evinci posset, Thomam aliqua vice Magistrum Halensem in Scholis docentem audivisse, non studii gratia, sed virum in Academia Parisiensi celeberrimum cognoscendi desiderio? Mirum est, ab eodem VVadingo in solutione argu- „ menti, quod Thomæ Chronographiam spectat, unum laudari Cantipra- „ tensensem, diligentioribus & synchronis prætermisissis testibus, Prolomæo Lu- „ censii, & Guillelmo de Tocco. Menda, quibus inquinata est narratio Can- „ tipratani, protulimus omnia in Dissertatione *adversus Monachatum Benedi- „ ctinum Sancti Thomæ*, Capite vi. num. 11. ubi ostendimus, a veritate ip- „ sum abluere, dum narrat 1. Aquinatem de Romanorum partibus ve- „ nisse Bononiam. 2. Dominicanam vestem Bononiæ indutum, *ibidem* ali- „ quandiu substituisse. 3. in Curiam semel, & iterum *per litteras Apostolicas* „ vocatum, eoque profectum esse. 4. Dignitatibus Ecclesiasticis a Pontifice „ oblati insigniri nolentem, tunc a germanis Fratribus *furtim raptum*, „ & in carcerem detrusum. 5. E Curia demum secunda vice *clam prola- „ psam*, Coloniam Agripinam profectum esse. Ad ipsam Abbatem Cassinensis „ oblationem quod attinet, si fides quidem adhibenda est, ad annum 1248. „ vel insequentem referri commode eam posse, loco citato haud levibus „ conjecturis conficimus.

In eadem Dissertatione Capite ix. num. 1. Ingressum Thomæ in Ordinem Fratrum Prædicatorum, capturam ejusdem ac detentionem in carcere per biennium saltem incompletum, egressumque demum e carcere, libertatemque ipsi donatam, eotemporis intervallo concludi, quod ab anno cadente 1243. excurrit ad annum 1245. ineuntem, non conjecturis, verum perspicuis argumentis demonstravimus. Atqui vero, fune demisso e carcere Thomam, *statim animalia sunt parata*, (Prolomæi Lucensis verba sunt in Hist. Eccl. Lib. xxii. Cap. xx1.) *ad ipsum deducendum Romam. Inde vadit Coloniam ad Fratrem Albertum, ubi multo tempore fuit.* Verba etiam refero Guillelmi de Tocco Capite 111. apud Bollandi Continuatores in- „ quientis: *Postquam vero Frater Thomas, sicut divinitus Ordini dedius, sic fuit divinitus restitutus... Fratres sui ipsum Romam, ad Capitulum generale miserunt, in quo provideretur ei propter spem futuri profectus in proximo de studio generali.* Ut minus accurata hæc narratio redigi ad veritatem queat; animadverte, Comitia Ordinis generalia anno 1243. habita fuisse Parisiis die 31. Maji: anno 1244. Bononiæ 22. Maji: anno 1245. Colonie 4. Junii. Unde Guillelmi de Tocco verba sic intellige, ut Aquinas Romam missus fuerit, indeque ad Capitulum generale celebrandum Colonie eo anno 1245. in quo de studio generali eidem provideretur. Ita factum: cum enim Joannes Theutonicus Magister Ordinis (pergit referre Guillelmus de Tocco) ipsum in carissimum in Christo filium suscepisset, duxit eum Parisios,

for, & deinde Coloniam, ubi Fratri Alberto tunc florenti erudiendus traditur. Parisinum iter silet Ptolomæus de Luca: disertè memorat illud Guillelmus de Tocco. Nempe, cum vix ibi commoratus fuerit Thomas, iterque suum Coloniam cum Magistro Generali continuo profecisset; Parisinam illam neque memorandam duxit Ptolomæus Lucensis profectiorem.

Quæ demum accuratissima chronographia satis evincit, neque diu, neque parum, Thomam nostrum in Scholis, discendi studio, Alexandrum Halensem audivisse: quem scilicet ipso anno 1245. vita migrasse, fatetur VVadingus, die xii. Kalendas Septembris, seu die 21. Augusti, ut in superiore legimus Epitaphio, quod Echardus in lucem protulit; cum Thomas jam Coloniam pervenisset ante diem 4. Junii, quo Comitia Ordinis Generalia Joannes Theutonicus celebravit. Quid? quod eodem nec anno 1245. neque superiore aliquo post annum 1238. tempore, publicis præfuisse Scholis Alexandrum Halensem, Echardi sententia est, quam alii expendant. Ipsum consule in Notis ad Sancti Thomæ elogium, & Natalem Alexandrum in Opusculo hac de re edito, egregie differentes.

Ego Doctori Angelico (iterum VVadingus numero xxv.) nihil in hoc derogatum esse video, si jam senem juvenis audivit, quem senex præ reliquis assumpsit imitandum, & sequendum. Priorem facti quætionem jam solutam, diremptamque puto. Quod additur, ad examen vocent alii: num scilicet ita Halensem sequutus & imitatus fuerit S. Thomas, ut ipsum etiam superaverit, Theologiam parturiendo (verbis utor Natalis Alexandri) Summamque scribendo, cujus ab ordine, metodo, sublimitate, nitore, stylo eruditione, ratiocinandi vi, Summa Doctoris Halensis toto celo distet.



# I N D E X

## Q U A E S T I O N U M , E T A R T I C U L O R U M

Quæ in hoc volumine continentur.

### SECUNDAE SECUNDAE PARTIS

#### SUMMAE THEOLOGICAE

##### Q U A E S T I O C I .

De pietate.

1. **A**d quos pietas se extendat.
2. quid per pietatem aliquibus exhibeatur.
3. utrum pietas sit specialis virtus.
4. utrum religionis obtentu sit pietatis officium prætermittendum.

##### Q U A E S T I O C I I .

De observantia.

1. utrum observantia sit specialis virtus ab aliis distincta.
2. quid sit observantia.
3. utrum observantia sit potior virtus quam pietas.

##### Q U A E S T I O C I I I .

De dulia, quæ est prima pars observantiæ.

1. utrum honor sit aliquid spirituale, vel corporale.
2. utrum honor debeatur solis superioribus.
3. utrum dulia, cuius est exhibere honorem, vel cultum superioribus, sit specialis virtus a latría distincta.
4. utrum dulia per species distinguatur.

##### Q U A E S T I O C I V .

De obedientia, quæ est pars observantiæ.

1. utrum homo debeat homini obedire.
2. utrum obedientia sit specialis virtus.
3. utrum obedientia sit maxima virtutum.
4. utrum Deo sit in omnibus obediendum.
5. utrum subditi suis Prælati teneantur in omnibus obedire.
6. utrum fideles teneantur potestatibus secularibus obedire.

##### Q U A E S T I O C V .

De inobedientia.

1. utrum inobedientia sit peccatum mortale.
2. utrum inobedientia sit gravissimum peccatorum.

##### Q U A E S T I O C V I .

De gratia, sive gratitudine.

1. utrum gratia sit specialis virtus ab aliis distincta.
2. utrum innocens teneatur ad maiores gratiarum actiones Deo quam penitens.
3. utrum homo teneatur semper ad gratias beneficiis humanis reddendas.
4. utrum retributio gratiarum sit differenda.
5. utrum sit mensuranda secundum acceptum beneficium, vel secundum dantis affectum.
6. utrum oporteat aliquid maius rependere.

##### Q U A E S T I O C V I I .

De ingratitudine.

1. utrum ingratitudo sit peccatum.
2. utrum sit peccatum speciale.
3. utrum omnis ingratitudo sit peccatum mortale.
4. utrum ingratitudo fini beneficia subtrahenda.

##### Q U A E S T I O C V I I I .

De vindicatione.

1. utrum vindicatio sit licita.
2. utrum sit specialis virtus.
3. de modo vindicandi.
4. in quos sit vindicta exercenda.

##### Q U A E S T I O C I X .

De veritate.

1. utrum veritas sit virtus.
2. utrum

- <sup>2</sup> *utrum sit specialis virtus.*  
<sup>3</sup> *utrum sit pars iustitiae.*  
<sup>4</sup> *utrum magis declinet in minus.*

## QUAESTIO CX.

De mendacio, quod est vitium veritati  
 oppositum.

- <sup>1</sup> *utrum mendacium semper opponatur ve-  
 ritati quasi continens falsitatem.*  
<sup>2</sup> *de speciebus mendacii.*  
<sup>3</sup> *utrum mendacium semper sit peccatum.*  
<sup>4</sup> *utrum semper sit peccatum mortale.*

## QUAESTIO CXI.

De simulatione, & hypocrisis.

- <sup>1</sup> *utrum omnis simulatio sit peccatum  
 mortale.*  
<sup>2</sup> *utrum hypocrisis sit simulatio.*  
<sup>3</sup> *utrum hypocrisis opponatur veritati.*  
<sup>4</sup> *utrum sit peccatum mortale.*

## QUAESTIO CXII.

De iactantia.

- <sup>1</sup> *cui virtuti opponatur.*  
<sup>2</sup> *utrum sit peccatum mortale.*

## QUAESTIO CXIII.

De ironia.

- <sup>1</sup> *utrum ironia sit peccatum.*  
<sup>2</sup> *utrum sit minus peccatum quam iac-  
 tantia.*

## QUAESTIO CXIV.

De amicitia, quae affabilitas dicitur.

- <sup>1</sup> *utrum sit specialis virtus.*  
<sup>2</sup> *utrum sit pars iustitiae.*

## QUAESTIO CXV.

De adulatione.

- <sup>1</sup> *utrum adulatio sit peccatum.*  
<sup>2</sup> *utrum sit peccatum mortale.*

## QUAESTIO CXVI.

De litigio.

- <sup>1</sup> *utrum opponatur virtuti amicitiae.*

- <sup>2</sup> *utrum sit maius peccatum, quam adu-  
 latio.*

## QUAESTIO CXVII.

De liberalitate.

- <sup>1</sup> *utrum liberalitas sit virtus.*  
<sup>2</sup> *qua sit eius materia.*  
<sup>3</sup> *quis sit eius actus.*  
<sup>4</sup> *utrum magis pertineat ad liberalem  
 dare quam accipere.*  
<sup>5</sup> *utrum liberalitas sit pars iustitiae.*  
<sup>6</sup> *utrum liberalitas sit maxima virtu-  
 tum.*

## QUAESTIO CXVIII.

De vitis quae opponitur liberalitati,  
 & primo de avaritia.

- <sup>1</sup> *utrum avaritia sit peccatum.*  
<sup>2</sup> *utrum sit speciale peccatum.*  
<sup>3</sup> *cui virtuti opponatur utrum scilicet  
 liberalitati.*  
<sup>4</sup> *utrum sit peccatum mortale.*  
<sup>5</sup> *utrum sit gravissimum peccatorum.*  
<sup>6</sup> *utrum sit peccatum carnale, vel spiri-  
 tuale.*  
<sup>7</sup> *utrum sit vitium capitale.*  
<sup>8</sup> *de filiabus eius.*

## QUAESTIO CXIX.

De prodigalitate.

- <sup>1</sup> *utrum opponatur avaritiae.*  
<sup>2</sup> *utrum sit peccatum.*  
<sup>4</sup> *utrum sit gravius peccatum quam  
 avaritia.*

## QUAESTIO CXX.

De epicheia.

- <sup>1</sup> *utrum epicheia sit virtus.*  
<sup>2</sup> *utrum sit pars iustitiae.*

## QUAESTIO CXXI.

De dono correspondente iustitiae,  
 scilicet de pietate.

- <sup>1</sup> *utrum pietas sit donum Spiritus sancti.*  
<sup>2</sup> *utrum aliquid in beatitudinibus, &  
 fructibus pietati respondeat.*

QUAESTIO CXXII.

De praeceptis iustitiae.

- 1 *utrum praecepta Decalogi sint praecepta iustitiae.*
- 2 *de primo praecepto Decalogi, utrum convenienter tradatur.*
- 3 *de secundo.*
- 4 *de tertio.*
- 5 *de quarto.*
- 6 *de aliis sex.*

QUAESTIO CXXIII.

De fortitudine.

- 1 *utrum fortitudo sit virtus.*
- 2 *utrum sit virtus specialis.*
- 3 *utrum sit circa timores, & audacias.*
- 4 *utrum sit solum circa timores mortis.*
- 5 *utrum sit solum in rebus bellicis.*
- 6 *utrum sufficere sit praeceptus actus eius.*
- 7 *utrum operetur propter proprium bonum.*
- 8 *utrum habeat delectationem in suo actu.*
- 9 *utrum fortitudo maxime consistat in repentinis.*
- 10 *utrum utatur ira in sua operatione.*
- 11 *utrum sit virtus cardinalis.*
- 12 *utrum fortitudo praeclat omnes alias virtutes.*

QUAESTIO CXXIV.

De praecepto actu fortitudinis, scilicet martyrio.

- 1 *utrum martyrium sit actus virtutis.*
- 2 *actus virtutis sit actus.*
- 3 *de perfectione huius actus.*
- 4 *de pena martyrii.*
- 5 *de causa martyrii.*

QUAESTIO CXXV.

De vitiis oppositis fortitudini, & primo de timore.

- 1 *utrum timor sit peccatum.*
- 2 *utrum timor opponatur fortitudini.*
- 3 *utrum sit peccatum mortale.*
- 4 *utrum excuset, vel diminuat peccatum.*

QUAESTIO CXXVI.

De vitio intimiditatis.

- 1 *utrum intimidum esse sit peccatum.*
- 2 *utrum opponatur fortitudini.*

QUAESTIO CXXVII.

De audacia.

- 1 *utrum audacia sit peccatum.*
- 2 *utrum opponatur fortitudini.*

QUAESTIO CXXVIII.

De partibus fortitudinis in communi,

- 1 *quae sint fortitudinis partes.*

QUAESTIO CXXIX.

De partibus fortitudinis in speciali, & primo de magnanimitate.

- 1 *utrum magnanimitas sit circa honores.*
- 2 *utrum sit solum circa magnos honores.*
- 3 *utrum sit virtus.*
- 4 *utrum sit specialis virtus.*
- 5 *utrum sit pars fortitudinis.*
- 6 *quomodo se habeas ad fiduciam.*
- 7 *quomodo se habeat ad securitatem.*
- 8 *quomodo se habeat ad bona fortuna.*

QUAESTIO CXXX.

De praesumptione, quae opponitur magnanimitati secundum excessum.

- 1 *utrum praesumptio sit peccatum.*
- 2 *utrum opponatur magnanimitati per excessum.*

QUAESTIO CXXXI.

De ambitione, quae similiter magnanimitati opponitur.

- 1 *utrum ambitio sit peccatum.*
- 2 *utrum opponatur magnanimitati per excessum.*

QUAESTIO CXXXII.

De inani gloria, quae similiter opponitur magnanimitati.

- 1 *utrum appetitus gloriae sit peccatum.*
- d
- 2 *utrum*

- 2 *utrum magnanimitati opponatur.*  
 3 *utrum sit peccatum mortale.*  
 4 *utrum sit vitium capitale.*

## QUAESTIO CXXXIII.

De pusillanimitate, quæ opponitur magnanimitati secundum defectum.

- 1 *utrum sit peccatum.*  
 2 *cui virtuti opponatur.*

## QUAESTIO CXXXIV.

De magnificentia.

- 1 *utrum magnificentia sit virtus.*  
 2 *utrum sit virtus specialis.*  
 3 *quæ sit materia ejus.*  
 4 *utrum sit pars fortitudinis.*

## QUAESTIO CXXXV.

De vitiis oppositis magnificentiæ.

- 1 *utrum parvificentia sit vitium.*  
 2 *utrum parvificentiæ aliquod vitium opponatur.*

## QUAESTIO CXXXVI.

De patientia.

- 1 *utrum patientia sit virtus.*  
 2 *utrum sit maxima virtutum.*  
 3 *utrum possit haberi sine gratia.*  
 4 *utrum sit pars fortitudinis.*  
 5 *utrum sit idem cum longanimitate.*

## QUAESTIO CXXXVII.

De perseverantia.

- 1 *utrum perseverantia sit virtus.*  
 2 *utrum sit pars fortitudinis.*  
 3 *utrum constantia pertineat ad perseverantiam.*  
 4 *utrum indigeat auxilio gratiæ.*

## QUAESTIO CXXXVIII.

De vitiis oppositis perseverantiæ.

- 1 *utrum mollities opponatur perseverantiæ.*  
 2 *utrum pertinacia opponatur perseverantiæ.*

## QUAESTIO CXXXIX.

De dono correspondente fortitudini.

- 1 *utrum fortitudo sit donum.*  
 2 *utrum quarta beatitudo, scilicet, Beati, qui esuriant, & sitiant iustitiam, respondeat dono fortitudinis.*

## QUAESTIO CXL.

De præceptis fortitudinis.

- 1 *de præceptis ipsius fortitudinis.*  
 2 *de præceptis partium eius.*

## QUAESTIO CXLI.

De temperantia.

- 1 *utrum temperantia sit virtus.*  
 2 *utrum sit virtus specialis.*  
 3 *utrum sit solum circa concupiscencias, & delectationes.*  
 4 *utrum sit solum circa delectationes tactus.*  
 5 *utrum sit circa delectationes gustus, in quantum est gustus, vel solum in quantum est tactus quidam.*  
 6 *quæ sit regula temperantiæ.*  
 7 *utrum sit virtus cardinalis, seu principalis.*  
 8 *utrum sit potissima virtutum.*

## QUAESTIO CXLII.

De vitiis oppositis temperantiæ.

- 1 *utrum insensibilitas sit peccatum.*  
 2 *utrum intemperantia sit vitium puerile.*  
 3 *utrum similitas sit malus vitium quam intemperantia.*  
 4 *utrum vitium intemperantiæ sit maxime exprobrabile.*

## QUAESTIO CXLIII.

De partibus temperantiæ in generali.

- 1 *utrum convenienter assignentur partes temperantiæ.*



QUAESTIO CXLIV.

De singulis partibus temperantiae in speciali : & primo de verecundia , quae est quasi pars integralis temperantiae .

- 1 *utrum verecundia sit virtus .*
- 2 *de quibus sit verecundia .*
- 3 *a quibus homo verecundetur .*
- 4 *quorum sit verecundari .*

QUAESTIO CXLV.

De honestate , quae est pars integralis temperantiae .

- 1 *quomodo honestum se habeat ad virtutem .*
- 2 *quomodo se habeat ad decorum .*
- 3 *quomodo se habeat ad utile , & delectabile .*
- 4 *utrum honestas sit temperantiae pars .*

QUAESTIO CXLVI.

De abstinentia , quae est pars subiectiva temperantiae .

- 1 *utrum abstinentia sit virtus .*
- 2 *utrum sit virtus specialis .*

QUAESTIO CXLVII.

De ieiunio , quod est actus abstinentiae .

- 1 *utrum ieiunium sit actus virtutis .*
- 2 *utrum ieiunium sit actus abstinentiae .*
- 3 *utrum ieiunium cadet sub praecipio .*
- 4 *utrum aliqui excusentur ab observantia huius praecipii .*
- 5 *de tempore ieiunii , utrum convenienter assignetur .*
- 6 *utrum semel comedere requiratur ad ieiunium .*
- 7 *utrum hora nona convenienter taxetur ieiunantibus ad comedendum .*
- 8 *utrum convenienter prohibeantur aliqui cibi ieiunantibus .*

QUAESTIO CXLVIII.

De gula , quae opponitur ieiunio .

- 1 *utrum gula sit peccatum .*
- 2 *utrum sit peccatum mortale .*
- 3 *utrum sit maximum peccatum .*

- 4 *utrum species gulae convenienter assignentur .*
- 5 *utrum sit vitium capitale .*
- 6 *utrum convenienter assignentur gulae quinque filiae .*

QUAESTIO CXLIX.

De sobrietate , quae est specialiter circa potum .

- 1 *quae sit materia sobrietatis .*
- 2 *utrum sit specialis virtus .*
- 3 *utrum usus vini sit licitus .*
- 4 *quibus competat sobrietas .*

QUAESTIO CL.

De ebrietate , quae opponitur sobrietati .

- 1 *utrum ebrietas sit peccatum .*
- 2 *utrum sit peccatum mortale .*
- 3 *utrum sit gravissimum peccatum .*
- 4 *utrum excuset a peccato .*

QUAESTIO CLI.

De castitate , quae est pars subiectiva temperantiae .

- 1 *utrum castitas sit virtus .*
- 2 *utrum sit virtus generalis .*
- 3 *utrum sit virtus distincta ab abstinentia .*
- 4 *quomodo se habeat ad pudicitiam .*

QUAESTIO CLII.

De virginitate , quae est pars castitatis .

- 1 *in quo consistat virginitas .*
- 2 *utrum sit licita .*
- 3 *utrum sit virtus .*
- 4 *utrum sit excellentior matrimonio .*
- 5 *utrum sit maxima virtutum .*

QUAESTIO CLIII.

De luxuria , quae opponitur castitati .

- 1 *quae sit materia luxuria .*
- 2 *utrum omnis concubitus sit illicitus .*
- 3 *utrum luxuria sit peccatum mortale .*
- 4 *utrum luxuria sit vitium capitale .*
- 5 *de filiabus eius .*

## QUAESTIO CLIV.

## De partibus luxuriae.

- 1 utrum convenienter assignentur sex species luxuriae.
- 2 utrum fornicatio simplex sit peccatum mortale.
- 3 utrum sit maximum peccatum.
- 4 utrum in tactibus, & osculis, & aliis huiusmodi illecebris consistat peccatum mortale.
- 5 utrum nocturna pollutio sit peccatum.
- 6 utrum stuprum sit species luxuriae.
- 7 utrum rapinus sit species luxuriae.
- 8 utrum adulterium sit determinata species distincta ab aliis.
- 9 utrum incestus sit determinata species luxuriae.
- 10 utrum sacrilegium sit species luxuriae.
- 11 utrum vitium contra naturam sit species luxuriae.
- 12 utrum sit maximum peccatum inter species luxuriae.

## QUAESTIO CLV.

## De partibus potentialibus temperantiae, &amp; primo de continentia.

- 1 utrum continentia sit virtus.
- 2 utrum materia continentia sit concupiscentia delectationum tactus.
- 3 quod sit eius subiectum.
- 4 utrum continentia sit melior quam temperantia.

## QUAESTIO CLVI.

## De incontinentia.

- 1 utrum incontinentia pertineat ad animam, vel ad corpus.
- 2 utrum incontinentia sit peccatum.
- 3 de comparatione incontinentiae ad incontinentiam.
- 4 quis sit turpior, utrum incontinens irae, vel incontinens concupiscentiae.

## QUAESTIO CLVII.

## De clementia, &amp; mansuetudine, quae sunt partes temperantiae.

- 1 utrum clementia, & mansuetudo sint idem.
- 2 utrum utraque earum sit virtus.
- 3 utrum utraque earum sit pars temperantiae.
- 4 utrum haec duae sint potissima virtutes.

## QUAESTIO CLVIII.

## De iracundia, quae opponitur mansuetudini.

- 1 utrum irasci possit esse licitum.
- 2 utrum ira sit peccatum.
- 3 utrum sit peccatum mortale.
- 4 utrum sit gravissimum peccatum.
- 5 utrum convenienter assignentur species iracundiae, & quae sint.
- 6 utrum ira sit vitium capitale.
- 7 quae, & quot sint filiae eius.
- 8 utrum ira habeat vitium oppositum.

## QUAESTIO CLIX.

## De crudelitate.

- 1 utrum opponatur clementiae.
- 2 de comparatione eius ad servitium, vel feritatem.

## QUAESTIO CLX.

## De modestia in communi.

- 1 utrum modestia sit pars temperantiae.
- 2 utrum modestia sit circa exteriores actiones.

## QUAESTIO CLXI.

## De speciebus modestiae, &amp; primo de humilitate.

- 1 utrum humilitas sit virtus.
- 2 utrum consistat in appetitu, vel iudicio rationis.
- 3 utrum aliquis per humilitatem debeat se omnibus subicere.
- 4 utrum humilitas sit pars modestiae, vel temperantiae.
- 5 utrum sit potissima virtutum.
- 6 de gradibus humilitatis.

## QUAESTIO CLXII.

## De superbia in communi.

- 1 utrum superbia sit peccatum.
- 2 utrum sit vitium speciale.
- 3 utrum sit intranscibili sicut in subiecto.
- 4 de speciebus superbiae.
- 5 utrum sit peccatum mortale.
- 6 utrum sit gravissimum peccatum.
- 7 utrum sit primum omnium peccatorum.
- 8 utrum superbia sit vitium capitale.

QUAE-

QUAESTIO CLXIII.

De peccato primi hominis, quod fuit per superbiam.

- 1 utrum primum peccatum primi hominis fuerit superbia.
- 2 quid primus homo peccando appetierit.
- 3 utrum eius peccatum fuerit gravius omnibus aliis peccatis.
- 4 uter plus peccaverit, utrum vir, vel mulier.

QUAESTIO CLXIV.

De poena primi peccati.

- 1 utrum mors fuerit poena peccati primorum parentum.
- 2 utrum poenae particulares primorum parentum convenienter assignentur in Scriptura.

QUAESTIO CLXV.

De tentatione primorum parentum.

- 1 utrum fuerit conveniens quod homo a diabolo tentaretur.
- 2 utrum modus, & ordo primae tentationis fuerit conveniens.

QUAESTIO CLXVI.

De studiofitate, quae est pars temperantiae.

- 1 quae sit materia studiofittatis.
- 2 utrum studiofittas sit pars temperantiae.

QUAESTIO CLXVII.

De curiositate, quae opponitur studiofittati.

- 1 utrum vitium curiositatis possit esse in cognitione intellectiva.
- 2 utrum sit in cognitione sensitiva.

QUAESTIO CLXVIII.

De modestia, quae consistit in exterioribus motibus corporis.

- 1 utrum in exterioribus motibus corporis, qui serio aguntur, possit esse virtus, & vitium.
- 2 utrum circa actiones ludii possit esse aliqua virtus.
- 3 utrum in superfluitate ludii possit esse aliquod vitium.

4 utrum in defectu ludii possit esse aliquod vitium.

QUAESTIO CLXIX.

De modestia, secundum quod consistit in exteriori apparatu.

- 1 utrum circa exteriorem apparatum possit esse virtus, & vitium.
- 2 utrum mulieres mortaliter peccent in superfluo ornatu.

QUAESTIO CLXX.

De praeceptis temperantiae.

- 1 utrum praecepta temperantiae convenienter in lege divina tradantur.
- 2 utrum praecepta de virtutibus annexis temperantiae convenienter in Scriptura tradantur.

QUAESTIO CLXXI.

De prophetia quantum ad eius essentiam.

- 1 utrum pertineat ad cognitionem.
- 2 utrum sit habitus.
- 3 utrum sit solum futurorum contingentium.
- 4 utrum Propheta cognoscat omnia prophetalia.
- 5 utrum Propheta discernat ea quae divinitus percipit, ab his quae proprio spiritu videt.
- 6 utrum prophetiae possit subesse falsum.

QUAESTIO CLXXII.

De causa prophetiae.

- 1 utrum prophetia sit naturalis.
- 2 utrum sit a Deo mediantibus Angelis.
- 3 utrum ad prophetiam requiratur naturalis dispositio.
- 4 utrum requiratur bonitas morum.
- 5 utrum sit aliqua prophetia a demonibus.
- 6 utrum propheta demonum aliquando dicant verum.

QUAESTIO CLXXIII.

De modo cognitionis propheticae.

- 1 utrum Propheta videant ipsam Dei essentiam.
- 2 utrum ipsa revelatio prophetica fiat per influentiam aliquarum specierum, vel per solam influentiam luminis.
- 3 utrum

utrum prophetica revelatio semper sit cum alienatione a sensibus.

- 4 utrum prophetia semper sit cum cognitione eorum quae prophetantur.

### QUAESTIO CLXXIV.

De divisione prophetiarum.

- 1 de divisione prophetiae in suas species.
- 2 utrum sit aliorum prophetia quae est sine imaginaria visione.
- 3 de diversitate graduum prophetiae.
- 4 utrum Moyses fuerit excellentissimus Prophetarum.
- 5 utrum aliquis comprehensor possit esse Propheta.
- 6 utrum prophetia crederetur per temporis processum.

### QUAESTIO CLXXV.

De raptu.

- 1 utrum anima hominis rapiatur ad divinam.
- 2 utrum raptus pertineat ad vim cognoscitivam, vel ad appetitivam.
- 3 utrum Paulus in raptu videretur Dei essentiam.
- 4 utrum fuerit alienatus a sensibus.
- 5 utrum totaliter fuerit anima a corpore separata in statu illo.
- 6 quid circa hoc sciveris, & quid ignoraveris.

### QUAESTIO CLXXVI.

De gratis gratis datis quantum ad genera linguarum.

- 1 utrum per gratiam linguarum homo adipiscatur scientiam omnium linguarum.
- 2 utrum donum linguarum sit excellentius quam donum prophetiae.

### QUAESTIO CLXXVII.

De gratia sermonis, sapientiae, seu scientiae.

- 1 utrum in sermone consistat aliqua gratia gratis data.
- 2 utrum hac gratia pertineat etiam ad mulieres.

### QUAESTIO CLXXVIII.

De gratia miraculorum.

- 1 utrum sit aliqua gratia gratis data sciendi miracula.
- 2 utrum mali possint facere miracula.

### QUAESTIO CLXXIX.

De divisione vitae per activam, & contemplativam.

- 1 utrum vita convenienter dividatur per activam, & contemplativam.
- 2 utrum divisio sit sufficiens.

### QUAESTIO CLXXX.

De vita contemplativa.

- 1 utrum vita contemplativa pertineat tantum ad intellectum, an consistat etiam in affectu.
- 2 utrum ad vitam contemplativam pertineant virtutes morales.
- 3 utrum vita contemplativa consistat solum in uno actu, aut in pluribus.
- 4 utrum ad vitam contemplativam pertineat consideratio cuiuscumque veritatis.
- 5 utrum vita contemplativa possit in statu viae elevari usque ad Dei visionem.
- 6 de moribus contemplationis, quas Dionysius assignat 4. cap. de div. Nom.
- 7 de delectatione contemplationis.
- 8 de duratione contemplationis.

### QUAESTIO CLXXXI.

De vita activa.

- 1 utrum omnia opera virtutum moralium pertineant ad vitam activam.
- 2 utrum prudentia pertineat ad vitam activam.
- 3 utrum doctrina pertineat ad vitam activam.
- 4 utrum vita activa maneat post hanc vitam.

### QUAESTIO CLXXXII.

De comparatione vitae activae ad contemplativam.

- 1 quae sit potior, seu dignior.

2 quae

- 2 *quæ sit maioris meriti.*
- 3 *utrum vita contemplativa impediatur per activam.*
- 4 *de ordine utriusque.*

QUAESTIO CLXXXIII.

De officiis, & statibus hominum in generali.

- 1 *quid facias in hominibus status.*
- 2 *utrum in hominibus debeant esse diversi status, sive diversa officia.*
- 3 *de differentia officiorum.*
- 4 *de differentia statuum.*

QUAESTIO CLXXXIV.

De statu perfectionis in communi.

- 1 *utrum perfectio attendatur secundum caritatem.*
- 2 *utrum aliquis possit esse perfectus in hac vita.*
- 3 *utrum perfectio huius vitae consistat principaliter in consiliis, vel in praeceptis.*
- 4 *utrum quicumque est perfectus, sit in statu perfectionis.*
- 5 *utrum praelati, & religiosi sint specialiter in statu perfectionis.*
- 6 *utrum omnes praelati sint in statu perfectionis.*
- 7 *utrum status Episcoporum sit perfectior quam status religiosorum.*
- 8 *de comparatione religiosorum ad plebanos, & archidiaconos.*

QUAESTIO CLXXXV.

De his quæ pertinent ad statum Episcoporum.

- 1 *utrum liceat Episcopatum appetere.*
- 2 *utrum liceat Episcopatum finaliter recusare.*
- 3 *utrum oporteat ad Episcopatum eligere meliorem.*
- 4 *utrum Episcopus possit ad religionem transire.*
- 5 *utrum liceat ei corporaliter suos subditos deferere.*
- 6 *utrum Episcopus possit habere proprium.*
- 7 *utrum peccet mortaliter bona ecclesiastica pauperibus non erogando.*
- 8 *utrum religiosi qui ad Episcopatum assumuntur, teneantur ad observantias regulares.*

QUAESTIO CLXXXVI.

De statu religionis quantum ad ea in quibus consistit principaliter religionis status.

- 1 *utrum status religiosorum sit perfectus.*
- 2 *utrum religiosi teneantur ad omnia consilia.*
- 3 *utrum voluntaria paupertas requiratur ad religionem.*
- 4 *utrum requiratur continentia.*
- 5 *utrum requiratur obedientia.*
- 6 *utrum requiratur quod hæc cadant sub voto.*
- 7 *de sufficientia horum votorum.*
- 8 *utrum votum obedientie sit potissimum inter tria vota.*
- 9 *utrum religiosi semper peccent mortaliter transgrediendo ea quæ sunt regulæ.*
- 10 *utrum religiosus eodem genere peccati gravius peccet quam secularis.*

QUAESTIO CLXXXVII.

De his quæ competunt religiosi.

- 1 *utrum liceat eis docere, & prædicare, & alia huiusmodi facere.*
- 2 *utrum liceat eis de negotiis secularibus se intrinicare.*
- 3 *utrum teneantur manibus operari.*
- 4 *utrum liceat eis de elemosinis vivere.*
- 5 *utrum liceat eis mendicare.*
- 6 *utrum liceat eis vestimenta ceteris viliora deferre.*

QUAESTIO CLXXXVIII.

De differentia religionum.

- 1 *utrum sint diversæ religiones, vel una tantum.*
- 2 *utrum aliqua religio institui possit ad opera vite activæ.*
- 3 *utrum aliqua religio institui possit ad militandum.*
- 4 *utrum aliqua religio institui possit ad prædicandum, & huiusmodi opera exercenda.*
- 5 *utrum aliqua religio possit institui ad studium scientiæ.*
- 6 *utrum religio quæ ordinatur ad vitam contemplativam, sit potior ea quæ ordinatur ad vitam activam.*
- 7 *utrum habere aliquid in communi diminuat de perfectione religionis.*
- 8 *utrum religio solitariorum sit præferenda religioni in societate viventium.*

QUAESTIO

## De ingressu religionis .

- 1 utrum illi qui non sunt exercitati in observantia praeceptorum, debeant religionem ingredi .
- 2 utrum liceat aliquos voto obligare ad religionis ingressum .
- 3 utrum illi qui voto obligantur ad religionis ingressum, teneantur votum implere .
- 4 utrum illi qui vovens religionem intrare, teneantur ibi perpetuo remanere.
- 5 utrum pueri sine recipiendi in religionem.
- 6 utrum propter parentum obsequium aliqui debeant retrahi a religionis ingressu.
- 7 utrum presbyteri curati, vel archidiaconi possint ad religionem transire.
- 8 utrum de una religione possit aliquis transire ad aliam.
- 9 utrum aliquis debeat alios inducere ad religionis ingressum.
- 10 utrum requiratur magna deliberatio cum consanguineis, & amicis ad religionis ingressum.

F I N I S.

# D I V I T H O M A E A Q U I N A T I S D O C T O R I S A N G E L I C I S U M M A E T H E O L O G I C A E

## S E C U N D A S E C U N D A E.

### Q U A E S T I O C I.

*De pietate,  
in quatuor articulos divisa.*



Einde post religionem considerandum est de pietate; cuius opposita vicia ex ipsius consideratione innascuntur.

Circa pietatem ergo quærantur quatuor.

Primo, ad quos pietas se extendat.

Secundo, quid per pietatem aliquibus exhibeatur.

Tertio, utrum pietas sit specialis virtus.

Quarto, utrum religionis obtentu sit pietatis officium prætermittendum.

### A R T I C U L U S I. 335

*Utrum pietas se extendat ad determinatas personas aliquorum hominum.*

III. dist. xxxiii. quæst. iiii. art. 4. quæst. i. cor. & ad 2. & I. Timoth. iv.

**A**D primum sic proceditur. Videtur quod pietas non se extendat ad determinatas personas aliquorum hominum. Dicit enim Augustinus in X. de civit. Dei (cap. 2. a med.) quod pietas proprie Dei cultus intelligi solet, quam Greci (*θεοσεβειαν*) eusebiam vocant. Sed Dei cultus non dicitur per comparationem ad homines, sed solum ad Deum. Ergo pietas

non se extendit determinate ad aliquas hominum personas.

2. Præterea. Gregorius dicit in I. Moral. (cap. xv. cir. med.) *Pietas in die suo convivium exhibet, quia cordis viscera misericordiae operibus replet.* Sed opera misericordiae sunt omnibus exhibenda, ut patet per Augustinum in I. de doctr. christi. (cap. xxx.) Ergo pietas non se extendit determinate ad aliquas speciales personas.

3. Præterea. Multæ sunt aliæ in humanis rebus communicationes præter consanguineorum, & convivium communicationem, ut patet per Philosophum in VIII. Ethicor. (cap. xi. & xii.) & super quamlibet eorum aliqua amicitia fundatur, quæ videtur esse pietatis virtus, ut dicit Glossa (interl.) II. ad Timoth. iij. super illud, *Habentes quidem speciem pietatis.* Ergo non solum ad consanguineos, & concives pietas se extendit.

Sed contra est quod Tullius dicit in sua Rhetor. (Lib. II.) de invent. aliquant. ante fin. quod *pietas est per quam sanguine iundis, patriæque benevolis officium, et diligens tributur cultus.*

Respondendo dicendum, quod homo efficitur diversimode aliis debitor, secundum eorum diversam excellentiam, & diversa beneficia ab eis suscepta. In utroque autem Deus summum obtinet locum; qui & excellentissimus est, & est nobis essendi, & gubernationis primum principium; secundario vero nostri esse, & gubernationis principia sunt parentes, & patria, a quibus, & in qua nati, & nutriti sumus. Et ideo post Deum est homo maxime debitor parentibus, & patriæ.

*S: T: Oper. Tom. XXIII.*

trior. Unde sicut ad religionem pertinet cultum Deo exhibere; ita secundario gradu ad pietatem pertinet exhibere cultum parentibus, & patriæ.

In cultu autem parentum includitur cultus omnium consanguineorum: quia etiam consanguinei ex hoc dicuntur, quod ex eisdem parentibus processerint, ut patet per Philosophum in VIII. Ethicor. (cap. XII. ante med.) In cultu autem patriæ intelligitur cultus omnium concivium, & omnium patriæ amicorum. Et ideo ad hos pietas principaliter se extendit.

Ad primum ergo dicendum, quod in maiori includitur minus. Et ideo cultus qui Deo debetur, includit in se, sicut aliquid particulare, cultum qui debetur parentibus: unde dicitur Malach. I. 6. *Si ego pater, ubi est honor meus?* Et ideo nomen pietatis etiam ad divinum cultum refertur.

Ad secundum dicendum, quod, sicut Augustinus dicit in X. de civ. Dei (cap. I. a med.) *more vulgi nomen pietatis etiam in operibus misericordiae frequentatur: quod ideo arbitror evenisse, quia hæc fieri præcipue mandat Deus quæ sibi præ sacrificium placere testatur; ex qua consuetudine factum est ut & Deus ipse pius dicatur.*

Ad tertium dicendum, quod communicationes consanguineorum, & concivium magis referuntur ad principia nostri esse, quam alie communicationes: & ideo ad has nomen pietatis magis extenditur.

## ARTICULUS II. 336

*Utrum pietas exhibeat parentibus sustentationem.*

**A**D secundum sic proceditur. Videtur quod pietas non exhibeat parentibus sustentationem. Ad pietatem enim videtur pertinere illud præceptum Decalogi, *Honora patrem tuum & matrem tuam*. Sed ibi non præcipitur nisi honoris exhibitio. Ergo ad pietatem non pertinet sustentationem parentibus exhibere.

2. Præterea. Illis homo debet thesaurizare quos tenetur sustentare. Sed secundum Apostolum, ut habetur II. ad Corinth. XII. 14. *filii non debent thesaurizare parentibus*. Ergo non tenentur eos per pietatem sustentare.

3. Præterea. Pietas non solum extendit se ad parentes, sed etiam ad alios consanguineos, & concives, ut dictum

est (art. præc.) Sed non tenetur aliquis omnes consanguineos, & concives sustentare. Ergo nec etiam tenetur ad sustentationem parentum.

Sed contra est quod Dominus Matth. XV. redarguit Phariseos, quod impediebant filios ne parentibus sustentationem exhiberent.

Respondeo dicendum, quod parentibus, & concivibus aliquid debetur dupliciter: uno modo per se; alio modo per accidens. Per se quidem debetur eis id quod decet patrem, inquantum pater est: qui cum sit superior, quasi principium filii existens, debetur ei a filio reverentia, & obsequium.

Per accidens autem aliquid debetur patri, quod decet eum accipere secundum aliquid quod ei accidit: puta si sit infirmus, quod visiteretur, & eius curationi intendatur; si sit pauper, quod sustentetur; & sic de aliis huiusmodi, quæ omnia sub debito obsequio continentur. Et ideo Tullius dicit (Lib. II. de invent. aliquant. ante fi.) quod *pietas exhibet & officium, & cultum*; ut officium referatur ad obsequium, cultus vero ad reverentiam, sive honorem: quia, ut dicit Augustinus in X. de civit. Dei (cap. I. circ. med.) *dicimus colere homines, quos honorifica vel recordatione, vel presentia frequentamus*.

Ad primum ergo dicendum, quod in honoratione parentum intelligitur omnis subventio quæ debet parentibus exhiberi, ut Dominus interpretatur Matth. XV. & hoc ideo, quia subventio fit patri ex debito, tamquam maiori.

Ad secundum dicendum, quod quia pater habet rationem principii, filius autem habet rationem a principio existentis; ideo per se patri convenit ut subveniat filio: & propter hoc non solum ad horam debet ei subvenire, sed ad totam suam vitam; quod est thesaurizare. Sed quod filius aliquid conferat patri, hoc est per accidens ratione alienius necessitatis instantis, in qua tenetur ei subvenire, non autem thesaurizare quasi in longinquum: quia naturaliter non parentes filiorum, sed filii parentum sunt successores.

Ad tertium dicendum, quod cultus, & officium, ut Tullius dicit (loc. sup. cit.) debetur omnibus sanguine iunctis, & patriæ benevolis; non tamen æqualiter omnibus, sed præcipue parentibus, aliis autem secundum propriam facultatem, & decentiam personarum.



## ARTICULUS III. 537

*Utrum pietas sit specialis virtus ab aliis distincta.*

**A**D tertium sic proceditur. Videtur quod pietas non sit specialis virtus ab aliis distincta. Exhibere enim obsequium, & cultum aliquibus ex amore procedit. Sed hoc pertinet ad pietatem. Ergo pietas non est virtus a caritate distincta.

2. Præterea. Cultum Deo exhibere est proprium religionis. Sed etiam pietas exhibet cultum Deo, ut dicit Augustinus X. de civit. Dei (cap. 1. a. mod.) Ergo pietas non distinguitur a religione.

3. Præterea. Pietas quæ exhibet cultum, & officium patriæ, videtur esse idem cum iustitia legali, quæ respicit bonum commune. Sed iustitia legalis est virtus generalis, ut patet per Philosophum in V. Ethicor. (cap. 1. & 11.) Ergo pietas non est virtus specialis.

Sed contra est quod ponitur a Tullio pars iustitiæ (Lib. II. de invent. aliquant. ante fi.)

Respondendo dicendum, quod aliqua virtus specialis est ex hoc quod respicit aliquod obiectum secundum aliquam specialem rationem. Cum autem ad rationem iustitiæ pertineat quod debitum alii reddat; ubi invenitur specialis ratio debiti alicui personæ, ibi est specialis virtus. Debetur autem aliquid alicui specialiter, quia est connaturale principium producens in esse & gubernans. Hoc autem principium respicit pietas, in quantum parentibus, & patriæ, & his qui ad hæc ordinantur, officium & cultum impendit.

Et ideo pietas est specialis virtus.

Ad primum ergo dicendum, quod sicut religio est quedam protestatio fidei, spei, & caritatis, quibus homo primordialiter ordinatur in Deum; ita etiam pietas est quedam protestatio caritatis, quam quis habet ad parentes, & ad patriam.

Ad secundum dicendum, quod Deus longe excellentiori modo est principium efficiendi, & gubernationis, quam pater, vel patria. Et ideo alia virtus est religio, quæ cultum Deo exhibet, a pietate, quæ exhibet cultum parentibus, & patriæ. Sed ea quæ sunt creaturarum, per quamdam super excellentiam, & causalitatem transferuntur in Deum, ut Dionysius dicit in Lib. de div. Nom.

(cap. 1. lect. 3.) unde per excellentiam pietas cultus Dei nominatur, sicut & Deus excellenter dicitur pater noster.

Ad tertium dicendum, quod pietas se extendit ad patriam, secundum quod est nobis quoddam efficiendi principium; sed iustitia legalis respicit bonum patriæ, secundum quod est bonum commune: & ideo iustitia legalis magis habet quod sit virtus generalis quam pietas.

## ARTICULUS IV. 538

*Utrum occasione religionis sint prætermittenda pietatis officia in parentes.*

**A**D quartum sic proceditur. Videtur quod occasione religionis sint prætermittenda pietatis officia in parentes. Dicit enim Dominus Luc. xiv. 26. *Si quis venit ad me, & non odit patrem suum, & matrem, & uxorem, & filios, & fratres, & sorores, adhuc autem & animam suam, non potest me esse discipulus.* Unde & in laudem Iacobi, & Ioannis Matth. xv. 22. dicitur, quod *reliquit vestibus, & patre, secuti sunt Christum*: & in laudem Levitarum dicitur Deuter. xxxiii. 9. *Qui dixerit patri suo, & matri suæ, Nescio vos, & fratribus suis, Ignoro vos, & nescierunt filios suos, hi infoderunt eloquium tuum.* Sed ignorando parentes, & alios consanguineos, vel etiam odendo eos, necesse est quod prætermittantur pietatis officia. Ergo propter religionem officia pietatis tunc prætermittenda.

2. Præterea. Matth. vii. 22. & Luc. ix. 38. dicitur, quod Dominus dicens tibi, *Permitte me primum ire, & sepelire patrem meum*, respondit: *Sine us mortui sepeliant mortuos suos. Tu autem vade, & annuntia regnum Dei*: quod pertinet ad religionem; sepultura autem patris pertinet ad pietatis officium. Ergo pietatis officium est prætermittendum propter religionem.

3. Præterea. Deus per excellentiam dicitur pater noster. Sed sicut per pietatis obsequia colimus parentes, ita per religionem colimus Deum. Ergo prætermittenda sunt pietatis obsequia propter religionis cultum.

4. Præterea. Religiosi tenentur ex voto, quod transgredi non licet, suæ religionis obliquantias implere, secundum quas suis parentibus subvenire impediuntur: tum propter paupertatem, quia proprio carent: tum etiam propter obedientiam,

A 2

fiam, quia sine licentia suorum praetorum eis claustrum exire non licet. Ergo propter religionem praetermittenda sunt pietatis officia in parentes.

Sed contra est quod Dominus Matth. xv. rearguit Phariseos, qui intuitu religionis honorem parentibus debitum subtrahere debebant.

Respondendo dicendum, quod religio & pietas sunt duae virtutes. Nulla autem virtus alii virtuti contrariatur, aut repugnat: quia secundum Philokophum in Praedicamentis (in cap. de oppos.) bonum non est bono contrarium. Unde non potest esse quod pietas, & religio sit mutuo impediatur, ut propter actum unius actus alterius excludatur. Cuiuslibet autem virtutis actus, ut ex supra dictis patet (1. 2. quaest. vii. art. 2. & quaest. xviii. art. 3.) debitis circumstantiis limitatur: quas si praetereat, iam non erit virtutis actus, sed vitii. Unde ad pietatem pertinet officium, & cultura parentibus exhibere secundum debitum modum. Non est autem debitus modus ut plus homo tendat ad colendum patrem quam ad colendum Deum; sed, sicut Ambrosius dicit super Luc. (cap. xii. super illud, *Erunt quinque &c.* cir. fi.) necessitudinis generis divinae religionis pietas auferatur.

Si ergo cultus parentum abstrahat nos a cultu Dei, iam non esset pietas, parentum insistere cultui contra Deum. Unde Hieronymus dicit in epist. ad Heliodorum (2. princ.) *Per calcatum perge patrem; per calcatam perge matrem, ad vexillum eras evola: summum genus pietatis est in hac re fuisse crudelem.* Et ideo in tali casu dimittenda sunt officia pietatis in parentes propter divinum religionis cultum: Si vero exhibendo debita obsequia parentibus, non abstrahamur a divino cultu, hoc iam pertinebit ad pietatem: & sic non oportebit propter religionem pietatem deserere.

Ad primum ergo dicendum, quod Gregorius (hom. xxxvii. in Evang. a princ.) exponens illud verbum Domini dicit, *quod parentes, quos adversarios in via Dei patimur, amando, & fugiendo noscitur debemus.* Si enim parentes nostri nos provocent ad peccandum; & abstrahant nos a cultu divino, debemus quantum ad hoc eos deserere, & odire. Et hoc modo dicuntur Legitae suos consanguineos ignorasse, quia idololatriis secundum mandatum Domini non pepercerunt, ut habetur Exod. xxxiii. Iacobus autem, &

Ioannes laudantur ex hoc quod sunt secuti Dominum dimisso parente, non quia eorum pater eos provocare ad malum, sed quia aliter adhibebant ipsum posse vitam transigere, eis Christum sequentibus.

Ad secundum dicendum, quod Dominus ideo prohibuit discipulum a sepultura patris, quia, sicut Chrysostomus dicit (hom. xxviii. in Matth. 2. med.) *per hoc cum Dominus a multis malis eripuit, puta ludibus, & maioribus, & aliis quae hinc expectantur: post sepulcrum enim erat necesse & testamenta scrutari, & hereditatis divisionem, & alia huiusmodi; & praecipue quia alii erant, qui complere poterant huius funeri sepulcrum.* Vel, sicut Cyrillus exponit super Luc. (cap. ix. & hab. in Cat. aur. d. Th.) *discipulus ille non petiit quod patrem iam defunctum sepeliret, sed adhuc viventem in senectute sustentaret, usquequo sepeliretur: quod Dominus non concessit, quia erant alii qui eius curam habere poterant, linea parentele adstricti.*

Ad tertium dicendum, quod hoc ipsum quod parentibus carnalibus ex pietate exhibemus, in Deum referimus; sicut & alia misericordiae opera, quae quibuscumque proximis impendimus, Deo exhibita videntur, secundum illud Matth. xxv. 40. *Quod uni ex minimis meis fecistis, mihi fecistis.* Et ideo si carnalibus parentibus nostra obsequia sint necessaria, ut sine his sustentari non possint, nec nos ad aliquid contra Deum inducant, non debemus intuitu religionis eos deserere. Si autem sine peccato eorum obsequiis vacare non possumus, vel etiam si abique nostro obsequio possunt sustentari, licitum est eorum obsequia praetermittere, ad hoc quod amplius religioni vacemus.

Ad quartum dicendum, quod aliud dicendum est de eo qui est adhuc in saeculo constitutus, & aliud de eo qui iam est in religione professus. Ille enim qui est in saeculo constitutus, si habet parentes, qui sine ipso sustentari non possunt, non debet eis relictis religionem intrare, quia transgredietur preceptum de honoratione parentum: quavis quidam fiant, quod etiam in hoc casu licita posset eos deserere, eorum curam Deo committens. Sed si quis recte consideret, hoc esset tentare Deum; cum habens ex humano consilio quid ageret, periculo parentes exponeret sub ipse divini auxilii. Si vero sine eo parentes vitam trans-

igere possent, licitum esset ei desertis parentibus religionem intrare : quia filii non tenentur ad sustentationem parentum nisi causa necessitatis, ne dictum est ( in corp. art. ). Ille vero qui iam est in religione professus, reputatur iam quasi mortuus mundo : unde non debet occasione sustentationis parentum exire claustrum, in quo Christo conspeditur, & se iterum secularibus negotiis implicare ; tenetur tamen, salva sui praelati obedientia, & suae religionis statu, pium studium adhibere, qualiter eius parentibus subveniatur.

QUAESTIO CII.

*De observantia, & partibus eius, in tres articulos divisa.*

**D**Einde considerandum est de observantia, & partibus eius, per quas de oppolitis vitiis erit manifestum.

Circa observantiam autem quaeruntur tria.

Primo, utrum observantia sit specialis virtus ab aliis distincta.

Secundo, quid observantia exhibeat.

Tertio de comparatione eius ad pietatem.

ARTICULUS I. 339

*Utrum observantia sit specialis virtus ab aliis distincta.*

*Sup. quæst. lxxx. & infra quæst. ciii. art. 3. corp.*

**A**D primum sic proceditur. Videtur quod observantia non sit specialis virtus ab aliis distincta. Virtutes enim distinguuntur secundum obiecta. Sed obiectum observantiae non distinguitur ab obiecto pietatis : dicit enim Tullius in sua Rhet. ( Lib. II. de invent. aliquant. ante fi. ) quod *observantia est per quam homines aliqua dignitate antecedentes quodam cultu, & honore dignantur*. Sed cultus, & honorem etiam pietas exhibet parentibus, qui dignitate antecedunt. Ergo observantia non est virtus distincta a pietate.

2. Præterea. Sicut hominibus in dignitate constitutis, debetur honor & cultus, ita etiam eis qui excellunt scientia, & virtute. Sed non est aliqua specialis virtus per quam honorem & cultum exhibeamus hominibus qui scientiæ, vel virtutis excellentiam habent. Ergo etiam

observantia, per quam cultum & honorem exhibemus his qui nos in dignitate antecedunt, non est specialis virtus ab aliis distincta.

3. Præterea. Hominibus in dignitate constitutis multa debentur, ad quæ solvenda lex cogit, secundum illud ad Rom. xiii. 7. *Reddite omnibus debita, cui tributum, tributum &c.* Ea vero ad quæ per legem compellimur, pertinent ad iustitiam legalem, seu etiam ad iustitiam specialem. Ergo observantia non est per se specialis virtus ab aliis distincta.

Sed contra est quod Tullius ( loc. sup. cit. ) dividit observantiam aliis iustitiæ partibus, quæ sunt speciales virtutes.

Respondeo dicendum, quod, sicut ex dictis patet ( quæst. præc. art. 1. & 31 & quæst. lxxx. ) necesse est ut eo modo per quemdam ordinatum descensum distinguantur virtutes, sicut excellentia personarum quibus est aliquid reddendum. Sicut autem carnalis pater particulariter participat rationem principii, quæ universaliter invenitur in Deo ; ita etiam persona quæ quantum ad aliquid providentiam circa nos gerit, particulariter participat proprietatem patris : quia pater est principium & generationis, & educationis, & disciplinæ, & omnium quæ ad perfectionem humanæ vitæ pertinent ; persona autem in dignitate constituta est sicut principium gubernationis respectu aliquarum rerum ; sicut princeps civitatis in rebus civilibus, dux autem exercitus in rebus bellicis, magister autem in disciplinis ; & simile est in aliis. Et inde est quod omnes tales personæ patres appellantur, propter similitudinem curæ ; sicut IV. Reg. v. 53. servi Naaman dixerunt ad eum : *Pater, & ceteri tibi gratiam dixeris*. Et sic.

Et ideo sicut sub religione, per quam cultus tribuitur Deo, quodammodo invenitur pietas, per quam coluntur parentes ; ita sub pietate invenitur observantia, per quam cultus & honor exhibetur personis in dignitate constitutis.

Ad primum ergo dicendum, quod, sicut dictum est supra ( quæst. præc. art. 3. ad 2. ) religio per quamdam supereminentiam pietatis dicitur ; & tamen pietas proprie dicta a religione distinguitur : ita etiam pietas per quamdam excellentiam potest dici observantia ; & tamen observantia proprie dicta a pietate distinguitur.

Ad secundum dicendum, quod aliquis

ex hoc quod est in aliqua dignitate constitutus, non solum quamdam status excellentiam habet, sed etiam quamdam potestatem gubernandi subditos: unde competit sibi ratio principii, prout est aliorum gubernator. Ex hoc autem quod aliquis habet perfectionem scientiæ, vel virtutis, non sortitur rationem principii quantum ad alios, sed solum quamdam excellentiam in seipso. Et ideo specialiter quædam virtus determinatur ad exhibendum honorem, & cultum his qui sunt in dignitate constituti. Verum quia per scientiam, & virtutem, & omnia alia huiusmodi aliquis idoneus redditur ad dignitatis statum, reverentia quæ propter quamcumque excellentiam aliquibus exhibetur, ad eandem virtutem pertinet.

Ad tertium dicendum, quod ad iustitiam specialem proprie sumptam pertinet reddere æquale ei cui aliquid debetur. Quod quidem non potest fieri ad virtuosos, & ad eos qui bene statu dignitatis utuntur, sicut nec ad Deum, nec ad parentes. Et ideo ad quamdam virtutem adiunctam hoc pertinet, non autem ad iustitiam specialem, quæ est principalis virtus. Iustitia vero legalis se extendit ad actus omnium virtutum, ut supra dictum est (quæst. lxxiii. art. 6.)

## ARTICULUS II. 540

*Utrum ad observantiam pertineat exhibere cultum & honorem his qui sunt in dignitate constituti.*

**A**D secundum sic proceditur. Videtur quod ad observantiam non pertineat exhibere cultum & honorem his qui sunt in dignitate constituti. Quia, ut Augustinus dicit in X. de civit. Dei (cap. 1. in med.) colere dicimur illas personas quas in quodam honore habemus: & sic idem esse videtur cultus, & honor. Inconvenienter ergo determinatur quod observantia exhibet in dignitate constitutis cultum, & honorem.

2. Præterea. Ad iustitiam pertinet reddere debitum: unde & ad observantiam, quæ ponitur iustitiæ pars, pertinet. Sed cultum, & honorem non debemus omnibus in dignitate constitutis, sed solum his qui super nos prælationem habent. Ergo inconvenienter determinatur quod eis observantia exhibet cultum, & honorem.

3. Præterea. Superioribus nostris in

dignitate constitutis non solum debemus honorem, sed etiam timorem, & aliquam munerum largitionem, secundum illud ad Rom. xiii. 7. *Reddite omnibus debita: cui tributum, tributum; cui vestigal, vestigal; cui timorem, timorem; cui honorem, honorem*: debemus etiam eis reverentiam, & subiectionem, secundum illud Hebr. xiii. 17. *Obedite præpositis vestris, & subiaceo eis*. Non ergo convenienter determinatur quod observantia exhibet cultum, & honorem.

Sed contra est quod Tullius dicit (Lib. II. de invent. aliquant. ante fin.) quod *observantia est per quam homines aliqua dignitate antecedentes quodam cultu, & honore dignantur*.

Respondeo dicendum, quod ad eos qui sunt in dignitate constituti, pertinet gubernare subditos. Gubernare autem est movere aliquos in debitum finem, sicut nauta gubernat navem, ducendo eam ad portum. Omne autem movens habet excellentiam quamdam, & virtutem supra id quod movetur. Unde oportet quod in eo qui est in dignitate constitutus, primo consideretur excellentia status cum quodam potestate in subditos, secundo ipsum gubernationis officium.

Ratione igitur excellentiæ debetur ei honor, qui est quædam recognitio excellentiæ alicuius; ratione autem officii gubernationis debetur ei cultus, qui in quodam obsequio consistit, dum scilicet aliquis eorum obedit imperio, & vicem beneficii eorum pro suo modo rependit.

Ad primum ergo dicendum, quod in cultu non solum intelligitur honor, sed etiam quæcumque alia quæ pertinent ad decentes actus, quibus homo ad alium ordinatur.

Ad secundum dicendum, quod, sicut supra dictum est (quæst. lxxx.) duplex est debitum. Unum quidem legale, ad quod reddendum homo lege compellitur: & sic debet homo honorem, & cultum his qui sunt in dignitate constituti, prælationem super ipsum habentes. Aliud autem est debitum morale, quod ex quadam honestate debetur: & hoc modo debemus cultum, & honorem his qui sunt in dignitate constituti, etiam si non sumus eis subiecti.

Ad tertium dicendum, quod excellentiæ eorum qui sunt in dignitate constituti, debetur honor ratione sublimioris gradus; timor autem ratione potestatis, quam habent ad coercendum; officio vero

ro gubernacionis ipsorum debetur obedientia, per quam subditi moventur ad imperium praesidentium; & tributa, quae sunt quaedam stipendia laboris ipsorum.

## ARTICULUS III. 541

*Utrum observantia sit potior virtus quam pietas.*

**A**D tertium sic proceditur. Videtur quod observantia sit potior virtus quam pietas. Princeps enim, cui cultus per observantiam exhibetur, comparatur ad patrem, qui pietate colitur, sicut universalis gubernator ad particularem: nam familia, quae pater gubernat, est pars civitatis, quae gubernatur a principe. Sed universalis virtus potior est, & magis ei inferiora subduntur. Ergo observantia est potior virtus quam pietas.

2. Praeterea. Illi qui sunt in dignitate constituti, curam gerunt boni communis. Conspiciunt autem pertinent ad bonum privatum, quod est propter bonum commune contemnendum: unde laudabiliter aliqui pro bono communi periculis mortis seipso exponunt. Ergo observantia, per quam exhibetur cultus his qui sunt in dignitate constituti, est potior virtus quam pietas, quae exhibet cultum personis sanguine iunctis.

3. Praeterea. Honor, & reverentia maxime debetur virtuosus post Deum. Sed virtuosus exhibetur honor, & reverentia per observantiam virtutem, ut dictum est (art. 1. huius quaest. ad 3.) Ergo observantia est praecipua post religionem.

Sed contra est quod praecipua legis dantur de actibus virtutum. Immediate autem post praecipua religionis, quae pertinent ad primam tabulam, subditur praecipuum de honoratione parentum, quod pertinet ad pietatem. Ergo pietas immediate sequitur religionem ordine dignitatis.

Respondetur dicendum, quod personis in dignitate constitutis potest aliquid exhiberi dupliciter. Uno modo in ordine ad bonum commune, puta cum aliquis eis servit in administratione reipublicae: & hoc iam non pertinet ad observantiam, sed ad pietatem, quae cultum exhibet non solum patri, sed etiam patriae.

Alio modo exhibetur, aliquid personis in dignitate constitutis pertinens specialiter ad personalem eorum utilitatem, vel gloriam: & hoc proprie pertinet ad

observantiam, secundum quod a pietate distinguitur.

Et ideo comparatio observantiae ad pietatem necesse est quod attendatur secundum diversas habitudines diversarum personarum ad nos, quas respicit utraque virtus. Manifestum est autem quod personae parentum, & eorum qui sunt nobis sanguine coniuncti, substantialius nobis coniunguntur quam personae quae sunt in dignitate constitutae: magis enim ad substantiam pertinet generatio, & educatio, cuius principium est pater, quam exterior gubernatio, cuius principium sunt illi qui in dignitate constituntur. Et secundum hoc pietas observantiae praeminet, in quantum cultum reddit personis magis coniunctis, quibus magis obligamur.

Ad primum ergo dicendum, quod princeps comparatur ad patrem, sicut universalis virtus ad particularem, quantum ad exteriorem gubernationem, non autem quantum ad hoc quod pater est principium generationis: sic enim comparatur ad ipsum virtus divina, quae est omnium productiva in esse.

Ad secundum dicendum, quod ex ea parte qua personae in dignitate constitutae ordinantur ad bonum commune, non pertinet earum cultus ad observantiam, sed ad pietatem, ut dictum est (in corp. art.)

Ad tertium dicendum, quod exhibitio honoris, vel cultus non solum est proportionanda personae, cui exhibetur secundum se consideratam, sed etiam secundum quod ad exhibentes comparatur. Quamvis ergo virtuosus secundum se consideratus sit magis digni honore quam personae parentum; tamen filii magis obligantur propter beneficia suscepta ab ipsis parentibus, & coniunctionem naturalem, ad exhibendum cultum, & honorem parentibus quam extraneis virtuosus.

## QUAESTIO CIII.

*De dulia.*

*in quatuor articulos divisa.*

**D**Einde considerandum est de partibus observantiae: & primo de dulia, quae exhibet honorem, & cetera ad hoc pertinentia personis superioribus; secundo de obedientia, per quam earum obediunt imperio.

A 4 Cir-

Circa primum quaeruntur quatuor.  
Primo, utrum honor sit aliquid spirituale, vel corporale.

Secundo, utrum honor debeat solis superioribus.

Tertio, utrum dulia, cuius est exhibere honorem, & cultum superioribus, sit specialis virtus a latría distincta.

Quarto, utrum per species distinguatur.

## ARTICULUS I. 543

*Utrum honor importet aliquid corporale.*

**A**D primum sic proceditur. Videtur quod honor non importet aliquid corporale. Honor enim est exhibitio reverentiae in testimonium virtutis, ut potest accipi a Philosopho in I. Eth. (cap. v.) Sed exhibitio reverentiae est aliquid spirituale: revereri enim est actus timoris, ut supra habitum est (quaest. lxxxv. art. 2. ad 1.) Ergo honor est aliquid spirituale.

2. Praeterea. Secundum Philosophum in IV. Eth. (cap. xii. aliquant. a princ.) *honor est primum virtutis*. Virtutis autem, quae principaliter in spiritualibus consistit, primum non est aliquid corporale, cum primum sit potius merito. Ergo honor non consistit in corporalibus.

3. Praeterea. Honor a laude distinguitur, & etiam a gloria. Sed laus, & gloria in exterioribus consistunt. Ergo honor consistit in interioribus, & spiritualibus.

Sed contra est, quod Hieronymus exponens illud I. ad Tim. v. *Qui bene praesunt Presbyteri, duplici honore digni habeantur* &c. dicit: (ep. ad Ageruch. inter princ. & med.) „Honor in praesentiarum vel pro elemosyna, vel pro munere accipitur. „Utrumque autem horum ad corporalia pertinet. Ergo honor in corporalibus consistit.

Respondetur dicendum, quod honor testimonificationem quandam importat de excellentia alicuius. Unde homines qui volunt honorari, testimonium suae excellentiae quaerunt, ut per Philosophum patet in I. Eth. (cap. v.) & in VIII. (cap. viii.) Testimonium autem redditur vel coram Deo, vel coram hominibus. Coram Deo quidem, qui inspector est cordium, testimonium conscientiae sufficit; & ideo honor quoad Deum potest consistere in solo interiori motu cor-

dis, dum scilicet aliquis recogitat vel Dei excellentiam, vel etiam alterius hominis coram Deo.

Sed quoad homines aliquis non potest testimonium ferre nisi per aliqua signa exteriora vel verborum, puta cum aliquis ore pronuntiat excellentiam alicuius; vel factis, sicut inclinationibus, oblationibus, & aliis huiusmodi; vel etiam exterioribus rebus, puta (a) in munerum oblatione, aut imaginum institutione, vel aliis huiusmodi. Et secundum hoc honor in signis exterioribus, & corporalibus consistit.

Ad primum ergo dicendum, quod reverentia non est idem quod honor. Sed ex una parte est primum motivum ad honorandum, inquantum scilicet aliquis ex reverentia quam habet ad aliquem, eum honorat; ex alia vero parte est honoris finis, inquantum scilicet aliquis ad hoc honoratur ut in reverentia habeatur ab aliis.

Ad secundum dicendum, quod, sicut Philosophus ibidem dicit, honor non est iustificans virtutis primum: sed nihil potest esse in humanis rebus, & corporalibus maius honore, inquantum scilicet ipsae corporales res sunt signa demonstrativa excellentiae virtutis. Est autem debitum bono, & pulchro, ut manifestetur, secundum illud Matth. v. 15. *Neque accendunt lucernam, & ponunt eam sub medio, sed super candelabrum, ut luceat omnibus qui in domo sunt.* Et pro tanto primum virtutis dicitur honor.

Ad tertium dicendum, quod laus distinguitur ab honore dupliciter. Uno modo quia laus consistit in solis signis verborum; honor autem in quibuscunque exterioribus signis; & secundum hoc laus in honore includitur. Alio modo quia per exhibitionem honoris testimonium reddimus de excellentia bonitatis alicuius absolute; sed per laudem testimoniamur de bonitate alicuius in ordine ad finem; sicut laudamus bene operantem propter finem. Honor autem est etiam optimorum, quae non ordinantur ad finem, sed iam sunt in fine, ut patet per Philosophum in I. Ethic. (cap. v.) Gloria autem est effectus honoris, & laudis: quia ex hoc quod testimoniamur de bonitate alicuius, clarescit bonitas eius in notitia plurimorum; & hoc importat nomen gloriae: nam gloria dicitur, quasi (κλῆρις) claria; unde ad Rom. ult. dicitur quaedam glossa Augustini (ord. lib. III. cont.:

(a) Ita communiter, Cui, Alico, in exteriorum (lege interiorum) oblatione.

cont. Maximin. cap. xiiii. a med.) quod gloria est clara cum laude notitia.

ARTICULUS II. 543

Utrum honor proprie debeat superioribus.

Ad Hebr. xi. lect. 3. princ.

**A**D secundum sic proceditur. Videtur quod honor non proprie debeat superioribus. Angelus enim est superior quolibet homine viatore, secundum illud Matth. xi. 11. *Qui minor est in regno celorum, maior est Ioanne Baptista*. Sed Angelus prohibuit Ioannem volentem se honorare, ut patet Apoc. ult. Ergo honor non debetur superioribus.

2. Præterea. Honor debetur alicui in testimonium virtutis, ut dictum est (art. præc. & quæst. lxiii. art. 3.) Sed quandoque contingit quod superiores non sunt virtuosius. Ergo eis non debetur honor; sicut nec dæmonibus, qui tamen superiores nobis sunt ordine naturæ.

3. Præterea. Apostolus dicit ad Rom. xii. 10. *Honore invicem prævenientes*; & I. Pet. ii. 17. *Omnes honorate*. Sed hoc non esset servandum, si solis superioribus honor deberetur. Ergo honor non debetur proprie superioribus.

4. Præterea. Tobia. i. 16. dicitur, quod Tobias habebat decem talenta exhibitis quibus erat honoratus a Rege; legitur etiam Hester, vi. 11. quod Assuerus honoravit Mardocheum, & coram eo fecit clamari: *Hoc honore dignus est quem Rex honorare volueris*. Ergo honor etiam exhibetur inferioribus; & ita videtur quod honor non debetur proprie superioribus.

Sed contra est quod Philosophus dicit in I. Ethicor. (cap. xii. & Lib. IV. cap. 111.) quod honor debetur optimis.

Respondendo dicendum, quod, sicut supra dictum est (art. præc.) honor nihil aliud est quam quædam protestatio de excellentia bonitatis alicuius. Potest autem alicuius excellentia considerari, non solum per comparationem ad honorantem, ut scilicet sit excellentior eo qui honorat, sed etiam secundum se, vel per comparationem ad aliquos alios; & secundum hoc honor semper debetur alicui propter aliquam excellentiam, vel superioritatem. Non enim oportet quod ille qui honoratur, sit excellentior honorante, sed forte quibusdam aliis, vel etiam ipso honorante quantum ad aliquid, & non simpliciter.

Ad primum ergo dicendum, quod An-

gelus prohibuit Ioannem non a quacunque honoratione, sed ab honoracione adorationis latræ, quæ debetur Deo; vel etiam ab honoracione duliæ, ut ostenderet ipsius Ioannis dignitatem, qua per Christum erat Angelis adæquatus secundum spem gloriæ filiorum Dei: & ideo nolebat ab eo honorari tamquam superior.

Ad secundum dicendum, quod si prælati sint mali, non honorantur propter excellentiam propriæ virtutis, sed propter excellentiam dignitatis, secundum quam sunt Dei ministri: & etiam in eis honoratur tota communitas, cui præstunt. Dæmones autem sunt irrevocabiler mali, & pro inimicis habendi magis quam honorandi.

Ad tertium dicendum, quod in quolibet invenitur aliquid ex quo potest aliquis eum superiorem reputare, secundum illud ad Philip. ii. 3. *In humilitate superiores invicem arbitrantur*; & secundum hoc etiam omnes se invicem debent honore prævenire.

Ad quartum dicendum, quod privatæ personæ interdum honorantur a Regibus, non quia sint eis superiores secundum ordinem dignitatis, sed propter aliquam excellentiam virtutis ipsarum: & secundum hoc honorati sunt Tobias, & Mardocheus a Regibus.

ARTICULUS III. 544

Utrum dulia sit specialis virtus a latría distincta.

III. dist. ix. quæst. 11. art. 1. & Psal. xl. fin.

**A**D tertium sic proceditur. Videtur quod dulia non sit specialis virtus a latría distincta. Quia super illud Ps. vii. *Domine Deus meus, in te speravi*, dicit Glossa (interl.) „Domine omnium” per potentiam, cui debetur dulia; „Deus per creationem, cui debetur latría.” Sed non est distincta virtus quæ ordinatur in Deum, secundum quod est Dominus. & secundum quod est Deus. Ergo dulia non est virtus distincta a latría.

2. Præterea. Secundum Philosophum in VIII. Ethic. (cap. viii. cir. princ.) *amari simile est ei quod est honorari*. Sed eadem est virtus caritatis qua amatur Deus, & qua amatur proximus. Ergo dulia, qua honoratur proximus, non est alia virtus a latría, qua honoratur Deus.

3. Præ-

3. Præterea. Idem est motus quo aliquis movetur in imaginem, & in rem cuius est imago. Sed per dulum honoratur homo, inquantum est ad Dei imaginem factus: dicitur enim Sap. 11. 22. de impiis, quod non iudicaverunt honorem animarum sanctarum, quoniam Deus creavit hominem inextinguibilem, & ad imaginem sue similitudinis fecit illum. Ergo dulia non est alia virtus a latría, quæ honoratur Deus.

Sed contra est quod Augustinus dicit in X. de civit. Dei (cap. 1. circ. med.) quod alia est servitus quæ debetur hominibus, secundum quam præcipit Apostolus servos dominis suis subditos esse, quæ scilicet græce dulia dicitur; alia vero latría, quæ dicitur servitus pertinet ad colendum Deum.

Respondetur dicendum, quod secundum ea quæ supra dicta sunt (quæst. c1. art. 3.) ubi est alia ratio debiti, ibi necesse est quod sit alia virtus, quæ debitum reddat. Alia autem ratione debetur servitus Deo, & homini; sicut & alia ratione dominium competit Deo, & homini: nam Deus plenarius, & principale dominium habet respectu totius, & cuiuslibet creaturæ, quæ totaliter eius subicitur potestati; homo autem participat quamdam similitudinem divini domini, secundum quod habet particularem potestatem super aliquem hominem, vel super aliquam creaturam.

Et ideo dulia, quæ debetur servituti exhibet homini dominanti, alia virtus est a latría, quæ exhibet debitam servitutem divino domino. Et est quædam observantia species: quia per observantiam honoramus quascunque personas dignitate præcellentes; per dulam autem proprie sumptam servi dominos suos venerantur: dulia (dulia) enim græce servitus dicitur.

Ad primum ergo dicendum, quod sicut religio per excellentiam dicitur pietas, inquantum Deus est per excellentiam pater; ita etiam latría per excellentiam dicitur dulia, inquantum Deus excellentior est dominus. Non autem creatura participat potentiam creandi, ratione cuius Deo debetur latría. Et ideo Glossa illa distinxit attribuens latríam Deo secundum creationem, quæ creaturæ non communicatur; dulam vero secundum dominium, quod creaturæ communicatur.

Ad secundum dicendum, quod ratio diligendi proximum Deus est: non enim per caritatem diligimus in proximo nisi

Deum. Et ideo eadem caritas est quæ diligitur Deus, & proximus. Sunt tamen alia amicitia differentes a caritate secundum alias rationes quibus homines amantur. Et similiter cum sit alia ratio serviendi Deo, & homini, aut honorandi utrumque, non est eadem virtus latría, & dulia.

Ad tertium dicendum, quod motus qui est in imaginem, inquantum est imago, refertur in rem cuius est imago; non tamen omnis motus qui est in imaginem, refertur in eam, inquantum est imago: & ideo quandoque est alius motus specie in imaginem, & motus in rem. Sic ergo dicendum est, quod honor, vel subiectio dulie respicit absolute quandam hominis dignitatem: licet enim secundum illam dignitatem sit homo ad imaginem vel similitudinem Dei; non tamen semper homo, quando reverentiam alteri exhibet, refert hoc actum in Deum.

Vel dicendum, quod motus qui est in imaginem, quodammodo est in rem; non tamen motus, qui est in rem, oportet quod sit in imaginem. Et ideo reverentia quæ exhibetur alicui, inquantum est imago Dei, redundat quodammodo in Deum. Alia tamen est reverentia quæ ipsi Deo exhibetur, quæ nullo modo pertinet ad eius imaginem.

#### ARTICULUS IV. 345

*Utrum dulia habeat diversas species.*

III. diff. 1x. quæst. 11. art. 2.

**A**D quartum sic proceditur. Videtur quod dulia habeat diversas species. Per dulam enim exhibetur honor proximo. Diversa autem ratione honorantur diversi proximi, sicut Rex, pater, & inagister, ut patet per Philosophum in IX. Ethic. (cap. 11.) Cum ergo diversa ratio obiecti diversificet speciem virtutis, videtur quod dulia dividatur in virtutes specie differentes.

2. Præterea. Medium differt specie ab extremis, sicut pallidum ab albo, & nigro. Sed hyperdulia videtur esse medium inter latríam, & dulam: exhibetur enim creaturis, quæ habent speciem affinitatem ad Deum, sicut B. Virgini, inquantum est mater Dei. Ergo videtur quod dulia sint species differentes, una quidem dulia simpliciter, alia vero hyperdulia.

3. Præterea. Sicut in creatura rationali invenitur imago Dei, ratione cuius

hqua-



honoratur; ita etiam in creatura irrationali invenitur vestigium Dei. Sed alia ratio similitudinis importatur in nomine imaginis, & in nomine vestigii. Ergo etiam oportet secundum hoc diversas species duliae attendi: praesertim cum quibusdam irrationabilibus creaturis honor exhibeatur; sicut ligno sanctae crucis, & aliis huiusmodi.

Sed contra est quod dulia contra laetiam dividitur. Laetia autem non dividitur per diversas species. Ergo nec dulia.

Respondendo dicendum, quod dulia potest accipi dupliciter. Uno modo communiter, secundum quod exhibet reverentiam cuicumque homini ratione cuiuscumque excellentiae: & sic continet sub se pietatem, & observantiam, & quamcumque huiusmodi virtutem, quae homini reverentiam exhibet; & secundum hoc habebit partes specie diversas.

Alio modo potest sumi stricte, prout secundum eam, reverentiam exhibet servus domino: nam dulia servitus dicitur, ut dictum est (art. 3. hu. quaest.) & secundum hoc non dividitur in diversas species, sed est una specierum observantiae, quam Tullius ponit (Lib. II. de invent. aliquant. ante fin.) eo quod alia ratione servus reveretur dominum, miles ducem, discipulus magistrum, & sic de aliis huiusmodi.

Ad primum ergo dicendum, quod ratio illa procedit de dulia communiter sumpta.

Ad secundum dicendum, quod hyperdulia est potissima species duliae communiter sumptae: maxima enim reverentia debetur homini ex affinitate quam habet ad Deum.

Ad tertium dicendum, quod creatura irrationali in se considerata non debetur ab homine aliqua subiectio, vel honor; quin potius omnis talis creatura est naturaliter homini subiecta. Quod autem crux Christi honoretur, hoc fit eodem honore quo Christus honoratur; sicut purpura Regis honoratur eodem honore quo Rex, ut Damascenus dicit in IV. Libro (orth. Fid. cap. 111.)

## QUAESTIO CIV.

### De obedientia,

#### in sex articulos divisa.

**D**Einde considerandum est de obedientia: & circa hoc quaeruntur sex.

Primo, utrum homo debeat obedire homini.

Secundo, utrum obedientia sit specialis virtus.

Tertio de comparatione eius ad alias virtutes.

Quarto, utrum Deo sit in omnibus obediendum.

Quinto, utrum subditi suis praelatis teneantur in omnibus obedire.

Sexto, utrum fideles teneantur secularibus potestatibus obedire.

## ARTICULUS I. 346

### Utrum homo teneatur alteri obedire.

*Sup. quaest. lxxix. art. 2. cor. & quaest. lxxxviii. art. 10. ad 2. & infra. art. 3. cor. & art. 6. ad 2.*

**A**D primum sic proceditur. Videtur quod unus homo non teneatur alteri obedire. Non est enim aliquid faciendum contra institutionem divinam. Sed hoc habet divina institutio ut homo suo consilio regatur, secundum illud Eccli. xv. 14. *Deus ab initio constituit hominem, & reliquit illum in manu consilii sui.* Ergo non tenetur unus homo alteri obedire.

2. Praeterea. Si aliquis alicui tenetur obedire, oporteret quod haberet voluntatem praecipientis tamquam regulam suae actionis. Sed sola divina voluntas, quae semper est recta, est regula humanae actionis. Ergo non tenetur homo obedire nisi Deo.

3. Praeterea. Servitia quanto sunt maioris gratuita, tanto sunt magis accepta. Sed id quod homo ex debito facit, non est gratuitum. Si ergo homo teneretur ex debito aliis obedire in bonis operibus faciendis, ex hoc ipso redderetur minus acceptabile opus bonum quod ex obedientia fieret. Non ergo tenetur homo alteri obedire.

Sed contra est quod praecipitur ad Hebr. ult. 17. *Obedite praepositis vestris, & subiaceite eis.*

Respondendo dicendum, quod sicut actiones rerum naturalium procedunt ex potest-

tentis naturalibus, ita etiam operationes humanae procedunt ex humana voluntate. Oportuit autem in rebus naturalibus ut superiora moverent inferiora ad suas actiones per excellentiam naturalis virtutis collatae divinitus. Unde etiam oportet in rebus humanis quod superiores moveant inferiores per suam voluntatem ex vi auctoritatis divinitus ordinatae. Movere autem per rationem, & voluntatem est praecipere.

Et ideo sicut ex ipso ordine naturali divinitus instituto inferiora in rebus naturalibus necesse habent subiaci motioni superiorum; ita etiam in rebus humanis ex ordine iuris naturalis, & divini tenentur inferiores suis superioribus obedire.

Ad primum ergo dicendum, quod Deus reliquit hominem in manu consilii sui, non quia licet ei facere omne quod velit, sed quia ad id quod faciendum est, (a) non cogitur necessitate naturae, sicut creaturae irrationales, sed libera electione ex proprio consilio procedente: & sicut ad alia facienda debet procedere proprio consilio, ita etiam ad hoc quod obediat suis superioribus: dicit enim Greg. ult. Moral. (cap. x. parum a princ.) quod dum alienae voci humiliter subdimur, nosmetipsos in corde superamus.

Ad secundum dicendum, quod divina voluntas est prima regula, qua regulantur omnes rationales voluntates; cui una magis appropinquat quam alia, secundum ordinem divinitus institutum. Et ideo voluntas unius hominis praecipientis potest esse quasi secunda regula voluntatis alterius obedientis.

Ad tertium dicendum, quod aliquid potest iudicari gratuitum dupliciter: uno modo ex parte ipsius operis, quia scilicet homo ad id non obligatur; alio modo ex parte operantis, quia scilicet libera voluntate hoc facit. Opus autem redditur virtuosum, & laudabile, & meritorium, praecipue secundum quod ex voluntate procedit. Et ideo quamvis obedire sit debitum, si prompta voluntate aliquis obediat, non propter hoc minuitur eius meritum, maxime apud Deum, qui non solum exteriora opera, verum etiam interiorum voluntatem videt.

## ARTICULUS II. 147

*Utrum obedientia sit specialis virtus.*

II. dist. xxxv. art. 2. ad 5. & dist. xlv. quaest. 11. art. 1. & Hebr. 11.

**A**D secundum sic proceditur. Videtur quod obedientia non sit specialis virtus. Obedientiae enim inobedientia opponitur. Sed inobedientia est generale peccatum: dicit enim Ambrosius (Lib. de parad. cap. viii. parum ante med.) quod peccatum est inobedientia legis divinae. Ergo obedientia non est specialis virtus, sed generalis.

2. Praeterea. Omnis virtus specialis aut est theologica, aut moralis. Sed obedientia non est virtus theologica, quia neque continetur sub fide, neque sub spe, neque sub caritate: similiter etiam non est virtus moralis, quia non est in medio superflui, & diminuti: quanto enim aliquis est magis obediens, tanto magis laudatur. Ergo obedientia non est specialis virtus.

3. Praeterea. Gregorius dicit ult. Moral. (cap. x. ante med.) quod obedientia tanto magis est meritoria, & laudabilis, quanto minus habet de suo. Sed qualibet specialis virtus tanto magis laudatur, quanto magis habet de suo: eo quod ad virtutem requiritur ut sit volens, & eligens, sicut dicitur in II. Eth. (cap. iv.) Ergo obedientia non est virtus specialis.

4. Praeterea. Virtutes differunt specie secundum obiecta. Obiectum autem obedientiae esse videtur superioris praecipitum, quod multipliciter diversificari videtur, secundum diversos superioritatis gradus. Ergo obedientia est virtus generalis, sub se multas virtutes speciales comprehendens.

Sed contra est quod obedientia a quibusdam ponitur pars iustitiae, ut supra dictum est (quaest. lxxx.)

Respondendo dicendum, quod ad omnia opera bona quae specialem habent laudis rationem, specialis virtus determinatur: hoc enim proprie competere virtuti ut opus bonum reddat. Obedire autem superiori debitum est secundum divinum ordinem rebus inditum, ut ostensum est (art. praec.) & per consequens est bonum; cum bonum consistat in modo, specie, & ordine, ut Augustinus dicit in Lib. de natura boni (cap. 111.) Habet autem hic actus

(a) Ita mss. & editi passim. Edit. Deacrissi, aliaque non regitur.

etiam specialem rationem laudis ex speciali obiecto. Cum enim inferiores suis superioribus multa debeant exhibere, inter cetera hoc est unum speciale quod tenentur eorum praeceptis obedire.

Unde obedientia est specialis virtus & eius speciale obiectum est praeceptum tacitum, vel expressum: voluntas enim superioris quocumque modo innotescat, est quoddam tacitum praeceptum: & tanto videtur obedientia proprior, quanto expressum praeceptum obediendo praevenit, voluntate superioris intellecta.

Ad primum ergo dicendum, quod nihil prohibet, duas speciales rationes, ad quas duae speciales virtutes respiciunt, in uno & eodem materiali obiecto concurrere; sicut naves defendendo castrum Regis, & implet opus fortitudinis, non refugiens mortis pericula propter bonum, & opus iustitiae, debitum servitium domino suo reddens. Sic igitur ratio praecepti quam attendit obedientia, concurret cum actibus omnium virtutum, non tamen cum omnibus virtutum actibus, quia non omnes actus virtutum sunt in praecepto, ut supra habitum est (1. a. quæst. xcvi. art. 3.) Similiter etiam quædam quandoque sub praecepto cadunt quæ ad nullam aliam virtutem pertinent, ut patet in his quæ non sunt mala, nisi quia prohibita. Sic ergo si obedientia proprie accipitur, secundum quod respicit per intentionem formalem rationem praecepti, erit specialis virtus, & inobedientia peccatum speciale: secundum hoc enim ad obedientiam requiritur quod impleat aliquis actum iustitiae, vel alterius virtutis, intendens implere praeceptum; & ad inobedientiam requiritur quod actualiter contemnat (a) praeceptum. Si vero obedientia large accipitur pro executione cuiuscunque quod potest cadere sub praecepto, & inobedientia pro omissione eiusdem ex quacunque intentione, sic obedientia erit generalis virtus, & inobedientia generale peccatum.

Ad secundum dicendum, quod obedientia non est virtus theolomica: non enim per se obiectum eius est Deus, sed praeceptum superioris cuiuscunque, vel expressum, vel interpretativum; scilicet simplex verbum prelati eius indicans voluntatem, cui obedit promptus obediens, secundum illud ad Tit. 111. 2.

*Admone illor, principibus, & potestatibus subditos esse, dicto obedire &c.* Est autem virtus moralis, cum sit pars iustitiae; & est medium inter superfluum, & diminutum. Attenditur autem eius superfluum, non quidem secundum quantum, sed secundum alias circumstantias, in quantum scilicet aliquis obedit vel cui non debet, vel in quibus non debet, sicut supra de religione dictum est (quæst. xcii. art. 2.) Potest etiam dici, quod sicut in iustitia superfluum est in eo qui retinet alienum, diminutum autem in eo cui non redditur quod debetur, ut Philosophus dicit in V. Eth. (cap. iv.) ita etiam obedientia medium est inter superfluum, quod attenuatur ex parte eius qui subtrahit superiori obedientiae debitum, quia superabundat in implendo propriam voluntatem; (b) & diminutum, quod attenditur ex parte superioris, cui non obeditur. Unde secundum hoc obedientia (c) erit medium duarum malitiarum, sicut supra de iustitia dictum est (quæst. lviii. art. 10.)

Ad tertium dicendum, quod obedientia, sicut & quælibet virtus, debet habere promptam voluntatem in suum proprium obiectum, non autem in id quod repugnans est ei. Proprium autem obiectum obedientiae est praeceptum; quod quidem ex alterius voluntate procedit. Unde obedientia reddit promptam hominis voluntatem ad implendum voluntatem alterius, scilicet praeceptantis. Si autem id quod ei praeceptum, sit propter se ei volitum, etiam absque ratione praecepti, sicut accidit in prosperis, iam ex propria voluntate tendit in illud, & non videtur illud implere propter praeceptum, sed propter voluntatem propriam. Sed quando illud quod praeceptum, nullo modo est secundum se volitum, sed est secundum se consideratum propriæ voluntati repugnans, sicut accidit in asperis, tunc omnino manifestum est quod non impletur nisi propter praeceptum. Et ideo Gregorius dicit in Lib. ult. Mor. (cap. x. ante med.) quod *obediencia quæ habet aliquid de suo in prosperis, est vel nulla, vel minor*, quia scilicet voluntas propria non videtur principaliter tendere ad implendum praeceptum, sed ad assequendum proprium volitum; *in adversis autem, vel difficilibus est maior*, quia voluntas propria in nihil aliud tendit quam in prae-

(a) Ita mss. & editi passim. Al. speciale praeceptum. (b) Ita passim post Nicolaus recentiorum editiones. Edit. Rom. cum mss. diminutum autem ex parte superioris dicit. (c) Ita edit. Patav. Al. non est.

præceptum. Sed hoc intelligendum est secundum id quod exterius apparet. Secundum tamen Dei iudicium, qui corda rimatur, potest contingere quod etiam in prosperis obedientia aliquid de suo habens non propter hoc sit minus laudabilis, si scilicet propria voluntas obediens non minus devote tendat ad impletionem præcepti.

Ad quartum dicendum, quod reverentia directe respicit personam excellentem: & ideo secundum diversam rationem excellentiæ diversas species habet. Obedientia vero respicit præceptum personæ excellentis: & ideo non est nisi unius rationis. Sed quia propter reverentiam personæ obedientia debetur eius præcepto, consequens est quod obedientia hominis sit eadem specie, ex diversis tamen specie causis procedens.

### ARTICULUS III. 548

*Utrum obedientia sit maxima virtutum.*

*Philip. ix. l. 8. 3.*

**A**D tertium sic proceditur. Videtur quod obedientia sit maxima virtutum. Dicitur enim I. Reg. xv. 22. *Melior est obedientia quam victimæ.* Sed oblatio victimarum pertinet ad religionem, quæ est potissima inter omnes virtutes morales, ut ex supra dictis patet (4. quæst. lxxxv. art. 6.). Ergo obedientia est potissima inter omnes virtutes.

2. Præterea. Gregorius dicit ult. Moral. (cap. x. in princ.) quod *obedientia sola virtus est quæ virtutes ceteras menti inserit, insertasque custodit.* Sed causa potior est effectui. Ergo obedientia est potior omnibus virtutibus.

3. Præterea. Gregorius dicit ult. Moral. (ibid. a princ.) quod *numquam per obedientiam malum debet fieri; aliquando autem per obedientiam bonum, quod agimus, intermittere debet.* Sed non prætermittitur aliquid nisi pro meliori. Ergo obedientia, pro qua prætermittuntur bona aliarum virtutum, est virtutibus aliis melior.

Sed contra est quod obedientia habet laudem ex eo quod ex caritate procedit: dicit enim Gregorius ult. Moral. (ibid. a med.) quod *obedientia non servili metu, sed caritatis affectu servanda est, non timore panis, sed amore iustitiæ.* Ergo caritas est potior virtus quam obedientia.

Respondendo dicendum, quod sicut peccatum consistit in hoc quod homo, con-

tempto Deo, commutabilibus bonis inhæret; ita meritum virtuosus actus consistit in hoc quod homo, contemptis bonis creatis, Deo inhæret sicut fini. Finis autem potior est his quæ sunt ad finem. Si ergo bona creata propter hoc continentantur ut Deo inhæreatur, maior est laus virtutis ex hoc quod Deo inhæret, quam ex hoc quod bona terrena continentur. Et ideo illæ virtutes quibus Deo secundum se inhæretur, scilicet theologice, sunt potiores virtutibus moralibus, quibus aliquid terrenum contemnitur, ut Deo inhæreatur.

Inter virtutes autem morales tanto aliqua potior est, quanto aliquis maius aliquid contemnit, ut Deo inhæreatur. Sunt autem tria genera bonorum humanorum, quæ homo potest continere propter Deum: quorum infimum sunt exteriora bona; medium autem sunt bona corporis; supremum autem sunt bona animæ: inter quæ quodammodo præcipuum est voluntas, inquantum scilicet per voluntatem homo omnibus aliis bonis utitur. Et ideo, per se loquendo, laudabilior est obedientia voluntatis, quæ propter Deum contemnit propriam voluntatem, quam aliæ virtutes morales, quæ propter Deum aliqua alia bona continentur.

Unde Gregorius dicit ult. Moral. (loc. sup. cit.) quod *obedientia vidimus iure præponitur: quia per victimas aliena caro, per obedientiam vero voluntas propria sacrificatur.* Unde etiam quæcumque alia virtutum opera ex hoc meritoria sunt apud Deum quod sunt ut obediatur voluntati divinæ. Nam si quis etiam martyrium sustineret, vel omnia sua pauperibus erogaret, nisi hæc ordinaret ad impletionem divinæ voluntatis, quod directe ad obedientiam pertinet, meritoria esse non possent; sicut nec si fierent sine caritate, quæ sine obedientia esse non potest: dicitur enim I. Ioan. 11. 4. quod *qui dicit se nosse Deum, & mandata eius non custodit, mendax est...* qui autem servat verba eius, vere in hoc caritas dei perfecta est. Et hoc ideo est, quia amicitia facit idem velle, & nolle.

Ad primum ergo dicendum, quod obedientia procedit ex reverentia, quæ exhibet cultum, & honorem superiori: & quantum ad hoc sub diversis virtutibus continetur, licet secundum se considerata, prout respicit rationem præcepti, sit una specialis virtus. Inquantum ergo procedit ex reverentia prælatorum, con-

tenetur quodammodo sub observantia; inquantum vero procedit ex reverentia parentum, sub pietate; inquantum vero procedit ex reverentia Dei, sub religione; & pertinet ad devotionem, quae est principalis actus religionis. Unde secundum hoc laudabilis est obedire Deo quam sacrificium offerre: & etiam quia in sacrificio immolatur aliena caro, per obedientiam autem propria voluntas, ut Gregorius dicit (loc. sup. cit.) Specialiter tamen in casu in quo loquebatur Samuel, melius fuisse Sauli obedire Deo, quam animalia pingua Amalecitarum in sacrificium offerre contra Dei mandatum:

Ad secundum dicendum, quod ad obedientiam pertineat omnes actus virtutum, prout sunt in praecepto. Inquantum ergo actus virtutum operantur causaliter, vel dispositive ad earum generationem, & conservationem, inquantum dicitur, quod obedientia omnes virtutes menti inierit, & custodit. Nec tamen sequitur quod obedientia sit simpliciter omnibus virtutibus prior, propter duo. Primo quia licet actus virtutis cadat sub praecepto, potest tamen aliquis implere actum virtutis, non attendens ad rationem praecepti: unde si aliqua virtus sit cuius obiectum sit naturaliter prius quam praeceptum, illa virtus dicitur naturaliter prior quam obedientia; ut patet de fide, per quam nobis divinae auctoritatis sublimitas innotescit, ex qua competit ei potestas praescipiendi. Secundo quia infusio gratiae, & virtutum potest praecedere etiam tempore omnem actum virtuosum: & secundum hoc neque tempore, neque natura est obedientia omnibus aliis virtutibus prior.

Ad tertium dicendum, quod duplex est bonum. Quoddam, ad quod faciendum Deus ex necessitate tenetur, sicut amare Deum, vel aliquid huiusmodi: & tale bonum nullo modo debet propter obedientiam praetermitti. ER autem aliud bonum, ad quod homo non tenetur ex necessitate: & tale bonum debet tenetur quandoque propter obedientiam praetermittere; ad quam ex necessitate homo tenetur: quia non debet homo aliquid bonum facere culpam incurrendo: & tamen, sicut ibidem Gregorius dicit, qui ab uno quolibet bono subiectos vetat, necesse est ut multa concedat, ne obedientis mens funditus intereat, si a bonis omnibus repulsa penitus ieiunet. Et sic per

obedientiam, & alia bona potest dampnum unius boni recompensari.

## ARTICULUS IV. 549

*Utrum in omnibus sit Deo obediendum.*

*Inf. art. 5. cor. & ad 2. & quaest. cliv. art. 2. ad 2. & II. dist. xlv. in exp. lit. ad 7.*

**A**D quartum sic proceditur. Videtur quod non in omnibus sit Deo obediendum. Dicitur enim Math. ix. 30. quod Dominus duobus caecis curatis praecipit dicens: *Videte ne quis sciatur. Illi autem exiuntes diffamaverunt eum per totam terram illam.* Nec tamen ex hoc culpantur. Ergo videtur quod non teneamur in omnibus obedire Deo.

2. Praeterea. Nullus tenetur aliquid facere contra virtutem. Sed inveniuntur quaedam praecepta Dei contra virtutem; sicut praecipit Abraham ut occideret filium innocentem, ut habetur Gen. xxi. & Iudaeis, ut firarentur res Aegyptiorum, ut habetur Exod. xi. quae sunt contra iustitiam: & Olee, quod acciperet mulierem adulteram, quod est contra castitatem. Ergo non in omnibus est obediendum Deo.

3. Praeterea. Quicumque obedit Deo, conformatur voluntatem suam voluntati divinae etiam in voluto. Sed non quantum ad omnia teneamur conformare voluntatem nostram voluntati divinae in voluto, ut supra habitum est (i. 2. quaest. xix. art. 10.) Ergo non in omnibus tenetur homo Deo obedire.

Sed contra est quod dicitur Exod. xxxv. 7. *Omnia, quaecumque locutus est Dominus, faciemus, & erimus obedientes.*

Respondeo dicendum, quod, sicut supra dictum est (art. 1. hu. quaest.) ille qui obedit, movetur per imperium eius cui obedit, sicut res naturales moventur per suos motores. Sicut autem Deus est primus motor omnium quae naturaliter moventur, ita etiam est primus motor omnium voluntatum, ut ex supra dictis patet (i. 2. quaest. ix. art. 6.)

Et ideo sicut naturali necessitate omnia naturalia subduntur divinae motioni; ita etiam quadam necessitate iustitiae omnes voluntates tenentur obedire divino imperio.

Ad primum ergo dicendum, quod Dominus caecis dixit, ut miraculum occultarent, non quasi intendens eos per vir-

tutem divini præcepti obligare; sed, sicut Gregorius dicit XIX. Moral. (cap. xiv. parum a princ.) *servis suis sese sequentibus exemplum dedit, ut ipsi quidem virtutes suas occultari desiderarent, & tamen ut alii eorum exemplo proficiant, prodantur intui.*

Ad secundum dicendum, quod sicut Deus nihil operatur contra naturam, quia hoc est natura uniuscuiusque rei quod in ea Deus operatur, ut habetur in Glossa ad Rom. xi. (ex Augustino Lib. XX. cont. Faust. cap. 111.) operatur tamen aliquid contra solum cursum naturæ; ita etiam nihil Deus potest præcipere contra virtutem: quia in hoc principaliter consistit virtus, & restitudo voluntatis humanæ quod Dei voluntati conformetur, & eius sequatur imperium, quamvis sit contra consuetum virtutis modum. Secundum hoc ergo præceptum Abraham factum, quod filium innocentem occideret, non fuit contra iustitiam: quia Deus est auctor mortis, & vitæ. Similiter nec fuit contra iustitiam quod mandavit Iudæis ut res Aegyptiorum acciperent: quia eius sunt omnia, & cui voluerit, dat illa. Similiter etiam non fuit contra castitatem præceptum Osee factum, ut mulierem adulteram acciperet: quia ipse Deus est humanæ generationis ordinator, & ille est debitus modus mulieribus utendi quem Deus instituit. Unde patet quod prædicti nec obediendo Deo, nec obedire volendo peccaverunt.

Ad tertium dicendum, quod etsi non semper teneatur homo velle quod Deus vult, semper tamen tenetur velle quod Deus vult eum velle: & hoc homini præcipue innoscitur per præceptum divinum: & ideo tenetur homo in omnibus divinis præceptis obedire.

## ARTICULUS V. 550

*Utrum subditi teneantur suis superioribus in omnibus obedire.*

*Sup. quæst. lxxix. art. 3. ad 1. & infr. quæst. clxxxvi. art. 2. cor. & dist. xxv. quæst. 11. art. 1. quæst. 4. ad 3. & Rom. xii. lect. 4. fin.*

**A**D quantum sic proceditur. Videtur quod subditi teneantur suis superioribus in omnibus obedire. Dicit enim Apostolus ad Coloss. iii. 20. *Filii obedite parentibus per omnia: & postea sub-*

*dit: Servi obedite per omnia dominis carnalibus. Ergo eadem ratione alii subditi debent prælati suis in omnibus obedire.*

2. Præterea. Prælati sunt medii inter Deum & subditos, secundum illud Deuter. v. 5. *Ego sequi sum, & modis suis inter Deum & vos in tempore illo, ut annuntiatem vobis verba eius.* Sed ab extremo in extremum non pervenitur nisi per medium. Ergo præcepta prælati sunt reputanda tamquam præcepta Dei: unde & Apostolus dicit ad Gal. iv. 14. *Sicut Angelum Dei excepistis me, sicut Christum lesistis: & I ad Thes. ii. 13. Cum accepissetis a nobis verbum auditus Dei, accepistis illud, non ut verbum hominum, sed, sicut vere est, verbum Dei.* Ergo sicut homo debet Deo obedire in omnibus, ita & prælati.

3. Præterea. Sicut Religiosi profitendo vovent castitatem, & paupertatem, ita & obedientiam. Sed religiosus tenetur quantum ad omnia servare castitatem, & paupertatem. Ergo similiter quantum ad omnia tenetur obedire.

Sed contra est quod dicitur AA. v. 29. *Obedire oportet Deo magis quam hominibus.* Sed quandoque præcepta prælatorum sunt contra Deum. Ergo non in omnibus prælati est obediendum.

Respondetur dicendum, quod, sicut dictum est (art. 1. & 4. hu. quæst.) obediens movetur ad imperium præcipientis quadam necessitate iustitiæ; sicut res naturalis movetur ex virtute sui motoris necessitate naturæ.

Quod autem aliqua res naturalis non moveatur a suo motore, potest contingere dupliciter: uno modo propter impedimentum quod provenit ex fortiori virtute alterius moventis; sicut lignum non comburitur ab igne, si fortior vis aquæ impediatur: alio modo ex defectu ordinis mobilis ad motorem quia etiam subiacitur eius actioni quantum ad aliquid, non tamen quantum ad omnia; sicut humor quandoque subiacitur actioni caloris quantum ad calefieri, non tamen quantum ad exsiccare, sive consumi.

Similiter ex duobus potest contingere quod subditus suo superiori non teneatur in omnibus obedire. Uno modo propter præceptum maioris potestatis. Ut enim Rom. xiiii. super illud, *Qui potestati resistunt, ipsi sibi damnationem acquirunt*, dicit Glossa (ord. Augustini serm. vi. de verb. Dom. cap. 8.) „ si quid iussit „ rit curator, numquid est tibi facien- „ dum,

„dum, si contra Proconsulem iubeat?  
 „Rursum si quid Proconsul iubeat, &  
 „aliud Imperator, numquid dubitatur  
 „illo contempto, isti esse serviendum?  
 „Ergo si aliud Imperator, aliud Deus  
 „iubeat, contempto illo, obtemperan-  
 „dum est Deo. “ Alio modo non te-  
 „netur inferior suo superiori obedire, si  
 „ei aliquid præcipiat in quo ei non sub-  
 „datur. Dicit enim Seneca in III. de be-  
 „neficiis ( cap. xx. in princip. ) *Errat, si  
 „quis existimat servitutem in totum homi-  
 „nem descendere: pars enim melior excepta  
 „est: corpora obnoxia sunt, & adscripta  
 „dominis, mens quidem est sui iuris.* Et  
 „ideo in his quæ pertinent ad interiorem  
 „motum voluntatis, homo non tenetur  
 „homini obedire, sed solum Deo.

Tenetur autem homo homini obedire  
 in his quæ exterius per corpus sunt agen-  
 da; in quibus tamen secundum ea quæ  
 ad naturam corporis pertinent, homo  
 homini obedire non tenetur, sed solum  
 Deo: quia omnes homines natura sunt  
 pares, puta in his quæ pertinent ad cor-  
 poris sustentationem, & proles genera-  
 tionem. Unde non tenentur nec servi  
 dominis, nec filii parentibus obedire de  
 matrimonio contrahendo, vel virginitate  
 servanda, aut aliquo alio huiusmodi. Sed  
 in his quæ pertinent ad dispositionem a-  
 nimum, & rerum humanarum, tenetur  
 subditus suo superiori obedire secundum  
 rationem superioritatis; sicut miles duci  
 exercitus in his quæ pertinent ad bel-  
 lum, servus domino in his quæ perti-  
 nent ad servilia opera exequenda, filius  
 patri in his quæ pertinent ad discipli-  
 nam vitæ, & curam domesticam; & sic  
 de aliis.

Ad primum ergo dicendum, quod hoc  
 quod Apostolus dicit, intelligendum est  
 per omnia quantum ad illa quæ perti-  
 nent ad ius patriæ, vel dominativæ po-  
 testatis.

Ad secundum dicendum, quod Deo  
 subditur homo simpliciter quantum ad  
 omnia & interiora, & exteriora: & ideo  
 in omnibus ei obedire tenetur. Subditi  
 autem non subdiciuntur suis superioribus  
 quantum ad omnia, sed quantum ad a-  
 liqua determinate; & quantum ad illa  
 nudi sunt inter Deum, & subditos;  
 quantum ad alia vero immediate subdun-  
 tur Deo, a quo instruuntur per legem  
 naturalem, vel scriptam.

Ad tertium dicendum, quod religiosi  
 obedientiam præstent quantum ad regu-  
 larem conversationem, secundum quam

*S. Tb. Oper. Tom. XXIII.*

suis prælati subduntur: & ideo quan-  
 tum ad illa sola obedire tenentur quæ  
 possunt ad regularem conversationem per-  
 tinere: & hæc est obedientia sufficiens  
 ad salutem. Si autem etiam in aliis obe-  
 dire voluerint, hoc pertinebit ad cumu-  
 lum perfectionis; dum tamen illa non  
 sint contra Deum, aut contra professio-  
 nem regulæ, quia talis obedientia esset  
 illicita. Sic ergo potest triplex obedien-  
 tia distingui: una sufficiens ad salutem,  
 quæ scilicet obedit in his ad quæ obli-  
 gatur; alia perfecta, quæ obedit in omni-  
 bus licitis; alia indiscreta, quæ etiam  
 in illicitis obedit.

## ARTICULUS VI. 555

*Utrum Christiani teneantur secularibus  
 potestatibus obedire.*

*II. dist. XLV. quest. 2. art. 2. & quol. 11.  
 art. 9. cor.*

**A**D sextum sic proceditur. Videtur  
 quod Christiani non teneantur sæ-  
 cularibus potestatibus obedire. Quia super  
 illud Matth. XVII. *Ergo liberi sunt  
 filii*, dicit Glossa (ord. Augustini Lib.  
 I. Q. Evang. cap. XXXI.) „Si in quo-  
 „libet regno filii illius Regis, qui re-  
 „gno illi præferretur, sunt liberi, tunc  
 „filii Regis illius, cui omnia regna sub-  
 „duntur, in quolibet regno liberi esse  
 „debent. “ Sed Christiani per fidem  
 Christi facti sunt filii Dei, secundum il-  
 lud Ioan. 1. 12. *Dedit eis potestatem filios  
 Dei fieri, his qui credunt in nomine eius.*  
 Ergo non tenentur potestatibus sæcula-  
 ribus obedire.

2. Præterea. Ad Rom VII. 4. dicitur:  
*Mortificati estis legi per corpus Christi:*  
 & loquitur de lege divina veteris Testa-  
 menti. Sed minor est lex humana, per  
 quam homines secularibus potestatibus  
 subduntur, quam lex divina veteris Testa-  
 menti. Ergo multo magis homines per  
 hoc quod sunt facti membra corporis  
 Christi, liberantur a lege subiectionis,  
 qua secularibus Principibus obstringe-  
 bantur.

3. Præterea. Latronibus, qui per vio-  
 lentiam opprimunt, homines obedire non  
 tenentur. Sed Augustinus dicit in IV.  
 de civ. Dei (cap. IV. in princ.) *Remota  
 iustitia, quid sunt regna, nisi magna la-  
 trocinia?* Cum ergo dominia Principum  
 secularium plerumque cum iniustitia  
 exerceantur, vel ab aliqua iniusta usur-  
 patione principum sumperint; videtur

B

quod

quod non sit Principibus saecularibus obediendum a Christianis.

Sed contra est quod dicitur ad Tit. 111. 1. *Admone illos, Principibus, & potestatibus subditi esse: & I. Pet. 11. 13. Subiecti estote omni humanae creature propter Deum, sive Regi, quasi praecellenti, sive ducibus tamquam ab eo missis.*

Respondendo dicendum, quod fides Christi est iustitiae principium, & causa, secundum illud Rom. 111. 22. *Iustitia Dei per fidem Iesu Christi: & ideo per fidem Iesu Christi non tollitur ordo iustitiae, sed magis firmatur. Ordo autem iustitiae requirit ut inferiores suis superioribus obediant: aliter enim non posset humanarum rerum status conservari.*

Et ideo per fidem Christi non excusantur fideles quin Principibus saecularibus obedire teneantur.

Ad primum ergo dicendum, quod, sicut supra dictum est (art. praec.) servitus, qua homo homini subiicitur, ad corpus pertinet, non ad animam, quae libera manet. Nunc autem in statu huius vitae per gratiam Christi liberamur a defectibus animae, non autem a defectibus corporis, ut patet per Apostolum Rom. vii. 23. qui dicit de seipso, *quod mente servus legi Dei, carne autem legi peccati.* Et ideo illi qui sunt filii Dei per gratiam, liberi sunt a spiritali servitute peccati, non autem a servitute corporali, qua temporalibus dominis tenentur adstricti, ut dicit Glossa (ordin.) super illud I. ad Timoth. vi. *Quicumque sunt sub iugo servi &c.*

Ad secundum dicendum, quod lex vetus fuit figura novi Testamenti: & ideo debuit cessare veritate veniente. Non autem est simile de lege humana, per quam homo subiicitur homini: & tamen etiam ex lege divina homo tenetur homini obedire.

Ad tertium dicendum, quod Principibus saecularibus intantum homo obedire tenetur, in quantum ordo iustitiae requirit. Et ideo si non habeant iustum principatum, sed usurpatum, vel si iniusta praecipiant, non tenentur eis subditi obedire: nisi forte per accidens, propter vitandum scandalum, vel periculum.

## QUAESTIO CV.

De inobedientia,

in duos articulos divisa.

**D**Einde considerandum est de inobedientia: & circa hoc quaeruntur duo.

Primo, utrum sit peccatum mortale. Secundo, utrum sit gravissimum peccatum.

### ARTICULUS I. 55a

*Utrum inobedientia sit peccatum mortale.*

*Sup. quaest. lxxix. art. 1. corp.*

**A**D primum sic proceditur. Videtur quod inobedientia non sit peccatum mortale. Omne enim peccatum est inobedientia, ut patet per definitionem Ambrosii superius positam (quaest. praec. art. 2. arg. 1.) Si ergo inobedientia esset peccatum mortale, omne peccatum esset mortale.

2. Praeterea. Gregorius dicit XXXI. Moral. (cap. xvii. a med.) quod inobedientia oritur ex inani gloria. Sed inanis gloria non est peccatum mortale. Ergo nec inobedientia.

3. Praeterea. Tunc dicitur aliquis esse inobediens, quando superioris praeceptum non implet. Sed superiores praeceptum multipliciter, quae vix, aut numquam omnia possunt observari. Si ergo inobedientia esset peccatum mortale, sequeretur quod homo non posset vitare mortale peccatum: quod est inconveniens. Non ergo inobedientia est peccatum mortale.

Sed contra est quod ad Rom. 1. & II. ad Tim. 111. inter alia peccata mortalia computantur *parentibus non obediens.*

Respondendo dicendum, quod, sicut supra dictum est (quaest. xxiv. art. 12. & 1. 2. quaest. lxxii. art. 5. & quaest. lxxxviii. art. 1.) peccatum mortale est quod contrariatur caritati, per quam est spiritalis vita. Caritate autem diligitur Deus, & proximus. Exigit autem caritas Dei ut eius mandatis obediat, ut supra dictum est (quaest. xxiv. art. 12.) Et ideo inobedientem esse divinis praeceptis est peccatum mortale, quasi divinae dilectioni contrarium.



In præceptis autem divinis continetur quod etiam superioribus obediat. Et ideo etiam inobedientia, qua quis inobediens est præceptis superiorum, est peccatum mortale, quasi divinæ dilectioni contrarium, secundum illud ad Rom. xiii. 2. *Qui potestati resistit, Dei ordinationi resistit.* Contrariatur insuper dilectioni proximi, inquantum superiori proximo subtrahit obedientiam quam ei debet.

Ad primum ergo dicendum, quod illa definitio Ambrosii datur de peccato mortali, quod habet perfectam peccati rationem. Peccatum autem veniale non est inobedientia: quia non est contra præceptum, sed præter præceptum. Nec etiam omne peccatum mortale est inobedientia, proprie & per se loquendo, sed solum tunc quando aliquis præceptum contemnit: quia ex fine morales actus speciem habent. Cum autem facit aliquid contra præceptum, non propter præcepti contemptum, sed propter aliquid aliud, est inobedientia materialiter tantum, sed pertinet formaliter ad aliam speciem peccati.

Ad secundum dicendum, quod inanis gloria appetit manifestationem alicuius excellentiæ. Et quia videtur ad quamdam excellentiam pertinere quod homo præceptis alterius non subdatur, inde est quod inobedientia ex inani gloria oritur. Nihil autem prohibet ex peccato veniali oriri mortale; cum veniale sit dispositio ad mortale.

Ad tertium dicendum, quod nullus obligatur ad impossibile: & ideo si tot præcepta prælatus aliquis ingerat, seu iniungat, quod subditus ea implere non possit, excusatur a peccato. Et ideo prælati abstinere debent a multitudine præceptorum.

## ARTICULUS II. 553

*Utrum inobedientia sit gravissimum peccatum.*

*Opusc. lxxv. cap. xi. & Heb. iiii. lect. 2.*

**A**D secundum sic proceditur. Videtur quod inobedientia sit gravissimum peccatum. Dicitur enim I. Reg. xv. 23. *Quasi peccatum ariolandi est remanere, & quasi scelus idololatriæ nolle acquiescere.* Sed idololatria est gravissimum peccatum, ut supra habitum est (quæst. xciv. art. 3.) Ergo inobedientia est gravissimum peccatum.

2. Præterea. Illud peccatum dicitur esse in Spiritum sanctum per quod tolluntur impedimenta peccati, ut supra dictum est (quæst. xiv. art. 2.) Sed per inobedientiam contemnit homo præceptum, quod maxime retrahit hominem a peccando. Ergo inobedientia est peccatum in Spiritum sanctum; & ita est gravissimum peccatum.

3. Præterea. Apostolus dicit ad Rom. v. 19. *quod per unius inobedientiam peccatores multi constituti sunt.* Sed causa videtur esse potior effectu. Ergo inobedientia videtur esse gravius peccatum quam alia quæ ex ea causantur.

Sed contra est quod gravius est contemnere præceptum quam præceptum. Sed quædam peccata sunt contra ipsam personam præceptantis, sicut pater de blasphemia, & homicidio. Ergo inobedientia non est gravissimum peccatum.

Respondeo dicendum, quod non omnis inobedientia est æquale peccatum. Potest enim una inobedientia esse gravior altera dupliciter. Uno modo ex parte præceptantis. Quamvis enim omnem curam homo apponet debeat ad hoc quod cuilibet superiori obediat; tamen magis est debitum quod homo obediat superiori quam inferiori potestati: cuius signum est quod præceptum inferioris prætermittitur, si sit præcepto superioris contrarium. Unde consequens est quod quanto superior est ille qui præcipit, tanto ei inobedientem esse sit gravius. Et sic inobedientem esse Deo est gravius quam inobedientem esse homini.

Secundo ex parte præceptorum. Non enim præcipiens æqualiter vult impleri omnia quæ mandat. Magis enim unusquisque præcipiens vult finem, & id quod est fini propinquius. Et ideo tanto est inobedientia gravior, quanto præceptum quod quis præterit, magis est de intentione illius qui præcipit. Et in præceptis quidem Dei manifestum est quod quanto præceptum datur de meliori, tanto est eius inobedientia gravior: quia cum voluntas Dei per se feratur ad bonum, quanto aliquid est melius, tanto Deus vult illud magis impleri. Unde qui inobediens est præcepto de dilectione Dei, gravius peccat, quam qui inobediens est præcepto de dilectione proximi. Voluntas autem hominis non semper magis fertur in melius; & ideo ubi obligatur ex solo hominis præcepto, non est gravius peccatum ex eo quod maius bonum præteritur, sed ex eo quod præ-

teritur illud quod est magis de intentione præcipientis.

Sic ergo oportet (a) diversos inobedientiae gradus diversis præceptorum gradibus comparare. Nam inobedientia, qua contemnitur Dei præceptum, ex ipsa ratione inobedientiae gravius est peccatum quam peccatum quo peccatur in hominem, si feceretur inobedientia Dei. Et hoc ideo dico, quia qui contra proximum peccat, etiam contra Dei præceptum agit. Si tamen in aliquo (b) potiori præceptum Dei contemneret, adhuc peccatum gravius esset. Inobedientia autem qua contemnitur præceptum hominis, levior est peccato quo contemnitur ipse præcipiens: quia ex reverentia præcipientis procedere debet reverentia præcepti. Et similiter peccatum quod directe pertinet ad contemptum Dei, sicut blasphemia, vel aliquid huiusmodi, gravius est, etiam remota per intellectum inobedientia a peccato, (c) quam esset illud peccatum in quo contemnitur solum Dei præceptum.

Ad primum ergo dicendum, quod illa comparatio Samuelis non est æqualitatis, sed similitudinis: quia inobedientia redundat in contemptum Dei, sicut & idololatria, licet idololatria magis.

Ad secundum dicendum, quod non omnis inobedientia est peccatum in Spiritum sanctum, sed solum illa cui obstinatio adhibetur. Non enim contemptus cuiuscunque, quod peccatum impedit, constituit peccatum in Spiritum sanctum: alioquin cuiuslibet boni contemptus esset peccatum in Spiritum sanctum, quia per quodlibet bonum potest homo impediri a peccato: sed bonorum illorum contemptus facit peccatum in Spiritum sanctum, quæ directe ducunt ad poenitentiam, & remissionem peccatorum.

Ad tertium dicendum, quod primum peccatum primi parentis, ex quo in omnes peccatum emanavit, non fuit inobedientia, secundum quod est speciale peccatum, sed superbia, ex qua homo ad inobedientiam processit. Unde Apostolus in verbis illis videtur accipere inobedientiam, secundum quod generaliter se habet ad omne peccatum.

## QUAESTIO CVI.

*De gratia, sive gratitudine, in sex articulis divisa.*

**D**Einde considerandum est de gratia, sive gratitudine, & ingratitude. Circa gratiam autem quaeruntur sex.

Primo, utrum gratia sit specialis virtus ab aliis distincta.

Secundo, quis teneatur ad maiorem gratiarum actionem Deo, utrum innocens, vel poenitens.

Tertio, utrum semper teneatur homo ad gratias pro beneficiis humanis reddendas.

Quarto, utrum retributio gratiarum sit differenda.

Quinto, utrum sit mensuranda secundum acceptum beneficium, vel secundum dantis affectum.

Sexto, utrum oporteat aliquid maius rependere.

### ARTICULUS I. 354

*Utrum gratia sit specialis virtus ab aliis distincta.*

*Inf. quæst. CVIII. art. 1. cor. & 2. z. quæst. VI. art. 3. cor.*

**A**D primum sic proceditur. Videtur quod gratia non sit virtus specialis ab aliis distincta. Maxima enim beneficia a Deo, & a parentibus accipimus. Sed honor quem Deo retribuimus, pertinet ad virtutem religionis; honor autem quem retribuimus parentibus, pertinet ad virtutem pietatis. Ergo gratia, sive gratitudo non est virtus ab aliis distincta.

2. Præterea. Retributio proportionalis pertinet ad iustitiam commutativam, ut patet per Philosophum in V. Ethic. (cap. IV.) Sed gratiæ redduntur, ut retributio sit, ut ibidem dicitur. Ergo retributio gratiarum, quæ pertinet ad gratitudinem, est actus iustitiæ. Non ergo gratitudo est specialis virtus ab aliis distincta.

3. Præterea. Recompensatio requiritur ad amicitiam conservandam, ut patet per Philosophum in VIII. Ethic. (cap. XIII.) & in IX. (cap. I.) Sed amicitia se habet ad omnes virtutes, propter quas homo

(a) Ita p. 4 Theologiae edit. univ. Veteris edit. cum ed. A. an. aliisque secundum diversos & non peccatorum pro præceptorum. (b) Ita mss. & editi passim. Theologi legendam putant minus potiori, (c) Ita passim. Cuius, A. an. quam illud peccatum &c.

homo amatur. Ergo gratia, siue gratitudo, ad quam pertinet recompensatio beneficii, non est specialis virtus.

Sed contra est quod Tullius ponit *gratiam* specialem iustitiae partem. (Lib. II. de invent. aliquant. ante si.)

Respondendo dicendum, quod, sicut supra dictum est (1. 2. quest. lx. art. 3.) secundum diversas causas ex quibus aliquid debetur, necesse est diversificari debiti reddendi rationem; ita tamen quod semper in maiori illud quod minus est contineatur. In Deo autem primo & principaliter invenitur causa debiti, eo quod ipse est primum principium omnium bonorum nostrorum: secundario autem in patre, quia est proximum nostrae generationis, & disciplinae principium: tertio autem in persona quae dignitate praecellit, ex qua communia beneficia procedunt: quarto autem in aliquo benefactore, a quo aliqua particularia, & privata beneficia percipimus, pro quibus particulariter ei obligamur.

Quia ergo non quicquid debemus Deo, vel patri, vel personae dignitate praecellenti, debemus alicui benefactorum, a quo aliquod particulare beneficium recepi- mus, inde est quod post religionem, qua debitum cultum Deo impendimus, & pietatem, qua colimus parentes, & obsequantiam, qua colimus personas dignitate praecellentes, est gratia, siue gratitudo, quae benefactoribus gratiam recompensat: & distinguitur a praemissis virtutibus, sicut quodlibet posterius distinguitur a priori, quali ab eo de- cians.

Ad primum ergo dicendum, quod sicut religio est quaedam superexcellens pietas, ita est quaedam excellens gratia, siue gratitudo. Unde & gratiarum actio ad Deum supra posita est (quest. lxxxiii. art. 17.) inter ea quae ad religionem per- tinent.

Ad secundum dicendum, quod retri- butio proportionalis pertinet ad iustitiam commutativam, quando attenditur se- cundum debitum legale; puta si passus firmetur ut tantum pro tanto retribuatur. Sed ad virtutem gratiae, siue grati- tudinis retributio pertinet quae sit ex solo debito honestatis, quam scilicet aliquis sponte facit. Unde & grati- tudo est minus grata, si sit coacta, ut Seneca dicit in Lib. III. de beneficiis (cap. vii.)

Ad tertium dicendum, quod cum ve-  
5. Tb. Oper. Tom. XXIII.

(2) *Palgora*: Cui minus dicitur, minus diligit,

ra amicitia supra virtutem fundetur, quicquid est virtuti contrarium in ami- co, est amicitiae impeditivum; & quic- quid est virtuosum, est amicitiae provo- cativum. Et secundum hoc per recom- pensationem beneficiorum amicitia con- servatur; quamvis recompensatio benefi- ciorum ad virtutem gratitudinis specia- liter pertineat.

## ARTICULUS II. 555

*Utrum magis teneatur ad gratias reddendas Deo innocens quam poenitens.*

**A**D secundum sic proceditur. Videtur quod magis teneatur ad gratias red- dendas Deo innocens quam poenitens. Quanto enim aliquis maius donum a Deo percipit, tanto magis ad gratiarum ac- tionem teneatur. Sed maius est donum innocentiae quam iustitiae restitutio. Er- go videtur quod magis teneatur ad gra- tiarum actionem innocens quam poeni- tens.

2. Praeterea. Sicut benefactori debetur gratiarum actio, ita & dilectio. Sed Au- gustinus dicit in II. Confess. (cap. vii. in med.) *Quis hominum suam cogitans infirmitatem audeat viribus suis tribuere castitatem, atque innocentiam suam, ut minus amet te, quasi minus fueris ei ne- cessaria misericordia tua, qua condonas peccata conversis ad te?* Et postea sub- dit: *Et ideo tantundem, immo amplius te diligat: quia per quem me videt tantis peccatorum morum languoribus exui, per eum se videt tantis peccatorum languoribus non implicari.* Ergo etiam magis teneatur ad gratiam reddendam innocens quam poenitens.

3. Praeterea. Quanto gratuitum bene- ficium est magis continuatum, tanto maior pro eo debetur gratiarum actio. Sed in innocente magis continuatur di- vine gratiae beneficium quam in poeni- tente: dicit enim Augustinus ibidem: *Gratiae tuae deputo, & misericordiae tuae, quia peccata mea tamquam glaciem sol- vissi: gratiae tuae deputo & quaecumque non feci mala: quid enim facere non potui? Et omnia mihi dimissa esse fateor, & quae mea sponte feci mala, & quae te duce non feci.* Ergo magis teneatur ad gratiarum actionem innocens quam poenitens.

Sed contra est quod dicitur Luc. vii.  
47. (a) *Cui plus dimittitur, plus diligit.*

B 3

Er-

Ergo eadem ratione plus tenetur ad gratiarum actiones.

Respondeo dicendum, quod actio gratiarum in accipiente respicit gratiam dantis: unde ubi est maior gratia ex parte dantis, ibi requiritur maior gratiarum actio ex parte recipientis. Gratia autem est, quia gratis datur. Unde dupliciter potest esse ex parte dantis maior gratia. Uno modo ex quantitate dati: & hoc modo innocens tenetur ad maiores gratiarum actiones: quia maius donum ei datur a Deo, & magis continuatur, ceteris paribus, absolute loquendo.

Alio modo potest dici maior gratia, quia magis datur gratis: & secundum hoc magis tenetur ad gratiarum actiones penitens quam innocens: quia magis gratis datur illud quod ei datur a Deo: cum enim esset dignus poena, datur ei gratia. Et sic licet illud donum quod datur innocenti, sit absolute consideratum maius; tamen donum quod datur penitenti, est maius in comparatione ad ipsum; sicut etiam parvum donum pauperi datum est ei maius quam diviti magnum. Et quia actus circa singularem sunt, in his quae agenda sunt, magis consideratur quod est hic vel nunc tale, quam quod est simpliciter tale, sicut Philosophus dicit in III. Ethic. (cap. 3.) de voluntario, & involuntario.

Et per hoc patet responsio ad obiecta.

### ARTICULUS III. 556

*Utrum homo teneatur ad gratiarum actiones omni homini beneficienti.*

**A**D tertium sic proceditur. Videtur quod homo non tenetur ad gratiarum actiones omni homini beneficienti. Potest enim aliquis sibi benefacere, sicut & sibiipsum nocere, secundum illud Eccli. xiv. 5. *Qui sibi nequam est, cui alii bonus erit?* Sed homo sibiipsum non potest gratias agere, quia gratiarum actio videtur transire ab uno in alterum. Ergo non omni benefactori debetur gratiarum actio.

2. Præterea. Gratiarum actio est quædam gratiæ recompensatio. Sed aliqua beneficia non cum gratia dantur, sed magis cum contumelia, & tarditate, vel tristitia. Ergo non semper benefactori sunt gratiæ reddendæ.

3. Præterea. Nulli debetur gratiarum actio ex eo quod suam utilitatem procurat. Sed quandoque aliqui aliqua be-

neficia dant propter suam utilitatem. Ergo eis non debetur gratiarum actio.

4. Præterea. Servo non debetur gratiarum actio, quia hoc ipsum quod est, domini est. Sed quandoque contingit servum in dominum beneficium esse. Ergo non omni benefactori debetur gratiarum actio.

5. Præterea. Nullus tenetur ad id quod facere non potest honeste, & utiliter. Sed quandoque contingit quod ille qui beneficium tribuit, est in statu magnæ felicitatis; cui inutiliter aliquid recompensaretur pro suscepto beneficio: quandoque etiam contingit quod benefactor mutatur de virtute in vitium; & sic videtur quod ei honeste recompensari non potest: quandoque etiam ille qui accipit beneficium, pauper est, & omnino recompensare non potest. Ergo videtur quod non semper tenetur homo ad gratiarum recompensationem.

6. Præterea. Nullus debet pro alio facere quod ei non expedit, sed est ei nocivum. Sed quandoque contingit quod recompensatio beneficii est nociva, vel inutilis ei cui recompensatur. Ergo non est semper beneficium recompensandum per gratiarum actionem.

Sed contra est quod dicitur I. ad Thess. ult. 18. *In omnibus gratias agite.*

Respondeo dicendum, quod omnis effectus naturaliter ad suam causam convertitur. Unde Dionysius dicit 1. cap. de div. Nom. (par. 1. lect. 1.) quod *Deus omnia in se convertit, tamquam omnium causa*. Semper enim oportet quod effectus ordinetur ad finem agentis. Manifestum est autem quod benefactor, in quantum huiusmodi, est causa beneficii.

Et ideo naturalis ordo requirit ut ille qui suscepit beneficium, per gratiarum recompensationem convertatur ad benefactorem secundum modum utriusque: & sicut de patre dictum est supra (quæst. xxxi. art. 3. & quæst. cr. art. 2.) benefactori quidem, in quantum huiusmodi, debetur honor, & reverentia, eo quod habet rationem principii; sed per accedens debetur ei subventio, vel sustentatio, si indigeat.

Ad primum ergo dicendum, quod, sicut Seneca dicit in Lib. V. de benefic. (cap. 18.) *sicut non est liberalis qui sibi donat, nec clemens qui sibi ignoscit, nec misericors qui malis suis tangitur, sed qui aliis; ita etiam nemo sibiipsum beneficium dat; sed naturæ suæ furit, quæ movet ad*

*ad refutanda nociva, & ad appetenda proficua.* Unde in his quæ sunt ad seipsum, non habet locum gratitudo, & ingratitudo: non enim potest homo sibi aliquid denegare, nisi sibi retinendo. Metaphorice tamen illa quæ ad alterum proprie dicuntur, accipiuntur in his quæ sunt ad seipsum, sicut de iustitia dicit Philosophus in V. Ethic. ( cap. ult. ) inquantum scilicet accipiuntur diversæ partes hominis, sicut diversæ personæ.

Ad secundum dicendum, quod boni animi est ut magis attendat ad bonum quam ad malum. Et ideo si aliquis beneficium dedit non eo modo quo debuit, non ideo debet recipiens a gratiarum actione cessare; minus tamen quam si modo debito præstitisset, quia etiam beneficium minus est: quia, ut Seneca dicit in Lib. II. de benef. ( cap. vi. in princ. ) *multum celeritas fecit, multum abstulit mora.*

Ad tertium dicendum, quod, sicut Seneca dicit in VI. de benef. ( cap. xii. ) *multum interest utrum aliquis beneficium nobis de sua causa, an nostra, an sua & nostra. Ille qui totus ad se spectat, & nobis prodest, quia aliter sibi prodesse non potest, eo mihi loco habendus videtur quo qui pecori suo pabulum propiciat.* Et mox ( cap. xiii. ) *Si modo me in consortium admisit, si duos cogitavit, ingratus sum, non solum iniustus, nisi gaudeam hoc illi profuisse quod proderat mihi. Summe malignitatis est non vocare beneficium, nisi quod dante aliquo incommodo afficit.*

Ad quartum dicendum, quod, sicut Seneca dicit in III. de benef. ( cap. xxi. in princ. ) *quamdiu servus præstas quod a servo exigi solet, ministerium est; ubi plus quam a servo necesse est, beneficium est: ubi enim in affectum amici transiit, si tamen transiit, desinit vocari ministerium.* Et ideo etiam servis ultra debitum facientibus gratiæ sunt habendæ.

Ad quintum dicendum, quod etiam pauper ingratus non est, si faciat quod possit. Sicut enim beneficium magis in affectu consistit quam in effectu; ita etiam recompensatio magis in affectu consistit. Unde Seneca dicit in II. de benef. ( cap. xxi. in fi. ) *Qui grate beneficium accipit, primam eius pensionem solvit. Quod grate autem ad nos beneficia pervenerint, indicimus et ipsi affectibus. quod non ipso tantum audiente, sed ubique testemur.* Et ex hoc patet quod quantumcumque in felicitate existenti potest

est recompensatio beneficii fieri per exhibitionem reverentie, & honoris. Unde Philosophus dicit in VIII. Ethic. ( cap. ult. ) *quod superexcellentem quidem debet fieri honoris retributio, indigenti autem retributio lucris.* Et Seneca dicit in VI. de benef. ( cap. xxix. in fi. ) *Multa sunt per quæ quicquid debemus, reddere & felicibus possumus: fidele consilium, assidua conversatio, sermo comis, & sine adulatione iucundus.* Et ideo non oportet ut homo oportet indigentiam eius, seu miseriam, qui beneficium dedit, ad hoc quod beneficium recompensetur: quia, ut Seneca dicit in VI. de benef. ( cap. xxvi. in fi. ) *si hoc ei optares, cuius nullum beneficium haberes, inhumanum erat votum. Quanto inhumanius ei optas cui beneficium debes?* Si autem ille qui beneficium dedit, in peius mutatur est, debet tamen sibi fieri recompensatio secundum statum ipsius, ut scilicet ad virtutem reducat, si sit possibile. Si autem sit insanabilis propter malitiam, tunc aliter est affectus quam prius erat: & ideo non debetur ei recompensatio beneficii, sicut prius. Et tamen, quantum fieri potest salva honestate, memoria debet haberi præstiti beneficii, ut patet per Philosophum in IX. Ethic. ( cap. iii. in fi. )

Ad sextum dicendum, quod, sicut dictum est ( in solut. præc. ) recompensatio beneficii præcipue pendet ex affectu: & ideo eo modo debet recompensatio fieri quo magis sit utilis. Si tamen postea per eius incuriam in damnum ipsius vertatur, non imputatur recompensanti, ut Seneca dicit in VII. de benef. ( cap. xix. parum a princ. ) *Reddendum mihi est, non servandum, cum reddidero, ac tuendum.*

#### ARTICULUS IV. 557

*Utrum homo debeat statim beneficium recompensare.*

**A**D quartum sic proceditur: Videtur quod homo debeat statim beneficium recompensare. Illa enim quæ debemus sine certo termino, tenemur restituere statim. Sed non est aliquis terminus præscriptus recompensationi beneficiorum; quæ tamen cadit sub debito, ut dictum est ( art. præc. ) Ergo tenetur homo statim beneficium recompensare.

2. Præterea. Quanto aliquod bonum fit ex maiore animi fervore, tanto videtur

B. 4. eile:

esse laudabilis. Sed ex fervore animi videtur procedere quod homo nullas moras adhibeat in faciendo quod debet. Ergo videtur esse laudabilis quod statim homo beneficium reddat.

3. Præterea. Seneca dicit in II. de beneh. (cap. v. cir. fi.) quod proprium beneficiorum est libenter, & cito facere. Sed recompensatio debet beneficium adæquare. Ergo debet statim recompensare.

Sed contra est quod Seneca dicit in IV. de benef. (in fi.) *Qui sekinat reddere, non animum habet grati hominis, sed debitoris.*

Respondeo dicendum, quod sicut in beneficio dando duo considerantur, scilicet affectus, & donum; ita etiam hæc duo considerantur in recompensatione beneficii. Et quantum quidem ad affectum, recompensatio statim fieri debet: unde Seneca dicit in II. de benef. (in fin.) *Vis reddere beneficium? accipe benigne.* Quantum autem ad donum, debet expectari tempus quo recompensatio sit benefactori opportuna. Si autem non convenienti tempore statim velit aliquis munus pro munere reddere, non videtur esse virtuosa recompensatio, sed invita. Ut enim Seneca dicit in IV. de benef. (in fin.) *qui nimis cito cupit solvere, invitatus debet; Et qui invitatus debet, ingratus est.*

Ad primum ergo dicendum, quod debitum legale est statim solvendum; alioquin non esset conservata iustitiæ aequalitas, si unus retineret rem alterius absque eius voluntate. Sed debitum morale dependet ex honestate debentis: & ideo oportet reddi debito tempore, secundum quod exigit restitudo virtutis.

Ad secundum dicendum, quod fervor voluntatis non est virtuosus, nisi sit ratione ordinatus: & ideo si aliquis ex fervore animi præoccupet debitum tempus, non erit laudandus.

Ad tertium dicendum, quod beneficia etiam sunt opportuno tempore danda; & tunc non est amplius tardandum, cum opportunitatem tempus advenerit: & idem etiam observari oportet in beneficiorum recompensatione.

## ARTICULUS V. 558

*Utrum gratiarum actio sit attendenda secundum affectum (a) benefactoris, an secundum effectum.*

*Sup. art. 3. ad 5. Et 6. Inf. art. 6. ad 1.*

**A**D quintum sic proceditur. Videtur quod beneficiorum recompensatio non sit attendenda secundum affectum benefactoris, sed secundum effectum. Recompensatio enim beneficii debetur. Sed beneficium in effectu consistit, ut ipsum nomen sonat. Ergo recompensatio debet attendi secundum effectum.

2. Præterea. Gratia, quæ recompensat beneficia, est pars iustitiæ. Sed iustitia respicit æqualitatem dati, & accepti. Ergo & in gratiarum recompensatione attendendus est magis effectus quam affectus benefactoris.

3. Præterea. Nullus potest attendere ad id quod ignorat. Sed solus Deus cognoscit interiorum affectum. Ergo non potest fieri gratiæ recompensatio secundum affectum.

Sed contra est quod Seneca dicit in I. de benef. (cap. vii. cir. princ.) *Nonnumquam magis nos obligat qui dedit parva magnifice, Et qui exiguum tribuit, sed libenter.*

Respondeo dicendum, quod recompensatio beneficii potest ad tres virtutes pertinere, scilicet ad iustitiam, ad gratiam, & ad amicitiam. Ad iustitiam quidem pertinet, quando recompensatio habet rationem debiti legalis, sicut in mutuo, & aliis huiusmodi: & in tali recompensatione debet attendi secundum quantitatem dati.

Ad amicitiam autem pertinet recompensatio beneficii, & similiter ad virtutem gratiæ, secundum quod habet rationem debiti morales; aliter tamen, & aliter. Nam in recompensatione amicitiae oportet respectum haberi ad amicitiae causam: unde in amicitia utilis debet recompensatio fieri secundum utilitatem, quam quis ex beneficio consecutus est; in amicitia autem honesti debet in recompensatione haberi respectus ad electionem, sive ad affectum dantis: quia hoc præcipue requiritur ad virtutem, ut dicitur in VIII. Eth. (cap. xiii. in fi.) Et similiter quia gratia respicit beneficium, secundum quod est gratis impensum, quod quidem pertinet ad affectum, ideo.

ideo etiam gratiæ recompensatio attendit magis affectum dantis quam effectum.

Ad primum ergo dicendum, quod omnis actus moralis ex voluntate pendet. Unde beneficium, secundum quod est laudabile, prout ei gratiæ recompensatio debetur, materialiter quidem consistit in effectu, sed formaliter & principaliter in voluntate. Unde Seneca dicit in l. de benefic. (cap. vi. cir. princ.) *Beneficium non in eo quod fit, aut datur, consistit, sed in ipso dantis, aut facientis animo.*

Ad secundum dicendum, quod gratia est pars iustitiæ, non quidem sicut species generis, sed per quamdam reductionem ad genus iustitiæ, ut supra dictum est (quaest. lxxx.) Unde non oportet quod eadem ratio debiti attendatur in utraque virtute.

Ad tertium dicendum, quod affectum hominis per se quidem solus Deus videt; sed secundum quod per aliqua signa manifestatur, potest etiam ipsum homo cognoscere. Et hoc modo affectus beneficentis cognoscitur ex ipso modo quo beneficium tribuitur, puta quia gaudenter & prompte aliquis beneficium impendit.

## ARTICULUS VI. 559

*Utrum oportens aliquem plus exhibere in recompensatione quam suscepit in beneficio.*

*Inf. quaest. CVII. art. 2. cor.*

**A**D sextum sic proceditur. Videtur quod non oporteat aliquem plus exhibere in recompensatione quam suscepit in beneficio. Quibusdam enim (sicut parentibus) nec etiam æqualis recompensatio fieri potest, sicut Philosophus dicit in VIII. Ethic. (cir. fi.) Sed virtus non conatur ad impossibile. Non ergo gratiæ recompensatio tendit ad aliquid maius.

2. Præterea. Si aliquis plus recompensat quam in beneficio acceperit, ex hoc ipso quasi aliquid de novo dat. Sed ad beneficium de novo datum tenetur homo gratiam recompensare. Ergo ille qui primo beneficium dederat, tenebitur aliquid maius recompensare; & sic procederet in infinitum. Sed virtus non conatur ad infinitum, quia *in infinitum auferri naturam boni*, ut dicitur in II. Metaph. (tex. viii.) Ergo gratiæ recompensatio non debet excedere acceptum beneficium.

3. Præterea. Iustitia in æqualitate consistit. Sed maius est quidam æqualitatis excessus. Cum ergo in qualibet virtute excessus sit vitiosus, videtur quod recompensare aliquid maius accepto beneficio sit vitiosum, & iustitiæ oppositum.

Sed contra est quod Philosophus dicit in V. Ethic. (cap. v. a princ.) *Refamulari oportet ei qui gratiam fecit, & rursum ipsum incipere*: quod quidem fit, dum aliquid maius retribuitur. Ergo recompensatio debet tendere ad hoc quod aliquid maius faciat.

Respondetur dicendum, quod, sicut dictum est (art. præc.) recompensatio gratiæ respicit beneficium secundum voluntatem beneficientis. In quo quidem præcipue hoc commendabile videtur quod gratis beneficium contulit, ad quod non tenebatur. Et ideo qui beneficium accepit, ad hoc obligatur ex debito honestatis ut similiter aliquid gratis impendat. Non autem videtur gratis aliquid impendere, nisi excedat quantitatem accepti beneficii: quia quamdiu recompensat minus, vel æquale, non videtur facere gratis, sed reddere quod accepit.

Et ideo gratiæ recompensatio semper tendit ut pro suo posse aliquid maius retribuat.

Ad primum ergo dicendum, quod, sicut dictum est (art. 3. hu. quaest. ad 3. & art. præc.) in recompensatione beneficii magis est considerandus affectus quam effectus. Si ergo consideremus effectum beneficii, quod filius a parentibus accepit, scilicet esse, & vivere, nihil æquale filius recompensare potest, ut Philosophus dicit (Lib. VIII. Ethic. cir. fin.) Si autem attendamus ad ipsam voluntatem dantis, & retribuentis, sic potest filius aliquid maius patri retribuere, ut Seneca dicit in III. de benef. (cap. xxx. & xxxv.) Si tamen non posset, sufficeret ad gratitudinem recompensandi voluntas.

Ad secundum dicendum, quod debitum gratitudinis ex caritate derivatur: quæ quanto plus solvitur, tanto magis debetur, secundum illud ad Rom. xxi.

8. *Nemini quicquam debeatis, nisi ut invicem diligatis.* Et ideo non est inconveniens, si obligatio gratitudinis interminabilis sit.

Ad tertium dicendum, quod sicut in iustitia, quæ est virtus cardinalis, attenditur æqualitas rerum; ita in gratitudine attenditur æqualitas voluntatum, aut scilicet sicut ex promptitudine voluntatis.

ratis beneficium aliquid exhibuit, ad quod non tenebatur, ita etiam ille qui suscipit beneficium, aliquid supra debitum recompenfet.

### QUAESTIO CVII.

De ingratitudine,  
in quatuor articulos divisa.

**D**Einde considerandum est de ingratitudine: & circa hoc quaeruntur quatuor.

Primo, utrum ingratitudo semper sit peccatum.

Secundo, utrum ingratiendo sit peccatum speciale.

Tertio, utrum omnis ingratitudo sit peccatum mortale.

Quarto, utrum ingratitudo sit beneficium subtrahenda.

#### ARTICULUS I. 360

Utrum ingratitudo sit semper peccatum.

*Inf. quæst. clxxi. art. 4. ad 3.*

**A**D primum sic proceditur. Videtur quod ingratitudo non semper sit peccatum. Dicit enim Seneca in III. de beneficiis (cap. 2. cir. med.) quod *ingratus est qui non reddit beneficium*. Sed quandoque aliquis non potest recompenfare beneficium nisi peccando, puta si auxiliatus est homini ad peccandum. Cum ergo abstinere a peccato non sit peccatum, videtur quod ingratitudo non semper sit peccatum.

2. Præterea. Omne peccatum est in potestate peccantis: quia secundum Augustinum. (Lib. III. de lib. arb. cap. xvii. & xviii. & Lib. I. Retract. cap. ix. ante med.) *nullus peccat in eo quod vitare non potest*. Sed quandoque non est in potestate peccantis ingratitudo, vitare, puta cum non habet unde reddat: obliuio etiam non est in potestate nostra; cum tamen Seneca dicat in III. de beneficiis (loc. cit.) quod *ingratissimum omnium est qui oblitus est*. Ergo ingratitudo non semper est peccatum.

3. Præterea. Non videtur peccare qui non vult aliquid debere, secundum illud Apostoli ad Rom. xiii. 8. *Nemini quicquam debetis*. Sed qui invitus debet, ingratus est, ut Seneca dicit in IV. de beneficiis (in fin.) Ergo non semper ingratitudo est peccatum.

Sed contra est quod II. ad Timoth.

xiii. 2. *ingratitudo connumeratur aliis peccatis, cum dicitur: Parentibus non obedientes, ingrati, scelesti*.

Respondendo dicendum, quod, sicut dictum est (quæst. præc. art. 4. ad 1. & art. 6.) debitum gratitudinis est quoddam debitum honestatis: quam virtus requirit. Ex hoc autem aliquid est peccatum quod repugnat virtuti. Unde manifestum est quod omnis ingratitudo est peccatum.

Ad primum ergo dicendum, quod gratitudo respicit beneficium. Ille autem qui alicui auxiliatur ad peccandum, non confert beneficium, sed magis nocumens: & ideo non debetur ei gratiarum actio; nisi forte propter voluntatem bonam, si sit deceptus, dum credidit adiuvare ad bonum, & adiuvit ad peccandum. Et tunc non debetur talis recompenfatio ut adiuvetur ad peccandum: quia hoc non esset recompenfare bonum, sed malum; quod contrariatur gratitudini.

Ad secundum dicendum, quod nullus propter impotentiam reddendi ab ingratitudine excusatur, ex quo ad debitum gratitudinis reddendum sufficit sola voluntas, ut dictum est (quæst. præc. art. 6. ad 1.) Oblivio autem beneficii ad ingratitudinem pertinet, non quidem illa quæ provenit ex naturali defectu, qui non subiacet voluntati, sed illa quæ ex negligentia provenit. Ut enim dicit Seneca in III. de benef. (cap. 1. in fin.) *apparet solum non scire de reddendo cogitasse cui obrepsit oblitio*.

Ad tertium dicendum, quod debitum gratitudinis ex debito amoris derivatur, a quo nullus debet velle absolvi. Unde quod aliquis invitus hoc debitum debeat, videtur provenire ex defectu amoris ad eum qui beneficium dedit.

#### ARTICULUS II. 361

Utrum ingratitudo sit speciale peccatum.

*III. P. quæst. lxxxviii. art. 4. & IV. diff. xxii. quæst. 1. art. 2. quæst. 1.*

**A**D secundum sic proceditur. Videtur quod ingratitudo non sit speciale peccatum. Quicumque enim peccat, contra Deum agit, qui est summus benefactor. Sed hoc pertinet ad ingratitudinem. Ergo ingratitudo non est speciale peccatum.

2. Præterea. Nullum speciale peccatum sub diversis peccatorum generibus con-



continetur. Sed diversis peccatorum generibus potest aliquis esse ingratus; puta si quis benefactori detrahat, si quis furetur, vel aliquid aliud huiusmodi contra eum committat. Ergo ingratitudo non est speciale peccatum.

3. Præterea. Seneca dicit in III. de beneficiis (cap. 1. cir. med.) *Ingratus est qui dissimulat, ingratus est qui non reddit, & ingratus omnium qui oblitus est.* Sed ista non videntur ad unam peccati speciem pertinere. Ergo ingratitudo non est speciale peccatum.

Sed contra est quod ingratitudo opponitur gratitudini, sive gratiæ, quæ est specialis virtus. Ergo est speciale peccatum.

Respondendo dicendum, quod omne vitium ex defectu virtutis nominatur, quia magis virtuti opponitur; sicut illiberalitas magis opponitur liberalitati quam prodigalitas. Potest autem virtuti gratitudinis aliquid vitium opponi per excessum; puta si recompensatio beneficii fiat vel pro quibus non debet, vel citius quam debet, ut ex dictis patet (quæst. civ. att. 4.) Sed magis opponitur gratitudinali vitium quod est per defectum, quia virtus gratitudinis, ut supra habitum est (quæst. præc. art. 6.) in aliquid amplius tendit. Et ideo proprie ingratitudo nominatur ex gratitudinis defectu. Omnis autem defectus, seu privatio speciem sortitur secundum habitum oppositum: differunt enim cæcitas, & surditas secundum differentiam visus, & auditus. Unde sicut gratitudo, vel gratia est una specialis virtus; ita etiam ingratitudo est unum speciale peccatum.

Habet tamen diversos gradus secundum ordinem eorum quæ ad gratitudinem requiruntur: in qua primum est quod homo acceptum beneficium recognoscat; secundum est quod laudet, & gratias agat; tertium est quod retribuat pro loco, & tempore secundum suam facultatem. Sed quia quod est ultimum in generatione, est primum in resolutione; ideo primus ingratitudinis gradus est ut homo beneficium non retribuat; secundus est ut dissimulet, quasi non demonstrans se beneficium accepisse; tertius, & gravissimus est, quod non recognoscat sive per oblivionem, sive quocumque alio modo. Et quia in affirmatione opposita intelligitur negatio; ideo ad primum ingratitudinis gradum pertinet quod aliquis retribuat mala pro bonis; ad secundum, quod beneficium vituperet; ad

tertium, quod beneficium quasi maleficium reputet.

Ad primum ergo dicendum, quod in quolibet peccato est materialis ingratitudo ad Deum, in quantum scilicet facit homo aliquid quod potest ad ingratitudinem pertinere; formaliter autem ingratitudo est, quando actualiter beneficium contemnitur: & hoc est speciale peccatum.

Ad secundum dicendum, quod nihil prohibet formalem rationem alicuius specialis peccati in pluribus peccatorum generibus materialiter inveniri: & secundum hoc in multis generibus peccatorum invenitur ingratitudinis ratio.

Ad tertium dicendum, quod illa tria non sunt diversæ species, sed diversi gradus unius specialis peccati.

## ARTICULUS III. 363

*Utrum ingratitudo semper sit peccatum mortale.*

**A**D tertium sic proceditur. Videtur quod ingratitudo semper sit peccatum mortale. Deo enim maxime debet aliquis esse gratus. Sed peccando venialiter homo non est ingratus Deo; alioquin omnes homines essent ingratuli. Ergo nulla ingratitudo est peccatum veniale.

2. Præterea. Ex hoc aliquod peccatum est mortale quod contrariatur caritati; ut supra dictum est (quæst. xxiv. art. 12.) Sed ingratitudo contrariatur caritati, ex qua procedit debitum gratitudinis, ut supra dictum est (quæst. præc. art. 1. ad 3. & art. 6. ad 2.) Ergo ingratitudo semper est peccatum mortale.

3. Præterea. Seneca dicit in II. de beneficiis (cap. x. in fin.) *Hæc beneficii lex est inter duos; alter statim oblitus est debet dari, alter accepti numquam.* Sed propter hoc, ut videtur, debet oblivisci, ut lateat eum peccatum recipientis, si contingat eum esse ingratum; quod non oportet, si ingratitudo esset leve peccatum. Ergo ingratitudo semper est peccatum mortale.

4. Sed contra est quod nulli est danda via peccandi mortaliter. Sed, sicut Seneca dicit ibidem (cap. ix. in fin.) *interdum & ipse qui iuvatur, fallendus est, ut habeat, nec a quo accepit sciat;* quod videtur, viam ingratitudinis recipienti præbere. Ergo ingratitudo non semper est peccatum mortale.

Respondendo dicendum, quod, sicut ex

supradictis patet (art. præc.) ingratus dicitur aliquis dupliciter. Uno modo per solam omissionem; puta quia non recognoscit, vel non laudat, vel non retribuit vices pro beneficio accepto: & hoc non semper est peccatum mortale: quia, ut supra dictum est (quaest. præc. art. 6.) debitum gratitudinis est ut homo etiam aliquid liberaliter tribuat, ad quod non tenetur: & ideo si illud prætermittit, non peccat mortaliter; est tamen peccatum veniale, quia hoc provenit ex negligentia quadam, aut ex aliqua indispositione hominis ad virtutem. Potest tamen contingere quod etiam talis ingratitudo sit mortale peccatum vel propter interiorum contemptum, vel etiam propter conditionem eius quod subtrahitur, quod ex necessitate debetur beneficio, sive simpliciter, sive in aliquo necessitatis casu.

Alio modo dicitur aliquis ingratus, quia non solum prætermittit implere gratitudinis debitum, sed etiam contrarium agit: & hoc etiam secundum conditionem eius quod agitur, quandoque est peccatum mortale, quandoque veniale.

Sciendum tamen, quod ingratitudo quæ provenit ex peccato mortali, habet perfectam ingratitudinis rationem; illa vero quæ provenit ex peccato veniali, imperfectam.

Ad primum ergo dicendum, quod per peccatum veniale non est aliquis ingratus Deo secundum perfectam ingratitudinis rationem; habet tamen aliquid ingratitudinis, inquantum peccatum veniale tollit aliquem actum virtutis, per quem homo Deo obsequitur.

Ad secundum dicendum, quod ingratitudo quæ est cum peccato veniali, non est contraria caritati, sed est præter ipsam: quia non tollit habitum caritatis, sed aliquem actum ipsius excludit.

Ad tertium dicendum, quod idem Seneca dicit in VII. de benef. (cap. xxxi.) *Errat, si quis aestimat, cum dicimus eum qui beneficium dedit, oblitisci oportere, excutere nos illi memoriam rei præsertim beneficissimæ. Cum ergo dicimus, Meminisse non debet, hoc volumus intelligi, Prædicare non debet, nec iactare.*

Ad quartum dicendum, quod ille qui ignorat beneficium, non est ingratus, si beneficium non recompenset, dummodo sit paratus recompensare, si nosset. Est autem laudabile quandoque ut ille cui providetur, beneficium ignoret: tum pro-

pter inanis gloriæ vitationem, sicut beatus Nicolaus aurum furtim in domum proiciens vitare voluit humanum favorem: tum etiam quia in hoc ipso amplius beneficium facit quod consultus veretur eius qui beneficium accipit.

## ARTICULUS IV. 163

*Utrum ingratiss sint beneficia subtrahenda.*

*Inf. quæst. cxxxv. art. 5. ad 4.*

**A**D quartum sic proceditur. Videtur quod ingratiss sint beneficia subtrahenda. Dicitur enim Sap. xvi. 29. *Ingratiss spes tamquam hybernalis glacies tabescent.* Non autem eius spes tabesceret, si non esset ei beneficium subtrahendum. Ergo sunt subtrahenda beneficia ingratiss.

2. Præterea. Nullus debet alteri præbere occasionem peccandi. Sed ingratus beneficium recipiens sumit occasionem ingratitudinis. Ergo non est ingrato beneficium dandum.

3. Præterea. (a) *In quo quis peccat, per hoc et torquetur*, ut dicitur Sap. xi. 17. Sed ille qui ingratus est beneficio accepto, peccat contra beneficium. Ergo est beneficium privandum.

Sed contra est quod dicitur Luc. vi. 35. *quod Altissimus benignus est super ingratos, & malos.* Sed per eius imitationem nos filios esse oportet, ut ibidem dicitur. Ergo non debemus ingratis beneficia subtrahere.

Respondendo dicendum, quod circa ingratum duo consideranda sunt. Primo quidem, quid est quod ipse dignus sit pati: & sic certum est quod meretur beneficii subtractionem.

Alio modo considerandum est, quid oporteat beneficium facere. Primo namque non debet esse facilis ad ingratitudinem iudicandam: quia *frequenter aliqui, ut Seneca dicit (Lib. III. de benef. cap. vii.) qui non reddidit, gratus est*: quia forte non occurrit ei facultas, aut debita opportunitas reddendi. Secundo debet tendere ad hoc quod de ingrato gratum faciat; quod si non potest primo beneficio facere, forte faciet secundo. Si vero ex beneficiis multiplicatis ingratitudinem augeat, & peior fiat, debet a beneficiorum exhibitione cessare.

Ad primum ergo dicendum, quod auctoritas illa loquitur quantum ad id quod ingratus dignus est pati.

Ad secundum dicendum, quod ille qui ingratiss

(a) *Vulgata: Per quæ peccat quis, p r hæc & torquetur.*

ingrato beneficium exhibet, non dat ei occasionem peccandi, sed magis gratitudinis, & amoris. Si vero ille qui accipit, ingratitude exinde occasionem sumat, non est danti imputandum.

Ad tertium dicendum, quod ille qui beneficium dat, non statim se debet exhibere punitori ingratitude, sed prius pium medicum, ut scilicet iteratis beneficiis ingratitude sanet.

QUAESTIO CVIII.

De vindicatione,  
in quatuor articulis divisa.

**D**Einde considerandum est de vindicatione: & circa hoc quaeruntur quatuor.

Primo, utrum vindicatio sit licita.

Secundo, utrum sit specialis virtus.

Tertio de modo vindicandi.

Quarto, in quos sit vindicta exercenda.

ARTICULUS I. 564

Utrum vindicatio sit licita.

*Inf. quest. clviii. art. 3. & III. P. quest. xv. art. 9. cor. & mal. quest. xii. art. 1. co. & ad 8. & 14. & art. 3. ad 5. & Rom. xii. lect. 3.*

**A**D primum sic proceditur. Videtur quod vindicatio non sit licita. Quicumque enim usurpat sibi quod Dei est, peccat. Sed vindicta pertinet ad Deum: dicitur enim Deut. xxxii. 35. secundum aliam litteram ( Chaldaic. Paraphr. & Rom. xii. 19. ) *Mibi vindicta, & ego retribuam*. Ergo omnis vindicatio est illicita.

2. Præterea. Ille de quo vindicta sumitur, non toleratur. Sed mali sunt tolerandi: quia super illud Cant. ii. *Sicut lilium inter spinas*, dicit Glossa ( Greg. hom. xxxviii. in Evang. ante med. ) „ Non fuit bonus, qui malos tolerare „ non potuit. “ Ergo vindicta non est sumenda de malis.

3. Præterea. Vindicta per poenas fit ex quibus causatur timor servilis. Sed lex nova non est lex timoris, sed amoris, ut Augustinus dicit contra Adamantium ( cap. xvii. inter princ. & med. ) Ergo ad minus in novo Testamento nulla vindicta fieri debet.

4. Præterea. Ille dicitur vindicare se qui iniurias suas ulciscitur. Sed, ut

videtur, non licet etiam iudici in se delinquentes punire: dicit enim Chrysostomus ( alius Auctor ) super Matth. ( hom. v. in op. imperf. inter med. & fi. ) *Disceamus exemplo Christi nostras iniurias magnanimitè sustinere, Dei autem iniurias nec usque ad auditum sufferre*. Ergo vindicatio videtur esse illicita.

5. Præterea. Peccatum multitudinis magis est nocivum quam peccatum unius tantum: dicitur enim Eccli. xxvi. 5. *A tribus timuit cor meum... delaturam civitatis, & collectionem populi, & calumniam mendacem*. Sed de peccato multitudinis non est vindicta sumenda: quia super illud Matth. xii. *Sinite utraque crescere, ne forte eradicetis triticum*, dicit Glossa ( Lyr. & interl. implice ) quod „ multitudo non est excommunicanda, „ nec Princeps. “ Ergo nec alia vindicatio est licita.

Sed contra. Nihil est expectandum a Deo, nisi quod est bonum, & licitum. Sed vindicta de hostibus est expectanda a Deo: dicitur enim Luc. xviii. 7. *Deus non faciet vindictam electorum suorum clamantium ad se die ac nocte? quasi diceret, immo faciet*. Ergo vindicatio non est per se mala, & illicita.

Respondeo dicendum, quod vindicatio fit per aliquod poenale malum inflictum peccanti. Est ergo in vindicatione considerandus vindicantis animus. Si enim eius intentio feratur principaliter in malum illius de quo vindictam sumit, & ibi quiescat; est omnino illicitum: quia delictari in malo alterius pertinet ad odium, quod caritati repugnat, qua omnes homines debemus diligere. Nec aliquis excusatur, si malum intendat illius qui sibi iniuste intulit malum; sicut non excusatur aliquis per hoc quod odit se odientem: non enim debet homo in alium peccare propter hoc quod ille peccavit prius in ipsum, hoc enim est vinci a malo: quod Apostolus prohibet ad Rom. xii. 21. dicens: *Noli vinci a malo, sed vince in bono malum*.

Si vero intentio vindicantis feratur principaliter ad aliquod bonum, ad quod pervenitur per poenam peccantis ( puta ad emendationem peccantis, vel saltem ad cohibitionem eius, & quietem aliorum, & ad iustitiae conservationem, & Dei honorem ) potest esse vindicatio licita, aliis debitis circumstantiis servatis.

Ad primum ergo dicendum, quod ille qui secundum gradum sui ordinis vindictam exercet in malos, non usurpat sibi quod

quod Dei est, sed utitur potestate sibi divinitus concessa: dicitur enim ad Rom. xiii. 4. de Principe terreno, quod *Dei minister est, vindex in iram ei qui male agit*. Si autem præter ordinem divinæ institutionis aliquis vindictam exerceat, usurpat sibi quod Dei est: & ideo peccat.

Ad secundum dicendum, quod mali tolerantur a bonis in hoc quod ab eis proprias iniurias patienter sustinent, secundum quod oportet; non autem tolerant eos, ut sustineant iniurias Dei, & proximorum. Dicit enim Chrysostomus (alius Auctor) super Matth. (loc. cit. in arg. 4.) *In propriis iniuriis esse quempiam patientem, laudabile est; iniurias autem Dei dissimulare, nimis est imitium*.

Ad tertium dicendum, quod lex Evangelii est lex amoris: & ideo illis qui ex amore bonum operantur, qui soli proprie ad Evangelium pertinent, non est timor incutiendus per pœnas, sed solum illis qui ex amore non moventur ad bonum; qui etsi numero sint de Ecclesia, non tamen merito.

Ad quartum dicendum, quod iniuria quæ inferitur personæ alicui, quandoque redundat in Deum, & in Ecclesiam: & tunc debet aliquis propriam iniuriam ulcisci; sicut patet de Helia, qui fecit ignem descendere super eos qui venerant ad ipsum capiendum, ut legitur IV. Reg. x. & similiter Helisæus maledixit pueris eum irridentibus, ut habetur IV. Reg. xi. & (a) Sylvester Papa excommunicavit eos qui eum in exilium miserunt, ut habetur xxiii. quæst. iv. (cap. *Gulifarius*.) In quantum vero iniuria in aliquem illata ad eius personam pertinet, debet eam tolerare patienter, si expediat. Huiusmodi enim præcepta patientiæ intelligenda sunt secundum præparationem animi, ut Augustinus dicit in Lib. I. de serm. Domini in monte (cap. xix. & seq.).

Ad quintum dicendum, quod quando tota multitudo peccat, est de ea vindicta sumenda vel quantum ad totam multitudinem, sicut Aegyptii submersi sunt in mari rubro, persequentes filios Israel, ut habetur Exod. xiv. & sicut Sodomitæ universaliter perierunt: vel quantum ad magnam multitudinis partem, sicut patet Exod. xxxii. in pœna eorum qui vitulum adoraverunt. Quandoque vero si speretur multorum correctio, debet ferreitas vindictæ exerceri in aliquos pau-

cos principales, quibus puniis ceteri terreatur; sicut Dominus Num. xxv. mandavit suspendi populi principes pro peccato multitudinis. Si autem non tota multitudo peccavit, sed pro parte, tunc si possunt mali fecerit a bonis, debet in eos vindicta exerceri; si tamen hoc fieri possit sine scandalo aliorum: alioquin parcendum est multitudini, & detrahendum severitati. Et eadem ratio est de Principe, quem sequitur multitudo. Tolerandum enim est peccatum eius, si sine scandalo multitudinis puniri non posset: nisi forte esset tale peccatum Principis, quod magis noceret multitudini vel spiritualiter, vel temporaliter, quam scandalum quod exinde timeretur.

## ARTICULUS II. 365

### Utrum vindictio sit specialis virtus.

**A**D secundum sic proceditur. Videtur quod vindictio non sit specialis virtus ab alijs distincta. Sicut enim remunerantur boni pro his quæ bene agunt, ita puniuntur mali pro his quæ male agunt. Sed remuneratio bonorum non pertinet ad aliquam virtutem specialem, sed est actus commutativæ iustitiæ. Ergo pari ratione & vindictio non debet poni specialis virtus.

2. Præterea. Ad actum illum non debet ordinari specialis virtus ad quem homo sufficienter disponitur per alias virtutes. Sed ad vindicandum mala sufficienter disponitur homo per virtutem fortitudinis, & per zelum. Non ergo vindictio debet poni specialis virtus.

3. Præterea. Cuilibet speciali virtuti aliquid speciale vitium opponitur. Sed vindicationi non videtur opponi aliquid vitium speciale. Ergo non est specialis virtus.

Sed contra est quod Tullius (Lib. II. de invent. aliquant. ante fin.) ponit eam partem iustitiæ.

Respondendo dicendum, quod, sicut Philosophus dicit in II. Ethic. (cir. princ.) aptitudo ad virtutem inest nobis a natura, licet complementum virtutis sit per assuetudinem, vel per aliquam aliam causam. Unde patet quod virtutes perficiant nos ad prosequendum debito modo inclinationes naturales, quæ pertinent ad ius naturale. Et ideo ad quamlibet inclinationem naturalem determinatam ordinatur aliqua virtus specialis.

(a) Porporam al. Sylvester.

Est autem quædam specialis inclinatio naturæ ad removendum nocumenta: unde & animalibus datur vis irascibilis separatim a vi concupiscibili. Repellit autem homo nocumenta per hoc quod se defendit contra iniurias, ne ei inferantur, vel illatas iam iniurias ulciscitur non intentione nocendi, sed intentione removendi nocumenta. Hoc autem pertinet ad vindicationem: dicit enim Tullius in sua Rhetorica (loc. sup. cit.) quod *vindicatio est per quam vis, aut iniuria, & omnino quicquid (a) obscurum est, idem ignominiosum, defendendo, aut ulciscendo propulsetur.*

Unde vindicatio est specialis virtus.

Ad primum ergo dicendum, quod sicut recompensatio debiti legalis pertinet ad iustitiam commutativam, recompensatio autem debiti moralis, quod nascitur ex particulari beneficio exhibito, pertinet ad virtutem gratiæ; ita etiam puniatio peccatorum, secundum quod pertinet ad publicam iustitiam, est actus iustitiæ commutativæ; secundum autem quod pertinet (b) ad immunitatem aliquius personæ singularis, a qua iniuria propulsetur, pertinet ad virtutem vindicationis.

Ad secundum dicendum, quod fortitudo disponit ad vindictam removendo prohibens, scilicet timorem periculi imminentis. Zelus autem, secundum quod importat fervorem amoris, importat primam radicem vindicationis, prout aliquis vindicat iniurias Dei, vel proximorum, quas ex caritate reputat quasi suas. Cuiuslibet autem virtutis actus ex radice caritatis procedit: quia, ut Gregorius dicit in quadam homilia (xxvii. in Evang. cir. princ.) *nihil habet viriditatis ramus boni operis, si non procedat ex radice caritatis.*

Ad tertium dicendum, quod vindicationi opponuntur duo vitia: unum quidem per excessum, scilicet peccatum crudelitatis, vel sævitie, quæ excedit mensuram in puniendo; aliud autem est vitium quod consistit in defectu, sicut cum aliquis est nimis remissus in puniendo. Unde dicitur Proverb. xiii. 24. *Qui parcat virga, odit filium suum.* Virtus autem vindicationis consistit in hoc ut homo secundum omnes circumstantias debitam mensuram in vindicando conservet.

# ARTICULUS III. 366

*Utrum vindicatio debeat fieri per penas apud homines consuetas.*

**A**D tertium sic proceditur. Videtur quod vindicatio non debeat fieri per penas apud homines consuetas. Occisio enim hominis est quædam eradicatio eius. Sed Dominus mandavit Matth. xiii. quod zizaniam, per quæ significantur filii nequam, non eradicarentur. Ergo peccatores non sunt occidendi.

2. Præterea. Quicumque mortaliter peccant, eadem pena videntur digni. Si ergo aliqui peccantes mortaliter morte puniuntur, videtur quod omnes tales deberent morte puniri: quod patet esse falsum.

3. Præterea. Cum aliquis pro peccato puniatur manifeste, ex hoc peccatum eius manifestatur, quod videtur esse nocivum multitudini, quæ ex exemplo peccati sumit occasionem peccandi. Ergo videtur quod non sit pena mortis pro aliquo peccato infligenda.

Sed contra est quod in lege divina huiusmodi penæ determinantur, ut ex supradictis patet (1. 2. quæst. cv. art. 2.)

Rpondeo dicendum, quod vindicatio intantum licita est, & virtuosa, inquantum tendit ad cohibitionem malorum. Cohibentur autem aliqui peccando qui affectum virtutis non habent, per hoc quod timent amittere aliqua quæ plus amant quam illa quæ peccando adipiscuntur; alias timor non compelleret peccatum. Et ideo per subtractionem omnium quæ homo maxime diligit, est vindicta de peccatis sumenda.

Hæc autem sunt quæ homo maxime diligit, vitam, incolumitatem corporis, libertatem sui, & bona exteriora, puta divitias, patriam, & gloriam. Et ideo, ut Augustinus refert XXI. de civ. Dei (cap. xi. a princ.) *otto genera puniarum in legibus esse scribit Tullius; scilicet mortem, per quam tollitur vita; verbera, & salionem, ut scilicet oculum pro oculo perdat, per quæ amittit quis corporis incolumitatem; servitutem, & vincula, per quæ perdit libertatem; exilium, per quod perdit patriam; damnum, per quod perdit divitias; ignominiam, per quam perdit gloriam.*

Ad primum ergo dicendum, quod Do-

(a) Apud Tullium obscurum, Menium est Thologarum, (b) Ita msi. & odit filium suum, optime, Ad commutationem.

minus prohibet eradicari zizania, quando timetur ne simul cum eis eradicetur & triticum. Sed quandoque possunt eradicari mali per mortem non solum sine periculo, sed etiam cum magna utilitate bonorum. Et ideo in tali casu potest poena mortis peccatoribus infligi.

Ad secundum dicendum, quod omnes peccantes mortaliter digni sunt morte aeterna quantum ad futuram retributionem, quae est secundum veritatem divini iudicii. Sed poenae praesentis vitae sunt magis medicinales: & ideo illis solis peccatis poena mortis infligitur quae in gravem perniciem aliorum cedunt.

Ad tertium dicendum, quod quando simul cum culpa innotescit & poena vel mortis, vel quaecumque alia, quam homo horret, ex hoc ipso voluntas eius a peccando abstrahitur: quia plus terret poena quam alliciat exemplum cul-  
pae.

#### ARTICULUS IV. 567

*Utrum vindicta sit exercenda in eos qui involuntarie peccaverunt.*

**A**D quartum sic proceditur. Videtur quod vindicta sit exercenda in eos qui involuntarie peccaverunt. Voluntas enim unius non consequitur voluntatem alterius. Sed unus punitur pro alio. secundum illud Exod. xx. 5. *Ego sum Deus zelotes, visitans iniquitatem patrum in filios, in tertiam, & quartam generationem*: unde & pro peccato Cham Chanaan filius eius maledictus est, ut habetur Gen. ix. Giezi etiam peccante, lepra transmittitur ad posteros, ut habetur IV. Reg. v. Sanguis etiam Christi poenae reddit obnoxiosos successores Iudaeorum, qui dixerunt Matth. xxvii. 25. *Sanguis eius super nos, & super filios nostros*. Legitur etiam quod pro peccato Achan populus Israel traditus est in manus hostium, ut habetur Iosue vii. Et pro peccato filiorum Heli idem populus corruit in conspectu Philistinorum, ut habetur I. Reg. iv. Ergo aliquis involuntarius est puniendus.

2. Praeterea. Illud solum est voluntarium quod est in potestate hominis. Sed quandoque poena inferitur pro eo quod non est in eius potestate; sicut propter vitium leprae aliquis removetur ab administratione Ecclesiae; & propter pravitatem, aut malitiam civium Ecclesia perdit cathedram episcopalem. Ergo non

solum pro peccato voluntario vindicta inferitur.

3. Praeterea. Ignorantia causat involuntarium. Sed vindicta quandoque exercetur in aliquos ignorantes: parvuli enim Sodomitae licet haberent ignorantiam invincibilem, cum parentibus tamen perierunt, ut legitur Gen. xix. Similiter etiam parvuli pro peccato Datan, & Abiron pariter cum eis absorpti sunt, ut habetur Num. xvi. Bruta etiam animalia, quae carent ratione, lussa sunt interheri pro peccato Amalecitarum, ut habetur I. Reg. xv. Ergo vindicta quandoque exercetur in involuntarios.

4. Praeterea. Coactio maxime repugnat voluntario. Sed aliquis qui timore coactus aliquod peccatum committit, non propter hoc reatum poenae evadit. Ergo vindicta quandoque exercetur in involuntarios.

5. Praeterea. Ambrosius dicit furer Lucam (cap. v. in princ. & hab. cap. Non turbatur xxiv. quaest. 1.) quod *navicula in qua erat Iudas, turbabatur*: unde & Petrus, qui erat firmus nervis suis, turbabatur alienis. Sed Petrus non volebat peccatum Iudae. Ergo quandoque involuntarius punitur.

Sed contra est quod poena debetur peccato. Sed omne peccatum est voluntarium, ut dicit Augustinus (Lib. III. de lib. arbitr. cap. i. cir. fin. & Lib. I. Retract. cap. ix.) Ergo in solos voluntarios exercenda est vindicta.

Respondeo dicendum, quod poena dupliciter potest considerari. Uno modo secundum rationem poenae: & secundum hoc poena non debetur nisi peccato: quia per poenam reparatur aequalitas iustitiae, inquantum ille qui peccando nimis secutus est suam voluntatem, aliquid contra suam voluntatem patitur. Unde cum omne peccatum sit voluntarium, etiam originale, ut supra habitum est (1. 2. quaest. lxxxvi. art. 1.) consequens est quod nullus punitur hoc modo, nisi pro eo quod voluntarie factum est.

Alio modo potest considerari poena, inquantum est medicina non solum sanativa peccati praeteriti, sed etiam praeservativa a peccato futuro, vel etiam promotiva in aliquod bonum: & secundum hoc aliquis interdum punitur sine culpa, non tamen sine causa.

Sciendum tamen, quod nunquam medicina subtrahit maius bonum, ut prodeat minus bonum; sicut medicina

car.

carialis numquam cecat oculum, ut sanet calcaneum; quandoque tamen infert nocumentum in minoribus, ut in melioribus auxilium praestet. Et quia bona spiritualia sunt maxima bona, bona autem temporalia sunt minima; ideo quandoque punitur aliquis in temporalibus bonis absque culpa; cuiusmodi sunt plures poenae praesentis vitae divinitus inflitae ad humiliationem, vel probationem: non autem punitur aliquis in spiritualibus bonis sine propria culpa neque in praesenti, neque in futuro: quia ibi poenae non sunt medicinae, sed consequuntur spiritualem damnationem.

Ad primum ergo dicendum, quod unus homo poena spirituali numquam punitur pro peccato alterius: quia poena spiritualis pertinet ad animam, secundum quam quilibet est liber sui. Poena autem temporalis quandoque unus punitur pro peccato alterius, triplici ratione. Primo quidem quia unus homo temporaliter est res alterius; & ita in poenam eius etiam ipse punitur; sicut filii secundum corpus sunt quaedam res patris, & servi quaedam res dominorum. Aliomodo in quantum peccatum unius derivatur in alterum vel per imitationem, sicut filii imitantur peccata parentum, & servi peccata dominorum, ut audacius peccent: vel per modum meriti, sicut peccata subditorum merentur peccatorem praetium, secundum illud Iob xxxiv. 30. *Qui regnare facit hominem hypocritam propter peccata populi.* Unde & pro peccato David populum numerantis populus Israel punitus est, ut habetur II. Reg. ult. Sive etiam per aliqualem consensum, seu dissimulationem; sicut etiam interdum boni simul puniuntur temporaliter cum malis, quia eorum peccata non redarguerunt, ut Augustinus dicit in I. de civ. Dei. (cap. ix.) Tertia ad commendandam unitatem humanae societatis, ex qua unus debet pro alio sollicitus esse ne peccet; & ad detestationem peccati, dum poena unius redundat in omnes, quasi omnes essent unum corpus, ut Augustinus dicit de peccato Achan (Lib. Qq. sup. Iosue quaest. viii.) Quod autem Dominus dicit, *Visitans peccata parentum in filios in tertiam, & quartam generationem*, magis videtur ad misericordiam quam ad severitatem pertinere; dum non statim vindictam adhibet, sed expectat in posterum, ut vel saltem posterius corrigantur: sed crescente malitia posterorum, quasi necesse est ultionem inferri.

S. Tb. Oper. Tom. XXIII.

Ad secundum dicendum, quod, sicut Augustinus dicit (loc. cit.) iudicium humanum debet imitari divinum iudicium in manifestis Dei iudiciis, quibus homines spiritualiter damnat pro proprio peccato. Occulta vero Dei iudicia, quibus temporaliter aliquos punit absque culpa, non potest humanum iudicium imitari: quia homo non potest comprehendere horum iudiciorum rationes, ut sciat quid expediat unicuique. Et ideo numquam secundum humanum iudicium aliquis debet puniri sine culpa poena flagelli, ut occidatur, vel mutiletur, vel verberetur. Poena autem damni punitur aliquis etiam secundum humanum iudicium, etiam sine culpa, sed non sine causa; & hoc tripliciter. Uno modo ex hoc quod aliquis ineptus redditur sine sua culpa ad aliquod bonum habendum, vel consequendum; sicut propter vitium leprae aliquis removetur ab administratione Ecclesiae; & propter bigamiam, vel iudicium sanguinis aliquis impeditur a sacerdotibus. Secundo quia bonum in quo damnificatur, non est proprium bonum, sed commune; sicut quod aliqua Ecclesia habeat Episcopatum pertinet ad bonum totius civitatis, non autem ad bonum clericorum tantum. Tercio quia bonum unius dependet ex bono alterius; sicut in crimine laesae maiestatis filius amittit hereditatem pro peccato parentis.

Ad tertium dicendum, quod parvuli divino iudicio simul puniuntur temporaliter cum parentibus: tum quia sunt res parentum, & in eis etiam parentes puniuntur: tum etiam quia hoc in eorum bonum cedit, ne si reservarentur, essent imitatores patrum malitiae, & graviore poenam mererentur. In bruta vero animalia, & quaecumque alias irrationales creaturas vindicta exercetur, quia per hoc puniuntur illi quorum sunt; & iterum propter detestationem peccati.

Ad quartum dicendum, quod coactio timoris non facit simpliciter involuntarium, sed habet voluntarium mixtum, ut supra habitum est (1. 2. quaest. vi. art. 5. & 6.)

Ad quintum dicendum, quod hoc modo pro peccato Iudae ceteri Apostoli turbabantur, sicut pro peccato unius puniuntur multitudo, ad unitatem commendandam, ut dictum est (in resp. ad 1. & 2.)

C

QUAE.

## QUAESTIO CIX.

## De veritate,

*in quatuor articulos diuisa.*

**D**Einde considerandum est de veritate, & vitiis oppositis.

Circa veritatem autem quaeruntur quatuor.

Primo, utrum veritas sit virtus.

Secundo, utrum sit specialis virtus.

Tertio, utrum sit pars iustitiae.

Quarto, utrum magis declinet in minus.

## ARTICULUS I. 368

*Utrum veritas sit virtus.*

1. P. quest. xvi. art. 4. ad 4. & quest. xvii. art. 8. cor. & III. dist. xxxiv. quest. 1. art. 2. cor. & IV. dist. xvi. quest. 1v. art. 1. quest. 2. cor. & dist. xxi. quest. 111. art. 2. quest. 3. cor. & verit. quest. 1. art. 3. ad 12.

**A**D primum sic proceditur. Videtur quod veritas non sit virtus. Prima enim virtutum est fides, cuius obiectum est veritas. Cum ergo obiectum sit prius habitu, & actu, videtur quod veritas non sit virtus, sed aliquid prius virtute.

2. Praeterea. Sicut Philosophus dicit in IV. Ethic. (cap. vii.) ad veritatem pertinet quod aliquis conhteatur existentia circa seipsum, & neque maiora, neque minora. Sed hoc non semper est laudabile neque in bonis, quia, ut dicitur Proverb. xxvii. 2. *laudet te alienus, & non as tuum*: nec etiam in malis, quia contra quosdam dicitur Isa. 111. 9. *Peccatum suum quasi Sodoma praedicaverunt, nec absconderunt*. Ergo veritas non est virtus.

3. Praeterea. Omnis virtus aut est theologia, aut intellectualis, aut moralis. Sed veritas non est virtus theologica, quia non habet Deum pro obiecto, sed res temporales: dicit enim Tullius (Lib. II. de invent. aliquant. ante fin.) *quod veritas est per quam immutata ea quae sunt, aut fuerunt, aut futura sunt, dicuntur*. Similiter etiam non est virtus intellectualis, sed finis earum. Neque etiam est virtus moralis, quia non consistit in medio inter *superfluum*, & *diminutum*: quanto enim aliquis plus dicit

verum, tanto melius est. Ergo veritas non est virtus.

Sed contra est quod Philosophus in II. & IV. Ethicor. (cap. vii. utrobique) ponit veritatem inter ceteras virtutes.

Respondeo dicendum, quod veritas dupliciter accipi potest. Uno modo, secundum quod veritate aliquid dicitur verum: & sic veritas non est virtus, sed obiectum, vel finis virtutis: sic enim accepta veritas non est habitus, qui est genus virtutis, sed aequalitas quaedam intellectus, vel signi ad rem intellectam, & signatam, vel etiam rei ad suam regulam, ut in primo habitu est (quest. xvi. art. 1. & quest. xxi. art. 2.)

Alio modo potest dici veritas, quia aliquis verum dicit, secundum quod per eam aliquis dicitur verax: & talis veritas, sive veracitas, necesse est quod sit virtus: quia hoc ipsum quod est dicere verum, est bonus actus. Virtus autem est *quae bonum facit habentem, & opus eius bonum reddit*.

Ad primum ergo dicendum, quod ratio illa procedit de veritate primo modo dicta.

Ad secundum dicendum, quod confiteri id quod est circa seipsum, inquantum est confessio veri, est bonum ex genere. Sed hoc non sufficit ad hoc quod sit virtutis actus; sed ad hoc requiritur quod ulterius debitis circumstantiis vestiat: quae si non observentur, erit actus vitiosus. Et secundum hoc vitiosum est quod aliquis sine debita causa laudet seipsum etiam de vero: vitiosum est etiam quod aliquis peccatum suum publicet, quasi se de hoc laudando, vel qualitercumque inutiliter manifestando.

Ad tertium dicendum, quod ille qui dicit verum, proferat aliqua signa consonantia rebus, scilicet vel verba, vel aliqua facta exteriora, aut quaecumque res exteriores. Circa huiusmodi autem res sunt solae virtutes morales, ad quas scilicet pertinet usus exteriorum membrorum, secundum quod sit per imperium voluntatis. Unde veritas non est virtus theologica, neque intellectualis, sed moralis. Est autem in medio inter *superfluum*, & *diminutum*, dupliciter: uno quidem modo ex parte obiecti, alio modo ex parte actus. Ex parte quidem obiecti, quia verum secundum suam rationem importat quandam aequalitatem: aequale autem est medium inter maius, & minus: unde ex hoc ipso quod aliquis dicit verum de seipso, medium tenet inter

cum



eum qui maiora dicit de seipso, & inter eum qui minora. Ex parte autem actus medium tenet, inquantum verum dicit, quando oportet, & secundum quod oportet. Superfluum autem convenit illi qui importune ea quae sua sunt manifestat; defectus autem competit illi qui occultat, quando manifestare oportet.

## ARTICULUS II. 369

*Utrum veritas sit specialis virtus.*

*II. dist. xvi. quæst. iv. art. i. quæst. 2.*

**A**D secundum sic proceditur. Videtur quod veritas non sit specialis virtus. Verum enim, & bonum convertuntur. Sed bonitas non est specialis virtus; quinimodo omnis virtus est bonitas, quia *bonum facit habentem*. Ergo veritas non est specialis virtus.

2. Præterea. Manifestatio eius quod ad ipsum hominem pertinet, est actus veritatis, de qua nunc loquimur. Sed hoc pertinet ad quamlibet virtutem: quilibet enim virtutis habitus manifestatur per proprium actum. Ergo non est specialis virtus.

3. Præterea. Veritas vitæ dicitur, quia quis recte vivit: de qua dicitur Isa. xxxviii. 3. *Memento, quæso, quomodo ambulaverim coram te in veritate, & in corde perfecto*. Sed qualibet virtute recte vivitur, ut patet per definitionem virtutis supra positam (1. 2. quæst. iv. art. 4.) Ergo veritas non est specialis virtus.

4. Præterea. Veritas videtur idem esse simplicitati, quia utrique opponitur simulatio. Sed simplicitas non est specialis virtus, quia facit intentionem rectam, quod requiritur in omni virtute. Ergo etiam veritas non est specialis virtus.

Sed contra est quod in II. Ethic. (cap. vii.) connumeratur aliis virtutibus.

Respondeo dicendum, quod ad rationem virtutis humanæ pertinet quod opus hominis bonum reddat. Unde ubi in actu hominis invenitur specialis ratio bonitatis, necesse est quod ad hoc disponatur homo per specialem virtutem. Cum autem bonum, secundum Augustinum in Lib. de natura boni (cap. xii.) consistat in ordine, necesse est specialem rationem boni considerari ex determinato ordine. Est autem quidam specialis vel ordinis, secundum quod exteriora nostra vel

verba, vel facta debite ordinantur ad aliquid, sicut signum ad signatum: & ad hoc perficitur homo per virtutem veritatis.

Unde manifestum est quod veritas est specialis virtus.

Ad primum ergo dicendum, quod verum, & bonum subiecto quidem convertuntur, quia omne verum est bonum, & omne bonum est verum; sed secundum rationem invicem se excedunt; sicut intellectus, & voluntas invicem se excedunt: nam intellectus intelligit voluntatem, & multa alia; & voluntas appetit ea quæ pertinent ad intellectum, & multa alia. Unde *verum* secundum rationem propriam, quæ est perfectio intellectus, est quoddam particulare bonum, inquantum appetibile quoddam est: & similiter *bonum* secundum propriam rationem, prout est finis appetitus, est quoddam verum, inquantum est quoddam intelligibile. Quia ergo virtus includit rationem bonitatis, potest esse quod veritas sit specialis virtus, sicut *verum* est speciale bonum; non autem potest esse quod bonitas hominis sit specialis virtus, cum magis secundum rationem sit genus virtutis.

Ad secundum dicendum, quod habitus virtutum, & virtutum fortiorum facientem ex eo quod est per se intentum, non autem ab eo quod est per accidens, & præter intentionem. Quod autem, aliquis manifestet quod circa ipsum est pertinet quidem ad virtutem veritatis, sicut per se intentum; ad alias autem virtutes potest pertinere ex consequenti, præter principalem intentionem. Fortis enim intendit fortiter agere; quod autem fortiter agendo aliquis manifestet fortitudinem quam habet, hoc consequitur præter eius principalem intentionem.

Ad tertium dicendum, quod veritas vitæ est veritas secundum quam aliquid est verum, non veritas secundum quam aliquid dicit verum. Dicitur autem vita vera, sicut & quælibet alia res, ex hoc quod attingit suam regulam, & mensuram, scilicet divinam legem, per cuius conformitatem rectitudinem habet: & talis veritas, sive rectitudo communis est ad quamlibet virtutem.

Ad quartum dicendum, quod simplicitas dicitur per oppositum duplici, quia scilicet aliquis aliud habet in corde, & aliud ostendit exterius: & sic simplicitas ad hanc virtutem pertinet. Facit autem intentionem rectam, non quidem

directe ( quia hoc pertinet ad omnem virtutem, ) sed excludendo duplicitatem, quia homo unum prætendit, & aliud intendit.

### ARTICULUS III. 570

*Utrum veritas sit pars iustitiæ.*

*Ver. quæst. 1. art. 3. ad 32.*

**A**D tertium sic proceditur. Videtur quod veritas non sit pars iustitiæ. Iustitiæ enim proprium esse videtur quod reddat alteri debitum. Sed ex hoc quod aliquis dicit verum, non videtur alteri debitum reddere, sicut fit in omnibus præmissis iustitiæ partibus. Ergo veritas non est pars iustitiæ.

2. Præterea. Veritas pertinet ad intellectum. Iustitia autem est in voluntate, ut supra habitum est (quæst. lxxii. art. 4.) Ergo veritas non est pars iustitiæ.

3. Præterea. Triplex distinguitur veritas secundum Hieronymum (habet. in Glossa Lyranus sup. illud Matth. xv. *Audite hoc, scandalizati sunt*) scilicet *veritas vitæ*, & *veritas iustitiæ*, & *veritas doctrinæ*. Sed nulla istarum est pars iustitiæ: nam veritas vitæ continet in se omnem virtutem, ut dictum est (art. præc. ad 3.) veritas autem iustitiæ est idem iustitiæ, unde non est pars eius; veritas autem doctrinæ pertinet magis ad virtutes intellectuales. Ergo veritas nullo modo est pars iustitiæ.

Sed contra est quod Tullius (Lib. II. de invent. aliquant. ante fin.) ponit veritatem inter partes iustitiæ.

Respondetur dicendum, quod, sicut supra dictum est (quæst. lxxx.) ex hoc aliqua virtus iustitiæ annectitur, sicut secundaria principali, quod partim quidem cum iustitia convenit, partim autem desinit ab eius perfecta ratione. Virtus autem veritatis convenit quidem cum iustitia in duobus. Uno quidem modo in hoc quod est ad alterum: manifestatio enim, quam diximus esse actum veritatis, est ad alterum, in quantum scilicet ea quæ circa ipsum sunt, unus homo alteri manifestat. Alio modo, in quantum iustitia æqualitatem quandam in rebus constituit: & hoc etiam facit virtus veritatis: adæquat enim sibi rebus existentibus circa ipsum. Deficit autem a propria ratione iustitiæ quantum ad rationem debiti: non enim hæc virtus attendit debi-

tum legale, quod attendit iustitia, sed potius debitum morale, in quantum scilicet ex honestate unus homo alteri debet veritatis manifestationem.

Unde veritas est pars iustitiæ, in quantum annectitur ei sicut virtus secundaria principali.

Ad primum ergo dicendum, quod quia homo est animal sociale, naturaliter unus homo debet alteri id sine quo societas humana servari non posset. Non autem possent homines ad invicem convivere, nisi sibi invicem crederent, tamquam sibi invicem veritatem manifestantibus. Et ideo virtus veritatis aliquo modo attendit rationem debiti.

Ad secundum dicendum, quod veritas, secundum quod est cognita, pertinet ad intellectum; sed homo per propriam voluntatem, per quam utitur & habitibus, & membris, proferit exteriora signa ad veritatem manifestandam: & secundum hoc manifestatio veritatis est actus voluntatis.

Ad tertium dicendum, quod veritas de qua nunc loquimur, differt a veritate vitæ, ut dictum est (art. præc. ad 3.) veritas autem iustitiæ dicitur dupliciter. Uno modo secundum quod ipsa iustitia est rectitudo quædam regulata secundum regulam divinæ legis: & secundum hoc differt veritas iustitiæ a veritate vitæ: quia veritas vitæ est secundum quam aliquis recte vivit in seipso; veritas autem iustitiæ est secundum quam aliquis rectitudinem legis in iudiciis, quæ sunt ad alterum, servat: & secundum hoc veritas iustitiæ non pertinet ad veritatem de qua nunc loquimur, sicut nec veritas vitæ. Alio modo potest intelligi veritas iustitiæ, secundum quod aliquis ex iustitia veritatem manifestat; puta cum aliquis in iudicio veritatem confitetur, aut verum testimonium dicit: & hæc veritas est quidam particularis actus iustitiæ, & non pertinet directe ad hanc veritatem, de qua nunc loquimur: quia scilicet in hac manifestatione veritatis principaliter homo intendit ius suum alteri reddere. Unde Philosophus in IV. Eth. (cap. vii. in med.) de hac virtute determinans dicit: *Non de veridico in confessionibus dicimus, neque quæcumque ad iustitiam, vel iniustitiam contendunt.* Veritas autem doctrinæ consistit in quadam manifestatione verborum, de quibus est scientia. Unde nec ista veritas directe pertinet ad hanc virtutem, sed solum

ve-

veritas qua aliquis & vita, & sermone talem se demonstrat, qualis est; & non alia (a) quam circa ipsum sint, nec maiora, nec minora. Veruntamen (b) quia moralia, inquantum sunt a nobis cognita, circa nos sunt, & ad nos pertinent, secundum hoc veritas doctrinae potest ad hanc virtutem pertinere; & quaecunque alia (c) veritas qua quis manifestat verbo, vel facto quod cognoscit.

ARTICULUS IV. 571

*Utrum virtus veritatis magis declinet in minus.*

*Inf. quæst. cxxix. art. 3. ad 5.*

**A**D quartum sic proceditur. Videtur quod virtus veritatis non declinet in minus. Sicut enim aliquis dicendo maius incurrit falsitatem, ita & dicendo minus: non enim magis est falsum quatuor esse quinque, quam quatuor esse tria: Sed omne falsum est secundum se malum, & fugiendum, ut Philosophus dicit in IV. Eth. (cap. vii. ante med.) Ergo veritatis virtus non plus declinat in minus quam in maius.

2. Præterea. Quod una virtus magis declinet ad unum extremum quam ad aliud, contingit ex hoc quod virtutis medium est propinquius uni extremo quam alteri; sicut fortitudo est propinquior audaciæ quam timiditati. Sed veritatis medium non est propinquius uni extremo quam alteri: quia veritas, cum sit æqualitas quædam, in medio punctuali consistit. Ergo veritas non magis declinat in minus.

3. Præterea. In minus videtur a veritate recedere qui veritatem negat, veritatem aliquid subtrahens; in maius autem qui veritati aliquid superaddit. Sed magis repugnat veritati qui veritatem negat, quam qui superaddit: quia veritas non compatitur secum negationem veritatis, compatitur autem secum superadditionem. Ergo videtur quod veritas magis debeat declinare in maius quam in minus.

Sed contra est quod Philosophus dicit in IV. Eth. (cap. vii. cir. med.) quod homo secundum hanc virtutem magis a vero declinat in minus.

*S. Tb. Oper. Tom. XXIII.*

Respondeo dicendum, quod declinare in minus a veritate contingit dupliciter. Uno modo affirmando; puta cum aliquis non manifestat verum bonum quod in ipso est, puta scientiam, vel sanctitatem, vel aliquid huiusmodi; quod fit sine præiudicio veritatis, quia in maiori etiam est minus: & secundum hoc hæc virtus declinat in minus. Hoc enim, ut Philosophus dicit ibidem, videtur esse prudentius, propter onerosas superabundantias. Homines enim qui maiora de seipsis dicunt (d) quam sint, sunt aliis onerosi, quasi excellere alios volentes; homines autem qui minora de seipsis dicunt, gratiosi sunt, quasi aliis condescendentes per quamdam moderationem. Unde Apostolus dicit II. ad Corinth. xii. 6. Si voluero gloriari, non ero insipiens, veritatem enim dicam; parco autem, ne quis me existimet supra id quod videt in me, aut audit ex me.

Alio modo potest aliquis declinare in minus negando, scilicet ut neget sibi inesse quod inest: & sic non pertinet ad hanc virtutem declinare in minus, quia per hoc incurreret falsum: & tamen hoc ipsum esset minus repugnans veritati, non quidem secundum propriam rationem veritatis, sed secundum rationem prudentiæ, quam oportet salvari in omnibus virtutibus: magis enim repugnat prudentiæ, quia periculosius est, & onerosius aliis, quod aliquis existimet, vel iactet se habere quod non habet, quam quod existimet, vel dicat se non habere quod habet.

Et per hoc patet responsio ad obiecta.

QUAESTIO CX.

*De vitiiis oppositis veritati, & primo de mendacio,*

*in quatuor articulos divisa.*

**D**Einde considerandum est de vitiiis oppositis veritati: & primo de mendacio; secundo de simulatione, sive hypocrisis; tertio de iactantia, & opposito vitio.

Circa mendacium quærentur quatuor. Primo, utrum mendacium semper opponatur veritati, quasi continens falsitatem.

C 3

Se-

(a) Ita communis. Codex Alcan. quæ. Editio Rom. quam circa ipsa. (b) Ita editi libri quos vidimus. Cod. Camer. & Alcan. quia vera nobilia, inquantum &c. alius Theologorum codex vera scibilia, latrone vera moralia. (c) Ita cum cod. Alcan. Rom. & Paris. editi passim. Cod. Camer. virtus. (d) Theologi putant vices quas sint esse adiecticias. Recte vero sic habent omnes mss. & editi libri.

Secundo de speciebus mendacii.

Tertio, utrum mendacium semper sit peccatum.

Quarto, utrum semper sit peccatum mortale.

## ARTICULUS I. 572

*Utrum mendacium semper opponatur veritati.*

*Inf. art. 2. cor. & III. dist. xxxviii. quæst. 1. art. 1.*

**A**D primum sic proceditur. Videtur quod mendacium non semper opponatur veritati. Opposita enim non possunt esse simul. Sed mendacium simul potest esse cum veritate: qui enim verum loquitur, quod falsum esse credit, mentitur, ut Augustinus dicit in Lib. de mendac. (cap. iiii. a med.) Ergo mendacium non opponitur veritati.

2. Præterea. Virtus veritatis non solum consistit in verbis, sed etiam in factis: quia secundum Philosophum in IV. Eth. (cap. vii.) secundum hanc virtutem aliquis verum dicit & in sermone, & in vita. Sed mendacium consistit solum in verbis: dicitur enim, quod mendacium est *falsa vocis significatio*. Sic ergo videtur quod mendacium non directe opponatur virtuti veritatis.

3. Præterea. Augustinus dicit in Lib. de mendacio (loc. cit.) quod *culpa mentientis est fallendi cupiditas*. Sed hoc non opponitur veritati, sed magis benevolentiae, vel iustitiæ. Ergo mendacium non opponitur veritati.

Sed contra est quod dicit Augustinus in Libro de mendacio (cap. iv. in fin.) *Nemo dubitet mentiri eum qui falsum enuntiat causa fallendi. Quapropter enuntiationis falsi cum voluntate ad fallendum prolata, manifestum est mendacium*. Sed hoc opponitur veritati. Ergo mendacium veritati opponitur.

Respondeo dicendum, quod actus moralis ex duobus speciebus sortitur, scilicet ex obiecto, & ex fine. Nam finis est obiectum voluntatis, quæ est primum movens in moralibus actibus. Potentia autem a voluntate mota habet suum obiectum, quod est proximum obiectum voluntarii actus; & se habet in actu voluntatis ad finem, sicut materiale ad formale, ut ex supradictis patet (1. 2. quæst. xviii. art. 6. & 7.)

Dictum est autem (quæst. præc. art. 1.

ad 3.) quod virtus veritatis, & per consequens opposita vitia, in manifestatione consistit, quæ fit per aliqua signa: quæ quidem manifestatio, sive enuntiatio est rationis actus conferentis signum ad signatum: omnis enim repræsentatio consistit in quadam collatione, quæ proprie pertinet ad rationem. Unde etiam bruta animalia aliquid manifestent, non tamen manifestationem inveniunt; sed naturali instinctu aliquid agunt, ad quod manifestatio sequitur. Inquantum tamen huiusmodi manifestatio, sive enuntiatio est actus moralis, oportet quod sit voluntarius, & ex intentione voluntatis dependens. Obiectum autem proprium manifestationis, sive enuntiationis est verum, vel falsum. Intentio vero voluntatis inordinatæ potest ad duo ferri: quorum unum est ut falsum enuntietur; aliud est effectus proprius falsæ enuntiationis, ut scilicet aliquis fallatur.

Si ergo ista tria concurrant, scilicet quod falsum sit id quod enuntiat, & quod adit voluntas falsum enuntiandi, & iterum intentio fallendi, tunc est falsitas materialiter, quia falsum dicitur, & formaliter propter voluntatem falsum dicendi, & effective propter voluntatem falsitatem imprimendi.

Sed tamen ratio mendacii sumitur a formali falsitate, ex hoc scilicet quod aliquis habet voluntatem falsum enuntiandi: unde & mendacium nominatur ex eo quod contra mentem dicitur. Et ideo si quis falsum enuntiet, credens id esse verum, est quidem falsum materialiter, sed non formaliter, quia falsitas est præter intentionem dicentis: unde non habet perfectam rationem mendacii: id enim quod præter intentionem dicentis est, per accidens est: unde non potest esse specifica differentia. Si vero aliquis formaliter falsum dicat, habens voluntatem falsum dicendi, licet sit verum id quod dicitur, inquantum tamen huiusmodi actus est voluntarius, & moralis, habet per se falsitatem, & per accidens veritatem: unde ad speciem mendacii pertingit. Quod autem aliquis intendat falsitatem in opinione alterius consistere, fallendo ipsum, non pertinet ad speciem mendacii, sed ad quandam perfectionem ipsius; sicut & in rebus naturalibus aliquid speciem sortitur, si formam habeat, etiam si delit formæ effectus; sicut patet in gravi, quod violenter sursum detinetur, ne descendat secundum exigentiam suæ formæ. Sic ergo patet quod

quod mendacium directe & formaliter opponitur virtuti veritatis.

Ad primum ergo dicendum, quod unumquodque magis iudicatur secundum id quod est in eo formaliter & per se, quam secundum id quod est in eo materialiter & per accidens: & ideo magis opponitur veritati, inquantum est virtus moralis, quod aliquis dicat verum intendens dicere falsum, quam quod dicat falsum intendens dicere verum.

Ad secundum dicendum, quod, sicut Augustinus dicit in II. de doctr. christ. (cap. 111. cir. med.) voces præcipuum locum tenent inter alia signa. Et ideo cum dicitur, quod mendacium est falsa vocis significatio, nomine vocis intelligitur omne signum. Unde ille qui aliquod falsum nutibus significare intenderet, non esset a mendacio immunis.

Ad tertium dicendum, quod cupiditas fallendi pertinet ad perfectionem mendacii, non autem ad speciem ipsius, sicut nec aliquis effectus pertinet ad speciem suæ causæ.

## ARTICULUS II. 573

*Utrum mendacium sufficienter dividatur per mendacium officiosum, iocosum, & perniciosum.*

III. dist. xxxviii. quæst. 1. art. 1. & 3. & opus. lxi. v. cap. xxv. & xxvi. & Psal. v.

**A**D secundum sic proceditur. Videtur quod mendacium insufficienter dividatur per mendacium officiosum, iocosum, & perniciosum. Divisio enim est danda secundum ea quæ per se conveniunt rei, ut patet per Philosophum in VII. Metaph. (tex. 43. & Lib. I. de part. animal. cap. 111. cir. med.) Sed intentio effectus est præter speciem actus moralis, & per accidens se habet ad ipsum, ut videtur: unde & infiniti effectus possunt consequi ex uno actu. Sed hæc divisio datur secundum intentionem effectus: nam mendacium iocosum est quod fit causa ludi; mendacium autem officiosum est quod fit causa utilitatis; mendacium autem perniciosum est quod fit causa nocuentium. Ergo inconvenienter hoc modo dividitur mendacium.

2. Præterea. Augustinus in Lib. de mendacio (cap. xiv.) dividit mendacium in octo partes: quorum primum est in doctrina religionis; secundum est quod nulli prodest, & obest alicui; tertium est

quod prodest ita uni, ut alteri obest; quartum est quod fit sola mentiendi, fallendique libidine; quintum est quod fit placendi cupiditate; sextum est quod nulli obest, & prodest alicui ad conservandam pecuniam; septimum est quod nulli obest, & prodest alicui ad vitandam mortem; octavum quod nulli obest, & prodest alicui ad vitandam immunditiam corporalem. Ergo videtur quod prima divisio mendacii sit insufficientis.

3. Præterea. Philosophus in IV. Eth. (cap. vii.) dividit mendacium in iactantiam, quæ verum excedit in dicendo, & ironiam, quæ deficit a vero in minus: quæ duo sub nullo prædictorum membrorum continentur. Ergo videtur quod divisio prædicta mendacii sit incompetens.

Sed contra est quod super illud Psal. v. *Perdes omnes qui loquuntur mendacium*, dicit Glossa (ord. Aug. ex I. lib. de mendac. cap. xiv.) quod „sunt tria genera mendaciorum: quædam enim sunt pro salute, & commodo alicuius: est etiam aliud genus mendacii quod fit ioco: tertium vero mendacii genus est quod fit ex malignitate.“ Primum autem horum trium dicitur officiosum, secundum iocosum, tertium perniciosum. Ergo mendacium in tria prædicta dividitur.

Respondeo dicendum, quod mendacium tripliciter dividi potest. Uno modo secundum ipsam mendacii rationem, quæ est propria & per se mendacii divisio: & secundum hoc mendacium in duo dividitur: scilicet in mendacium quod transcendit veritatem in maius, quod pertinet ad iactantiam; & in mendacium quod deficit a veritate in minus, quod pertinet ad ironiam; ut patet per Philosophum in IV. Ethic. (cap. vii.) Hæc autem divisio ideo per se est ipsius mendacii, quia mendacium, inquantum huiusmodi, opponitur veritati, ut dictum est (art. præc.) Veritas autem æqualitas quædam est, cui per se opponitur maius, & minus.

Alio modo potest dividi mendacium, inquantum habet rationem culpæ secundum ea quæ aggravant, vel diminuant culpam mendacii ex parte finis intenti. Aggravat autem culpam mendacii, si aliquis per mendacium intendant alterius nocuentium, quod vocatur mendacium perniciosum: diminuit autem culpa mendacii, si ordinetur ad aliquod bonum, vel delectabile, & sic est mendacium iocosum.

cosum; vel utile, & sic est mendacium officiosum, quo intenditur iuvamentum alterius, vel remotio nocimenti. Et secundum hoc dividitur mendacium in tria praedicta.

Tertio modo dividitur mendacium universaliter secundum ordinem ad finem, sive ex hoc addatur, vel diminuat ad culpam mendacii, sive non: & secundum hoc divisio est octo membrorum, quae dicta est (in arg. 2.) In qua quidem tria prima membra continentur sub mendacio pernicioso: quod quidem sit vel contra Deum; & ad hoc pertinet primum mendacium, quod est in doctrina religionis: vel est contra hominem; sive sola intentione nocendi alicui, & sic est mendacium secundum, quod scilicet nulli prodest, & obest alicui; sive etiam intendatur in nocimento unius utilitas alterius, & hoc est tertium mendacium, quod uni prodest, & alteri obest. Inter quae tria primum est gravissimum, quia semper peccata contra Deum sunt graviora, ut supra dictum est (1. 2. quæst. lxxiii. art. 9.) Secundum autem est gravius tertio, quod diminuitur ex intentione utilitatis alterius. Post hæc autem tria, quæ superaddunt ad gravitatem culpæ mendacii, ponitur quartum, quod habet propriam quantitatem sine additione, vel diminutione, & hoc est mendacium quod fit ex sola mentiendi libidine: quod procedit ex habitu: unde & Philosophus dicit in IV. Ethic. (cap. vii.) quod mendax, eo quod talis est secundum habitum, ipso mendacio gaudet. Quatuor vero subseqentes modi diminuant de culpa mendacii: nam quintum est mendacium iocosum, quod fit placendi cupiditate; alia vero tria continentur sub mendacio officioso, in quo intenditur quod est alteri utile; vel quantum ad res exteriores; & sic est sextum mendacium, quod prodest alicui ad pecuniam conservandam: vel est utile corpori; & hoc est septimum mendacium, in quo impeditur mors hominis: vel etiam utile est ad honestatem virtutis; & hoc est octavum mendacium, in quo impeditur illicita pollutio corporalis. Patet autem quod quanto bonum intentum est melius, tanto magis minuitur culpa mendacii. Et ideo si quis diligenter consideret, secundum ordinem prædictæ enumerationis, est ordo gravitatis culpæ in istis mendaciis: nam bonum utile præferitur delectabili, & vita corporalis præfertur pecuniæ, honestas autem ipsi corporali vitæ.

Et per hoc patet responsio ad obiecta.

### ARTICULUS III. 174

*Utrum omne mendacium sit peccatum.*

Sup. quæst. lxx. art. 1. & quæst. lxx. art. 4. cor. & III. dist. xxxviii. quæst. 1. art. 3. & quod. viii. art. 14.

**A**D tertium sic proceditur. Videtur quod non omne mendacium sit peccatum. Manifestum enim est quod Evangelistæ scribendo Evangelium non peccaverunt. Videtur tamen aliquid falsum dixisse: quia verba Christi, & etiam aliorum frequenter alter unus, & alter rectius alius: unde videtur quod alter eorum dixerit falsum. Non ergo omne mendacium est peccatum.

2. Præterea. Nullus remuneratur a Deo pro peccato. Sed oblectrices Aegypti remuneratæ sunt a Deo propter mendacium: dicitur enim Exod. 1. 21. quod edificavit illis Deus domes. Ergo mendacium non est peccatum.

3. Præterea. Gestæ Sanctorum narrantur in sacra Scriptura ad informationem vitæ humanæ. Sed de quibusdams sanctissimis viris legitur, quod sunt mentiti; sicut Gen. xii. & xx. quod Abraham dixit de uxore sua, quod soror sua esset: Jacob etiam mentitus est dicens se esse Esau; & tamen benedictionem adeptus est, ut habetur Genes. xxvii. Iudith etiam commendatur, quæ tamen Holoferni mentita est. Non ergo omne mendacium est peccatum.

4. Præterea. Minus malum est eligendum, ut vitetur maius malum; sicut medicus præcincit membrum, ne corrumpatur totum corpus. Sed minus nocivum est quod aliquis generet falsam opinionem in animo alicuius, quam quod aliquis occidat, vel occidatur. Ergo licite potest homo mentiri, ut unum præservet ab homicidio, & alium præservet a morte.

5. Præterea. Mendacium est, si quis non impleat quod promissit. Sed non omnia promissa sunt implenda: dicit enim Ildorus (Lib. II. Synonym. cap. x. item. & hab. cap. In malis xxii. quæst. iv.) In malis promissis rescinde fidem. Ergo non omne mendacium est peccatum.

6. Præterea. Mendacium ob hoc videtur esse peccatum, quia per ipsum homo decipit proximum: unde Augustinus dicit

dicat in Lib. de mendac. (cap. ult. a med.) *Quisquis esse aliquod genus mendacii quod peccatum non sit, putaverit, decipiet seipsum turpiter, cum bonestum se deceptorum arbitrat aliorum.* Sed non omne mendacium est deceptionis causa: quia per mendacium iocofum nullus decipitur: non enim ad hoc dicuntur huiusmodi mendacia, ut credantur, sed propter delectationem solam: unde & hyperbolica locutiones quandoque etiam in Scriptura sacra inveniuntur. Non ergo omne mendacium est peccatum.

Sed contra est quod dicitur Ecclesi. vii. 14 *Noli velle mentiri omne mendacium.*

Respondeo dicendum, quod illud quod est secundum de malum ex genere, nullo modo potest esse bonum, & licitum: quia ad hoc quod aliquid sit bonum, requiritur quod omnia recte concurrant. Bonum enim est ex integra causa, malum vero est ex singularibus defectibus, ut Dionysius dicit in iv. cap. de div. Nom. (part. iv. lect. 23.) Mendacium autem est malum ex genere: est enim actus cadens super indebitam materiam. Cum enim voces naturaliter sint signa intellectuum, innaturale est, & indebitum quod aliquis voce significet id quod non habet in mente. Unde Philosophus dicit in IV. Ethicor. (cap. vii.) *quod mendacium est per se pravum, & fugiendum: verum autem est bonum, & laudabile.*

Unde omne mendacium est peccatum, sicut etiam Augustinus asserit in Lib. contra mendacium (cap. 1.)

Ad primum ergo dicendum, quod nec in Evangelio, nec in aliqua Scriptura canonica fas est opinari aliquod falsum asseri, nec quod scriptores earum mendacium dixerint: quia periret fidei certitudo, quae auctoritati sacrae Scripturae innititur. In hoc vero quod in Evangelio, & in aliis Scripturis sacris verba aliorum diversimode recitantur, non est mendacium. Unde Augustinus dicit in Lib. II. de consensu Evangelistarum (cap. xii. parum a med.) *Nullo modo hinc laborandum esse iudicis qui prudenter intelligit ipsas sententias esse necessarias cognoscenda veritati, quibuslibet verbis fuerint explicatae.* Et in hoc apparet (ut ibidem subdit) *non debere nos arbitrari mentiri quemquam, si pluribus reminiscens rem quam audierunt vel viderunt, non eodem modo, atque eisdem verbis eadem res fuerit indicata.*

Ad secundum dicendum, quod obstrictes non sunt remuneratae pro mendacio, sed pro timore Dei, & benevolentia, ex qua proceffit mendacium. Unde signanter dicitur Exod. 1. 21. *Et quia timuerunt obstrictes Deum, edificavit illis domos.* Mendacium vero postea sequens non fuit meritorium.

Ad tertium dicendum, quod in sacra Scriptura, ut Augustinus dicit (Lib. de mendacio cap. v. ante med.) inducuntur aliquorum gesta, quali exempla perfectae virtutis; de quibus non est assumendum eos fuisse mentitos. Si qua tamen in eorum dictis appareant quae mendacia videantur, intelligendum est ea figurativer, & prophetice dicta esse. Unde Augustinus dicit in Lib. de mendac. (loc cit.) *Credendum est, illos homines qui prophetis temporibus digni auctoritate fuisse commemorantur, omnia quae scripta sunt de illis, prophetice gessisse, atque dixisse.* Abraham tamen, ut Augustinus dicit in Qq. super Genes. (quæst. xxvi. & Lib. cont. mendac. cap. x. & Lib. XXII. cont. Faust. cap. xxxiii. & xxxiv.) *dicens Saram esse suam sororem, veritatem voluit celari, & non mendacium dici: soror enim dicitur, quia filia patris erat.* Unde & ipse Abraham dicit Genes. xx. 12. *Veror mea est filia patris mei, & non maritris meae filia, quia scilicet ex parte patris ei attingebat.* Iacob vero mystice dicit se esse Esau primogenitum Isaac, quia videlicet primogenita illius de iure ei debebantur. Usus autem est hoc modo loquendi per spiritum prophetiae ad designandum mysterium, quia videlicet minor populus, scilicet gentium, substituendus erat in locum primogeniti, scilicet in locum Iudaeorum. Quidam vero commendantur in Scriptura non propter perfectam virtutem, sed propter quandam virtutis indolem; scilicet quia apparebat in eis aliquis laudabilis affectus, ex quo movebantur ad quadam indebita faciendum: & hoc modo Iudith laudatur, non quia mentita est Holoferni, sed propter affectum quem habuit ad salutem populi, pro qua periculis se exposuit: quamvis etiam dici possit, quod verba eius veritatem habent secundum aliquem mysticum intellectum.

Ad quartum dicendum, quod mendacium non solum habet rationem peccati ex damno quod inferitur proximo, sed ex sua inordinatione, ut dictum est (in corp. art.) Non licet autem aliqua illicita inordinatione uti ad impediendum

no-

documenta, & defectus aliorum; sicut non licet furari ad hoc quod homo elemosynam faciat, nisi forte in casu necessitatis, in quo omnia sunt communia. Et ideo non est licitum mendacium dicere ad hoc quod aliquis alium a quocumque periculo liberet. Licet tamen veritatem occultare prudenter sub aliqua dissimulatione, ut Augustinus dicit in Lib. de mendacio (cap. x. prope fin.)

Ad quintum dicendum, quod ille qui aliquid promittit, si habeat animum, faciendo quod promittit, non mentitur, quia non loquitur contra id quod gerit in mente; si vero non faciat quod promissit, tunc videtur infideliter agere per hoc quod animum murat. Potest tamen excusari ex duobus: uno modo, si promissit id quod manifeste est illicitum; quia promittendo peccavit, mutando autem propositum bene facit: alio modo, si sunt mutatae conditiones personarum, & negotiorum. Ut enim Seneca dicit in Lib. IV. de beneficiis. (cap. xxxiv. & xxxv.) ad hoc quod homo teneatur facere quod promissit, requiritur quod omnia immutata permaneant: alioquin nec fuit mendax in promittendo, quia promissit quod habebat in mente, subintellectis debitis conditionibus; nec etiam est infidelis non implendo quod promissit, quia eadem conditiones non extant. Unde & Apostolus non est mentitus, qui non iuravit Corinthum, quo se iturum esse promiserat, ut dicitur II. ad Corinth. i. & hoc propter impedimenta quae supervenerunt.

Ad sextum dicendum, quod operatio aliqua potest considerari dupliciter: uno modo secundum seipsam; alio modo ex parte operantis. Mendacium ergo locutionem ex ipso genere operis habet rationem fallendi; quamvis ex intentione dicentis non dicatur ad fallendum, nec falsitas ex modo dicendi. Nec est simile de hyperbolicis, aut quibuscunque figuratis locutionibus, quae in sacra Scriptura inveniuntur: quia, sicut Augustinus dicit in Libro de mendac. (cap. v. aliquant. a princ.) *Quicquid figurate fit, vel dicitur, non est mendacium: omnis enim enuntiatio ad id quod enuntiat referenda est; omne autem figurate aut factum, aut dictum hoc enuntiat quod significat eis quibus intelligendum prolatum est.*

## ARTICULUS IV. 375

*Utrum omne mendacium sit peccatum mortale.*

*Sup. quæst. lxx. art. 1. & 2. & quæst. lxx. art. 4. corp. & III. dist. xxxviii. quæst. 1. art. 4. & IV. dist. xvi. quæst. iv. art. 1. quæst. 3. corp. & quol. viii. art. 14. & quol. ix. art. 14.*

**A**D quartum sic proceditur. Videtur quod omne mendacium sit peccatum mortale. Dicitur enim in Psal. v. 7. *Perdes omnes qui loquuntur mendacium:* & Sap. i. 11. *Os quod mentitur, occidit animam.* Sed perditio, & mors animae non est nisi per peccatum mortale. Ergo omne mendacium est peccatum mortale.

2. Præterea. Omne quod est contra præceptum Decalogi, est peccatum mortale. Sed mendacium est contra hoc præceptum Decalogi, *Non falsum testimonium dices.* Ergo omne mendacium est peccatum mortale.

3. Præterea. Augustinus dicit in I. de doct. christ. (cap. xxxv. a med.) *Nemo mentiens in eo quod mentitur servat fidem: nam hoc utique vult, ut qui mentitur, fidem sibi habeat, quam tamen ei mentiendo non servat: omnis autem fidei violator iniquus est.* Nullus autem dicitur fidei violator, vel iniquus propter peccatum veniale. Ergo nullum mendacium est peccatum veniale.

4. Præterea. Merces æterna non perditur nisi pro peccato mortali. Sed pro mendacio perditur merces æterna commutata in temporalem: dicit enim Gregorius (Lib. XVIII. Moral. cap. iv. ante med.) quod in remuneratione obstetricum cognoscitur, quid mendacii culpa mereatur: *nam benignitatis earum merces, quæ eis potuit in æterna vita retribui, pro admissa culpa mendacii in terrenam esse remunerationem declinata.* Ergo etiam mendacium officiosum, quale fuit obstetricum, quod videtur esse levissimum, est peccatum mortale.

5. Præterea. Augustinus dicit in Lib. de mendacio (cap. xvii. cir. med.) quod *perfectorum præceptum est, omnino non solum non mentiri, sed nec velle mentiri.* Sed facere contra præceptum est peccatum mortale. Ergo omne mendacium perfectorum est peccatum mortale. Pari ergo ratione & omnium aliorum: alioquin essent peioris conditionis.

Sed



Sed contra est quod Augustinus dicit in v. Psal. (sup. illud: *Perdes omnes &c.*) *Duo sunt genera mendaciorum, in quibus non est magna culpa, sed tamen non sunt sine culpa, cum aut iocamur aut proximo consulendo mentimur.* Sed omne peccatum mortale habet gravem culpam. Ergo mendacium iocolum, & officiosum non sunt peccata mortalia.

Respondeo dicendum, quod peccatum mortale proprie est quod repugnat caritati, per quam anima vivit Deo coniuncta, ut dictum est (quaest. xxiv. art. 12. & quaest. xxxv. art. 3.) Potest autem mendacium contrariari caritati tripliciter: uno modo secundum se; alio modo secundum finem intentum; tertio modo per accidens. Secundum se quidem caritati contrariatur ex ipsa falsa significatione. Quæ quidem si sit circa res divinas, contrariatur caritati Dei, cuius veritatem aliquis tali mendacio occultat, vel corrumpit: unde huiusmodi mendacium non solum opponitur virtuti (a) caritatis, sed etiam virtuti fidei, & religionis: & ideo hoc mendacium est gravissimum, & mortale. Si vero falsa significatio sit circa aliquid cuius cognitio pertineat ad hominis bonum, puta quæ pertineat ad perfectionem scientiæ, & informationem morum; tale mendacium, inquantum infert damnum falsæ opinionis proximo, contrariatur caritati quantum ad dilectionem proximi: unde est peccatum mortale. Si vero falsa opinio ex mendacio generata sit circa aliquid de quo non referat utrum sic vel aliter cognoscatur, tunc ex tali mendacio non damnificatur proximus; sicut si quis fallatur in aliquibus particularibus contingentibus ad se non pertinentibus. Unde tale mendacium secundum se non est peccatum mortale.

Ratione vero finis intenti aliquod mendacium contrariatur caritati: puta quod dicitur aut in iniuriam Dei; quod semper est peccatum mortale, utpote religioni contrarium: aut in nocumentum proximi, quantum ad personam, divitias, vel famam; & hoc etiam est peccatum mortale, cum nocere proximo sit peccatum mortale. Ex sola autem intentione peccati mortalis aliquis mortaliter peccat. Si vero finis intentus non sit contrarius caritati, nec mendacium secundum hanc rationem erit peccatum mortale; sicut apparet in mendacio iocoso, in quo intenditur aliqua levis de-

lectatio, & in mendacio officioso, in quo intenditur etiam utilitas proximi.

Per accidens autem potest contrariari caritati ratione scandalii, vel cuiuscumque damni consequentis: & sic erit etiam peccatum mortale, dum scilicet aliquis non veretur propter scandalum publice mentiri.

Ad primum ergo dicendum, quod illæ auctoritates intelliguntur de mendacio pernicioso, ut exponit Glossa (interl. & ord. Aug.) super illud Psal. v. *Perdes omnes qui loquuntur mendacium.*

Ad secundum dicendum, quod cum omnia præcepta Decalogi ordinentur ad dilectionem Dei, & proximi, sicut supra dictum est (quaest. xlv. art. 1. ad 3. & t. 2. quaest. c. art. 5. ad 1.) intantum mendacium est contra præceptum Decalogi, inquantum est contra dilectionem Dei, & proximi. Unde signanter prohibetur contra proximum falsum testimonium.

Ad tertium dicendum, quod etiam peccatum veniale largo modo potest dici iniquitas, inquantum est præter equitatem iustitiæ: unde dicitur I. Ioan. 111. 4. (b) *Omne peccatum est iniquitas: & hoc modo loquitur Augustinus.*

Ad quartum dicendum, quod mendacium obstericium potest dupliciter considerari. Uno modo quantum ad affectum benevolentiae in ludacos, & quantum ad reverentiam divini timoris, ex quibus commendatur in eis indoles virtutis; & sic debetur eis remuneratio æterna: unde Hieronymus exponit (super illud Mat. lxxv. *Et edificabitis domos*) quod *Deus edificabit illis domos spirituales.* Alio modo potest considerari quantum ad ipsum exteriorem actum mendacii: quo quidem non potuerunt æternam remunerationem mereri, sed forte aliquam remunerationem temporalem, cuius merito non repugnabat deformitas illius mendacii, sicut repugnabat merito remunerationis æternæ. Et sic intelligenda sunt verba Gregorii, non quod periculum mendacium mererentur amittere remunerationem æternam, quam iam ex præcedenti affectu meruerant, ut ratio procedebat.

Ad quintum dicendum, quod quidam dicunt, quod perfectis viris omne mendacium est peccatum mortale.

Sed hoc irrationabiliter dicitur. Nulla enim circumstantia aggravat in infinitum, nisi quæ transfert in aliam speciem.

(a) Ad veritatem, (b) Falsitas: & peccatum est iniquitas.

ciem. Circumstantia autem personæ non transfert in aliam speciem, nisi forte ratione alicuius annexi; puta si sit contrarium ipsius: quod non potest dici de mendacii officioso, vel iocoso. Et ideo mendacium officiosum, vel iocosum non est peccatum mortale in viris perfectis, nisi forte per accidens ratione scandalii. Et ad hoc potest referri quod Augustinus dicit, *perfectis esse præceptum non solum mentiri, sed nec velle mentiri*: quævis hoc Augustinus non assertive, sed sub dubitatione dicat, præmittit enim, *Nisi forte ita ut perfectorum &c.* Nec obstat quod ipsi ponuntur in statu conservandæ veritatis: quia veritatem tenentur conservare ex suo officio in indicio, vel doctrina, contra quæ si mentiantur, erit mendacium quod est peccatum mortale; in aliis autem non oportet quod mortaliter peccent mentiendo.

### QUAESTIO CXI.

*De simulatione, & hypocrisi,  
in quatuor articulos divisa.*

**P**ostea considerandum est de simulatione, & hypocrisi: & circa hoc quaeruntur quatuor.

Primo, utrum omnis simulatio sit peccatum.

Secundo, utrum hypocrisis sit simulatio.

Tertio, utrum opponatur veritati.

Quarto, utrum sit peccatum mortale.

### ARTICULUS I. 376

*Utrum omnis simulatio sit peccatum.*

**A**d primum sic proceditur. Videtur quod non omnis simulatio sit peccatum. Dicitur enim Luc. ult. 28. quod *Dominus se finxit longius ire*: & Ambrosius dicit de Abraham in Libro de Patriarchis (seu Lib. I. de Abraham cap. viii. in med.) quod *captiose loquebatur cum servulis, cum dixit Gen. xxii. Ego, & puer illius usque properantes, postquam adoraverimus, revertemur ad vos*. Fingere autem, & captiose loqui ad simulationem pertinet. Sed non est dicendum, quod in Christo, & in Abraham fuerit peccatum. Ergo non omnis simulatio est peccatum.

2. Præterea, Nullum peccatum est u-

tile. Sed, sicut Hieronymus dicit (sup. illud ad Galat. ii. *Cum venisset Petrus Antioch.*) *utilem simulationem, & in tempore assumendam, Iahu Regis Israel nos doceat exemplum, qui interfecti sacerdotes Baal, fingens se idola colere velle, ut habetur IV. Reg. x. & David immutavit faciem suam coram Achis Rege Geth, ut habetur I. Regum xxi.* Ergo non omnis simulatio est peccatum.

3. Præterea. Bonum est malo contrarium. Si ergo simulare bonum est malum; ergo simulare malum erit bonum.

4. Præterea. Isa. lxxv. 9. contra quoddam dicitur: *Peccatum suum quasi Sodoma prædicaverunt, nec absconderunt*. Sed abscondere peccatum ad simulationem pertinet. Ergo non uti simulatione interdum est reprehensibile. Vitare autem peccatum nunquam est reprehensibile. Ergo simulatio non semper est peccatum.

Sed contra est quod Isa. xvi. super illud, *In tribus annis &c.* dicit Glossa (ord. Hieron.) „In comparatione duorum malorum levius est aperte peccare, quam sanctitatem simulare.“ Sed aperte peccare semper est peccatum. Ergo simulatio semper est peccatum.

Respondo dicendum, quod, sicut dictum est (quæst. cxv. art. 3. ad 3. & quæst. cx. art. 1.) ad virtutem veritatis pertinet ut quis talem se exhibeat exterius per signa exteriora, qualis est. Signa autem exteriora non solum sunt verba, sed etiam facta. Sicut ergo veritati opponitur quod aliquis per verba exteriora aliud significet quam quod habet apud se, quod ad mendacium pertinet; ita etiam opponitur veritati quod aliquis per aliqua signa factorum, vel rerum aliquid significet contrarium eius quod in eo est, quod proprie simulatio dicitur. Unde simulatio proprie est mendacium quoddam in exteriorum signis factorum consistens. Non refert autem utrum aliquis præntiatur verbo, vel quocumque alio facto, ut supra habitum est (quæst. præc. art. 1. arg. 2.)

Unde cum omne mendacium sit peccatum, ut supra dictum est (quæst. præc. art. 3.) consequens est etiam quod omnis simulatio est peccatum.

Ad primum ergo dicendum, quod, sicut Augustinus dicit in Lib. II. de Qq. Evang. (quæst. li. in princ.) *non omne quod fingimus, mendacium est; sed quando id fingimus quod nihil significat, tunc est mendacium; cum autem fictio nostra*

refertur ad aliquam significationem, non est mendacium, sed aliqua figura veritatis: & subiungit exemplum de figuratis locutionibus, in quibus fingitur quaedam res, non ut asseratur ita esse, sed eam proponimus ut figuram alterius quod asserere volumus. Sic ergo Dominus in Evangelio finxit se longius ire, quia composuit motum suum quasi volentis longius ire ad aliud figurate significandum, scilicet quod ipse ab eorum fide longe erat, ut Gregorius dicit (hom. xxxiii. in Evang.) Vel, ut Augustinus dicit (Lib. II. Qq. Evangel. quest. ult. a med.) quia cum longius recessurus esset ascendendo in celum, per hospitalitatem quodammodo retinebatur in terra. Abraham etiam figurate locutus est. Unde Ambrosius (loc. cit. in arg.) dicit de Abraham, quod prophetavit quod ignorabat. Ipse enim solus disponebas redire immolato filio; sed Dominus per os eius locutus est quod parabat. Unde patet quod neuter simulavit.

Ad secundum dicendum, quod Hieronymus utitur large nomine simulationis pro quacunque hēione. Commutatio autem faciei David fuit fictio figuralis, sicut Glossa (ord. Aug.) exponit in titulo Psal. xxxiii. Benedicam Dominum in omni tempore. Simulationem vero Iesu non est necesse excusari a peccato, vel mendacio: quia malus fuit, utpote ad idololatriam Ieroboam non recedens. Commendatur tamen, & temporaliter remuneratur a Deo, non pro simulatione, sed pro zelo quo destruxit cultum Baal.

Ad tertium dicendum, quod quidam dicunt, quod nullus potest se simulare esse malum: quia per opera bona nullus simulat se malum; si autem opera mala faciat, malus est.

Sed haec ratio non cogit. Potest enim aliquis se simulare malum per opera, quia in se non sunt mala, sed habent in se quandam speciem mali; & tamen ipsa simulatio est mala tum ratione mendacii, tum ratione scandalii: & quamvis per hoc fiat malus, non tamen fit malus illa malitia quam simulat. Et quia ipsa simulatio secundum se mala est, non ratione eius de quo est, sive sit de bono, sive sit de malo, peccatum est.

Ad quartum dicendum, quod sicut aliquis verbo mentitur, quando significat quod non est, non autem quando tacet quod est; quod aliquando licet: ita et-

iam simulatio est, quando aliquis per exteriora signa factorum, vel rerum significat aliquid quod non est, non autem si aliquis praetermittat significare quod est: unde aliquis potest peccatum suum occultare absque simulatione. Et secundum hoc intelligendum est quod Hieronymus dicit ibidem (sup. verb. II. cit. in arg.) quod secundum remedium post naufragium est peccatum abscondere, ne scilicet exinde alius scandalum generetur.

## ARTICULUS II. 577

Utrum hypocrisis sit idem quod simulatio.

IV. dist. xvi. quest. iv. art. 1. quest. 1. & quest. 2. ad 1.

AD secundum sic proceditur. Videtur quod hypocrisis non sit idem quod simulatio. Simulatio enim consistit in quodam factorum mendacio. Sed hypocrisis potest etiam esse, si aliquis ostendat exterius quae interior agat, secundum illud Matth. vi. 2. Cum facis elemosinam, noli tuba canere ante te, sicut hypocritae faciunt. Ergo hypocrisis non est idem simulatio.

2. Praeterea. Gregorius dicit XXXI. Moral. (cap. viii. a med.) Sunt nonnulli qui & sanctitatis habitum tenent, & perfectionis meritum exequi non valent. Hos nequaquam credendum est in hypocritarum numerum currere: quia aliud est infirmitas, aliud malitia peccare. Sed illi qui tenent habitum sanctitatis, & meritum perfectionis non exequuntur, sunt simulatores: quia exterior habitus sanctitatis opera perfectionis significat. Non ergo simulatio est idem quod hypocrisis.

3. Praeterea. Hypocrisis in sola intentione consistit: dicit enim Dominus de hypocritis Matth. xxiii. 5. quod omnia opera sua faciunt, ut ab hominibus videantur: & Gregorius dicit XXXI. Moral. (loc. sup. cit.) quod nunquam quid agant, sed quomodo de actione qualibet hominibus possint placere, considerant. Sed simulatio non consistit in sola intentione, sed in exteriori operatione: unde super illud Iob xxxvi. Simulatores, & calidi provocant iram Dei, dicit Glossa (quid simile hab. Greg. Lib. XXVI. Moral. cap. xxxiii.) quod „simulator aliud simulat, „& aliud agit; castitatem praefert, & lasciviam sequitur; ostendat pauperem, & marisipium replet. „Ergo hypocrisis non est idem quod simulatio.

Sed

Sed contra est quod Iſidorus dicit in Lib. X. *Erymologiarum* ( ad lit. H. ) *Hypocrita Græco sermone in Latino simulator interpretatur ; qui cum intus malus sit , ut bonum se solum ostendit : vni enim falsum , agitur iudicium interpretatur .*

Respondeo dicendum , quod , sicut Iſidorus dicit ibidem , *nomen hypocrite traditum est a specie eorum qui in spectaculis coacta facie incedunt , distinguentes vultum vario colore , ut ad personam quam simulant , colorem perveniant , modo in specie viri , modo in specie femine , ut in ludis populum fallant .* Unde Augustinus dicit in Lib. II. de sermone Domini in monte ( cap. 11. parum a princ. ) quod *sicut hypocrite simulators aliarum personarum agunt partem illius quod non sunt ( non enim qui agit partes Agamemnonis , vere ipse est , sed simulat eum ; ) sic in Ecclesiis , & in omni vita humana , qui se vult videri quod non est , hypocrita est : simulat enim se iustum , non exhibet .*

Sic igitur dicendum est , quod hypocritis simulatio est , non autem omnis simulatio , sed solum illa qua quis simulat personam aliter ; sicut cum peccator simulat personam iusti .

Ad primum ergo dicendum , quod opus exterius naturaliter significat intentionem . Quando ergo aliquis per bona opera quæ facit ex suo genere ad Dei servitium pertinentia , non querit Deo placere , sed hominibus , simulat rectam intentionem quam non habet . Unde Gregorius dicit XXXI. Moral. ( cap. viii. a med ) quod *hypocrite per causas Dei deserviunt intentioni sæculi : quia per ipsa quoque quæ se agere sancti ostendunt , non conversionem querunt hominum , sed auris favorem : & ita simulant mendaciter intentionem rectam , quam non habent ; quamvis non simulant aliquid rectum opus , quod non agunt .*

Ad secundum dicendum , quod habitus sanctitatis , puta religionis , vel clericatus , significat statum quo quis obligatur ad opera perfectionis . Et ideo cum quis habitum sanctitatis assumit , intendens se ad statum perfectionis transferre , si per infirmitatem deficiat , non est simulator , vel hypocrita : quia non tenetur manifestare suum peccatum , sanctitatis habitum deponendo . Si autem ad hoc sanctitatis habitum assumeret , ut se iustum ostentaret , esset hypocrita , & simulator .

Ad tertium dicendum , quod in simu-

latione , sicut in mendacio , duo sunt : unum quidem sicut signum ; & aliud sicut signatum . Mala ergo intentio in hypocritis consideratur sicut signatum , quod non respondet signo ; exteriora autem vel verba , vel opera , vel quæcumque sensibilia considerantur in omni simulatione , & mendacio sicut signa .

## ARTICULUS III. 578

*Utrum hypocritis opponatur virtuti veritatis .*

IV. diff. xvi. quæst. xv. art. 1. quæst. 2.

**A**D tertium sic proceditur . Videtur quod hypocritis non opponatur virtuti veritatis . In simulatione enim , sive hypocritis est signum , & signatum . Sed quantum ad utrumque non videtur opponi alicui speciali virtuti : hypocrita enim simulat quæcumque virtutem , & etiam per quæcumque virtutis opera , puta per ieiunium , orationem , & eleemosynam , ut habetur Matth. vi. Ergo hypocritis non opponitur specialiter virtuti veritatis .

2. Præterea . Omnis simulatio ex aliquo dolo videtur procedere : unde & simplicitati opponitur . Dolus autem opponitur prudentiæ , ut supra habitum est ( quæst. iv. art. 4. ) Ergo hypocritis , quæ est simulatio , non opponitur veritati , sed magis prudentiæ , vel simplicitati .

3. Præterea . Species moralium considerantur ex fine . Sed finis hypocritis est acquisitio lucri , vel inanis gloriæ : unde super illud Job xxxvii. *Quæ est spes hypocrite , si avaræ rapiat &c.* dicit Glossa ( ordin. Gregor. Lib. XVIII. Moral. cap. vii. cir. princ. ) , *Hypocrita , qui latine dicitur simulator , avarus raptor est : qui dum inique agens desiderat de sanctitate venerari , laudem vite rapit alienæ .* Cum ergo avaritia , vel inanis gloria non directe opponatur veritati , videtur quod nec simulatio , sive hypocritis .

Sed contra est quia omnis simulatio est mendacium quoddam , ut dictum est ( art. 1. hu. quæst. ) Mendacium autem directe opponitur veritati . Ergo & simulatio , sive hypocritis .

Respondeo dicendum , quod secundum Philosophum in X. Metaph. ( text. 13. & 24. ) *contrarietas est oppositio secundum formam* , a qua scilicet res speciem habet . Et ideo dicendum est , quod simulatio , sive hypocritis potest opponi alicui

enī virtuti dupliciter, uno modo directe, alio modo indirecte. Directa quidem oppositio eius, sive eius contrarietas est attendenda secundum ipsam speciem actus, quæ accipitur secundum proprium obiectum. Unde cum hypocrisis sit quedam simulatio, qua quis simulat se habere personam quam non habet, ut dictum est (art. præc.) consequens est quod directe opponatur veritati, per quam aliquis exhibet se talem vita, & sermone, qualis est, ut dicitur in IV. Ethicor. (cap. vii.)

Indirecta autem oppositio, sive contrarietas hypocrisis potest attendi secundum quodcumque accidens, puta secundum aliquem finem remotum, vel secundum aliquod instrumentum actus, vel quodcumque aliud huiusmodi.

Ad primum ergo dicendum, quod hypocrita simulans aliquam virtutem assumit eam ut finem, non quidem secundum existentiam, quasi volens eam habere, sed secundum apparentiam, quasi volens videri eam habere: ex quo non habet quod opponatur illi virtuti, sed quod opponatur veritati, in quantum vult decipere homines circa illam virtutem. Opera autem illius virtutis non assumit quasi per se intenta, sed instrumentaliter, quasi signa illius virtutis: unde ex hoc non habet directam oppositionem ad illam virtutem.

Ad secundum dicendum, quod, sicut supra dictum est (quæst. IV. art. 3. 4. & 5.) prudentiæ directe opponitur astutia, ad quam pertinet adinvenire quasdam vias apparentes, & non existentes, ad propositum consequendum: executio autem astutiæ est proprieper dolum in verbis, per fraudem autem in factis; & sicut astutia se habet ad prudentiam, ita dolum, & fraus ad simplicitatem. Dolum autem, vel fraus ordinatur ad decipiendum principaliter, & quandoque secundario ad nocendum. Unde ad simplicitatem pertinet directe se præservare a deceptione: & secundum hoc, ut supra dictum est (quæst. cix. art. 2. ad 4.) virtus simplicitatis est eadem virtuti veritatis; sed differt sola ratione: quia veritas dicitur secundum quod signa concordant signatis; simplicitas autem dicitur secundum quod non tendit in diversa, ut scilicet aliud intendat interius, & aliud prætendat exterius.

Ad tertium dicendum, quod lucrum, vel gloria est finis remotus simulatoris, sicut & mendacis. Unde ex hoc fine

speciem non sortitur, sed ex fine proximo, qui est ostendere se alium quam sit. Unde quandoque contingit quod aliquis fingit de se magnā, nullius alterius gratia, sed sola libidine simulandi, sicut Philosophus dicit in IV. Ethic. (cap. vii.) & sicut etiam supra de mendacio dictum est (quæst. cx. art. 2.)

## ARTICULUS IV. 579

*Utrum hypocrisis semper sit peccatum mortale.*

IV. dist. xvi. quæst. IV. art. 1. quæst. 3.

**A**D quartum sic proceditur. Videtur quod hypocrisis semper sit peccatum mortale. Dicit enim Hieronymus IIa. xvi. in Glossa (ord. in si. cap.) quod in comparatione duorum malorum levius est aperte peccare quam sanctitatem simulare: & super illud Iob i. Sicut autem Domino placuit &c. Glossa (Aug. sup. illud Psal. lxxii. Scrutati sunt iniqui.) dicit, quod „simulata æquitas non est æquitas, sed duplex peccatum: “ & super illud Thren. iv. Maior essetia est iniquitas populi mei peccato Sodomorum, dicit Glossa (ordin.) „Scelerata animæ planantur, quæ in hypocrisim labitur, cuius maior est iniquitas peccato Sodomorum. “ Peccata autem Sodomorum sunt peccata mortalia. Ergo hypocrisis semper est peccatum mortale.

2. Præterea. Gregorius dicit XXXI. Moralium (cap. viii. a med.) quod hypocritæ ex malitia peccant. Sed hoc est gravissimum, quia pertinet ad peccatum in Spiritum sanctum. Ergo hypocrisis semper mortaliter peccat.

3. Præterea. Nullus meretur iram Dei, & exclusionem a Dei visione, nisi propter peccatum mortale. Sed per hypocrisim aliquis meretur iram Dei, secundum illud Iob xxxvi. 13. *Simulatores, & callidi provocant iram Dei*: excluditur etiam hypocrita a visione Dei, secundum illud Iob xlii. 16. *Non venit in conspectu eius omnis hypocrita*. Ergo hypocrisis semper est peccatum mortale.

Sed contra est quod hypocrisis est mendacium operis, cum sit simulatio quedam. Non autem omne mendacium operis est peccatum mortale. Ergo nec omnis hypocrisis.

Præterea. Intentio hypocritæ est ad hoc quod videatur bonus. Sed hoc non opponitur caritati. Ergo hypocrisis non est secundum se peccatum mortale.

Præ-

Præterea. Hypocritis nascitur ex inani gloria, ut Gregorius dicit XXXI. Moral. ( cap. xvii. a med. ) Sed inanis gloria non semper est peccatum mortale. Ergo nec hypocritis.

Respondeo dicendum, quod in hypocritis duo sunt, scilicet defectus sanctitatis, & simulatio ipsius. Si ergo hypocrita dicatur ille cuius intentio fertur ad utrumque, ut scilicet aliquis non curet sanctitatem habere, sed solum sanctus apparere, sicut consuevit accipi in sacra Scriptura; sic manifestum est quod est peccatum mortale: nullus enim totaliter privatur sanctitate nisi per peccatum mortale.

Si autem dicatur hypocrita ille qui intendit simulare sanctitatem, a qua deficit per peccatum mortale; tunc quamvis sit in peccato mortali, ex quo privatur sanctitate, non tamen semper ipsa simulatio est ei peccatum mortale, sed quandoque veniale. Quod discernendum est ex fine: qui si repugnat caritati Dei, vel proximi, erit peccatum mortale; puta cum simulat sanctitatem, ut falsam doctrinam disseminet, vel ut adificetur ecclesiasticam dignitatem indignus, vel quæcumque alia temporalia bona, in quibus finem constituit: si vero finis intentus non repugnet caritati, erit peccatum veniale; puta cum aliquis in ipsa fitione delectatur: de quo dicitur IV. Ethic. ( cap. vii. a med. ) quod *magis videtur vanus quam malus*: eadem enim ratio est de mendacio, & simulatione.

Contingit tamen quandoque quod aliquis simulat perfectionem sanctitatis, quæ non est de salutis necessitate: & talis simulatio nec semper est peccatum mortale, nec semper est cum peccato mortali.

Et per hoc patet responsio ad obiecta.

## QUAESTIO CXII.

### De iactantia,

#### in duos articulos divisa.

Postea considerandum est de iactantia, & in qua, quæ sunt partes mendacii, secundum Philosophum in IV. Ethicor. ( cap. vii. )

Primo autem circa iactantiam quaeruntur duo.

Primo, cui virtuti opponatur.

Secundo, utrum sit peccatum mortale.

## ARTICULUS I. 380

### Utrum iactantia opponatur virtuti veritatis.

Ad primum sic proceditur. Videtur quod iactantia non opponatur virtuti veritatis. Veritati enim opponitur mendacium. Sed quandoque potest esse iactantia etiam sine mendacio; sicut cum aliquis suam excellentiam ostendat: dicitur enim Hester 1.3. *Assuerus fecit grande convivium, ut ostenderet divitias gloriæ suæ, ac regni sui, ac magnitudinem, atque iactantiam potentie suæ*. Ergo iactantia non opponitur virtuti veritatis.

2. Præterea. Iactantia ponitur a Gregorio XXIII. Moral. ( cap. iv. a princ. ) una de quatuor speciebus superbiæ, cum scilicet quis iactat se habere quod non habet: unde dicitur Hierem. xlviii. 29. *Audivimus superbiam Moab (superbus est valde) sublimitatem eius, & arrogantiam, & superbiam, & altitudinem cordis eius*. Ego scio, ait Dominus, iactantiam eius, & quod non sit iuxta eam virtus eius. Et XXXI. Moral. ( cap. vii. a med. ) Gregorius dicit, quod iactantia oritur ex inani gloria. Superbia autem, & inanis gloria opponuntur virtuti humilitatis. Ergo iactantia non opponitur veritati, sed humilitati.

3. Præterea. Iactantia ex divitiis causari videtur: unde dicitur Sap. v. 8. *Quid nobis profuit superbia, aut divitiarum iactantia quid contulit nobis?* Sed superfluitas divitiarum videtur pertinere ad peccatum avaritiæ, quod opponitur iustitiæ, vel liberalitati. Non ergo iactantia opponitur veritati.

Sed contra est quod Philoſophus dicit in II. & in IV. Ethicor. ( cap. vii. utrobique ) iactantiam opponi veritati.

Respondeo dicendum, quod iactantia proprie importare videtur quod homo verbis se extollat. Illa enim quæ vult homo longe iactare, in altum elevat. Tunc autem proprie aliquis se extollit, quando de se supra se aliquid dicit. Quod quidem contingit dupliciter. Quandoque enim aliquis loquitur de se, non quidem supra id quod in se est, sed supra id quod de eo homines opinantur: quod Apostolus fugiens dicit II. ad Cor. xii. 6. *Parco, ne quis existimet me supra id quod videt in me, aut audit aliquid ex me*. Alio modo aliquis per verba se extollit, loquens de se supra id quod in se est secundum

cundum rei veritatem . Et quia magis est aliquid iudicandum , secundum quod in se est , quam secundum quod est in opinione aliorum ; inde est quod magis proprie dicitur iactantia , quando aliquis effert se supra id quod in ipso est , quam quando effert se supra id quod est in opinione aliorum ; quamvis utroque modo iactantia dici possit .

Et ideo iactantia proprie dicta opponitur veritati per modum excessus .

Ad primum ergo dicendum , quod ratio illa procedit de iactantia , secundum quod excedit opinionem .

Ad secundum dicendum , quod iactantiae peccatum considerari potest dupliciter . Uno modo secundum speciem actus : & sic opponitur veritati , ut dictum est ( in corp. & quest. cx. art. 2. ) Alio modo secundum causam suam , ex qua etsi non semper , tamen frequentius accedit : & sic procedit quidem ex superbia sicut ex causa interiori motiva , & impellente : ex hoc enim quod aliquis interior per arrogantiam supra seipsum elevatur , sequitur plerumque quod exterius maiora quam de se iacet ; licet quandoque non ex arrogantia , sed ex quadam vanitate aliquis ad iactantiam procedat , & in hoc delectetur , quia talis est secundum habitum . Et ideo arrogantia , per quam aliquis supra seipsum extollitur , est species superbiae ; non tamen est idem iactantiae , sed ut frequentius eius causa . Et propter hoc Gregorius iactantiam ponit inter superbiae species . Tendit autem iactator plerumque ad hoc quod gloriam consequatur per suam iactantiam : & ideo secundum Gregorium ex inani gloria oritur secundum rationem finis .

Ad tertium dicendum , quod opulentia etiam iactantiam causat dupliciter . Uno modo occasionaliter , inquantum de divitiis aliquis superbit : unde & signanter Proverb. viii. opes dicuntur superbiae . Alio modo per modum finis : quia , ut dicitur in IV. Ethic. ( cap. vii. a med. ) aliqui seipsum iactant non solum propter gloriam , sed etiam propter lucrum , qui de seipsis fingunt ea ex quibus lucrari possunt ; puta quod sint medici , vel sapientes , vel divini .

## ARTICULUS II. 581

*Utrum iactantia sit peccatum mortale .*

**A**D secundum sic proceditur . Videtur quod iactantia sit peccatum mortale . Dicitur enim Proverb. xxviii. 25. *Qui se iactat , & dilatat , iurgia concitat .* Sed concitare iurgia est peccatum mortale : detestatur enim Deus eos qui seminant discordias , ut habetur Proverb. vi. Ergo iactantia est peccatum mortale .

2. Præterea . Omne quod prohibetur in lege Dei , est peccatum mortale . Sed super illud Eccli. vi. *Non se extollas in cogitatione anime tue ,* dicit Glossa ( interl. ) „ iactantiam , & superbiam prohibet . “ Ergo iactantia est peccatum mortale .

3. Præterea . Iactantia est mendacium quoddam . Non est autem mendacium officiosum , vel iocosum ; quod patet ex fine mendacii : quia , ut Philosophus dicit in IV. Ethic. ( cap. vii. cir. med. ) *iactator fingit de se maiora existentibus , quandoque nullius gratia , quandoque gratia gloriae , vel honoris , quandoque autem gratia argenti :* & sic patet quod neque est mendacium iocosum , neque officiosum . Unde relinquitur quod semper sit perniciosum . Videtur ergo quod semper sit peccatum mortale .

Sed contra est quod iactantia oritur ex inani gloria secundum Gregorium XXXI. Moral. ( cap. xvii. a med. ) Sed inanis gloria non semper est peccatum mortale , sed quandoque veniale , quod vitare est valde perfectorum : dicit enim Gregorius ( Lib. VIII. Moral. cap. xxx. a med. ) quod *valde est perfectorum , sit ex offenso opere auctoris gloriam querere , ut de illata laude privata nesciant exultatione gaudere .* Ergo iactantia non semper est peccatum mortale .

Respondendo dicendum , quod , sicut supra dictum est ( quest. cx. art. 4. ) peccatum mortale est quod caritati contrariatur . Dupliciter ergo iactantia considerari potest . Uno modo secundum se , prout est mendacium quoddam : & sic quandoque est peccatum mortale , quandoque veniale . Mortale quidem , quando aliquis iactanter de se profert quod est contra gloriam Dei ; sicut ex persona Regis Tyri dicitur Ezech. xxviii. 2. *Elevarum est cor tuum , & dixisti , Deus ego sum :* vel etiam contra caritatem proximi ,

D

mi; sicut cum aliquis iactando seipsum, prorumpit in contumelias aliorum, sicut habetur Luc. xviii. de Pharisæo, qui dicebat: *Non sum sicut ceteri hominum, raptores, iniusti, adulteri, velut etiam hic Publicanus*. Quandoque vero est peccatum veniale, quando scilicet aliquis de se talia iactat quæ neque sunt contra Deum, neque contra proximum.

Alio modo potest considerari secundum suam causam, scilicet superbiam, vel appetitum lucri, aut inanis gloriæ: & sic si procedat ex superbia, vel inani gloria, quæ sit peccatum mortale, etiam ipsa iactantia erit peccatum mortale: alioquin erit peccatum veniale. Sed quandoque aliquis prorumpit in iactantiam propter appetitum lucri; & hoc videtur iam pertinere ad proximi deceptionem, & damnum: & ideo talis iactantia magis est peccatum mortale. Unde & Philosophus dicit in IV. Ethicor. (cap. vii. a med.) quod turpius est qui se iactat causa lucri, quam qui se iactat causa gloriæ, vel bonoris. Non tamen semper est peccatum mortale: quia potest esse tale lucrum ex quo alius non damniatur.

Ad primum ergo dicendum, quod ille qui iactat se ad hoc quod iurgia concitet, peccat mortaliter. Sed quandoque contingit quod iactantia est causa iurgiorum non per se, sed per acciden. Unde ex hoc iactantia non est peccatum mortale.

Ad secundum dicendum, quod Glossa illa loquitur de iactantia, secundum quod procedit ex superbia prohibita, quæ est peccatum mortale.

Ad tertium dicendum, quod non semper iactantia importat mendacium perniciosum, sed solum quando est contra caritatem Dei, aut proximi, aut secundum se, aut secundum suam causam. Quod autem aliquis se iactet, quasi ex hoc ipso delectatus, est quoddam vanum, ut Philosophus dicit (Lib. IV. Eth. cap. vii. a med.) Unde reducitur ad mendacium iocosum. Nisi forte hoc divina dilectioni præferret, ut propter hoc Dei præcepta contemneret: sic enim esset contra caritatem Dei, in quo solo mens nostra debet quiescere sicut in ultimo fine. Videtur autem ad mendacium officiosum pertinere, cum aliquis ad hoc se iactat, ut gloriam, vel lucrum acquirat; dummodo hoc sit sine damno aliorum, quia hoc iam pertineret ad mendacium perniciosum.

## QUAESTIO CXIII.

De ironia,  
in duos articulos divisa.

**D**Einde considerandum est de ironia: circa quam quaeruntur duo.

Primo, utrum ironia sit peccatum. Secundo, de comparatione eius ad iactantiam.

## ARTICULUS I. 38a

*Utrum ironia, per quam aliquis de se fingit minora, sit peccatum.*

Sup. quæst. cx. art. 2. corp. & III. dist. xxxix. quæst. i. art. 2. ad 6.

**A**D primum sic proceditur. Videtur quod ironia, per quam aliquis de se fingit minora, non sit peccatum. Nullum enim peccatum procedit ex divina confortatione, ex qua procedit quod aliquis de se minora dicat, secundum illud Proverb. xxx. 1. *Viso quam locutus est vir cum quo est Deus, & qui Deo secum morante confortatus ait: Stultissimus sum virorum*: & Amos vii. 14. dicitur: *Respondit Amos, Non sum Propheta*. Ergo ironia, per quam aliquis minora de se dicit, non est peccatum.

2. Præterea. Gregorius dicit in epistola ad Augustinum Anglorum Episcopum (Lib. XII. Regist. epist. xxxi. interrog. x. cir. med.) *Bonarum mentium est suas ibi culpas agnoscere, ubi culpa non est*. Sed omne peccatum repugnat bonitati mentis. Ergo ironia non est peccatum.

3. Præterea. Fugere superbiam non est peccatum. Sed aliqui minora de seipso dicunt fugientes tumidum, ut Philo- phus dicit in IV. Ethic. (cap. vii.) Ergo ironia non est peccatum.

Sed contra est quod Augustinus dicit in Libro de verbis Apostoli (serm. xxxix. parum ante med.) *Cum humilitatis causa mentiris, si non eras peccator, antequam mentireris, mentiendo efficeris*.

Respondeo dicendum, quod hoc quod aliqui minora de se dicant, potest contingere dupliciter. Uno modo salva veritate, dum scilicet maiora quæ sunt in seipsis recitent, quædam vero minora de- tegunt, & de se proferunt, quæ tamen in se esse recognoscunt: & sic minora de se dicere non pertinet ad ironiam, nec est peccatum secundum genus suum, nisi



nisi per alicuius circumstantiæ corruptionem.

Alio modo aliquis dicit minora a veritate declinans, puta cum asserit de se aliquid vile, quod in se non recognoscit, aut cum negat de se aliquid magnum, quod tamen percipit in seipso esse: & sic pertinet ad ironiam, & est semper peccatum.

Ad primum ergo dicendum, quod duplex est sapientia, & duplex stultitia. Est enim quædam sapientia secundum Deum, quæ humanam, vel mundanam stultitiam habet adiunctam, secundum illud I. ad Cor. xii. 18. *Si quis inter vos sapiens videtur esse in hoc sæculo, stultus fiat, ut sit sapiens*. Alia vero est sapientia mundana, quæ, ut ibidem subditur, *stultitia est apud Deum*. Ille ergo qui a Deo confortatur, confitetur se esse stultissimum secundum reputationem humanam, quia scilicet humana contemnit, quæ hominum sapientia quærit: unde & ibidem subditur: *Et sapientia hominum non est mecum*: & postea subdit: *Et novi Sanctorum scientiam*. Vel potest dici sapientia hominum quæ humana ratione acquiritur, sapientia vero Sanctorum quæ ex divina inspiratione habetur. Amos autem negavit se esse Prophetam origine, quia scilicet non erat de genere Prophetarum: unde & ibidem subdit: *Nec filius Prophete*.

Ad secundum dicendum, quod ad bonitatem mentis pertinet ut homo ad iustitiæ perfectionem tendat: & ideo in culpam reputat, non solum si deficiat a communi iustitia, quod vere culpa est; sed etiam si deficiat a iustitiæ perfectione, quod quandoque culpa non est. Non autem culpam dicit quod pro culpa non recognoscit; quod ad ironiæ mendacium pertineret.

Ad tertium dicendum, quod homo non debet unum peccatum facere, ut aliud vitet: & ideo non debet mentiri qualitercumque, ut vitet superbiam. Unde Augustinus dicit super Ioan. (tract. xlii. inter med. & fin.) & habetur cap. Non ita xxi. quæst. xi. *Non ita caveatur arrogantia, ut veritas relinquatur*: & Gregorius dicit (Lib. XXVI. Moral. cap. xxi.) quod *incute sunt humiles qui se mentiendo illaqueant*.

## ARTICULUS II. 583

*Utrum ironia sit minus peccatum quam iactantia.*

*Locis sup. art. 1. indultis.*

**A**D secundum sic proceditur. Videtur quod ironia non sit minus peccatum quam iactantia. Utrumque enim est peccatum, inquantum declinat a veritate, quæ æqualitas est quædam. Sed ab æqualitate non magis declinat qui excedit, quam qui diminuit. Ergo ironia non est minus peccatum quam iactantia.

2. Præterea. Secundum Philosophum (Lib. IV. Ethic. cap. vii.) ironia quoque est iactantia. Iactantia autem non est ironia. Ergo ironia non est minus peccatum quam iactantia.

3. Præterea. Proverb. xxvi. 25. dicitur: *Quando submiserit vocem suam, non credideris ei, quoniam septem nequitias sunt in corde illius*. Sed submittere vocem pertinet ad ironiam. Ergo in ea est multiplex nequitia.

Sed contra est quod Philosophus dicit in IV. Ethicor. (cap. vii.) quod *irones, & minus dicentes gratiores secundum mores videntur*.

Respondeo dicendum, quod, sicut dictum est (quæst. cx. art. 2. & 4.) unum mendacium est gravius altero, quandoque quidem ex materia de qua est; sicut mendacium quod sit in doctrina religionis, est gravissimum: quandoque autem ex motivo ad peccandum; sicut mendacium perniciosum est gravius quam officiosum, vel iocosum. Ironia autem, & iactantia circa idem mentiuntur vel verbis, vel quibuscumque exterioribus signis, scilicet circa conditionem personæ: unde quantum ad hoc æqualia sunt.

Sed ut plurimum iactantia ex turpiori motivo procedit, scilicet ex appetitu lucri, vel honoris; ironia vero ex hoc quod fugit, licet inordinate, per elationem aliis gravis esse: & secundum hoc Philosophus dicit (loc. cit.) quod *iactantia est gravius peccatum quam ironia*.

Contingit tamen quandoque quod aliquis minora de se fingit ex aliquo alio motivo, puta ad dolose decipiendum: & tunc ironia est gravior.

Ad primum ergo dicendum, quod ratio illa procedit de ironia, & iactantia, secundum quod mendacii gravitas consideratur ex seipso, vel ex materia eius:

D 2 sic

sic enim dictum est, quod aequalitatem habent.

Ad secundum dicendum, quod, duplex est excellentia, una quidem in temporalibus rebus, alia vero in spiritualibus. Contingit autem quandoque quod aliquis per verba exteriora, vel signa praetendit quidem defectum in exterioribus rebus, puta per aliquam vestem abiectam, aut per aliquid huiusmodi, & per hoc ipsum intendit ostendere aliquam excellentiam spiritualem; sicut Dominus de quibusdam dicit Matth. vi. 16. quod *exterminant facies suas, ut appareant hominibus ieiunantes*: unde isti simul incurrunt virium ironiae, & iactantiae, tamen secundum diversia, & propter hoc gravius peccant. Unde & Philosophus dicit in IV. Ethicor. (cap. vii.) quod *& superabundantia, & valde defectus iactantium est*. Propter quod & de Augustino legitur, (Possid. in eius vita cap. xxxi.) quod neque vestes nimis pretiosas, neque nimis abiectas habere volebat, quia in utroque homines suam gloriam quaerunt.

Ad tertium dicendum, quod, sicut dicitur Eccli. xix. 23. *est qui nequit se humiliter, & interiora eius plena sunt dolis*; & secundum hoc Salomon loquitur de eo qui ex dolosa humilitate nequit vocem suam submittere.

#### QUAESTIO CXIV.

*De amicitia, quae affabilitas dicitur, in duos articulos divisa.*

**D**Einde considerandum est de amicitia, quae affabilitas dicitur, & de vitiiis oppositis, quae sunt adulario, & litigium.

Circa amicitiam autem, seu affabilitatem quaeruntur duo.

Primo, utrum sit specialis virtus.

Secundo, utrum sit pars iustitiae.

#### ARTICULUS I. 184

*Utrum amicitia sit specialis virtus.*

*Sup. quæst. xxxii. art. 3. ad 7. & III. dist. xxvii. quæst. 11. art. 2. ad 1. & dist. xxxiv. quæst. 1. art. 2. corp. & vult. quæst. 111. art. 3. ad 5. & quæst. 11. art. 2. ad 8.*

**A**D primum sic proceditur. Videtur quod amicitia non sit specialis virtus. Dicit enim Philosophus in VIII. Ethic. (cap. 121.) quod *amicitia perfecta*

*est quæ est propter virtutem. Quælibet autem virtus est amicitiae causa: quia bonum omnium est amabile, ut Dionysius dicit in iv. cap. de div. Nom. (par. 1. le 8.9.) Ergo amicitia non est specialis virtus, sed consequens omnem virtutem.*

2. Præterea. Philosophus dicit in IV. Ethic. (cap. vi. ante med.) de tali amico, quod *non in amando, vel inimicando recipit singula ut oportet*. Sed quod aliquis signa amicitiae ostendat ad eos quos non amat, videtur pertinere ad simulationem, quæ repugnat virtuti. Ergo huiusmodi amicitia non est virtus.

3. Præterea. Virtus in mediocritate constituitur, prout sapiens determinabit, sicut dicitur II. Ethic. (cap. vi. a med.) Sed Eccli. vii. 5. dicitur: *Cor sapientum ubi tristitia, & cor stultorum ubi lætitia*: unde ad virtutem pertinet maxime a delectatione sibi cavere, ut dicitur in II. Ethic. (cap. ult. a med.) Hæc autem amicitia per se quidem desiderat condeslere, contristare autem reveretur, ut Philosophus dicit in IV. Ethic. (cap. vi. a med.) Ergo huiusmodi amicitia non est virtus.

Sed contra. Præcepta legis dantur de actibus virtutum. Sed Eccli. xv. 7. dicitur: *Congregationi pauperum affabilem te facito*. Ergo affabilitas, quæ hic amicitia dicitur, est quædam specialis virtus.

Respondendo dicendum, quod, sicut dictum est (quæst. cix. art. 2. & 1. 2. quæst. lv. art. 3.) cum virtus ordinetur ad bonum, ubi occurrat specialis ratio boni, ibi oportet esse specialem rationem virtutis. Bonum autem in ordine consistit, sicut supra dictum est (quæst. cix. art. 2.) Oportet autem hominem convenire ad alios homines ordinari in communis conversatione tam in factis, quam in dictis, ut scilicet ad unumquemque se habeat secundum quod decet. Et ideo oportet esse quædam specialem virtutem quæ hanc convenientiam ordinis observet; & hæc vocatur amicitia, sive affabilitas.

Ad primum ergo dicendum, quod Philosophus in Lib. Ethic. de duplici amicitia loquitur. Quarum una consistit principaliter in affectu, quo unus alium diligit: & hæc potest consequi quamcumque virtutem. Quæ autem ad hanc amicitiam pertinent, supra de caritate dicta sunt (quæst. xxxii. art. 1. & art. 3. ad 1. & quæst. xxv. & xxvi.) Aliam vero amicitiam ponit quæ consistit in factis exterioribus verbis, vel factis: quæ

ARTICULUS II. 587

*Utrum huiusmodi amicitia sit pars iustitiae.*

quidem non habet perfectam rationem amicitiae, sed quamdam eius similitudinem, inquantum aliquis decenter habet se ad illos cum quibus conversatur.

Ad secundum dicendum, quod omnis homo naturaliter omni homini est amicus quodam generali amore, sicut etiam dicitur Eccli. xiii. 19. *quod omne animal diligit simile sibi*: & hunc amorem repræsentant signa amicitiae, quæ quis exterius ostendit in verbis, vel factis, etiam extraneis, vel ignotis. Unde non est ibi simulatio: non enim ostendit eis signa perfectæ amicitiae: quia non eodem modo se habet familiariter ad extraneos, sicut ad eos qui sunt sibi speciali amicitia iuncti.

Ad tertium dicendum, quod cor sapientum dicitur esse ubi tristitia, non quidem ut ipsi proximo tristitiam inferant: dicit enim Apostolus ad Rom. xiv. 15. *Si propter cibum frater tuus contristatur, non secundum caritatem ambulas*: sed ut contristatis consolationem conferant, secundum illud Eccli. vii. 38. *Non desuperantibus in consolatione, & cum lugentibus ambula*. Cor autem stultorum est ubi lætitia, non quidem ut ipsi alios lætificent, sed ut ipsi aliorum lætitia perfruantur. Pertinet ergo ad sapientem ut condelectationem afferat his cum quibus conversatur, non quidem lasciviam, quam virtus cavet, sed honestam, secundum illud Psal. cxxxiii. 1. *Ecce quam bonum, & quam iucundum habitare fratres in unum*! Quandoque tamen propter aliquod bonum consequens, vel propter aliquod malum excludendum, non refugiet virtuosus eos quibus convivit, contristare, ut Philosophus dicit in IV. Ethic. (cap. vi.) Unde & Apostolus dicit II. ad Cor. vii. 8. *Si contristati vos in epistola, non me pariter*: & postea: *Gaudeo, non quia contristati estis, sed quia contristati estis ad penitentiam*. Et ideo his qui sunt pñi ad peccandum, non debemus hilarem vultum ostendere ad eos delectandum, ne videamur eorum peccato consentire, & quodammodo peccandi audaciam ministrare. Unde dicitur Eccli. vii. 26. *Filii tibi sunt? Serua corpus earum, & non ostendas hilarem faciem tuam ad illas*.

**A**D secundum sic proceditur. Videtur quod huiusmodi amicitia non sit pars iustitiae. Ad iustitiam enim pertinet reddere debitum alteri. Sed hoc non pertinet ad hanc virtutem, sed solum deestabiliter aliis convivere. Ergo huiusmodi virtus non est pars iustitiae.

2. Præterea. Secundum Philosophum in IV. Ethicor. (cap. vi.) huiusmodi virtus consistit circa delectationem, vel tristitiam, quæ est in convitio. Sed moderari maximas delectationes pertinet ad temperantiam, ut supra habitum est (1. 2. quæst. lx. art. 5. & quæst. lxi. art. 3.) Ergo hæc virtus est magis pars temperantiae quam iustitiae.

3. Præterea. Aequalia inæqualibus exhibere contra iustitiam est, ut supra habitum est (quæst. lxx. art. 1. & 2.) Sed, sicut Philosophus dicit in IV. Ethic. (cap. vi. ante med.) hæc virtus *similiter ad novos, & ignotos, & consuetos, & incon-  
suetos operatur*. Ergo hæc virtus non est pars iustitiae, sed magis ei contrariatur.

Sed contra est quod Macrobius (Lib. I. in somn. Scip. cap. viii. ante med.) ponit amicitiam partem iustitiae.

Respondendo dicendum, quod hæc virtus est pars iustitiae, inquantum adiungitur ei sicut principali virtuti. Convenit enim cum iustitia in hoc quod ad alterum est, sicut & iustitia: deficit autem a ratione iustitiae, quia non habet plenam debiti rationem; prout aliquis alteri obligatur vel debito legali, ad cuius solutionem lex cogit, vel etiam aliquo debito proveniente ex aliquo beneficio suscepto; sed solum attendit quoddam debitum honestatis, quod magis est ex parte ipsius virtuosius quam ex parte alterius, ut scilicet faciat alteri quod debet eum facere.

Ad primum ergo dicendum, quod, sicut supra dictum est (quæst. cix. art. 3. ad 1.) quia homo naturaliter est animal sociale, debet ex quadam honestate veritatis manifestationem aliis hominibus, sine qua societas hominum durare non posset. Sicut autem non posset homo vivere in societate sine veritate, ita nec sine delectatione: quia, sicut Philosophus dicit in VIII. Ethic. (cap. v.) *nullus potest*

*est per diem morari cum tristi, nec cum non delectabili.* Et ideo homo tenetur ex quodam naturali debito honestatis, ut aliis delectabiliter convivatur; nisi propter aliquam causam necesse sit aliquando alios utiliter contristare.

Ad secundum dicendum, quod ad temperantiam pertinet refrenare delectationes sensibiles. Sed hæc virtus consistit circa delectationes in convictu, quæ ex ratione proveniunt, in quantum unus ad alterum decenter se habet. & has delectationes non oportet refrenare tanquam noxias.

Ad tertium dicendum, quod verbum illud Philosophi non est intelligendum, quod aliquis eodem modo debeat colloqui, & convivere notis, & ignotis: quia, ut ipse ibidem subdit, *non similiter convenit consuetos, & extraneos curare, aut contristare*: sed in hoc attenditur similitudo, quod ad omnes oportet facere quod decet.

## QUAESTIO CXV.

*De adulatione,*

*in duos articulos divisa.*

**D**Einde considerandum est de vitiis oppositis prædictæ virtuti: & primo de adulatione; secundo de litigio.

Circa adulationem queruntur duo.

Primo, utrum adulatio sit peccatum. Secundo, utrum sit peccatum mortale.

### ARTICULUS I. 586

*Utrum adulatio sit peccatum.*

**A**D primum sic proceditur. Videtur quod adulatio non sit peccatum. Adulatio enim consistit in quodam sermone laudis alteri exhibitio intentione placendi. Sed laudare aliquem non est malum, secundum illud Proverb. ult. 28. *Surrexerunt filii eius, & beatissimam prædicaverunt, vir eius & laudavit eam.* Similiter etiam velle placere aliis non est malum, secundum illud I. Cor. x. 33. *Per omnia omnismodo placeo.* Ergo adulatio non est peccatum.

2. Præterea. Bono malum est contrarium, & similiter vituperium laudi. Sed vituperare malum non est peccatum. Ergo neque laudare bonum; quod videtur ad adulationem pertinere. Ergo adulatio non est peccatum.

3. Præterea. Adulationi detractio con-

trariatur: unde Gregorius dicit (Lib. XXII. Moral. cap. v. a. nœd.) quod remedium contra adulationem est detractio. *Sciendum est, inquit, quod ne immoderatis laudibus elevemur, plerumque viro nostri rectoris moderamine detractio- nibus lacerari permittitur, ut quos vox laudantis elevat, lingua detrabentis humiliet.* Sed detractio est malum, ut supra habitum est (quæst. lxxxi. art. 2. & 3.) Ergo adulatio est bonum.

Sed contra est quod super illud Ezech. xlii. *Per qui consuevit pavillos sub omni cubito manus*, dicit Glossa (interl. Greg. Lib. XVIII. Moral. cap. iv. ad fin.) „id-“, est suavem adulationem. „Ergo adulatio est peccatum.“

Respondeo dicendum, quod, sicut supra dictum est (quæst. præc. art. 1. ad 3.) amicitia prædicta, vel affabilitas, est principaliter delectare intendat eos quibus convivitur; tamen ubi necesse est propter aliquod bonum exequendum, vel malum vitandum, non veretur contristare. Si ergo aliquis in omnibus velit ad delectationem alteri loqui, excedit modum in delectando, & ideo peccat per excessum.

Et si quidem hoc faciat sola intentione delectandi, vocatur *placidus*, secundum Philosophum (Lib. IV. Ethic. cap. vi. in fi.) Si autem faciat hoc intentione alicuius lucri consequendi, vocatur *blanditor*, sive *adulator*. Communiter tamen nomen adulationis attribui solet omnibus qui supra debitum modum virtutis volunt alios verbis, vel factis delectare in communi conversatione.

Ad primum ergo dicendum, quod laudare aliquem contingit & bene, & male, prout scilicet debitas circumstantiæ vel servantur, vel prætermittuntur. Si enim aliquis aliquem velit delectare laudando, ut ex hoc eum consoletur, ne in tribulationibus deficiat, vel etiam ut in bono proficere studeat, aliis debitis circumstantiis observatis, pertinebit hoc ad prædictam virtutem amicitie. Pertinet autem ad adulationem, si quis velit aliquem laudare in quibus non est laudandus: quia forte mala sunt, secundum illud Psal. ix. 3. *Laudatur peccator in desideriiis animæ suæ*: vel quia non sunt certa, secundum illud Eccli. xxvii. 8. *Ante sermonem non laudes virum*; & iterum Eccli. xi. 2. *Non laudes virum in specie sua*: vel etiam si timeri possit ne humana laude ad inanem gloriam provocetur: unde dicitur Eccli. xi. 30. *An-*

te mortem ne laudes hominem. Similiter etiam velle placere hominibus propter caritatem nutriendam, ut in ea homo spiritualiter proficere possit, laudabile est. Quod autem aliquis velit placere hominibus propter inanem gloriam, vel propter lucrum, vel etiam in malo, hoc esset peccatum, secundum illud Psal. lxi. 6. *Deus dissipavit ossa eorum qui hominibus placent*: & Apostolus dicit ad Gal. i. 10. *Si adhuc hominibus placerem, Christi servus non essem*.

Ad secundum dicendum, quod etiam vituperare malum, si non adhibeantur debite circumstantiæ, est vitiosum: & similiter laudare bonum.

Ad tertium dicendum, quod nihil prohibet duo vitia esse contraria: & ideo sicut detractio est malum, ita & adulatio, quæ contrariatur ei quantum ad ea quæ dicuntur, non autem directe quantum ad finem: quia adulator quærit delectationem eius cui adulatur; detractor autem non quærit eius contritionem, cum aliquando occulte detrahatur, sed magis quærit eius infamiam.

## ARTICULUS II. 587

*Utrum adulatio sit peccatum mortale.*

*Mal. quæst. vii. art. 1. ad 11.*

**A**D secundum sic proceditur. Videtur quod adulatio sit peccatum mortale. Quia secundum Augustinum in Enchir. (cap. xii.) *malum dicitur, quia nocet*. Sed adulatio maxime nocet, secundum illud Pl. ix. 3. *Quoniam laudatur peccator in desiderii anime sue, & iniquus benedicitur: exacerbavit Dominum peccator*: & ideo Hieronymus dicit, (epist. ad Celant. cir. med.) *quod nihil est quod tam facile corrumpat mentes hominum quam adulatio*: & super illud Pl. lxi. *Convertantur statim erubescens*, dicit Glossa (ord. Augustini:), „Plus nocet, lingua adulatoris quam gladius persecutoris.“ Ergo adulatio est gravissimum peccatum.

2. Præterea. Quicumque verbis nocet, non minus nocet tibi quam aliis: unde dicitur in Psal. xxxvi. 15. *Gladius eorum intret in corda ipsorum*. Sed ille qui alteri adulatur, inducit eum ad peccandum mortaliter: unde super illud Psal. cxi. 5. *Oleum peccatoris non impinget caput meum*, dicit Glossa (interl. & ord.) „Falsa laus adulatoris mentes a rigore

veritatis emollit ad noxia.“ Ergo multo magis adulator in se mortaliter peccat.

3. Præterea. In Decretis scribitur dist. xlv. (cap. lxi.) *Clericus qui adulationibus, & proditiionibus vacare deprehenditur, degradetur ab officio*. Sed talis pena non infligitur nisi pro peccato mortali. Ergo adulatio est peccatum mortale.

Sed contra est quod Augustinus in serm. de purgat. (qui est xli. de Sanctis, inter princ. & med.) inter peccata minuta numerat, *si quis cuiquam maiori persone aut ex voluntate, aut ex necessitate adulari voluerit*.

Respondendo dicendum, quod, sicut supra dictum est (quæst. cxii. art. 2.) peccatum mortale est quod caritati contrariatur. Adulatio autem quandoque quidem caritati contrariatur, quandoque autem non. Contrariatur siquidem caritati tripliciter. Uno modo ratione ipsius materiæ, puta cum aliquis laudat alicuius peccatum: hoc enim contrariatur dilectioni Dei, contra cuius iustitiam homo loquitur, & contra dilectionem proximi, quem in peccato sovet. Unde est peccatum mortale, secundum illud Iia. v. 20. *Vae qui dicitis malum bonum*.

Alio modo ratione intentionis, puta cum quis alicui adulatur ad hoc quod fraudulenter ei noceat vel corporaliter, vel spiritualiter: & hoc etiam est peccatum mortale: & de hoc habetur Prov. xxvii. 6. *Meliora sunt vulnera diligentis quam fraudulenta oscula odientis*.

Tertio modo per occasionem, sicut cum laus adulatoris sit alteri occasio peccandi, etiam præter adulatoris intentionem. Et in hoc considerare oportet, utrum sit occasio data, vel accepta, & qualis ruina subsequatur; sicut potest patere ex his quæ supra de scandalo dicta sunt (quæst. xlii. art. 3. & 4.) Si autem aliquis ex sola aviditate delectandus alios, vel etiam ad evitandum aliquod malum, vel consequendum aliquid in necessitate, alicui adulatus fuerit, non est contra caritatem. Unde non est peccatum mortale, sed veniale.

Ad primum ergo dicendum, quod auctoritates illæ loquuntur de adulatore qui laudat peccatum alicuius. Talis enim adulatio dicitur plus nocere quam gladius persecutoris, quia in potioribus bonis nocet, scilicet in spiritualibus; non autem nocet ita efficaciter: quia gladius persecutoris occidit effective, quasi sufficiens.

ficiens causa mortis; nullus autem adulando potest esse alteri sufficiens causa peccandi, ut ex supradictis patet (quaest. xlii. art. 1. ad 3. & 1. 2. quaest. lxxii. art. 8. ad 3. & quaest. lxxx. art. 1.).

Ad secundum dicendum, quod ratio illa procedit de eo qui adulatur intentione nocendi: ille enim plus nocet sibi quam aliis: quia sibi nocet tanquam sufficiens causa peccandi, aliis autem occasionaliter tantum.

Ad tertium dicendum, quod auctoritas illa loquitur de eo qui proditorie alteri adulatur, ut eum decipiat.

## QUAESTIO CXVI.

*De litigio,*

*in duos articulos divisa.*

**P**ostea considerandum est de litigio: & circa hoc quaeruntur duo.  
Primo, utrum opponatur virtuti amicitiae.

Secundo de comparatione eius ad adulationem.

### ARTICULUS I. 588

*Utrum litigium opponatur virtuti amicitiae, seu affabilitatis.*

**A**d primum sic proceditur. Videtur quod litigium non opponatur virtuti amicitiae, vel affabilitatis. Litigium enim ad discordiam pertinere videtur, sicut & contentio. Sed discordia opponitur caritati, sicut dictum est (quaest. xxxvii. art. 1.) Ergo & litigium.

2. Præterea. Proverb. xxvi. 21. dicitur: *Homo iracundus (a) incendit litem.* Sed iracundia opponitur mansuetudini. Ergo & lis, sive litigium.

3. Præterea. Iacobi iv. 1. dicitur: *Unde bella, & lites in vobis? Nonne ex concupiscentiis vestris, quae militant in membris vestris?* Sed sequi concupiscentias videtur opponi temperantiae. Ergo videtur quod litigium non opponatur amicitiae, sed temperantiae.

Sed contra est quod Philosophus in IV. Ethicor. (cap. vi.) litigium opponit amicitiae.

Respondendo dicendum, quod proprie litigium in verbis consistit, cum scilicet unus verbis alterius contradicit. In qua quidem contradictione duo possunt at-

tendi. Quandoque enim contingit contradictio propter personam dicentis, cui contradicens consentire recusat propter defectum amoris animos unitis; & hoc videtur ad discordiam pertinere caritati contrariam.

Quandoque vero contradictio oritur ratione personae, quam aliquis contristare non veretur: & sic fit litigium, quod praedictae amicitiae, vel affabilitati opponitur, ad quam pertinet delectabiliter aliis convivere. Unde Philosophus dicit in IV. Ethicor. (cap. vi.) quod illi qui ad omnia contrariantur, causa eius quod est contristare, neque quoscumque curantes, discolor, & litigiosi vocantur.

Ad primum ergo dicendum, quod contentio magis proprie pertinet ad contradictionem discordiae; litigium autem ad contradictionem quae fit intentione contristandi.

Ad secundum dicendum, quod directa oppositio vitiorum ad virtutes non attenditur secundum causas, cum contingat unum vitium ex diversis causis oriri, sed attenditur secundum speciem actus. Licet autem quandoque litigium ex ira oriatur, potest tamen etiam ex multis aliis causis oriri: unde non oportet quod directe opponatur mansuetudini.

Ad tertium dicendum, quod Iacobus loquitur ibi de concupiscentia, secundum quod est generale malum, ex quo omnia vitia oriuntur, prout dicit Glossa ad Rom. vii. (ord. sup. illud, *Concupiscentiam nesciebam*.) *Bona est lex, quae dum concupiscentiam prohibet, omne malum prohibet.*

### ARTICULUS II. 589

*Utrum litigium sit gravius peccatum quam adulatio.*

**A**d secundum sic proceditur. Videtur quod litigium sit minus peccatum quam contrarium vitium, scilicet placiditas, vel adulatio. Quanto enim aliud quod peccatum plus nocet, tanto peius esse videtur. Sed adulatio plus nocet quam litigium: dicitur enim Isa. lvi. 12. *Popule meus, qui beatum te dicunt, ipsi te decipiunt, & viam gressuum tuorum dissipant.* Ergo adulatio est gravius peccatum quam litigium.

2. Præterea. In adulatione videtur esse quaedam dolositas, quia aliud adulator

(a) Valgata suscitatur.

tor dicit ore, aliud habet in corde; litigiosus autem caret dolo, quia manifeste contradicit. Ille autem qui cum dolo peccat, turpior est, ut Philosophus dicit in VII. Ethic. (cap. vi. parum ante med.) Ergo gravius peccatum est adulatio quam litigium.

3. Præterea. Verecundia est timor de turpi, ut patet per Philosophum in IV. Ethic. (cap. ult.) Sed magis verecundatur homo esse adulator quam litigiosus. Ergo litigium est minus peccatum quam adulatio.

Sed contra est quod tanto aliquod peccatum videtur esse gravius, quanto spiritali statui magis repugnat. Sed litigium magis repugnare videtur statui spiritali: dicitur enim I. ad Timoth. 11. 3. quod *orotes Episcopum non litigiosum esse*: & II. ad Timoth. 11. 24. *Servum Domini non oportet litigare*. Ergo litigium videtur esse gravius peccatum quam adulatio.

Respondendo dicendum, quod de utroque istorum peccatorum loqui possumus dupliciter. Uno modo considerando speciem utriusque peccati; & secundum hoc tanto aliquod vitium est gravius, quanto magis repugnat oppositæ virtuti. Virtus autem amicitiae principaliter tendit ad delectandum quam ad contristandum: & ideo litigiosus, qui superabundat in contristando, gravius peccat quam placidus, vel adulator, qui superabundat in delectando.

Alio modo possunt considerari secundum aliqua exteriora motiva: & secundum hoc quandoque adulatio est gravior; puta quando intendit per deceptionem indebitum honorem, vel lucrum acquirere: quandoque vero litigium est gravius; puta quando homo intendit vel veritatem impugnare, vel dicentem in contemptum adducere.

Ad primum ergo dicendum, quod sicut adulator potest nocere oculis decipiendi; ita litigiosus potest interdum nocere manifeste impugando. Gravius autem est, ceteris paribus, manifeste alicui nocere, quasi per violentiam, quam occulte. Unde rapina est gravius peccatum quam furtum, ut supra dictum est (quæst. lxxi. art. 9.)

Ad secundum dicendum, quod non semper in actibus humanis illud est gravius quod est turpius. Decor enim hominis est ex ratione: & ideo turpiora sunt peccata carnalia, quibus caro dominatur rationi; quamvis peccata spiri-

tualia sint graviora, quia procedunt ex maiori contemptu. Similiter peccata quæ sunt ex dolo, sunt turpiora, inquantum videntur ex quadam infirmitate procedere, & ex quadam falsitate rationis; cum tamen peccata manifesta quandoque sint ex maiori contemptu. Et ideo adulatio, quasi cum dolo exiens, videtur esse turpior; sed litigium, quasi ex maiori contemptu procedens, videtur esse gravius.

Ad tertium dicendum, quod, sicut dictum est (in arg.) verecundia respicit turpitudinem peccati: unde non semper magis verecundatur homo de graviore peccato, sed de magis turpi peccato. Et inde est quod magis verecundatur homo de adulatione quam de litigio, quamvis litigium sit gravius.

## QUAESTIO CXVII.

### De liberalitate,

#### in sex articulos divisa.

**D**einde considerandum est de liberalitate, & vitiis oppositis, scilicet avaritia, & prodigalitate.

Circa liberalitatem autem quaeruntur sex.

Primo, utrum liberalitas sit virtus.

Secundo, quæ sit materia eius.

Tertio de actu ipsius.

Quarto, utrum magis ad eam dare quam accipere pertineat.

Quinto, utrum liberalitas sit pars iustitiæ.

Sexto de comparatione eius ad alias virtutes.

## ARTICULUS I. 590

### Utrum liberalitas sit virtus.

II. Cor. viii. 1. & II. Esd. 1. 2.

**A**d primum sic proceditur. Videtur quod liberalitas non sit virtus. Nulla enim virtus contrariatur naturali inclinationi. Inclinationem autem naturalis est ad hoc ut aliquis plus sibi quam aliis provideat: cuius contrarius pertinet ad liberalem: quia, ut Philosophus dicit in IV. Ethicor. (cap. 1. ante med.) *liberalis non est respicere ad seipsum, ita quod sibi minora derelinquit*. Ergo liberalitas non est virtus.

2. Præterea. Per divitias homo suam

vi-

vitam sustentat; & ad felicitatem divitiarum organice delervit, ut dicitur in I. Ethic. (cap. vii. ad fin.) Cum ergo omnis virtus ordinetur ad felicitatem, videtur quod liberalis non sit virtuosus: da quo Philosophus dicit in IV. Ethic. (cap. i. ante med.) quod non est acceptivus pecunie, neque custoditivus, sed emissivus.

3. Præterea. Virtutes habent connexionem ad invicem. Sed liberalitas non videtur connexa aliis virtutibus: multi enim sunt virtuosus qui non possunt esse liberales, quia non habent quod dent; multi etiam liberaliter dant, vel expendunt, qui tamen alias sunt vitiosi. Ergo liberalitas non est virtus.

Sed contra est quod Ambrosius dicit in I. de offic. (cap. xxx. cir. princ.) quod in Evangelio multas doctrinas accepimus iussu liberalitatis. Sed in Evangelio non docetur nisi ea quæ ad virtutem pertinent. Ergo liberalitas est virtus.

Respondendo dicendum, quod, sicut Augustinus dicit in Lib. II. de lib. arbit. (cap. xix. a princ.) bene uti his quibus male uti possumus, pertinet ad virtutem.

Possumus autem bene, & male uti non solum his quæ intra nos sunt, puta potentis, & passionibus animæ, sed etiam his quæ extra nos sunt, scilicet rebus huius mundi concessis nobis ad sustentationem vitæ. Et ideo cum bene uti his rebus pertineat ad liberalitatem, consequens est quod liberalitas virtus sit.

Ad primum ergo dicendum, quod, sicut Ambrosius (serm. lxxv. de temp.) & Basilus (serm. sup. illud, *Destruam horrea mea*) dicunt, superabundantia divitiarum datur aliquibus a Deo, ut meritum bonæ dispensationis acquirant. Pauci autem uni sufficiunt. Et ideo liberalis plura laudabiliter in alios expendit quam in seipsum. Debet autem homo semper magis sibi providere in spiritualibus bonis, in quibus unusquisque sibi præcipue subvenire potest: & tamen etiam in rebus temporalibus non pertinet ad liberalem ut sic aliis intendat, quod omnino se, & suos despiciat. Unde Ambrosius dicit in I. de officiis (cap. xxx. parum ante med.) *Est illa probanda liberalitas, ut proximos seminis tui non despicias, si egere cognoscas.*

Ad secundum dicendum, quod ad liberalem non pertinet sic divitias emitte- re, ut non sibi remaneat unde sustentetur, & unde virtutis opera exequatur,

quibus ad felicitatem pervenitur. Unde Philosophus dicit in IV. Ethic. (cap. i. ante med.) quod liberalis non negliget propria, volens per hoc quibusdam sufficere: & Ambrosius dicit in Lib. I. de offic. (loc. sup. cit.) quod Dominus non vult simul effundi opes, sed dispensari; nisi forte ut Heliseus, qui boves suos occidit, & parit pauperes ex eo quod habuit, ut nulla cura teneretur domestica: quod pertinet ad statum perfectionis spiritualis vitæ, de quo infra dicitur (quest. clxxxv. & clxxxvi. art. 3.)

Est tamen sciendum, quod hoc ipsum quod est sua liberaliter largiri, inquantum est actus virtutis, ad beatitudinem ordinatur.

Ad tertium dicendum, quod, sicut Philosophus dicit in IV. Ethic. (cap. i. cir. princ.) illi qui consumunt multas res in intemperantia, non sunt liberales, sed prodigi: & similiter quicumque effundit quæ habet, propter quæcumque alia peccata. Unde & Ambrosius dicit in I. de offic. (cap. xxx. parum a princ.) *Si ad invicem cum qui possessiones aliorum eripere conatur, non probatur largitas: nec illa perfecta est liberalitas, si instantia causa magis quam misericordie largiatur.* Et ideo illi qui carent aliis virtutibus, licet in aliqua mala opera multa expendant, non sunt liberales. Nihil etiam prohibet aliquos multa in bonos usus expendere, & habitum liberalitatis non habere; sicut & aliarum virtutum opera faciunt homines, antequam habitum virtutis habeant, licet non eodem modo quo virtuosus, ut supra dictum est (1. 2. quest. lxxv. art. 1.) Similiter etiam nihil prohibet, aliquos virtuosos, licet sint pauperes, esse liberales. Unde Philosophus dicit in IV. Ethic. (cap. i. ante med.) *Secundum substantiam, id est facultatem divitiarum, liberalitas dicitur: non enim consistit in multitudine datorum, sed in dantis habitu:* & Ambrosius dicit in I. de offic. (cap. xxx. parum ante med.) quod affectus divitem collationem, aut pauperem facit, & pretium rebus imponit.



ARTICULUS II. 591

*Utrum liberalitas sit circa pecunias.*

*Inf. art. 3. & 1. 2. quest. lx. art. 5. cor. & mal. quest. xlii. art. 1. cor. & IV. Ethic. fin.*

**A**D secundum sic proceditur. Videtur quod liberalitas non sit circa pecunias. Omnis enim virtus moralis est circa operationes, vel passiones. Esse autem circa operationes est proprium iustitiæ, ut dicitur in V. Ethic. (cap. 1.) Ergo cum liberalitas sit virtus moralis, videtur quod sit circa passiones, & non circa pecunias.

2. Præterea. Ad liberalem pertinet quantumcumque divitiarum usus. Sed divitiæ naturales sunt viresiores quam divitiæ artificiales, quæ in pecuniis consistunt, ut patet per Philosophum in I. Politic. (cap. v. & vi.) Ergo liberalitas non est principaliter circa pecunias.

3. Præterea. Diversarum virtutum diversæ sunt materiæ: quia habitus distinguuntur secundum obiecta. Sed res exteriores sunt materia iustitiæ distributi- væ, & commutativæ. Ergo non sunt materia liberalitatis.

Sed contra est quod Philosophus dicit in IV. Eth. (cap. 1. ante med.) quod liberalitas videtur esse mediæ quædam circa pecunias.

Respondetur dicendum, quod secundum Philosophum in IV. Ethic. (ibid.) ad liberalem pertinet emissivum esse. Unde & alio nomine liberalitas largitas nominatur: quia quod largum est, non est retentivum, sed emissivum. Et ad hoc idem pertinere videtur etiam nomen liberalitatis: cum enim aliquis a se emit- tit, quodammodo illud a sua custodia, & dominio liberat, & animum suum ab eius affectu liberum esse ostendit.

Ex vero quæ emittenda sunt ab uno homine in alium, sunt bona posses- siva: quæ nomine pecuniæ significantur: & ideo propria materia liberalitatis est pecunia.

Ad primum ergo dicendum, quod, si- cut dictum est (art. præc. ad 3.) libera- litas non attenditur in quantitate dati, sed in affectu dantis. Affectus autem dantis disponitur secundum passiones a- moris, & concupiscentiæ, & per conse- quens delectationis, & tristitiæ ad ea quæ dantur: & ideo immediata materia liberalitatis sunt interiores passiones; sed

pecunia exterior est obiectum ipsarum passionum.

Ad secundum dicendum, quod, sicut Augustinus dicit in Lib. de disciplina christi. (qui est tract. 1. de diversis cap. vi. a med.) totum quicquid homines in terra habent, & omnia quorum sunt do- mini, pecunia vocatur: quia antiqui quæ habebant, in pecoribus habebant. Et Philosophus dicit in IV. Ethic. (cap. 1. cir. princ.) quod pecunias omnia dici- mus, quorum dignitas numismate mensu- ratur.

Ad tertium dicendum, quod iustitia constituit æqualitatem in istis exteriori- bus rebus; non autem ad eam proprie pertinet moderari interiores passiones: unde aliter pecunia est materia liberali- tatis, & aliter iustitiæ.

ARTICULUS III. 592

*Utrum uti pecunia sit actus liberalitatis.*

*Inf. art. 4. & quod v. art. 23. ad 1. & IV. Ethic.*

**A**D tertium sic proceditur. Videtur quod uti pecunia non sit actus liberalitatis. Diversarum enim virtutum di- versi sunt actus. Sed uti pecunia convenit aliis virtutibus, sicut iustitiæ, & magnificentiæ. Non ergo est proprius actus liberalitatis.

2. Præterea. Ad liberalem non solum pertinet dare, sed etiam accipere, & custodire. Sed acceptio, & custodia non videntur ad usum pecuniæ pertinere. Ergo inconvenienter dicitur proprius actus liberalitatis usus pecuniæ.

3. Præterea. Usus pecuniæ non solum consistit in hoc quod pecunia detur, sed in hoc quod expendatur. Sed expendere pecuniam refertur ad ipsum expenden- tem; & sic non videtur esse actus liberalitatis: dicit enim Seneca in V. de benefic. (cap. ix. parum a princ.) Non est liberalis aliquis ex hoc quod sibi do- nat. Ergo non quilibet usus pecuniæ per- tinet ad liberalitatem.

Sed contra est quod Philosophus dicit in IV. Ethic. (cap. 1. a princ.) Unoquo- que optime utitur qui habet circa singula virtutem: ergo divitiis utitur optime qui habet circa pecunias virtutem. Ille autem est liberalis. Ergo bonus usus pecunia- rum est actus liberalitatis.

Respondetur dicendum, quod species a- ctus sumitur ex obiecto, ut supra habi- tum est (1. 2. quest. xlviii. art. 2.)

Ob-

Obiectum autem, siue materia liberalitatis est pecunia, & quicquid pecunia mensurari potest, ut dictum est (art. præc. ad 2.) Et quia quælibet virtus convenienter se habet ad suum obiectum, consequens est ut cum liberalitas sit virtus, actus eius sit proportionatus pecuniae. Pecunia autem cadit sub ratione bonorum utilium: quia omnia exteriora bona ad usum hominis sunt ordinata: & ideo actus proprius liberalitatis est pecunia, vel divitiis uti.

Ad primum ergo dicendum, quod ad liberalitatem pertinet bene uti divitiis, inquantum huiusmodi, eo quod divitiæ sunt propria materia liberalitatis. Ad iusticiam autem pertinet uti divitiis secundum aliam rationem, scilicet secundum rationem debiti, prout scilicet res exterior debetur alteri; ad magnificentiam autem pertinet uti divitiis secundum quandam specialem rationem, id est secundum quod assumuntur in alicuius operis magni expletionem. Unde & magnificentia quodammodo se habet ex additione ad liberalitatem, ut infra dicitur (quæst. cxxxiv.)

Ad secundum dicendum, quod ad virtuosum pertinet non solum convenienter uti sua materia, vel instrumento, sed etiam præparare opportunitates ad bene utendum; sicut ad fortitudinem militis pertinet non solum exercere gladium in hostes, sed etiam exacuere gladium, & in vagina conservare. Sic etiam liberalitatem pertinet non solum uti pecunia, sed etiam eam præparare, & conservare ad idoneum usum.

Ad tertium dicendum, quod, sicut dictum est (art. præc. ad 1.) propinqua materia liberalitatis sunt interiores passionēs, secundum quas homo afficitur circa pecuniam: & ideo ad liberalitatem pertinet præcipue ut homo propter inordinatam affectionem ad pecuniam non prohibeatur a quocunque debito usu eius. Est autem duplex usus pecuniae: unus ad seipsum, qui videtur ad sumptus, vel expensas pertinere; alius autem, quo quis utitur ad alios, qui pertinet ad donationes. Et ideo ad liberalitatem pertinet ut neque propter immoderatum amorem pecuniae aliquis impediatur a convenientibus expensis, neque a convenientibus donationibus. Unde circa donationes, & sumptus liberalitas consistit, secundum Philosophum in IV. Ethic. (cap. 1. ante med.) Verbum autem Senecæ est intelligendum de liberalitate, secundum

quod se habet ad donationes: non enim dicitur aliquis liberalis ex hoc quod sibi aliquid donat.

#### ARTICULUS IV. 593

*Utrum ad liberalem maxime pertineat dare.*

*Inf. quæst. cxix. art. 1. ad 2. & 3. & IV. Ethic.*

**A**D quantum sic proceditur. Videtur quod ad liberalem non maxime pertineat dare. Liberalitas enim a prudentia dirigitur, sicut & quælibet alia virtus moralis. Sed maxime videtur ad prudentiam pertinere divitias conservare: unde & Philosophus dicit in IV. Ethic. (cap. 1. ante med.) quod illi qui non acquisierunt pecuniam, sed susceperunt acquisitam ab aliis, liberalius eam expendunt, quia sunt in experti indigens. Ergo videtur quod dare non maxime pertineat ad liberalem.

2. Præterea. De hoc quod aliquis maxime intendit, nullus tristatur, neque ab eo cessat. Sed liberalis quandoque tristatur de his quæ dedit, neque etiam dat omnibus, ut dicitur in IV. Ethicor. (loc. cit.) Ergo ad liberalem non maxime pertinet dare.

3. Præterea. Ad illud implendum quod quis maxime intendit, homo utitur viis quibus potest. Sed liberalis non est petitiuus, ut Philosophus dicit in IV. Ethic. (loc. cit.) cum per hoc possit sibi præparare facultatem aliis donandi. Ergo videtur quod non maxime intendat ad dandum.

4. Præterea. Magis homo obligatur ad hoc quod provideat sibi quam aliis. Sed expendendo aliquid providet sibi; dando autem providet aliis. Ergo ad liberalem magis pertinet expendere quam dare.

Sed contra est quod Philosophus dicit in IV. Ethic. (loc. sup. cit.) quod liberalis est superabundare in datione.

Respondeo dicendum, quod proprium est liberalis uti pecunia. Usus autem pecuniae est in emissionem ipsius. Nam acquisitio pecuniae magis assimilatur generationi quam usui; custodia vero pecuniae, inquantum ordinatur ad facultatem utendi, assimilatur habitui.

Emissio autem alicuius rei quanto fit ad aliquid distantius, tanto a maiori virtute procedit, sicut patet in his quæ proiciuntur. Et ideo ex maiori virtute procedit quod aliquis emitat pecuniam dan-

dando eam aliis, quam expendendo eam circa seipsum. Proprium est autem virtutis ut praeclat tendat in id quod perfectius est: nam *virtus est perfectio quaedam*, ut dicitur in VII. Phisic. (tex. 17. & 18.) Et ideo liberalis maxime laudatur ex datione.

Ad primum ergo dicendum, quod ad prudentiam pertinet custodire pecuniam, ne furripiatur, aut inutiliter expendatur. Sed utiliter eam expendere non est minoris prudentiae, quam utiliter eam conservare, sed maioris: quia plura sunt attendenda circa utrumque pecuniae, qui assimilatur motui, quam circa conservationem, quae assimilatur quieti. Quod autem illi qui succiperunt pecunias ab aliis acquisite, liberaliter expendant, quasi existentes inopiae inexpectati, si propter solam hanc inexperientiam liberaliter expendere, non haberent virtutem liberalitatis. Sed quandoque huiusmodi inexperientia se habet solum sicut tollens impedimentum liberalitatis; ita quod promptius liberaliter agant. Timor enim inopiae ex eius experientia procedens, impedit quandoque eos qui acquisierunt pecuniam, ne eam consumant liberaliter agendo, & similiter amor quo eam amant tamquam proprium effectum, ut Philosophus dicit in IV. Ethicor. (cap. 1. ante med.)

Ad secundum dicendum, quod, sicut dictum est (in corp. art. & art. praec.) ad liberalitatem pertinet convenienter uti pecunia, & per consequens convenienter dare; quod est quidam pecuniae usus. Quilibet autem virtus tristatur de contrario sui actus, & viciat eius impedimenta. Ei autem quod est convenienter dare, duo opponuntur; scilicet non dare quod convenienter est dandum, & dare aliquid inconvenienter. Unde de utroque tristatur liberalis; sed de primo magis, quia plus opponitur proprio actui. Et ideo etiam non dat omnibus: impediretur enim actus eius, si quibuslibet daret: non enim haberet unde aliis daret, quibus dare convenit.

Ad tertium dicendum, quod dare, & accipere le habent sicut agere, & pati. Non est autem idem principium agendi, & patiendi. Unde quia liberalitas est principium dationis, non pertinet ad liberalem ut sit promptus ad recipiendum, & multo minus ad petendum. Unde versus:

*Si quis in hoc mundo multis vult  
gratus haberi,*

*Des, capiat, quavus plurima, pauca,  
nihil.*

Ordinat autem addendum aliqua secundum convenientiam liberalitatis, scilicet fructus propriarum possessionum, quos sollicitè procurat, ut eis liberaliter utatur.

Ad quartum dicendum, quod ad expendendum in seipsum natura inclinat: unde hoc quod pecuniam quis profundat in alios, pertinet proprie ad virtutem.

## ARTICULUS V. 594

*Utrum liberalitas sit pars iustitiae.*

*Sup. quaest. lxxiii. art. 12. ad 1. & quaest. praef. art. 2. ad 3. & art. 3. ad 2. & instr. quaest. clviii. art. 1. cor. & ill. dist. xxvii. quaest. 11. art. 4. quaest. 2. & mal. quaest. xlii. artic. 1. cor. fin.*

**A**D quintum sic proceditur. Videtur quod liberalitas non sit pars iustitiae. Iustitia enim respicit debitum. Sed quanto est aliquid magis debitum, tanto minus liberaliter datur. Ergo liberalitas non est pars iustitiae, sed ei repugnat.

2. Praeterea. Iustitia est circa operationes, ut supra habitum est (quaest. lxxiii. art. 9. & 1. 2. quaest. lx. art. 2. & 3.) Sed liberalitas est praecipue circa amorem, & concupiscentiam pecuniarum, quae sunt passionis. Ergo magis videtur liberalitas ad temperantiam pertinere quam ad iustitiam.

3. Praeterea. Ad liberalitatem pertinet praecipue convenienter dare, ut dictum est (art. praec. ad 2.) Sed convenienter dare pertinet ad beneficentiam, & misericordiam, quae pertinent ad caritatem, ut supra dictum est (quaest. xxx. & xxxi.) Ergo liberalitas magis est pars caritatis quam iustitiae.

Sed contra est quod Ambrosius dicit in I. de officiis (cap. xxviii. in princ.) *Iustitia ad societatem generis humani refertur. Societatis enim ratio dividitur in duas partes, iustitiam scilicet, & beneficentiam, quam eandem liberalitatem, & benignitatem vocant.* Ergo liberalitas ad iustitiam pertinet.

Respondeo dicendum, quod liberalitas non est species iustitiae: quia iustitia exhibet alteri quod est eius; sed liberalitas exhibet id quod suum est.

Habet tamen quandam convenientiam cum iustitia in duobus: primo quidem quia principaliter est ad alterum, sicut & iustitia; secundo quia est circa res exteriores, sicut & iustitia; licet secundum aliam rationem, ut dictum est (hic & art.

& art. 2. hu. quæst. ad 3.) Et ideo liberalitas a quibusdam ponitur pars iustitiæ, sicut virtus annexa ei ut principali.

Ad primum ergo dicendum, quod liberalitas etiam non attendat debitum legale, quod attendit iustitia, attendit tamen debitum quoddam morale, quod attenditur ex quadam ipsius decencia, non ex hoc quod sit alteri obligatus: unde minimum habet de ratione debiti.

Ad secundum dicendum, quod temperantia est circa concupiscentiam corporalem delectationum. Concupiscentia autem pecuniæ, & delectatio non est corporalis, sed magis animalis. Unde liberalitas non pertinet proprie ad temperantiam.

Ad tertium dicendum, quod datio beneficentiæ, & misericordiæ procedit ex eo quod homo est aequaliter affectus circa eum cui dat: & ideo talis datio pertinet ad caritatem, sive ad amicitiam. Sed datio liberalitatis provenit ex eo quod dans est aequaliter affectus circa pecuniam, dum eam non concupiscit, neque amat: unde etiam non solum amicitis, sed etiam ignotis dat quando oportet. Unde non pertinet ad caritatem, sed magis ad iustitiam, quæ est circa res exteriores.

## ARTICULUS VI. 395

*Utrum liberalitas sit maxima virtutum.*

**A**D sextum sic proceditur. Videtur quod liberalitas sit maxima virtutum. Omnis enim virtus hominis est quædam similitudo divinæ bonitatis. Sed per liberalitatem homo maxime assimilatur Deo, qui dat omnibus affluenter, & non impropere, ut dicitur Iacobi 2. 1. Ergo liberalitas est maxima virtutum.

2. Præterea. Secundum Augustinum in VI. de Trinit. (cap. VIII. parum a princ.) in his que non mole magna sunt, idem est esse maius, quod melius. Sed ratio bonitatis maxime videtur ad liberalitatem pertinere: quia *bonum diffusivum est*, ut patet per Dionysium IV. de div. Nom. (par. 1. lect. 1.) unde & Ambrosius dicit in I. de offic. (cap. XXVIII. cir. princ.) quod *iustitia censuram tenet, liberalitas bonitatem*. Ergo liberalitas est maxima virtutum.

3. Præterea. Homines honorantur, & amantur propter virtutem. Sed Boetius

dicit in Lib. II. de consolator. (prosa v. parum a princ.) *Largitas maxime claros facit: & Philosophus dicit in IV. Ethic. (cap. 1. ante med.) quod inter virtuosos maxime liberales amantur*. Ergo liberalitas est maxima virtutum.

Sed contra est quod Ambrosius dicit in Lib. I. de offic. (cap. XXVIII. in princ.) quod *iustitia (a) excellentior videtur liberalitate, sed liberalitas gravior*. Philosophus etiam dicit in I. Rhetor. (cap. 12. non procul a princ.) quod *fortes, & iusti maxime honorantur, & post eos liberales*.

Respondeo dicendum, quod quælibet virtus tendit in aliquod bonum. Unde quanto aliqua virtus in maius bonum tendit, tanto melior est. Liberalitas autem tendit in aliquod bonum dupliciter: uno modo primo & per se, alio modo ex consequenti. Primo quidem & per se tendit ad ordinandum propriam affectionem circa possessionem pecuniarum, & usum: & sic secundum hoc præfertur liberalitati temperantia, quæ moderatur concupiscentias, & delectationes pertinentes ad proprium corpus: & fortitudo, & iustitia, quæ ordinantur quodammodo in bonum commune; una quidem tempore pacis, alia vero tempore belli: & omnibus præferuntur virtutes quæ ordinantur in bonum divinum: nam bonum divinum præminet cuilibet bono humano; & in bonis humanis bonum publicum præminet bono privato; in quibus bonum corporis præminet bono exteriorum rerum.

Alio modo ordinatur liberalitas ad aliquod bonum ex consequenti; & secundum hoc liberalitas ordinatur in omnia bona prædicta: ex hoc enim quod homo non est amativus pecuniæ, sequitur quod de facili utatur ea & ad seipsum, & ad utilitatem aliorum, & ad honorem Dei: & secundum hoc habet quædam excellentiam ex hoc quod utilis est ad multa.

Quia tamen unumquodque magis iudicatur secundum id quod primo & per se competit ei, quam secundum id quod consequenter se habet; ideo dicendum est, liberalitatem non esse maximam virtutum.

Ad primum ergo dicendum, quod datio divina provenit ex eo quod amat homines quibus dat; non autem ex eo quod afficiatur ad ea quæ dat: & ideo magis videtur pertinere ad caritatem,

quæ

(1) Ita communius, Cod. Alcan. cum Ambrosii textu excellentior.

quæ est maxima virtutum, quam ad liberalitatem.

Ad secundum dicendum, quod quilibet virtus participationem boni quantum ad emissionem proprii actus: actus autem quarundam aliarum virtutum meliores sunt pecunia, quam emittit liberalis.

Ad tertium dicendum, quod liberales maxime amantur, non quidem amicitia honesti, quasi sint meliores, sed amicitia utilis, quia sunt utiliores in exterioribus bonis, quæ communiter homines maxime cupiunt: & etiam propter eandem causam clari redduntur.

## QUAESTIO CXVIII.

*De vitiis liberalitati oppositis, & primo de avaritia,*

*in octo articulos divisa.*

**D**Einde considerandum est de vitiis liberalitati oppositis: & primo de avaritia; secundo de prodigalitate.

Circa primum quaeruntur octo.

Primo, utrum avaritia sit peccatum. Secundum, utrum sit speciale peccatum.

Tertio, cui virtuti opponatur.

Quarto, utrum sit peccatum mortale.

Quinto, utrum sit gravissimum peccatorum.

Sexto, utrum sit carnale, vel spirituale peccatum.

Septimo, utrum sit vitium capitale.

Octavo de filiabus eius.

## ARTICULUS I. 396

*Utrum avaritia sit peccatum.*

*Inf. quaest. cxi.*

**A**D primum sic proceditur. Videtur quod avaritia non sit peccatum. Dicitur enim avaritia, quasi *avis aviditas*, quia scilicet in appetitu pecunie consistit, per quam omnia exteriora bona intelligi possunt. Sed appetere exteriora bona non est peccatum: naturaliter enim homo ea appetit, tum quia subiecta sunt homini naturaliter, tum quia per ea vita hominis conservatur, unde & substantia hominis dicitur. Ergo avaritia non est peccatum.

2. Præterea. Omne peccatum aut est in Deum, aut in proximum, aut in seipsum,

ut supra habitum est (1. 2. quaest. lxxii. art. 4.) Sed avaritia non est proprie peccatum contra Deum: non enim opponitur neque religioni, in neque virtutibus theologicis, quibus homo ordinatur in Deum: neque etiam est peccatum in seipsum, hoc enim proprie pertinet ad gulam, & luxuriam, de qua Apostolus dicit I. ad Cor. vi. 18. *Qui fornicatur, in corpus suum peccat*: similiter etiam non videtur esse peccatum in proximum, quia per hoc quod homo recipit sua, nulli facit iniuriam. Ergo avaritia non est peccatum.

3. Præterea. Ea quæ naturaliter eveniunt, non sunt peccata. Sed avaritia naturaliter consequitur senectutem, & quemlibet defectum, ut Philosophus dicit in IV. Eth. (cap. 1. aliquant. ante fin.) Ergo avaritia non est peccatum.

Sed contra est quod dicitur ad Hebr. ult. 5. *Sint mores sine avaritia contenti presentibus*.

Respondendo dicendum, quod in quibuscumque bonum consistit in debita mensura, necesse est quod per excessum, vel diminutionem illius mensuræ malum proveniat. In omnibus autem quæ sunt propter finem, bonum consistit in quadam mensura: nam ea quæ sunt ad finem, necesse est commensurari fini; sic ut medicina commensuratur sanitati, ut patet per Philosophum in I. Polit. (cap. vi. a med.) Bona autem exteriora habent rationem utilium ad finem, sicut dictum est (quaest. præc. art. 3. & 1. 2. quaest. 11. art. 1.) Unde necesse est quod bonum hominis circa ea consistat in quadam mensura, dum scilicet homo secundum aliquam mensuram quaerit habere exteriores divitias, prout sunt necessariae ad vitam eius secundum suam conditionem. Et ideo in excessu huius mensuræ consistit peccatum, dum scilicet aliquis supra debitum modum vult eas acquirere, vel retinere; quod pertinet ad rationem avaritiæ, quæ definitur esse *immoderatus amor habendi*. Unde patet quod avaritia est peccatum.

Ad primum ergo dicendum, quod appetitus rerum exteriorum est homini naturalis, ut eorum quæ sunt propter finem: & ideo tantum vitio caret, in quantum continetur sub regula sumpta ex ratione finis. Avaritia autem hanc regulam excedit: & ideo est peccatum.

Ad secundum dicendum, quod avaritia potest importare immoderantiam circa res exteriores dupliciter. Uno modo in-

immediate quantum ad acceptionem, vel conservationem ipsarum, ut scilicet homo plus debito eas acquirat, vel conservet: & secundum hoc est directe peccatum in proximum: quia in exterioribus divitiis non potest unus homo superabundare, nisi alteri deficiat, quia bona temporalia non possunt simul possideri a multis. Alio modo potest importare immoderantiam circa interiores affectiones, quas quis ad divitias habet; puta quod immoderate aliquis divitias amet, aut desideret, aut delectetur in eis: & sic avaritia est peccatum hominis in seipsum, quia per hoc deordinatur eius affectus, licet non deordinetur corpus, sicut per vitia carnalia. Ex consequenti autem est peccatum in Deum, sicut & omnia peccata mortalia, in quantum homo propter bonum temporale contemnit aeternum.

Ad tertium dicendum, quod inclinationes naturales sunt regulandae secundum rationem, quae principatum tenet in natura humana. Et ideo quamvis senes propter naturae defectum avidius exteriorum rerum inquirant subsidia, sicut & omnis indigens quaerit suae indigentiae supplementum; non tamen a peccato excusantur, si debitam rationis mensuram circa divitias excedant.

## ARTICULUS II. 597

*Utrum avaritia sit speciale peccatum.*

*Inf. art. 5. ad 2. & I. P. quæst. lxxiii. art. 2. ad 2. & II. dist. cxi. in exp. lit. f. & mal. quæst. viii. art. 1. ad 1. & quæst. xiii. art. 1.*

**A**D secundum sic proceditur. Videtur quod avaritia non sit speciale peccatum. Dicit enim Augustinus in Lib. III. de lib. arbit. (cap. xvii. cir. med.) *Avaritia, quæ græce (φιλαργυρία) philargyria dicitur, non in solo argento, vel in nummis, sed in omnibus rebus quæ immoderate cupiuntur, intelligenda est.* Sed in omni peccato est cupiditas immoderata alicuius rei: quia peccatum est, spreto bono incommutabili, bonis commutabilibus inhærere, ut supra habitum est (1. 2. quæst. lxxi. art. 6. arg. 3.) Ergo avaritia est generale peccatum.

2. Præterea. Secundum Isidorum in Lib. X. Etymolog. (ad lit. A.) *avarus dicitur, quasi avidus æris*, idest pecuniæ: unde & in Græco avaritia *philargyria* nominatur, idest *amor argenti*. Sed sub

argento, per quod pecunia significatur, significantur omnia bona exteriora, quorum pretium potest numismate mensurari, ut supra habitum est (quæst. præc. art. 2. ad 2.) Ergo avaritia consistit in appetitu cuiuslibet exterioris rei. Ergo videtur esse generale peccatum.

3. Præterea. Super illud ad Rom. vii. *Nam concupiscentiam nesciebam etc.* dicit Glossa (ord. August. Lib. de spir. & lit. cap. iv. cir. med.) „Bona est lex, quæ dum concupiscentiam prohibet, omne malum prohibet.“ Videtur autem lex specialiter prohibere concupiscentiam avaritiæ: unde dicitur Exod. xx. 17. *Non concupisces rem proximi tui.* Ergo concupiscentia avaritiæ est omne malum; & ita avaritia est generale peccatum.

Sed contra est quod ad Rom. 1. 29. avaritia connumeratur inter alia specialia peccata, ubi dicitur: *Repletos omni iniquitate, malitia, fornicatione, avaritia etc.*

Respondendo dicendum, quod peccata fortiuntur speciem secundum obiecta, ut supra habitum est (1. 2. quæst. lxxii. art. 1.) Obiectum autem peccati est illud bonum in quod tendit inordinatus appetitus. Et ideo ubi est specialis ratio boni quod inordinate appetitur, ibi est specialis ratio peccati. Alia autem est ratio boni utilis, & boni delectabilis. Divitiæ autem secundum se habent rationem utilis: ea enim ratione appetuntur, in quantum in usum hominis cedunt. Et ideo speciale quoddam peccatum est avaritia, secundum quod est immoderatus amor habendi possessiones, quæ nomine pecuniæ delignantur, ex qua sumitur avaritiæ nomen.

Verum quia verbum habendi, quod secundum primariam impositionem ad possessiones pertinere videtur, quarum sumus totaliter domini, ad multa alia derivatur, sicut dicitur homo habere sanitatem, uxorem, vestimentum, & alia huiusmodi, ut patet in Prædicatoris (cap. ult. post prædicam.) per consequens & nomen avaritiæ ampliatur est ad omnem immoderatum appetitum habendi quancumque rem, sicut Gregorius dicit in quadam hom. (xvi. in Evang. inter princ. & med.) quod *avaritia est non solum pecunie, sed etiam altitudinis, cum supra debitum modum sublimitas ambitur.* Et secundum hoc avaritia non est speciale peccatum: & hoc etiam modo loquitur Augustinus de avaritia in auctoritate inducitur (in arg. 1.)

Unde patet responsio ad primum.

Ad secundum dicendum, quod omnes res exteriores, quæ veniunt in usum humanæ vitæ, nomine pecuniæ intelliguntur, inquantum habent rationem boni utilis. Sunt autem quædam exteriora bona quæ potest aliquis pecunia consequi, sicut voluptates, & honores, & alia huiusmodi, quæ habent aliam rationem appetibilitatis. Et ideo illorum appetitus non proprie dicitur avaritia, secundum quod est vitium speciale.

Ad tertium dicendum, quod Glossa illa loquitur de concupiscentia inordinata cuiuscunque rei. Potest enim intelligi, quod per prohibitionem concupiscentiæ rerum possessorum prohibeantur quarumcumque rerum concupiscentiæ, quæ per res possessas haberi possunt.

### ARTICULUS III. 598

*Utrum avaritia opponatur liberalitati.*

*Sup. quæst. CXVII. art. 2. cor. & quæst. CXVIII. art. 5. ad 3. & mal. quæst. XIII. art. 2. ad 10. & IV. Ethic. lect. 4. per 101. & lect. 5. fin.*

**A**D tertium sic proceditur. Videtur quod avaritia non opponatur liberalitati. Quia super illud Matth. v. *Beati qui esuriunt, & sitiunt iustitiam*, Chrysostomus dicit (hom. xv. in Matth. inter princ. & med.) quod duplex est iustitia, una generalis, & alia specialis, cui opponitur avaritia: & idem Philosophus dicit in V. Eth. (cap. 11.) Ergo avaritia non opponitur liberalitati.

2. Præterea. Peccatum avaritiæ in hoc consistit quod homo transgreditur mensuram in rebus possessis. Sed huiusmodi mensura statuitur per iustitiam. Ergo avaritia directe opponitur iustitiæ, & non liberalitati.

3. Præterea. Liberalitas est virtus media inter duo vitia contraria, ut patet per Philosophum in II. Ethic. (cap. vii.) & in IV. (cap. 1.) Sed avaritia non habet peccatum contrarium, & oppositum, ut patet per Philosophum in V. Ethicor. (implic. cap. 1. & 11.) Ergo avaritia non opponitur liberalitati.

Sed contra est quod, sicut dicitur Eccl. v. 9. *avarus non implebitur pecunia, & qui amat divitias, fructum non capiet ex eis*. Sed non impleri pecunia, & inordinate eas amare, est contrarium liberalitati, quæ in appetitu divitiarum me-

dium tenet. Ergo avaritia opponitur liberalitati.

Respondeo dicendum, quod avaritia importat immoderantiam quamdam circa divitias dupliciter. Uno modo immediate circa ipsam acceptionem, & conservationem divitiarum, inquantum scilicet aliquis acquirit pecuniam ultra debitum, aliena surripiendo, vel retinendo; & sic opponitur iustitiæ: & hoc modo accipitur avaritia Ezech. xxxi. 27. ubi dicitur: *Principes eius in medio eius, quasi lupi rapientes prædam ad effundendum sanguinem, & avaræ festinanda lucra*.

Alio modo importat immoderantiam circa interiores affectiones divitiarum; puta cum quis nimis amat, vel desiderat divitias, aut nimis delectatur in eis, etiam si nolit rapere aliena: & hoc modo avaritia opponitur liberalitati, quæ moderatur huiusmodi affectiones, ut dictum est (quæst. præc. art. 2. ad 3. & art. 3. ad 3. & art. 6.) Et sic accipitur avaritia II. ad Corinth. ix. 5. *Præparent remissionem benedictionem hanc paratam esse, sic quasi benedictionem, non quasi avaritiam*: Glossa (interl.) „ scilicet „ ut doleant pro dato, & parum sit quod „ dent.

Ad primum ergo dicendum, quod Chrysostomus, & Philosophus loquuntur de avaritia primo modo dicta; avaritiam autem secundo modo dictam nominat Philosophus illiberalitatem.

Ad secundum dicendum, quod iustitia proprie statuit mensuram in acceptionibus, & conservationibus divitiarum secundum rationem debiti legalis, ut scilicet homo non accipiat, nec retineat alienum; sed liberalitas constituit mensuram rationis, principaliter quidem in interioribus affectionibus, & per consequens in exteriori acceptione, & conservatione pecuniarum, & emissionem earum, secundum quod ex interiori affectione procedunt, non observando rationem debiti legalis, sed debiti moralis, quod attenditur secundum regulam rationis.

Ad tertium dicendum, quod avaritia, secundum quod opponitur iustitiæ, non habet vitium oppositum: quia avaritia consistit in plus habendo quam debeat secundum iustitiam: & huic opponitur minus habere, quod non habet rationem culpæ, sed pœnæ. Sed avaritia, secundum quod opponitur liberalitati, habet vitium prodigalitatis oppositum.

E

A R-

S. Th. Oper. Tom. XXIII.

## ARTICULUS, IV. 599

*Utrum avaritia semper sit peccatum mortale.*

*Mal. quæst. xiii. art. 2.*

**A**D quantum sic proceditur. Videtur quod avaritia semper sit peccatum mortale. Nullus enim est dignus morte nisi pro peccato mortali. Sed propter avaritiam homines digni sunt morte: cum enim Apostolus ad Rom. 1. 29. præmiserit, *Repletos omni iniquitate, fornicatione, avaritia* &c. subdit v. 32. *Quæ talia agunt, digni sunt morte.* Ergo avaritia est peccatum mortale.

2. Præterea. Minimum in avaritia est quod aliquis inordinate retineat sua. Sed hoc videtur esse peccatum mortale: dicit enim Basilii (in term. super illud, *Destruam horrea mea*, vers. fi.) *Est panis famelici, quem tu tenes; nudi tunicæ, quam conservas; indigentis argentum, quod possides: quocirca tui iniuriarum, quos exhibere valeres.* Sed iniuriari alteri est peccatum mortale, quia contrariatur dilectioni proximi. Ergo multo magis omnis avaritia est peccatum mortale.

3. Præterea. Nullus excusetur spirituali cæcitate nisi per peccatum mortale, quod animam privat lumine gratiæ. Sed, secundum Chrysostomum (alium Auctorem implic. hom. xv. in op. imperf. vers. fi.) *senescit anima est pecuniarum cupidus.* Ergo avaritia, quæ est pecuniarum cupidus, est peccatum mortale.

Sed contra est quod I. ad Corinth. 111. super illud, *Si quis edificaverit super hoc fundamentum* &c. dicit Glossa (August. Lib. de fide & oper. cap. xvi. ante med.) quod „lignum, fenum, & stipulam superædificat ille qui cogitat quæ mundi sunt, quomodo placeat mun-“ do: quod pertinet ad peccatum avaritiæ. Ille autem qui ædificat lignum, fenum, & stipulam, non peccat mortaliter, sed venialiter: de eo enim dicitur, quod *salvus eris sic quasi per ignem.* Ergo avaritia quandoque est veniale peccatum.

Respondendo dicendum, quod, sicut dictum est (art. præc.) avaritia dupliciter dicitur. Uno modo secundum quod opponitur iustitiæ: & hoc modo ex genere suo est peccatum mortale: sic enim ad avaritiam pertinet quod aliquis iniuste accipiat, vel retineat res alienas;

quod pertinet ad rapinam, vel furtum, quæ sunt peccata mortalia, ut supra habitum est (quæst. lxxvi. art. 6. & 8.) Contingit tamen in hoc genere avaritiæ aliquid esse peccatum veniale propter imperfectionem actus, sicut supra dictum est (quæst. lxxvi. art. 6. ad 3.) cum de furto ageretur. Alio modo potest accipi avaritia, secundum quod opponitur liberalitati: & secundum hoc importat inordinatum amorem divitiarum.

Si ergo in tantum amor divitiarum crescat, quod preferatur caritati, ut scilicet propter amorem divitiarum aliquis non vereatur facere contra amorem Dei, & proximi, sic avaritia erit peccatum mortale. Si autem inordinatio amoris intra hoc sistat, ut scilicet homo quamvis superflue divitias amet, non tamen præferat earum amorem amori divino, ut si propter divitias non velit aliquid facere contra Deum, & proximum; sic avaritia est peccatum veniale.

Ad primum ergo dicendum, quod avaritia connumeratur peccatis mortalibus secundum illam rationem qua est peccatum mortale.

Ad secundum dicendum, quod Basilii loquitur in illo casu in quo aliquis tenetur ex debito legali bona sua pauperibus erogare vel propter periculum necessitatis, vel etiam propter superfluitatem habituum.

Ad tertium dicendum, quod cupidus divitiarum obtenebrat animam proprie, quando excludit lumen caritatis, præferendo amorem divitiarum amori divino.

## ARTICULUS V. 600

*Utrum avaritia sit maximum peccatum.*

*Psal. xxi. com. 5. fin.*

**A**D quantum sic proceditur. Videtur quod avaritia sit maximum peccatum. Dicitur enim Eccle. x. 9. *Ataro nihil est scelestius: & postea subditur: Nihil est iniquius quam amare pecuniam: hic enim & animam suam venalem habet.* Et Tullius dicit in I. de offic. (in tit. *Vera magnanimitas in duobus potissimum fit:*) *Nihil est tam angusti animi, tamque parvi, quam amare pecuniam.* Sed hoc pertinet ad avaritiam. Ergo avaritia est gravissimum peccatum.

2. Præterea. Tanto aliquod peccatum est gravius, quanto magis caritati contrariatur. Sed avaritia maxime contrariatur caritati: dicit enim Augustinus



in Lib. lxxxiii. Q<sup>a</sup>. (quaest. xxxvi. a princ.) quod *venenum caritatis est cupiditas*. Ergo avaritia est maximum peccatorum.

3. Præterea. Ad gravitatem peccati pertinet quod sit incurabile: unde & peccatum in Spiritum sanctum dicitur gravissimum, quia est irremissibile. Sed avaritia est peccatum insanabile: unde dicit Philosophus in IV. Ethic. (cap. 1. a med.) quod *senectus, & omnis impotentia avaros facit*. Ergo avaritia est gravissimum peccatorum.

4. Præterea. Apostolus dicit ad Ephes. v. 5. quod *avaritia est idolorum servitus*. Sed idololatria computatur inter gravissima peccata. Ergo & avaritia.

Sed contra est quod adulterium est gravius peccatum quam furtum, ut habetur Proverb. vi. Furtum autem pertinet ad avaritiam. Ergo avaritia non est gravissimum peccatorum.

Respondeo dicendum, quod omne peccatum ex hoc ipso quod est malum, consistit in quadam corruptione, sive privatione alicuius boni; in quantum autem est voluntarium, consistit in appetitu alicuius boni. Dupliciter ergo ordo peccatorum potest attendi. Uno modo ex parte boni quod per peccatum contemnitur, vel corrumpitur; quod quanto magis est, tanto peccatum gravius est. Et secundum hoc peccatum quod est contra Deum, est gravissimum: & sub hoc est peccatum quod est contra personam hominis: sub quo est peccatum quod est contra res exteriores, quæ sunt ad usum hominis deputatæ; quod videtur ad avaritiam pertinere.

Alio modo potest attendi gradus peccatorum ex parte boni cui inordinate subditur appetitus humanus; quod quanto minus est, tanto peccatum est deformius: turpius est enim subesse inferiori bono quam superiori. Bonum autem exteriorum rerum est infimum inter humana bona: est enim minus quam bonum corporis, quod etiam minus est quam bonum animæ, quod excedit a bono divino. Et secundum hoc peccatum avaritiæ, quod appetitus humanus subicitur etiam exterioribus rebus, habet quoddammodo deformitatem maiorem.

Quia tamen corruptio, vel privatio boni formaliter se habet in peccato; converso autem ad bonum commutabile materialiter, magis est iudicanda gravitas peccati ex parte boni quod corrumpitur, quam ex parte boni cui subicitur

appetitus. Et ideo dicendum est, quod avaritia non est simpliciter maximum peccatorum.

Ad primum ergo dicendum, quod auctoritates illæ loquuntur de avaritia ex parte boni cui subditur appetitus. Unde & in Eccli. x. 10. pro ratione subditur, quod *avarus suam animam habet venalem*, quia videlicet animam suam, id est vitam suam, expouit periculis pro pecunia: & ideo subdit: *Quoniam in vita sua proiecit*, id est contemplit, *intima sua*, ut scilicet pecuniam lucraretur. Tullius etiam addit, hoc esse *angusti animi*, ut scilicet velit pecuniae subici.

Ad secundum dicendum, quod Augustinus ibi accipit cupiditatem generaliter cuiuscumque temporalis boni, non secundum quod accipitur specialiter pro avaritia: cupiditas enim cuiuscumque temporalis boni est venenum caritatis, in quantum scilicet homo spernit bonum divinum propter hoc quod inhæret bono temporali.

Ad tertium dicendum, quod aliter est insanabile peccatum in Spiritum sanctum, & aliter avaritia. Nam peccatum in Spiritum sanctum est insanabile ex parte contemptus; puta quia homo contemnit vel misericordiam, vel iustitiam divinam, aut aliquid horum per quæ hominis peccata sanantur: & ideo talis insanabilitas pertinet ad maiorem gravitatem peccati. Avaritia vero habet insanabilitatem ex parte defectus humani, in quem scilicet semper procedit humana natura: quia quo aliquis est magis deficiens, eo magis indiget adminiculo exteriorum rerum; & ideo magis in avaritiam labitur. Unde per talem insanabilitatem non ostenditur peccatum esse gravius, sed per hoc est quoddammodo periculosius.

Ad quartum dicendum, quod avaritia comparatur idololatriæ: per quamdam similitudinem, quam habet ad ipsam, quia sicut idololatra subicit se creaturæ exteriori, ita etiam avarus; non tamen eodem modo; sed idololatra quidem subicit se creaturæ exteriori, ut exhibeat ei cultum divinum; avarus autem subicit se creaturæ exteriori immoderate eam concupiscendo ad usum, non tamen ad cultum. Et ideo non oportet quod avaritia habeat tantam gravitatem, quantum habet idololatria.

## ARTICULUS VI. 602

*Utrum avaritia sit peccatum spirituale.*

**A**D sextum sic proceditur. Videtur quod avaritia non sit peccatum spirituale. Peccata enim spiritualia videntur esse circa spiritualia bona. Sed materia avaritiæ sunt bona corporalia, scilicet exteriores divitiæ. Ergo avaritia non est peccatum spirituale.

2. Præterea. Peccatum spirituale contra carnale dividitur. Sed avaritia videtur esse peccatum carnale: sequitur enim corruptionem carnis, ut patet in senibus, qui propter naturæ carnalis defectum in avaritiam incidunt. Ergo avaritia non est peccatum spirituale.

3. Præterea. Peccatum carnale est per quod etiam corpus hominis deordinatur, secundum illud Apostoli I. Corinth. vi. 18. *Qui fornicatur, in corpus suum peccat.* Sed avaritia etiam corporaliter hominem vexat: unde & Chrysostomus Mar. v. comparat avarum dæmoniaco, qui in corpore vexatur (hom. xxix. in Marth. a med.). Ergo avaritia non videtur esse peccatum spirituale.

Sed contra est quod Gregorius XXXI. Moral. (cap. xvii. a med.) computat avaritiam cum vitiis spiritualibus.

Respondeo dicendum, quod peccata præcipue in affectu consistunt. Omnes autem affectiones animæ, sive passionem terminantur ad dilectiones, & tristitias, ut patet per Philosophum in II. Ethic. (cap. v. cir. princ.) Dilectionum autem quædam sunt carnales, & quædam spirituales. Carnales quidem delectationes dicuntur quæ in sensu carnis complentur, sicut delectationes ciborum, & venereorum; delectationes vero spirituales dicuntur quæ complentur in sola animæ apprehensione. Illa ergo peccata dicuntur carnalia quæ perfiuntur in delectationibus carnalibus; illa vero dicuntur spiritualia quæ perfiuntur in spiritualibus delectationibus absque carnali delectatione.

Et huiusmodi est avaritia: delectatur enim avarus in hoc quod considerat se possessorem divitiarum. Et ideo avaritia est peccatum spirituale.

Ad primum ergo dicendum, quod avaritia circa corporale obiectum non quaerit delectationem corporalem, sed solum animalem, prout scilicet homo in hoc delectatur quod divitiis possideat: & ideo non est peccatum carnale. Ratione

tamen obiecti medium est inter peccata pure spiritualia, quæ quaerunt delectationem spirituales circa obiecta spiritualia, (sicut superbia est circa excellentiam) & vitia pure carnalia, quæ quaerunt delectationem pure corporalem circa obiectum corporale.

Ad secundum dicendum, quod motus recipit speciem secundum terminum ad quem, non autem secundum terminum a quo: & ideo vitium dicitur carnale ex hoc quod tendit in delectationem carnalem, non autem ex eo quod procedit ex aliquo defectu carnis.

Ad tertium dicendum, quod Chrysostomus comparat avarum dæmoniaco, non quia vexetur in carne, sicut dæmoniaco; sed per oppositum: quia sicut dæmoniaco ille de quo legitur Marc. v. se denudabat, ita avarus se superfluis divitiis onerat.

## ARTICULUS VII. 602

*Utrum avaritia sit vitium capitale.*

II. dist. xlii. quæst. ix. art. 3. & mal. quæst. viii. art. 1. cor. & quæst. xlii. art. 3.

**A**D septimum sic proceditur. Videtur quod avaritia non sit vitium capitale. Avaritia enim opponitur liberalitati sicut medio, & prodigalitati sicut extremo. Sed neque liberalitas est principalis virtus, neque prodigalitas vitium capitale. Ergo etiam avaritia non debet poni vitium capitale.

2. Præterea. Sicut supra dictum est (1. 2. quæst. lxxxiv. art. 3. & 4.) illa dicuntur esse vitia capitalia quæ habent principales fines, ad quos ordinantur fines aliorum vitiorum. Sed hoc non competit avaritiæ: quia divitiæ non habent rationem finis, sed magis rationem eius quod est ad finem, ut dicitur in I. Ethic. (cap. v. cir. fi.) Ergo avaritia non est vitium capitale.

3. Præterea. Gregorius dicit XV. Moral. (cap. xiv. in princ.) quod avaritia quandoque oritur ex elatione, quandoque ex timore. Dum enim quidam desicere sibi ad sumptum necessaria estimant, mentem ad avaritiam relaxant. Sunt alii qui dum potiores videri appetunt, ad alienarum rerum ambitum succedunt. Ergo avaritia magis oritur ab aliis vitiis, quam ipsa sit vitium capitale respectu aliorum.

Sed contra est quod Gregorius XXXI. Mo-

Moralium ( cap. xviii. a med. ) ponit avaritiam inter vitia capitalia.

Respondeo dicendum, quod, sicut supra dictum est ( in arg. 2. hu. art. ) vitium capitale dicitur ex quo alia vitia oriuntur secundum rationem finis: qui cum sit multum appetibilis, propter eius appetitum homo procedit ad multa faciendi vel bona, vel mala. Finis autem maxime appetibilis est beatitudo, vel felicitas, qui est ultimus finis humanæ vitæ, ut supra habitum est ( 1. 2. quæst. 2. art. 4. 7. & 8. ). Et ideo quanto aliquid magis participat conditiones felicitatis, tanto magis est appetibile. Est autem una de conditionibus felicitatis ut sit per se sufficiens; alioquin non quietaret appetitum tamquam ultimus finis. Sed per se sufficientiam maxime reppromittit divitiæ, ut Boetius dicit in III. de Consol. ( profa lxx. cir. med. ) Cuius ratio est, quia, sicut Philosophus dicit in V. Ethic. ( cap. v. ) *denario utimur quasi fideiussore ad dominia habenda: & Eccl. x. 16. dicitur, quod pecunie obediunt omnia.*

Et ideo avaritia, quæ consistit in appetitu pecunie, est vitium capitale.

Ad primum ergo dicendum, quod virtus perficitur secundum rationem; vitium autem perficitur secundum inclinationem appetitus sensitivi. Non autem ad idem genus principaliter respicit ratio, & appetitus sensitivus: & ideo non oportet quod principale vitium opponatur principali virtuti. Unde licet liberalitas non sit principalis virtus, quia non respicit ad principale bonum rationis; avaritia tamen est principale vitium, quia respicit ad pecuniam, quæ habet quandam principalitatem inter bona sensibilia, ratione iam dicta ( in cor. ar. ) Prodigalitas autem non ordinatur ad aliquem finem principaliter appetibilem, sed magis videtur procedere ex defectu rationis. Unde Philosophus dicit in IV. Ethic. ( cap. 1. a med. ) quod *prodigus magis dicitur vanus quam malus.*

Ad secundum dicendum, quod pecunia ordinatur quidem ad aliud sicut ad finem; inquantum tamen utilis est ad omnia sensibilia acquirenda, continet quodammodo virtute omnia: & ideo habet quandam similitudinem felicitatis, ut dictum est ( in cor. ar. )

Ad tertium dicendum, quod nihil prohibet vitium capitale interdum acqui-

S. Th. Oper. Tom. XXIII.

buiusmodi aliis oriri, ut dictum est ( quæst. xxxvi. art. 4. ad 1. & 1. 2. quæst. lxxxiv. art. 4. ) dum tamen ex eo alia vitia soleant plerumque oriri.

# ARTICULUS VIII. 603

*Utrum proditio, fraus, fallacia, periuria, inquietudo; violentia, & contra misericordiam obduratio, sint avaritiæ filie.*

Sup. quæst. lv. art. 1. & II. dist. xlii. quæst. li. art. 3. & mal. quæst. viii. art. 1. cor. & quæst. xlii. art. 3.

**A**D octavum sic proceditur. Videtur quod non sint avaritiæ filie, quæ dicuntur, scilicet proditio, fraus, fallacia, periuria, inquietudo, violentia, & contra misericordiam obduratio. Avaritia enim opponitur liberalitati, ut dictum est ( art. 3. hu. quæst. ) Proditio autem, fraus, & fallacia opponuntur prudentiæ, periuria religioni, inquietudo spei, vel caritati, quæ quiescit in amato, violentia opponuntur iustitiæ, obduratio misericordiæ. Ergo huiusmodi vitia non pertinent ad avaritiam.

2. Præterea. Proditio, dolus, & fallacia ad idem pertinere videntur, scilicet ad proximi deceptionem. Ergo non debent enumerari tamquam diversæ filie avaritiæ.

3. Præterea. Isidorus ( comment. in Deut. cap. xvi. cir. med. ) ponit novem filias; quæ sunt mendacium, fraus, fur-tum, periurium, & turpis lucris appetitus, falsa testimonia, violentia, inhumanitas, rapacitas. Ergo prima assignatio filiarum fuit insufficiens.

4. Præterea. Philosophus in IV. Ethic. ( cap. 1. a med. ) ponit multa genera vitiorum pertinentium ad avaritiam, quam nominat *illiberalitatem*; videlicet *parcos, renaces, (a) cumini sectores, cimbices, illiberales operationes operantes, & de-mrestricio passus, & usurarios, aleatores, & mortuorum spoliatores, & latrones.* Ergo videtur quod prædicta enumeratio sit insufficiens.

5. Præterea. Tyranni maxime violentias subditis inferunt. Dicit autem Philosophus ibidem, quod *tyrannos civitates desolantes, & sacra prædantes non dicimus illiberales, id est avaros.* Ergo violentia non debet poni filia avaritiæ.

E 3 Sed

(a) Cod. Alcan. chiniabiles, sicut & in solutione Edit. Rom. chiniabiles, liberales (illiberales) operantes operantes &c.

Sed contra est quod Gregorius XXXI. Moral. (cap. xviii. a med.) assignat avaritiæ filias prius enumeratas.

Respondetur dicendum, quod filiae avaritiæ dicuntur vitia quæ ex ipsa oriuntur, & præcipue secundum appetitum finis.

Quia vero avaritia est superfluous amor habendi divitias, in duobus excedit. Primo enim superabundant in retinendo: & ex hac parte oritur ex avaritia *obduratio contra misericordiam*, quia scilicet cor eius misericordia non emollitur, ut de divitiis suis subveniant miseris. Secundo ad avaritiam pertinet superabundare in accipiendo: & secundum hoc avaritia potest considerari dupliciter. Uno modo secundum quod est in affectu: & sic ex avaritia oritur *inquietudo*, in quantum ingerit homini sollicitudinem, & curas superfluas: *avarus enim non implebitur pecunia*, ut dicitur Eccl. v. 9. Alio modo potest considerari in effectu: & sic in acquirendo aliena utitur quandoque quidem vi, quod pertinet ad *violentias*; quandoque autem dolo: qui quidem si fiat in verbo, *fallacia* erit, quantum ad simplex verbum; *perjurium*, si addatur confirmatio iuramenti: si autem dolus committitur opere, sic quantum ad res erit *fraus*, quantum autem ad personas erit *proditio*; ut patet de Iuda, qui ex avaritia prodidit Christum.

Ad primum ergo dicendum, quod non oportet filias alicuius peccati capitalis ad idem genus vitii pertinere: quia ad finem unius vitii possunt ordinari etiam peccata alterius generis: aliud est enim peccatum habere filias, & peccatum habere species.

Ad secundum dicendum, quod illa tria distinguuntur, sicut dictum est (in eor. art.)

Ad tertium dicendum, quod illa novem reducuntur ad septem prædicta: nam mendacium, & falsum testimonium continentur sub fallacia: falsum enim testimonium est quædam specificatio mendacii; sicut & furtum est quædam specificatio fraudis, unde sub fraude continentur: appetitus autem turpis lucri pertinet ad inquietudinem: rapacitas autem continetur sub violentia, cum sit species eius: inhumanitas autem est idem quod obduratio contra misericordiam.

Ad quartum dicendum, quod illa quæ ponit Aristoteles, sunt illiberalitatis, vel avaritiæ species magis quam filiae. Potest enim aliquis dici illiberalis, vel avarus ex eo quod deficit in dando: & si

quidem parum det, vocatur *parcus*; si autem nihil, *tenax*; si autem cum magna difficultate det, vocatur *cumini-bilis*, quasi *cumini venditor*, quia de parvis magnam vim facit. Quandoque autem aliquis dicitur illiberalis, vel avarus, quia excedit in accipiendo: & hoc dupliciter. Uno modo quia turpiter lucratur vel villia, & servilia opera exercendo per illiberales operationes; vel quia de aliquibus vitiosis actibus lucratur, sicut de meretricio, vel de aliquo huiusmodi; vel quia lucratur de eo quod gratis oportet concedere, sicut usurarii; vel quia lucratur parva cum magno labore. Alio modo quia iniuste lucratur; vel vivis vim inferendo, sicut latrones; vel mortuos spoliando; vel ab amicis auferendo, sicut aleatores.

Ad quintum dicendum, quod sicut liberalitas est circa mediocres pecunias, ita & illiberalitas. Unde tyranni, qui magna per violentiam auferunt, non dicuntur illiberales, sed iniusti.

## QUAESTIO CXIX.

De prodigalitate,

in tres articulos divisa.

**D**Einde considerandum est de prodigalitate: & circa hoc quaeruntur tria.

Primo, utrum prodigalitas avaritiæ opponatur.

Secundo, utrum prodigalitas sit peccatum.

Tertio, utrum sit gravius peccatum quam avaritia.

## ARTICULUS I. 604

Utrum prodigalitas opponatur avaritiæ.

Sup. quæst. cxviii. art. 3. ad 3. & inf. art. 2. & 3. cor.

**A**D primum sic proceditur. Videtur quod prodigalitas non opponatur avaritiæ. Opposita enim non possunt simul esse in eodem. Sed aliqui sunt simul prodigi, & avari. Ergo prodigalitas non opponitur avaritiæ.

2. Præterea. Opposita sunt circa idem. Sed avaritia, secundum quod opponitur liberalitati, est circa passiones quasdam, quibus homo afficitur ad pecuniam; pro-

digalitas autem non videtur esse circa aliquas animæ passiones: non enim afficitur circa pecunias, nec circa aliquid aliud huiusmodi. Non ergo prodigalitas opponitur avaritiæ.

3. Præterea. Peccatum principaliter recipit speciem a fine, ut supra habitum est (1. 2. quæst. lxxii. art. 3.) Sed prodigalitas semper videtur ordinari ad aliquem finem illicitum, propter quem sua bona expendat, & præcipue propter voluptates: unde & Luc. xv. 13. dicitur de filio prodigo, quod *dissepavit substantiam suam luxuriose vivendo*. Ergo videtur quod prodigalitas magis opponatur temperantiæ, & insensibilitati, quam avaritiæ, & liberalitati.

Sed contra est quod Philosophus in II. Eth. (cap. vii.) & in IV. (cap. i. a med.) ponit prodigalitatem oppositam liberalitati, & illiberalitati, quam nunc avaritiam dicimus.

Respondeo dicendum, quod in moralibus attenditur oppositio vitiorum ad invicem, & ad virtutem secundum superabundantiam, & defectum. Differunt autem avaritia, & prodigalitas secundum superabundantiam, & defectum diversimode. Nam in affectione divitiarum avarus superabundat, plus debito eas diligens; prodigus autem deficit, minus debito earum sollicitudinem gerens. Circa exteriora vero ad prodigalitatem pertinet excedere quidem in dando, deicere autem in retinendo, & acquirendo: ad avaritiam autem pertinet e contrario deficere quidem in dando, superabundare autem in accipiendo, & retinendo.

Unde patet quod prodigalitas avaritiæ opponitur.

Ad primum ergo dicendum, quod nihil prohibet eidem inesse opposita secundum diversa. Ab illo tamen aliquid magis denominatur quod inest principaliter. Sicut autem in liberalitate, quæ medium tenet, præcipua est datio, ad quam acceptio, & retentio ordinantur; ita etiam avaritia, & prodigalitas præcipue attenduntur secundum dationem. Unde ille qui superabundat in dando, vocatur *prodigus*; qui autem deficit in dando, vocatur *avarus*. Contingit autem quandoque quod aliquis deficit in dando, qui tamen non excedit in accipiendo, ut Philosophus dicit in IV. Ethic. (cap. i. a med.) Similiter etiam contingit quod aliquis excedat in dando, & ex hoc est prodigus; & simul cum hoc excedat in

accipiendo: vel ex quadam necessitate: quia dum superabundat in dando, deficiunt ei propria bona, unde cogitur indebite acquirere, quod pertinet ad avaritiam: vel etiam propter animi inordinatorem: dum enim non dat propter bonum, quasi contempta virtute, non curat undecumque, & qualitercumque accipiat: & sic non secundum idem est prodigus, & avarus.

Ad secundum dicendum, quod prodigalitas attenditur circa passiones pecuniæ, non sicut superabundans in eis, sed sicut deficiens.

Ad tertium dicendum, quod prodigi non semper abundant in dando propter voluptates, circa quas est intemperantia; sed quandoque quidem ex eo quod taliter sunt dispositi ut divitias non curent, quandoque autem propter aliquid aliud. Ut frequentius tamen ad intemperantiam declinant: tum quia ex quo superflue expendunt in aliis, etiam in rebus voluptuosis expendere non verentur, ad quas magis inclinat concupiscentia carnis: tum etiam quia ex quo non delectantur in bonis virtutum, querunt sibi corporales delectationes. Et inde est quod Philosophus in IV. Eth. (cap. i. a med.) dicit, quod *multi prodigorum fiunt intemperati*.

## ARTICULUS II. 605

*Utrum prodigalitas sit peccatum.*

*Inf. art. 3. ad 3.*

**A**D secundum sic proceditur. Videtur quod prodigalitas non sit peccatum. Dicit enim Apostolus, 1. ad Tim. ult. 10. *Radix omnium malorum est cupiditas*. Sed non est radix prodigalitati, quæ ei opponitur. Ergo prodigalitas non est peccatum.

2. Præterea. Apostolus I. ad Tim. ult. 17. dicit: *Divitiis huius sæculi præcipe facile tribuere, communicare*. Sed hoc maxime facit prodigi. Ergo prodigalitas non est peccatum.

3. Præterea. Ad prodigalitatem pertinet superabundare in datione, & deicere in sollicitudine divitiarum. Sed hoc maxime convenit viris perfectis, implentibus quod Dominus dicit Matth. vi. 34. *Nolite solliciti esse in crastinum*: & Matth. xix. 21. *Vende omnia quæ habes, & da pauperibus*. Ergo prodigalitas non est peccatum.

Sed contra est quod filius prodigus viceratur de sua prodigalitate.

Respondeo dicendum, quod, sicut dictum est (art. præc.) prodigalitas opponitur avaritiæ secundum oppositionem superabundantiæ, & defectus. Medium autem virtutis per utrumque horum corrumpitur. Ex hoc autem est aliquid vitiosum, & peccatum, quod corrumpit bonum virtutis.

Unde relinquitur quod prodigalitas sit peccatum.

Ad primum ergo dicendum, quod illud verbum Apostoli quidam exponunt non de cupiditate actuali, sed de quadam habituali cupiditate, quæ est concupiscentia fomitis, ex qua omnia peccata oriuntur. Alii vero dicunt, quod loquitur de cupiditate generali respectu cuiuscunque boni: & sic manifestum est quod etiam prodigalitas ex cupiditate oritur: prodigus enim aliquid bonum temporale cupit consequi inordinate, vel placere aliis, vel saltem satisfacere suæ voluntati in dando. Sed si quis recte consideret, Apostolus loquitur ibi ad litteram de cupiditate divitiarum: nam supra præmiserat: *Qui volunt divites fieri* &c. Et sic dicitur esse avaritia radix omnium malorum, non quia omnia mala semper ex avaritia oriuntur, sed quia nullum malum est quod non interdum oriatur ex avaritia. Unde & prodigalitas quandoque ex avaritia nascitur; sicut cum aliquis prodigæ multa consumit intentione captandi favorem aliquorum, a quibus divitias accipiat.

Ad secundum dicendum, quod Apostolus monet divites ut facile tribuant, & communicent sua, secundum quod oportet: quod non faciunt prodigi: quia, ut Philosophus dicit in IV. Ethic. (cap. 1. post med.) *donationes eorum non sunt bonæ, neque boni gratia, neque secundum quod oportet; sed quandoque dant multa illis quos oportet pauperes esse, scilicet distributionibus, & adulatoriis; boni autem nihil dant.*

Ad tertium dicendum, quod super-excessus prodigalitaris non attenditur principaliter secundum quantitatem dati, sed magis in quantum excedit id quod fieri oportet. Unde quandoque liberalis majora dat quam prodigus, si necessarium sit. Sic ergo dicendum est, quod illi qui intentione sequendi Christum omnia sua dant, & ab animo suo omnem temporalium sollicitudinem remouent,

non sunt prodigi, sed perfecte liberales.

### ARTICULUS III. 606

*Utrum prodigalitas sit gravius peccatum quam avaritia.*

*Sup. quæst. cxvii. art. 2. cor. & quæst. cxviii. art. 3. ad 3. & mal. quæst. xlii. art. 2. ad 10. & IV. Eth. lect. 4. per 101. & lect. 5. fin.*

**A**D tertium sic proceditur. Videtur quod prodigalitas sit gravius peccatum quam avaritia. Per avaritiam enim aliquis nocet proximo, cui bona sua non communicat; per prodigalitatem autem quis sibiipsi nocet: dicit enim Philosophus in IV. Ethic. (cap. 1. circa princ.) *quod corruptio divitiarum, per quas homo vivit, est quædam ipsius esse perditio.* Gravius autem peccat qui sibiipsi nocet, secundum illud Eccli. xiv. 5. *Qui sibi nequam est, cui bonus erit?* Ergo prodigalitas est gravius peccatum quam avaritia.

Præterea. Inordinatio quæ provenit cum aliqua conditione laudabili, minus est vitiosa. Sed inordinatio avaritiæ quandoque est cum aliqua laudabili conditione; ut patet in illis qui nolunt sua expendere, ne cogantur aliena accipere: prodigalitaris autem inordinatio provenit cum conditione vituperabili: unde & prodigalitatem attribuiamus intemperatis hominibus, ut Philosophus dicit in IV. Ethic. (cap. 1.) Ergo prodigalitas est gravius peccatum quam avaritia.

Præterea. Prudentia præcipua est inter morales virtutes, ut supra habitum est (quæst. lvi. art. 1. ad 1. & 1. 2. quæst. lxi. art. 2. ad 1.) Sed prodigalitas magis opponitur prudentiæ quam avaritia: dicitur enim Proverb. xxi. 20. *Thesaurus desiderabilis, & oleum in habitaculo iusti, & imprudens homo dissipabit illud:* & Philosophus dicit in IV. Ethic. (cap. 1. a med.) *quod insipientis est superabundanter dare, & non accipere.* Ergo prodigalitas est gravius peccatum quam avaritia.

Sed contra est quod Philosophus dicit in IV. Ethicor. (ibid.) *quod prodigus multo videtur melior liberali.*

Respondeo dicendum, quod prodigalitas secundum se considerata minus peccatum est quam avaritia: & hoc triplici ratione.

Primo quidem quia avaritia magis differt a virtute opposita: magis enim ad liberalem pertinet dare, in quo superabundat prodigus, quam accipere, vel retinere, in quo superabundat avarus. Secundo quia prodigus est multis utilis, quibus dat; avarus autem nulli, sed nec sibi ipsi, ut dicitur in IV. Ethic. (loc. cit.) Tertio quia prodigalitas est facile sanabilis; & per hoc quod declinat ad aetatem senectutis, quæ est contraria prodigalitati; & per hoc quod pervenit ad egestatem de facili, dum multa inutiliter consumit, & sic pauper factus non potest in dando superabundare; & etiam quia de facili perducitur ad virtutem, propter similitudinem quam habet ad ipsam. Sed avarus non de facili sanatur, ratione supradicta (quaest. præc. art. 5. ad 3.)

Ad primum ergo dicendum, quod differentia prodigi, & avari non attenditur secundum hoc quod est peccare in seipsum, & in alium. Nam prodigus peccat in seipsum, dum bona sua consumit, unde vivere deberet: peccat etiam in alterum consumendo bona, ex quibus aliis deberet providere. Et præcipue hoc apparet in clericis, qui sunt dispensatores bonorum Ecclesiæ, quæ sunt pauperum, quos defraudant, prodige expendendo. Similiter & avarus peccat in alios, in quantum deficit in donationibus: peccat & in seipsum, in quantum deficit in sumptibus: unde dicitur Eccle. vii. 2. *Vir cui Deus dedit divitias, nec tribuit ei potestatem ut comedat ex eis*. Sed tamen in hoc superabundat prodigus: quia sic sibi, & quibusdam aliis nocet, quod tamen aliquibus prodest. Avarus autem nec aliis, nec sibi prodest: quia non audet uti etiam ad suam utilitatem bonis suis.

Ad secundum dicendum, quod cum de vitis communiter loquimur, iudicamus de eis secundum proprias rationes ipsorum; sicut circa prodigalitatem attendimus, quod superflue consumit divitias; circa avaritiam vero, quod superflue eas retinet. Quod autem quidam propter intemperantiam superflue consumat, hoc iam nominat simul peccata multa: unde & tales prodigi sunt peiores, ut dicitur in IV. Ethic. (cap. 1. post princ.) Quod autem illiberalis, sive avarus abstineat ab accipiendis alienis, etsi in se laudabile videatur, tamen ea causa propter quam facit, vituperabile est; dum ideo non vult ab aliis accipere, ne cogatur aliis dare.

Ad tertium dicendum, quod omnia vitia prudentiæ opponuntur, sicut & omnes virtutes a prudentia diriguntur: & ideo vitium ex hoc ipso quod opponitur soli prudentiæ, levius reputatur.

## QUAESTIO CXX.

*De (a) epicheia, seu aequitate,  
in duos articulos divisa.*

**D**Einde considerandum est de epicheia: circa quam quaeruntur duo. Primo, utrum epicheia sit virtus. Secundo, utrum sit pars iustitiæ.

## ARTICULUS I. 607

*Utrum epicheia sit virtus.*

*Inf. quaest. cxxviii. art. 1. ad 6. & III. dist. xxxviii. art. 4. cor. fin. & V. Ethic. lect. 16.*

**A**D primum sic proceditur. Videtur quod epicheia non sit virtus. Nulla enim virtus aufert aliam virtutem. Sed epicheia aufert aliam virtutem, quia tollit id quod iustum est secundum legem, & opponi videtur severitati. Ergo epicheia non est virtus.

2. Præterea. Augustinus dicit in Lib. de vera religione (cap. xxxi. ad fin.) *In istis temporalibus legibus quamquam de his homines iudicant, cum eas instituit; tamen cum fuerint institutæ, & firmatæ, non licebit iudici de ipsis iudicare, sed secundum ipsas*. Sed epicheia videtur iudicare de lege, quando eam existimat non esse servandam in aliquo casu. Ergo epicheia magis est vitium quam virtus.

3. Præterea. Ad epicheiam videtur pertinere ut attendat ad intentionem legislatoris, ut Philosophus dicit in V. Ethic. (cap. x) Sed interpretari intentionem legislatoris ad solum Principem pertinet: unde Imperator dicit in Codice de legibus, & constitutionibus Princ. (lege 1.) *Inter aequitatem, inique interpretationem interpretationem nobis solis & oportet, & licet inspicere*. Ergo actus epicheiæ non est licitus. Ergo epicheia non est virtus.

Sed contra est quod Philosophus in V. Ethic. (loc. cit.) ponit eam virtutem.

Respondendo dicendum, quod, sicut supra dictum est (1. 2. quaest. xcvi. art. 6.) cum de legibus ageretur, quia humani actus, de quibus leges dantur, in singula-

(a) Ita editi recentiores passim, veteres epicheia, mss. epikhaia aliquæ.

laribus contingentibus consistunt, quæ infinitis modis variari possunt; non tunc possibile aliquam regulam legis institui quæ in nullo casu dederet; sed legislatores attendunt ad id quod in pluribus accidit, secundum hoc legem ferentes. quam tamen in aliquibus casibus servare, est contra æqualitatem iustitiæ, & contra commune bonum, quod lex intendit: sicut lex instituit quod deposita reddantur, quia hoc ut in pluribus iustum est; contingit tamen aliquando esse nocivum; puta si furiosus deposuit gladium, & eum reposcat, dum est in iuria; vel si aliquis reposcat depositum ad patriæ impugnationem. In his ergo, & similibus casibus malum est sequi legem positam; bonum autem est, prætermisissimis verbis legis, sequi id quod pollicetur iustitiæ ratio, & communis utilitas. Et ad hoc ordinatur epicheia, quæ apud nos dicitur æquitas.

Unde patet quod epicheia est virtus.

Ad primum ergo dicendum, quod epicheia non deserit iustum simpliciter, sed iustum quod est lege determinatum: nec etiam opponitur veritati, quæ sequitur (a) veritatem legis in quibus oportet. Sequi autem verba legis in quibus non oportet, vitiosum est. Unde dicitur in Codice de legibus, & const. Princ. (leg. v.) *Non dubium est in legem committere eum qui verba legis amplexus, contra legislatoris nititur voluntatem.*

Ad secundum dicendum, quod ille de lege iudicat qui dicit eam non esse bene positam; qui vero dicit verba legis non esse in hoc casu servanda, non iudicat de lege, sed de aliquo negotio particulari quod occurrit.

Ad tertium dicendum, quod interpretatio locum habet in dubiis, in quibus non licet abique determinatione Principis a verbis legis recedere; sed in manifestis non est opus interpretatione, sed executione.

## ARTICULUS II. 603

*Utrum epicheia sit pars iustitiæ.*

Sup. quæst. lxxx. art. 1. ad 5. & III. dist. xxxiii. quæst. xii. art. 3. quæst. 5. cor. & ad 5. & V. Eth. lect. 16.

**A**d secundum sic proceditur. Videtur quod epicheia non sit pars iustitiæ. Ut enim patet ex supradictis (quæst. lviii. art. 7.) duplex est iustitia, una parti-

cularis, alia legalis. Sed epicheia non est pars iustitiæ particularis, quia se extendit ad omnes virtutes, sicut & iustitia legalis: similiter etiam non est pars iustitiæ legalis, quia operatur præter id quod lege positum est. Ergo videtur quod epicheia non sit pars iustitiæ.

2. Præterea. Virtus principalior non assignatur virtuti minus principali ut pars: cardinalibus enim virtutibus, quasi principalibus, assignantur secundariæ virtutes ut partes. Sed epicheia videtur esse principalior virtus quam iustitia, ut ipsum nomen sonat: dicitur enim ab (ἐπι) epi, quod est supra, & (δικαιο) dikeon, quod est iustum. Ergo epicheia non est pars iustitiæ.

3. Præterea. Videtur quod epicheia sit idem quod modestia. Nam ubi Apostolus ad Philip. iv. 5. dicit, *Modestia vestra nota sit omnibus hominibus*, in Græco habetur *ἐνίκεια*. Sed secundum Tullium (Lib. II. de invent. aliquant. ante fin.) modestia est pars temperantiæ. Ergo epicheia non est pars iustitiæ.

Sed contra est quod Philosophus dicit in V. Ethic. (cap. x.) quod *epicheia est quoddam iustum*.

Respondeo dicendum, quod, sicut supra dictum est (quæst. xlviii.) virtus aliqua triplicem habet partem, scilicet partem subiectivam, partem integram, & partem potentialem. Pars autem subiectiva est de qua essentialiter prædicatur totum; & est minus. Quod quidem contingit dupliciter: quandoque enim aliquid prædicatur de pluribus secundum unam rationem, sicut animal de equo, & bove: quandoque autem prædicatur secundum prius, & posterius, sicut ens prædicatur de substantia, & accidente. Epicheia ergo est pars iustitiæ communiter dictæ, tamquam iustitia quædam existens, ut Philosophus dicit in V. Eth. (loc. cit.) Unde patet quod epicheia est pars subiectiva iustitiæ; & de ea iustitia dicitur per prius quoniam de legali: nam legalis iustitia dirigitur secundum epicheiam. Unde epicheia est quasi superior regula humanorum actuum.

Ad primum ergo dicendum, quod epicheia correspondet proprie iustitiæ legali, & quodammodo continetur sub ea, & quodammodo excedit eam. Si enim iustitia legalis dicatur quæ obtemperat legi sive quantum ad verba legis, sive quantum ad intentionem legislatoris, quæ prior est, sit epicheia est pars posterior.

(a) Ita mss. & editi communiter. Alii: verba legis.



legalis iustitiæ. Si vero iustitia legalis dicatur solum quæ obtemperat legi secundum verba legis, sic epicheia non est pars legalis iustitiæ, sed est pars iustitiæ communiter dictæ, divisa contra iustitiam legalem, sicut excedens ipsam.

Ad secundum dicendum, quod, sicut Philosophus dicit in V. Ethic. (cap. x.) *epicheia est melior quâdam iustitia*, scilicet legali, quæ observat verba legis: quia tamen & ipsa est iustitia quædam, non est melior omni iustitia.

Ad tertium dicendum, quod ad epicheiam pertinet aliquid moderari, scilicet observantiam verborum legis. Sed modestia, quæ ponitur pars temperantiæ, moderatur exteriorem hominis vitam, puta in incessu, vel habitu, vel aliis huiusmodi. Potest tamen esse quod nomen epicheiæ apud Græcos per quamdam similitudinem transferatur ad omnes moderationes.

## QUAESTIO CXXI.

*De pietate,  
in duos articulos divisa.*

**D**Einde considerandum est de dono correspondente iustitiæ, scilicet de pietate: circa quam quæruntur duo.

Primo, utrum sit donum Spiritus sancti.

Secundo, quid in beatitudinibus, & fructibus ei correspondeat.

## ARTICULUS I. 609

*Utrum pietas sit donum.*

III. dist. xliii. quæst. iiii. art. 2. quæst. i.

**A**D primum sic proceditur. Videtur quod pietas non sit donum. Dona enim a virtutibus differunt, ut supra habitum est (1. 2. quæst. lxxviii. art. 1.) Sed pietas est quædam virtus, ut supra dictum est (quæst. ci. art. 3.) Ergo pietas non est donum.

2. Præterea. Dona excellentiora sunt virtutibus, maxime moralibus, ut supra habitum est (1. 2. quæst. lxxviii. art. 8.) Sed inter partes iustitiæ religio est potior pietate. Ergo si aliqua pars iustitiæ debeat poni donum, videtur quod magis religio debeat esse donum quam pietas.

3. Præterea. Dona manent in patria, & actus donorum, ut supra habitum est (1. 2. quæst. lxxviii. art. 6.) Sed actus pietatis non potest manere in patria: di-

citur enim Gregorius I. Mor. (cap. xv. ante med.) quod *pietas cordis viscera misericordiae operibus replet*: & sic non erit in patria, ubi nulla erit miseria. Ergo pietas non est donum.

Sed contra est quod Isaïæ xi. ponitur inter dona.

Respondeo dicendum, quod, sicut supra dictum est (1. 2. quæst. lxxviii. art. 1. & quæst. lxxx. art. 1. & 3.) dona Spiritus sancti sunt quædam habituales animæ dispositiones, quibus est prompte mobilis a Spiritu sancto. Inter cetera autem movet nos Spiritus sanctus ad hoc quod affectum quemdam filialem habeamus ad Deum, secundum illud Rom. viii. 25. *Acceptis spiritum adoptionis filiorum, in quo clamamus, Abba, pater.*

Et quia ad pietatem proprie pertinet officium, & cultum patri exhibere, consequens est quod pietas, secundum quam cultum, & officium exhibemus Deo ut patri per insinctum Spiritus sancti, sit Spiritus sancti donum.

Ad primum ergo dicendum, quod pietas quæ exhibet patri carnali officium, & cultum, est virtus; sed pietas, quæ est donum, hoc exhibet Deo ut patri.

Ad secundum dicendum, quod exhibere cultum Deo ut creatori, quod facit religio, est excellentius quam exhibere cultum patri carnali, quod facit pietas, quæ est virtus; sed exhibere cultum Deo ut patri, est adhuc excellentius quam exhibere cultum Deo ut creatori, & domino. Unde religio est potior pietatis virtute; sed pietas, secundum quod est donum, est potior religione.

Ad tertium dicendum, quod sicut per pietatem, quæ est virtus, exhibet homo officium, & cultum non solum patri carnali, sed etiam omnibus sanguine iunctis, secundum quod pertinent ad patrem; ita etiam pietas, secundum quod est donum, non solum exhibet cultum, & officium Deo, sed etiam omnibus hominibus, in quantum pertinent ad Deum. Et propter hoc ad ipsam pertinet honorare Sanctos, non contradicere Scripturæ sive intellectæ, sive non intellectæ, sicut Augustinus dicit in II. Lib. de doctr. christ. (cap. vii. circ. princ.) Ipsa etiam ex consequenti subvenit in miseria constitutis. Et quavis iste actus non habeat locum in patria, præcipue post diem iudicii; habebit tamen locum præcipuus actus eius, qui est revereri Deum affectu filiali: quod præcipue tunc erit, secundum illud Sap. v. 3. *Eccē quomodo computati sunt*

*sunt inter filios Dei.* Erit etiam mutua honoratio Sanctorum ad invicem. Nunc autem ante diem iudicii miserentur Sancti etiam eorum qui in statu huius miserie vivunt.

## ARTICULUS II. 610

*Utrum dono pietatis respondeat secunda beatitudo, scilicet Beati mites.*

*Sup. quest. lxxxiii. art. 9. ad 3. & 1.  
2. quest. lxx. art. 3. ad 3. & III.  
dist. xxxiv. quest. 1. art. 4. & 6. & Matib. v.*

**A**D secundum sic proceditur. Videtur quod dono pietatis non respondeat secunda beatitudo, scilicet *Beati mites*. Pietas enim est donum respondens iustitiæ; ad quam magis pertinet quarta beatitudo, scilicet *Beati qui esurunt, & sitiunt iustitiam*; vel etiam quinta beatitudo, videlicet *Beati misericordes*: quia, ut dictum est (art. præc. arg. 3) opus misericordiæ pertinet ad pietatem. Non ergo secunda beatitudo pertinet ad donum pietatis.

2. Præterea. Donum pietatis dirigitur dono scientiæ, quod adiungitur in connumeratione donorum Isa. xi. Ad idem autem se extendunt dirigens, & exequens. Cum ergo ad scientiam pertineat tertia beatitudo, scilicet *Beati qui lugent*, videtur quod non pertineat ad pietatem secunda beatitudo.

3. Præterea. Fructus respondent beatitudinibus, & donis, ut supra habitum est (1. 2. quest. lxx. art. 2.) Sed inter fructus bonitas, & benignitas magis videntur convenire cum pietate quam mansuetudo, quæ pertinet ad mititatem. Ergo secunda beatitudo non respondet dono pietatis.

Sed contra est quod Augustinus dicit in Lib. I. de serm. Dom. in monte (cap. 1v. parum a princ.) *Pietas congruit mitibus.*

Respondeo dicendum, quod in adaptione beatitudinum ad dona duplex convenientia potest attendi. Una quidem secundum rationem ordinis; quam videtur Augustinus fuisse secutus: unde primam beatitudinem attribuit infimo dono, scilicet timoris; secundam autem, scilicet *Beati mites*, attribuit pietati; & sic de aliis.

Alia convenientia potest attendi secundum propriam rationem doni, & beati-

tudinis: & secundum hoc oportet ad aptare beatitudines donis secundum obiecta, & actus: & ita pietati magis responderet quarta, & quinta beatitudo, quam secunda; secunda tamen beatitudo habet aliquam convenientiam cum pietate, in quantum scilicet per mansuetudinem tolluntur impedimenta actuum pietatis.

Et per hoc patet responsio ad primum. Ad secundum dicendum, quod secundum proprietatem beatitudinum, & donorum, oportet quod eadem beatitudo respondeat scientiæ, & pietati; sed secundum rationem ordinis diversæ beatitudines eis adaptantur, observata tamen aliquali convenientia, ut supra dictum est (in cor. art.)

Ad tertium dicendum, quod bonitas, & benignitas in fructibus directe attribui possunt pietati; mansuetudo autem indirecte, in quantum tollit impedimenta actuum pietatis, ut dictum est (in corp. art.)

## QUAESTIO CXXII.

*De præceptis iustitiæ,  
in sex articulos divisa.*

**D**Einde considerandum est de præceptis iustitiæ: & circa hoc quaeruntur sex.

Primo, utrum præcepta Decalogi sint præcepta iustitiæ.

Secundo de primo præcepto Decalogi.

Tertio de secundo.

Quarto de tertio.

Quinto de quarto.

Sexto de aliis sex.

## ARTICULUS I. 611

*Utrum præcepta Decalogi sint præcepta iustitiæ.*

*Sup. quest. lvi. art. 1. ad 1. & art. 2. & quest. cxl. art. 1. ad 3. & quest. cxlviii. art. 2. ad 1. & 1. & 2. & 3. & 4. & 5. & 6. & 7. & 8. & 9. & 10. & 11. & 12. & 13. & 14. & 15. & 16. & 17. & 18. & 19. & 20. & 21. & 22. & 23. & 24. & 25. & 26. & 27. & 28. & 29. & 30. & 31. & 32. & 33. & 34. & 35. & 36. & 37. & 38. & 39. & 40. & 41. & 42. & 43. & 44. & 45. & 46. & 47. & 48. & 49. & 50. & 51. & 52. & 53. & 54. & 55. & 56. & 57. & 58. & 59. & 60. & 61. & 62. & 63. & 64. & 65. & 66. & 67. & 68. & 69. & 70. & 71. & 72. & 73. & 74. & 75. & 76. & 77. & 78. & 79. & 80. & 81. & 82. & 83. & 84. & 85. & 86. & 87. & 88. & 89. & 90. & 91. & 92. & 93. & 94. & 95. & 96. & 97. & 98. & 99. & 100.*

**A**D primum sic proceditur. Videtur quod præcepta Decalogi non sint præcepta iustitiæ. Intentio enim legislatoris est cives facere virtuosos secundum omnem virtutem, ut dicitur in II. Ethic. (cap. 1. cir. med.) unde & V. Ethic. (cap. 1. a. med.) dicitur, quod *lex præcipit de omnibus actibus omnium virtutum*. Sed præcepta Decalogi sunt prima prin-

cipia totius divinae legis. Ergo praecepta Decalogi non pertinent ad solam iustitiam.

2. Præterea. Ad iustitiam videntur pertinere praecepta praecepta iudicialia, quæ contra moralia dividuntur, ut supra habitum est (1. 2. quæst. xcix. art. 4.) Sed praecepta Decalogi sunt praecepta moralia, ut ex dictis patet (1. 2. quæst. c. art. 3.) Ergo praecepta Decalogi non sunt praecepta iustitiæ.

3. Præterea. Lex praecepta tradit praecepta de actibus iustitiæ pertinentibus ad bonum commune, puta de officiis publicis, & aliis huiusmodi. Sed de his non fit mentio in praeceptis Decalogi. Ergo videtur quod praecepta Decalogi non pertineant proprie ad iustitiam.

4. Præterea. Praecepta Decalogi distinguuntur in duas tabulas, secundum dilectionem Dei, & proximi, quæ pertinent ad virtutem caritatis. Ergo praecepta Decalogi magis pertinent ad caritatem quam ad iustitiam.

Sed contra est quod iustitia sola videtur esse virtus per quam ordinamur ad alterum. Sed per omnia praecepta Decalogi ordinamur ad alterum, ut patet diccurrenti per singula. Ergo omnia praecepta Decalogi pertinent ad iustitiam.

Respondetur dicendum, quod praecepta Decalogi sunt prima principia legis, & quibus statim ratio naturalis assentit, sicut manifestissimis principiis. Manifestissime autem ratio debiti, quæ requiritur ad praeceptum, apparet in iustitia, quæ est ad alterum: quia in his quæ sunt ad seipsum, videtur primo aspectu quod homo sit sui dominus, & quod liceat ei facere quodlibet; sed in his quæ sunt ad alterum, manifeste apparet quod homo est alteri obligatus ad reddendum ei quod debet.

Et ideo praecepta Decalogi oportuit ad iustitiam pertinere. Unde tria prima praecepta sunt de actibus religionis, quæ est potissima pars iustitiæ; quartum autem praeceptum est de actibus pietatis, quæ est pars iustitiæ secunda; alia vero sex dantur de actibus iustitiæ communiter dictæ, quæ inter æquales attenditur.

Ad primum ergo dicendum, quod lex intendit omnes homines facere virtuosos, sed ordine quodam, ut scilicet prius tradat eis praecepta de his in quibus est manifestior ratio debiti, ut dictum est (in corp. art.)

Ad secundum dicendum, quod iudicia-

lia praecepta sunt quædam determinationes moralium praeceptorum, prout ordinantur ad proximum; sicut & ceremonialia sunt quædam determinationes praeceptorum moralium, prout ordinantur ad Deum. Unde neutra praecepta continentur in Decalogo; sunt tamen determinationes praeceptorum Decalogi, & sic ad iustitiam pertinent.

Ad tertium dicendum, quod ea quæ pertinent ad bonum commune, oportet diversimode dispensari secundum hominum diversitatem: & ideo non fuerunt ponenda inter praecepta Decalogi, sed inter praecepta iudicialia.

Ad quartum dicendum, quod praecepta Decalogi pertinent ad caritatem sicut ad finem, secundum illud I. ad Tim. 3. 5. *Finis praecepti est caritas*; sed ad iustitiam pertinent, inquantum immediate sunt de actibus iustitiæ.

## ARTICULUS II. 613

*Utrum primum praeceptum Decalogi convenienter tradatur.*

1. 2. quæst. cx. art. 6. & 7. & III. dist. xxxvi. quæst. 11.

**A**D secundum sic proceditur. Videtur quod primum praeceptum Decalogi inconvenienter tradatur. Magis enim homo est obligatus Deo quam patri carnali, secundum illud ad Heb. xix. 9. (a) *Quanto magis obtemperabimus patri spirituum, & vivemus?* Sed praeceptum pietatis, qua honoratur pater, ponitur affirmative, cum dicitur: *Honora patrem tuum, & matrem tuam.* Ergo multo magis primum praeceptum religionis, qua honoratur Deus, debuit proponi affirmative; præsertim cum affirmatio naturaliter sit prior negatione.

2. Præterea. Primum praeceptum Decalogi ad religionem pertinet, ut dictum est (art. præc.) Sed religio, cum sit una virtus, habet unum actum. In primo autem praecepto prohibentur tres actus: nam primo dicitur: *Non habebis deos alienos coram me*: secundo dicitur: *Non facies tibi sculptile*: tertio vero: *Non adorabis ea, neque coles.* Ergo inconvenienter traditur primum praeceptum.

3. Præterea. Augustinus dicit in Lib. de decem cordis (cap. ix. a med.) quod *per primum praeceptum excluditur vitium superstitionis*. Sed multæ sunt aliæ noxiæ superstitiones præter idololatriam, ut

(a) *Valgata*: Non multo magis &c.

supra dictum est (quaest. xcii. art. 2.) Indulgentius ergo prohibetur sola idololatria.

In contrarium est Scripturae auctoritas.

Respondeo dicendum, quod ad legem pertinet facere homines bonos: & ideo oportet praecepta legis ordinari secundum ordinem generationis, qua scilicet fit homo bonus. In ordine autem generationis duo sunt attendenda. Quorum primum est quod prima pars primo constituitur; sicut in generatione animalis primo generatur cor, & in domo primo ponitur fundamentum, & in bonitate animae prima pars est bonitas voluntatis, ex qua aliquis homo bene utitur qualibet alia bonitate. Bonitas autem voluntatis attenditur ad obiectum suum, quod est finis: & ideo in eo qui erat per legem instituendus ad virtutem, primo oportuit quasi iacere quoddam fundamentum religionis, per quam homo debere ordinatur in Deum, qui est ultimus finis humanae voluntatis.

Secundo attendendum est in ordine generationis quod primo contraria, & impedimenta tolluntur; sicut agricola primo purgat agrum, & postea proicit semina, secundum illud Hierem. iv. 3. *Novate vobis novale, & nolite ferere (a) super spinas.* Et ideo circa religionem primo homo erat instituendus, ut impedimenta verae religionis excluderet. Praecipuum autem impedimentum religionis est quod homo falso deo inhaereat, secundum illud Matth. vi. 24. *Non potestis Deo servire, & mammonae.* Et ideo in primo praecepto legis excluditur cultus falorum deorum.

Ad primum ergo dicendum, quod etiam circa religionem ponitur unum praeceptum affirmativum, scilicet *Memento ut diem sabbati sanctifices.* Sed erant praemittenda praecepta negativa, quibus impedimenta religionis tollerentur. Quamvis enim affirmatio naturaliter sit prior negatione; tamen in via generationis negatio, qua remouentur impedimenta, est prior, ut dictum est (in cor. art.) & praecipue in rebus divinis, in quibus negationes praesentur affirmationibus, propter insufficienciam nostram, ut Dionysius dicit xi. cap. caelest. Hierarch. (parum ante mod.)

Ad secundum dicendum, quod cultus alienorum deorum dupliciter apud ali-

quos observabatur. Quidam enim quaedam creaturas pro diis colebant absque institutione imaginum. Unde Varro dicit, quod antiqui Romani diu sine simulacris deos coluerunt. Et hic cultus prohibetur primo, cum dicitur: *Non habebis deos alienos.* Apud alios autem erat cultus falorum deorum sub quibusdam imaginibus. Et ideo opportune prohibetur etiam ipsarum imaginum institutio, cum dicitur, *Non facies tibi sculptile;* & ipsarum imaginum cultus, cum dicitur, *Non coles ea &c.*

Ad tertium dicendum, quod omnes aliae superstitiones procedunt ex aliquo pacto cum daemonibus inito, tacito, vel expresso: & ideo omnes intelliguntur prohiberi in hoc quod dicitur, *Non habebis deos alienos.*

### ARTICULUS III. 613

*Utrum secundum praeceptum Decalogi convenienter tradatur.*

*Locus sup. art. 2. indultis.*

**A**D tertium sic proceditur. Videtur quod secundum praeceptum Decalogi non convenienter tradatur. Hoc enim praeceptum, *Non assumes nomen Dei tui in vanum*, sic exponitur in Glossa (interl.) Exod. xx. „Non existimes creaturam esse filium Dei: “ per quod prohibetur error contra fidem: & Deut. v. exponitur (in Glossa interl.) *Non assumes nomen Dei tui in vanum*, scilicet „nomen Deiligno, vel lapidi attribuentur do: “ per quod prohibetur falsa confessio, quae est actus infidelitatis, sicut & error. Infidelitas autem est prior superstitione, sicut & fides religione. Ergo hoc praeceptum debuit praemitti primo, in quo prohibetur superstitio.

2. Praeterea. Nomen Dei ad multa assumitur, sicut ad laudandum, ad miracula faciendum, & universaliter ad omnia quae dicuntur, vel fiunt a nobis, secundum illud ad Col. iii. 17. *Omne quodcumque facitis verbo, vel opere, in nomine Domini facite.* Ergo praeceptum quo prohibetur nomen Dei assumi in vanum, videtur universalis esse quasi praeceptum quo prohibetur superstitio; & ita debuit ei praemitti.

3. Praeterea. Exod. xx. exponitur (in Glossa interl.) illud praeceptum, *Non as-*

(a) *De vitiis, & recitatiois editi: antiqui nannali super spinas & tribulos, quod nra est in tempore Hierem.*

*assumes nomen Dei tui in vanum*, iurando scilicet pro nihilo: unde videtur per hoc prohiberi vana iuratio, quæ est scilicet sine iudicio. Sed multo gravior est falsa iuratio, quæ est sine veritate, & iniusta iuratio, quæ est sine iustitia. Ergo magis debuerunt illa prohiberi per hoc præceptum.

4. Præterea. Multo gravius peccatum est blasphemia, vel quicquid fiat verbo, vel facto in contumeliam Dei, quam periurium. Ergo blasphemia, & alia huiusmodi debuerunt magis per hoc præceptum prohiberi.

5. Præterea. Multa sunt Dei nomina. Ergo non debuit indeterminate dici: *Non assumes nomen Dei tui in vanum*.

Sed in contrarium est auctoritas Scripturæ.

Respondeo dicendum, quod oportet prius impedimenta veræ religionis excludere in eo qui instituitur ad virtutem, quam in vera religione fundare. Opponitur autem veræ religioni aliquid dupliciter: uno modo per excessum, quando scilicet id quod est religionis, alteri indebite exhibetur; quod pertinet ad superstitionem: alio modo quasi per defectum reverentiæ, cum scilicet Deus contemnitur; quod pertinet ad vitium irreligiositatis, ut supra habitum est (quæst. xcviij. in divisione, & in art. seq.) Superstitio autem impedit religionem quantum ad hoc ne suscipiatur Deus ad colendum. Ille autem cuius animus implicatus est alicui cultui indebito, non potest simul debitum Dei cultum suscipere, secundum illud Isa. xxviii. 20. *Coangustatum est stratum, ita ut alter decidat*, scilicet Deus verus, vel falsus a corde hominis; & passum breve utrumque aperire non potest. Per irreligiositatem autem impeditur religio quantum ad hoc ne Deus, postquam susceptus est, honoretur. Prius autem est Deum suscipere ad colendum, quam eum susceptum honorare.

Et ideo præmittitur præceptum quod prohibetur supersticio, secundo præcepto quod prohibetur periurium ad irreligiositatem pertinens.

Ad primum ergo dicendum, quod illæ expositiones sunt mysticæ; litteralis autem expositio est, quæ habetur Deuter. v. *Non assumes nomen Dei tui in vanum*, scilicet, iurando pro re quæ non est.

Ad secundum dicendum, quod non prohibetur quælibet assumptio divini no-

minis per hoc præceptum, sed proprie illa qua assumitur divinum nomen ad confirmationem humani verbi per modum iuramenti: quia ista assumptio divini nominis est frequentior apud homines. Potest tamen ex consequenti intelligi, quod per hoc prohibetur omnis inordinata divini nominis assumptio. Et secundum hoc procedunt illæ expositiones de quibus supra dictum est (in arg. 1.)

Ad tertium dicendum, quod pro nihilo iurare dicitur ille qui iurat pro eo quod non est: quod pertinet ad falsam iurationem, quæ principaliter periurium nominatur, ut supra dictum est (quæst. xcviij. art. 1. ad 3.) Quando enim aliquis falsum iurat, tunc iuratio est vana secundum seipsam, quia non habet firmitatem veritatis; quando autem aliquis iurat sine iudicio ex aliqua levitate, si verum iurat, non est ibi vanitas ex parte ipsius iuramenti, sed solum ex parte iurantis.

Ad quartum dicendum, quod sicut el qui instruitur in aliqua scientia, primo proponuntur quædam communia documenta; ita etiam lex, quæ instituit hominem ad virtutem in præceptis Decalogi, quæ sunt prima, proposuit ea vel prohibendo, vel mandando quæ communis in cursu vitæ humanæ solent accidere. Et ideo inter præcepta Decalogi prohibetur periurium, quod frequentius accidit quam blasphemia, in quam homo rarius prolabitur.

Ad quintum dicendum, quod nominibus Dei debetur reverentia ex parte rei significatæ, quæ est una; non autem ratione vocum significantium, quæ sunt multe. Et ideo singulariter dixit, *Non assumes nomen Dei tui in vanum*: quia non differt per quodcumque nomen Dei periurium committatur.

## ARTICULUS IV. 614

*Utrum tertium Decalogi præceptum convenienter tradatur, scilicet de sanctificatione sabbati.*

1. 2. quæst. c. art. 5. ad 2. & quæst. cii. art. 4. ad 10. & iii. dist. xxxvii. art. 5. & iij. col. 1. fin. & lob 11 co. 2. fin. & Colof. ii. lect. 4.

**A**D quartum sic proceditur. Videtur quod inconvenienter tertium præceptum Decalogi tradatur, scilicet de sanctificatione sabbati. Hoc enim præceptum spiritualiter intellectum est go-

nerale: super illud enim Luc. xiii. *Archimagoz indignans, quod sabbato curasset*, dicit Beda (Lib. IV. comment. cap. xiii.) „Lex in sabbato non prohibet hominem curare; sed servilia opera facere, idest peccatis gravari, prohibet.“ Secundum autem litteralem sensum est præceptum cæremoniale: dicitur enim Exod. xxxi. 13. *Videte ut sabbatum meum custodiat: quia signum est inter me, & vos in generationibus vestris*. Præcepta autem Decalogi & sunt præcepta spiritualia, & sunt præcepta moralia. Inconvenienter ergo ponitur inter præcepta Decalogi.

2. Præterea. Cæremonialia legis præcepta continent *sacra, sacrificia, sacramenta, & observantias*, ut supra habitum est (1. 2. quæst. c. 1. art. 4.) Ad sacra autem pertinebant non solum sacri dies, sed etiam sacra loca, & sacra vasa, & alia huiusmodi. Similiter etiam erant multi sacri dies præter sabbatum. Inconvenienter est ergo quod, prætermittis aliis omnibus cæremonialibus, de sola observantia sabbati fiat mentio.

3. Præterea. Quicumque transgreditur præceptum Decalogi, peccat. Sed in veteri lege aliqui transgredientes observantiam sabbati non peccabant, sicut circumcidentes pueros octava die, & sacerdotes in templo sabbatis operantes: & Elias (III. Reg. xix.) cum quadraginta diebus pervenisset ad montem Dei Oreb, consequens est quod in sabbato itineravit: similiter etiam sacerdotes dum septem diebus circumferrent arcam Domini, ut legitur Iosue vi. intelliguntur eam die sabbati circumtulisse: dicitur etiam Luc. xiii. 15. *Nonne unusquisque vestrum sabbato solvit bovem suum, aut asinum, & ducit adquare?* Ergo inconvenienter ponitur inter præcepta Decalogi.

4. Præterea. Præcepta Decalogi sunt etiam in nova lege observanda. Sed in nova lege non servatur hoc præceptum nec quantum ad diem sabbati, nec quantum ad diem dominicam, in qua & cibi coquantur, & itinerantur, & piscantur homines, & alia multa huiusmodi faciunt. Ergo inconvenienter traditur præceptum de observatione sabbati.

Sed contra est Scripturæ auctoritas.

Respondendo dicendum, quod, remotis impedimentis veræ religionis per primum, & secundum præceptum Decalogi, ut su-

pra dictum est (art. 2. & 3. h. quæst.) consequens fuit ut tertium præceptum poneretur, per quod homines in vera religione fundarentur. Ad religionem autem pertinet cultum Deo exhibere. (a) Sicut autem in Scriptura divina traditur nobis cultus interior sub aliquibus corporalium rerum similitudinibus; ita cultus exterior Deo (b) exhibetur per aliquid sensibile signum. Et quia ad interiorum cultum, qui consistit in oratione, & devotione, magis inducitur homo ex interiori Spiritus sancti instinctu, præceptum legis dandum fuit (c) de exteriori cultu secundum aliquod sensibile signum.

Et quia præcepta Decalogi sunt quasi quædam prima, & communia legis principia; ideo in tertio præcepto Decalogi præcipitur exterior Dei cultus sub signo communis beneficii, quod pertinet ad omnes, scilicet ad repræsentandum opus creationis mundi, a quo requievit dicitur Deus septima die: in cuius signum dies septima mandatur sanctificanda, idest deputanda ad vacandum Deo. Et ideo Exod. xx. 11. præmissio præcepto de sanctificatione sabbati, assignatur ratio: quia *sex diebus fecit Deus celum, & terram, & in septima die requievit*.

Ad primum ergo dicendum, quod præceptum de sanctificatione sabbati literaliter intellectum, est partim morale, partim autem cæremoniale. Morale quidem est quantum ad hoc quod homo deputet aliquod tempus vite sue ad vacandum divinis. Inest enim homini naturalis inclinatio ad hoc quod cuilibet rei necessaria deputetur aliquod tempus, sicut corporali refectioni, somno, & aliis huiusmodi. Unde etiam spirituali refectioni, qua mens hominis in Deo reficitur, secundum distictam naturalis rationis, aliquod tempus deputat homo. Et sic habere aliquod tempus deputatum ad vacandum divinis, cadit sub præcepto morali. Sed inquantum in hoc præcepto determinatur speciale tempus in signum creationis mundi, sic est præceptum cæremoniale. Similiter etiam cæremoniale est secundum allegoricam significationem, prout fuit signum quietis Christi in sepulcro, quæ fuit septima die: & similiter secundum moralem significationem, prout significat cessationem ab omni actu peccati, & quietem mentis in Deo. Et secundum hoc quodammodo est præceptum generale. Similiter etiam cæ-

(a) Ita cum mss. editi passim. Nicolai: Sicut autem Scriptura divina tradit nobis sub aliquibus &c.  
(b) ut. debetur. (c) Sed. Camer. de interiori. Ita vero cum aliis mss. editi communi.

remoniale est secundum significationem anagogicam, prout scilicet praefigurat quietem fructuionis Dei, quae erit in patria. Unde praecipuum de sanctificatione sabbati ponitur inter praecipua Decalogi, inquantum est praecipuum morale, non inquantum est caeremoniale.

Ad secundum dicendum, quod aliae caeremoniae legis sunt signa aliquorum particularium effectuum Dei; sed observatio sabbati est signum generalis beneficii, scilicet productionis universae creaturae. Et ideo convenientius debuit poni inter praecipua generalia Decalogi quam aliquod aliud caeremoniale legis.

Ad tertium dicendum, quod in observantia sabbati duo sunt consideranda. Quorum unum est sicut finis; & hoc est ut homo vacet rebus divinis: quod significatur in hoc quod dicit, *Memento ut diem sabbati sanctifices*: illa enim dicuntur sanctificari in lege quae divino cultui applicantur. Aliud autem est cessatio operum; quae significatur cum subditur: *Septima die Domini Dei tui non facies omne opus*. Sed de quo opere intelligatur, apparet per id quod exponitur Levit. xxiii. 3. *Omne opus servile non facietis in eo*. Opus autem servile dicitur a servitute. Est autem triplex servitus. Una quidem qua homo servit peccato, secundum illud Ioen. viii. 34. *Qui facit peccatum, servus est peccati*: & secundum hoc omne opus peccati dicitur servile. Alia vero servitus est qua homo servit homini. Est autem homo alterius servus, non secundum mentem, sed secundum corpus, ut supra habitum est (quaest. civ. art. 5. & art. 6. ad 1.) Et ideo opera servilia secundum hoc dicuntur opera corporalia, in quibus unus homo alteri servit. Tertia autem est servitus Dei: & secundum hoc opus servile posset dici opus latiae, quod pertinet ad Dei servitium. Si autem sic intelligatur opus servile, non prohibetur in die sabbati: quia hoc esset contrarium fini observationis sabbati. Homo enim ad hoc ab aliis operibus abstinet in die sabbati, ut vacet operibus ad Dei servitium pertinentibus. Et inde est quod, sicut dicitur Ioann. vii. 23. *circumcisionem homo accipit in sabbato, ut non solvatur lex Moysi*. Inde etiam est quod, sicut dicitur Matth. xii. 5. *sabbatis sacerdotes in templo sabbatum violant*, id est corporaliter in sabbato operantur, & sine crimine sunt. Et sic etiam sacerdotes in sabbato circumferentes arcam non transgrediuntur.

J. Tb. Oper. Tom. XXIII.

bantur praecipuum de sabbati observatione. Similiter etiam nullius spiritualis actus exercitum est contra observantiam sabbati; puta si quis doceat verbo, vel scribo. Unde Num. xxvii. dicit Glossa (ord. Orig. hom. xxi. in Num. sup. illud, *Die autem sabbati*) quod „fabri,“ & huiusmodi artifices oxiantur in die „sabbati: lector autem divinae legis, vel „doctor ab opere suo non desinit; nec „tamen contaminatur sabbatum; sicut „sacerdotes in templo sabbatum violant, & sine crimine sunt.“ Sed alia opera servilia, quae dicuntur servilia primo, vel secundo modo, contrariantur observantiae sabbati, inquantum impediunt applicationem hominis ad divina. Et quia magis homo impeditur a rebus divinis per opus peccati, quam per opus licitum, quamvis sit corporale; ideo magis contra hoc praecipuum agit qui peccat in die festo, quam qui aliud corporale opus licitum facit. Unde Augustinus dicit in Lib. de decem chordis (cap. xii. ante med.) *Melius faceret Iudeus in agro suo aliquid utile, quam si in theatro seditiosus existeret: & melius femine eorum die sabbati lanam facerent, quam quod tota die in neomeniis suis impudice saltarent*. Non autem qui peccat venialiter in sabbato, contra hoc praecipuum facit, quia peccatum veniale non excludit sanctitatem. Opera etiam corporalia ad spirituale Dei cultum non pertinentia intantum servilia dicuntur, inquantum proprie pertinent ad servientes; inquantum vero sunt communia servis, & liberis, servilia non dicuntur. Quilibet autem tam servus, quam liber tenetur in necessariis providere non tantum sibi, sed etiam proximo: praecipue quidem in his quae ad salutem corporis pertinent, secundum illud Proverb. xxiv. 11. *Erue eos qui dicuntur ad mortem*: secundario autem etiam in damno rerum vitando, secundum illud Deuter. xxii. 1. *Non videbis bovem fratris tui, aut ovem errantem, & praeteribis, sed reduces fratri tuo*. Et ideo opus corporale pertinens ad conservandam salutem proprii corporis non violat sabbatum: non enim est contra observantiam sabbati quod aliquis comedat, & alia huiusmodi faciat, quibus salus corporis conservatur. Et propter hoc Machabaei non polluerunt sabbatum pugnae ad sui defensionem die sabbati, ut legitur I. Machabaeorum 11. similiter nec etiam Elias fugiens a facie Iezabel in die sabbati. Et propter hoc etiam

F

Do-

Dominus Matth. xii. excusat discipulos suos, qui colligebant spicas in die sabbati propter necessitatem quam patiebantur. Similiter opus corporale, quod ordinatur ad salutem corporalem alterius, non est contra observantiam sabbati: unde dicitur Ioan. vii. 23. *Mibi indignamini, quia totum hominem saluum feci in sabbato*? Similiter etiam opus corporale, quod ordinatur ad imminens damnum rei exterioris vitandum, non violat sabbatum: unde dicit Dominus Matth. xii. 11. *Quis erit ex vobis homo qui habet unam ovem, & si ceciderit sabbato in fornem, nonne tenebit, & levabit eam?*

Ad quartum dicendum, quod observantia diei dominicæ in nova lege succedit observantiæ sabbati, non ex vi præcepti legis, sed ex constitutione Ecclesiæ, & consuetudine populi christianæ. Nec enim huiusmodi observatio est figuralis, sicut fuit observatio sabbati in veteri lege. Et ideo non est ita arcta prohibitio operandi in die dominica, sicut in die sabbati; sed quædam opera conceduntur in die dominica quæ in die sabbati prohibebantur, sicut decoctio ciborum, & alia huiusmodi; & etiam in quibusdam operibus prohibitis facilius propter necessitatem dispensatur in nova quam in veteri lege: quia figura pertinet ad protestationem veritatis, quam nec in modico præterire oportet; opera autem secundum se considerata immutari possunt pro loco, & tempore.

## ARTICULUS V. 625

*Utrum convenienter tradatur quartum præceptum de honoratione parentum.*

III. dist. xxxvii. art. 1. quæst. 2.

**A**D quintum sic proceditur. Videtur quod inconvenienter tradatur quartum præceptum de honoratione parentum. Hoc enim est præceptum quod pertinet ad pietatem. Sed sicut pietas est pars iustitiæ, ita etiam observantia, & gratia, & alia, de quibus dictum est (quæst. ci. art. 1. & seq.) Ergo videtur quod non debuit dari speciale præceptum de pietate, cum de aliis non detur.

2. Præterea. Pietas non solum exhibet cultum parentibus, sed patriæ, & etiam aliis sanguine coniunctis, & patriæ benevolis, ut supra dictum est (quæst. ci. art. 1. & 2.) Inconvenienter ergo in hoc quarto præcepto fit

mentio solum de honoratione patris, & matris.

3. Præterea. Parentibus non solum debetur honoris reverentia, sed etiam sustentatio. Ergo insufficienter sola parentum honoratio præcipitur.

4. Præterea. Contingit quandoque quod hi qui honorant parentes, cito moriuntur; & e contrario qui parentes non honorant, diu vivunt. Inconvenienter ergo additur huic præcepto hæc promissio: *Ut sis longævus super terram*.

In contrarium est sacræ Scripturæ autoritas.

Respondeo dicendum, quod præcepta Decalogi ordinantur ad dilectionem Dei, & proximi. Inter proximos autem maxime obligamur parentibus: & ideo immediate post præcepta ordinantia nos in Deum, ponitur præceptum ordinans nos ad parentes, qui sunt particulare principium nostri esse, sicut Deus est universalis principium: & sic est quædam affinitas huius præcepti ad præcepta primæ tabulæ.

Ad primum ergo dicendum, quod, sicut supra dictum est (quæst. ci. art. 2.) pietas ordinatur ad reddendum debitum parentibus, quod communiter ad omnes pertinet. Et ideo inter præcepta Decalogi, quæ sunt communia, magis debet poni aliquid pertinens ad pietatem quam ad alias partes iustitiæ, quæ respiciunt aliquid debitum speciale.

Ad secundum dicendum, quod per prius aliquid debetur parentibus quam patriæ, & consanguineis: quia per hoc quod sumus nati a parentibus, pertinet ad nos & consanguinei, & patria. Et ideo cum præcepta Decalogi sint prima præcepta legis, magis ordinatur homo per ea ad parentes quam ad patriam, vel ad alios consanguineos. Nihilominus tamen in hoc præcepto quod est de honoratione parentum, intelligitur mandari quicquid pertinet ad reddendum debitum cuicumque personæ, sicut secundarium includitur in principali.

Ad tertium dicendum, quod parentibus, in quantum huiusmodi, debetur reverentiæ honor; sed sustentatio, & alia huiusmodi debentur eis ratione alicuius accidentis, puta in quantum sunt indigentes, vel servi, vel aliquid huiusmodi, ut supra dictum est (quæst. ci. art. 2.) Et quia quod est per se, prius est eo quod est per accidens, ideo inter prima præcepta legis, quæ sunt præcepta Decalo-



calogi, specialiter præcipitur honoratio parentum; in qua, sicut in quodam principali, intelligitur mandari sustentatio, & quicquid aliud parentibus debetur.

Ad quartum dicendum, quod longævitas promittitur honorantibus parentes, non solum quantum ad futuram vitam, sed etiam quantum ad præsentem, secundum illud Apostoli I. ad Tim. IV. 8. *Pietas ad omnia utilis est, promissionem habens vitæ quæ nunc est, & futuræ.* Et hoc rationabiliter. Qui enim est gratus beneficio, meretur secundum quamdam congruentiam ut sibi beneficium conservetur; propter ingratitudinem autem meretur aliquis beneficium perdere. Beneficium autem vitæ corporalis post Deum a parentibus habemus: & ideo ille qui honorat parentes, quasi beneficio gratus, meretur vitæ conservationem; qui autem non honorat parentes, tamquam ingratus, meretur vita privari. Quia tamen præsentia bona, vel mala non cadunt sub merito, vel demerito, nisi in quantum ordinantur ad futuram remunerationem; ut dictum est (1. 2. quæst. cxiv. art. 12.) ideo quandoque secundum occultam rationem divinorum iudiciorum, quæ maxime futuram remunerationem respiciunt, aliqui qui sunt pii in parentes, citius vita privantur; alii vero qui sunt impii in parentes, diutius vivunt.

## ARTICULUS VI. 616

*Utrum alia sex præcepta Decalogi convenienter tradantur.*

III. dist. xxxvii. art. 2. quæst. 1.

**A**D sextum sic proceditur. Videtur quod alia sex præcepta Decalogi inconvenienter tradantur. Non enim sufficit ad salutem quod aliquis proximo suo non noceat; sed requiritur quod ei debitum reddat, secundum illud Rom. x. 11. 7. *Reddite omnibus debita.* Sed in sex ultimis præceptis solum prohibetur nocumentum proximo inferendum. Ergo inconvenienter prædicta præcepta tradantur.

1. Præterea. In prædictis præceptis prohibentur homicidium, adulterium, furtum, & falsum testimonium. Sed multa alia nocumenta possunt proximo inferri, ut patet ex his quæ supra determinata sunt (quæst. lxxxi. & seq.) Ergo

videtur quod inconvenienter sint tradita huiusmodi præcepta.

3. Præterea. Concupiscentia dupliciter potest capi: uno modo, secundum quod est actus voluntatis, ut dicitur Sap. xv.

21. *Concupiscentia sapientie deducit ad regnum perpetuum:* alio modo, secundum quod est actus sensualitatis, sicut dicitur Iacobi iv. 1. *Unde bella, & fites in vobis? nonne ex concupiscentiis quæ militans in membris vestris?* Sed per præceptum Decalogi non prohibetur concupiscentia sensualitatis, quia secundum hoc primi motus essent peccata mortalia, utpote contra præceptum Decalogi existentes: similiter etiam non prohibetur concupiscentia voluntatis, quia hæc includitur in quolibet præcepto. Ergo inter præcepta Decalogi inconvenienter ponuntur quedam concupiscentiæ prohibitiva.

4. Præterea. Homicidium est gravius peccatum quam adulterium, vel furtum. Sed non ponitur aliquod præceptum prohibitorium concupiscentiæ homicidii. Ergo etiam inconvenienter ponuntur quedam præcepta prohibitiva concupiscentiæ furti, & adulterii.

Sed in contrarium est auctoritas Scripturæ.

Respondendo dicendum, quod sicut per partes iustitiæ debitum redditur aliquibus determinatis personis, quibus homo ex aliqua speciali ratione obligatur; ita etiam per iustitiam proprie dictam aliquis debitum reddit communiter omnibus. Et ideo post præcepta tria pertinentia ad religionem, qua redditur debitum Deo, post quartum præceptum, quod est pietatis, qua redditur parentibus debitum, in quo includitur omne debitum quod ex aliqua speciali ratione debetur; necesse fuit quod ponerentur consequenter aliqua præcepta pertinentia ad iustitiam proprie dictam, quæ indifferenter omnibus debitum reddit.

Ad primum ergo dicendum, quod communiter ad hoc obligatur homo ut nulli inferat nocumentum: & ideo præcepta negativa, quibus prohibentur nocumenta, quæ possunt proximis inferri, tamquam communia, fuerunt ponenda inter præcepta Decalogi. Ea vero quæ sunt proximis exhibenda, diversimode exhibentur diversis: & ideo non fuerunt inter præcepta Decalogi ponenda de his affirmativa præcepta.

Ad secundum dicendum, quod omnia alia nocumenta quæ proximo inferuntur, possunt ad ista reduci quæ his præceptis

prohibentur, tamquam ad quædam communiora, & principaliora. Nam omnia nocumenta quæ in personam proximi inferuntur, intelliguntur prohiberi in homicidio sicut in principaliori. Quæ vero inferuntur in personam coniunctam, & maxime per modum libidinis, intelliguntur prohiberi simul cum adulterio. Quæ vero pertinent ad damna in rebus illata, intelliguntur prohiberi simul cum furto. Quæ autem pertinent ad locutiones, sicut detractiones, blasphemias, & si quæ huiusmodi, intelliguntur prohiberi in falso testimonio, quod directius iustitiz contrariatur.

Ad tertium dicendum, quod per præcepta prohibitiva concupiscentiæ, non intelligitur prohiberi primus motus concupiscentiæ, qui consistit infra limites sensualitatis; sed prohibetur directe consensus voluntatis, qui est in opus, vel in delectationem.

Ad quartum dicendum, quod homicidium secundum se non est concupisibile, sed magis horribile, quia non habet de se rationem alicuius boni. Sed adulterium habet rationem alicuius boni, scilicet delectabilis: sicut etiam habet rationem alicuius boni, scilicet utilis. Bonum autem de se habet rationem concupisibilem. Et ideo fuit specialibus præceptis prohibenda: concupiscentia furti, & adulteri; non autem concupiscentia homicidii.

## QUAESTIO CXXIII.

### De fortitudine.

#### in duodecim articulos divisa.

Consequenter post iustitiam considerandum est de fortitudine: & primo de ipsa virtute fortitudinis; secundo de partibus eius; tertio de dono ei correspondente; quarto de præceptis ad ipsam pertinentibus.

Circa fortitudinem autem consideranda sunt tria. Primo quidem de ipsa fortitudine; secundo de actu præcipuo eius, scilicet de martyrio; tertio de vitiis oppositis.

Circa primum quaeruntur duodecim.

Primo, utrum fortitudo sit virtus.

Secundo, utrum sit virtus specialis.

Tertio, utrum fortitudo sit solum circa timores, & audacias.

Quarto, utrum sit solum circa timorem mortis.

Quinto, utrum sit solum in rebus bellicis.

Sexto, utrum sustinere sit præcipuus actus eius.

Septimo, utrum operetur propter proprium bonum.

Octavo, utrum habeat delectationem in suo actu.

Nono, utrum fortitudo maxime consistat in repentinis.

Decimo, utrum utatur ira in sua operatione.

Undecimo, utrum sit virtus cardinalis.

Duodecimo de comparatione eius ad alias virtutes cardinales.

## ARTICULUS I. 617

### Utum fortitudo sit virtus.

*1<sup>a</sup> art. 3. 4. & 5. & quæst. cxxiv. art. 2. cor. & III. dist. xxxiii. quæst. 111. art. 1. quæst. 1. & op. xlii. cap. xviii. & Psal. xvi. con. 2. & III. Ethic. lect. 18. fin.*

Ad primum sic proceditur. Videtur quod fortitudo non sit virtus. Dicit enim Apostolus II. ad Corinth. xii. 9. *Virtus in infirmitate perficitur*. Sed fortitudo infirmitati opponitur. Ergo fortitudo non est virtus.

2. Præterea. Si est virtus, aut est theologica, aut intellectualis, aut moralis. Sed fortitudo neque continetur inter virtutes theologicas, neque inter intellectuales, ut ex supradictis patet (1. 2. quæst. lvii. art. 2. & quæst. lxi. art. 3.) neque videtur esse virtus moralis: quia, ut Philosophus dicit in III. Ethic. (cap. vii. & viii.) *videtur aliqui esse fortes propter ignorantiam, aut propter experientiam, sicut milites*; quæ magis pertinent ad artem, quam ad virtutem moralem: *quidam etiam dicuntur esse fortes propter aliquas passiones*, puta propter timorem comminationum, vel debonorationis, aut etiam propter tristitiam, vel iram, seu spem. Virtus autem moralis non operatur ex passione, sed ex electione, ut supra habitum est (1. 2. quæst. lv. art. 4.) Ergo fortitudo non est virtus.

3. Præterea. Virtus humana maxime consistit in anima: est enim *bona qualitas mentis*, ut supra dictum est (ibid.) Sed fortitudo videtur consistere in corpore, vel saltem corporis complexionem sequi. Ergo videtur quod fortitudo non sit virtus.

Sed

Sed contra est quod Augustinus in Libro de moribus Ecclesiae ( cap. xv. xxi. & xxi. ) fortitudinem inter virtutes enumerat.

Respondendo dicendum, quod secundum Philosophum in II. Ethic. ( cap. vi. ) *virtus est quae bonum facit habentem, & opus eius bonum reddit.* Unde virtus hominis, de qua loquimur, est quae facit bonum hominem, & opus eius bonum reddit. Bonum autem hominis est secundum rationem esse, secundum Dionysium iv. cap. de div. Nom. ( par. iv. lect. 22. ) Et ideo ad virtutem humanam pertinet ut bonum faciat hominem, & opus eis secundum rationem esse.

Quod quidem tripliciter contingit: uno modo, secundum quod ipsa ratio resistitur; quod fit per virtutes intellectuales: alio modo, secundum quod ipsa restitudo rationis in rebus humanis instituitur; quod pertinet ad iustitiam: tertio modo, secundum quod tolluntur impedimenta huius restitudo in rebus humanis ponenda.

Dupliciter autem impeditur voluntas humana, ne restitudo rationis sequatur. Uno modo per hoc quod attrahitur ab aliquo delectabili ad aliquid aliud quam restitudo rationis requirit: & hoc impedimentum tollit virtus temperantiae. Alio modo per hoc quod voluntas repellitur ab eo quod est secundum rationem, propter aliquid difficile quod incumbit: & ad hoc impedimentum tollendum requiritur fortitudo mentis, qua scilicet huiusmodi difficultatibus resistat; sicut & homo per fortitudinem corporalem impedimenta corporalia superat, & repellit.

Unde manifestum est quod fortitudo est virtus, in quantum facit hominem secundum rationem esse.

Ad primum ergo dicendum, quod virtus animae non perficitur in infirmitate animae, sed in infirmitate carnis, de qua Apostolus loquebatur. Hoc autem ad fortitudinem mentis pertinet quod infirmitatem carnis fortiter seruat, quod pertinet ad virtutem patientiae, vel fortitudinis; & quod homo propriam infirmitatem recognoscat, quod pertinet ad perfectionem, quae dicitur humilitas.

Ad secundum dicendum, quod exteriorum virtutis actum quandoque aliqui efficiunt non habentes virtutem ex aliqua alia causa quam ex virtute. Et ideo Philosophus in III. Ethic. ( cap. viii. ) ponit quinque modos eorum qui similitu-

dinarie dicuntur fortes, quasi exercentes actum fortitudinis praeter virtutem. Quod quidem contingit tripliciter. Primo quidem quia feruntur in id quod est difficile, ac si non esset difficile: quod in tres modos dividitur: quandoque enim hoc accidit propter ignorantiam, quia scilicet homo non percipit magnitudinem periculi: quandoque hoc accidit propter hoc quod homo est bonus spei ad pericula vincenda; puta cum expertus est se saepe pericula evasisse: quandoque autem hoc accidit propter scientiam, & artem quandam; sicut contingit in militibus, qui propter peritiam armorum, & exercitium non reputant gravia pericula belli, aestimantes se per suam artem posse contra ea defendi, sicut Vegetius dicit in Lib. I. de re militari ( cap. i. ) *Nemo facere metuit quod se bene didicisse confidit.* Alio modo agit aliquis actum fortitudinis sine virtute propter impulsum passionis, sive tristitiae, quam vult repellere, vel etiam irae. Tertio modo propter electionem, non quidem finis debiti, sed alicuius temporalis commodi acquirendi, puta honoris, voluptatis, vel lucri; vel alicuius incommodi vitandi, puta vituperii, afflictionis, vel damni.

Ad tertium dicendum, quod ad similitudinem corporalis fortitudinis dicitur fortitudo animae, quae ponitur virtus, ut dictum est ( in solut. ad 1. ) Nec tamen est contra rationem virtutis, quod ex naturali complexione aliquis habeat naturalem inclinationem ad virtutem, ut supra habitum est ( 1. 2. quæst. lxxiii. ar. 1. )

## ARTICULUS II. 618

*Utrum fortitudo sit virtus specialis.*

1. 2. quæst. lxxi. ar. 3. & 4. III. dist. xxxiii. quæst. 1. ar. 1. quæst. 3. cor. & ad 2.

**A**D secundum sic proceditur. Videtur quod fortitudo non sit specialis virtus. Dicitur enim Sapient. viii. 7. quod *sapientia sobrietatem, & prudentiam docet, iustitiam, & virtutem*; & ponitur ibi virtus pro fortitudine. Cum ergo nomen virtutis sit commune omnibus virtutibus, videtur quod fortitudo sit generalis virtus.

2. Præterea. Ambrosius dicit in I. de offic. ( cap. xxxix. in princ. ) *Non mediocris animi est fortitudo, quae sola defendit ornamenta virtutum omnium, & iudicia custodit, & quae inexsuperabili praelio adversus omnia*

*omnia vitia decernat, invicta ad labores, fortis ad pericula, rigidior adversus voluptates, dura adversus illecebras, avaritiam fugat tamquam labem quamdam, quæ virtutem effeminet : & idem postea subdit de aliis vitiis . Hoc autem non potest convenire alicui specialis virtuti . Ergo fortitudo non est specialis virtus .*

3. Præterea . Nomen fortitudinis a firmitate sumptum esse videtur . Sed firmiter se habere pertinet ad omnem virtutem, ut dicitur in II. Ethic. ( cap. iv. ante med. ) Ergo fortitudo est virtus generalis .

Sed contra est quod XXII. Moral. ( cap. i. a med. ) Gregorius connumerat eam aliis virtutibus .

Respondeo dicendum , quod , sicut supra dictum est ( 1. 2. quæst. lxxi. art. 3. & 4. ) nomen fortitudinis dupliciter accipi potest . Uno modo , secundum quod absolute importat quamdam animi firmitatem ; & secundum hoc est generalis virtus , vel potius conditio cuiuslibet virtutis : quia , sicut Philosophus dicit in II. Ethic. ( loc. cit. ) ad virtutem requiritur firmiter & immobiliter operari . Alio modo potest accipi fortitudo , secundum quod importat firmitatem tantum in sustinendis , & repellendis his in quibus maxime difficile est firmitatem habere , scilicet in aliquibus periculis gravibus : unde Tullius dicit in sua Rethor. ( Lib. II. de invent. aliquant. ante fin. ) *quod fortitudo est considerata periculorum susceptio , & laborum perpassio* . Et sic fortitudo ponitur specialis virtus , utpote materiam determinatam habens .

Ad primum ergo dicendum , quod , secundum Philosophum in I. de celo ( tex. 126. ) nomen virtutis refertur ad ultimum potentia . Dicitur autem uno modo potentia naturalis , secundum quam aliquis potest resistere corruptentibus ; alio modo , secundum quod est principium agendi , ut patet in V. Metaph. ( tex. 17. ) Et ideo quia hæc acceptio est communior , nomen virtutis , secundum quod importat ultimum talis potentia , est commune : nam virtus communiter sumpta nihil aliud est quam habitus quo quis potest bene operari . Secundum autem quod importat ultimum potentia primo modo dictæ , qui quidem est modus magis specialis , attribuitur speciali virtuti , scilicet fortitudini , ad quam pertinet firmiter contra quæcumque impugnantia stare .

Ad secundum dicendum , quod Am-

brosius accipit fortitudinem large , secundum quod importat animi firmitatem respectu quorumcumque impugnatum . Et tamen etiam secundum quod est specialis virtus , habens determinatam materiam , coadiuvat ad resistendum impugnationibus omnium vitiatorum . Qui enim potest firmiter stare in his quæ sunt difficillima ad sustinendum , consequens est quod sit idoneus ad resistendum aliis quæ sunt minus difficilia .

Ad tertium dicendum , quod obiecta illa procedit de fortitudine primo modo dicta .

## ARTICULUS III. 619

### Utrum fortitudo sit circa timores , & audacias ,

*Inf. art. 6. cor. & quæst. cxxvii. art. 2. corp. & quæst. clviii. art. 1. cor. & quæst. cxlii. art. 1. co. & ad 2. & I. P. quæst. xi. art. 1. ad 2. & quæst. xcv. art. 2. ad 2. & III. dist. xxxiii. art. 2. & vir. quæst. 1. art. 4. cor. fi. & art. 5. corp.*

**A**D tertium sic proceditur . Videtur quod fortitudo non sit circa timores , & audacias . Dicit enim Gregorius VII. Moral. ( cap. viii. in princ. ) *Iustorum fortitudo est carnem vincere , propriis voluptatibus contraire , delectationem præsentis vite extinguere* . Ergo fortitudo magis videtur esse circa delectationes quam circa timores , & audacias .

2. Præterea . Tullius dicit in sua Reth. ( Lib. II. de invent. aliquant. ante fi. ) quod *ad fortitudinem pertinet susceptio periculorum , & perpassio laborum* . Sed hoc non videtur pertinere ad passionem timoris , vel audacia , sed magis ad actiones hominis laboriosas , vel ad exteriores res periculosas . Ergo fortitudo non est circa timores , & audacias .

3. Præterea . Timori non solum opponitur audacia , sed etiam spes , ut supra habitum est ( 1. 2. quæst. xlv. art. 1. ad 2. ) cum de passionibus ageretur . Ergo fortitudo non magis debet esse circa audaciam quam circa spem .

Sed contra est quod Philosophus dicit in II. Ethic. ( cap. vii. ) & in III. ( cap. ix. ) quod fortitudo est circa timorem , & audaciam .

Respondeo dicendum , quod , sicut supra dictum est ( art. 1. huius quæst. ) ad virtutem fortitudinis pertinet remove impedimentum , quo retrahitur voluntas a sequela rationis . Quod autem aliquis

retrahatur ab aliquo difficili, pertinet ad rationem timoris, qui importat recessum quemdam a malo difficultate habente, ut supra habitum est (1. 2. quaest. xlii. art. 3. & 5.) cum de passionibus ageretur. Et ideo fortitudo principaliter est circa timores difficultium rerum, quæ retrahere possunt voluntatem a sequela rationis. Oportet autem huiusmodi difficultium impulsium non solum firmiter tolerare cohibendo timorem, sed etiam moderate aggredi, quando scilicet oportet ea exterminare ad securitatem in posterum habendam; quod videtur pertinere ad rationem audaciæ.

Et ideo fortitudo est circa timores, & audacias, quasi cohibitiva timorum, & audaciarum moderativa.

Ad primum ergo dicendum, quod Gregorius ibi loquitur de fortitudine iustorum, secundum quod communiter se habet ad omnem virtutem: unde præmittit quædam pertinentia ad temperantiam, ut dictum est; & subdit de his quæ pertinent proprie ad fortitudinem, secundum quod est specialis virtus, dicens: *huius mundi aspera pro æternis præmiis amare*.

Ad secundum dicendum, quod res periculosa, & æstus laboriosi non retrahunt voluntatem a via rationis, nisi inquantum timentur. Et ideo oportet quod fortitudo sit immediate circa timores, & audacias; mediate autem circa pericula, & labores, sicut obiecta prædictarum passionum.

Ad tertium dicendum, quod spes opponitur timori ex parte obiecti, quia spes est de bono, timor de malo; audacia autem est circa idem obiectum, & opponitur timori secundum accessum, & recessum, ut supra dictum est (1. 2. quaest. xlv. art. 1.) Et quia fortitudo proprie respicit temporalia mala retrahentia a virtute, ut patet per definitionem Tullii (cit. in arg. 2.) inde est quod fortitudo proprie est circa timorem, & audaciam, non autem circa spem, nisi inquantum conne-ctitur audaciæ, ut supra habitum est (1. 2. quaest. xlv. art. 2.)

## ARTICULUS IV. 620

*Utrum fortitudo sit solum circa pericula mortis.*

*Inf. art. 11. & 12. & III. dist. xxxvii. quaest. 11. art. 3. ad 6. & IV. dist. xlix. quaest. v. art. 3. quaest. 2. ad 1. & vir. quaest. 1. art. 12. ad 6. & quaest. v. art. 1. & 4. cor. & III. Ethic. l. 9. 18.*

**A**D quartum sic proceditur. Videtur quod fortitudo non solum sit circa pericula mortis. Dicit enim Augustinus in Lib. de moribus Ecclesiæ (cap. xv. cir. med.) quod *fortitudo est amor facile tolerans omnia propter id quod amatur*. Et in VI. musicæ (cap. xv. cir. fi.) dicit, quod *fortitudo est affectio quæ nullas adversitates, mortemve formidas*. Ergo fortitudo non est solum circa pericula mortis, sed etiam circa omnia alia adversaria.

2. Præterea. Oportet omnes passiones animæ per aliquam virtutem ad medium reduci. Sed non est dare aliquam aliam virtutem reducumentem ad medium alios timores. Ergo fortitudo non solum est circa timores mortis, sed etiam circa alios timores.

3. Præterea. Nulla virtus est in extremis. Sed timor mortis est in extremis, quia est maximus timor, ut dicitur in III. Ethic. (cap. vi. a med.) Ergo virtus fortitudinis non est circa timores mortis.

Sed contra est quod Andronicus dicit, quod *fortitudo est virtus irascibilis non facile obstupescibilis a timoribus qui sunt circa mortem*.

Respondeo dicendum, quod, sicut supra dictum est (art. præc.) ad virtutem fortitudinis pertinet ut voluntatem hominis tueatur, ne retrahatur a bono rationis propter timorem mali corporalis. Oportet autem bonum rationis firmiter tenere contra quodcumque malum, quia nullum bonum corporale æquivalet bono rationis. Et ideo oportet quod fortitudo animi dicatur quæ firmiter retinet voluntatem hominis in bono rationis contra maxima mala: quia qui stat firmus contra maiora, consequens est quod stet firmus contra minora; sed non convertitur. Et hoc etiam ad rationem virtutis pertinet ut respiciat ultimum. Maxime autem terribile inter omnia corporalia mala est mors, quæ tollit omnia corporalia bona. Unde Augustinus dicit in Lib. de moribus Ec-

clisæ ( cap. xxxi. parum a princ. ) quod vinculum corporis , ne concutatur atque vexetur , laboris , & doloris , ne auferatur autem , atque perinatur , mortis terrore animam quatit .

Et ideo virtus fortitudinis est circa timores periculorum mortis .

Ad primum ergo dicendum , quod fortitudo bene se habet in omnibus adversis tolerandis ; non tamen ex toleratione quorumlibet adversorum reputatur homo simpliciter fortis , sed solum ex hoc quod bene tolerat etiam maxima mala ; ex aliis autem dicitur homo fortis secundum quid .

Ad secundum dicendum , quod quia timor ex amore nascitur , quæcumque virtus moderatur amorem aliquorum bonorum , consequens est ut moderetur contrarium malorum timorem ; sicut liberalitas , quæ moderatur amorem pecuniarum , per consequens etiam moderatur timorem amissionis earum : & idem apparet in temperantia , & aliis virtutibus . Sed amare propriam vitam est naturale : & ideo oportuit esse specialem virtutem quæ moderaretur timores mortis .

Ad tertium dicendum , quod extremum in virtutibus attenditur secundum excessum rationis rectæ : & ideo si aliquis maxima pericula subeat secundum rationem , non est virtuti contrarium .

## ARTICULUS V. 621

*Utrum fortitudo proprie consistat circa pericula mortis quæ sunt in bello .*

*Inf. quæst. cxxiv. art. 2. cor. & quæst. cxli. art. 8. cor. & II. dist. xlv. quæst. 11. art. 1. ad 3. & III. dist. xxxviii. quæst. 127. art. 3. quæst. 1. cor.*

**A**d quantum sic proceditur . Videtur quod fortitudo non consistat proprie circa pericula mortis quæ sunt in bello . Martyres enim præcipue de fortitudine commendantur . Sed Martyres non commendantur de rebus bellicis . Ergo fortitudo non proprie consistit circa pericula mortis quæ sunt in bello .

2. Præterea . Ambrosius dicit in Libro I. de offic. ( cap. xxxv. in princ. ) quod fortitudo dividitur in res bellicas , & domesticas . Tullius etiam dicit in I. de offic. ( in tit. fortius esse in reb. bellic. quam in urbanis antecellere : ) Cum plerique arbitarentur res bellicas maiores esse

quam urbanas , minuenda est hæc opinio ; sed si vere volumus iudicare , multæ res extiterunt urbanæ maiores , clarioreque quam bellicæ . Sed circa maiora maior fortitudo consistit . Ergo non proprie consistit fortitudo circa mortem quæ in bello est .

3. Præterea . Bella ordinantur ad pacem temporalem reipublicæ conservandam : dicit enim Augustinus de civ. Dei ( Lib. XIX. cap. xxi. cir. princ. ) quod *intentione pacis bella geruntur* . Sed pro pace temporali reipublicæ non videtur quod aliquis debeat se periculo mortis exponere ; cum talis pax sit multarum lasciviarum occasio . Ergo videtur quod virtus fortitudinis non consistat circa mortis bellicæ pericula .

Sed contra est quod Philosophus dicit in III. Ethicor. ( cap. vi. parum ante fi. ) quod *maxime est fortitudo circa mortem quæ est in bello* .

Respondendo dicendum , quod , sicut dictum est ( art. præc. ) fortitudo confirmat animum hominis contra maximam periculam , quæ sunt pericula mortis . Sed quia fortitudo virtus est ad cuius rationem pertinet quod semper tendat in bonum , consequens est ut homo pericula mortis non refugiat propter aliquod bonum prosequendum . Pericula autem mortis quæ sunt ex agritudine , vel ex tempestate maris , vel ex incurfu latronum , vel si qua alia sunt huiusmodi , non videntur alicui directe imminere ex hoc quod prosequatur aliquod bonum . Sed pericula mortis quæ sunt in bellicis , directe imminet homini propter aliquod bonum , in quantum videlicet defendit bonum commune per iustum bellum . Potest autem aliquod esse iustum bellum dupliciter : uno modo generale , sicut cum aliqui decertant in acie ; alio modo particulare , puta cum aliquis iudex , vel etiam persona privata non recedit a iusto iudicio timore gladii imminenti , vel cuiuscumque periculi , etiam si sit mortis . Pertinet ergo ad fortitudinem firmitatem animi præbere contra pericula mortis , non solum quæ imminet in bello communi , sed etiam quæ imminet in particulari impugnatione , quæ communi nomine bellum dici potest . Et secundum hoc concedendum est , quod fortitudo proprie est circa pericula mortis quæ est in bello .

Sed & circa pericula cuiuscumque alterius mortis fortis benefe habet : (a) præ-

(a) Ita mss. editi libri possunt . Sed . Arist. præsertim etiam cuiuscumque mortis .

fertim quia cuiuscumque mortis homo potest periculum subire propter virtutem; puta cum aliquis non refugit amico infirmanti obsequi propter timorem mortis: & infektionis; vel cum non refugit itinerari ad aliquod pium negotium prosequendum propter timorem naufragii, vel latronum.

Ad primum ergo dicendum, quod Martires sustinent personales impugnationes propter summum bonum, quod est Deus: ideo eorum fortitudo præcipue commendatur. Nec est extra genus fortitudinis quæ est circa bellica: unde dicuntur *fortes facti in bello*.

Ad secundum dicendum, quod res domesticæ, vel urbanæ distinguuntur contra res bellicas, quæ scilicet pertinent ad bella communia. In ipsis tamen rebus domesticis, vel urbanis possunt imminere pericula mortis ex impugnationibus quibuscumque, quæ sunt quædam particularia bella: & ita etiam circa huiusmodi potest esse proprie dicta fortitudo.

Ad tertium dicendum, quod pax reipublicæ est secundum se bona: nec reddit mala ex hoc quod aliqui male ea utuntur: nam & multi alii sunt qui bene ea utuntur; & multo peiora mala per eam prohibentur, scilicet homicidia, sacrilegia, quam ex ea occasionentur, quæ præcipue pertinent ad vitia carnis.

## ARTICULUS VI. 623

*Utrum sustinere sit principalis actus fortitudinis.*

*Sup. art. 3. cor. & inf. art. 8. corp. & art. 10. ad 3. & art. 11. ad 1. & quæst. cxxiv. art. 2. ad 3. & quæst. cxli. art. 2. & 3. cor. & II. dist. xxxiii. quæst. 11. art. 3. ad 6. & quæst. 111. art. 3. quæst. 1. cor. & virt. quæst. 1. art. 12. cor.*

**A**D sextum sic proceditur. Videtur quod sustinere non sit principalis actus fortitudinis. Virtus enim est circa difficile, & bonum, ut dicitur in II. Ethic. (cap. 111. cir. fin.) Sed difficilius est aggredi quam sustinere. Ergo sustinere non est præcipuus actus fortitudinis.

2. Præterea. Maioris potentie esse videtur quod aliquid possit in aliud agere, quam quod ipsum ab alio non immutetur. Sed aggredi est in aliud agere, sustinere autem est immobiliter perseverare. Cum ergo fortitudo perfectionem potentie nominet, videtur quod magis ad

fortitudinem pertineat aggredi quam sustinere.

3. Præterea. Magis distat ab uno contrariorum aliud contrarium, quam simplex eius negatio. Sed ille qui sustinet, hoc solum habet quod non timet; ille autem qui aggreditur, contrarie movetur timenti, quia insequitur. Ergo videtur quod cum fortitudo retrahat maxime animum a timore, magis pertineat ad eam aggredi quam sustinere.

Sed contra est quod Philosophus dicit in III. Ethic. (cap. ix. cir. princ.) quod *in sustinendo tristitia maxime aliqui fortes dicuntur*.

Respondeo dicendum, quod, sicut supra dictum est (art. 3. hu. quæst.) & Philosophus dicit in III. Ethic. (loc. cit.) *fortitudo est magis circa timores reprimendos quam circa audacias moderandas*. Difficilius enim est timorem reprimere quam audaciam moderari: eo quod ipsum periculum, quod est obiectum audaciæ, & timoris, de se consistit aliquid ad repressionem audaciæ, sed operatur ad augmentum timoris. Aggredi autem pertinet ad fortitudinem, secundum quod moderatur audaciam; sed sustinere sequitur repressionem timoris.

Et ideo principalior actus fortitudinis est sustinere, id est immobiliter sistere in periculis, quam aggredi.

Ad primum ergo dicendum, quod sustinere est difficilius quam aggredi, triplici ratione. Primo quidem quia sustinere videtur aliquis ab aliquo fortiori invadente: qui autem aggreditur, invadit per modum fortioris. Difficilius autem est pugnare cum fortiori quam cum debiliore. Secundo quia ille qui sustinet, iam sentit pericula imminencia; ille autem qui aggreditur, habet ea ut futura. Difficilius autem est non moveri a præsentibus quam a futuris. Tertio quia sustinere importat diuturnitatem temporis; sed aggredi potest aliquis ex subito motu. Difficilius autem est diu manere immobilem quam subito motu moveri ad aliquod arduum. Unde Philosophus dicit in III. Ethic. (cap. viii.) quod *quidam sunt prævalentes ante pericula, in ipsis autem discedunt; fortes autem e contrario se habent*.

Ad secundum dicendum, quod sustinere importat quidem passionem corporis, sed actum animæ fortissime inharrentis bono: ex quo sequitur quod non cedat passioni corporali iam imminenti. Virtus autem magis arctetur

dicur circa animam quam circa corpus.

Ad tertium dicendum, quod ille qui sustinet<sup>r</sup>, non timet præsente iam causa timoris, quam non habet præsentem ille qui aggreditur.

## ARTICULUS VII. 623

*Utrum fortis operetur propter bonum proprii habitus.*

**A**D septimum sic proceditur. Videtur quod fortis non operetur propter bonum proprii habitus. Finis enim in rebus agendis est prior in intentione, est tamen posterior in executione. Sed actus fortitudinis in executione est posterior quam ipse fortitudinis habitus. Non ergo potest esse quod fortis agat propter bonum proprii habitus.

2. Præterea. Augustinus dicit XIII. de Trin. (cap. viii. ante med.) *Virtutes, quas propter solam beatitudinem amamus, sic persuadere quidam nobis audent, scilicet dicendo eas propter se appetendas, ut ipsam beatitudinem non amemus. Quod si faciant, etiam ipsas amare utique desistimus, quando illam, propter quam solam ipsas amavimus, non amamus.* Sed fortitudo est quædam virtus. Ergo actus fortitudinis non est ad ipsam fortitudinem, sed ad beatitudinem referendus.

3. Præterea. Augustinus dicit in Lib. de moribus Ecclesiæ (cap. xv. cir. fi.) *quod fortitudo est amor omnia propter Deum facile preferens.* Deus autem non est ipse habitus fortitudinis, sed aliquid melius; sicut oportet finem meliorem esse his quæ sunt ad finem. Non ergo fortis agit propter bonum proprii habitus.

Sed contra est quod Philosophus dicit in III. Ethic. (cap. vii. ante med.) *quod forti fortitudo est bonum.* Talis autem est finis.

Respondeo dicendum, quod duplex est finis, scilicet proximus & ultimus. Finis autem proximus uniuscuiusque agentis est ut similitudinem suæ formæ in alterum inducat; sicut finis ignis calefacientis est ut inducat similitudinem sui caloris in patiente; & finis ædificatoris est ut inducat similitudinem suæ artis in materia. Quodcumque autem bonum ex hoc sequitur, si sit intentum, potest dici finis remotus agentis. Sicut autem in sensibilibus materia exterior disponitur

per artem; ita etiam in agibilibus per prudentiam disponuntur actus humani.

Sic ergo dicendum est, quod fortis sicut proximum finem intendit ut similitudinem sui habitus exprimat in actu, intendit enim agere secundum convenientiam sui habitus. Finis autem remotus est beatitudo, vel Deus.

Et per hoc patet responsio ad obiectiones. Nam prima ratio procedebat, ac si ipsa essentia habitus esset finis, non autem similitudo eius in actu, ut dictum est. Aliæ vero duæ procedunt de fine ultimo.

## ARTICULUS VIII. 624

*Utrum fortis delectetur in suo actu.*

**A**D octavum sic proceditur. Videtur quod fortis delectetur in suo actu. Delectatio enim est operatio connaturalis habitus non impedita, ut dicitur in X. Eth. (cap. iv. vi. & viii). Sed operatio fortis procedit ex habitu, qui agit in modum naturæ. Ergo fortis habet delectationem in suo actu.

2. Præterea. Ad Galat. v. super illud, *Fructus autem spiritus est caritas, gaudium, pax, dicit Ambrosius, quod opera virtutum dicuntur fructus, quia mentem hominis sancta, & sincera delectatione reficiunt.* Sed fortis agit opera virtutis. Ergo habet delectationem in suo actu.

3. Præterea. Debilius vincitur a fortiori. Sed fortis plus amat bonum virtutis quam proprium corpus, quod periculis mortis exponit. Ergo delectatio de bono virtutis evacuat dolorem corporalem; & ita delectabiliter omnia operatur.

Sed contra est quod Philosophus dicit in III. Eth. (cap. ix.) *quod fortis in suo actu nihil delectabile videtur habere.*

Respondeo dicendum, quod, sicut supra dictum est (1. 2. quæst. xxxi. art. 3. 4. & 5.) cum de passionibus ageretur, duplex est delectatio: una quidem corporalis, quæ consequitur tactum corporalem; alia autem animalis, quæ consequitur apprehensionem animæ: & hæc proprie consequitur opera virtutum, quia in eis consideratur bonum rationis. Principalis vero actus fortitudinis est sustinere aliqua tristitia secundum apprehensionem animæ; puta quod homo mittat corporalem vitam, quam virtuosus



mat, non solum inquantum est quoddam bonum naturale, sed etiam inquantum necessaria est ad opera virtutum, & quae ad ea pertinent: & iterum sustinere aliqua dolorosa secundum tactum corporis, puta vulnera, vel flagella. Et ideo fortis ex una parte habet unde delectetur, scilicet secundum delectationem animalem, scilicet de ipso actu virtutis, & de fine eius; ex alia vero parte habet unde doleat & animaliter, dum considerat amissionem propriae vitae, & corporaliter. Unde legitur II. Machab. vi. 30. quod Eleazarus dixit: *Diros corporis sustineo dolores; secundum animam vero propter timorem tuum libenter haec patior.*

Sensibilis autem dolor corporis facit non sentiri animalem delectationem virtutis, nisi forte propter abundantem Dei gratiam, quae fortius elevat animam ad divina, in quibus delectatur, quam a corporalibus poenis afficiatur; sicut beatus Tiburtius, cum super carbones incensus nudis plantis incederet, dixit, quod videbatur sibi super roseos flores ambulare.

Facit tamen virtus fortitudinis ut ratio non absorbeatur a corporalibus doloribus. Tristitiam autem animalem super delectatio virtutis, inquantum homo praefert bonum virtutis corporali vitae, & quibuscumque ad eam pertinentibus. Et ideo Philosophus dicit in III. Ethic. (cap. ix. & Lib. II. cap. iii.) quod a forti non requiritur ut delectetur, quasi delectationem sentiat, sed sufficit quod non tristetur.

Ad primum ergo dicendum, quod vehementia actus, vel passionis unius potentiae impedit aliam potentiam in suo actu: & ideo per dolorem sensus impeditur mens fortis ne in propria operatione delectationem sentiat.

Ad secundum dicendum, quod opera virtutum sunt delectabilia praecipue propter finem; possunt autem ex sui natura esse tristitia: & praecipue hoc contingit in tristitia. Unde Philosophus dicit in III. Eth. (cap. ix. ad fin.) quod non in omnibus virtutibus operari delectabiliter existit, praeterquam inquantum finem attingit.

Ad tertium dicendum, quod tristitia animalis vincitur in forti a delectatione virtutis. Sed quia dolor corporalis est sensibilior, & apprehensio sensitiva magis est homini in manifesto; inde est quod a magnitudine corporalis doloris quasi evanescit delectatio spiritualis, quae est de fine virtutis.

# ARTICULUS IX. 625

*Utrum fortitudo maxime consistat in repentinis.*

**A**D nonum sic proceditur. Videtur quod fortitudo non maxime consistat in repentinis. Illud enim videtur esse in repentinis quod ex inopinato provenit. Sed Tullius dicit in sua Rhetor. (Lib. II. de invent. aliquant. ante fin.) quod fortitudo est considerata periculorum susceptio, & laborum perpassio. Ergo fortitudo non consistit maxime in repentinis.

2. Præterea. Ambrosius dicit in I. de off. (cap. xxxviii. cit. med.) *Fortis viri est non dissimulare, cum aliquid imminet, sed praetendere, & tamquam explorare de specula quadam mentis, & obviare cogitatione provida rebus futuris, ne forte dicat postea: Ideo in ista incidi, quia non arbitrabar posse evenire.* Sed ubi est aliquod repentinum, ibi non potest provideri in futurum. Ergo operatio fortitudinis non est circa repentina.

3. Præterea. Philosophus dicit in III. Ethic. (cap. viii. a med.) quod fortis est bonae spei. Sed spes expectat aliquid in futurum, quod repugnat repentino. Ergo operatio fortitudinis non consistit circa repentina.

Sed contra est quod Philosophus dicit in III. Ethic. (cap. viii. ad fin.) quod fortitudo maxime est circa quaecumque quae mortem inferunt, repentina existantia.

Respondeo dicendum, quod in operatione fortitudinis duo sunt considerata. Unum quidem quantum ad electionem ipsius; & sic fortitudo non est circa repentina: eligit enim fortis praemeditari pericula, quae possunt imminere, ut eis resistere possit, aut facilius ea ferre: quia, ut Gregorius dicit in quadam homil. (xxxv. in Evang. in princ.) *iacula quae praevidentur, minus feriunt; & nos mala mundi facilius ferimus, si contra ea clypeo praescientiae premunimur.*

Aliud vero considerandum est in operatione fortitudinis quantum ad manifestationem virtuosi habitus; & sic fortitudo maxime est circa repentina: quia secundum Philosophum in III. Ethic. (cap. viii. ad fin.) in repentinis periculis maxime manifestatur fortitudinis habitus: habitus enim agit in modum naturae. Unde quod aliquis absque praemeditatione

ne faciat ea quæ sunt virtutis, cum necessitas imminet propter repentina pericula, hoc maxime manifestat quod sit fortitudo habitualis in anima confirmata.

Potest autem aliquis, etiam qui habitu fortitudinis caret, ex diuturna præmeditatione animum suum contra pericula præparare: quia etiam præparatione fortis utitur, cum tempus adest.

Et per hoc patet responso ad obiecta.

## ARTICULUS X. 626

*Utrum fortis utatur ira in suo actu.*

*Infra art. 11. ad 1. & ver. quest. xxvi.  
art. 7. cor. fin. & III. Eth. lect. 17.*

**A**D decimum sic proceditur. Videtur quod fortis non utatur ira in actu suo. Nullus enim debet assumere quasi instrumentum suæ actionis illud quo non potest uti pro suo arbitrio. Sed homo non potest uti ira pro suo arbitrio, ut scilicet possit eam assumere cum velit, & deponere cum velit: ut enim Philosophus dicit in libro de memoria (cap. 11. sub fin.) quando passio corporalis mota est, non statim quiescit, ut homo vult. Ergo fortis non debet assumere iram ad suam operationem.

2. Præterea, ille qui per seipsum sufficit ad aliquid peragendum, non debet in auxilium sui assumere id quod est infirmius, & imperfectius. Sed ratio per seipsum sufficit ad opus fortitudinis exequendum, in quo iracundia deficit: unde Seneca dicit in Lib. 1. de ira (cap. xvi. inter princ. & med.) *Non ad providendum tantum, sed ad res gerendas satis est per seipsum ratio: & quid stultius est quam hanc ab iracundia petere prædictum? rem stabilem ab incerta, fidem ab infida, sanam ab ægra?* Ergo fortitudo non debet iram assumere.

3. Præterea, sicut aliqui propter iram opera fortitudinis vehementius exequuntur, ita etiam propter tristitiam, vel concupiscentiam: unde Philosophus dicit in III. Ethic. (cap. viii.) quod sæpe propter tristitiam, sive dolorem incitantur ad pericula; & adulteri propter concupiscentiam multa audacia operantur. Sed fortitudo non assumit ad actum suum neque tristitiam, neque concupiscentiam. Ergo pari ratione non debet assumere iram.

Sed contra est quod Philosophus dicit in III. Ethic. (loc. cit.) quod *furor cooperatur fortibus.*

Respondeo dicendum, quod de ira, & de ceteris anime passionibus, sicut supra dictum est (1. 2. quest. xxiv. art. 2.) aliter sunt locuti Peripatetici, & aliter Stoici. Stoici enim iram, & omnes alias passiones animæ ab animo sapientis, sive virtuosus excludebant. Peripatetici vero, quorum princeps fuit Aristoteles, & iram, & alias animæ passiones attribuebant virtuosus, sed moderatas ratione.

Et forte quantum ad rem non differant, sed solum quantum ad modum loquendi. Nam Peripatetici omnes motus appetitus sensitivi qualitercumque se habentes, passiones animæ nominabant, ut supra dictum est (1. 2. quest. xxiv. art. 2.) Et quia appetitus sensitivus movetur per imperium rationis, ad hoc quod cooperetur ad promptius agendum; idcirco ponebat, & iram, & alias passiones animæ assumendas esse a virtuosus, moderatas secundum imperium rationis. Stoici vero vocabant animæ passiones immoderatas quosdam affectus appetitus sensitivi, unde nominabant eas ægritudines, vel morbos: & ideo penitus eas a virtute separabant.

Sic ergo iram moderatam assumit fortis ad suum actum, non autem iram immoderatam.

Ad primum ergo dicendum, quod ira moderata secundum rationem subiicitur imperio rationis: unde consequens est ut homo ea utatur pro suo arbitrio, non autem si esset immoderata.

Ad secundum dicendum, quod ratio non assumit iram ad suum actum, quasi auxilium ab ea accipiens, sed quia utitur appetitu sensitivo ut instrumento, sicut & membris corporis. Nec est inconveniens, si instrumentum sit imperfectius principali agente, ut martellus iatro. Seneca autem sectator fuit Stoicorum, & directe contra Aristotelem verba præmissa proponit.

Ad tertium dicendum, quod cum fortitudo, sicut dictum est (art. 6. hui. quest.) habeat duos actus, scilicet sustinere, & aggredi, non assumit iram ad actum sustinendi, quia hunc actum sola ratio per se facit; sed ad actum aggrediendi, ad quem magis assumit iram quam alias passiones, quia ad iram pertinet insilire in rem contristantem; & sic directe cooperatur fortitudini in aggrediendo. Tristitia autem secundum propriam rationem succumbit nocivo; sed per accidens coadiuvat ad aggrediendum, vel in quantum tristitia est causa iræ, ut supra

pra dictum est (1. 2. quaest. xlviii. art. 3.) vel inquantum aliquis exponit se periculo, ut tristitiam fugiat. Similiter etiam concupiscentia secundum propriam rationem tendit in bonum delectabile, cui per se repugnat aggressio periculum; sed per accidens quandoque coadiuvat ad aggrediendum, inquantum scilicet aliquis vult potius in pericula incidere quam delectabili carere. Et ideo Philosophus dicit in III. Eth. (cap. viii. a med.) quod *inter fortitudines quae sunt ex passione, naturalissima esse videtur quae est per iram, & accipiens electionem, & cuius gratia, scilicet debitum finem, (a) fortitudo sit vera.*

## ARTICULUS XI. 627

*Utrum fortitudo sit virtus cardinalis.*

*Inf. quaest. cxli. art. 7. & 12. quaest. lxi. art. 2. & 3. & quaest. lxxv. art. 2. & 4. cor. & III. dist. xxxiii. quaest. 11. art. 1. quaest. 3. & 4. & vir. quaest. 1. art. 12. ad 25. & 26. & quaest. v. art. 2.*

**A**D undecimum sic proceditur. Videtur quod fortitudo non sit virtus cardinalis. Ira enim, ut dictum est (art. praec.) maximam affinitatem habet ad fortitudinem. Sed ira non ponitur passio principalis; nec etiam audacia, quae ad fortitudinem pertinet. Ergo nec fortitudo debet poni virtus cardinalis.

2. Praeterea. Virtus ordinatur ad bonum. Sed fortitudo non directe ordinatur ad bonum, sed magis ad malum, scilicet ad sustinendum pericula, & labores, ut Tullius dicit (Lib. II. de invent. aliquant. ante fin.) Ergo fortitudo non est virtus cardinalis.

3. Praeterea. Virtus cardinalis est circa ea in quibus praecipue versatur vita humana, sicut ostium in cardine vertitur. Sed fortitudo est circa pericula mortis, quae raro occurrunt in vita humana. Ergo fortitudo non debet poni virtus cardinalis, sive principalis.

Sed contra est quod Gregorius XXII. Mor. (cap. 1. a med.) & Ambrosius super Luc. (cap. vi. sup. illud, *Beati pauperes*) & Augustinus in Lib. de morib. Ecclesiae (cap. xv.) numerant fortitudinem inter quatuor virtutes cardinales, sive principales.

Respondeo dicendum, quod, sicut supra dictum est (1. 2. quaest. lxi. art. 3. & 4.) virtutes cardinales, sive principales di-

cuntur quae praecipue sibi vendicant id quod pertinet communiter ad virtutes. Inter alias autem communes virtutis conditiones una ponitur *firmiter operari*, ut patet in II. Ethic. (cap. iv.) Laudem autem firmitatis potissime sibi vendicat fortitudo. Tanto enim magis laudatur qui firmiter stat, quanto habet gravius impellens ad cadendum, vel ad retrocedendum. Impellit autem hominem ad discedendum ab eo quod est secundum rationem, & bonum delectans, & malum affligens. Sed gravius impellit dolor corporis quam voluptas. Dicit enim Augustinus in Lib. lxxxiii. Qq. (quaest. xxxvi. aliquant. a princ.) *Nemo est qui non magis fugiat dolorem, quam appetat voluptatem. Namque videmus, etiam immansissimas bestias a maximis voluptatibus absterri dolorum metu.* Et inter dolores animi, & pericula maxime timentur ea quae ducunt ad mortem, contra quae firmiter stat fortis. Unde fortitudo est virtus cardinalis.

Ad primum ergo dicendum, quod audacia, & ira non cooperantur fortitudini ad actum eius, qui est sustinere, in quo praecipue commendatur firmitas eius: per hunc enim actum fortis cohibet timorem, qui est passio principalis, ut supra dictum est (1. 2. quaest. xxv. art. 4.)

Ad secundum dicendum, quod virtus ordinatur ad bonum rationis, quod conservari oportet contra impulsus malorum. Fortitudo autem ordinatur ad mala corporalia, sicut ad contraria, quibus resistit; ad bonum autem rationis, sicut ad finem, quem intendit conservare.

Ad tertium dicendum, quod quamvis pericula mortis raro immincant, tamen occasiones illorum periculum frequenter occurrunt, dum scilicet homini adversari mortales fuscitantur propter iustitiam, quam sequitur, & etiam propter alia bona quae facit.

## ARTICULUS XII. 628

*Utrum fortitudo praecellat inter omnes alias virtutes.*

**A**D duodecimum sic proceditur. Videtur quod fortitudo praecellat inter omnes alias virtutes. Dicit enim Ambrosius in I. de offic. (cap. xxxv. in princ.) *Est fortitudo velut ceteris excellior.*

2. Pra-

(a) Ita omnes edd. post Garciam, Cod. Alcan, fortitudo sic fgt: vera. Edit. Rom, fortitudo fuit.

2. Præterea. Virtus est circa difficile, & bonum. Sed fortitudo est circa difficilissima. Ergo est maxima virtutum.

3. Præterea. Dignior est persona hominis quam res eius. Sed fortitudo est circa personam hominis, quam aliquis periculo mortis exponit propter bonum virtutis; iustitia autem, & aliae virtutes morales sunt circa alias res exteriores. Ergo fortitudo est præcipua inter omnes virtutes morales.

4. Sed contra est quod Thullius dicit in I. de offic. (in tit. de iustitia): *In iustitia virtutis splendor est maximus, ex qua viri boni nominantur.*

5. Præterea. Philosophus dicit in I. Rhetor. (cap. ix. parum a princ.) *Necesse est maximas esse virtutes quæ maxime aliis sunt.* Sed liberalitas videtur magis utilis quam fortitudo. Ergo est maior virtus.

Respondeo dicendum, quod, sicut Augustinus dicit in VI. de Trin. (cap. viii. parum a princ.) *in his quæ non mole magna sunt, idem est esse maius, quod melius: unde tanto aliqua virtus maior est, quanto melior est.* Bonum autem rationis est hominis bonum, secundum Dionysium iv. cap. de div. Nom. (part. iv. lect. 22.) Hoc autem bonum essentialiter quidem habet prudentia, quæ est perfectio rationis; iustitia autem est huius boni factiva, in quantum scilicet ad ipsam pertinet ordinem rationis ponere in omnibus rebus humanis. Aliæ autem virtutes sunt conservativæ huius boni, in quantum scilicet moderantur passionibus, ne abducant hominem a bono rationis. Et in ordine harum fortitudo tenet locum præcipuum, quia timor periculorum mortis maxime est efficax ad hoc quod hominem faciat recedere a bono rationis: post quam ordinatur temperantia, quia etiam delectationes tactus maxime inter cetera impediunt bonum rationis. Id autem quod essentialiter dicitur, potius est eo quod dicitur effective; & hoc etiam potius est eo quod dicitur conservative secundum remotionem impedimenti.

Unde inter virtutes cardinales est post prudentia, secunda iustitia, tertia fortitudo, quarta temperantia; & post has ceteræ virtutes.

Ad primum ergo dicendum, quod Ambrosius fortitudinem aliis virtutibus præfert, secundum quamdam generalem utilitatem, prout scilicet & in rebus bellicis, & in rebus civilibus, & domesticis

utilis est. Unde ipse ibidem præmittit: *Nunc de fortitudine tractemus, quæ velut excellor ceteris, dividitur in res bellicas, & domesticas.*

Ad secundum dicendum, quod ratio virtutis magis consistit in bono quam in difficili. Unde magis est mensuranda magnitudo virtutis secundum rationem boni quam secundum rationem difficultis.

Ad tertium dicendum, quod homo non exponit personam suam mortis periculis nisi propter iustitiam conservandam; & ideo laus fortitudinis dependet quodammodo ex iustitia. Unde Ambrosius dicit in I. de offic. (cap. xxxv. ante med.) *quod fortitudo sine iustitia iniquitatis est materia: quod enim validior est, eo promptior ut inferiorem opprimat.*

Quantum concedimus.

Ad quintum dicendum, quod liberalitas utilis est in quibusdam particularibus beneficiis; sed fortitudo habet utilitatem generalem ad conservandum totum iustitiæ ordinem. Et ideo Philosophus dicit in Rhet. (cap. ix. a princip.) *quod iusti, & fortes maxime amantur, quia sunt maxime utiles in bello, & in pace.*

## QUAESTIO CXXIV.

### De martyrio.

#### in quinque articulis divisa.

**D**Einde considerandum est de martyrio: & circa hoc quaeruntur quinque.

Primo, utrum martyrium sit actus virtutis.

Secundo, cuius virtutis sit actus.

Tertio de perfectione huius actus.

Quarto de poena martyrii.

Quinto de causa.

## ARTICULUS I. 629

### Utrum martyrium sit actus virtutis.

**A**D primum sic proceditur. Videtur quod martyrium non sit actus virtutis. Omnis enim actus virtutis est voluntarius. Sed martyrium quandoque non est voluntarium, ut patet de innocentibus pro Christo occisis, de quibus dicit Hilarius sup. Matth. (can. 2. in fin.) *quod in aeternitatis profectum per martyrii gloriam efferebantur.* Ergo martyrium non est actus virtutis.

2. Præterea. Nullum illicitum est actus.

Actus virtutis. Sed occidere seipsum est illicitum, ut supra habitum est (quaest. lxxv. art. 5.) per quod tamen martyrium consummatur: dicit enim Augustinus in I. de civ. Dei (cap. xxvi. in princ.) quod *quedam sancta femina tempore persecutionis, ut insecutores suae pudicitiae devitarent, se in fluvium deiecerunt, eoque modo defunctae sunt, earumque martyria in catholica Ecclesia veneratione celeberrima frequentantur*. Non ergo martyrium est actus virtutis.

3. Præterea. Laudabile est quod aliquis sponte se offerat ad exequendum actum virtutis. Sed non est laudabile quod aliquis martyrio se ingerat, sed magis videtur esse presumptuosum, & periculosum. Non ergo martyrium est actus virtutis.

Sed contra est quod præmiū beatitudinis non debetur nisi actui virtutis. Debetur autem martyrio, secundum illud Matth. v. 10. *Beati qui persecutionem patiuntur propter iustitiam, quoniam ipsorum est regnum caelorum*. Ergo martyrium est actus virtutis.

Respondendo dicendum, quod, sicut dictum est (quaest. præc. art. 1. & 3.) ad virtutem pertinet quod aliquis in bono rationis conservetur. Consistit autem bonum rationis in veritate sicut in proprio obiecto, & in iustitia sicut in proprio effectu, sicut ex supra dictis patet (quaest. cix. art. 1. & 2. & quaest. præc. art. 12.) Pertinet autem ad rationem martyrii ut aliquis firmiter stet in veritate, & iustitia contra presequendum impetum. Unde manifestum est quod martyrium est actus virtutis.

Ad primum ergo dicendum, quod quidam dixerunt, quod innocentibus acceleratus est miraculose liberi arbitrii usus, ita quod etiam voluntarie martyrium passi sunt.

Sed quia hoc per auctoritatem Scripturae non comprobatur, ideo melius dicendum est, quod martyrii gloriam, quam in aliis propria voluntas meretur, illi parvuli occisi per Dei gratiam sunt affecti. Nam effusio sanguinis propter Christum vicem gerit baptismatis. Unde sicut in pueris baptizatis per gratiam baptismalem meritum Christi operatur ad gloriam obtinendam; ita & in occisis propter Christum (a) meritum martyrii Christi operatur ad palmam martyrii consequendam. Unde Augustinus dicit in quodam sermone de Epiph. (lxxvi.

de divers. cap. 111. in med.) quasi eos alloquens: *Ille de vestra corona dubitabit in passione pro Christo, qui etiam parvulis baptismum prodesse non aestimavit Christus. Non habebatis ætatem, qua in passurum Christum crederetis; sed habebatis carnem, in qua pro Christo passuro passionem sustineretis*.

Ad secundum dicendum, quod Augustinus ibidem dicit, esse possibile quod aliquibus fide dignis testificationibus divina persuaserit auctoritas Ecclesiae, ut dictarum Sanctorum memoriam honoraret.

Ad tertium dicendum, quod præcepta legis dantur de actibus virtutum. Dictum autem est supra (quaest. cviii. art. 1. ad 4.) quaedam præcepta legis divinae tradita esse secundum præparationem animi, ut scilicet homo sit paratus hoc, vel illud facere; cum fuerit opportunum. Ita etiam & aliqua pertinent ad actum virtutis secundum præparationem animi, ut scilicet superveniente tali casu, homo secundum rationem agat. Et hoc præceptum videtur observandum in martyrio, quod consistit in debita sustentia passionum iniuste infligatarum. Non autem debet homo occasionem dare alteri iniuste agendi; sed si alius iniuste egerit, ipse moderate tolerare debet.

## ARTICULUS II. 630

*Utrum martyrium sit actus fortitudinis.*

**A**D secundum sic proceditur. Videtur quod martyrium non sit actus fortitudinis. Dicitur enim *propterea in greco, quasi testis*. Testimonium autem redditur fidei Christi, secundum illud Act. 1. 8. *Eritis mihi testes in Hierusalem &c.* & Maximus dicit in quodam sermone: *Mater martyrii est fides catholica, in qua illustres athletæ suo sanguine subscripserunt*. Ergo martyrium est potius actus fidei quam fortitudinis.

2. Præterea. Actus laudabilis ad illam virtutem præcipue pertinet quæ ad ipsum inclinatur, & quæ ab ipso manifestatur, & sine qua ipse non valet. Sed ad martyrium præcipue inclinatur caritas: unde in quodam sermone Maximi dicitur: *Caritas Christi in suis martyribus vincit*. Maxime etiam caritas per actum martyrii manifestatur, secundum illud Ioan. xv. 13. *Maiorem dilectionem nemo habet, quam ut animam suam ponat quis pro amicis suis*. Sine caritate etiam

mar-

(a) Ita mss. & editi passim. Ad meritum Christi, ita meritum martyrii tantum.

martyrium nihil valet, secundum illud 1. ad Corinth. XIII. 3. *Si tradidero corpus meum, ita ut ardeam, caritatem autem non habuero, nihil mihi prodest.* Ergo martyrium magis est actus caritatis quam fortitudinis.

3. Præterea. Augustinus dicit in quodam sermone de S. Cypriano: *Facile est martyrem celebrando venerari, magnum vero fidem eius, & patientiam imitari.* Sed in unoquoque actu virtutis præcipue laudatur virtus cuius est actus. Ergo martyrium magis est actus patientiæ quam fortitudinis.

Sed contra est quod Cyprianus dicit in epist. ad Martyres, & Confessores (Lib. II. epist. vi. parum a princ.) *O beati Martyres, quibus vos laudibus prædicem? O milites fortissimi, robur pectoris vestri quo præconio vocis explicem?* Quilibet autem laudatur ex virtute cuius actum exercet. Ergo martyrium est actus fortitudinis.

Respondeo dicendum, quod, sicut ex supra dictis patet (quæst. præc. art. 1. & seq.) ad fortitudinem pertinet ut confirmet hominem in bono virtutis, & maxime contra pericula, & præcipue contra pericula mortis, & maxime eius quæ est in bello. Manifestum est autem quod in martyrio homo firmiter confirmatur in bono virtutis, dum fidem, & iustitiam non deserit propter riminentia pericula mortis, quæ etiam in quodam certamine particulari a persecutoribus imminet. Unde Cyprianus dicit in quodam serm. (loc. sup. cit.) *Vidit admirans præsentium multitudo cæleste certamen, & in prælio stetit servus Christi voce libera, mente incorrupta, virtute divina.* Unde manifestum est quod martyrium est fortitudinis actus: & propter hoc de martyribus legit Ecclesia: *Fortes facti sunt in bello.*

Ad primum ergo dicendum, quod in actu fortitudinis duo sunt considerata: quorum unum est bonum, in quo fortis firmatur; & hoc est fortitudinis finis: aliud est ipsa firmitas, qua quis non cedit contrariis prohibentibus ab illo bono; & in hoc consistit essentia fortitudinis. Sicut autem fortitudo civilis firmat animum hominis in iustitia humana, propter cuius conservationem mortis pericula sustinet; ita etiam fortitudo gratuita firmat animam hominis in bono iustitiæ Dei, quæ est per fidem Christi Iesu, ut dicitur ad Rom. XII. 22. Et sic martyrium comparatur ad fidem sicut ad fi-

nem in quo aliquis confirmatur, ad fortitudinem autem sicut ad habitum elicientem.

Ad secundum dicendum, quod ad actum martyrii inclinat quidem caritas sicut primum & principale motivum, per modum virtutis imperantis; fortitudo autem sicut motivum proprium, per modum virtutis elicientis. Et inde est quod martyrium est actus caritatis ut imperantis, fortitudinis autem ut elicientis. Inde etiam etiam est quod utramque virtutem manifestat. Quod autem sit meritum, hoc habet ex caritate, sicut & quilibet virtutis actus. Et ideo sine caritate non valet.

Ad tertium dicendum, quod, sicut dictum est (quæst. præc. art. 6.) principalior actus fortitudinis est sustinere; ad quem pertinet martyrium, non autem ad secundarium actum eius, qui est aggredi. Et quia patientia deservit fortitudini ex parte actus principalis, qui est sustinere; inde est quod concomitanter in martyribus patientia commendatur.

### ARTICULUS III. 631

*Utrum martyrium sit actus maximæ perfectionis.*

*Inf. quæst. cxxxiv. art. 5. ad 3.*

**A**D tertium sic proceditur. Videtur quod martyrium non sit actus maximæ perfectionis. Illud enim ad perfectionem videtur pertinere quod cadit sub consilio, non sub præcepto, quia scilicet non est de necessitate salutis. Sed martyrium videtur esse de necessitate salutis: dicit enim Apostolus ad Rom. x. 10. *Corde creditur ad iustitiam, ore autem fit confessio ad salutem;* & 1. Ioan. III. 16. dicitur, *quod nos debemus pro fratribus animas nostras ponere.* Ergo martyrium non pertinet ad perfectionem.

2. Præterea. Ad maiorem perfectionem videtur pertinere quod aliquis det Deo animam, quod fit per obedientiam, quam quod Deo det proprium corpus, quod fit per martyrium: unde Gregorius dicit ult. Moral. (cap. x. parum a princ.) *quod obedientia cunctis viciis præferitur.* Ergo martyrium non est actus maximæ perfectionis.

3. Præterea. Melius esse videtur aliis prodesse quam seipsum in bono conservare: quia *bonum gentis melius est quam bonum unius hominis*, secundum Philo-

Iosophum in I. Ethic. (cap. 11. in fi.) Sed ille qui martyrium sustinet, sibi soli prodest; ille autem qui docet, proficit multis. Ergo actus docendi, & gubernandi subditos est perfectior quam actus martyrii.

Sed contra est quod Augustinus in Lib. de sancta virginitate (cap. xlv. in fi.) praefert martyrium virginitati, quae ad perfectionem pertinet. Ergo martyrium maxime ad perfectionem pertinere videtur.

Respondendo dicendum, quod de aliquo actu virtutis loqui possumus dupliciter. Uno modo secundum speciem actus ipsius, prout comparatur ad virtutem proximam efficientem ipsum; & sic non potest esse quod martyrium, quod consistit in debita tolerantia mortis, sit perfectissimus inter virtutis actus: quia tolerare mortem non est laudabile secundum se, sed solum secundum quod ordinatur ad aliquod bonum, quod consistit in actu virtutis, puta ad fidem, & ad dilectionem Dei: unde ille actus virtutis, cum sit finis, melior est.

Alio modo potest considerari actus virtutis, secundum quod comparatur ad primum motivum, quod est amor caritatis. & ex hac parte praecipue aliquis actus habet quod ad perfectionem vitae pertineat: quia, ut Apostolus dicit ad Col. 111. 14. *caritas est apostolorum perfectissima*. Martyrium autem inter omnes actus virtuos maxime demonstrat perfectionem caritatis: quia tanto magis ostenditur aliquis aliquam rem amare, quanto pro ea rem magis amatam contemnit, & eam magis odiosam eligit pati. Manifestum est autem quod inter omnia alia bona praesentis vitae maxime amat homo ipsam vitam, & e contrario maxime odit ipsam mortem, & praecipue cum doloribus corporalem tormentorum; quorum metu etiam bruta animalia a maximis voluptatibus abstrahuntur, ut Augustinus dicit in Lib. lxxxiii. Qq. (quaest. xxxv. inter princ. & med.) Et secundum hoc patet quod martyrium inter ceteros actus humanos est perfectissimum secundum suum genus, quasi maxime caritatis signum, secundum illud Ioan. xv. 13. *Maiores caritatem nemo habet quam ut animam suam ponat quis pro amicis suis*.

Ad primum ergo dicendum, quod nullus est actus perfectionis sub consilio cadens, qui in aliquo eventu non cadat sub praecepto, quasi de necessitate salutis existens; sicut Augustinus dicit in

Lib. de adulterinis coniugiis (cap. x111.) quod aliquis incidit in necessitatem continentiae servandae propter abtentionem, vel infirmitatem uxoris. Et ideo non est contra perfectionem martyrii, si in aliquo casu sit de necessitate salutis: est enim aliquis casus in quo martyrium perferre non est de necessitate salutis, puta cum ex zelo fidei, & caritate fraterna multoties leguntur sancti martyres sponte se obtulisse martyrio. Illa autem praecepta sunt intelligenda secundum praerogationem animi.

Ad secundum dicendum, quod martyrium completitur id quod summum in obedientia esse potest, ut scilicet aliquis sit obediens usque ad mortem, sicut legitur de Christo ad Philip. 11. 8. *quod factus est obediens usque ad mortem*. Unde patet quod martyrium secundum se est perfectius quam obedientia absolute dicta.

Ad tertium dicendum, quod ratio illa procedit de martyrio secundum propriam speciem actus, ex qua non habet excellentiam inter omnes actus virtutum; sicut nec sortitudo est excellentior inter omnes virtutes.

#### ARTICULUS IV. 632

*Utrum mors sit de ratione martyrii.*

*IV. dist. xlix. quaest. v. art. 3. quaest. 2.*

**A**D quartum sic proceditur. Videtur quod mors non sit de ratione martyrii. Dicit enim Hieronymus in sermone Assumpti. (seu epist. ad Paul. & Eustoch. inter med. & fin.) *Relle dixerim, quod Dei Genitrix virgo, & martyr fuit, quamvis in pace vitam finiverit*: & Gregorius dicit (hom. 111. in Evang. in fi.) *Quamvis occasio persecutionis desit, habet tamen & pax nostra suum martyrium: quia est carnalis colla ferro non subitimus, spirituali tamen gladio carnalia desideria in mente trucidamus*. Ergo absque passione mortis potest esse martyrium.

2. Praeterea. Pro integritate carnis servanda aliquae mulieres leguntur laudabiliter contempsisse vitam suam; & ita videtur quod corporalis integritas castitatis praefatur vitae corporali. Sed quandoque ipsa integritas carnis aufertur, aut auferri intenditur pro confessione fidei christianae, ut patet de Agnere, & Lucia. Ergo videtur quod martyrium magis debeat dici, si aliqua mulier pro fide Christi integritatem carnis perdat, quam

G

si et-

si etiam perderet corporalem vitam: unde & Lucia dixit: *Si me invitam feceris violari, castitas mihi duplicabitur ad coronam*.

3. Præterea. Martyrium est fortitudinis actus. Ad fortitudinem autem pertinet non solum mortem non formidare, sed nec alias adversitates, ut Augustinus dicit in VI. Mulieræ (cap. xv. ad fi.). Sed multæ sunt aliæ adversitates præter mortem, quas aliqui possunt sustinere pro fide Christi, scilicet carcerem, exilium, rapinam bonorum, ut patet ad Heb. x. unde & sancti Marcelli Patres martyrium celebrant, qui tamen fuit mortuus in carcere. Ergo non est de martyrii necessitate quod aliquis sustineat penam mortis.

4. Præterea. Martyrium est actus meritorius, ut dictum est (art. præc. & art. 2. huius quæst. ad 1.) Sed actus meritorius non potest esse post mortem. Ergo ante mortem: & ita mors non est de ratione martyrii.

Sed contra est quod Maximus dicit in quodam sermone de martyr. quod *vincit pro fide moriendo, qui vinceretur sine fide vivendo*.

Respondeo dicendum, quod, sicut dictum est (art. 2. huius quæst.) martyr dicitur quasi testis fidei christianæ, per quam nobis visibilia pro invisibilibus contemnenda proponuntur, ut dicitur ad Hebr. xi.

Ad martyrium ergo pertinet ut homo testificetur fidem, se opere ostendens omnia præsentia contemnere, ut ad futura, & invisibilia bona perveniat. Quamdiu autem homini remanet vita corporalis, nondum se opere ostendit corporalia cuncta despiciere. Consueverunt enim homines & consanguineos, & omnia bona possessa contemnere, & etiam dolores corporis pati, ut vitam conservent. Unde & Satan contra Iob induxit (Iob 11. 4.) *Pellem pro pelle. & cuncta quæ homo habet, dabit pro anima sua*, idest pro vita sua corporali. Et ideo ad perfectam rationem martyrii requiritur quod aliquis mortem sustineat propter Christum.

Ad primum ergo dicendum, quod illæ autoritates, & si quæ similes inveniantur, loquuntur de martyrio per quamdam similitudinem.

Ad secundum dicendum, quod in muliere quæ integritatem carnis perdit, vel ad perdendam eam damnatur occasione fidei christianæ, non est apud homines manifestum utrum hoc mulier patitur propter amorem fidei christianæ;

vel magis pro contemptu castitatis: & ideo apud homines non redditur per hoc testimonium sufficiens: unde hoc non proprie habet rationem martyrii. Sed apud Deum, qui corda scrutatur, potest hoc ad præmium deputari, sicut Lucia dicit.

Ad tertium dicendum, quod, sicut supra dictum est (quæst. præc. art. 4. & 5.) fortitudo principaliter consistit circa pericula mortis, circa alia autem consequenter: & ideo nec martyrium proprie dicitur pro sola tolerantia carceris, vel exilii, vel rapinæ divitiarum, nisi forte secundum quod ex his sequitur mors.

Ad quartum dicendum, quod meritum martyrii non est post mortem, sed in ipsa voluntaria sustinentia mortis, pro ut scilicet aliquis voluntarie patitur afflictionem mortis. Contingit tamen quandoque quod aliquis post mortalia vulnera pro Christo suscepta, vel quascumque alias tribulationes continuatas usque ad mortem, quas a persecutoribus patitur pro fide Christi, diu vivat: in quo statu actus martyrii meritorius est, & etiam ipso eodem tempore quo huiusmodi afflictiones patitur.

## ARTICULUS V. 633

*Utrum sola fides sit causa martyrii.*

IV. dist. xlix. quæst. v. art. 3. quæst. 2. cor. & ad 9. 10. & 12. & Rom. viii. let. 7.

AD quintum sic proceditur. Videtur quod sola fides sit causa martyrii. Dicitur enim I. Pet. iv. 13. *Nemo vestrum patietur ut homicida, aut fur, aut aliquid huiusmodi; si autem ut Christianus, non erubescat, glorificet autem Deum in ipso nomine*. Sed ex hoc dicitur aliquis Christianus, quia tenet fidem Christi. Ergo sola fides Christi dat patientibus martyrii gloriam.

2. Præterea. Martyr dicitur quasi testis. Testimonium autem non redditur nisi veritati. Non autem aliquis dicitur martyr ex testimonio cuiuslibet veritatis, sed solum ex testimonio veritatis divine: alioquin si quis moretur pro confessione veritatis Geometrie, vel alterius speculative scientiæ, esset martyr: quod videtur ridiculum. Ergo sola fides est martyrii causa.

3. Præterea. Inter alia virtutum opera illa videntur esse potiora quæ ordinantur ad bonum commune: quia *bonum gentis melius est quam bonum unius hominis*,



*nis*, secundum Philosophum in I. Ethic. (cap. 11. in fin.) Si ergo aliquid aliud bonum esset causa martyrii, maxime videretur quod illi essent martyres qui pro defensione reipublicæ moriuntur: quod Ecclesiae observatio non habet: non enim militum qui in bello iusto moriuntur, martyria celebrantur. Ergo sola fides videtur esse martyrii causa.

Sed contra est quod dicitur Matth. v. 10. *Beati qui persecutionem patiuntur propter iustitiam*: quod pertinet ad martyrium, ut Glossa (ord. & Hieron. in hunc loc.) ibidem dicit. Ad iustitiam autem pertinet non solum fides, sed etiam aliae virtutes. Ergo & aliae virtutes possunt esse martyrii causa.

Respondendo dicendum, quod, sicut dictum est (art. præc.) martyres dicuntur quasi testes, quia scilicet corporalibus suis passionibus usque ad mortem testimonium perhibent veritati, non cuiusque, sed veritati quæ secundum pietatem est, quæ per Christum nobis innotuit: unde & martyres Christi dicuntur quasi testes ipsius. Huiusmodi autem est veritas fidei. Et ideo cuiuslibet martyrii causa est fidei veritas.

Sed ad fidei veritatem non solum pertinet ipsa credulitas cordis, sed etiam exterior protestatio: quæ quidem fit non solum per verba, quibus aliquis confitetur fidem, sed etiam per facta, quibus aliquis fidem se habere ostendit, secundum illud Iacobi 11. 18. *Ego ostendam tibi ex operibus fidem meam*. Unde & de quibusdam dicitur ad Titum 1. 16. *Confitentur verbis se nosse Deum, factis autem negant*. Et ideo omnium virtutum opera, secundum quod referuntur in Deum, sunt quedam protestationes fidei, per quam nobis innotescit quod Deus huiusmodi opera a nobis requirit, & nos pro eis remunerat: & secundum hoc possunt esse martyrii causa. Unde & beati Iohannis Baptiste martyrium in Ecclesia celebratur, qui non pro neganda fide, sed pro reprehensione adulterii mortem sustinuit.

Ad primum ergo dicendum, quod Christianus dicitur qui Christi est. Dicitur autem aliquis esse Christi, non solum ex eo quod habet fidem Christi, sed etiam ex eo quod spiritu Christi ad opera virtuosus procedit, secundum illud ad Rom. viii. 9. *Si quis spiritum Christi non habet, hic non est eius*: & etiam ex hoc quod ad imitationem Christi peccatis moritur, secundum illud ad Galat. v. 24.

*Qui Christi sunt, carnem suam crucifixerunt cum vitiis, & concupiscentiis*. Et ideo ut Christianus patitur, non solum qui patitur pro fidei confessione, quæ fit per verba, sed etiam quicumque patitur pro quocumque bono opere faciendo, vel pro quocumque peccato vitando propter Christum, quia hoc totum pertinet ad fidei protestationem.

Ad secundum dicendum, quod veritas aliarum scientiarum non pertinet ad cultum Divinitatis: & ideo non dicitur esse veritas secundum pietatem, unde nec eius confessio potest esse directæ martyrii causa. Sed quia omne mendacium peccatum est, ut supra habitum est (quæst. cx. art. 3. & 4.) vitatio mendacii, contra quancumque veritatem sit, inquantum mendacium est peccatum divinæ legi contrarium, potest esse martyrii causa.

Ad tertium dicendum, quod bonum reipublicæ est præcipuum inter bona humana. Sed bonum divinum, quod est propria causa martyrii, est potius quam humanum. Tamen quia bonum humanum potest esse divinum, ut si refertur in Deum; ideo potest esse quoddamque bonum humanum martyrii causa, secundum quod in Deum refertur.

## QUAESTIO CXXV.

De timore,

in quatuor articulos divisa.

**D**Einde considerandum est de vitiis oppositis fortitudini: & primo de timore; secundo de intimiditate; tertio de audacia.

Circa primum quaeruntur quatuor.

Primo, utrum timor sit peccatum.

Secundo, utrum opponatur fortitudini.

Tertio, utrum sit peccatum mortale.

Quarto, utrum excuset, vel diminuat peccatum.

## ARTICULUS I. 634

Utrum timor sit peccatum.

**A**D primum sic proceditur. Videtur quod timor non sit peccatum. Timor enim est passio quædam, ut supra habitum est (1. 2. quæst. xxiii. art. 4. & quæst. xlii.) Sed ex passionibus non laudamur, neque vituperamur, ut patet in II. Ethic. (cap. v. in med.) Cum er-

go omne peccatum sit vituperabile, videtur quod timor non sit peccatum.

2. Præterea. Nihil quod in lege divina mandatur, est peccatum: quia *lex Domini est immaculata*; ut dicitur in Psal. cxviii. 8. Sed timor mandatur in lege Dei: dicitur enim ad Ephes. vi. 5. *Servi obedite dominis carnalibus cum timore, & tremore*. Ergo timor non est peccatum.

3. Præterea. Nihil quod naturaliter inest homini, est peccatum: quia peccatum est contra naturam, ut Damascenus dicit in II. Lib. (orth. Fid. cap. xiii. & Lib. IV. cap. xi.) Sed timere est homini naturale: unde Philosophus dicit in III. Ethic. (cap. vii. in med.) quod *erit aliquis infans, vel sine sensu doloris, si nihil timeat, neque terremotum, neque inundationes*. Ergo timor est peccatum.

Sed contra est quod Dominus dicit Matth. x. 28. *Nolite timere eos qui occidunt corpus*: & Ezech. ii. 6. dicitur: *Ne timeas eos, neque sermones eorum metuas*.

Respondeo dicendum, quod aliquod dicitur esse peccatum in actibus humanis propter inordinationem: nam bonum actus humani in ordine quodam consistit, ut ex supra dictis patet (quæst. cix. art. 2. & quæst. cxv. art. r.) Est autem hic debitus ordo ut appetitus regimini rationis subdatur. Ratio autem dicitur, aliqua esse refugienda, & aliqua prosequenda: & inter fugienda, quædam dicitur magis fugienda quam alia; & similiter etiam inter prosequenda, quædam dicitur esse magis prosequenda quam alia: & quantum est bonum prosequendum, tantum est aliquod oppositum malum fugiendum. Inde est quod ratio dicitur, quædam bona magis esse prosequenda, quam quædam mala fugienda. Quando ergo appetitus fugit ea quæ ratio dicitur esse sustinenda, ne desistat ab aliis quæ magis prosequi debet; timor inordinatus est, & habet rationem peccati. Quando autem appetitus tirando refugit id quod est secundum rationem fugiendum; tunc appetitus non est inordinatus, nec peccatum.

Ad primum ergo dicendum, quod timor communiter dictus secundum suam rationem importat universaliter fugam. Unde quantum ad hoc non importat rationem boni, vel mali: & similiter est de qualibet alia passione. Et ideo Philosophus dicit, quod passiones non sunt

laudabiles, neque vituperabiles, quia scilicet non laudantur, neque vituperantur qui irascuntur, vel timent, sed qui circa hæc aut ordinate, aut inordinate se habent.

Ad secundum dicendum, quod timor ille ad quem inducit Apostolus, est convenienti rationi, ut scilicet servus timeat, ne deficiat in obsequiis quæ domino debet impendere.

Ad tertium dicendum, quod mala quibus homo resistere non potest, & ex quorum sustinentia nihil boni provenit homini, ratio dicitur esse fugienda. Et ideo timor talium non est peccatum.

## ARTICULUS II. 635

*Utrum peccatum timoris opponatur fortitudini.*

**A**D secundum sic proceditur. Videtur quod peccatum timoris non opponatur fortitudini. Fortitudo enim est circa pericula mortis, ut supra habitum est (quæst. cxxiii. art. 4. & 5.) Sed peccatum timoris non semper pertinet ad pericula mortis: quia super illud Psal. cxxxvii. *Beati omnes qui timeant Dominum*, Glossa (ord. Aug.) dicit, quod „humanus timor est quo timeamus pati pericula carnis, vel perdere mundi bona:“ & super illud Matth. xxvi. *Oravit tertio eundem sermonem* &c. dicit Glossa (ord. Aug. Lib. I. Qq. Evangel. quæst. ult.) quod „triplex est malus timor, scilicet timor mortis, timor doloris, & timor vilitalis.“ Non ergo peccatum timoris opponitur fortitudini.

2. Præterea. Præcipuum quod commendatur in fortitudine, est quod exponit se periculis mortis. Sed quandoque aliquis ex timore servitutis, vel ignominie exponit se morti; sicut Augustinus in I. de civ. Dei (cap. cxlv.) narrat de Catone, qui ut non incurreret Cæsaribus servitutem, morti se tradidit. Ergo peccatum timoris non opponitur fortitudini, sed magis habet similitudinem cum ipsa.

3. Præterea. Omnis desperatio procedit ex aliquo timore. Sed desperatio non opponitur fortitudini, sed magis spei, ut supra habitum est (quæst. xx. art. r. & r. 2. quæst. xl. art. 4.) Ergo neque peccatum timoris opponitur fortitudini.

Sed contra est quod Philosophus in II. Ethic. (cap. vii.) & in III. (cap. vii.) similitudinem ponit fortitudini oppositam.

Re-

Respondeo dicendum, quod, sicut supra dictum est ( quaest. xix. art. 3. & 1. 2. quaest. xlii. art. 1. ) omnis timor ex amore procedit : nullus enim timet nisi contrarium eius quod amat. Amor autem non determinatur ad aliquod genus virtutis, vel vitii : sed amor ordinatus includitur in qualibet virtute, quilibet enim virtuosus amat proprium bonum virtutis ; amor autem inordinatus includitur in qualibet peccato, ex amore enim inordinato procedit inordinata cupiditas. Unde similiter inordinatus timor includitur in qualibet peccato ; sicut avarus timet amissionem pecuniae, intemperatus amissionem voluptatis, & sic de aliis.

Sed timor praecipuus est periculorum mortis, ut probatur in III. Ethic. ( cap. vi. a med. ) Et ideo talis timoris inordinatio opponitur fortitudini, quae est circa pericula mortis. Et propter hoc antonomastice dicitur timiditas fortitudini opponi.

Ad primum ergo dicendum, quod auctoritates illae loquuntur de timore inordinato communiter sumpto, qui diversis virtutibus opponi potest.

Ad secundum dicendum, quod actus humani praecipue diiudicantur ex fine, ut ex supra dictis patet ( quaest. 1. art. 3. & quaest. xviii. art. 6. ) ad fortem autem pertinet ut se exponat periculis mortis propter bonum. Sed ille qui se periculis mortis exponit, ut fugiat servitutem, vel aliquid laboriosum, a timore vincitur ; quod est fortitudini contrarium. Unde Philo sophus dicit in III. Ethic. ( cap. vii. ad fin. ) quod *mori fugientem inopiam, vel cupidinem, vel aliquid triste, non est fortis, sed magis timidi : molities est enim fugere laboriosa*.

Ad tertium dicendum, quod, sicut supra dictum est ( 1. 2. quaest. xlv. art. 2. ) sicut spes est principium audaciae, ita timor est principium desperationis. Unde sicut ad fortem, qui utitur audacia moderate, praexigitur spes ; ita e converso desperatio ex aliquo timore procedit. Non autem oportet quod quolibet desperatio procedat ex timore quolibet, sed ex eo qui est generis sui. Desperatio autem quae opponitur spei, ad aliud genus refertur, scilicet ad res divinas ; timor autem qui opponitur fortitudini, pertinet ad pericula mortis. Unde ratio non sequitur.

## ARTICULUS III. 636

*Utrum timor sit peccatum mortale.*

**A**D tertium sic proceditur. Videtur quod timor non sit peccatum mortale. Timor enim, ut supra dictum est ( 1. 2. quaest. xlii. art. 1. ) est in irascibili, quae est pars sensualitatis. Sed in sensualitate est tantum peccatum veniale, ut supra habitum est ( 1. 2. quaest. lxxiv. art. 4. ) Ergo timor non est peccatum mortale.

2. Praeterea. Omne peccatum mortale totaliter cor avertit a Deo. Hoc autem non facit timor : quia super illud Iudicum vii. *Qui formidolosus est &c.* dicit Glossa ( ord. ) quod „ timidus est qui „ primo aspectu ad congressum trepidat, „ non tamen toto corde terretur, sed re- „ parari, & animari denuo potest. “ Ergo timor non est peccatum mortale.

3. Praeterea. Peccatum mortale non solum retrahit a perfectione, sed etiam a praecepto. Sed timor non retrahit a praecepto, sed solum a perfectione : quia super illud Deuteronomio xx. *Quis est bonus formidolosus, & corde parido? &c.* dicit Glossa ( ord. lisd. ) „ Docet, non posse „ quemquam professionem contemplatio- „ nis, vel militiae spiritualis arripere, „ qui adhuc nudari terrenis opibus per- „ timescit. “ Ergo timor non est peccatum mortale.

Sed contra est quod pro solo peccato mortali debetur poena inferni : quae tamen debetur timidus, secundum illud Apocalypsis xxi. 8. *Timidis, & inireduis, & execratis &c. pars erit in stagno ignis, & sulphuris, quod est mors secunda.* Ergo timiditas est peccatum mortale.

Respondeo dicendum, quod, sicut supra dictum est ( art. 1. hu. quaest. ) timor peccatum est, secundum quod est inordinatus, prout scilicet refugit quod non est secundum rationem refugendum. Haec autem inordinatio timoris quandoque quidem consistit in solo appetitu sensitivo, non superveniente consensu rationalis appetitus : & sic non potest esse peccatum mortale, sed solum veniale.

Quandoque vero huiusmodi inordinatio timoris pertingit usque ad appetitum rationalem, qui dicitur voluntas, quae ex libero arbitrio refugit aliquid non secundum rationem : & talis inordinatio timoris quandoque est peccatum mortale, quandoque veniale.

Si enim aliquis propter timorem, quo refugit periculum mortis, vel quodcumque aliud temporale malum, sic dispositus est ut faciat aliquid prohibitum, vel prætermittat aliquid quod est præceptum in lege divina; talis timor est peccatum mortale: alioquin erit peccatum veniale.

Ad primum ergo dicendum, quod ratio illa procedit de timore, secundum quod consistit intra sensualitatem.

Ad secundum dicendum, quod etiam Glossa illa potest intelligi de timore in sensualitate existente.

Vel potest melius dici, quod ille toto corde terretur cuius animum timor vincit irreparabiliter. Potest autem contingere quod etiam timor sit peccatum mortale, non tamen aliquis ita obstinate terretur, quin persuasionibus revocari possit; sicut quandoque aliquis mortaliter peccans, concupiscentiæ consentiendo, revocatur ne opere impleat quod proposuit facere.

Ad tertium dicendum, quod Glossa illa loquitur de timore revocante hominem a bono, quod non est de necessitate præcepti, sed de perfectione consilii. Talis autem timor non est peccatum mortale, sed quandoque veniale; quandoque etiam non est peccatum, puta cum aliquis habet rationalem causam timoris.

#### ARTICULUS IV. 637

*Utrum timor excuset a peccato.*

**A**D quantum sic proceditur. Videtur quod timor non excuset a peccato. Timor enim est peccatum, ut dictum est (art. 1. huius quæstionis.) Sed peccatum non excusat a peccato, sed magis aggravat ipsum. Ergo timor non excusat a peccato.

2. Præterea. Si aliquis timor excuset a peccato, maxime excusaret timor mortis, qui dicitur cadere in constantem virum. Sed hic timor non videtur excusare: quia cum mors ex necessitate imminet omnibus, non videtur esse timenda. Ergo timor non excusat a peccato.

3. Præterea. Omnis timor aut est mali temporalis, aut spiritualis. Sed timor mali spiritualis non potest excusare peccatum, quia non inducit ad peccandum, sed magis retrahit a peccato: timor etiam mali temporalis non excusat a pecca-

to: quia, sicut Philosophus dicit in III. Eth. (cap. vi. ante med.) *inopiam non oportet timere, neque agriudicem, neque quacumque non a propria malitia procedunt.* Ergo videtur quod timor nullo modo excuset a peccato.

Sed contra est quod dicitur in Decret. 1. quæst. 1. (cap. Constat:) *Vim passus, et iniurius ab hereticis ordinatus, colorem habet excusationis.*

Respondeo dicendum, quod, sicut supra dictum est (art. præc.) timor in quantum habet rationem peccati, in quantum est contra ordinem rationis. Ratio autem iudicat, quædam mala esse magis aliis fugienda. Et ideo quicumque ut fugiat mala quæ secundum rationem sunt magis fugienda, non refugit mala quæ sunt minus fugienda, non incurrit peccatum; sicut magis est fugienda mors corporalis quam amissio rerum temporalium. Unde si quis propter timorem mortis latronibus aliquid promitteret, aut daret, excusaretur a peccato; quod incurreret, si sine causa legitima, prætermisisset bonis, quibus esset magis dandum, peccatoribus largiretur.

Si autem aliquis per timorem fugiens mala quæ secundum rationem sunt minus fugienda, incurrat mala quæ secundum rationem sunt magis fugienda, non posset totaliter a peccato excusari: quia timor talis inordinatus esset.

Sunt autem magis timenda mala animæ quam mala corporis; corporis autem magis quam mala exteriorum rerum. Et ideo si quis incurrat mala animæ, id est peccata, fugiens mala corporis, puta flagella, vel mortem, aut mala exteriorum rerum, puta damnum pecuniæ, aut si sustineat mala corporis, ut vitet damnum pecuniæ; non excusatur totaliter a peccato.

Diminuitur tamen secundum aliquid eius peccatum: quia minus voluntarium est quod ex timore agitur: imponitur enim homini quædam necessitas aliquid faciendi propter timorem imminuentem.

Unde Philosophus (Lib. III. Eth. cap. 1.) huiusmodi quæ ex timore sunt, dicit esse non simpliciter voluntaria, sed mixta ex voluntario, & involuntario.

Ad primum ergo dicendum, quod timor non excusat ex ea parte qua est peccatum, sed ex ea parte qua est involuntarium.

Ad secundum dicendum, quod licet mors omnibus imminet ex necessitate, tamen ipsa diminutio temporalis vitæ est quod-

quoddam malum, & per consequens timendum.

Ad tertium dicendum, quod secundum Stoicos, qui ponebant bona temporalia non esse hominis bona, sequitur ex consequenti quod mala temporalia non sint hominis mala, & per consequens nullo modo timenda. Sed secundum Augustinum in Lib. II. de libero arbitrio (cap. xviii. & xix.) huiusmodi temporalia sunt minima bona; quod etiam Peripatetici senserunt: & ideo contraria eorum sunt quidem timenda, non tamen multum, ut pro eis recedatur ab eo quod est bonum secundum virtutem.

## QUAESTIO CXXVI.

De intimiditate,  
in duos articulos divisa.

**D**Einde considerandum est de vitio intimiditatis: & circa hoc quaeruntur duo.

Primo, utrum intimidum esse sit peccatum.

Secundo, utrum opponatur fortitudini.

### ARTICULUS I. 638

Utrum intimiditas sit peccatum.

**A**D primum sic proceditur. Videtur quod intimiditas non sit peccatum. Quod enim ponitur in commendationem viri iusti, non est peccatum. Sed in commendationem viri iusti dicitur Proverb. xxviii. 1. *Iustus, quasi leo confidens, absque terrore erit*. Ergo esse impavidum non est peccatum.

2. Praeterea. Maximum terribilium est mors, secundum Philosophum in III. Ethic. (cap. vi. a med.) Sed nec mortem oportet timere, secundum illud Matth. x. 28. *Nolite timere eos qui occidunt corpus etc.* nec etiam aliquid quod ab homine posset inferri, secundum illud Ila. li. 12. *Quis tu, ut timeas ab homine mortali?* Ergo impavidum esse non est peccatum.

3. Praeterea. Timor ex amore nascitur, ut supra habitum est (quaest. praec. art. 2.) Sed nihil mundanum amare pertinet ad perfectionem virtutis: quia, ut Augustinus dicit XIV. de civit. Dei (cap. xxviii. in princ.) *amor Dei usque ad contemptum sui facit civem civitatis ca-*

*lestis*. Ergo nihil humanum formidare, videtur non esse peccatum.

Sed contra est quod de iudice iniquo dicitur Luc. xviii. 2. *quod nec Deum timebat, nec hominem reverebatur*.

Respondeo dicendum, quod quia timor ex amore nascitur, idem iudicium videtur esse de amore, & timore. Agitur autem nunc de timore quo mala temporalia timentur, qui provenit ex temporalium bonorum amore. Inditum autem est unicuique naturaliter ut propriam vitam amet, & ea quae ad ipsam ordinantur, cum debito modo; ut scilicet amentur huiusmodi, non quasi finis constituantur in eis, sed secundum quod eis utendum est propter ultimum finem. Unde quod aliquis deficiat a debito modo amoris ipsorum, est contra naturalem inclinationem, & per consequens est peccatum.

Numquam tamen a tali amore aliquis totaliter decidit: quia id quod est naturale, totaliter perdi non potest: propter quod Apostolus dicit ad Eph. v. 29. *Nemo unquam carnem suam odio habuit*. Unde etiam illi qui seipsos interimunt, ex amore carnis suae hoc faciunt, quam volunt a praesentibus angustiis liberare. Unde contingere potest quod aliquis minus quam debeat, timeat mortem, & alia temporalia mala, propter hoc quod minus debito amet ea. Sed quod nihil horum timeat, non potest ex rotali defectu amoris contingere, sed ex eo quod aestimat, mala opposita bonis quae amat, sibi supervenire non posse. Quod quandoque contingit ex superbia animi de se praesumentis, & alios contemnentis, secundum quod dicitur Iob xli. 24. *Factus est ut nullum timeres: omne sublime videt*: quandoque autem contingit ex defectu rationis, sicut Philosophus dicit in III. Ethic. (cap. vii. circ. med.) quod *Celae propter stultitiam nihil timeant*.

Unde patet quod esse impavidum est vitiosum, sive causetur ex defectu amoris, sive causetur ex elatione animi, sive causetur ex soliditate; quae tamen excusat a peccato, si sit invincibilis.

Ad primum ergo dicendum, quod iustus commendatur a timore non retrahente eum a bono, non quod sit absque omni timore: dicitur enim Eccli. i. 28. *Qui sine timore est, non poterit insisteri*.

Ad secundum dicendum, quod mors, vel quicquid aliud ab homine mortali potest inferri, non est ea ratione timendum.

dum ut a stultitia recedatur; est tamen timendum, inquantum per hoc homopoc-  
est impediri ab operibus virtuosus vel  
quantum ad se, vel quantum ad profes-  
tum quem in aliis facit. Unde dicitur  
Proverb. xiv. 16. *Sapiens timet, & decli-*  
*nat a malo.*

Ad tertium dicendum, quod bona tem-  
poralia debent contemni, inquantum nos  
impediunt ab amore, & timore Dei; &  
secundum hoc etiam non debent timeri:  
unde dicitur Eccli. xxxiv. 16. *Qui timet*  
*Dominum, nihil trepidabit.* Non autem  
debent contemni bona temporalia, in-  
quantum instrumentaliter nos iuvant  
ad ea quae sunt divini timoris, & a-  
moris.

## ARTICULUS II. 639

*Utrum esse impavidum opponatur  
fortitudini.*

II. dist. xxvi. quest. 11. art. 2. ad 4. &  
dist. xxxiv. quest. 1. art. 2. cor. fin. &  
dist. xlv. quest. 11. art. 1. ad 4.

**A**D secundum sic proceditur. Videtur  
quod esse impavidum non opponatur  
fortitudini. De habitibus enim iudica-  
mus per actus. Sed nullus actus fortitu-  
dinis impeditur per hoc quod aliquis est  
impavidus: remoto enim timore, aliquis  
& fortiter sustinet, & audacter aggredi-  
tur. Ergo esse impavidum non opponitur  
fortitudini.

2. Præterea. Esse impavidum est vi-  
tiosum vel propter defectum debiti amo-  
ris, vel propter superbiam, vel propter  
stultitiam. Sed defectus debiti amoris op-  
ponitur caritati, superbia autem humi-  
litati, stultitia autem prudentiae, sive  
sapientiae. Ergo vitium impaviditatis non  
opponitur fortitudini.

3. Præterea. Virtuti opponuntur vitia  
sicut extrema medio. Sed unum medium  
ex una parte non habet nisi unum extre-  
mum. Cum ergo fortitudini ex una parte  
opponatur timor, ex alia vero parte  
opponatur ei audacia, videtur quod im-  
paviditas ei non opponatur.

Sed contra est quod Philosophus in  
III. Ethic. (cap. vii.) ponit impavi-  
ditatem fortitudini oppositam.

Respondendo dicendum, quod, sicut su-  
pra dictum est (quest. cxxiii. art. 3.)  
fortitudo est circa timores, & audacias.  
Omnis autem virtus moralis ponit mo-

dum rationis in materia circa quam est.  
Unde ad fortitudinem pertinet timor mo-  
deratus secundum rationem, ut scilicet  
homo timeat quod oportet, & quando  
oportet, & similiter de aliis. Hic au-  
tem modus rationis corrumpi potest sic-  
ut per excessum, ita & per defectum.

Unde sicut timiditas opponitur forti-  
tudini per excessum timoris, inquantum  
scilicet homo (a) timet quod non oportet,  
vel secundum quod non oportet;  
ita etiam impaviditas opponitur ei per  
defectum timoris, inquantum scilicet ali-  
quis non timet quod oportet timere.

Ad primum ergo dicendum, quod au-  
dacia fortitudinis est, timorem sustinere  
& aggredi, non qualitercumque, sed se-  
cundum rationem; quod non facit im-  
pavidus.

Ad secundum dicendum, quod impa-  
viditas ex sua specie corrumpit medium  
fortitudinis; & ideo directe opponitur  
fortitudini: sed secundum suas causas ni-  
hil prohibet quin opponatur aliis virtu-  
tibus.

Ad tertium dicendum, quod vitium  
audaciae opponitur fortitudini secundum  
excessum audaciae, impaviditas autem se-  
cundum defectum timoris. Fortitudo au-  
tem in utraque passione medium ponit.  
Unde non est inconveniens quod secun-  
dum diversa habeat diversa extrema.

## QUAESTIO CXXVII.

*De audacia,*

*in duos articulos divisa.*

**D**Einde considerandum est de auda-  
cia: & circa hoc quaeruntur duo.

Primo, utrum audacia sit peccatum.  
Secundo, utrum opponatur fortitudini.

## ARTICULUS I. 640

*Utrum audacia sit peccatum.*

**A**D primum sic proceditur. Videtur  
quod audacia non sit peccatum. Di-  
citur enim Iob xxxix. 17. de equo, per  
quem designatur bonus praeceptor secundum  
Gregorium in Moral. (Lib. XXXI.  
cap. xi.) quod *audacter in accursum per-*  
*git armatis.* Sed nullum vitium credit in  
commendationem alicuius. Ergo esse au-  
dacem non est peccatum.

2. Præ-

(a) Ita inf. & editi passim. Alii timet quod non debet, vel secundum quod non debet, vel secundum  
quod non oportet.

ARTICULUS II. 641

*Utrum audacia opponatur fortitudini.*

12. Præterea. Sicut Philosophus dicit in VI. Ethic. ( cap. ix. a princ. ) oportet *conflari quidem tarde, operari autem velociter constitata*. Sed ad hanc velocitatem operandi iuvat audacia. Ergo audacia non est peccatum, sed magis aliquid laudabile.

3. Præterea. Audacia est quædam passio, quæ causatur a spe, ut supra habitum est ( 1. 2. quæst. xlv. art. 2. ) cum de passionibus ageretur. Sed spes non ponitur peccatum, sed magis virtus. Ergo nec audacia debet poni peccatum.

13. Sed contra est quod dicitur Eccli. viii. 18. *Cum audacia non eas in via, ne forte graves mala sua in te*. Nullius autem societates est declinata nisi propter peccatum. Ergo audacia est peccatum.

Respondendo dicendum, quod audacia, sicut supra dictum est ( 1. 2. quæst. xxxii. art. 1. & quæst. xlv. ) est quædam passio. Passio autem quandoque quidem est moderata secundum rationem, quandoque autem caret moderatione vel per excessum, vel per defectum; & secundum hoc est passio vitiosa. Sumuntur autem quandoque nomina passionum a superabundanti; sicut ira dicitur non quæcumque, sed superabundans, prout scilicet est vitiosa: & hoc etiam modo audacia per superabundantiam dicta ponitur esse peccatum.

Ad primum ergo dicendum, quod audacia ibi sumitur, secundum quod est moderata ratione: sic enim pertinet ad virtutem fortitudinis.

Ad secundum dicendum, quod operatio festina commendabilis est post consilium, quod est actus rationis. Sed si quis ante consilium vellet festine agere, non esset hoc laudabile, sed vitiosum: esset enim quædam præcipitatio actionis, quod est vitium prudentiæ oppositum, ut supra dictum est ( quæst. lxi. art. 3. ) Et ideo audacia, quæ operatur ad velocitatem operandi, intantum laudabilis est, inquantum a ratione ordinatur.

Ad tertium dicendum, quod quædam vitia innominata sunt, & similiter quædam virtutes, ut patet per Philosophum in IV. Eth. ( cap. iv. v. & vi. & Lib. II. cap. vii. ) Et ideo oportuit in quibusdam passionibus utri nomine virtutum, & vitiorum. Præcipue autem illis passionibus utimur ad vitia designanda quarum obiectum est malum; sicut patet de odio, timore, ira, & audacia. Spes autem, & amor habent bonum pro obiecto: & ideo magis eis utimur ad designanda nomina virtutum.

Ad secundum sic proceditur. Videtur quod audacia non opponatur fortitudini. Superfluitas enim audaciæ videtur ex animi præsumptione procedere. Sed præsumptio pertinet ad superbiam, quæ opponitur humilitati. Ergo audacia magis opponitur humilitati quam fortitudini.

2. Præterea. Audacia non videtur esse vituperabilis, nisi inquantum ex ea provenit vel nocuumentum aliquid ipsi audaci, qui se periculis inordinate ingerit, vel etiam aliis, quos per audaciam aggreditur, vel in pericula præcipitat. Sed hoc videtur ad iniustitiam pertinere. Ergo audacia, secundum quod est peccatum, non opponitur fortitudini, sed iustitiæ.

3. Præterea. Fortitudo est circa timores, & audacias, ut dictum est ( quæst. cxxiii. art. 3. ) Sed quia timiditas opponitur fortitudini secundum excessum timoris, habet aliud vitium oppositum timiditati secundum defectum timoris. Si ergo audacia opponitur fortitudini propter excessum audaciæ, pari ratione opponetur ei aliquod vitium propter audaciæ defectum. Sed hoc non invenitur. Ergo nec audacia debet poni vitium oppositum fortitudini.

Sed contra est quod Philosophus in II. & III. Ethic. ( cap. ult. utrobique ) ponit audaciam fortitudini oppositam.

Respondendo dicendum, quod, ut supra dictum est ( quæst. præc. art. 2. ) ad virtutem moralem pertinet modum rationis servare in materia circa quam est. Et ideo omne vitium quod importat immoderantiam circa materiam alicuius virtutis moralis, opponitur illi virtuti morali, sicut immoderatum moderato.

Audacia autem, secundum quod sonat vitium, importat excessum passionis, qui audacia dicitur. Unde manifestum est quod opponitur virtuti fortitudinis, quæ est circa timores, & audacias, ut supra dictum est ( quæst. cxxiii. art. 3. )

Ad primum ergo dicendum, quod oppositio vitii ad virtutem non attenditur principaliter secundum causam vitii, sed secundum ipsam viii speciem. Et ideo non oportet quod audacia opponatur eidem virtuti cui opponitur præsumptio, quæ est causa ipsius.

Ad

Ad secundum dicendum, quod sicut directio oppositio vitii non attenditur circa eius causam, ita etiam non attenditur secundum eius effectum. Nocendum autem quod provenit ex audacia, est effectus ipsius. Unde nec etiam secundum hoc attenditur audaciae oppositio.

Ad tertium dicendum, quod motus audaciae consistit in invadendo id quod est homini contrarium, ad quod natura inclinat, nisi inquantum talis inclinatio impeditur per timorem patiendi nocuum ab eo. Et ideo vitium quod excedit in audacia, non habet contrarium defectum, nisi timiditatem tantum. Sed audacia non semper comitatur tantum defectum timiditatis: quia, sicut Philosophus dicit in III. Ethic. (cap. vii.) *audaces sunt praevolantes, et volentes ante pericula, sed in ipsis discedunt, scilicet praeter timorem.*

### QUAESTIO CXXVIII.

#### De partibus fortitudinis.

**D**Einde considerandum est de partibus fortitudinis: & primo considerandum est, quae sint fortitudinis partes; secundo, de singulis partibus est agendum.

### ARTICULUS UNICUS. 643

#### Utrum partes fortitudinis convenienter enumerentur.

*Inf. quaest. cxxix. art. 5. & quaest. cxxxiv. art. 4. & quaest. cxxxvi. art. 4. & quaest. clxi. art. 4. ad 3. & III. dist. xxxiii. quaest. iis. art. 3. quaest. 2. & 4.*

**A**D primum sic proceditur. Videtur quod inconvenienter partes fortitudinis enumerentur. Tullius enim in sua Rethor. (Lib. II. de invent. aliquant. ante fin.) ponit fortitudinis quatuor partes, scilicet *magnificentiam, fiduciam, patientiam, & perseverantiam*: & videtur quod inconvenienter. Magnificentia enim videtur ad liberalitatem pertinere: quia utraque est circa pecunias, & necesse est *magnificum liberalem esse*, ut Philosophus dicit in IV. Ethic. (cap. ii.) Sed liberalitas est pars iustitiae, ut supra habitum est (quaest. cxvii. art. 5.) Ergo magnificentia non debet poni pars fortitudinis.

1. Præterea. Fiducia nihil aliud videtur esse quam spes. Sed spes non videtur ad fortitudinem pertinere, sed potius per se est virtus. Ergo fiducia non debet poni pars fortitudinis.

3. Præterea. Fortitudo facit hominem bene se habere circa pericula. Sed magnificentia, & fiducia non important illi ratione aliquam habitudinem ad pericula. Ergo non ponuntur convenienter partes fortitudinis.

4. Præterea. Patientia secundum Tullium (loc. sup. cit.) importat difficultatem perpassionem; quod etiam ipse attribuit fortitudini. Ergo patientia est idem fortitudini, & non est pars eius.

5. Præterea. Illud quod requiritur in qualibet virtute, non debet poni pars alicuius specialis virtutis. Sed perseverantia requiritur in qualibet virtute: dicitur enim Matth. xxiv. 33. *Qui perseveraverit usque in finem, hic salvus erit.* Ergo perseverantia non debet poni pars fortitudinis.

6. Præterea. Macrobius (Lib. I. in somn. Scip. cap. viii. cir. med.) ponit septem partes fortitudinis, scilicet *magnanimitatem, fiduciam, securitatem, magnificentiam, constantiam, tolerantiam, firmitatem*. Andronicus etiam ponit septem virtutes annexas fortitudini, quae sunt *euphrosia, lenitas, magnanimitas, virilitas, perseverantia, magnificentia, andragogia*. Ergo videtur quod insufficienter Tullius partes fortitudinis enumeret.

7. Præterea. Aristoteles in III. Ethic. (cap. viii.) ponit quinque partes fortitudinis: quarum prima est *politica*, quae fortiter operatur propter timorem vel exhonorationis, vel poenae: secunda est *militaris*, quae fortiter operatur propter artem, vel experientiam rei bellicae: tertia est *fortitudo* quae fortiter operatur ex passione, praecipue irae: quarta est *fortitudo*, quae fortiter operatur propter consuetudinem victoriarum: quinta est *fortitudo* quae fortiter operatur propter inexperiencem periculorum. Has autem fortitudines nulla praedictarum enumerationum continet. Ergo praedictae enumerationes partium fortitudinis videntur esse inconvenientes.

Respondeo dicendum, quod, sicut supra dictum est (quaest. xlvi. art. i.) alicuius virtutis possunt esse triplices partes, scilicet subiectivae, integrales, potentiales. Fortitudini autem, secundum quod est specialis virtus, non possunt assignari partes subiectivae, eo quod non dividitur in multas.

vi-



virtutes specie differentes, quia est circa materiam valde specialem.

Assignantur autem ei partes quasi integrales, & potentiales: integrales quidem secundum ea quae oportet concurrere ad actum fortitudinis; potentiales autem, secundum quod ea quae fortitudo observat circa difficillima, scilicet circa pericula mortis, aliisque aliis virtutes observant circa quasdam alias materias minus difficiles: quae quidem virtutes adiunguntur fortitudini, sicut secundariae principali. Est autem, sicut supra dictum est (quaest. cxxviii. art. 3. & 6.) duplex fortitudinis actus, scilicet aggredi, & sustinere. Ad actum autem aggrediendi duo requiruntur. Quorum primum pertinet ad animi preparationem, ut scilicet aliquis promptum animum habeat ad aggrediendum: & quantum ad hoc ponit Tullius *fiduciam*: unde dicit (loc. cit. in arg. 1.) quod *fiducia est per quam magnis, & bonis in rebus multum ipse animus in se fiducia certa cum spe collocat*. Secundum autem pertinet ad operis executionem, ne scilicet aliquis deficiat in executione illorum quae fiducialiter inchoavit: & quantum ad hoc ponit Tullius *magnificentiam*: unde dicit, quod *magnificentia est rerum magnarum, & excellentiarum cum animi ampla quadam, & splendida propositione (a) cogitatio, atque administratio*, id est excurio; ut scilicet amplo proposito administratio non desit.

Hae ergo duo si coarctentur ad propriam materiam fortitudinis, scilicet ad pericula mortis, erunt quasi partes integrales ipsius, sine quibus fortitudo esse non potest: si autem referantur ad aliquas alias materias, in quibus est minus difficultatis, erunt virtutes distinctae a fortitudine secundum speciem suam; tamen adiunguntur ei sicut secundarium principali; sicut *magnificentia* a Philosopho in IV. Ethic. (cap. ii.) ponitur circa magnos sumptus; *magnanimitas* autem, quae videtur idem esse fiduciae, circa magnos honores.

Ad alium autem actum fortitudinis, qui est sustinere, duo requiruntur. Quorum primum est ne difficultate imminenti malorum animus frangatur per tristitiam, & decedat a sua magnitudine: & quantum ad hoc ponit *patientiam*: unde dicit, quod *patientia est benevolentiae, aut utilitatis causa, rerum arduarum, aut difficultium voluntaria, ac diuturna perpetuatio*. Aliud autem est ut ex diuturna dif-

ficilium passione homo non fatigetur usque ad hoc quod deficiat, secundum illud Hebr. xii. 3. *Non fatigomini animis vestris deficientes*: & quantum ad hoc ponit *perseverantiam*: unde dicit, quod *perseverantia est in ratione bene considerata stabilis, & perpetua permansio*. Hae etiam duo si coarctentur ad propriam materiam fortitudinis, erunt partes quasi integrales ipsius: si autem ad quascunque materias difficiles referantur, erunt virtutes a fortitudine distinctae; & tamen ei adiunguntur sicut secundariae principali.

Ad primum ergo dicendum, quod magnificentia circa materiam liberalitatis addit quamdam magnitudinem, quae pertinet ad rationem ardui, quod est obiectum irascibilis, quam principaliter perficit fortitudo: & ex hac parte pertinet ad fortitudinem.

Ad secundum dicendum, quod spes quae de Deo confidit, ponitur virtus theologica, ut supra habitum est (quaest. xvii. art. 3. & 1. 2. quaest. lxxi. art. 3.) Sed per fiduciam, quae nunc ponitur fortitudinis pars, homo habet spem in seipso, tamen sub Deo.

Ad tertium dicendum, quod quascunque res magnas aggredi, videtur periculosum esse, quia in his deficere est valde nocivum. Unde etiam magnificentia, & fiducia circa quaecunque alia magna operanda, vel aggredienda ponantur, habent quamdam affinitatem cum fortitudine ratione periculi imminantis.

Ad quartum dicendum, quod patientia non solum patitur pericula mortis, circa quae est fortitudo, absque superabundanti tristitia, sed etiam quaecunque alia difficilia, sive periculosa: & secundum hoc ponitur virtus adiuncta fortitudini; inquantum autem est circa pericula mortis, est pars integralis ipsius.

Ad quintum dicendum, quod perseverantia, secundum quod dicit continuitatem boni operis usque in finem, circumstantia omnis virtutis esse potest: ponitur autem pars fortitudinis, secundum quod dictum est (in corp. art.)

Ad sextum dicendum, quod Macrobius ponit quatuor praedicta a Tullio posita, scilicet *fiduciam*, *magnificentiam*, *tolerantiam*, quam ponit loco patientiae, & *firmitatem*, quam ponit loco perseverantiae; superaddit autem tria, quorum duo, scilicet *magnanimitas*, & *securitas*, a Tul-

(a) Ita mss. & editi passim. Thurolegi, & editi. Patav. ex Tullii textu agilitate.

a Tullio sub fiducia comprehenduntur. Sed Macrobius magis per specialia distinguit. Nam fiducia importat spem hominis ad magna: spes autem cuiuslibet rei præsupponit appetitum in magna profectum per desiderium, quod pertinet ad magnanimitatem. Dictum est enim supra (1. 2. quæst. xl. art. 7.) quod spes præsupponit amorem, & desiderium rei speratæ. Vel potest melius dici, quod fiducia pertinet ad spei certitudinem; magnanimitas autem ad magnitudinem rei speratæ. Spes autem firma esse non potest, nisi amoveatur contrarium: quandoque enim aliquis, quantum ex seipso est, speraret aliquid; sed spes tollitur propter impedimentum timoris: timor enim quodammodo spei contrariatur, ut supra habitum est (1. 2. quæst. xl. art. 4. ad 1.) Et ideo Macrobius addit securitatem, quæ excludit timorem. Tertium autem addit, scilicet constantiam, quæ sub magnificientia comprehendendi potest. Oportet enim in his quæ magnifice aliquis facit, constantem animum habere. Et ideo Tullius ad magnificientiam pertinere dicit non solum administracionem rerum magnarum, sed etiam animi amplam excitacionem ipsarum. Potest etiam constantia ad perseverantiam pertinere, ut perseverans dicatur aliquis ex eo quod non desistit propter diuturnitatem, constans autem ex eo quod non desistit propter quæcumque alia repugnantia. Illa etiam quæ Andronicus ponit, ad eadem pertinere videntur. Ponit enim *perseverantiam*, & *magnificientiam* cum Tullio, & Macrobio, *magnanimitatem* autem cum Macrobio. *Lenitas* autem est idem quod patientia, vel tolerantia: dicit enim, quod *lenitas est habitus promptus tributus ad conari qualia oportet, & sustinere quæ ratio dicit*. Euplychia autem, id est bona animositas, idem videtur esse quod securitas: dicit enim, quod *est robur anime ad perficiendum opera ipsius*. Virilitas autem videtur idem esse quod fiducia: dicit enim, quod *virilitas est habitus per se sufficiens, tributus in his quæ secundum virtutem sunt*. Magnificentiæ autem addit *andragathiam*, quasi virilem bonitatem, quæ apud nos *srenuitas* potest dici. Ad magnificientiam autem pertinet, non solum quod homo consistat in executione magnorum operum, quod pertinet ad constantiam, sed etiam cum quadam virili prudentia, & sollicitudine ea exequatur, quod pertinet ad andragathiam, sive strenuitatem: unde dicit,

quod andragathia est viri virtus adinventiva communicabilium operum. Et sic patet quod omnes huiusmodi partes ad quatuor principales reducuntur, quas Tullius ponit.

Ad septimum dicendum, quod illa quinque quæ ponit Aristoteles, deficiunt a vera ratione virtutis: quia etsi conveniant in actu fortitudinis, differunt tamen in motivo, ut supra habitum est (quæst. cxxiii. art. 1. ad 2.) Et ideo non ponuntur partes fortitudinis, sed quidam fortitudinis modi.

## QUAESTIO CXXIX.

De magnanimitate,  
in octo articulos divisa.

**D**Einde considerandum est de singulari fortitudinis partibus, ita tamen quod sub quatuor principalibus, quas Tullius ponit, alias comprehendamus, nisi quod magnanimitatem, de qua etiam Aristoteles tractat, loco fiduciæ ponemus.

Primo ergo considerandum erit de magnanimitate; secundo de magnificentiâ; tertio de patientia; quarto de perseverantia.

Circa primum primo considerandum est de magnanimitate; secundo de vitiiis oppositis.

Circa primum quærentur octo.

Primo, utrum magnanimitas sit circa honores.

Secundo, utrum magnanimitas sit solum circa magnos honores.

Tertio, utrum sit virtus.

Quarto, utrum sit virtus specialis.

Quinto, utrum sit pars fortitudinis.

Sexto, quomodo se habeat ad fiduciam.

Septimo, quomodo se habeat ad securitatem.

Octavo, quomodo se habeat ab bona fortunæ.

## ARTICULUS I. 643

*Utrum magnanimitas sit circa honores.*

*Sup. quæst. xxviii. & infra præsentii quæst. art. 4. & 8. & quæst. cxxxi. art. 2. cor. & III. dist. xxvi. quæst. 11. art. 2. ad 4. & dist. xxxiii. quæst. 111. art. 3. quæst. 1. cor. & ad 2. & dist. xxxiv. quæst. 1. art. 2. cor.*

**A**D primum sic proceditur. Videtur quod magnanimitas non sit circa honores. Magnanimitas enim est in irascibili: quod ex ipso nomine patet: nam magnanimitas dicitur quasi magnitudo animi. Animus autem pro vi irascibili ponitur, ut patet in III. de Anima (tex. 42.) ubi Philosophus dicit, quod *in sensitivo appetitu est desiderium, & animus, idest concupiscibilis, & irascibilis*. Sed honor est quoddam bonum concupiscibile, cum sit præmium virtutis. Ergo videtur quod magnanimitas non sit circa honores.

2. Præterea. Magnanimitas, cum sit virtus moralis, oportet quod sit circa passiones, vel operationes. Non autem est circa operationes, quia sic esset pars iustitiæ: & sic relinqueretur quod sit circa passiones. Honor autem non est passio. Ergo magnanimitas non est circa honores.

3. Præterea. Ratio magnanimitatis videtur pertinere magis ad prosecutionem quam ad fugam: dicitur enim magnanimus, quia ad magna tendit. Sed virtuosus non laudatur ex hoc quod cupiunt honores, sed magis ex eo quod eos fugiunt. Ergo magnanimitas non est circa honores.

Sed contra est quod Philosophus dicit in IV. Ethic. (cap. 111.) quod *magnanimitas est circa honores, & in honores*.

Respondetur dicendum, quod magnanimitas ex suo nomine importat quandam extensionem animi ad magna. Consideratur autem habitudo virtutis ad duo: primo ad materiam circa quam operatur; alio modo ad actum proprium, qui consistit in debito usu talis materie. Et quia habitus virtutis principaliter ex actu determinatur, ex hoc principaliter dicitur aliquis magnanimus, quia habet animum ad aliquem magnum actum.

Aliquis autem actus potest dici dupliciter magnus: uno modo secundum proportionem; alio modo absolute. Magnus

quidem potest dici actus secundum proportionem, etiam qui consistit in usu alicuius rei parvæ, vel mediocris, puta si aliquis illa re optime utatur; sed simpliciter, & absolute magnus actus est qui consistit in optimo usu rei maximæ.

Res autem quæ in usum hominis veniunt, sunt res exteriores: inter quas simpliciter maximum est honor: cum quia propinquissimum est virtuti, utpote reificatio quædam existens de virtute alicuius, ut supra habitum est (quæst. ciii. art. 1. & 2.) tum etiam quia Deo, & optimis exhibetur: tum etiam quia homines propter honorem consequendum, & vituperium vitandum, alia omnia possunt. Sic autem dicitur aliquis magnanimus ex his quæ sunt magna absolute, & simpliciter, sicut dicitur aliquis fortis ex his quæ sunt difficilia simpliciter. Et ideo consequens est quod magnanimitas consistat circa honores.

Ad primum ergo dicendum, quod bonum, vel malum, absolute quidem considerata pertinent ad concupiscibilem; sed inquantum additur ratio ardui, sic pertinent ad irascibilem: & hoc modo honorem respicit magnanimitas, inquantum scilicet honor habet rationem magni, vel ardui.

Ad secundum dicendum, quod honor etsi non sit passio, vel operatio, est tamen alicuius passionis obiectum, scilicet spei, quæ tendit in bonum arduum. Et ideo magnanimitas est quidem immediate circa passionem spei, mediate autem circa honorem, sicut circa obiectum spei; sicut & de fortitudine supra dictum est (quæst. cxxiii. art. 4. & 5.) quod est circa pericula mortis, inquantum sunt obiectum timoris, & audaciæ.

Ad tertium dicendum, quod illi qui continentur honores hoc modo quod pro eis adipiscendis nil inconveniens faciunt, nec eos nimis appreciantur, laudabiles sunt. Si quis autem hoc modo contemneret honores, quod non curaret facere ea quæ sunt digna honore, hoc vituperabile esset. Et hoc modo magnanimitas est circa honores, ut videlicet studeat facere ea quæ sunt honore digna, non tamen sic ut pro magno æstimet humanum honorem.

A R-

## ARTICULUS II. 644

*Utrum magnanimitas de sui ratione habeat quod sit circa magnum honorem.*

*Sup. quæst. ix. art. 3. cor. & inf. præsent. quæst. art. 4. ad 1. & quæst. cxxx. art. 2. ad 2. & III. dist. ix. quæst. 1. art. 1. quæst. 2. cor. & quæst. 3. ad 3. & dist. xxxiv. quæst. 1. art. 2. corp.*

**A**D secundum sic proceditur. Videtur quod magnanimitas de sui ratione non habeat quod sit circa magnum honorem. Propria enim materia magnanimitatis est honor, ut dictum est (art. præc.) Sed magnum, & parvum accidunt honori. Ergo de ratione magnanimitatis non est quod sit circa magnum honorem.

2. Præterea. Sicut magnanimitas est circa honores, ita mansuetudo est circa iras. Sed non est de ratione mansuetudinis quod sit circa iras magnas, vel parvas. Ergo etiam non est de ratione magnanimitatis quod sit circa magnos honores.

3. Præterea. Parvus honor minus distat a magno honore quam exhonoriatio. Sed magnanimitas bene se habet circa exhonores. Ergo etiam circa parvos honores. Non ergo est solum circa honores magnos.

Sed contra est quod Philosophus dicit in II. Ethic. (cap. vii.) quod magnanimitas est circa magnos honores.

Respondendo dicendum, quod, secundum Philosophum in VII. Physic. (tex. 17. & 18.) virtus est perfectio quædam; & intelligitur esse perfectio potentie, ad cuius ultimum pertinet, ut patet in I. de celo (tex. 116.) Perfectio autem potentie non attenditur in quacumque operatione, sed in operatione quæ habet aliquam magnitudinem, aut difficultatem. Quælibet enim potentia quantumcumque imperfecta, potest in aliquam operationem modicam, & debilem. Et ideo ad rationem virtutis pertinet ut sit circa difficile, & bonum, ut dicitur in II. Ethic. (cap. iii. in fi.)

Difficile autem, & magnum (quæ ad idem pertinent) in actu virtutis potest attendi dupliciter. Uno modo ex parte rationis, in quantum scilicet difficile est medium rationis adinvicem, & in aliqua materia statuere: & ista difficultas solum invenitur in actu virtutum intellectualium, & etiam in actu iusticie. A-

lia autem difficultas est ex parte materie, quæ de se repugnantiam habet oportet ad modum rationis, qui est circa eam ponendus: & ista difficultas præcipue attenditur in aliis virtutibus moralibus, quæ sunt circa passiones: quia passiones pugnant contra rationem, ut Dionysius dicit iv. cap. de div. Nom. (part. iv. lect. 20. & 21.)

Circa quas considerandum est, quod quædam passiones sunt quæ habent magnam vim resistendi rationi, principaliter ex parte passionis; quædam vero principaliter ex parte rerum quæ sunt obiecta passionum. Passiones autem non habent magnam vim repugnandi rationi, nisi fuerint vehementes, eo quod appetitus sensitivus, in quo sunt passiones, naturaliter subditur rationi. Et ideo virtutes quæ sunt circa huiusmodi passiones, non ponuntur nisi circa id quod est magnum in illis passionibus; sicut sortitudo est circa maximos timores, & audacias; temperantia autem circa maximam delectationem concupiscentias; & similiter mansuetudo est circa maximas iras. Passiones autem quædam habent magnam vim repugnandi rationi ex ipsis rebus exterioribus, quæ sunt passionum obiecta, sicut amor, vel cupiditas pecunie, sive honoris. Et in his oportet esse virtutem non solum circa id quod est maximum in eis, sed etiam circa media, vel minora: quia res exterius existentes, etiam si sint parvæ, sunt multum appetibiles, utpote necessarias ad vitam hominis. Et ideo circa appetitum pecuniarum sunt duæ virtutes: una quidem circa mediocres, vel moderatas, scilicet liberalitas; alia autem circa pecunias magnas, scilicet magnificentia.

Similiter etiam & circa honores sunt duæ virtutes. Una quidem circa mediocres honores, quæ innominata est; nominatur tamen ex suis extremis, quæ sunt *philotimia*, id est amor honoris; & *apbitotimia*, id est sine amore honoris: laudatur enim quandoque qui amat honorem, quandoque autem qui non curat de honore, prout scilicet utrumque moderate fieri potest. Circa magnos autem honores est *magnanimitas*. Et ideo dicendum est, quod propria materia magnanimitatis est magnus honor; & ad ea tendit magnanimus quæ sunt magno honore digna.

Ad primum ergo dicendum, quod magnum, & parvum per accidens se habent ad honorem secundum se consideratum.

scd

sed magnam differentiam faciunt, secundum quod comparantur ad rationem, cuius modum in usu honoris observari oportet, qui multo difficilius observatur in magnis honoribus quam in parvis.

Ad secundum dicendum, quod in ira, & in aliis materiis non habet difficultatem notabilem nisi illud quod est maximum, circa quod solum oportet esse virtutem. Alia autem est ratio de divitiis, & honoribus, quæ sunt res extra animam existentes.

Ad tertium dicendum, quod ille qui bene magnis utitur, multo magis potest bene uti parvis. Magnanimus ergo intendit magnos honores, sicut quibus est dignus, vel etiam sicut minores his quibus est dignus, quia scilicet virtus non potest sufficienter honorari ab homine, cui debetur honor a Deo. Et ideo non extollitur ex magnis honoribus, quia non reputat eos supra se, sed magis eos contemnit; & multo magis moderatur aut parvos. Et similiter etiam de honorationibus non frangitur, sed eas contemnit, utpote quas reputat sibi indigne asserri.

### ARTICULUS III. 643

*Utrum magnanimitas sit virtus.*

*Inf. quest. cxxx. art. 2. & II. dist. xlii. quest. 11. art. 4. cor. & IV. dist. xxxiii. quest. 111. art. 2. ad 1. & mal. quest. viii. art. 2. corp.*

**A**D tertium sic proceditur. Videtur quod magnanimitas non sit virtus. Omnis enim virtus moralis in medio consistit. Sed magnanimitas non consistit in medio, sed in maximo: quia magnanimus maximis dignificat seipsum, ut dicitur in IV. Ethic. (cap. 111.) Ergo magnanimitas non est virtus.

2. Præterea. Qui unam virtutem habet, habet omnes, ut supra habitum est (1. 2. quest. lxxv. art. 1.) Sed aliquis potest habere aliquam virtutem non habens magnanimitatem: dicit enim Philosophus in IV. Ethic. (cap. 111. circa princ.) quod qui est parvis dignus, & his dignificat seipsum, temperatus est, magnanimus autem non. Ergo magnanimitas non est virtus.

3. Præterea. Virtus est bona qualitas mentis, ut supra habitum est (1. 2. quest. lv. art. 4.) Sed magnanimitas habet quasdam corporales dispositiones: dicit enim Philosophus in IV. Ethic. (cap. 111. a

med.) quod motus lentus magnanimi videtur, & vox gravis, & locutio stabilis. Ergo magnanimitas non est virtus.

4. Præterea. Nulla virtus opponitur alteri virtuti. Sed magnanimitas opponitur humilitati: nam magnanimus se dignum reputat magnis, & alios contemnit, ut dicitur in IV. Ethic. (loc. cit.) Ergo magnanimitas non est virtus.

5. Præterea. Cuiuslibet virtutis proprietates sunt laudabiles. Sed magnanimitas habet quasdam proprietates vituperabiles: primo quidem quia magnanimus non est memor beneficiorum; secundo quia est otiosus, & tardus; tertio quia utitur ironia ad multos; quarto quia non potest aliis convivere; quinto quia magis possidet infructuosa quam fructuosa. Ergo magnanimitas non est virtus.

Sed contra est quod in laudem quorundam dicitur II. Machab. xiv. 18. Nicanor audiens virtutem comitum Iude, & animi magnitudinem, quam pro patria certaminibus habebant, sanguine iudicium facere metuebat. Laudabilia autem sunt solum virtutum opera. Ergo magnanimitas, ad quam pertinet magnum animum habere, est virtus.

Respondeo dicendum, quod ad rationem virtutis humanæ pertinet ut in rebus humanis bonum rationis servetur, quod est proprium hominis bonum. Inter ceteras autem res humanas exteriores, honores præcipuum locum tenent, sicut dictum est (art. 1. huius quest. & 1. 2. quest. 11. art. 2. arg. 3.) Et ideo magnanimitas, quæ modum rationis ponit circa magnos honores, est virtus.

Ad primum ergo dicendum, quod, sicut etiam Philosophus dicit in IV. Ethic. (cap. 111. parum a princ.) magnanimus est quidem magnitudine extremus, in quantum scilicet ad maxima tendit; eo autem quod ut oportet, medius, quia videlicet ad ea quæ sunt maxima, secundum rationem tendit: eo enim quod est secundum dignitatem, seipsum dignificat, ut ibidem dicitur, quia scilicet se non extendit ad maiora quam dignus est.

Ad secundum dicendum, quod connexio virtutum non est intelligenda secundum actus, ut scilicet cuilibet competat habere actus omnium virtutum. Unde actus magnanimitatis non competit cuilibet virtuoso, sed solum magnis. Sed secundum principia virtutum, quæ sunt prudentia, & gratia, omnes virtutes sunt connexæ secundum habitum suum in ani-

ma existentes vel in actu, vel in propinqua dispositione. Et sic potest aliquis cui non competit affectus magnanimitatis, habere habitum magnanimitatis, per quem scilicet disponitur ad talem actum exequendum, si sibi secundum statum suum competeret.

Ad tertium dicendum, quod corporales motus diversificantur secundum diversas animæ apprehensiones, & affectiones. Et secundum hoc contingit quod ad magnanimitatem consequuntur quædam accidentia determinata circa motus corporales. Velocitas enim motus provenit ex eo quod homo ad multa intendit quæ explere festinat. Sed magnanimus intendit solum ad magna, quæ pauca sunt, quæ etiam indigent magna attentione: & ideo habet motum tardum. Similiter etiam acuitas vocis, & velocitas præcipue competit his qui de quibuslibet contendere volunt: quod non pertinet ad magnanimos, qui non intromittunt se nisi de magnis. Et sicut prædictæ dispositiones corporalium motuum conveniunt magnanimis secundum modum affectionis eorum; ira etiam in his qui sunt naturaliter dispositi ad magnanimitatem tales conditiones naturaliter inveniuntur.

Ad quartum dicendum, quod in homine invenitur aliquid magnum, quod ex dono Dei possidet; & aliquis defectus, qui competit ei ex infirmitate naturæ. Magnanimitas ergo facit quod homo se magnis dignificet secundum considerationem donorum quæ possidet ex Deo; sicut si habet magnam virtutem animi, magnanimitatis facit quod ad perfecta opera virtutis tendat: & similiter est dicendum de usu cuiuslibet alterius boni, puta scientiæ, vel exterioris fortunæ. Humilitas autem facit quod homo seipsum parvipendat secundum considerationem proprii defectus. Similiter etiam magnanimitas contemnit alios, secundum quod deficient a donis Dei: non enim tantum alios appetiatur quod pro eis aliquid indecens faciat. Sed humilitas alios honorat, & superiores æstimat, in quantum in eis aliquid inspicit de donis Dei. Unde dicitur in Psal. xiv. 4. de viro iusto: *Ad nihilum deductus est in conspectu eius magnus*, quod pertinet ad contemptum magnanimi; *timentes autem Dominum glorificat*, quod pertinet ad honorationem humilis. Et sic patet quod magnanimitas, & humilitas non sunt contraria, quamvis in contraria tendere videantur, quia

procedunt secundum diversas considerationes.

Ad quintum dicendum, quod proprietates illæ secundum quod ad magnanimum pertinent, non sunt vituperabiles, sed superexcedenter laudabiles. Quod enim primo dicitur, quod magnanimus non habet in memoria eos a quibus beneficia recipit, intelligendum est quantum ad hoc quod non est sibi delectabile quod ab aliquibus beneficia recipiat, quin eis maiora recompenset: quod pertinet ad perfectionem gratitudinis, in cuius actu vult superexcellere, sicut & in actibus aliarum virtutum. Similiter etiam secundo dicitur, quod est otiosus, & tardus; non quia deficiat ab operando ea quæ sibi conveniunt, sed quia non ingerit se quibuscumque operibus, sed solum magnis, qualia decent eum. Dicitur etiam tertio, quod utitur ironia, non secundum quod opponitur veritati, ut scilicet dicat de se aliqua vilia, quæ non sunt, vel neget aliqua magna, quæ sunt; sed quia non totam magnitudinem suam monstrat, maxime quantum ad inferiorum multitudinem: quia, sicut etiam Philosophus ibidem dicit (sc. Lib. IV. Ethic. cap. 11.) *ad magnanimum pertinet magnum esse ad eos qui in dignitate, & bonis fortunæ sunt, ad medios autem moderatum*. Quarto etiam dicitur, quod ad alios non potest convivere, scilicet familiariter, nisi ad amicos: quia omnino vitat adulationem, & simulationem, quæ pertinent ad animi parvitatem. Convivit tamen omnibus, & magnis, & parvis, secundum quod oportet, ut dictum est (in resp. ad 1.) Quinto etiam dicitur, quod vult habere magis instructuosa, non quæcumque, sed bona, idest honesta: nam in omnibus præponit honesta utilibus, tamquam maiora: utilia enim quæruntur ad subveniendum alicui defectui, qui magnanimitati repugnat.

## ARTICULUS IV. 646

*Utrum magnanimitas sit virtus specialis.*

*Inf. art. 5. ad 2. & quaest. cxxxiv. art. 2. ad 2. & II. dist. xlii. quaest. 11. art. 4. co. & III. dist. ix. quaest. 1. art. 1. quaest. 2. cor. & dist. xxxiii. quaest. 111. art. 3. quaest. 4. cor. & ad 1. & IV. dist. xiv. quaest. 1. art. 1. quaest. 3. ad 2. & dist. xvi. quaest. 1v. art. 1. quaest. 2. ad 2. & mal. quaest. viii. art. 2. ad 1.*

**A**D quartum sic proceditur. Videtur quod magnanimitas non sit specialis virtus. Nulla enim specialis virtus operatur in omnibus virtutibus. Sed Philosophus in IV. Ethic. (cap. 111. antemed.) dicit, quod ad magnanimum pertinet quod est in unaquaque virtute magnum. Ergo magnanimitas non est specialis virtus.

2. Præterea. Nulli speciali virtuti attribuntur actus diversarum virtutum. Sed magnanimo attribuntur diversarum virtutum actus: dicitur enim in IV. Ethic. (loc. cit.) quod ad magnanimum pertinet non fugere commentem (quod est actus prudentiæ) neque facere iniusta (quod est actus iustitiæ) & quod est promptus ad beneficiendum (quod est actus caritatis) & quod ministrat prompte (quod est actus liberalitatis) & quod est veridicus (quod est actus veritatis) & quod non est plandivus (quod est actus patientiæ.) Ergo magnanimitas non est specialis virtus.

3. Præterea. Quælibet virtus est quidam specialis ornatu animæ, secundum illud Isaïæ lxx. 10. *Induit me Dominus vestimentis salutis:* & postea subdit: *Quasi sponfam ornatam manibus suis.* Sed magnanimitas est ornatu omnium virtutum, ut dicitur in IV. Ethic. (loc. cit.) Ergo magnanimitas est virtus generalis.

Sed contra est quod Philosophus in II. Ethic. (cap. vii.) distinguit eam contra alias virtutes.

Respondeo dicendum, quod, sicut supra dictum est (quaest. cxxiii. art. 2.) ad specialem virtutem pertinet quod modum rationis in aliqua determinata materia ponat. Magnanimitas autem ponit modum rationis circa determinatam materiam, scilicet circa honores, ut supra dictum est (art. 1. & 2. hu. quaest.) Honor autem secundum se consideratus, est

quoddam speciale bonum: & secundum hoc magnanimitas secundum se considerata, est specialis quædam virtus.

Sed quia honor est cuiuslibet virtutis præmium, ut ex supra dictis patet (quaest. ciii. art. 1. ad 2.) ideo ex consequenti, ratione suæ materiæ, respicit omnes virtutes.

Ad primum ergo dicendum, quod magnanimitas non est circa honorem quantumcumque, sed circa magnum honorem. Sicut autem honor debetur virtuti, ita & magnus honor debetur magno operi virtutis. Et inde est quod magnanimus intendit magna operari in qualibet virtute, inquantum scilicet tendit ad ea quæ sunt digna magno honore.

Ad secundum dicendum, quod quia magnanimus tendit ad magna, consequens est quod ad illa præcipue tendat quæ important aliquam excellentiam, & illa fugiat quæ pertinent ad defectum. Pertinet autem ad quandam excellentiam quod aliquis beneficiat, & quod sit communicativus, & plurium retributivus. Et ideo ad ista promptum se exhibet, inquantum habent rationem cuiusdam excellentiæ, non autem secundum eam rationem qua sunt actus aliarum virtutum. Ad defectum autem pertinet quod aliquis intantum magnipendat aliqua exteriora bona, vel mala, quod pro eis a iustitia, vel quacumque virtute recedat, & declinet. Similiter etiam ad defectum pertinet omnis occultatio veritatis, quia videtur ex timore procedere. Quod etiam aliquis sit plandivus, ad defectum pertinet, quia per hoc videtur animus exterioribus malis succumbere. Et ideo hæc, & similia vitat magnanimus secundum quandam specialem rationem scilicet tamquam contraria excellentiæ, vel magnitudini.

Ad tertium dicendum, quod quælibet virtus habet quandam decorem, si ve ornatu ex sua specie, qui est proprius unicuique virtuti; sed superadditur alius ornatu ex ipsa magnitudine operis virtuosus per magnanimitatem, quæ omnes virtutes maiores facit, ut dicitur in IV. Ethicor. (cap. 111.)

## ARTICULUS V. 647

*Utrum magnanimitas sit pars fortitudinis.*

*Sup. quaest. cxxviii. & locis ibid. notatis.*

**A**D quintum sic proceditur. Videtur quod magnanimitas non sit pars fortitudinis. Idem enim non est pars sui ipsius. Sed magnanimitas videtur idem esse fortitudini: dicit enim Seneca in Lib. de quatuor virtutibus (cap. de magnanim. in princ.) *Magnanimitas, quae & fortitudo dicitur, si inest animo tuo, cum fiducia magna vires: & Tullius dicit in 1. de offic. (in tit. Fortitudinem, si ab honestate recedat &c.) Viros fortes, magnanimos eodem esse volumus, veritatis amicos, minimeque fallaces.* Ergo magnanimitas non est pars fortitudinis.

2. Praeterea. Philosophus in IV. Ethic. (cap. xii. a med.) dicit, quod *magnanimus non est philokindynos*, id est amator periculi. Ad fortem autem pertinet se exponere periculis. Ergo magnanimitas non convenit cum fortitudine, ut possit dici pars eius.

3. Praeterea. Magnanimitas respicit magnum in bonis sperandis; fortitudo autem respicit magnum in malis timendis, vel audendis. Sed bonum est principalius quam malum. Ergo magnanimitas est principalior virtus quam fortitudo. Non ergo est pars eius.

Sed contra est quod Macrobius (Lib. I. in somn. Scip. cap. viii.) & Andronicus ponunt magnanimitatem fortitudinis partem.

Respondetur dicendum, quod, sicut supra dictum est (1. 2. quaest. lxi. art. 3.) principalis virtus est ad quam pertinet aliquem generalem modum virtutis constituere in aliqua materia principali. Inter alios autem generales modos virtutis unus est firmitas animi: quia *firmiter se habere requiritur in omni virtute*, ut dicitur in II. Eth. (cap. iv.) Praecipue tamen laudatur hoc in virtutibus quae in aliquod arduum tendunt, in quibus difficillimum est firmitatem servare. Et ideo quanto difficilior est in aliquo arduo firmiter se habere, tanto principalior est virtus quae circa illud firmitatem praestat animo.

Difficilior autem est firmiter se habere in periculis mortis, in quibus confir-

mat animum fortitudo, quam in maximis bonis sperandis, vel adipiscendis, ad quae confirmat animum magnanimitas: quia sicut homo maxime diligit vitam suam, ita maxime refugit mortis pericula. Sic ergo patet quod magnanimitas convenit cum fortitudine, inquantum confirmat animum circa aliquid arduum; deficit autem ab ea in hoc quod confirmat animum in eo circa quod facilius est firmitatem servare. Unde magnanimitas ponitur pars fortitudinis, quia adiungitur ei sicut secundaria principali.

Ad primum ergo dicendum, quod, sicut Philosophus dicit in V. Ethic. (cap. 1. cir. med. & cap. xii. in fin.) *carere malo accipitur in ratione boni*: unde & non superari ab aliquo gravi malo, puta a periculis mortis; accipitur quodammodo pro eo quod est attingere ad magnum bonum: quorum primum pertinet ad fortitudinem, sed secundum ad magnanimitatem: & secundum hoc fortitudo, & magnanimitas pro eodem accipi possunt. Quia tamen alia ratio difficultatis est in utroque praedictorum, ideo proprie loquendo magnanimitas a Philosopho (Lib. II. Ethic. cap. vii.) ponitur alia virtus a fortitudine.

Ad secundum dicendum, quod amator periculi dicitur qui indifferenter se periculis exponit: quod videtur pertinere ad eum qui indifferenter multa quasi magna existimat; quod est contra rationem magnanimi: nullus enim videtur pro aliquo se periculis exponere, nisi illud magnum existimet. Sed pro his quae vere sunt magna, magnanimus promptissime se periculis exponit: quia operatur magnum in actu fortitudinis, sicut in actibus aliarum virtutum. Unde & Philosophus ibidem dicit, quod *magnanimus non est microkindynos*, id est pro parvis periclitans, sed *est megalokindynos*, id est pro magnis periclitans. Et Seneca dicit in Libro de quatuor virtutibus (cap. de magnanim. in fin.) *Eris magnanimus, si pericula nec appetas ut temerarius, nec formides ut timidus. Nam nil timidum facit animum, nisi reprehensibiles vitae conscientia.*

Ad tertium dicendum, quod malum, inquantum huiusmodi, fugiendum est: quod autem contra ipsum sit perflendum, est per accidens, id est inquantum oportet sustinere mala ad conservationem bonorum. Sed bonum de se est appetendum; & quod ab eo refugiat, non est nisi per accidens, inquantum scilicet existimatur excedere facultatem defini-



desiderantis . Semper autem quod per se est , potius est quam illud quod est per accidens . Et ideo magis repugnat firmitati animi arduum in malis quam arduum in bonis . Et ideo principalior est virtus fortitudinis quam magnanimitatis . Licet enim bonum sit simpliciter principalius quam malum , malum tamen est principalius quantum ad hoc .

# ARTICULUS VI. 648

*Utrum fiducia pertineat ad magnanimitatem .*

*Sup. 1. quæst. cxxviii. & III. dist. xxxiii. quæst. 111. art. 3. quæst. 1. cor.*

**A**D sextum sic proceditur . Videtur quod fiducia non pertineat ad magnanimitatem . Potest enim aliquis habere fiduciam non solum de seipso , sed etiam de alio , secundum illud II. ad Corinth. 111. 4. *Fiduciam autem talem habemus per Christum Iesum ad Deum , non quod sufficienter finis cogitare aliquid a nobis quasi ex nobis .* Sed hoc videtur esse contra rationem magnanimitatis . Ergo fiducia ad magnanimitatem non pertinet .

2. Præterea . Fiducia videtur esse timori opposita , secundum illud Isa. xii. 2. *Fiducialiter agam , & non timebo .* Sed carere timore magis pertinet ad fortitudinem . Ergo & fiducia magis ad fortitudinem pertinet quam ad magnanimitatem .

3. Præterea . Præmium non debetur nisi virtuti . Sed fiduciæ debetur præmium : dicitur enim ad Hebr. 111. 6. *quod nos sumus domus Christi , si fiduciam , & gloriam spei usque in finem firmam retineamus .* Ergo fiducia est quædam virtus distincta a magnanimitate : quod etiam videtur per hoc quod Macrobius ( Lib. I. in somn. Scip. cap. viii. ) eam magnanimitati condidit .

Sed contra est quod Tullius in sua Rhetor. ( Lib. II. de invent. aliquant. ante fin. ) videtur ponere fiduciam loco magnanimitatis , ut supra dictum est ( quæst. præc. ad 6. & in divis. hu. quæst. )

Respondendo dicendum , quod nomen fiduciæ ex fide assumptum esse videtur . Ad fidem autem pertinet aliquid , & alicui credere . Pertinet autem fiducia ad spem , secundum illud Iob xi. 18. *Habebis fiduciam proposita tibi spe .* Et ideo nomen fiduciæ hoc principaliter significare videtur quod aliquis spem concipiat

ex hoc quod credit verbis alicuius auxilium promittentis .

Sed quia fides dicitur etiam opinio vehemens , contingit autem aliquid vehementer opinari non solum ex eo quod est ab alio dictum , sed etiam ex hoc quod est in alio consideratum ; inde est quod fiducia etiam potest dici , quia aliquis spem alicuius rei concipit ex aliquo considerato : quandoque quidem in seipso , puta cum aliquis videns se sanum , confidit se diu victurum ; quandoque autem in alio , puta cum aliquis considerans alium amicum suum esse , & potentem , fiduciam habet adiuvari ab eo .

Dictum est autem supra ( art. 1. hu. quæst. ad 2. ) quod magnanimitas proprie est circa spem alicuius ardui . Et ideo quia fiducia importat quoddam robur spei proveniens ex aliqua consideratione , quæ facit vehementem opinionem de bono assequendo , inde est quod fiducia ad magnanimitatem pertinet .

Ad primum ergo dicendum , quod , sicut Philosophus dicit in IV. Ethic. ( cap. 111. ad fin. ) *ad magnanimum pertinet nulla indigere* , quia hoc deficientis est . Hoc tamen debet intelligi secundum modum humanum : unde addit *vel vix* . Hoc est enim supra hominem ut omnino nullo indigeat . Indiget enim omnis homo primo quidem divino auxilio , secundo autem etiam auxilio humano : quia homo est naturaliter animal sociale , eo quod sibi non sufficit ad vitam . Inquantum ergo indiget aliis , sic ad magnanimum pertinet ut habeat fiduciam de aliis : quia hoc etiam ad excellentiam hominis pertinet quod habeat alios in promptu qui eum possint iuvare . Inquantum autem ipse aliquid potest , intantum ad magnanimitatem pertinet fiducia quam habet de seipso .

Ad secundum dicendum , quod , sicut supra dictum est ( 1. 2. quæst. cxxiii. art. 2. & quæst. xl. art. 4. ) cum de passionibus ageretur , spes quidem directe opponitur desperationi , quæ est circa idem obiectum , scilicet circa bonum ; sed secundum obiectorum contrarietatem opponitur timori , cuius obiectum est malum . Fiducia autem quoddam robur spei importat : & ideo opponitur timori , sicut & spes . Sed quia fortitudo proprie firmat hominem circa mala , magnanimitas autem circa prosecutionem bonorum , inde est quod fiducia magis proprie pertinet ad magnanimitatem quam ad fortitudinem . Sed quia spes causat audaciam ,

quæ pertinet ad fortitudinem, inde est quod fiducia ex consequenti ad fortitudinem pertinet.

Ad tertium dicendum, quod fiducia, ut dictum est (in cor. art.) importat quemdam modum spei: est enim fiducia spes roborata ex aliqua firma opinione. Modus autem adhibitus alicui affectioni potest pertinere ad commendationem ipsius actus, ut ex hoc sit meritorius; non tamen ex hoc determinatur ad speciem virtutis, sed ex materia. Et ideo fiducia non potest, proprie loquendo, nominare aliquam virtutem, sed potest nominare conditionem virtutis: & propter hoc numeratur inter partes fortitudinis, non quasi virtus adiuncta, nisi secundum quod accipitur pro magnanimitate a Tullio (loc. cit. in arg. *Sed cont.*) sed sicut pars integralis, ut dictum est (quaest. præc.)

## ARTICULUS VII. 649

*Utrum securitas ad magnanimitatem pertineat.*

**A**D septimum sic proceditur. Videtur quod securitas ad magnanimitatem non pertineat. Securitas enim, ut supra habitum est (quaest. præc. ad 6.) importat quietem quamdam a perturbatione timoris. Sed hoc maxime facit fortitudo. Ergo securitas videtur idem esse quod fortitudo. Sed fortitudo non pertinet ad magnanimitatem, sed potius e converso. Ergo neque securitas ad magnanimitatem pertinet.

2. Præterea. Isidorus dicit in Lib. X. Etymol. (ad lit. S.) quod *securus dicitur quasi sine cura*. Sed hoc videtur esse contra virtutem, quæ curam habet de rebus honestis, secundum illud Apostoli II. ad Timoth. 11. 15. *Solicite cura reipsum probabilem exhibere Deo*. Ergo securitas non pertinet ad magnanimitatem, quæ operatur magnum in omnibus virtutibus.

3. Præterea. Non est idem virtus, & virtutis præmium. Sed securitas ponitur virtutis præmium, ut patet Iob 11. 14. *Si iniquitatem, quæ est in manu tua, abstuleris.... desolus securus dormies*. Ergo securitas non pertinet ad magnanimitatem, neque ad aliam virtutem, sicut pars eius.

Sed contra est quod Tullius dicit in I. de officiis (in tit. *Magnanim. in duobus sita est*) quod ad magnanimum perti-

net neque perturbationi animi, neque homini, neque fortune succumbere. Sed in hoc consistit hominis securitas. Ergo securitas ad magnanimitatem pertinet.

Respondetur dicendum, quod, sicut Philosophus dicit in II. suæ Rethorice (cap. v. a med.) *timor facit homines confisarios*, inquantum scilicet curam habent, qualiter possint evadere ea quæ timent. Securitas autem dicitur per remotionem huius curæ, quam timor ingerit: & ideo securitas importat quamdam perfectam quietem animi a timore, sicut fiducia importat quoddam robur spei. Sic ut autem spes directe pertinet ad magnanimitatem, ita timor directe pertinet ad fortitudinem. Et ideo sicut fiducia immediate pertinet ad magnanimitatem, ita securitas immediate pertinet ad fortitudinem.

Considerandum tamen est, quod sicut spes est causa audacia, ita timor est causa desperationis, ut supra habitum est (1. 2. quaest. xlv. art. 2.) cum de passionibus ageretur. Et ideo sicut fiducia ex consequenti pertinet ad fortitudinem, inquantum utitur audacia; ita & securitas ex consequenti pertinet ad magnanimitatem, inquantum repellit desperationem.

Ad primum ergo dicendum, quod fortitudo non præcipue laudatur ex hoc quod non timeat, quod pertinet ad securitatem, sed inquantum importat firmitatem quamdam in passionibus. Unde securitas non est idem quod fortitudo, sed est quædam conditio eius.

Ad secundum dicendum, quod non quælibet securitas est laudabilis, sed quando deponit aliquis curam, prout debet, & in quibus timere non oportet: & hoc modo est conditio fortitudinis, & magnanimitatis.

Ad tertium dicendum, quod in virtutibus est quædam similitudo, & participatio futuræ beatitudinis, ut supra habitum est (1. 2. quaest. v. art. 3. & 7.) Et ideo nihil prohibet securitatem quamdam esse conditionem alicuius virtutis, quamvis perfecta securitas ad præmium virtutis pertineat.

ARTICULUS VIII. 650

*Utrum bona fortunæ conferant ad magnanimitatem.*

**A**D octavum sic proceditur. Videtur quod bona fortunæ non conferant ad magnanimitatem. Quia, ut Seneca dicit in Lib. I. de ira (cap. xx. & Lib. de vita beata cap. xvi.) *virtus sibi sufficiens est*. Sed magnanimitas facit omnes virtutes magnas, ut dictum est (art. 4. hu. quæst. ad 3.) Ergo bona fortunæ non conferunt ad magnanimitatem.

2. Præterea. Nullus virtuosus contemnit ea quibus iuvatur. Sed magnanimus contemnit ea quæ pertinent ad exteriorem fortunam: dicit enim Tullius in Lib. I. de offic. (in tit. *Magnanimus in duob. posis. sit*) quod *magnus animus in externarum rerum despectu commendatur*. Ergo magnanimitas non adiuvatur a bonis fortunæ.

3. Præterea. Ibidem Tullius subdit, quod *ad magnum animum pertinet, ea quæ videntur acerba, ita ferre, ut nihil a statu nature discedat, nihil a dignitate sapientis*: & Aristoteles dicit in IV. Ethic. (cap. 111. ante med.) quod *magnanimus in infortunio non est tristis*. Sed acerba, & infortunia opponuntur bonis fortunæ: quilibet enim tristatur de subtractione eorum quibus iuvatur. Ergo exteriora bona fortunæ non conferunt ad magnanimitatem.

Sed contra est quod Philosophus dicit in IV. Ethic. (cap. 111. ante med.) quod *bona fortunæ videntur conferre ad magnanimitatem*.

Respondeo dicendum, quod, sicut ex supra dictis patet (art. 1. hu. quæst.) magnanimitas ad duo respicit; ad honorem quidem sicut ad materiam, & ad aliquid magnum operandum sicut ad finem.

Ad utrumque autem istorum bona fortunæ cooperantur. Quia enim honor virtuosus non solum a sapientibus, sed etiam a multitudine exhibetur, quæ maxima reputat huiusmodi exteriora bona fortunæ; sit ex consequenti ut ab eis maior honor exhibetur his quibus adfuit exteriora bona fortunæ. Similiter etiam ad actus virtutum organicæ bona fortunæ deserviunt: quia per divitias, & potentias, & amicos datur nobis fa-

3. Tb. Oper. Tom. XXIII.

(1) *Vulgata: ad ea vero quæ sunt priora extendens seipsum &c.*

cultas operandi. Et ideo manifestum est quod bona fortunæ conferunt ad magnanimitatem.

Ad primum ergo dicendum, quod virtus sibi sufficiens esse dicitur, quia sine his etiam exterioribus bonis esse potest; indiget tamen his exterioribus bonis ad hoc quod expeditius operetur.

Ad secundum dicendum, quod magnanimus exteriora bona contemnit, inquantum non reputat ea bona magna, pro quibus debeat aliquid indecens facere; non tamen quantum ad hoc contemnit ea, quin reputet ea utilia ad opus virtutis exequendum.

Ad tertium dicendum, quod quicumque non reputat aliquid magnum, neque multum gaudet, si illud obtineat, neque multum tristatur, si illud amittat: & ideo quia magnanimus non æstimat exteriora bona, scilicet bona fortunæ, quasi aliqua magna; inde est quod nec de eis multum extollitur, si adfuit, neque in eorum amissione multum deicitur.

QUAESTIO CXXX.

*De præsumptione.*

*ip. duos articulos divisa.*

**D**Einde considerandum est de vitiis oppositis magnanimitati: & primo de illis quæ opponuntur sibi per excessum; quæ sunt tria, scilicet præsumptio, ambitio, & inanis gloria: secundo de pusillanimitate, quæ opponitur ei per modum defectus.

Et circa primum quærentur duo.

Primo, utrum præsumptio sit peccatum.

Secundo, utrum opponatur magnanimitati per excessum.

ARTICULUS I. 651

*Utrum præsumptio sit peccatum.*

*Sup. quæst. xxi. art. 2. ad 1. Et quæst. lxx. art. 3. ad 2.*

**A**D primum sic proceditur: Videtur quod præsumptio non sit peccatum. Dicit enim Apostolus ad Philip. 111. 13. *Quæ retro sunt obliuiscens, (a) ad anteriora me extendo*. Sed hoc videtur ad præsumptionem pertinere quod aliquis tendat in ea quæ sunt supra seipsum. Ergo præsumptio non est peccatum.

H 3

3. Præ-

2. Præterea. Philosophus dicit in X. Ethic. ( cap. vii. ad fin. ) quod oportet non secundum suadentes humana sapere hominem entem, neque mortalia mortalem, sed in quantum contingit immortalem facere : & in I. Metaph. ( cap. ii. a med. ) dicit, quod homo debet se trahere ad divina, in quantum potest. Sed divina, & immortalia maxime videntur esse supra hominem. Cum ergo de ratione præsumptionis sit quod aliquis tendat in ea quæ sunt supra seipsum, videtur quod præsumptio non sit peccatum, sed magis sit aliquid laudabile.

3. Præterea. Apostolus dicit II. ad Corinth. iii. 5. Non sumus sufficientes aliquid cogitare a nobis, quasi ex nobis. Si ergo præsumptio, secundum quam aliquis nititur in ea ad quæ non sufficit, sit peccatum, videtur quod homo nec cogitare aliquid bonum licite possit : quod est inconveniens. Non ergo præsumptio est peccatum.

Sed contra est quod dicitur Eccli. xxxvii. 3. O præsumptio nequissima, unde creata es ? Ubi respondet Glossa ( interl. ), de mala scilicet voluntate, creaturæ. Sed omne quod procedit ex radice malæ voluntatis, est peccatum. Ergo præsumptio est peccatum.

Respondeo dicendum, quod cum ea quæ sunt secundum naturam, sint ordinata ratione divina, quam humana ratio debet imitari ; quicquid secundum rationem humanam sit quod est contra ordinem communiter in naturalibus rebus inventum, est vitiosum, & peccatum.

Hoc autem communiter in omnibus rebus naturalibus invenitur quod quælibet actio commensuratur virtuti agentis ; nec aliquid agens naturale nititur ad agendum id quod excedit suam facultatem. Et ideo vitiosum est, & peccatum quasi contra ordinem naturalem existens, quod aliquis assumat ad agendum ea quæ præferuntur suæ virtuti : quod pertinet ad rationem præsumptionis, sicut & ipsum nomen manifestat. Unde manifestum est quod præsumptio est peccatum.

Ad primum ergo dicendum, quod nihil prohibet aliquid esse supra potentiam activam alicuius rei naturalis quod non est supra potentiam passivam eiusdem : inest enim acri potentia passiva, per quam potest transmutari in hoc quod habet actionem, & motum ignis, quæ excedunt potentiam activam aeris. Sic etiam

vitiolum esset, & præsumptuosum quod aliquis in statu imperfectæ virtutis existens, attentaret statim assequi ea quæ sunt perfectæ virtutis. Sed si quis ad hoc tendat ut proficiat in virtutem perfectam, hoc non est præsumptuosum, nec vitiosum. Et hoc modo Apostolus in anteriora se extendebat, scilicet per continuum profectum.

Ad secundum dicendum, quod divina, & immortalia secundum ordinem naturæ sunt supra hominem. Homini tamen inest quædam potentia naturalis, scilicet intellectus, per quam potest coniungi immortalibus, & divinis. Et secundum hoc Philosophus dicit, quod oportet hominem se trahere ad immortalia, & divina, non quidem ut ea operetur quæ decet Deum facere, sed ut ei uniatur per intellectum, & voluntatem.

Ad tertium dicendum, quod, sicut Philosophus dicit in III. Ethic. ( cap. iii. a med. ) quæ per alios possumus, aequaliter per nos possumus. Et ideo quia cogitare, & facere bonum possumus cum auxilio divino, non totaliter hoc excedit nostram facultatem. Et ideo non est præsumptuosum, si aliquis ad aliquid opus virtuosum agendum intendat ; esset autem præsumptuosum, si ad hoc aliquis tenderet absque fiducia divini auxilii.

## ARTICULUS II. 652

Utrum præsumptio opponatur magnanimitati per excessum.

Inf. quæst. cxxxiii. art. 1. cor. & mal. quæst. viii. art. 3. ad 1.

AD secundum sic proceditur. Videtur quod præsumptio non opponatur magnanimitati per excessum. Præsumptio enim ponitur species peccati in Spiritum sanctum, ut supra habitum est ( quæst. xiv. art. 2. & quæst. xxi. art. 1. ) Sed peccatum in spiritum sanctum non opponitur magnanimitati, sed magis caritati. Ergo etiam neque præsumptio opponitur magnanimitati.

2. Præterea. Ad magnanimitatem pertinet quod aliquis se magnis dignificet. Sed aliquis dicitur præsumptuosus, etiam si se parvis dignificet, dummodo hoc excedat propriam facultatem. Non ergo directe præsumptio opponitur magnanimitati.

3. Præterea. Magnanimus exteriora bona

bona reputat quasi parva. Sed secundum Philosophum in IV. Ethic. (cap. 111. cir. med.) *presumptuosi propter exteriorum fortium sunt despectores, & iniuriatores aliorum, quasi magnum aliquid aestimant exteriora bona.* Ergo praesumptio non opponitur magnanimitati per excessum, sed solum per defectum.

Sed contra est quod Philosophus dicit in II. Ethicor. (cap. vii.) & in IV. (cap. 111. ad fin.) quod *magnanimo opponitur per excessum cibus, idest sumosus, vel ventosus, quem nos dicimus praesumptuosum.*

Respondeo dicendum, quod, sicut supra dictum est (quaest. praec. art. 3. ad 1.) magnanimitas consistit in medio; non quidem secundum quantitatem eius in quod tendit, quia tendit in maximum, sed constituitur in medio secundum proportionem ad propriam facultatem: non enim in maiora tendit quam sibi conveniant.

Praesumptuosus autem, quantum ad id in quod tendit, non excedit magnanimum, sed multum quandoque ab eo deficit; excedit autem secundum proportionem sine facultatis, quam magnanimus non transcendit. Et hoc modo opponitur praesumptio magnanimitati per excessum.

Ad primum ergo dicendum, quod non quilibet praesumptio ponitur peccatum in Spiritum sanctum, sed illa qua quis divinam iustitiam contemnit ex inordinata confidentia divinae misericordiae: & talis praesumptio ratione materiae, in quantum scilicet per eam contemnitur aliquid divinum, opponitur caritati, vel potius dono timoris, cuius est Deum revereri. In quantum tamen talis contemptus excedit proportionem propriae facultatis, potest opponi magnanimitati.

Ad secundum dicendum, quod sicut magnanimitas, ita & praesumptio in aliquod magnum tendere videtur. Non enim multum consuevit dici aliquis praesumptuosus, si in aliquo modico vires proprias transcendat. Si tamen talis praesumptuosus dicatur, haec praesumptio non opponitur magnanimitati, sed illi virtuti quae est circa mediocres honores, ut dictum est (quaest. praec. art. 2.)

Ad tertium dicendum, quod nullus attemptat aliquid supra suam facultatem, nisi in quantum facultatem suam aestimat maiorem quam sit. Circa quod potest esse error dupliciter: uno modo secundum solam quantitatem; puta cum ali-

quis aestimat se habere maiorem virtutem, scientiam, vel aliquid aliud huiusmodi, quam habeat: alio modo secundum genus rei; puta cum aliquis ex hoc aestimat se magnum, & magnis dignum, ex quo non est, puta propter divitias, vel propter aliqua bona fortunae. Ut enim Philosophus dicit in IV. Ethic. (cap. 111. cir. med.) *qui sine virtute talia bona habent, neque iuste magnis seiplos dignificant, neque recte magnanimi dicuntur.* Similiter etiam illud ad quod aliquis tendit supra vires suas quandoque quidem secundum rei veritatem est magnum simpliciter; sicut patet de Petro, qui tendebat ad hoc quod pro Christo pateretur, quod erat supra virtutem suam: quandoque vero non est aliquid magnum simpliciter, sed solum secundum stultorum opinionem; sicut pretiosis vestibus indui, despicere, & iniuriari aliis: quod quidem pertinet ad excessum magnanimitatis, non secundum rei veritatem, sed secundum opinionem. Unde Seneca dicit in Libro de quatuor virtutibus (cap. de moderanda fortitudine) quod *magnanimitas, si se extra modum suum extollat, facit virum minorem, inflatum, turbidum, inquietum, & in quacunque excellentias, ditorum, iactorumque neglecta honestate, festinum.* Et sic patet quod praesumptuosus secundum rei veritatem quandoque deficit a magnanimo, sed secundum apparentiam in excessu se habet.

QUAESTIO CXXXI.

De ambitione,  
in duos articulos divisa.

**D**Einde considerandum est de ambitione: & circa hoc quaeruntur duo. Primo, utrum ambitio sit peccatum. Secundo, utrum opponatur magnanimitati per excessum.

ARTICULUS I. 633

Utrum ambitio sit peccatum.

**A**D primum sic proceditur. Videtur quod ambitio non sit peccatum. Importat enim ambitio cupiditatem honoris. Honor autem de se quoddam bonum est, & maximum inter exteriora bona; unde & illi qui de honore non curant, vituperantur. Ergo ambitio non est peccatum, sed magis aliquid laudabile, se-

cundum quod bonum laudabiliter appetitur.

2. Præterea. Quilibet absque vitio potest appetere illud quod sibi debetur pro præmio. Sed honor est præmium virtutis, ut Philosophus dicit in I. Ethicor. (cap. xii.) & in IV. (cap. i.) & in VIII. (cap. ult.) Ergo ambitio honoris non est peccatum.

3. Præterea. Illud per quod homo provocatur ad bonum, & revocatur a malo, non est peccatum. Sed per honorem homines provocantur ad bona facienda, & mala vitanda; sicut Philosophus dicit in III. Ethic. (cap. viii. cir princ.) quod *fortissimi videntur esse apud quos timidi sunt inbonorati, fortes autem honorati*; & Tullius dicit in Lib. I. de Tusculanis quaestionibus (parum a princ.) quod *honor alit artes*. Ergo ambitio non est peccatum.

Sed contra est quod dicitur I. ad Corinth. xiii. 5. quod *caritas non est ambitiosa, non quaerit quae sua sunt*. Nihil autem repugnat caritati nisi peccatum. Ergo ambitio est peccatum.

Respondeo dicendum, quod, sicut supra dictum est (quaest. ciii. art. 2. & 3.) honor importat quandam reverentiam alicui exhibitam testimonium excellentiae eius. Circa excellentiam autem hominis duo sunt attendenda. Primo quidem quod illud secundum quod homo excellit, non habet homo a seipso, sed est quasi quiddam divinum in eo: & ideo ex hoc non debetur ei principaliter honor, sed Deo. Secundo considerandum est, quod illud in quo homo excellit, datur homini a Deo, ut ex eo alius proficiat: unde intantum debet homini placere testimonium suae excellentiae, quod ab aliis exhibetur, inquantum ex hoc paratur sibi via ad hoc quod aliis proficiat.

Tripliciter autem appetitum honoris contingit esse inordinatum. Uno modo per hoc quod aliquis appetit testimonium de excellentia quam non habet; quod est appetere honorem supra suam proportionem; alio modo per hoc quod honorem sibi cupit, non referendo in Deum: tertio per hoc quod appetitus eius in ipso honore quiescit, non referens honorem ad utilitatem aliorum. Ambitio autem importat inordinatum appetitum honoris. Unde manifestum est quod ambitio semper est peccatum.

Ad primum ergo dicendum, quod appetitus boni debet regulari secundum rationem, cuius regulam si transgrediar,

erit vitiosus. Et hoc modo vitiosum est quod aliquis honorem appetat non secundum ordinem rationis. Vituperantur autem qui non curant de honore, secundum quod ratio dicitur, ut scilicet non vident ea quae sunt contraria honori.

Ad secundum dicendum, quod honor non est præmium virtutis quoad ipsum virtuosum, ut scilicet hoc pro præmio expectare debeat; sed pro præmio expectat beatitudinem, quae est finis virtutis. Dicitur autem esse præmium virtutis ex parte aliorum, qui non habent aliquid maius, quod virtuosus retribuatur, quam honorem; qui ex hoc ipsa magnitudinem habet, quod perhibet testimonium virtutis. Unde patet quod non est sufficiens præmium, ut dicitur in IV. Ethic. (cap. xii. ante med.)

Ad tertium dicendum, quod sicut per appetitum honoris, quando debito modo appetitur, aliqui provocantur ad bonum, & revocantur a malo; ita etiam si inordinate appetatur, potest esse hominibus occasio multa mala facienda, dum scilicet aliquis non curat, qualitercumque honorem consequi possit. Unde Sallustius dicit in Catilinario (non remote a princ.) quod *gloriam, & honorem, & imperium bonus, & ignavus aequè sibi exoptant*. Sed ille, scilicet bonus, *vera via versatur; huic, scilicet ignavo, quia bene artes desunt, dolis, atque fallaciis contendit*. Et tamen illi qui solum propter honorem vel bona faciunt, vel mala vitant, non sunt virtuosus, ut patet per Philosophum in III. Ethic. (cap. viii. in princ.) ubi dicit, quod non sunt vere fortes qui propter honorem fortia faciunt.

## ARTICULUS II. 654

Utrum ambitio opponatur magnanimitati per excessum.

Ad secundum sic proceditur. Videtur quod ambitio non opponatur magnanimitati per excessum. Uni enim medio non opponitur ex una parte nisi unum extremum. Sed magnanimitati per excessum opponitur praesumptio, ut dictum est (quaest. praec. art. 2.) Ergo non opponitur ei ambitio per excessum.

2. Præterea. Magnanimitas est circa honores. Sed ambitio videtur pertinere ad dignitates: dicitur enim II. Machab. iv. 7. quod *Isaion ambebat summum sa-*

*cerdotium*. Ergo ambitio non opponitur magnanimitati.

3. Præterea. Ambitio videtur ad exteriorem apparatus pertinere: dicitur enim Act. xxv. 23. quod *Agrippa, & Bernice cum multa ambitione introierunt prætorium*: & II. Paralipom. xvi. 14. quod *super corpus Asa morui combusserunt aromata, & unguenta ambitione nimia*. Sed magnanimitas non est circa exteriorem apparatus. Ergo ambitio non opponitur magnanimitati.

Sed contra est quod Tullius in I. de offic. (in tit. *Fortitudinem, si ab honestate recedat* &c.) dicit quod *sicut quisque magnitudine animi excellit, ita maxime vult omnium princeps esse*. Sed hoc pertinet ad ambitionem. Ergo ambitio pertinet ad excessum magnanimitatis.

Respondeo dicendum, quod, sicut dictum est (art. præc.) ambitio importat appetitum inordinatum honoris. Magnanimitas autem est circa honores, & utitur eis, secundum quod oportet. Unde manifestum est quod ambitio opponitur magnanimitati sicut inordinatum ordinato.

Ad primum ergo dicendum, quod magnanimitas ad duo respicit. Ad unum quidem respicit sicut ad finem intentum, quod est aliquod magnum opus, quod magnanimus attentat secundum suam facultatem: & quantum ad hoc opponitur magnanimitati per excessum præsumptio, præsumptio enim attentat aliquid magnum opus supra suam facultatem. Ad aliud autem respicit magnanimitas sicut ad materiam qua debite utitur scilicet ad honorem: & quantum ad hoc opponitur magnanimitati per excessum ambitio. Non est autem inconveniens, secundum diversa esse plures excessus unius medii.

Ad secundum dicendum, quod illis qui sunt constituti in dignitate, propter quamdam excellentiam status debetur honor: & secundum hoc inordinatus appetitus dignitatem pertinet ad ambitionem. Si quis enim inordinate appetet dignitatem, non ratione honoris, sed propter debitum dignitatis usum suam facultatem excedentem, non esset ambibitiosus, sed magis præsumptuosus.

Ad tertium dicendum, quod ipsa solemnitas exterioris cultus ad quemdam honorem pertinet: unde & talibus consuevit honor exhiberi: quod significatur Iacobi 11. 2. *Si introieris in conventum*

*vestrum vir annulum aureum habens in veste candida, & dixeritis ei: Tu sedebis bene* &c. Unde ambitio non est circa exteriorem cultum, nisi secundum quod pertinet ad honorem.

## QUAESTIO CXXXII.

De inani gloria,  
in quinque articulos divisa.

Deinde considerandum est de inani gloria: & circa hoc quaeruntur quinque.

Primo, utrum appetitus gloriæ sit peccatum.

Secundo, utrum magnanimitati opponatur.

Tertio, utrum sit peccatum mortale.

Quarto, utrum sit vitium capitale.

Quinto de filiabus eius.

## ARTICULUS I. 655

Utrum appetitus gloriæ sit peccatum.

Mal. quæst. 11. art. 1. & 2. cor.

Ad primum sic proceditur. Videtur quod appetitus gloriæ non sit peccatum. Nullus enim peccat in hoc quod Deo assimilatur: quinimmo mandatur ad Ephes. v. 1. *Estote imitatores Dei, sicut filii carissimi*. Sed in hoc quod homo quaerit gloriam, videtur Deum imitari, qui ab hominibus gloriam quaerit: unde dicitur Isa. xlii. 6. *Affer filios meos de longinquo, & filias meas ab extremis terræ, & omnem qui invocat nomen meum, in gloriam meam convocavi*. Ergo appetitus gloriæ non est peccatum.

2. Præterea. Illud per quod aliquis provocatur ad bonum, non videtur esse peccatum. Sed per appetitum gloriæ homines provocantur ad bonum: dicit enim Tullius Lib. I. de Tuscul. quæst. (a princ.) quod *omnes ad studia incenduntur gloria*: in sacra etiam Scriptura promittitur gloria pro bonis operibus, secundum illud ad Rom. 11. 7. *His quidem qui secundum patientiam boni operis, gloriam, & honorem*. Ergo appetitus gloriæ non est peccatum.

3. Præterea. Tullius dicit in sua Rhetorica (Lib. II. de invent. aliquant. ante fin.) quod *gloria est frequens de aliquo fama cum laude*: & ad idem pertinet quod

quod (a) Augustinus dicit (Lib. III. cont. Maximin. cap. xiiii. a med.) quod gloria est quasi clara cum laude notitia. Sed appetere laudabilem famam non est peccatum; quinimo videtur esse laudabile, secundum illud Eccli. xli. 15. *Curam habe de bono nomine*: & ad Rom. xii. 17. *Providentes bona non solum coram Deo, sed etiam coram omnibus hominibus*. Ergo appetitus inanis gloriæ non est peccatum.

Sed contra est quod Augustinus dicit V. de civ. Dei (cap. xiii. in princ.) *Sanius videt qui & amorem laudis vitium esse cognoscit*.

Respondendo dicendum, quod gloria claritatem quamdam significat: unde glorificari idem est quod clarificari. Unde Augustinus dicit super Ioan. (tract. lxxxix. & c. a princ. & civ. vers. fin.) *Claritas autem & decor quamdam habent manifestationem*: & ideo nomen gloriæ proprie importat manifestationem alicuius de hoc quod apud homines decorum videtur, sive illud sit bonum corporale aliquid, sive spirituale. Quia vero illud quod simpliciter clarum est, a multis conspici potest, & a senioribus; ideo proprie per nomen gloriæ designatur quod bonum alicuius deveniat in multorum notitiam, & approbationem, secundum quod Salustius dicit in Catilinario: *Gloriari ad unum non est*.

Largius tamen accepto gloriæ nomine, non solum consistit in multitudinis cognitione, sed etiam paucorum, vel unius, aut sui solius, dum scilicet aliquis proprium bonum suum considerat ut dignum laude. Quod autem aliquis bonum suum cognoscat, & approbet, non est peccatum: dicitur enim I. ad Corinth. ii. 12. *Nos autem non spiritum huius mundi accepimus; sed spiritum qui ex Deo est, ut sciamus quæ a Deo donata sunt nobis*. Similiter etiam non est peccatum: quod aliquis velit bona opera sua ab aliis approbati: dicitur enim March. v. 16. *Luceat lux vestra coram hominibus*. Et ideo appetitus gloriæ de se non nominat aliquod vitiosum; sed appetitus inanis, vel vanæ gloriæ vitium importat: nam quodlibet vanum appetere vitiosum est, secundum illud Psal. iv. 3. *Ut quid diligitis vanitatem, & queritis mendaciam?*

Potest autem gloria dici vana tripliciter. Uno modo ex parte rei de qua quis

gloriam querit; puta cum quis querit gloriam de eo quod non est, vel de eo quod non est gloria dignum, sicut de aliqua re fragili, & caduca: alio modo ex parte eius a quo quis gloriam querit, puta hominis, cuius iudicium non est certum: tertio ex parte ipsius qui gloriam appetit, qui videlicet appetitum gloriæ suæ non refert in debitum finem, puta ad honorem Dei, vel proximi salutem.

Ad primum ergo dicendum, quod, sicut Augustinus dicit super illud Ioan. xiiii. *Vos vocatis me, Magister & Domine, & bene dicitis*, (tract. lvi. a princ.) periculosum est sibi placere, cui cavendum est superbiere. Ille autem qui super omnia est, quantumcumque se laudet, non extollit se. Nobis namque que expedit Deum nosse, non illi: nec eum quisque cognoscit, si non se inquit dicit ipse qui novit. Unde patet quod Deus suam gloriam non querit propter se, sed propter nos. Et similiter etiam homo laudabiliter potest ad aliorum utilitatem gloriam suam appetere, secundum illud Matth. v. 16. *Videant opera vestra bona, & glorificent Patrem vestrum, qui in caelis est*.

Ad secundum dicendum, quod gloria quæ habetur a Deo, non est gloria vana, sed vera: & talis gloria bonis operibus in præmium reponitur: de qua dicitur II. ad Corinth. x. 17. *Qui glorietur, in Domino gloriatur: non enim qui seipsum commendat, ille probatus est, sed quem Deus commendat*. Provocantur etiam aliqui ad virtutum opera ex appetitu gloriæ humanæ, sicut etiam ex appetitu aliorum terrenorum bonorum. Non tamen est vere virtuosus qui propter humanam gloriam opera virtutis operatur, ut Augustinus probat in V. de civ. Dei (cap. xii. cir. med.).

Ad tertium dicendum, quod ad perfectionem hominis pertinet quod ipse se cognoscat; sed quod ipse ab aliis cognoscatur, non pertinet ad eius perfectionem: & ideo non est per se appetendum. Potest tamen appeti, inquantum est utile ad aliquid, vel ad hoc quod Deus ab hominibus glorificetur, vel ad hoc quod homines proficiant ex bono quod in alio cognoscunt, vel ex hoc quod ipse homo ex bonis quæ in se cognoscit, per testimonium laudis alienæ, studeat in eis perseverare, & ad meliora proficere. Et secundum hoc laudabile est.

(a) Sic recte Nicolaus, & edit. posteriores. Alii Ambrosius; & in margine; Alii habet Augustinus. Lib. Maximi, Qu. quæst. xxxi. circa finem.



est quod curam habeat aliquis de bono nomine, & quod provideat bona coram Deo, & hominibus; non tamen quod in hominum laude inaniter delectetur.

## ARTICULUS II. 656

*Utrum inanis gloria magnanimitati opponatur.*

II. dist. xlii. quest. xi. art. 4.

**A**D secundum sic proceditur. Videtur quod inanis gloria magnanimitati non opponatur. Pertinet enim ad inane gloriam, ut dictum est (art. præc.) quod aliquis gloriatur in his quæ non sunt, quod pertinet ad falsitatem; vel in rebus terrenis, & caducis, quod pertinet ad cupiditatem; vel in testimonio hominum, quorum iudicium non est certum, quod pertinet ad imprudentiam. Huiusmodi autem vitia non opponuntur magnanimitati. Ergo inanis gloria non opponitur magnanimitati.

2. Præterea. Inanis gloria non opponitur magnanimitati per defectum, sicut pusillanimitas, quæ inani gloriæ repugnans videtur: similiter etiam nec per excessum: sic enim magnanimitati præsumptio, & ambitio opponuntur, ut dictum est (quest. cxxx. art. 2. & quest. præc. art. 2.) a quibus inanis gloria differt. Ergo inanis gloria non opponitur magnanimitati.

3. Præterea. Ad Philip. ii. super illud, *Nihil per contentionem, aut inane gloriam*, dicit Glossa (ord. Ambrosii in hunc loc.) „Erant aliqui inter eos dissidentes, inquieti, inanis gloriæ caventes, contentiones.” Contentio autem non opponitur magnanimitati. Ergo neque inanis gloria.

Sed contra est quod Tullius dicit in I. de off. (in tit. *Magnan. in duob. sita*.) *Cavenda est gloriæ cupiditas: eripit enim animi libertatem, pro qua magnanimis viris omnis debet esse contentio.* Ergo opponitur magnanimitati.

Respondetur dicendum, quod, sicut supra dictum est (quest. cxii. art. 1. ad 3.) gloria est quidam effectus honoris, & laudis: ex hoc enim quod aliquis laudatur, vel quæcumque reverentia ei exhibetur, redditur clarus in notitia aliorum. Et quia magnanimitas est circa honorem, ut supra dictum est (quest. cxxx. art. 1. & 2.) consequens est et-

iam ut sit circa gloriam; ut scilicet sicut aliquis moderate utitur honore, ita etiam moderate utatur gloria. Et ideo inordinatus appetitus gloriæ directe magnanimitati opponitur.

Ad primum ergo dicendum, quod hoc ipsum magnitudini animi repugnat quod aliquis res modicas tantum appetit, quod de eis gloriatur. Unde in IV. Ethic. (cap. xii. ante med.) dicitur de magnanimo, quod sibi sit honor parvus. Similiter etiam alia quæ propter honorem quaeruntur, puta potentatus, & divitiæ, parva reputantur ab eo. Similiter etiam magnitudini animi repugnat quod aliquis de his quæ non sunt, gloriatur: unde de magnanimo dicitur IV. Ethic. (cap. xii. ad fin.) quod magis curat veritatem quam opinionem. Similiter etiam magnitudini animi repugnat quod aliquis gloriatur in testimonio laudis humanæ, quasi hoc magnum aliquid aestimetur: unde de magnanimo dicitur in IV. Ethic. (ibid.) quod non est ei cura ut laudetur. Et sic ea quæ aliis virtutibus opponuntur, nihil prohibet poni magnanimitati, secundum quod habent pro magnis quæ parva sunt.

Ad secundum dicendum, quod inanis gloriæ cupidus secundum rei veritatem deficit a magnanimo, quia videlicet gloriatur in his quæ magnanimus parva aestimat, ut dictum est (in solut. præc.) Sed considerando estimationem eius, opponitur magnanimo per excessum, quia videlicet gloriam, quam appetit, reputat aliquid magnum, & ad eam tendit supra suam dignitatem.

Ad tertium dicendum, quod, sicut supra dictum est (quest. cxxvii. art. 2. ad 2.) oppositio vitiorum non attenditur secundum (a) effectum; & tamen hoc ipsum magnitudini animi opponitur quod aliquis contentionem intendat: nullus enim contendit, nisi pro re quam aestimat magnam. Unde Philosophus dicit in IV. Ethic. (cap. xii. ad fin.) quod magnanimus non est contentiosus, quia nihil aestimat magnum.

## ARTICULUS III. 657

*Utrum inanis gloria sit peccatum mortale.*

Mal. quest. ix. art. 2.

**A**D tertium sic proceditur. Videtur quod inanis gloria sit peccatum mortale. Nihil enim excludit mercedem eter-

(a) Ita mss. & edidit melioris notæ libri. Al. affectum.

æternam nisi peccatum mortale. Sed inanis gloria excludit mercedem æternam: dicitur enim Matth. vi. 1. *Attendite ne iustitiam vestram faciatis coram hominibus, ut videamini ab eis: alioquin mercedem non habebitis apud Patrem vestrum, qui in caelis est.* Ergo inanis gloria est peccatum mortale.

2. Præterea. Quicumque furripit sibi quod est Dei proprium, mortaliter peccat. Sed per appetitum inanis gloriæ aliquis sibi attribuit quod est proprium Dei: dicitur enim Isa. xlii. 8. *Gloriam meam alteri non dabo: & I. ad Timoth. i. 17. Soli Deo honor, & gloria.* Ergo inanis gloria est peccatum mortale.

3. Præterea. Illud peccatum quod est maxime periculosum, & nocivum, videtur esse mortale. Sed peccatum inanis gloriæ est huiusmodi: quia super illud I. ad Thes. ii. Deo, qui probat corda nostra, dicit Glossa Augustini (ord. ex epist. xxii. al. lxiv. a med.) „Quas vires nocendi habeat humanæ gloriæ amor, non sentit nisi qui ei bellum indixit: rit: quia etsi cuiquam facile est laudem non cupere, dum negatur, difficile tamen est ea non delectari, cum offertur.“ Chrysostomus etiam dicit Matth. vi. (hom. xix. parum a princ.) quod „inanis gloria occulte ingreditur, & omnia quæ incus sunt, insensibiliter aufert.“ Ergo inanis gloria est peccatum mortale.

Sed contra est quod Chrysostomus (alius Auctor) dicit super Matth. (hom. xlii. in op. imperf. ante med.) quod cum vitia cetera locum habeant in servis diaboli, inanis gloria etiam locum habet in servis Christi: in quibus tamen nullum est peccatum mortale. Ergo inanis gloria non est peccatum mortale.

Respondeo dicendum, quod, sicut supra dictum est (quæst. xxiv. art. 12. & quæst. cx. art. 4. & quæst. cxii. art. 2.) ex hoc aliquod peccatum est mortale quod caritati contrariatur. Peccatum autem inanis gloriæ, secundum se consideratum, non videtur contrariari caritati quantum ad dilectionem proximi: quantum autem ad dilectionem Dei potest contrariari caritati dupliciter. Uno modo ratione materiæ de qua quis gloriatur: puta cum quis gloriatur de aliquo falso, quod contrariatur divinæ reverentiæ, secundum illud Ezech. xxviii. 3. *Elevatum est cor tuum, & dixisti, Deus ego sum:* & I. ad Cor. iv. 7. *Quid habes quod non acceperis? Si autem acceperis,*

*quid gloriaris, quasi non acceperis?* Vel etiam cum quis bonum temporale, de quo gloriatur, præfert Deo: quod prohibetur Hierem. ix. 23. *Non glorietur sapiens in sapientia sua, nec fortis in fortitudine sua, nec dives in divitiis suis; sed in hoc glorietur qui gloriatur, scire, & nosse me.* Aut etiam cum quis præfert testimonium hominum testimonio Dei, sicut contra quosdam dicitur Ioan. xii. 43. *qui dilexerunt magis gloriam hominum quam Dei.*

Alio modo ex parte ipsius gloriantis, qui intentionem suam refert ad gloriam tamquam ad ultimum finem: ad quem scilicet ordinat etiam virtutis opera, & pro quo consequendo non prætermittit iacere etiam ea quæ sunt contra Deum. Et sic est peccatum mortale. Unde Augustinus dicit in V. de civit. Dei (cap. xiv. a princ.) quod hoc vitium, scilicet amor humanæ laudis, tam inimicum est piæ fidei, si maior in corde sit cupiditas gloriæ quam Dei timor, vel amor, ut diceret Dominus (Ioan. v. xlv.) *Quomodo potestis credere, gloriam ab invicem expectantes, & gloriam quæ a solo Deo est, non quærentes?*

Si autem amor humanæ gloriæ, quantum sit inanis, non tamen repugnet caritati neque quantum ad id de quo est gloria, neque quantum ad intentionem gloriam quærentis: non est peccatum mortale, sed veniale.

Ad primum ergo dicendum, quod nullus peccando meretur vitam æternam. Unde opus virtuosum amittit vim merendi vitam æternam, si propter inanem gloriam fiat, etiam illa inanis gloria non sit peccatum mortale. Sed quando aliquis simpliciter amittit æternam mercedem propter inanem gloriam, & non solum quantum ad unum actum; tunc inanis gloria est peccatum mortale.

Ad secundum dicendum, quod non omnis qui est inanis gloriæ cupidus, appetit sibi illam excellentiam quæ competit soli Deo. Alia enim est gloria quæ debetur soli Deo, & alia quæ debetur homini virtuosus, vel diviti.

Ad tertium dicendum, quod inanis gloria dicitur esse periculosum peccatum, non tantum propter gravitatem sui, sed etiam propter hoc quod est dispositio ad gravia peccata, in quantum scilicet per inanem gloriam redditur homo presumptuosus, & nimis de seipso confidens: & sic etiam paulatim disponit ad hoc quod homo privetur interioribus bonis.

A R-

ARTICULUS IV. 658

*Utrum inanis gloria sit vitium capitale.*

*Inf. art. 5. & locis ibidem not.*

**A**D quartum sic proceditur. Videtur quod inanis gloria non sit vitium capitale. Vitium enim quod semper ex altero oritur, non videtur esse capitale. Sed inanis gloria semper ex superbia nascitur. Ergo inanis gloria non est vitium capitale.

2. Præterea. Honor videtur esse aliquid principalius quam gloria, quæ est eius effectus. Sed ambitio, quæ est inordinatus appetitus honoris, non est vitium capitale. Ergo etiam neque appetitus inanis gloriæ.

3. Præterea. Vitium capitale habet aliquam principalitatem. Sed inanis gloria non videtur habere aliquam principalitatem neque quantum ad rationem peccati, quia non semper est peccatum mortale; neque etiam quantum ad rationem boni appetibilis, quia gloria humana videtur esse quiddam fragile, & extra hominem existens. Ergo inanis gloria non est vitium capitale.

Sed contra est quod Gregorius XXXI. Moral. (cap. xvii. a med.) numerat inanem gloriam inter septem vitia capitalia.

Respondeo dicendum, quod de vitiis capitalibus dupliciter aliqui loquuntur. Quidam enim ponunt superbiam unum de vitiis capitalibus; & hi non ponunt inanem gloriam inter vitia capitalia. Gregorius autem in XXXI. Moral. (loc. cit.) superbiam ponit reginam omnium vitiorum; & inanem gloriam, quæ immediate ab ipsa oritur, ponit vitium capitale.

Et hoc rationabiliter. Superbia enim, ut infra dicitur (quæst. clxi. art. 1. & 2.) importat inordinatum appetitum excellentiæ. Ex omni autem bono quod quis appetit, quandam perfectionem, & excellentiam consequitur: & ideo fines omnium vitiorum ordinantur in finem superbiæ: & propter hoc videtur quod habeat quandam generalem causalitatem super alia vitia, & non debeat computari inter specialia vitiorum principia, quæ sunt vitia capitalia.

Inter bona autem per quæ excellentiam homo consequitur, præcipue ad hoc operari videtur gloria, inquantum

importat manifestationem bonitatis alius: nam bonum naturaliter amatur, & honoratur ab omnibus. Et ideo sicut per gloriam quæ est apud Deum, consequitur homo excellentiam in rebus divinis; ita etiam per gloriam hominum consequitur homo excellentiam in rebus humanis. Et ideo propter propinquitatem ad excellentiam, quam homines maxime desiderant, consequens est quod sit multum appetibilis. Et quia ex eius inordinato appetitu multa vitia oriuntur, ideo inanis gloria est vitium capitale.

Ad primum ergo dicendum, quod aliquod vitium oriri ex superbia non repugnat ei quod est esse vitium capitale, eo quod, sicut supra dictum est (incorp. & 1. 2. quæst. lxxxiv. art. 2.) superbia est regina, & mater omnium vitiorum.

Ad secundum dicendum, quod laus, & honor comparantur ad gloriam, ut supra dictum est (art. 2. hu. quæst.) sicut causæ, ex quibus sequitur gloria: unde gloria comparatur ad ea sicut finis. Propter hoc enim aliquis amat honorari, & laudari, inquantum per hoc aliquis æstimat se in aliorum notitia fore præclarum.

Ad tertium dicendum, quod inanis gloria (a) habet principalem rationem appetibilis, ratione iam dicta (in cor.) & hoc sufficit ad rationem vitii capitalis. Non autem requiritur quod vitium capitale semper sit peccatum mortale: quia etiam ex veniali peccato potest mortale oriri, inquantum scilicet veniale disponit ad mortale.

ARTICULUS V. 659

*Utrum convenienter dicantur filie inanis gloriæ esse inobedientia, iactantia, hypocrisis, contentio, pertinacia, discordia, & novitatum præsumptio.*

*Sup. quæst. xxi. art. 4. & quæst. cv. art. 1. ad 2. & infr. quæst. cxxxviii. art. 2. ad 1. & 11. dist. xlii. quæst. 11. art. 3. corp. & mal. quæst. viii. art. 1. cor. & quæst. ix. art. 3. & quæst. xlii. art. 3. corp.*

**A**D quintum sic proceditur. Videtur quod inconvenienter dicantur filie inanis gloriæ esse inobedientia, iactantia, hypocrisis, contentio, pertinacia, discordia, & novitatum præsumptio. Iactantia enim secundum Gregorium XXIII. Moral.

(a) Ita nrs, & editi omnes, Theologi legendam monent habet principalitatem.

Moral. (cap. iv. v. & vii.) ponitur inter species superbiae. Superbia autem non oritur ex inani gloria, sed potius e converso, ut Gregorius dicit XXXI. Moral. (cap. xvii. a med.) Ergo iactantia non debet poni filia inanis gloriae.

2. Præterea. Contentiones, & discordiae videntur ex ira maxime provenire. Sed ira est capitale vitium inani gloriae conditum. Ergo videtur quod non sint filiae inanis gloriae.

3. Præterea. Chrysostomus dicit super Matth. (implicite hom. xix.) quod ubique vana gloria malum est, sed maxime in philanthropia, id est in misericordia; quæ tamen non est aliquid novum, sed in consuetudine hominum existit. Ergo præsumptio novitatum non debet specialiter poni filia inanis gloriae.

Sed contra est auctoritas Gregorii in XXXI. Moral. (cap. xvii. a med.) ubi prædictas filias inanis gloriae assignat.

Respondeo dicendum, quod, sicut supra dictum est (quæst. xxxiv. art. 5. & quæst. xxxv. art. 4. & 1. 2. quæst. lxxxiv. art. 3. & 4.) illa vitia quæ de se nata sunt ordinari ad finem alicuius vitii capitalis, dicuntur filiae eius. Finis autem inanis gloriae est manifestatio propriæ excellentiæ, ut ex supra dictis patet (art. præc. & art. 1. huius quæstionis.) Ad quod potest homo tendere dupliciter. Uno modo directe: sive per verba; & sic est iactantia; sive per facta; & sic, si sint vera, habentia aliquam admirationem, est *præsumptio novitatum*, quas homines solent magis admirari; (a) si autem falsa sint, sic est *hypocrisis*.

Alio autem modo nititur aliquis manifestare suam excellentiam indirecte, ostendendo se non esse alio minorem; & hoc quadrupliciter. Primo quidem quantum ad intellectum; & sic est *pertinacia*, per quam homo nimis innititur suæ sententiæ, nolens credere sententiæ meliori. Secundo quantum ad voluntatem; & sic est *discordia*, dum non vult a propria voluntate discedere, ut aliis concordet. Tercio quantum ad locutionem; & sic est *contentio*, cum aliquis verbis clamose contra alium litigat. Quarto quantum ad factum; & sic est *inobedientia*, dum scilicet aliquis non vult exequi superioris præceptum.

Ad primum ergo dicendum, quod, sicut supra dictum est (quæst. cxix. art. 1.

ad 2.) iactantia ponitur species superbiae quantum ad interiorem causam eius, quæ est arrogantia; ipsa autem iactantia exterior, ut dicitur in IV. Ethic. (cap. vii. a med.) ordinatur quandoque quidem ad lucrum, sed frequentius ad gloriam, & honorem; & sic oritur ex inani gloria.

Ad secundum dicendum, quod ira non causat discordiam, & contentionem, nisi cum adiunctione inanis gloriae; per hoc scilicet quod aliquis sibi gloriosum reputat quod non cedat voluntati, vel verbis aliorum.

Ad tertium dicendum, quod inanis gloria vituperatur circa eleemosynam propter defectum caritatis, qui videtur esse in eo qui præfert inanem gloriam utilitati proximi, dum hoc propter illud facit. Non autem vituperatur aliquis ex hoc quod præsumat eleemosynam facere, quasi aliquid novum.

## QUAESTIO CXXXIII.

*De pusillanimitate,  
in duos articulos divisa.*

**D**ēinde considerandum est de pusillanimitate: & circa hoc quaeruntur duo.

Primo, utrum pusillanimitas sit peccatum.

Secundo, cui virtuti opponatur.

### ARTICULUS I. 660.

*Utrum pusillanimitas sit peccatum.*

*IV. Ethic. lect. 11.*

**A**d primum sic proceditur. Videtur quod pusillanimitas non sit peccatum. Ex omni enim peccato aliquis efficitur malus, sicut ex omni virtute aliquis efficitur bonus. Sed *pusillanimitas non est malus*, ut Philoſophus dicit in IV. Ethic. (cap. 111. ad fin.) Ergo pusillanimitas non est peccatum.

2. Præterea. Philoſophus dicit ibidem, quod *maxime videtur pusillanimitas esse qui magnis bonis dignus existit, & tamen his non dignificat seipsum*. Sed nullus est dignus magnis bonis, nisi virtuosus: quia, ut Philoſophus ibidem dicit, *secundum veritatem solus bonus est honorandus*. Ergo pusillanimitas est virtuosus. Non ergo pusillanimitas est peccatum.

3. Præ-

(a) Ita cum N'estala posterioris edit. Cod. Cambr. aliique; Si autem perfecta (dix per facta) sic est hypocrisis, Cod. A. cam. Si autem per facta facta, sic &c. Edit. Rom. Si autem per facta sit, sic &c.

3. Præterea. *Initium omnis peccati est superbia*, ut dicitur Eccli. x. 15. Sed pusillanimitas non procedit ex superbia: quia superbus extollit se supra id quod est; pusillanimus autem subtrahit se ab his quibus dignus est. Ergo pusillanimitas non est peccatum.

4. Præterea. Philosophus dicit in IV. Ethic. (cap. 111. a. princ.) quod qui dignificatur se minoribus quam sit dignus, dicitur pusillanimus. Sed quandoque sancti viri dignificant seiplos minoribus quam sint digni; sicut patet de Moyse, & Hieremia, qui digni erant officio ad quod assumebantur a Deo, quod tamen uterque eorum humiliter recusabat, ut habetur Exod. 111. & Hierem. 1. Non ergo pusillanimitas est peccatum.

Sed contra. Nihil in moribus hominum est vitandum nisi peccatum. Sed pusillanimitas est vitanda: dicitur enim ad Coloss. 111. 21. *Patres nolite ad indignationem provocare filios vestros, ut non pusillo animo fiant*. Ergo pusillanimitas est peccatum.

Respondendo dicendum, quod omne illud quod contrariatur naturali inclinationi, est peccatum, quia contrariatur legi naturæ. Inest autem unicuique rei naturalis inclinatio ad exequendum actionem commensuratam suæ potentie, ut patet in omnibus rebus naturalibus tam animatis, quam inanimatis. Sicut autem per præsumptionem aliquis excedit proportionem suæ potentie, dum nititur ad maiora quam possit; ita pusillanimus etiam deficit a proportionem suæ potentie, dum recusat in id tendere quod est suæ potentie commensuratum. Et ideo sicut præsumptio est peccatum, ita & pusillanimitas.

Et inde est quod servus qui acceptam pecuniam domini sui fodit in terram, nec est operatus ex ea propter quemdam pusillanimitatis timorem, punitur a domino, ut habetur Matth. xxv. & Luc. xix.

Ad primum ergo dicendum, quod Philosophus illos nominat malos qui proximos inferunt nocumenta: & secundum hoc pusillanimus dicitur non esse malus, quia nulli infert nocumentum, nisi per accidens, in quantum scilicet deficit ab operibus quibus posset alios iuvare. Dicit enim Gregorius in Pastoralis (par. 1. cap. v. cir. fin.) quod illi qui prodesse utilitati proximorum in prædicatione recusant, si districte iudicentur, ex tantis rei sunt, quantis venientes ad publicum prodesse potuerunt.

Ad secundum dicendum, quod nihil prohibet aliquem habentem habitum virtutis peccare; venialiter quidem, etiam ipso habitu remanente; mortaliter autem cum corruptione ipsius habitus virtutis gratiæ. Et ideo potest contingere quod aliquis ex virtute quam habet, sit dignus ad aliqua magna facienda, quæ sunt digna magno honore. Et tamen per hoc quod ipse non attentat suam virtute uti, peccat quandoque quidem venialiter, quandoque autem mortaliter.

Vel potest dici, quod pusillanimus est dignus magnis secundum habilitatem ad virtutem, quæ inest ei vel ex bona dispositione naturæ, vel ex scientia, vel ex exteriori fortuna, quibus dum recusat uti ad virtutem, pusillanimus redditur.

Ad tertium dicendum, quod etiam pusillanimitas aliquo modo ex superbia potest oriri; dum scilicet aliquis nimis proprio sensu innititur, quo reputat se insufficientem ad ea respectu quorum sufficientiam habet. Unde dicitur Proverb. xxvi. 16. *Sapientior sibi piger videtur seipsum viris loquentibus sententias*. Nihil enim prohibet quod se quantum ad aliqua deiciat, & quantum ad alia se in sublime extollat. Unde Gregorius in Pastoralis (par. 1. cap. vii. a med.) de Moyse dicit, quod superbus forsasse esset, si ducatum plebis innumeræ sine reprobatione susceperet; & rursum superbus existeret, si auctoris imperio obedire recusaret.

Ad quartum dicendum, quod Moyses, & Hieremias digni erant officio, ad quod divinitus eligebantur ex divina gratia; sed ipsi considerantes propriæ inhumanitatis insufficientiam, recusabant; non tamen pertinaciter, ne in superbiā laberentur.

## ARTICULUS II. 667

*Utrum pusillanimitas opponatur magnanimitati.*

*Infr. quæst. clxii. art. 1. ad 3. & IV. Ethic. lect. 11. fin.*

AD secundum sic proceditur. Videtur quod pusillanimitas non opponatur magnanimitati. Dicit enim Philosophus in IV. Ethic. (cap. 111. ad fin.) quod pusillanimus ignorat seipsum: appetit enim bona, quibus dignus est, si se cognosceret. Sed ignorantia sui videtur op-

opponi prudentiæ. Ergo pusillanimitas opponitur prudentiæ.

2. Præterea. Matth. xxv. servum qui propter pusillanimitatem pecunia uti recusavit, vocat Dominus malum, & pigrum: Philosophus etiam dicit in IV. Eth. (loc. cit.) quod pusillanimi videntur pigri. Sed pigritia opponitur sollicitudini, quæ est affectus prudentiæ, ut supra habitum est (quaest. xlvii. art. 9.) Ergo pusillanimitas non opponitur magnanimitati.

3. Præterea. Pusillanimitas videtur ex inordinato timore procedere: unde dicitur Isaïæ xxxv. 4. *Dicite pusillanimitis: Confortamini, & nolite timere.* Videtur etiam procedere ex inordinata ira, secundum illud ad Coloss. iii. 21. *Patres nolite ad indignationem provocare filios vestros, ut non pusillo animo fiant.* Sed inordinatio timoris opponitur fortitudini, inordinatio autem iræ mansuetudini. Ergo pusillanimitas non opponitur magnanimitati.

4. Præterea. Vitium quod opponitur alicui virtuti, tanto gravius est, quanto est magis virtuti dissimile. Sed pusillanimitas magis est dissimilis magnanimitati quam præsumptio. Ergo si pusillanimitas opponeretur magnanimitati, sequeretur quod esset gravius peccatum quam præsumptio: quod est contra illud quod dicitur Eccl. xxxvii. 3. *O præsumptio nequissima, unde creata es?* Non ergo pusillanimitas opponitur magnanimitati.

Sed contra est quod pusillanimitas, & magnanimitas differunt secundum magnitudinem, & parvitatem animi, ut ex ipsis nominibus apparet. Sed magnum, & parvum sunt opposita. Ergo pusillanimitas opponitur magnanimitati.

Respondeo dicendum, quod pusillanimitas potest tripliciter considerari. Uno modo secundum seipsam: & sic manifestum est quod secundum propriam rationem opponitur magnanimitati, a qua differt secundum differentiam magnitudinis, & parvitas circa idem: nam sicut magnanimus ex animi magnitudine tendit ad magna, ita pusillanimus ex animi parvitate se retrahit a magnis.

Alio modo potest considerari ex parte suæ causæ, quæ ex parte intellectus est ignorantia propriæ conditionis, ex parte autem appetitus est timor deficiendi in his quæ falso existimantur excedere suam facultatem.

Tertio modo potest considerari quan-

tum ad effectum, qui est retrahere se a magnis, quibus est dignus.

Sed, sicut supra dictum est (quaest. præc. art. 2. ad 3.) oppositio vitii ad virtutem attenditur magis secundum propriam speciem quam secundum causam, vel effectum. Et ideo pusillanimitas directe magnanimitati opponitur.

Ad primum ergo dicendum, quod ratio illa procedit de pusillanimitate ex parte causæ, quam habet in intellectu. Et tamen non proprie potest dici, quod opponatur prudentiæ etiam secundum causam suam: quia talis ignorantia non procedit ex insipientia, sed magis ex pigritia considerandi suam facultatem, ut dicitur in IV. Ethic. (cap. iii. circ. fin.) vel exequendi quod suum subiaceat potestati.

Ad secundum dicendum, quod ratio illa procedit de pusillanimitate ex parte effectus.

Ad tertium dicendum, quod ratio illa procedit ex parte causæ. Nec tamen timor causans pusillanimitatem semper est timor periculorum mortis. Unde etiam ex hac parte non oportet quod opponatur fortitudini. Ira autem secundum rationem proprii motus, quod quis extollitur in vindictam, non causat pusillanimitatem, quæ deiecit animum, sed magis tollit eam. Inducit autem ad pusillanimitatem ratione causarum iræ, quæ sunt iniuriæ illatæ, ex quibus deiecit animum patientis.

Ad quartum dicendum, quod pusillanimitas est gravius peccatum, secundum propriam speciem, quam præsumptio: quia per ipsam recedit homo a bonis; quod est pessimum, ut dicitur in IV. Ethic. (loc. sup. cit.) Sed præsumptio dicitur esse nequissima ratione superbiæ, ex qua procedit.

## QUAESTIO CXXXIV.

*De magnificencia,  
in quatuor articulos divisa.*

**D**Einde considerandum est de magnificencia, & vitiis oppositis.

Circa magnificenciam autem quaeruntur quatuor.

Primo, quomodo magnificencia sit virtus.

Secundo, utrum sit virtus specialis.

Tertio, quæ sit materia eius.

Quarto, utrum sit pars fortitudinis.

ARTICULUS I. 662

*Utrum magnificentia sit virtus.*

*IV. Eth. lect. 6.*

**A**D secundum sic proceditur. Videtur quod magnificentia non sit virtus. Qui enim habet unam virtutem, habet omnes, ut supra habitum est (1. 2. quest. lxxv. art. 1.) Sed aliquis potest habere alias virtutes sine magnificentia: dicit enim Philosophus in IV. Ethic. (cap. 11. paulo a princ.) quod *non omnis liberalis est magnificus*. Ergo magnificentia non est virtus.

3. Præterea. Virtus moralis consistit in medio, ut patet in II. Ethic. (cap. vi.) Sed magnificentia non videtur consistere in medio, superexcellit enim liberalitatem magnitudine: magnum autem opponitur parvo, sicut extremum, quorum medium est æquale, ut dicitur in X. Metaph. (tex. 17. 18. & 19.) & sic magnificentia non est in medio, sed in extremo. Ergo non est virtus.

3. Præterea. Nulla virtus contrariatur naturali inclinationi, sed magis perficit ipsam, ut supra habitum est (quest. cviii. art. 2. & quest. cxvii. art. 1. arg. 1.) Sed, sicut Philosophus dicit in IV. Ethic. (cap. 11. a med.) *magnificus non est sumptuosus in seipsum*; quod est contra naturalem inclinationem, per quam aliquis maxime providet sibi. Ergo magnificentia non est virtus.

4. Præterea. Secundum Philosophum in VI. Ethicor. (cap. iv.) *ars est recta ratio factibilium*. Sed magnificentia est circa factibilia, ut ex ipso nomine apparet. Ergo magis est ars quam virtus.

Sed contra. Humana virtus est participatio quædam virtutis divinæ. Sed magnificentia pertinet ad virtutem divinam, secundum illud Plal. lxxvii. 35. *Magnificencia eius, & virtus eius in nubibus*. Ergo magnificentia est virtus.

Respondeo dicendum, quod, sicut dicitur in I. de calo (tex. 116.) *virtus dicitur per comparationem ad ultimum in quod potentia potest*: non quidem ad ultimum ex parte defectus, sed ex parte excessus, cuius ratio consistit in magnitudine. Et ideo operari aliquid magnum, ex quo sumitur nomen magnificentie, proprie pertinet ad rationem virtutis. Unde magnificentia nominat virtutem.

Ad primum ergo dicendum, quod non omnis liberalis est magnificus quantum

ad actum, quia desunt sibi ea quibus uti necesse est ad actum magnificum. Tamen omnis liberalis habet habitum magnificentie vel actum, vel in propinqua dispositione, ut supra dictum est (quest. cxxxix. art. 3. ad 2. & 1. 2. quest. lxxv. art. 1.) cum de connexionem virtutum ageretur.

Ad secundum dicendum, quod magnificentia consistit quidem in extremo, considerata quantitate eius quod facit; sed tamen in medio consistit, considerata regula rationis, a qua non deficit, nec eam excedit, sicut etiam de magnanimitate dictum est (quest. cxxxix. art. 3. ad 1.)

Ad tertium dicendum, quod ad magnificentiam pertinet facere aliquid magnum. Quod autem pertinet ad personam uniuscuiusque, est aliquid parvum in comparatione ad id quod convenit rebus divinis, vel rebus communibus. Et ideo magnificus non principaliter intendit sumptus facere in his quæ pertinent ad personam propriam, non quia bonum suum non querat, sed quia non est magnum. Si quid tamen in his quæ ad ipsum pertinent, magnitudinem habeat, hoc etiam magnifice magnificus prosequitur; sicut ea quæ semel sunt, ut nuptiæ, vel aliquid aliud huiusmodi; vel etiam ea quæ permanentia sunt; sicut ad magnificum pertinet præparare convenientem habitationem, ut dicitur in IV. Ethic. (loc. cit. in arg.)

Ad quartum dicendum, quod, sicut dicit Philosophus in VI. Ethic. (cap. v. a med.) *oportet artis esse quamdam virtutem*, scilicet moralem, per quam scilicet appetitus inclinatur ad recte utendum ratione artis: & hoc pertinet ad magnificentiam. Unde non est ars, sed virtus.

ARTICULUS II. 663

*Utrum magnificentia sit specialis virtus.*

**A**D secundum sic proceditur. Videtur quod magnificentia non sit specialis virtus. Ad magnificentiam enim videtur pertinere facere aliquid magnum. Sed facere aliquid magnum potest convenire cuilibet virtuti, si sit magna; sicut qui habet magnam virtutem temperantie, facit magnum temperantie opus. Ergo magnificentia non est aliqua specialis virtus, sed significat statum perfectum cuiuslibet virtutis.

1

2. Præ-

*J. Tb. Oper. Tom. XXXIII.*

2. Præterea. Eiusdem videtur esse aliquid facere, & tendere in illud. Sed tendere in aliquid magnum pertinet ad magnanimitatem, ut supra dictum est (quæst. cxxix. art. 1. & 2.) Ergo & facere aliquid magnum pertinet ad magnanimitatem. Non ergo magnificentia est virtus distincta a magnanimitate.

3. Præterea. Magnificentia videtur pertinere ad sanctitatem: dicitur enim Exodi xv. 11. *Magnificus in sanctitate*; & in Psal. xcv. 6. *Sanctitas, & magnificentia in sanctificatione eius*. Sed sanctitas est idem religioni, ut supra habitum est (quæst. lxxx. art. 8.) Ergo magnificentia videtur idem esse religioni. Non ergo est virtus specialis ab aliis distincta.

Sed contra est quod Philosophus (Lib. II. Ethic. cap. vii. & Lib. IV. cap. ii.) connumerat eam aliis virtutibus specialibus.

Respondendo dicendum, quod, ad magnificentiam pertinet facere aliquid magnum, sicut ex ipso nomine apparet. *Facere* autem dupliciter potest accipi: uno modo proprie; alio modo communiter. Proprie autem *facere* dicitur operari aliquid in exteriori materia, sicut facere domum, vel aliquid aliud huiusmodi; communiter autem dicitur *facere* pro quacunque actione; sive transcat in exteriorem materiam, sicut urere, & secare; sive maneat in ipso agente, sicut intelligere, & velle.

Si ergo magnificentia accipiat, secundum quod actionem alicuius magni importat, prout factio proprie dicitur; sic magnificentia est specialis virtus. Opus enim factibile producit ab arte: in cuius quidem usu potest attendi una specialis ratio bonitatis, quod ipsum opus factum per artem sit magnum, scilicet in quantitate, pretiositate, vel dignitate; quod facit magnificentia. Et secundum hoc magnificentia est specialis virtus.

Si vero nomen magnificentie accipiat, ut ab eo quod est facere magnum, secundum quod *facere* communiter sumitur; sic magnificentia non est specialis virtus.

Ad primum ergo dicendum, quod ad quamlibet virtutem perfectam pertinet magnum facere in suo genere, secundum quod *facere* communiter sumitur, non autem secundum quod sumitur proprie; sed hoc est proprium magnificentie.

Ad secundum dicendum, quod ad ma-

gnanimitatem pertinet non solum tendere in magnum, sed etiam in omnibus virtutibus magnum operari vel faciendo, vel qualitercumque agendo, ut dicitur in IV. Ethic. (cap. iii.) Ita tamen quod magnanimitas circa hoc respicit solum rationem magni; aliarum autem virtutes, quæ, si sint perfectæ, magnum operantur, non principaliter dirigunt intentionem suam ad magnum, sed ad id quod est proprium unicuique virtuti. Magnitudo autem consequitur ex quantitate virtutis. Ad magnificentiam vero pertinet non solum facere magnum, secundum quod *facere* proprie sumitur, sed etiam ad magnum faciendum tendere animo. Unde Tullius dicit in sua Rhetorica (Lib. II. de invent. aliquant. ant. fin.) quod *magnificentia est verum magnarum, & excellentiarum cum animi quadam ampla, & splendida propositione agitatio, atque administratio*, ut agitatio relectur ad interiorem intentionem, administratio autem ad exteriorum executionem. Unde oportet quod sicut magnanimitas intendit aliquid magnum in omni materia, ita & magnificentia in aliquo opere factibili.

Ad tertium dicendum, quod magnificentia intendit opus magnum facere. Opera autem ab hominibus facta ad aliquem finem ordinantur. Nullus autem finis humanorum operum est adeo magnus, sicut honor Dei: & ideo magnificentia præcipue magnum opus facit in ordine ad honorem Dei. Unde Philosophus dicit in IV. Ethicor. (cap. ii. ante med.) quod *honorabiles sumptus sunt maxime qui pertinent ad divina sacrificia*; & circa hos maxime studet magnificus. Et ideo magnificentia coniungitur sanctitati, quia præcipue eius effectus ad religionem, sive ad sanctitatem ordinatur.

### ARTICULUS III. 664

*Utrum materia magnificentie sint sumptus magni.*

*Inf. quæst. cli. art. 3. cor. & quæst. cli. art. 1. co. & 1. 2. quæst. lx. art. 5. co. & 11. diff. xxxiv. quæst. 1. art. 2. & IV. diff. vii. quæst. 11. & diff. xvii. quæst. 111. art. 2. quæst. 3. & diff. xxxiii. quæst. 111. art. 2. & IV. Ethic. lect. 6.*

**A**D tertium sic proceditur. Videtur quod materia magnificentie non sint sumptus magni. Circa eandem enim ma-



teriam non sunt duæ virtutes. Sed circa sumptus est liberalitas, ut supra habitum est ( quæst. cxvii. art. 2. ) Ergo magnificentia non est circa sumptus.

2. Præterea. *Omnis magnificus est liberalis*, ut dicit in IV. Ethic. ( cap. ii. a princ. ) Sed liberalitas est magis circa dona quam circa sumptus. Ergo etiam magnificentia non præcipue est circa sumptus, sed magis circa dona.

3. Præterea. Ad magnificentiam pertinet aliquid opus exteriori facere. Non autem quibuslibet sumptibus ut aliquid exteriori opus, etiam si sint sumptus magni; puta cum aliquis multa expendit in xenis mittendis. Ergo sumptus non sunt propria materia magnificentiae.

4. Præterea. Magnos sumptus non possunt facere nisi divites. Sed omnes virtutes possunt habere etiam pauperes: quia *virtutes non ex necessitate indigent exteriori fortuna, sed sibiipsis sufficiunt*, ut Seneca dicit in Lib. I. de ira ( cap. ix. & Lib. de vita beata cap. xvi. ) Ergo magnificentia non est circa magnos sumptus.

Sed contra est quod Philosophus dicit in IV. Ethic. ( cap. ii. ante med. ) quod *magnificentia non extenditur circa omnes operationes quæ sunt in pecuniis, sicut liberalitas, sed circa sumptuosas solum, in quibus excellit liberalitatem magnitudinis*. Ergo est solum circa magnos sumptus.

Respondet dicendum, quod ad magnificentiam, sicut dictum est ( art. præc. ) pertinet intendere ad aliquid magnum opus faciendum. Ad hoc autem quod aliquid magnum opus convenienter fiat, requiruntur proportionari sumptus: non enim possunt magna opera fieri nisi cum magnis expensis. Unde ad magnificentiam pertinet magnos sumptus facere, ad hoc quod opus magnum convenienter fiat. Unde & Philosophus dicit in IV. Ethic. ( loc. cit. ) quod *magnificus ab equali*, id est a proportionato, *sumptus opus faciet magnificum*. Sumptus autem est quædam pecuniæ emissio, a qua potest aliquis prohiberi per superfluum amorem pecuniæ. Et ideo materia magnificentiae possunt dici & ipsi sumptus, quibus utitur magnificus ad opus magnum faciendum, & ipsa pecunia qua utitur ad sumptus magnos faciendos, & amor pecuniæ, quem moderatur magnificus, ne sumptus magni impendantur.

Ad primam ergo dicendum, quod,

sicut supra dictum est ( quæst. cxxxix. art. 2 ) virtutes illæ quæ sunt circa res exteriores, habent aliquam difficultatem ex ipso genere rei circa quam est virtus, & aliam difficultatem ex magnitudine ipsius rei. Et ideo oportet circa pecuniam, & usum eius esse duas virtutes; scilicet liberalitatem, quæ respicit communiter usum pecuniæ; & magnificentiam, quæ respicit ( a ) magnum in pecuniæ usu.

Ad secundum dicendum, quod usus pecuniæ aliter pertinet ad liberalem, & aliter ad magnificentiam. Ad liberalem enim pertinet, secundum quod procedit ex ordinato affectu circa pecunias: & ideo omnis usus debitus pecuniæ, cuius impedimentum tollit moderatio amoris pecuniæ, pertinet ad liberalitatem, scilicet dona, & sumptus. Sed usus pecuniæ pertinet ad magnificentiam in ordine ad aliquid magnum opus, quod faciendum est: & talis usus non potest esse sine sumptu, sive expensa.

Ad tertium dicendum, quod magnificus etiam dat dona, vel xenia, ut dicitur in IV. Ethicor. ( cap. ii. ) non tamen sub ratione doni, sed potius sub ratione sumptus ordinati ad aliquid opus faciendum; puta ad honorandum aliquem, vel ad faciendum aliquid, unde proveniat honor toti civitati; sicut cum facit aliquid ad quod tota civitas studet.

Ad quartum dicendum, quod principalis actus virtutis est interior electio, quam virtus potest habere absque exteriori fortuna: & sic etiam pauper potest esse magnificus. Sed ad exteriores actus virtutum requiruntur bona fortunæ, sicut quædam instrumenta: & secundum hoc pauper non potest actum magnificentiae exterioriorem exercere in his quæ sunt magna simpliciter, sed forte in his quæ sunt magna per comparisonem ad aliquid opus; quod etsi in se sit parvum, tamen potest magnifice fieri secundum proportionem illius generis: nam parvum, & magnum dicuntur relative, ut Philosophus dicit in Prædicamentis ( cap. Ad aliquid )

(1) Ita msf. & editi mssis nota, Ad, magnum pecuniæ usum

## ARTICULUS IV. 665

*Utrum magnificentia sit pars fortitudinis.*

*Sup. quæst. cxxxix. & locis ibi notatis.*

**A**D quartum sic proceditur. Videtur quod magnificentia non sit pars fortitudinis. Magnificencia enim convenit in materia cum liberalitate, ut dictum est (art. præc.) Sed liberalitas non est pars fortitudinis, sed iustitiæ. Ergo magnificentia non est pars fortitudinis.

2. Præterea. Fortitudo est circa timores, & audacias. Magnificencia autem in nullo videtur respicere timorem, sed solum sumptus, qui sunt operationes quedam. Ergo magnificentia magis videtur pertinere ad iustitiam, quæ est circa operationes, quam ad fortitudinem.

3. Præterea. Philosophus dicit in IV. Ethic. (cap. II. a princ.) quod *magnificus scienti assimilatur*. Sed scientia magis convenit cum prudentia quam cum fortitudine. Ergo magnificentia non debet poni pars fortitudinis.

Sed contra est quod Tullius (Lib. II. de invent. aliquid. ante fin.) & Macrobius (Lib. I. in somn. Scip. cap. VIII. cir. med.) & Andronicus magnificentiam partem fortitudinis ponunt.

Respondeo dicendum, quod magnificentia, secundum quod est specialis virtus, non potest poni pars subiectiva fortitudinis, quia non convenit cum ea in materia; sed ponitur pars eius, in quantum adiungitur ei sicut virtus secundaria principali.

Ad hoc autem quod aliqua virtus adiungatur alicui principali, duo requiruntur, ut supra dictum est (quæst. lxxx.) quorum unum est ut secundaria conveniat cum principali; aliud autem est ut in aliquo excedatur ab ea. Magnificencia autem convenit cum fortitudine in hoc quod sicut fortitudo tendit in aliquid arduum, & difficile, ita etiam & magnificentia: unde etiam videtur esse in irascibili, sicut & fortitudo. Sed magnificentia deficit a fortitudine in hoc quod illud arduum in quod tendit fortitudo, habet difficultatem propter periculum, quod imminet personæ; arduum autem in quod tendit magnificentia, habet difficultatem propter dispendium rerum, quod est multo minus quam periculum personæ. Et ideo magnificentia ponitur pars fortitudinis.

Ad primum ergo dicendum, quod iustitia respicit operationes secundum se, prout in eis consideratur ratio debiti; sed liberalitas, & magnificentia considerant operationes sumptuum, secundum quod comparantur ad passionem animæ; diversimode tamen. Nam liberalitas respicit sumptus per comparisonem ad aurorem, & concupiscentiam pecuniarum, quæ sunt passionem concupiscibilis, quibus non impeditur liberalis a dationibus, & sumptibus faciendis: unde est in concupiscibili. Sed magnificentia respicit sumptus per comparisonem ad spem, attingendo ad aliquid arduum non simpliciter, sicut magnanimitas, sed in determinata materia, scilicet in sumptibus: unde magnificentia videtur esse in irascibili, sicut & magnanimitas.

Ad secundum dicendum, quod magnificentia, etiam non conveniat cum fortitudine in materia, convenit autem cum ea in conditione materiæ, in quantum scilicet tendit in aliquid arduum circa sumptus, sicut & fortitudo in aliquid arduum circa timores.

Ad tertium dicendum, quod magnificentia ordinat usum artis ad aliquid inagnum, ut dictum est (in corp. & art. præc.) Ars autem est in ratione. Et ideo ad magnificum pertinet bene uti ratione in attendendo proportionem sumptus ad opus quod faciendum est: & hoc precipue necessarium est propter magnitudinem utriusque: quia nisi diligens consideratio adhiberetur, innumeret periculum magni damni.

## QUAESTIO CXXXV.

*De parvificencia,  
in duos articulos divisa.*

**D**Einde considerandum est de vitio oppositis magnificentiae: & circa hoc quaeruntur duo.

Primo, utrum parvificencia sit vitium. Secundo de vitio ei opposito.

## ARTICULUS I. 666

*Utrum parvificencia sit vitium.*

*IV. Eth. lect. 7.*

**A**D primum sic proceditur. Videtur quod parvificencia non sit vitium. Virtus enim sicut est moderativa magnorum, ita etiam est moderativa parvorum: unde & liberales, & etiam magni-

gnifici aliqua parva faciunt. Sed magnificentia est virtus. Ergo etiam similiter parvificentia magis est virtus quam vitium.

2. Præterea. Philosophus dicit in IV. Ethic. (cap. 11. ante med.) quod *diligentia rationis est parvifica*. Sed diligentia rationis videtur esse laudabilis: quia *bonum hominis est secundum rationem esse*, ut Dionysius dicit in 1v. cap. de divin. Nomin. (part. 1v. lect. 22.) Ergo parvificentia non est vitium.

3. Præterea. Philosophus dicit in IV. Eth. (cap. 12. in fi.) quod *parvificus consumit pecuniam tristatus*. Sed hoc pertinet ad avaritiam, sive ad illiberalitatem. Ergo parvificentia non est vitium ab aliis distinctum.

Sed contra est quod Philosophus in II. Ethic. (cap. vii.) & in IV. (cap. 12. ad fin.) ponit parvificentiam speciale vitium magnificentie oppositum.

Respondeo dicendum, quod, sicut supra dictum est (2. 3. quest. 1. art. 3. & quest. xvii. art. 6.) moralia speciem a fine fortuntur, unde & a fine ut pluries nominantur. Ex hoc ergo dicitur aliquis parvificus, quod intendit ad aliquid parvum faciendum. Parvum autem, & magnum, secundum Philosophum in Prædicamentis (cap. *Ad aliquid*) relative dicuntur. Unde cum dicitur, quod parvificus intendit aliquid parvum facere, intelligendum est in *comparatione* ad genus operis quod facit.

In quo quidem parvum, & magnum potest attendi dupliciter: uno modo ex parte operis fiendi; alio modo ex parte sumptus. Magnificus ergo principaliter intendit magnitudinem operis; secundario intendit magnitudinem sumptus, quam non vitat, ut faciat magnum opus. Unde & Philosophus dicit in IV. Ethic. (cap. 1v. cir. med.) quod *magnificus equali sumptu opus facit magis magnificum*. Parvificus autem e converso principaliter quidem intendit parvitatem sumptus: unde & Philosophus dicit in IV. Ethic. (cap. 12. ad fi.) quod *intendit qualiter minimum consumat*. Ex consequenti autem intendit parvitatem operis, quam scilicet non recusat, dummodo parvum sumptum faciat: unde Philosophus dicit ibidem, quod *parvificus maxima consumens, in parvo*, scilicet quod non vult expendere, *bonum perdit*, scilicet magnifici operis. Sic ergo patet quod parvificus deficit a proportionem, quæ debet esse secundum rationem inter sumptus, &

S. Tb. Oper. Tom. XXIII.

opus. Defectus autem ab eo quod est secundum rationem, causat rationem vitii. Unde manifestum est quod parvificentia vitium est.

Ad primum ergo dicendum, quod virtus moderatur parva secundum regulam rationis, a qua deficit parvificus, ut dictum est (in corp.) non enim dicitur parvificus qui parva moderatur, sed qui in moderando magna, vel parva, deficit a regula rationis: & ideo habet vitii rationem.

Ad secundum dicendum, quod, sicut Philosophus dicit in II. Rhetor. (cap. v. circ. med.) *timor facit conflictivos*: & ideo parvificus diligenter rationis intendit, quia inordinate timet bonorum suorum consumptionem etiam in minimis. Unde hoc non est laudabile, sed vitiosum, & vituperabile: quia non dirigit affectum suum secundum rationem, sed potius rationis usum applicat ad inordinationem sui affectus.

Ad tertium dicendum, quod sicut magnificus convenit cum liberali in hoc quod prompte, & delectabiliter pecunias emitte; ita etiam parvificus convenit cum illiberali, sive avaro in hoc quod cum tristitia, & tarditate expensas facit. Dissert autem in hoc quod illiberalitas attenditur circa communes sumptus; parvificentia autem circa magnos sumptus, quos difficilius est facere: & ideo minus vitium est parvificentia quam illiberalitas. Unde Philosophus dicit in IV. Ethic. (cap. 12. in fin.) quod *quavis parvificentia, & vitium oppositum sunt malitia, non tamen opprobria inferunt: quia nec sunt nociva proximo, nec sunt valde turpes*.

## ARTICULUS II. 667

Utrum parvificentia aliquid vitium opponatur.

IV. Eth. lect. 7.

AD secundum sic proceditur. Videtur quod parvificentia nullum vitium opponatur. Parvo enim opponitur magnum. Sed magnificentia non est vitium, sed virtus. Ergo parvificentia non opponitur vitium.

2. Præterea. Cum parvificentia sit vitium ex defectu, ut dictum est (art. præc.) videtur quod si aliquid vitium esset parvificentia oppositum, confisteret solum in superabundanti consumptione. Sed illi qui consumunt multa ubi pau-

ca consumere oporteret, consumunt pauca ubi multa oporteret consumere, ut dicitur in IV. Ethic. ( cap. 11. cir. fin. ) & sic habent aliquid de parvificentia. Non ergo est aliquid vitium parvificentiae oppositum.

3. Præterea. Moralia fortiuntur speciem ex fine, ut dictum est ( art. præc. ) Sed illi qui superflue consumunt, hoc faciunt causa ostentationis divitiarum, ut dicitur in IV. Ethic. ( loc. cit. ) Hoc autem pertinet ad inanem gloriam, quæ opponitur magnanimitati, ut dictum est ( quæst. cxxx1. art. 2. ) Ergo nullum vitium parvificentiae opponitur.

Sed contra est autoritas Philosophi, qui in II. Ethic. ( cap. vii. ) & in IV. ( cap. 11. ) ponit magnificentiam medium duorum oppositorum vitiorum.

Respondeo dicendum, quod parvo opponitur magnum. Parvum autem, & magnum relative dicuntur, ut dictum est ( art. præc. ) Sicut autem contingit sumptum esse parvum per comparationem ad opus; ita etiam contingit sumptum esse magnum in comparatione ad opus, ut scilicet excedat proportionem, quæ esse debet sumptus ad opus secundum regulam rationis. Unde manifestum est quod vitio parvificentiae, quo aliquis deficit a debita proportionem expensarum ad opus, intendens minus expendere quam dignitas operis requirat, opponitur vitium quo aliquis dictam proportionem excedit, ut scilicet plus expendat quam sit operi proportionatum.

Et hoc vitium græce quidem dicitur *βερνεια* a fumo dicta, quia videlicet ad modum ignis, qui est in fumo, omnia consumit. Vel dicitur *ἀνυποκαλία*, id est sine bono igne, quia ad modum ignis omnia consumit non propter bonum. Unde latine hoc vitium potest nominari *consumptio*.

Ad primum ergo dicendum, quod magnificencia dicitur esse ex eo quod facit magnum opus, non autem ex eo quod in sumptu excedat proportionem operis. Hoc enim pertinet ad vitium quod opponitur parvificentiae.

Ad secundum dicendum, quod idem vitium contrariatur virtuti, quæ est in medio, & contrario vitio. Sic ergo vitium consumptionis opponitur parvificentiae in eo quod excedit in sumptu operis dignitatem, expendens multa ubi pauca oporteret expendere. Opponitur autem magnificentiæ ex parte operis magni, quod præcipue intendit magnificus, inquantum scilicet ubi oportet

multa expendere, nihil, aut parum expendit.

Ad tertium dicendum, quod consumptor ex ipsa specie actus opponitur parvifico, inquantum transcendit regulam rationis, a qua parvificus deficit. Nihil tamen prohibet quin hoc ad finem alterius vitii ordinetur, puta inanis gloriæ, vel cuiuscunque alterius.

## QUAESTIO CXXXVI.

*De patientia,*

*in quatuor articulos divisa.*

**D**einde considerandum est de patientia: & circa hoc quaeruntur quinque.

Primo, utrum patientia sit virtus.

Secundo, utrum sit maxima virtutum.

Tertio, utrum possit haberi sine gratia.

Quarto, utrum sit pars fortitudinis.

Quinto, utrum sit idem cum longanimitate.

## ARTICULUS I. 668

*Utrum patientia sit virtus.*

*Inf. art. 5. cor. & Sup. quæst. cxxviii.*

**A**d primum sic proceditur. Videtur quod patientia non sit virtus. Virtutes enim perfectissime sunt in patria, ut Augustinus dicit in XIV. de Trin. ( cap. 11. ) Sed ibi non est patientia: quia nulla sunt ibi mala toleranda, secundum illud Isa. xli. ro. & Apocal. vii. 16. *Non esurient, neque sitient, & non percutiet earum aestus, neque Sol.* Ergo patientia non est virtus.

2. Præterea. Nulla virtus in malis potest inveniri: quia virtus est *que bonum facit habentem*. Sed patientia quandoque in malis hominibus invenitur; sicut patet in avaris, qui multa mala patienter tolerant, ut pecunias congregent, secundum illud Eccle. v. 16. *Cunctis diebus vite sue comedit in tenebris, & in curis multis, & in erumna, atque tristitia.* Ergo patientia non est virtus.

3. Præterea. Frius a virtutibus differunt, ut supra habitum est ( 1. 2. quæst. lxx. art. 1. ad 3. ) Sed patientia ponitur inter fructus, ut patet Gal. v. Ergo patientia non est virtus.

Sed contra est quod Augustinus dicit in Lib. de patientia ( in princ. ) *Virtus*

*an-*

*animi, quæ patientia dicitur, tam magnam Dei donum est, ut etiam ipse qui nobis tam largitur, patientia prædicetur.*

Respondeo dicendum, quod, sicut dictum est supra (quæst. cxxxii. art. 1.) virtutes morales ordinantur ad bonum, inquantum conservant bonum rationis contra impetus passionum. Inter alias autem passiones tristitia efficax est ad impediendum bonum rationis, secundum illud II. ad Cor. vii. 10. *Sæculi tristitia mortem operatur*; & Eccli. xxx. 25. *Multos occidit tristitia, & non est utilitas in illa*. Unde necesse est habere aliquam virtutem per quam bonum rationis conservetur contra tristitiam, ne scilicet ratio tristitiæ succumbat. Hoc autem facit patientia. Unde Augustinus dicit in Lib. de patientia (cap. 11. in princ.) quod *patientia hominis est, qua mala e quo animo toleramus, id est sine perturbatione tristitiæ, ne animo iniquo bona deseramus, per quæ ad meliora pervenimus*. Unde manifestum est patientiam esse virtutem.

Ad primum ergo dicendum, quod virtutes morales non remanent secundum eundem actum in patria quem habent in via, scilicet per comparisonem ad bona præsentis vitæ, quæ non remanebunt in patria; sed per comparisonem ad finem, qui erit in patria: sicut iustitia non erit in patria circa emptiones, & vendiciones, & alia quæ pertinent ad præsentem vitam, sed in hoc quod est subditum esse Deo. Similiter actus patientiæ in patria non erit in sustinendo aliqua, sed in fruitione bonorum, in quæ pervenire volebamus patiendū. Unde Augustinus dicit in XIV. de civit. Dei (cap. 11. ad fi.) quod *in patria non erit ipsa patientia, quæ necessaria non est, nisi ubi toleranda sunt mala; sed æternum erit id quod per patientiam pervenitur*.

Ad secundum dicendum, quod, sicut Augustinus dicit in Lib. de patientia (cap. 11. & cap. v. a med.) *patientes proprie dicuntur qui malum mala non committendo ferre, quam non ferendo committere*. In illis autem qui mala sustinent, ut mala faciant, nec miranda, nec laudanda est patientia, quæ nulla est; sed miranda duritia, neganda patientia.

Ad tertium dicendum, quod, sicut supra dictum est (1. 2. quæst. xi. art. 1.) fructus in sui ratione importat quandam delectationem. Sunt autem operationes virtutum delectabiles, secundum seipsas, ut dicitur in I. Ethic. (cap.

viii. a med.) *Consuetum est autem ut nomine virtutis etiam virtutum actus significentur*. Et ideo patientia quantum ad habitum ponitur virtus; quantum autem ad delectationem quam habet in actu, ponitur fructus; & præcipue quantum ad hoc quod per patientiam animus præservatur, ne obruatur tristitia.

## ARTICULUS II. 669

*Utrum patientia sit potissima virtutum.*

1. 2. quæst. lxxvi. art. 3. ad 1.

**A**D secundum sic proceditur. Videtur quod patientia sit potissima virtutum. Id enim quod est perfectum, est potissimum in unoquoque genere. Sed patientia habet opus perfectum, ut dicitur Iacobi 1. 4. Ergo patientia est potissima virtutum.

2. Præterea. Omnes virtutes ad bonum animæ ordinantur. Sed hoc præcipue videtur pertinere ad patientiam: dicitur enim Luc. xxi. 19. *In patientia vestra possidebitis animas vestras*. Ergo patientia est maxima virtutum.

3. Præterea. Illud quod est conservativum, & causa aliorum, videtur potius esse. Sed, sicut Gregorius dicit in quadam homil. (xxxv. in Evang. parum ante med.) *patientia est radix, & cussos omnium virtutum*. Ergo patientia est maxima virtutum.

Sed contra est quod non enumeratur inter quatuor virtutes quas Gregorius XXII. Moral. (cap. 1.) & Augustinus in Lib. de moribus Ecclesiæ (cap. xv.) vocant principales.

Respondeo dicendum, quod virtutes secundum suam rationem ordinantur ad bonum. Est enim virtus quæ facit bonum habentem, & opus eius bonum reddit, ut dicitur in II. Ethic. (cap. vi.) Unde oportet quod tanto principalior sit virtus, & potior, quanto magis, & directius ordinat hominem in bonum. Directius autem ad bonum ordinant hominem virtutes quæ sunt constitutive boni, quam illæ quæ sunt impeditivæ eorum quæ abducunt a bono: & sicut inter eas quæ sunt constitutive boni, tanto aliqua potior est, quanto in maiori bono statuit hominem (sicut fides, spes, & caritas quam prudentia, & iustitia;) ita & inter illas quæ sunt impeditivæ retrahentium a bono, tanto aliqua est potior, quanto id quod ab ea impeditur, magis a bono retrahit. Plus autem a bono re-

trahunt pericula mortis, circa quæ est fortitudo, vel delectationes tactus, circa quas est temperantia, quam quævis aduersa, circa quæ est patientia.

Et ideo patientia non est potissima virtutum; sed deficit non solum a virtutibus theologicis, & prudentia, & iustitia, quæ directe statuunt hominem in bono; sed etiam a fortitudine, & temperantia, quæ retrahunt a maioribus impedimentis.

Ad primum ergo dicendum, quod patientia dicitur habere opus perfectum in aduersis tolerandis: ex quibus primo procedit tristitia, quam moderatur patientia; secundo ira, quam moderatur mansuetudo; tertio odium, quod tollit caritas; quarto iniustum nocentum, quod prohibet iustitia. Tollere enim principium uniuscuiusque est perfectius. Nec ramen sequitur, si in hoc patientia est perfectior, quod sit perfectior simpliciter.

Ad secundum dicendum, quod possessio importat quietum dominium: & ideo per patientiam dicitur homo suam animam possidere, inquantum radicitus evelit passionem aduersitatum, quibus anima inquietatur.

Ad tertium dicendum, quod patientia dicitur esse radix, & cultus omnium virtutum, non quasi directe eas causando, & conservando, sed solum removendo prohibens.

### ARTICULUS III. 670

*Utrum patientia possit haberi sine gratia.*

**A**D tertium sic proceditur. Videtur quod patientia possit haberi sine gratia. Illud enim ad quod ratio magis inclinat, magis potest implere rationalis creatura. Sed magis est rationabile quod aliquis patiatur mala propter bonum quam propter malum: aliqui autem patiuntur mala propter malum ex propria virtute sine auxilio gratiæ: dicit enim Augustinus in Lib. de patientia (cap. 111. in princ.) quod multa in laboribus, & doloribus sustinent homines propter ea quæ vixile diligunt. Ergo multo magis homo potest mala sustinere propter bonum, quod est vero patientem esse, præter auxilium gratiæ.

2. Præterea. Aliqui non existentes in

statu gratiæ magis abhorrent mala virtutum quam corporalia mala: unde quidam Gentilium leguntur multa mala tolerasse, ne patriam proderent, aut aliquid aliud inhonestum committerent. Sed hoc est vere patientem esse. Ergo videtur quod patientia possit haberi absque auxilio gratiæ.

3. Præterea. Manifeste apparet quod aliqui propter sanitatem corporis recuperandam gravia quædam, & amara patiuntur. Salus autem animæ non est minus appetibilis quam sanitas corporis. Ergo pari ratione pro salute animæ potest aliquis multa mala sustinere, quod est vere patientem esse, absque auxilio gratiæ.

Sed contra est quod dicitur in Psal. lxx. 6. *Ab ipso, scilicet Deo, patientia mea.*

Respondeo dicendum, quod, sicut Augustinus dicit in Lib. de patientia (cap. xv. cir. fin.) *vis desideriorum facit tolerantiam laborum, & dolorum; & nemo, nisi pro eo quod delectat, sponte suscipit ferre quod cruciat.* Et huius ratio est, quia tristitiam, & dolorem secundum se abhorret animus: unde numquam eligeret eam pati propter se, sed solum propter finem. Ergo oportet quod illud bonum propter quod aliquis vult pati mala, sit magis volitum, & amatum, quam illud bonum cuius privatio ingerit dolorem, quem patienter toleramus. Quod autem aliquis præferat bonum gratiæ omnibus naturalibus bonis, ex quorum amissione potest dolor causari, pertinet ad caritatem, quæ diligit Deum super omnia. Unde manifestum est quod patientia, secundum quod est virtus, a caritate causatur, secundum illud I. ad Corinth. xiii. 4. *Caritas patiens est.*

Manifestum est autem quod caritas non potest haberi nisi per gratiam, secundum illud ad Rom. v. 5. *Caritas Dei diffusa est in cordibus nostris per Spiritum sanctum, qui datus est nobis.* Unde patet quod patientia non potest haberi sine auxilio gratiæ.

Ad primum ergo dicendum, quod in natura humana, si esset integra, prævaleret inclinatio rationis; sed in natura corrupta prævalet inclinatio concupiscentiæ, quæ in homine dominatur. Et ideo prior est homo ad sustinendum mala (a) propter bona in quibus concupiscentia delectatur præfentialiter, quam

(a) Ita edidimus omnes Mssales posteriores. Cod. Alcan. alique, & edidit totos præter omnes præter bona, illa habent pro his in quibus &c.

tolerare mala propter bona futura, quæ secundum rationem appetuntur; quod tamen pertinet ad veram patientiam.

Ad secundum dicendum, quod bonum politicæ virtutis commenturatum est naturæ humanæ: & ideo absque auxilio gratiæ gratum faciens potest voluntas humana in illud tendere, licet non absque auxilio gratiæ Dei. Sed bonum gratiæ est supernaturale: unde in illud non potest tendere homo per virtutem suæ naturæ. Et ideo non est similis ratio.

Ad tertium dicendum, quod tolerantia etiam malorum, quæ quis sustinet propter corporis sanitatem, procedit ex amore quo homo naturaliter diligit suam carnem. Et ideo non est similis ratio de patientia, quæ procedit ex amore supernaturali.

#### ARTICULUS IV. 671

*Utrum patientia sit pars fortitudinis.*

*Sup. quæst. cxxviii. & locis ibi notatis.*

**A**D quartum sic proceditur. Videtur quod patientia non sit pars fortitudinis. Idem enim non est pars sui ipsius. Sed patientia videtur idem esse fortitudini: quia, sicut supra dictum est (quæst. cxxxvi. art. 6.) proprius actus fortitudinis est sustinere: & hoc etiam pertinet ad patientiam: dicitur enim in Lib. Sentent. Prosperi (id habet Gregorius hom. xxxv. in Evang. circa med.) quod *patientia consistit in alienis malis tolerandis*. Ergo patientia non est pars fortitudinis.

2. Præterea. Fortitudo est circa timores, & audacias, ut supra habitum est (quæst. cxxiii. art. 3.) & ita est irascibili. Sed patientia videtur esse circa tristitias; & ita videtur esse in concupiscibili. Ergo patientia non est pars fortitudinis, sed magis temperantiæ.

3. Præterea. Timor non potest esse sine parte. Si ergo patientia sit pars fortitudinis, fortitudo nunquam posset esse sine patientia; cum tamen fortis quandoque non toleret patienter mala, sed etiam aggrediatur cum qui mala facit. Ergo patientia non est pars fortitudinis.

Sed contra est quod Tullius in sua Rhetorica (Lib. II. de invent. aliquant. ante fin.) ponit eam fortitudinis partem.

Respondeo dicendum, quod patientia

est pars fortitudinis quasi potentialis, quia adiungitur fortitudini sicut virtus secundaria principali.

Ad patientiam enim pertinet *aliena mala æquanimiter persequi*, ut Gregorius dicit in quadam homil. (xxxv. in Evang. parum ante med.) In malis autem quæ ab aliis inferuntur, præcipua sunt, & difficillima ad sustinendum illa quæ pertinent ad pericula mortis, circa quæ est fortitudo. Unde patet quod in ista materia principalitatem tenet fortitudo, quasi vendicans sibi id quod principalis est in hac materia. Et ideo patientia adiungitur ei sicut secundaria virtus principali.

Ad primum ergo dicendum, quod ad fortitudinem pertinet, non qualicumque sustinere, sed illud quod est summè difficile in sustinendo, scilicet sustinere pericula mortis. Ad patientiam autem potest pertinere sustinentia quorumcumque malorum.

Ad secundum dicendum, quod actus fortitudinis non solum consistit in hoc quod aliquis in bono persistat contra timores futurorum periculorum, sed etiam ut non deficiat propter præsentium tristitiam, sive dolorem: & ex hac parte habet affinitatem cum fortitudine patientia. Et tamen fortitudo est principaliter circa timores, ad quorum rationem pertinet fugere, quod vitat fortitudo; patientia vero principalis est circa tristitias: nam patiens dicitur aliquis non ex hoc quod non fugit, sed ex hoc quod laudabiliter se habet in patiendo quæ præsentialiter nocent, ut scilicet non inordinate ex eis tristetur. Et ideo fortitudo est proprie in irascibili, patientia autem in concupiscibili. Nec hoc impedit quin patientia sit pars fortitudinis: quia adiunctio virtutis ad virtutem non attenditur secundum subiectum, sed secundum materiam, vel formam. Nec tamen patientia ponitur pars temperantiæ, quamvis utraque sit in concupiscibili: quia temperantia est solum circa tristitias quæ opponuntur delectationibus tactus, puta quæ sunt ex abstinencia ciborum, vel venerorum; sed patientia præcipue est circa tristitias quæ ab aliis inferuntur. Et iterum ad temperantiam pertinet refrenare huiusmodi tristitias, sicut & delectationes contrarias. Ad patientiam autem pertinet ut propter huiusmodi tristitias, quantumcumque sint, homo non recedat a bono virtutis.

Ad tertium dicendum, quod patientia potest quantum ad aliquid sui poni pars integralis fortitudinis: de qua parte obiectio procedit, prout scilicet aliquis patientia sustinet mala, quae pertinent ad pericula mortis. Nec est contra rationem patientiae quod aliquis, quando opus fuerit, insiliat in eum qui mala facit: quia, ut Chrysostomus (videt Auctor) dicit super illud Matth. 18. *Vade Satana* (hom. v. in op. imperf. a med.) *In iniuriis propriis patientem esse laudabile est; iniurias autem Dei patienter sustinere, nimis est imptum:* & Augustinus dicit in quadam epistola ad Marcellinum. (cxxxviii. al. v. ant. med.) *quod praecepta patientiae non contrariantur bono reipublicae, pro quo conservando contra inimicos pugnatur.* Secundum vero quod patientia se habet circa quaecumque alia mala, adiungitur fortitudini ut virtus secundaria principali.

## ARTICULUS V. 673

*Utrum patientia sit idem quod longanimitas.*

*Sup. quaest. cxviii. art. 5. ad 3. & 1. 2. quaest. lxx. art. 3. cor. & II. Cor. vi. lect. 2. prime.*

**A**D quintum sic proceditur. Videtur quod patientia sit idem quod longanimitas. Dicit enim Augustinus in Lib. de patientia (aequal. cap. 1.) *quod patientia Dei non praedicatur in hoc quod aliquod malum patitur, sed in hoc quod expectat malos, ut convertantur: unde Eccli. v. 4. dicitur: Altissimus patiens redditor est.* Ergo videtur quod patientia sit idem quod longanimitas.

2. Praeterea. Idem non est oppositum duobus. Sed impatientia opponitur longanimitati, per quam aliquis moram expectat: dicitur enim aliquis impatiens morae, sicut aliorum malorum. Ergo videtur quod patientia sit idem longanimitas.

3. Praeterea. Sicut tempus est quaedam circumstantia malorum quae sustinentur, ita etiam locus. Sed ex parte loci non sumitur aliqua virtus, quae distinguatur a patientia. Ergo similiter nec longanimitas, quae sumitur ex parte temporis, inquantum scilicet aliquis diu expectat, distinguitur a patientia.

4. Sed contra est quod super illud ad

Rom. 12. *An divitias bonitatis eius?* & patientiae, & longanimitatis: *contemnis?* dicit Glossa (Orig. Lib. II. coment. in hanc epist. cap. 11. parum a princ.) *» Videtur longanimitas a patientia distingere: quia qui infirmitate magis quam proposito delinquit, sustentari per longanimitatem dicitur; qui vero pertinaci mente exultat in delictis suis, ferri patienter dicendi sunt.* «

Respondendo dicendum, quod sicut magnanimitas dicitur per quam habet aliquis animum tendendi in magna; ita etiam longanimitas dicitur per quam aliquis habet animum tendendi in aliquid quod in longinquum distat. Et ideo sicut magnanimitas magis respicit spem tendentem in bonum, quam audaciam, vel timorem, five tristitiam, quae respiciunt malum; ita etiam longanimitas. Unde longanimitas maiorem convenientiam videtur habere cum magnanimitate quam cum patientia.

Potest tamen convenire cum patientia duplici ratione. Primo quidem quia patientia, sicut & fortitudo, sustinet aliqua mala propter aliquod bonum: quod si ex propinquo expectetur, facilius est sustinere; (a) si autem in longinquum differatur illud bonum, mala autem oporteat in praesenti sustinere, difficilius est. Secundo quia hoc ipsum quod est differri bonum speratum, natum est causare tristitiam, secundum illud Proverb. xiii. 12. *Spes, quae differtur, affligit animam.* Unde & in sustinendo huiusmodi afflictionem potest esse patientia, sicut & in sustinendo quaecumque alias tristitias. Sic ergo secundum quod sub eadem ratione mali contristantur potest comprehendere & dilatio boni sperari, quae pertinet ad longanimitatem, & labor, quem homo sustinet in continuata executione boni operis, quod pertinet ad constantiam; tam longanimitas, quam etiam constantia sub patientia comprehenduntur.

Unde & Tullius (Lib. II. de invent. aliquant. ante fin.) definit patientiam dicit, quod *patientia est honestatis, ac utilitatis causa, voluntaria ac diuturna perpessio rerum arduarum, ac difficultium.* Quod dicit *arduarum*, pertinet ad constantiam in bono; quod dicit *difficilium*, pertinet ad gravitatem mali, quam proprie respicit patientia; quod vero addit, *diuturna*, sive *diutina*, pertinet ad lon-

ga-

(a) Ita communiter. Edit. Rom. si autem in longinquum differatur, difficilis est expectatio. Mala autem in praesenti sustinere difficilius est.



ganimitatem, secundum quod convenit cum patientia.

Et per hoc patet responsio ad primum, & secundum.

Ad tertium dicendum, quod illud quod est longinquum loco, quamvis sit remotum a nobis, non tamen est simpliciter remotum a natura rerum, sicut id quod est longinquum tempore: & ideo non est similis ratio. Et praterea quod est longinquum loco, non affert difficultatem nisi ratione temporis: quia quod est longinquum loco a nobis, tardius tempore ad nos potest pervenire.

Quartum concedimus. Tamen consideranda est ratio illius differentiae, quam Glossa assignat: quia in his qui ex infirmitate peccant, hoc solum videtur importabile quod diu perseverant in malo: & ideo dicitur, quod ex longanimitate supportantur. Sed hoc ipsum quod aliquis ex superbia peccat, importabile videtur: & ideo per patientiam dicuntur sustineri illi qui ex superbia peccant.

## QUAESTIO CXXXVII.

*De perseverantia,*

*in quatuor articulos divisa.*

**D**Einde considerandum est de perseverantia, & virtutibus oppositis.

Circa perseverantiam autem quaeruntur quatuor.

Primo, utrum perseverantia sit virtus.

Secundo, utrum sit pars fortitudinis.

Tertio, quomodo se habeat ad constantiam.

Quarto, utrum indigeat auxilio gratiae.

## ARTICULUS I. 673

*Utrum perseverantia sit virtus.*

*Inf. art. 2. cor. & ad 1. & 2. & quest. cxxxviii. art. 1. cor. & III. dist. xxxiii. quest. 111. art. 3. quest. 1. ad 4. & quest. 4. ad 1.*

**A**D primum sic proceditur. Videtur quod perseverantia non sit virtus. Quia, ut Philosophus dicit in VII. Eth. (cap. vii. circ. med.) continentia est potior quam perseverantia. Sed continentia non est virtus, ut dicitur in IV. Ethic. (in fin.) Ergo perseverantia non est virtus.

2. Praterea. *Virtus est qua recte vivi-*

*tar, secundum Augustinum in Lib. II. de lib. arb. (cap. xix. a princ.) Sed, sicut ipse dicit in Lib. de perseverantia (cap. 1.) nullus potest dici perseverantiam habere, quamdiu vivit, nisi perseveret usque ad mortem. Ergo perseverantia non est virtus.*

3. Praterea. Immobiliter persistere in opere virtutis requiritur ad omnem virtutem, ut patet in II. Ethic. (cap. iv.) Sed hoc pertinet ad rationem perseverantiae: dicit enim Tullius in sua Rhet. (Lib. II. de invent. aliquant. ante fin.) quod *perseverantia est in ratione bene considerata stabilis, & perpetua permansio*. Ergo perseverantia non est specialis virtus, sed conditio omnis virtutis.

Sed contra est quod Andronicus dicit, quod *perseverantia est habitus eorum quibus immanendum est, & non immanendum, & neurorum*. Sed habitus ordinans nos ad benefaciendum aliquid, vel omittendum, est virtus. Ergo perseverantia est virtus.

Respondeo dicendum, quod secundum Philosophum in II. Ethic. (cap. iir. in fin.) *virtus est circa difficile, & bonum*: & ideo ubi occurrit specialis ratio difficultatis, vel boni, ibi est specialis virtus. Opus autem virtutis potest habere bonitatem, & difficultatem ex duobus: uno quidem modo ex ipsa specie actus, quae accipitur secundum rationem proprii obiecti; alio modo ex ipsa diuturnitate temporis: nam hoc ipsum quod est diu insistere alicui difficili, specialem difficultatem habet. Et ideo diu persistere in aliquo bono usque ad consummationem pertinet ad specialem virtutem.

Sicut ergo temperantia, & fortitudo sunt speciales virtutes, eo quod altera earum moderatur delectationes tactus (quod de se difficultatem habet) altera autem moderatur timores, & audacias circa pericula mortis (quod etiam secundum se difficile est) ita etiam perseverantia est quaedam specialis virtus, ad quam pertinet in his, vel in aliis virtutibus operibus diuturnitatem sustinere, prout necesse est.

Ad primum ergo dicendum, quod Philosophus accipit ibi perseverantiam, secundum quod aliquis perseverat in his in quibus difficillimum est diu sustinere. Non est autem difficile diu sustinere bona, sed mala. Mala autem quae sunt pericula mortis, ut plurimum non diu sustinentur, quia ut frequentius cito trans-

transcunt: unde respectu illorum non est præcipua laus perseverantiæ. Inter alia autem mala præcipua sunt illa quæ opponuntur delectationibus tactus: quia huiusmodi mala attenduntur circa necessaria vitæ, puta circa defectum ciborum, & aliorum huiusmodi, quæ quandoque imminere diu sustinenda. Non est autem difficile hæc diu sustinere illi qui circa hoc non muleum tristatur, nec in oppositis bonis multum delectatur; sicut patet in temperato, in quo huiusmodi passionum non sunt vehementes. Sed maxime hoc difficile est in eo qui circa hoc vehementer afficitur, utpote non habens perfectam virtutem modificantem has passionum. Et ideo si accipitur hoc modo perseverantia, non est virtus perfecta, sed est quoddam imperfectum in genere virtutis. Si autem accipiamus perseverantiam, secundum quod aliquis in quocumque bono difficili diu persistit, hoc potest convenire etiam habenti perfectam virtutem: cui etiam si persisteret minus difficile, persistit tamen in bono magis perfecto. Unde talis perseverantia potest esse virtus: quia perfectio virtutis, magis attenditur secundum rationem boni quam secundum rationem difficultatis.

Ad secundum dicendum, quod eodem nomine quandoque nominatur & virtus, & actus virtutis, sicut Augustinus dicit super Ioan. (tract. lxxix. paulo a princ.) *Fides est credere quod non vides*. Potest tamen contingere quod aliquis habeat habitum virtutis, qui tamen non exercet actum; sicut aliquis pauper habet habitum magnificentiæ, cum tamen actum non exercet. Quandoque vero aliquis habens habitum, incipit quidem exercere actum, sed non perficit; puta si ædificator incipiat ædificare, & non compleat domum. Sic ergo dicendum est, quod nomen perseverantiæ quandoque sumitur pro habitu, quo quis eligit perseverare, quandoque autem pro actu, quo quis perseverat: & quandoque quidem habens habitum perseverantiæ eligit quidem perseverare, & incipit exequi aliquamdiu persistendo, non tamen complet actum, quia non persistit usque ad finem. Est autem duplex finis: unus quidem qui est finis operis; alius autem qui est finis humanæ vitæ. Per se autem ad perseverantiam pertinet ut aliquis perseveret usque ad terminum virtuosius operis; sicut quod miles perseveret usque ad finem certaminis, & magnificus usque ad consummationem operis. Sunt autem

quædam virtutes quarum actus per totam vitam debent durare, sicut fidei, spei, & caritatis, quia respiciunt ultimum finem totius vitæ humanæ. Et ideo respectu harum virtutum, quæ sunt principales, non consummatur actus perseverantiæ usque ad finem vitæ. Et secundum hoc Augustinus accipit perseverantiam pro actu perseverantiæ consummato.

Ad tertium dicendum, quod immobiliter persistere virtuti potest convenire dupliciter. Uno modo ex propria intentione finis: & sic diu persistere usque ad finem in bono, pertinet ad specialem virtutem, quæ dicitur perseverantia, quæ hoc intendit sicut specialem finem. Alio modo ex comparatione habitus ad subiectum: & sic immobiliter persistere consequitur quamlibet virtutem, in quantum est *qualitas difficile mobilis*.

## ARTICULUS II. 674

*Utrum perseverantia sit pars fortitudinis.*

*Sup. quæst. cxxviii. & III. dist. xxxiii. quæst. 111. art. 3. quæst. I. 2. & 4. cor.*

**A**D secundum sic proceditur. Videtur quod perseverantia non sit pars fortitudinis. Quia, ut Philosophus dicit in VII. Eth. (cap. vii. a princ.) *perseverantia est circa tristitias tactus*. Sed huiusmodi pertinent ad temperantiam. Ergo perseverantia magis est pars temperantiæ quam fortitudinis.

2. Præterea. Omnis pars virtutis moralis est circa aliquas passiones quas virtus moralis moderatur. Sed perseverantia non importat moderationem passionum; quia quanto vehementiores fuerint passionum, tanto aliquis secundum rationem perseverans laudabilior videtur. Ergo videtur quod perseverantia non sit pars alicuius virtutis moralis, sed magis prudentiæ, quæ perficit rationem.

3. Præterea. Augustinus dicit in Lib. de perseverantia (cap. 1.) quod perseverantiam nullus potest amittere; alias autem virtutes potest homo amittere. Ergo perseverantia est potior omnibus aliis virtutibus. Sed virtus principalis est potior quam eius pars. Ergo perseverantia non est pars alicuius virtutis, sed magis ipsa est virtus principalis.

Sed contra est quod Tullius (Lib. II. de invent. aliquant. ante fin.) ponit perseverantiam partem fortitudinis.

Ref-

ARTICULUS III. 675

*Utrum constantia pertineat ad perseverantiam.*

**A**D tertium sic proceditur. Videtur quod constantia non pertineat ad perseverantiam. Constantia enim pertinet ad patientiam, ut supra dictum est (quaest. præc. art. 5.) Sed patientia differt a perseverantia. Ergo constantia non pertinet ad perseverantiam.

2. Præterea. *Virtus est circa difficile, & bonum.* Sed in parvis operibus constantem esse non videtur esse difficile, sed solum in operibus magnis, quæ pertinent ad magnificentiam. Ergo constantia magis pertinet ad magnificentiam quam ad perseverantiam.

3. Præterea. Si ad perseverantiam pertineret constantia, in nullo videretur a perseverantia differe, quia utrumque immobilitatem quandam importat. Diferunt autem: nam Macrobius (Lib. I. in somn. Scip. cap. viii. cir. med.) condidit constantiam firmitati, per quam intelligitur perseverantia, ut supra dictum est (quaest. cxxviii. ad vi.) Ergo constantia non pertinet ad perseverantiam.

Sed contra est quod aliquis dicitur esse constans ex eo quod in aliquo stat. Sed imminere aliquibus pertinet ad perseverantiam, ut patet ex definitione quam Andronicus ponit. Ergo constantia pertinet ad perseverantiam.

Respondeo dicendum, quod perseverantia, & constantia conveniunt quidem in fine, quia ad utrumque pertinet firmiter persistere in aliquo bono; differunt autem secundum ea quæ difficultatem afferant ad persistendum in bono: nam virtus perseverantiae proprie facit firmiter persistere hominem in bono contra difficultatem quæ provenit ex ipsa diuturnitate actus; constantia autem facit firmiter persistere in bono contra difficultatem quæ provenit ex quibuscumque aliis exterioribus impedimentis.

Et ideo principalior pars fortitudinis est perseverantia quam constantia: quia difficultas quæ est ex diuturnitate actus, est essentialior actui virtutis, quam illa quæ est ex exterioribus impedimentis.

Ad primum ergo dicendum, quod exteriora impedimenta persistendi in bono præcipue sunt illa quæ tristitiam inferunt. Circa tristitiam autem est patientia, ut dictum est (quaest. præc. art. 1.)

Et

Respondeo dicendum, quod, sicut supra dictum est (quaest. cxxiii. art. 11. & 1. 2. quaest. lxi. art. 3. & 4.) virtus principalis est cui principatim adscribitur aliquid quod pertinet ad laudem virtutis, inquantum scilicet exercet illud circa propriam materiam, in qua difficillimum, & optimum est illud observare.

Et secundum hoc dictum est (quaest. cxxiii. art. 11.) quod fortitudo est principalis virtus, quia firmitatem servat in his in quibus difficillimum est firmiter persistere, scilicet in periculis mortis. Et ideo necesse est quod fortitudini adiungatur, sicut secundaria virtus principali, omnis illa virtus cuius laus consistit in sustinendo firmiter aliquid difficile. Sustinere autem difficultatem quæ provenit ex diuturnitate boni operis, dat laudem perseverantiae: nec hoc est ita difficile sicut sustinere pericula mortis. Et ideo perseverantia adiungitur fortitudini sicut virtus secundaria principali.

Ad primum ergo dicendum, quod annexio secundariæ virtutis ad principalem non solum attenditur secundum materiam, sed magis secundum modum: quia forma in unoquoque potior est quam materia. Unde licet perseverantia magis videatur convenire in materia cum temperantia quam cum fortitudine; tamen in modo magis convenit cum fortitudine, inquantum firmitatem servat contra difficultatem diuturnitatis.

Ad secundum dicendum, quod illa perseverantia de qua loquitur Philosophus (Lib. VII. Ethic. cap. iv. & vii.) non moderatur aliquas passiones, sed consistit solum in quadam firmitate rationis, & voluntatis. Sed perseverantia, secundum quod ponitur virtus, moderatur aliquas passiones, scilicet timorem fatigationis, aut defectus propter diuturnitatem. Unde hæc virtus est in irascibili, sicut fortitudo.

Ad tertium dicendum, quod Augustinus ibi loquitur de perseverantia, non secundum quod nominat habitum virtutis, sed secundum quod nominat actum virtutis continuatum usque in finem, secundum illud Matth. xxiv. 13. *Qui perseveraverit usque in finem, hic salvus erit.* Et ideo contra rationem perseverantiae sic acceptæ esset quod amitteretur, quia iam non duraret usque in finem.

Et ideo constantia secundum finem convenit cum perseverantia; secundum autem ea quæ difficultatem inferunt, convenit cum patientia. Finis autem potior est: & ideo constantia magis pertinet ad perseverantiam quam ad patientiam.

Ad secundum dicendum, quod in magnis operibus persistere difficilius est; sed in parvis, vel in mediocribus diu persistere habet difficultatem, etsi non ex magnitudine actus, quam respicit magnificentia, saltem ex ipsa diuturnitate, quam respicit perseverantia. Et ideo constantia potest ad utrumque pertinere.

Ad tertium dicendum, quod constantia pertinet quidem ad perseverantiam, inquantum convenit cum ea; non tamen est idem ei, inquantum differt ab ea, ut dictum est (in corp.)

#### ARTICULUS IV. 676

*Utrum perseverantia indigeat auxilio gratiæ.*

1. 2. *quæst. cix. art. 9. & 10. & quæst. cxiv. art. 2. cor. & II. dist. xx. in expof. & ad 2. & III. cont. cap. cxxv. & vir. quæst. xxiv. art. 5. ad 3. & Pfa. xxxi. & Ioan. 1. sed. 2. princ.*

**A**D quantum sic proceditur. Videtur quod perseverantia non indigeat auxilio gratiæ. Perseverantia enim est quædam virtus, ut dictum est (art. 1. hu. quæst.). Sed virtus, ut Tullius dicit in sua Rethor. (Lib. II. de invent. aliquant. ante fi.) agit in modum naturæ. Ergo sola inclinatio virtutis sufficit ad perseverandum. Non ergo ad hoc requiritur aliquod auxilium gratiæ.

2. Præterea. Donum gratiæ Christi est maius quam nocumentum quod Adam intulit, ut patet ad Rom. v. Sed ante peccatum sic conditus fuit homo, ut posset perseverare per id quod acceperat, sicut Augustinus dicit in Lib. de corrept. & gratia (cap. xr. in med.). Ergo multo magis per gratiam Christi reparatus potest perseverare absque auxilio novæ gratiæ.

3. Præterea. Opera peccati quandoque sunt difficiliora quam opera virtutis: unde ex persona impiorum dicitur Sap. v. 7. *Ambulavimus vias difficiles.* Sed aliqui perseverant in operibus peccati absque alterius auxilio. Ergo etiam in operibus virtutum potest homo perseverare absque auxilio gratiæ.

Sed contra est quod Augustinus dicit in Lib. de perseverantia (cap. 1. in prin.). *Afferimus donum Dei esse perseverantiam, qua usque ad finem perseveratur in Christo.*

Respondeo dicendum, quod, sicut ex dictis patet (art. 1. hu. quæst. ad 2. & art. 2. ad 3.) perseverantia dupliciter dicitur. Uno modo pro ipso habitu perseverantiæ, secundum quod est virtus: & hoc modo indiget dono habitualis gratiæ, sicut & ceteræ virtutes infusæ.

Alio modo potest accipi pro actu perseverantiæ durante usque ad mortem: & secundum hoc indiget non solum gratia habituali, sed etiam gratuito Dei auxilio conservantis hominem in bono usque ad finem vitæ, sicut supra dictum est (1. 2. quæst. cix. art. 10.) cum de gratia ageretur.

Quia cum liberum arbitrium de se sit veritabile, & hoc ei non tollatur per habituales gratias præsentis vitæ, non subest potestati liberi arbitrii etiam per gratiam reparati, ut se immobiliter in bono statuatur, licet sit in potestate eius quod hoc eligat: plerumque enim cadit in nostram potestatem electio, sed non executio.

Ad primum ergo dicendum, quod virtutis perseverantiæ, quantum est de se, inclinatur ad perseverandum; quia tamen habitus est, quo quis utitur cum voluerit, non est necessarium quod habens habitum virtutis immobiliter utatur eo usque ad mortem.

Ad secundum dicendum, quod, sicut Augustinus dicit in Lib. de corrept. & gratia (cap. xr. in med.) *primo homini datum est non ut perseveraret, sed ut perseverare posset per liberum arbitrium: quia nulla corruptio tunc erat in humana natura, quæ perseverantiam difficultatem præberet. Sed nunc prædestinatis per gratiam Christi non solum datur ut perseverare possint, sed ut perseverent. Unde primus homo nullo terrente, contra Dei terrentis imperium libero usus arbitrio, non stetit in tanta felicitate cum tanta non peccandi facilitate; isti autem, scientes mundo ne starent, steterunt in fide.*

Ad tertium dicendum, quod homo per se potest cadere in peccatum; sed non potest per se resurgere a peccato sine auxilio gratiæ. Et ideo ex hoc ipso quod homo cadit in peccatum, quantum de se est, facit se in peccato perseverantem, nisi gratia Dei liberetur; non autem ex hoc quod facit bonum, facit se perseverantem.

rantem in bono, quia de se potens est peccare; & ideo ad hoc indiget auxilio gratiae.

## QUAESTIO CXXXVIII.

De vitiis oppositis perseverantiae,  
in duos articulos divisa.

**D**Einde considerandum est de vitiis oppositis perseverantiae: & circa hoc quaeruntur duo.

Primo de mollietate.

Secundo de pertinacia.

## ARTICULUS I. 677

Utrum mollietates opponantur perseverantiae.

Inf. art. 2. cor.

**A**D primum sic proceditur. Videtur quod mollietates non opponantur perseverantiae. Quia super illud I. ad Cor. VI. *Neque adulteri, neque molles, neque masculorum concubinatores*, Glossa (interl.) exponit: „*Molles*, idest pathici, hoc est muliebria patientes.“ Sed hoc opponitur castitati. Ergo mollietates non est vitium oppositum perseverantiae.

2. Præterea. Philosophus dicit in VII. Ethic. (cap. VII. ante med.) quod *delicia mollietatis quædam est*. Sed esse delictosum videtur pertinere ad intemperantiam. Ergo mollietates non opponitur perseverantiae, sed magis temperantiae.

3. Præterea. Philosophus ibidem dicit, quod *luscivus est molliis*. Sed esse immoderate luscivum opponitur eutrapeliæ, quæ est virtus circa delectationes ludorum, ut dicitur in IV. Ethic. (cap. VIII.) Ergo mollietates non opponitur perseverantiae.

Sed contra est quod Philosophus dicit in VII. Ethic. (cap. VII. cir. med.) quod *molli opponitur perseverantius*.

Respondendo dicendum, quod, sicut supra dictum est (quæst. præc. art. 1. & 2.) laus perseverantiae in hoc consistit quod aliquis non recedit a bono propter diuturnam tolerantiam difficultium, & laboriosorum: cui directe videtur opponi quod aliquis de facili recedat a bono propter aliqua difficultia, quæ sustinere non potest: & hoc pertinet ad rationem mollietatis: nam *molle* dicitur quod facile cedit tangenti.

Non autem iudicatur aliquid molle ex hoc quod cedit fortiter impellenti: nam & parietes cedunt machinæ percutienti.

Et ideo non reputatur aliquis molliis, si cedat aliquibus valde graviter impellentibus. Unde Philosophus dicit in VII. Ethicor. (cap. VII. a med.) quod *si quis a fortibus, & superexcellens delectationibus vincitur, vel tristitibus; non est admirabile, sed condonabile, si contra tendat*. Manifestum est autem quod gravius impellit ræctus periculorum quam cupiditas delectationum. Unde Tullius dicit in I. de offic. (in tit. *Vere magnanim.* in duobus sita est:) *Non est consentaneum, qui metu non frangatur, cum frangi cupiditate, nec qui invictum se a labore præstiterit, vinci a voluptate*. Ipsa etiam voluptas fortius movet attrahendo, quam tristitia de carentia voluptatis retrahendo: quia carentia voluptatis est purus defectus. Et ideo secundum Philosophum (loc. sup. cit.) proprie molliis dicitur qui recedit a bono propter tristitias causatas ex defectu delectationum, quasi cedens debili moventi.

Ad primum ergo dicendum, quod prædicta mollietates causatur dupliciter: uno modo ex consuetudine: cum enim aliquis consuetus est voluptatibus frui, difficilius potest earum abentiam sustinere: alio modo ex naturali dispositione, quia videlicet habet animum minus constantem propter fragilitatem complexionis. Et hoc modo comparantur femine ad masculos, ut Philosophus dicit in VII. Ethic. (loc. sup. cit.) Et ideo illi qui muliebria patiuntur, *molles* dicuntur, quasi muliebres effecti.

Ad secundum dicendum, quod voluptati corporali opponitur labor: & ideo res laboriosæ tantum impediunt voluptates. Deliciosi autem dicuntur qui non possunt sustinere aliquos labores, nec aliquid quod voluptatem diminuat. Unde dicitur Deuter. XXVIII. 56. *Tenera mulier, & delicata, quæ subit terram ingredi non valebat, nec pedis vestigium figere propter mollietatem*. Et ideo delicia mollietates quædam est. Sed mollietates proprie respicit *intra* delectationum; delicia autem causam impeditivam delectationis, puta laborem, vel aliquid huiusmodi.

Ad tertium dicendum, quod in ludo duo est considerare. Uno quidem modo delectationem: & sic inordinate luscivus opponitur eutrapeliæ: Alio modo in ludo consideratur quædam remissio, sive quies, quæ opponitur labori. Et ideo sicut non posse sustinere laboriosa pertinet ad mollietatem, ita etiam nimis appetere remissionem ludi, vel quamcumque aliam quietem.

A R-

## ARTICULUS II. 678

*Utrum pertinacia opponatur  
perseverantiae.*

**A**D secundum sic proceditur. Videtur quod pertinacia non opponatur perseverantiae. Dicit enim Gregorius XXXI. Moral. (cap. xvii. a med.) quod *pertinacia oritur ex inani gloria*. Sed inanis gloria non opponitur perseverantiae, sed magis magnanimitati, ut supra dictum est (quaest. cxxxix. art. 2.) Ergo pertinacia non opponitur perseverantiae.

3. Præterea. Si opponitur perseverantiae, aut opponitur ei per excessum, aut per defectum. Sed non opponitur ei per excessum, quia etiam pertinax cedit alicui delectationi, & tristitiae: quia, ut dicit Philosophus in VII. Ethicor. (cap. ix. ante med.) *gaudent vincentes, & triflantur, si sententiae eorum infirmæ appareant*. Si autem per defectum, erit idem quod mollities: quod patet esse falsum. Nullo ergo modo pertinacia opponitur perseverantiae.

3. Præterea. Sicut perseverans persistit in bono contra tristitias; ita continens, & temperatus contra delectationes, & fortes contra timores, & mansuetus contra iras. Sed pertinax dicitur aliquis ex eo quod nimis in aliquo persistit. Ergo pertinacia non magis opponitur perseverantiae quam aliis virtutibus.

Sed contra est quod Tullius dicit in sua Rethor. (Lib. II. de invent. aliquant. ante fi.) quod ita se habet pertinacia ad perseverantiam, sicut superstitio ad religionem. Sed superstitio opponitur religioni, ut supra dictum est (quaest. xxi. art. 1.) Ergo & pertinacia perseverantiae.

Respondeo dicendum, quod, sicut Isidorus dicit in Lib. X. Etymol. (ad lit. P.) *pertinax dicitur aliquis qui est (a) impudenter tenens, quasi omnino tenax*: & hic idem dicitur *pertinax*, eo quod in proposito suo ad victoriam perseverat: antiqui enim dicebant *viciam*, quam nos *victoriam*. Et hos Philosophus vocat in VII. Ethic. (cap. ix.) *ισχυροπρεπες* ischyrognomones, idest fortis sententiae, vel *ισχυροφειδους* idiothomones, idest propriae sententiae, quia scilicet perseverant in propria sententia plus quam oportet; mol-

lis autem minus quam oportet; perseverans autem secundum quod oportet.

Unde patet quod perseverantia laudatur, sicut in medio existens; pertinax autem vituperatur secundum excessum medii; mollis autem secundum defectum.

Ad primum ergo dicendum, quod id eo aliquis nimis persistit in propria sententia, quia per hoc vult suam excellentiam manifestare: & ideo oritur ex inani gloria sicut ex causa. Dictum est autem supra (quaest. cxxxix. art. 2. ad 1. & quaest. cxxxix. art. 2.) quod oppositio vitiorum ad virtutes non attenditur secundum causam, sed secundum propriam speciem.

Ad secundum dicendum, quod pertinax excedit quidem in hoc quod inordinate persistit in aliquo contra multas difficultates; habet tamen aliquam delectationem in fine, sicut & fortis, & etiam perseverans. Quia tamen illa delectatio est vitiosa, ex eo quod nimis appetit eam, & contrariam tristitiam fugit, assimilatur incontinenti, vel molli.

Ad tertium dicendum, quod etsi aliae virtutes persistent contra impetus passionum, non tamen proprie laus earum est ex persistendo, sicut laus perseverantiae. Laus vero continentiae magis videtur ex vincendo delectationes. Et ideo pertinacia directe opponitur perseverantiae.

## QUAESTIO CXXXIX.

*De dono fortitudinis,  
in duos articulos divisa.*

**D**Einde considerandum est de dono quod respondet fortitudini, quod est fortitudinis donum: & circa hoc quaeruntur duo.

Primo, utrum fortitudo sit donum.

Secundo, quid respondeat ei in beatitudinibus, & fructibus.

## ARTICULUS I. 679

*Utrum fortitudo sit donum.*

III. dist. xxxiv. quaest. iv. art. 2. cor. & quaest. xxi. art. 1. quaest. 1.

**A**D primum sic proceditur. Videtur quod fortitudo non sit donum. Virtutes enim a donis differunt. Sed fortitudo

(a) Ita optima ed., Alen., iuxta vetum Græc. a. qui locum depravatam deprahendit, Nicolaus impudenter tenax, & quasi omnino tenens &c. Edit. Rom. quali omnia tenens: & hic idem dicitur pertinax, Edit. Latav. &c. quasi ad omnia tenax &c.

tudo est virtus. Ergo non debet poni donum.

2. Præterea. Actus donorum manent in patria, ut supra habitum est (1. 2. quæst. lxxviii. art. 6.) Sed actus fortitudinis non manet in patria: dicit enim Gregorius in I. Moral. (cap. xv. ante med.) quod fortitudo dat fiduciam trepidanti contra adversa; quæ nulla erunt in patria. Ergo fortitudo non est donum.

3. Præterea. Augustinus dicit in II. de doct. christ. (cap. vii. in med.) quod fortitudinis est ab omni transeuntium meritis incunctitate seipsum sequestrare. Sed circa noxias incunctitates, seu delectationes magis consistit temperantia quam fortitudo. Ergo videtur quod fortitudo non sit donum respondens virtuti fortitudinis.

Sed contra est quod Isa. xi. fortitudo inter alia dona Spiritus sancti computatur.

Respondeo dicendum, quod fortitudo importat quandam animi firmitatem, ut supra dictum est (quæst. cxxiii. art. 2. & 1. 2. quæst. lxi. art. 3.) Et hæc quidem firmitas animi requiritur & in bonis faciendis, & in malis perferendis, & præcipue in arduis bonis, vel malis. Homo autem secundum proprium, & conaturalem sibi modum hæc firmitatem in utroque potest habere, ut non deficiat a bono propter difficultatem vel alicuius ardui operis implendi, vel alicuius gravis mali perferendi: & secundum hoc fortitudo ponitur virtus specialis, vel generalis, ut supra dictum est (quæst. cxxiii. art. 2.)

Sed ulterius a Spiritu sancto movetur animus hominis ad hoc quod perveniat ad finem cuiuslibet operis inchoati, & evadat quæcumque pericula imminentia: quod quidem excedit naturam humanam. Quandoque enim non subest potestati hominis ut consequatur finem sui operis, vel evadat mala, seu pericula, cum quandoque opprimatur ab eis in morte; sed hoc operatur Spiritus sanctus in homine, cum perducit eum ad vitam æternam, quæ est finis omnium bonorum operum, & evasio omnium periculorum: & huius rei infundit quandam fiduciam menti Spiritus sanctus, contrarium timorem excludens: & secundum hoc fortitudo donum Spiritus sancti ponitur. Dictum est enim supra (1. 2. quæst. lxxviii. art. 1. & 2.) quod dona respiciunt motionem animæ a Spiritu sancto.

S. Tb. Oper. Tom. XXIII.

Ad primum ergo dicendum, quod fortitudo quæ est virtus, perficit animum ad sustinendum quæcumque pericula; sed non sufficit dare fiduciam evadendi quæcumque pericula; sed hoc pertinet ad fortitudinem quæ est donum Spiritus sancti.

Ad secundum dicendum, quod dona non habent eosdem actus in patria quos habent in via; sed ibi habent actus circa perfruitionem finis. Unde actus fortitudinis ibi est perfrui plena securitate a laboribus, & malis.

Ad tertium dicendum, quod donum fortitudinis respicit virtutem fortitudinis, non solum secundum quod consistit in sustinendo pericula, sed etiam secundum quod consistit in quocumque arduo opere faciendo. Et ideo donum fortitudinis dirigitur a dono consilii, quod videtur præcipue esse de melioribus bonis.

## ARTICULUS II. 68a

Utrum quarta beatitudo, scilicet Beati qui esuriunt, & sitiunt iustitiam, respondeat dono fortitudinis.

Inf. quæst. cxxxiii. & 1. 2. quæst. lxxix. art. 3. ad 3. & III. dist. xxxiv. quæst. 1. art. 4. & 6. cor.

**A**D secundum sic proceditur. Videtur quod quarta beatitudo, scilicet Beati qui esuriunt, & sitiunt iustitiam, non respondeat dono fortitudinis. Donum enim fortitudinis non respondet virtuti iustitiæ, sed potius donum pietatis. Sed esurire, & sitire iustitiam pertinet ad actum iustitiæ. Ergo beatitudo ista magis pertinet ad donum pietatis quam ad donum fortitudinis.

2. Præterea. Esuries, & sitis iustitiæ importat desiderium boni. Sed hoc proprie pertinet ad caritatem, cui non respondet donum fortitudinis, sed magis donum sapientiæ, ut supra dictum est (quæst. xlv.) Ergo ista beatitudo non respondet dono fortitudinis, sed dono sapientiæ.

3. Præterea. Fructus consequuntur ad beatitudines: quia de ratione beatitudinis est delectatio, ut dicitur in I. Ethicor. (cap. viii. a med.) Sed in fructibus non videtur aliquid poni quod pertineat ad fortitudinem. Ergo nec beatitudo aliqua ei respondet.

Sed contra est quod Augustinus dicit in Lib. I. de serm. Dom. in monte (cap.

K

IV.

xv. ante med.) *Fortitudo congruit esurientibus, & sitientibus: laborant enim desiderantes gaudium de veris bonis, amorem a terrenis, & corporalibus avertere cupientes.*

Respondeo dicendum, quod, sicut supra dictum est (quæst. cxxi. art. 2.) Augustinus attribuit beatitudines donis secundum ordinem enumerationis, considerata tamen aliqua convenientia. Et ideo quartam beatitudinem, scilicet de esurie, & siti iustitiæ, attribuit quarto dono, scilicet dono fortitudinis.

Est tamen ibi aliqua convenientia: quia, sicut dictum est (art. præc.) fortitudo in arduis consistit. Est autem valde arduum quod aliquis non solum opera virtuosa faciat, quæ communiter dicuntur opera iustitiæ; sed quod faciat ea cum infatigabili quodam desiderio; quod potest significari per famem, & sitim iustitiæ.

Ad primum ergo dicendum, quod, sicut Chrysostomus dicit super Matth. (hom. xv. inter princ. & med.) iustitia hic potest accipi non solum particularis, sed etiam universalis, quæ se habet ad omnium virtutum opera, ut dicitur in V. Ethic. (cap. x. a med.) in quibus arduum intendit fortitudo, quæ est donum.

Ad secundum dicendum, quod caritas est radix omnium donorum, & virtutum, ut supra dictum est (quæst. xxiii. art. 8. ad 3. & 1. 2. quæst. lxxiii. art. 4. ad 3.) Et ideo quicquid pertinet ad fortitudinem, potest etiam ad caritatem pertinere.

Ad tertium dicendum, quod interfructus ponuntur duo quæ sufficienter correspondent dono fortitudinis; scilicet patientia, quæ respicit sustinentiam malorum, & longanimitas, quæ respicere potest diuturnam expectationem, & operationem bonorum.

## QUAESTIO CXL.

*De præceptis fortitudinis,  
in duos articulos divisa.*

**D**Einde considerandum est de præceptis fortitudinis.

Et primo de præceptis ipsius fortitudinis.

Secundo de præceptis partium eius.

## ARTICULUS I. 662

*Utrum convenienter in lege divina præcepta fortitudinis tradantur.*

**A**D primum sic proceditur. Videtur quod non convenienter in lege divina præcepta fortitudinis tradantur. Lex enim nova perfectior est veteri lege. Sed in veteri lege ponuntur aliqua præcepta fortitudinis, ut patet Deuter. xx. Ergo & in nova lege aliqua præcepta fortitudinis danda fuerunt.

2. Præterea. Præcepta affirmativa videntur esse potiora præceptis negativis, quia affirmativa includunt negativa, sed non e converso. Inconvenienter ergo in lege divina ponuntur præcepta fortitudinis solum negativa timorem prohibentia.

3. Præterea. Fortitudo est una de virtutibus principalibus, ut supra habitum est (quæst. cxxiii. art. 11. & 1. 2. quæst. lxx. art. 2.) Sed præcepta ordinantur ad virtutes sicut ad fines: unde debent eis proportionari. Ergo præcepta fortitudinis debuerunt poni inter præcepta Decalogi, quæ sunt principalia legis præcepta.

Sed contrarium apparet ex traditione sacrae Scripturæ.

Respondeo dicendum, quod præcepta legis ordinantur ad intentionem legislatoris. Unde secundum diversos fines quos intendit legislator, oportet diversimode præcepta legis institui: unde & in rebus humanis alia sunt præcepta democratica, alia regia, alia tyrannica. Finis autem legis divinæ est ut homo inhaereat Deo: & ideo præcepta legis divinæ tam de fortitudine, quam de aliis virtutibus dantur, secundum quod convenit ordinationi mentis in Deum: & propter hoc Deuter. xx. 3. dicitur: *Non formidetis eos, quia Dominus Deus vestrum in medio vestrum est, & pro vobis contra adversarios dimicabit.*

Leges autem humanæ ordinantur ad aliqua mundana bona, secundum quorum conditionem præcepta fortitudinis in humanis legibus inveniuntur.

Ad primum ergo dicendum, quod vetus testamentum habebat temporalia promissa, novum autem spiritualia, & æterna, ut Augustinus dicit contra Faust. (Lib. IV. cap. 11. in princ.) Et ideo necessarium fuit ut in veteri lege populus instrueretur, qualiter pugnare deberet et



iam corporaliter pro terrena possessione acquirenda; in novo autem testamento instruendi fruuntur homines, qualiter spiritaliter cercando ad possessionem vitae aeternae pervenirent, secundum illud Matth. xi. 12. *Regnum caelorum vim patitur, & violenti rapiunt illud*. Unde & Petrus praecipit I. Pet. ult. 8. *Adversarius vester diabolus, tamquam leo rugiens, circuit querens quem devoret: cui resistite fortes in fide*; & Iacobi xv. 7. *Resistite diabolo, & fugiet a vobis*. Quia tamen homines ad spiritalia bona tendentes, ab eis retrahi possent per corporalia pericula, fuerunt etiam in lege nova danda fortitudinis praecepta ad sustinenda fortiter temporalia mala, secundum illud Matth. x. 28. *Nolite timere eos qui occidunt corpus*.

Ad secundum dicendum, quod lex in suis praecipitis habet communem instructionem. Ea vero quae sunt agenda in periculis, non possunt ad aliquod commune reduci, sicut ea quae sunt vitanda. Et ideo praecepta fortitudinis magis dantur negative quam affirmative.

Ad tertium dicendum, quod, sicut dictum est (quaest. cxxii. art. 1.) praecepta Decalogi ponuntur in lege, sicut prima principia, quae statim debent esse omnibus nota. Et ideo praecepta Decalogi debuerunt esse principaliter de actibus iustitiae, in quibus manifeste videtur esse ratio debiti; non autem de actibus fortitudinis, quia non ita manifeste videtur esse debitum quod aliquis pericula mortis non reformidet.

## ARTICULUS II. 682

*Utrum convenienter tradantur praecepta in lege divina de partibus fortitudinis.*

**A**D secundum sic proceditur. Videtur quod inconvenienter tradantur praecepta in lege divina de partibus fortitudinis. Sicut enim patientia, & perseverantia sunt partes fortitudinis; ita etiam magnificentia, & magnanimitas, sive fiducia, ut ex supra dictis patet (quaest. cxxviii.) Sed de patientia inveniuntur aliqua praecepta tradita in lege divina: similiter etiam & de perseverantia. Ergo pari ratione de magnificentia, & magnanimitate aliqua praecepta tradi debuerunt.

2. Praeterea. Patientia est virtus maxime necessaria, cum sit custos a-

liarum virtutum, ut Gregorius dicit (hom. xxxv. in Evang. parum ante med.) Sed de aliis virtutibus dantur absolute praecepta. Non ergo de patientia fuerunt danda praecepta quae intelligantur solum secundum praeparationem animi, ut Augustinus dicit in Lib. I. de ferm. Dom. in monte (cap. xix. & cxi).

3. Praeterea. Patientia, & perseverantia sunt partes fortitudinis, ut dictum est (quaest. cxxviii. & cxxvii. art. 4. & cxxvii. art. 2.) Sed de fortitudine non dantur praecepta affirmativa, sed solum negativa, ut supra habitum est (art. praec. ad 2.) Ergo etiam neque de patientia, & perseverantia fuerunt danda praecepta affirmativa, sed solum negativa.

Sed contrarium habetur ex traditione sacrae Scripturae.

Respondendo dicendum, quod lex divina perfecte informat hominem de his quae sunt necessaria ad recte vivendum. Indiget autem homo ad recte vivendum, non solum virtutibus principalibus, sed etiam virtutibus secundariis, & adiunctis: & ideo in lege divina sicut dantur convenientia praecepta de actibus virtutum principalium, ita etiam dantur convenientia praecepta de actibus secundariorum virtutum, & adiunctorum.

Ad primum ergo dicendum, quod magnificentia, & magnanimitas non pertinent ad genus fortitudinis, nisi secundum quandam magnitudinis excellentiam, quam circa propriam materiam considerant. Ea autem quae pertinent ad excellentiam, magis cadunt sub consiliis perfectionis quam sub praecipitis necessitatis. Et ideo de magnificentia, & de magnanimitate non fuerunt danda praecepta, sed magis consilia. Afflictiones autem, & labores praesentis vitae pertinent ad patientiam, & perseverantiam, non ratione alicuius magnitudinis in eis consideratae, sed ratione ipsius generis. Et ideo de patientia, & perseverantia fuerunt danda praecepta.

Ad secundum dicendum, quod, sicut supra dictum est (quaest. lxx. art. 2.) praecepta affirmativa etsi semper obligent, non tamen obligant ad semper, sed pro loco, & tempore. Et ideo sicut praecepta affirmativa (a) quae de aliis virtutibus dantur, sunt accipienda secundum praeparationem animi, ut scilicet homo sit paratus ea adimplere, cum opus fuerit; ita etiam praecepta patientiae.

K 2 Ad.

(a) Ita post Gratianum dicit, etiam, Videri dicit, & nisi, plura quae de patientia dantur.

Ad tertium dicendum, quod fortitudo, secundum quod distinguitur a patientia, & perseverantia, est circa maxima pericula, in quibus est cautius agendum: nec oportet aliquid determinari in particulari quid sit faciendum. Sed patientia, & perseverantia sunt circa minores afflictiones, & labores: & ideo magis sine periculo potest in eis determinari quid sit agendum, maxime in universali.

## QUAESTIO CXLI.

### De temperantia,

#### in octo articulis divisa.

**C**onsequenter considerandum est de temperantia: & primo quidem de ipsa temperantia; secundo de partibus eius; tertio de praeceptis ipsius. Circa temperantiam autem primo considerare oportet de ipsa temperantia; secundo de vitiis oppositis.

Circa primum quaeruntur octo.

Primo, utrum temperantia sit virtus.

Secundo, utrum sit virtus specialis.

Tertio, utrum sit solum circa concupiscentias, & delectationes.

Quarto, utrum sit solum circa delectationes tactus.

Quinto, utrum sit circa delectationes gustus, inquantum est gustus, vel solum inquantum est tactus quidam.

Sexto, quae sit regula temperantiae.

Septimo, utrum sit virtus cardinalis, seu principalis.

Octavo, utrum sit potissima virtutum.

## ARTICULUS I. 683

### Utrum temperantia sit virtus.

*Inf. quaest. cxxxvi. art. 1. cor. & vir. quaest. 1. art. 12. ad 3. Et III.*

*Eth. lib. 19.*

**A**d primum sic proceditur. Videtur quod temperantia non sit virtus. Nulla enim virtus repugnat inclinationi naturae, eo quod in nobis est naturalis appetitudo ad virtutem, ut dicitur in II. Eth. (cap. 1. a princ.) Sed temperantia retrahit a delectationibus, ad quas natura inclinat, ut dicitur in II. Ethic. (cap. 111. & viii.) Ergo temperantia non est virtus.

2. Praeterea. Virtutes sunt connexae ad invicem, ut supra habitum est (1. 2. quaest. lxxv. art. 1.) Sed aliqui habent tem-

perantiam qui non habent alias virtutes: multi enim inveniuntur temperati, qui tamen sunt avari, vel timidi. Ergo temperantia non est virtus.

3. Praeterea. Cuiuslibet virtutis respondet aliquod donum, ut ex supradictis patet (1. 2. quaest. lxxviii.) Sed temperantiae non videtur aliquod donum respondere: quia iam in superioribus donata omnia sunt aliis virtutibus attributa. Ergo temperantia non est virtus.

Sed contra est quod Augustinus dicit in VI. Musicae (cap. xv. a med.) *Est est virtus quae temperantia nominatur.*

Respondetur dicendum, quod, sicut supra dictum est (1. 2. quaest. lv. art. 3.) de ratione virtutis est ut inclinet hominem ad bonum. Bonum autem hominis est secundum rationem esse, ut Dionysius dicit in iv. cap. de div. Nom. (par. lv. lib. 22.) Et ideo virtus humana est quae inclinat ad id quod est secundum rationem. (4) Manifeste autem ad hoc inclinat temperantia: nam in eius nomine importatur quaedam moderatio, seu temperies, quam ratio facit. Et ideo temperantia est virtus.

Ad primum ergo dicendum, quod natura inclinat in id quod est conveniens unicuique. Unde homo naturaliter appetit delectationem sibi convenientem. Quia vero homo, inquantum huiusmodi, est rationalis, consequens est quod delectationes sint homini convenientes, quae sunt secundum rationem: & ab his non retrahit temperantia, sed potius ab his quae sunt contra rationem. Unde patet quod temperantia non contrariatur inclinationi naturae humanae, sed convenienti cum ea. Contrariatur tamen inclinationi naturae bestialis non subiectae rationi.

Ad secundum dicendum, quod temperantia, secundum quod perfecte habet rationem virtutis, non est sine prudentia, qua carent quicumque vitiosi. Et ideo illi qui carent aliis virtutibus, oppositis vitiis subditi, non habent temperantiam, quae est virtus, sed operantur actus temperantiae ex quadam naturali dispositione, prout virtutes quaedam imperfectae sunt hominibus naturaliter, ut supra dictum est (1. 2. quaest. lxxii. art. 1.) vel per consuetudinem acquisitae, quae sine prudentia non habent perfectionem rationis, ut supra dictum est (1. 2. quaest. lxxii. art. 4. & quaest. lxxv. art. 1.)

Ad tertium dicendum, quod temperantiae etiam correspondet aliquod donum.

(4) Ita cum dicitur *est*, recte videtur veteres Maxime autem.

num, scilicet timoris, quo aliquis refrenatur a delectationibus carnis, secundum illud Psal. cxviii. *Confige timore tuo carnes meas*. Donum autem timoris principaliter quidem respicit Deum, cuius offensam vitat; & secundum hoc correspondet virtuti spei, ut supra dictum est (quæst. xix. art. 9. ad 1.) secundario autem potest respicere quæcumque aliquis refugit ad vitandam Dei offensam. Maxime autem homo indiget timore divino, ad fugiendum ea quæ maxime alliciunt, circa quæ est temperantia: & ideo temperantia etiam correspondet donum timoris.

ARTICULUS II. 684

*Utrum temperantia sit specialis virtus.*

*Inf. art. 4. ad 2.*

**A**D secundum sic proceditur. Videtur quod temperantia non sit specialis virtus. Dicit enim Augustinus in Lib. de morib. Eccles. (cap. xv. cir. fin. & cap. xrx.) quod ad temperantiam pertinet, Deo se integrum incorruptumque servare. Sed hoc convenit omni virtuti. Ergo temperantia est virtus generalis.

2. Præterea. Ambrosius dicit in I. de offi. (cap. xlii. in princ.) quod in temperantia maxime tranquillitas animi spectatur, & queritur. Sed hoc pertinet ad omnem virtutem. Ergo temperantia est generalis virtus.

3. Præterea. Tullius dicit in I. de offic. (in tit. de temperantia) quod decorum ab honesto nequit separari; & quod iusta omnia decora sunt. Sed decorum proprie consideratur in temperantia, ut ibidem dicitur. Ergo temperantia non est specialis virtus.

Sed contra est quod Philosophus in II. Ethic. (cap. vii.) & in III. (cap. x.) ponit eam specialem virtutem.

Respondendo dicendum, quod secundum consuetudinem humanæ locutionis, aliqua nomina communia restringuntur ad ea quæ sunt præcipua inter illa quæ sub tali communitate continentur; sicut nomen urbis accipitur antonomastice pro Roma.

Sic ergo nomen temperantiæ dupliciter accipi potest. Uno modo secundum communitatem suæ significationis; & sic temperantia non est virtus specialis, sed generalis: quia nomen temperantiæ significat quandam temperiem, id est moderationem, quam ratio ponit in humanis

operationibus, & passionibus; quod est commune in omni virtute morali. Differt tamen ratione temperantia a fortitudine, etiam secundum quod utraque sumitur ut virtus communis: nam temperantia retrahit ab his quæ contra rationem appetitum alliciunt; fortitudo autem impellit ad ea sustinenda, vel agredienda, propter quæ homo refugit boni rationis.

Si vero consideretur antonomastice temperantia, secundum quod refrenat appetitum ab his quæ maxime alliciunt hominem; sic est specialis virtus, utpote habens specialem materiam, sicut & fortitudo.

Ad primum ergo dicendum, quod appetitus hominis maxime corrumpitur per ea quibus allicitur homo ad recedendum a regula rationis, & legis divinæ. Et ideo sicut ipsum temperantiæ nomen potest dupliciter sumi, uno modo communiter, alio modo excellenter; ita & integritas, quam temperantiæ Augustinus attribuit.

Ad secundum dicendum, quod ea circa quæ est temperantia, maxime possunt animum inquietare, propter hoc quod sunt homini essentialia, ut infra dicitur (art. 4. & 5. hu. quæst.) Et ideo tranquillitas animi per quamdam excellentiam attribuitur temperantiæ, quamvis communiter conveniat omnibus virtutibus.

Ad tertium dicendum, quod quamvis pulchritudo conveniat cuilibet virtuti, excellenter tamen attribuitur temperantiæ duplici ratione. Primo quidem secundum rationem communem temperantiæ, ad quam pertinet quædam moderata, & conveniens proportio, in qua consistit ratio pulchritudinis, ut patet per Dionysium rv. cap. de div. Nomin. (par. 1. lect. 5.) Alio modo quia ea a quibus refrenat temperantia, sunt infima in homine, convenientia sibi secundum naturam bestialem, ut infra dicitur (art. 4. & 5. hu. quæst. & quæst. seq. art. 4.) & ideo ex eis maxime natus est homo deturpari: & per consequens pulchritudo maxime attribuitur temperantiæ, quæ præcipue turpitudinem hominis tollit; & ex eadem ratione honestum maxime attribuitur temperantiæ. Dicit enim Iustinus in Lib. X. Etymolog. (ad lit. H.) *Honestus dicitur qui nil habet turpitudinis: nam honestas dicitur, quasi honoris status*; qui maxime consideratur in temperantia, quæ repellit vicia maxime op-

*S. Tb. Oper. Tom. XXXIII.*

K 3

pro-

probriosa, ut infra dicitur (quæst. seq. art. 4.)

### ARTICULUS III. 685

*Utrum temperantia sit solum circa concupiscentias, & delectationes.*

Sup. quæst. xxz. art. 1. ad 2. & quæst. xxiii. art. 4. ad 3. & quæst. xcv. art. 3. ad 2. & infr. quæst. cxlvii. art. 2. ad 3. & 1. 2. quæst. xxxv. art. 6. ad 3. & III. Est. lect. 19.

**A**D tertium sic proceditur. Videtur quod temperantia non sit solum circa concupiscentias, & delectationes. Dicit enim Tullius in sua Rhetor. (Lib. II. de invent. aliquant. ante fin.) quod temperantia est rationis in libidinem, atque in alios non rectos impetus animi firma, & moderata dominatio. Sed impetus animi dicuntur omnes animæ passionibus. Ergo videtur quod temperantia non sit solum circa concupiscentias, & delectationes.

2. Præterea. Virtus est circa difficile, & bonum. Sed difficultius videtur esse temperare timorem, maxime circa pericula mortis, quam moderari concupiscentias, & delectationes, quæ propter dolores, & pericula mortis continentur, ut Augustinus dicit in Lib. lxxxiii. Qg. (quæst. xxxvi. parum a princ.) Ergo videtur quod temperantia virtus non sit præcipue circa concupiscentias, & delectationes.

3. Præterea. Ad temperantiam pertinet moderationis gratia, ut Ambrosius dicit in I. de offic. (cap. xv. in princ.) & Tullius uidet in I. de off. (tit. de temp.) quod ad temperantiam pertinet omnis sedatio perturbationum animi, & rerum modus. Oportet autem modum ponere non solum in concupiscentiis, & delectationibus, sed etiam in exterioribus actibus, & quibuslibet exterioribus. Ergo temperantia non est solum circa concupiscentias, & delectationes.

Sed contra est, quod Isidorus dicit in Lib. Etymolog. (non occurrit) quod temperantia est qua libido concupiscentiarum refrenatur.

Respondeo dicendum, quod, sicut supra dictum est (quæst. cxxiii. art. 1. & quæst. cxxxvi. art. 1.) ad virtutem moralem pertinet conservatio boni rationis contra passiones rationi repugnantes. Motus autem passionum animæ est duplex, ut supra habitum est (1. 2. quæst.

xxiii. art. 2.) cum de passionibus ageretur: unus quidem, secundum quod appetitus sensitivus prosequitur sensibilia, & corporalia bona; alius autem, secundum quod refugit sensibilia, & corporalia mala. Primus autem motus appetitus sensitivi præcipue repugnat rationi per immoderantiam. Nam bona sensibilia, & corporalia secundum suam speciem considerata non repugnant rationi, sed magis serviunt ei sicut instrumenta, quibus ratio utitur ad consecutionem proprii finis: repugnant autem ei præcipue secundum quod appetitus sensitivus in ea tendit non secundum modum rationis. Et ideo ad virtutem moralem pertinet proprie huiusmodi passiones moderari quæ important prosecutionem boni.

Motus autem appetitus sensitivi refugientis mala sensibilia præcipue contrariatur rationi, non quidem secundum suam immoderantiam, sed maxime secundum suum discessum, prout scilicet aliquis refugiendo mala sensibilia, & corporalia, quæ interdum concomitantur bonum rationis, per consequens discedit ab ipso bono rationis: & ideo ad virtutem moralem pertinet in huiusmodi discessu firmitatem præstare in bono rationis.

Sicut ergo virtus fortitudinis, de cuius ratione est firmitatem præstare, præcipue consistit circa passionem pertinentem ad fugam corporaliū malorum, scilicet circa timorem; ex consequenti autem circa audaciam, quæ aggreditur terribilia sub spe alicuius boni: ita etiam temperantia, quæ importat moderationem quamdam, præcipue consistit circa passiones tendentes in bona sensibilia, scilicet circa concupiscentiam, & delectationem; ex consequenti autem circa tristitias, quæ contingunt ex absentia talium delectationum. Nam sicut audacia præsupponit terribilia, ita etiam tristitia talis provenit ex absentia prædictarum delectationum.

Ad primum ergo dicendum, quod, sicut supra dictum est (1. 2. quæst. xxiii. art. 1. & 2. & quæst. xxv. art. 1.) cum de passionibus ageretur, passiones quæ pertinent ad fugam mali, præsupponunt passiones quæ pertinent ad prosecutionem boni; & passiones irascibilis præsupponunt passiones concupiscibilis. Et sic dum temperantia directe modificat passiones concupiscibilis tendentes in bonum, per quamdam consequentiam modificat omnes alias passiones, inquantum ad moderantiam priorum passionum sequitur

moderantia posteriorum : qui enim non immoderate concupiscit, consequens est ut moderate speret, & moderate de absentia concupiscibilium tristetur.

Ad secundum dicendum, quod concupiscentia importat impetum quemdam appetitum in delectabile; qui indiget refractione, quod pertinet ad temperantiam: sed timor importat retactionem quamdam animi ab aliquibus malis; contra quod indiget homo animi firmitate, quam praestat fortitudo. Et ideo temperantia proprie est circa concupiscentias, fortitudo circa timores.

Ad tertium dicendum, quod exteriores actus procedunt ab interioribus animae passionibus: & ideo moderatio eorum dependet a moderatione interiorum passionum.

## ARTICULUS IV. 686

*Utrum temperantia sit solum circa concupiscentias, & delectationes tactus.*

1. par. quest. lxx. art. 4. ad 3. & 1. 2. quest. lxxi. art. 3. cor. & III. dist. xxxiii. quest. ii. art. 2. quest. 2. & IV. dist. xlix. quest. iii. art. 5. quest. 2. cor. & viii. quest. 1. art. 12. ad 23. & 26.

**A**D quartum sic proceditur. Videtur quod temperantia non solum sit circa concupiscentias, & delectationes tactus. Dicit enim Augustinus in Lib. de moribus Eccl. (cap. xix. cir. princ.) quod *munus temperantiae est in coercendis sedandisque cupiditatibus, quibus vertimur in ea quae nos avertunt a legibus Dei, & a fructu bonitatis eius: & post pauca subdit, quod officium temperantiae est continere omnes corporales illecebras, laudumque populares.* Sed non solum cupiditates delectationum tactus avertunt nos a legibus Dei, sed etiam concupiscentiae delectationum aliorum sensum, quae etiam pertinent ad illecebras corporales; & similiter cupiditates divitiarum, vel etiam mundanae gloriae: unde dicitur I ad Timoth. ult. 10. quod *radix omnium malorum est cupiditas.* Ergo temperantia non est solum circa concupiscentias delectationum tactus.

2. Praeterea. Philosophus dicit in IV. Ethic. (cap. iii. circ. princ.) quod *ille qui est parvis dignus, & his dignificat seipsum, est temperatus, non autem magnanimus.* Sed honores parvi, vel magni, de quibus ibi loquitur, non sunt

delectabiles secundum tactum, sed secundum apprehensionem animalem. Ergo temperantia non est solum circa concupiscentias delectationum tactus.

3. Praeterea. Ea quae sunt unius generis, videntur eadem ratione pertinere ad materiam alicuius virtutis. Sed omnes delectationes sensuum videntur esse unius generis. Ergo pari ratione pertinent ad materiam temperantiae.

4. Praeterea. Delectationes spirituales sunt maiores quam corporales, ut supra habitum est (1. 2. quest. xxxi. art. 5.) cum de passionibus ageretur. Sed quandoque propter concupiscentias delectationum spiritualium aliqui discunt a legibus Dei, & a statu virtutis, sicut propter curiositatem scientiae: unde & primo homini diabolus scientiam promisit Genes. iii. 5. dicens: *Eritis sicut dii, scientes bonum, & malum.* Ergo non solum temperantia est circa delectationes tactus.

5. Praeterea. Si delectationes tactus essent propria materia temperantiae, oporteret quod circa omnes delectationes tactus temperantia esset. Non autem est circa omnes, puta circa eas quae sunt in ludis. Ergo delectationes tactus non sunt propria materia temperantiae.

Sed contra est quod Philosophus dicit in III. Ethic. (cap. x.) quod *temperantia proprie est circa concupiscentias, & delectationes tactus.*

Respondendo dicendum, quod, sicut supra dictum est (art. praec.) ita est temperantia circa concupiscentias, & delectationes, sicut fortitudo est circa timores, & audacias. Fortitudo autem est circa timores, & audacias respectu maximorum malorum, quibus ipsa natura extinguitur, quae sunt pericula mortis. Unde similiter temperantia oportet quod sit circa concupiscentias maximarum delectationum. Et quia delectatio consequitur operationem naturalem, tanto alicuius delectationes sunt vehementiores, quanto consequuntur operationes magis naturales. Maxime autem naturales animalibus sunt operationes quibus conservatur natura individui per cibum, & potum, & natura speciei per coniunctionem maris, & feminae: & ideo circa delectationes ciborum, & potuum, & circa delectationes veneriorum est proprie temperantia. Huiusmodi autem delectationes consequuntur sensum tactus. Unde relinquitur quod temperantia sit circa delectationes tactus.

Ad primum ergo dicendum, quod Augustinus ibi videtur accipere temperantiam, non secundum quod est specialis virtus habens determinatam materiam, sed secundum quod ad eam pertinet moderatio rationis in quacunque materia; quod pertinet ad generale conditionem virtutis. Quamvis etiam dici possit, quod ille qui potest refrenare maximas delectationes, multo etiam magis potest refrenare minores delectationes. Et ideo ad temperantiam principaliter quidem, & proprie pertinet moderari concupiscentias delectationum tactus; secundario autem alias concupiscentias.

Ad secundum dicendum, quod Philosophus ibi refert nomen temperantiae ad moderationem exteriorum rerum, dum scilicet aliquis tendit in aliqua sibi commensurata; non autem prout refertur ad moderationem affectionum animae, quae pertinet ad virtutem temperantiae.

Ad tertium dicendum, quod delectationes aliorum sensuum aliter se habent in hominibus, & aliter in aliis animalibus. In aliis enim animalibus ex aliis sensibus non causantur delectationes nisi in ordine ad sensibilia tactus; sicut leo delectatur videns cervum, vel audiens vocem eius, propter cibum. Homo autem delectatur secundum alios sensus, non solum propter hoc, sed etiam propter convenientiam sensibilibus. Et sic circa delectationes aliorum sensuum, in quantum referuntur ad delectationes tactus, est temperantia, non principaliter, sed ex consequenti; in quantum autem sensibilia aliorum sensuum sunt delectabilia propter sui convenientiam, sicut cum delectatur homo in sono bene harmonizato, ista delectatio non pertinet ad conservationem naturae: unde non habent huiusmodi passionem illam principalitatem, ut circa eas antonomastice temperantia dicatur.

Ad quartum dicendum, quod delectationes spirituales etsi secundum suam naturam sint maiores delectationibus corporalibus; tamen non ita percipiuntur sensu, & per consequens non ita vehementer afficiunt appetitum sensitivum, contra cuius impetum bonum rationis conservatur per moralem virtutem.

Vel dicendum, quod delectationes spirituales, per se loquendo, sunt secundum rationem: unde non sunt refrenandae nisi per accedens, in quantum scilicet una delectatio spiritualis retrahit ab alia potiori, & magis debita.

Ad quintum dicendum, quod non omnes delectationes tactus pertinent ad naturae conservationem: & ideo non oportet quod circa omnes delectationes tactus sit temperantia.

## ARTICULUS V. 687

*Utrum circa proprias delectationes gustus sit temperantia.*

III. Ethicor. lect. 9.

**A**D quintum sic proceditur. Videtur quod circa proprias delectationes gustus sit temperantia. Delectationes enim gustus sunt in cibis, & potibus, qui magis sunt necessarii ad hominis vitam quam delectationes venerorum, quae pertinent ad tactum. Sed secundum praedicta (art. praec.) temperantia est circa delectationes eorum quae sunt necessaria ad vitam hominis. Ergo temperantia est magis circa proprias delectationes gustus quam circa proprias delectationes tactus.

2. Praeterea. Temperantia est circa passionem magis quam circa res ipsas. Sed, sicut dicitur in II. de Anima (tex. 23.) *tactus videtur esse sensus alimentum* quantum ad ipsam substantiam alimentum; sapor autem, qui est proprie obiectum gustus, est sicut delectamentum alimentorum. Ergo temperantia magis est circa gustum quam circa tactum.

3. Praeterea. Sicut dicitur in VII. Ethic. (cap. IV. & VII. & Lib. III. cap. X. a med.) *circa eadem sunt temperantia, & intemperantia, continentia, & incontinentia, perseverantia, & mollescentia*, ad quam pertinent deliciae. Sed ad delicias videtur pertinere delectatio quae est in saporibus, qui pertinent ad gustum. Ergo temperantia est circa delectationes proprias gustus.

Sed contra est quod Philosophus dicit (III. Ethic. cap. X. a med.) quod *temperantia, & intemperantia videntur gustu parum, vel nihil uti*.

Respondeo dicendum, quod, sicut dictum est (art. praec.) temperantia consistit circa praecipuas delectationes, quae maxime pertinent ad conservationem humanae vitae vel in specie, vel in individuo: in quibus consideratur aliquid principaliter, & aliquid secundario. Principaliter quidem ipse usus necessarius, puta vel seminae, quae est necessaria ad conservationem speciei; vel cibi, & potus,

tus, quæ sunt necessaria ad conservati-  
onem individui : & iple usus horum ne-  
cessariorum habet quamdam essentialem  
delectationem adiunctam. Secundario au-  
tem consideratur circa utrumque usum  
aliquid quod facit ad hoc quod usus sit  
magis delectabilis, sicut pulchritudo, &  
ornatus feminæ, & sapor delectabilis in  
cibo, & etiam odor.

Et ideo principaliter temperantia est  
circa delectationem tactus, quæ per se  
consequitur ipsum usum necessariorum  
rerum, quarum omnis usus est, in tan-  
gendo. Circa delectationes autem gustus,  
vel olfactus, vel visus est temperantia,  
& intemperantia secundario, inquantum  
sensibilia horum sensuum conferunt ad  
delectabilem usum rerum necessariorum,  
quæ pertinent ad tactum. Quia tamen  
gustus propinquior est tactui quam alii  
sensus, ideo temperantia magis est circa  
gustum quam circa alios sensus.

Ad primum ergo dicendum, quod et-  
iam iple usus ciborum, & delectatio es-  
sentialiter ipsum consequens ad tactum  
pertinent. Unde Philosophus dicit in II.  
de Anima (tex. 28.) quod *tactus est  
sensus alimenti* : nutritur enim calido,  
& frigido, humido, & siccio. Sed ad gu-  
stum pertinet discretio saporum, qui  
conferunt ad delectationem alimenti,  
inquantum sunt signa convenientis nu-  
trimenti.

Ad secundum dicendum, quod delecta-  
tio saporis est quasi superveniens; sed de-  
lectatio tactus per se consequitur usum  
cibi, & potus.

Ad tertium dicendum, quod delicie  
principaliter quidem consistunt in ipsa  
substantia alimenti, sed secundario in  
exquisito sapore, & præparatione cibo-  
rum.

## ARTICULUS VI. 638

*Utrum regula temperantiæ sit sumenda  
secundum necessitatem præsentis vitæ.*

*Infr. quæst. cxlii. art. 2. cor. & 1. 2. quæst.  
lxiii. art. 4. cor. & IV. dist. xv. quæst.  
111. art. 1. quæst. 4. cor. & mal. quæst.  
xiv. art. 1. ad 2.*

**A**D sextum sic proceditur. Videtur  
quod regula temperantiæ non sit li-  
menda secundum necessitatem præsentis  
vitæ. Superius enim non regulatur ab  
inferiori. Sed temperantia, cum sit vir-  
tus animæ, est superior quam necessitas

corporalis. Ergo regula temperantiæ non  
debet sumi secundum necessitatem cor-  
poralem.

2. Præterea. Quicumque excedit regu-  
lam, peccat. Si ergo necessitas corpora-  
lis esset regula temperantiæ, quicumque  
alia delectatione uteretur supra necessi-  
tatem naturæ, quæ valde modicis con-  
tenta est, peccaret contra temperan-  
tiam: quod videtur esse inconveniens.

3. Præterea. Nullus attingens regu-  
lam peccat. Si ergo necessitas corporalis  
esset regula temperantiæ, quicumque u-  
teretur aliqua delectatione propter ne-  
cessitatem corporalem, puta propter sa-  
nitatem, esset immunis a peccato. Hoc  
autem videtur falsum. Ergo necessitas  
corporalis non est regula temperantiæ.

Sed contra est quod Augustinus dicit  
in Lib. de morib. Eccl. (cap. xxi. cir-  
ca. ii.) *Habet vir temperans in rebus huius  
vitæ regulam utroque Testamento firma-  
tam, ut eorum nil diligit, nil per se ap-  
petendum putet; sed ad vitæ huius, atque  
officiorum necessitatem, quantum satis est,  
usurpet utentis modestia, non amantis  
affectu.*

Respondeo dicendum, quod, sicut ex  
supradictis patet (art. 1. hu. quæst. &  
quæst. cix. art. 2. & quæst. cxiii. art.  
1.) bonum virtutis moralis præcipue  
consistit in ordine rationis. Nam *bonum  
hominis est secundum rationem esse*, ut  
Dionysius dicit iv. cap. de divin. Nom.  
(par. iv. lect. 22.). Præcipuus autem  
ordo rationis consistit in hoc quod ali-  
qua in finem ordinat: & in hoc ordine  
maxime consistit bonum rationis: nam  
bonum habet rationem finis; & ipse fi-  
nis est regula eorum quæ sunt ad finem.  
Omnia autem delectabilia quæ in usum  
hominis veniunt, ordinantur ad ali-  
quam huius vitæ necessitatem sicut ad fi-  
nem. Et ideo temperantia accipit neces-  
sitatem huius vitæ, sicut regulam dele-  
ctabilium quibus utitur, ut scilicet tan-  
tum eis utatur, quantum necessitas huius  
vitæ requirit.

Ad primum ergo dicendum, quod, sic-  
ut dictum est (in corp. art.) necessitas  
huius vitæ habet rationem regulæ, in-  
quantum est finis. Considerandum est  
autem, quod quandoque aliud est finis  
operantis, & aliud finis operis: sicut  
patet quod ædificationis finis est domus,  
sed ædificatoris finis quandoque est lu-  
crum. Sic ergo temperantiæ ipsius finis  
& regula est beatitudo; sed eius rei qua  
utitur, finis, & regula est necessitas hu-  
ma-

manæ vitæ, infra quam est id quod in usum vitæ venit.

Ad secundum dicendum, quod necessitas humanæ vitæ potest attendi dupliciter: uno modo secundum quod dicitur necessarium illud sine quo res nullo modo potest esse, sicut cibus est necessarius animali; alio modo secundum quod dicitur necessarium illud sine quo res non potest convenienter esse. Temperantia autem non solum attendit primam necessitatem, sed etiam secundam. Unde Philosophus dicit in III. Ethic. (cap. xi. ad fin.) quod *temperatus appetit delectabilia propter sanitatem, vel propter bonam habitudinem*. Alia vero quæ ad hoc non sunt necessaria, possunt dupliciter se habere. Quædam enim sunt impedimenta sanitatis, vel bonæ habitudinis: & his temperatus nullo modo utitur, hoc enim esset peccatum contra temperantiam. Quædam vero sunt quæ non sunt his impedimenta: & his moderate utitur pro loco, & tempore, & congruentia eorum quibus convivit. Et ideo ibidem Philosophus dicit, quod *etiam temperatus appetit talia delectabilia*, quæ scilicet non sunt necessaria ad sanitatem, vel ad bonam habitudinem, non impedimenta his existentia.

Ad tertium dicendum, quod, sicut dictum est (in corp.) temperantia respicit necessitatem quantum ad convenientiam vitæ: quæ quidem attenditur non solum secundum convenientiam corporis, sed etiam secundum convenientiam exteriorum rerum, puta divitiarum, & officiorum, & multo magis secundum convenientiam honestatis. Et ideo Philosophus ibi subdit (loc. sup. cit.) quod *in delectabilibus quibus temperatus utitur, non solum considerat ut non sint impeditiva sanitatis, & bonæ habitudinis corporalis, sed etiam ut non sint præter bonum*, id est contra honestatem, & quod non sint supra substantiam, id est supra facultatem divitiarum. Et Augustinus dicit in Lib. de moribus Ecclesiæ (cap. xxi. cir. ff.) quod *temperans respicit non solum necessitatem huius vitæ, sed etiam officiorum*.

## ARTICULUS VII. 689

*Utrum temperantia sit virtus cardinalis.*

1. 2. quæst. lxxi. & quæst. lxxvi. art. 1.  
& 4. corp. & III. dist. xxxii. quæst.  
11. art. 1. & vii. quæst. 1. art. 12. ad  
24. 25. & 26. & quæst. v. art. 1.

**A**D septimum sic proceditur. Videtur quod temperantia non sit virtus cardinalis. Bonum enim virtutis (a) moralis a ratione dependet. Sed temperantia est circa ea quæ magis distant a ratione, scilicet circa delectationes quæ sunt nobis, & brutis communes, ut dicitur in III. Ethicor. (cap. x. a med.) Ergo temperantia non videtur esse principalis virtus.

2. Præterea. Quanto aliquid est magis impetuosum, tanto difficilius videtur esse ad refrenandum. Sed ira, quam refrenat mansuetudo, videtur esse impetuosior quam concupiscentia, quam refrenat temperantia: dicitur enim Proverb. xxvii. 4. *Ira non habet misericordiam, nec erumpens furor; & impetum concitati spiritus ferre quis poterit?* Ergo mansuetudo est principalior virtus quam temperantia.

3. Præterea. Spes est principalior motus animæ quam desiderium, & concupiscentia, ut supra habitum est (1. 2. quæst. xxv. art. 4.) Sed humilitas refrenat præsumptionem immoderatæ spei. Ergo humilitas videtur esse principalior virtus quam temperantia, quæ refrenat concupiscentiam.

Sed contra est quod Gregorius in II. Moral. (cap. xxvi. a princ.) ponit temperantiam inter virtutes principales.

Respondeo dicendum, quod, sicut supra dictum est (quæst. cxxiii. art. 11. & 1. 2. quæst. lxi. art. 3.) virtus principalis, seu cardinalis dicitur quæ principalis laudatur ex aliquo eorum quæ communiter requiruntur ad rationem virtutis.

Moderatio autem, quæ in omni virtute requiritur, præcipue laudabilis est in delectationibus tactus, circa quas est temperantia: tum quia tales delectationes sunt magis nobis naturales; & ideo difficilius est ab eis abstinere, & concupiscentias earum refrenare: tum etiam quia earum obiecta magis sunt necessaria præsentī vitæ, ut ex dictis patet (art. 4. huius quæst.) Et ideo temperan-

tia

(a) Ita enim codicibus Nicolai & Al. cardinalis.



tia ponitur virtus principalis, seu cardinalis.

Ad primum ergo dicendum, quod tanto maior offenditur agentis virtus, quanto in ea quæ sunt magis distantia, potest suam operationem extendere. Et ideo ex hoc ipso offenditur maior virtus rationis quod potest etiam concupiscentias, & delectationes maxime distantes moderari. Unde hoc pertinet ad principalem temperantiam.

Ad secundum dicendum, quod impetus iræ calaufat ex quodam accidente, puta ex aliqua læsione contristante: & ideo cito transit, quamvis magnum impetum habeat. Sed impetus concupiscentiæ delectabilem tactus procedit ex causa naturali, unde est diuturnior, & communior: & ideo ad principaliorem virtutem pertinet ipsum refrenare.

Ad tertium dicendum, quod ea quorum est spes, sunt altiora his quorum est concupiscentia: & propter hoc spes ponitur passio principalis in irascibili. Sed ea quorum est concupiscentia, & delectatio tactus, vehementius movent appetitum, quia sunt magis naturalia: & ideo temperantia, quæ in his modum statuit, est virtus principalis.

#### ARTICULUS VIII. 690

*Utrum temperantia sit maxima virtutum.*

**A**D octavum sic proceditur. Videtur quod temperantia sit maxima virtutum. Dicit enim Ambrosius in I. de off. (cap. xlii. in princ.) quod *in temperantia maxime bonæ cures, decoris consideratio spectatur, & queritur*. Sed virtus laudabilis est, in quantum est honesta, & decora. Ergo temperantia est maxima virtutum.

2. Præterea. Maioris est virtutis operari id quod est difficilius. Sed difficilius est refrenare concupiscentias, & delectationes tactus, quam rectificare actiones exteriores: quorum primum pertinet ad temperantiam, secundum ad iustitiam. Ergo temperantia est maior virtus quam iustitia.

3. Præterea. Quanto aliquid est communius, tanto magis necessarium videtur esse, & melius. Sed fortitudo est circa pericula mortis, quæ rarius accidunt, quam delectabilia tactus, quæ quotidie occurrunt; & sic usus temperantiæ est communior quam fortitudinis. Ergo temperantia est nobilior virtus quam fortitudo.

Sed contra est quod Philosophus dicit in I. Rhetor. (cap. ix. a princ.) quod *maxime virtutes sunt quæ aliis maxime sunt utiles: & propter hoc fortes & iusti maxime honoramus*.

Respondeo dicendum, quod, sicut Philosophus dicit in I. Ethic. (cap. ii. cir. fin.) *bonum multitudinis divinius est quam bonum unius*: & ideo quanto aliqua virtus magis pertinet ad bonum multitudinis, tanto melior est. Iustitia autem, & fortitudo magis pertinent ad bonum multitudinis quam temperantia: quia iustitia consistit in communicationibus, quæ sunt ad alterum; fortitudo autem in periculis bellorum, quæ sustinentur pro salute communi; temperantia autem moderatur solum concupiscentias, & delectationes eorum quæ pertinent ad ipsum hominem. Unde manifestum est quod iustitia, & fortitudo sunt excellentiores virtutes quam temperantia: quibus prudentia, & virtutes theologice sunt potiores.

Ad primum ergo dicendum, quod honestas, & decor maxime attribuantur temperantiæ, non propter principalitatem proprii boni, sed propter turpitudinem contrarii mali, a quo retrahit, in quantum scilicet moderatur delectationes quæ sunt nobis, & brutis communes.

Ad secundum dicendum, quod cum virtus sit circa difficile, & bonum, dignitas virtutis magis attenditur secundum rationem boni, in quo excedit iustitia, quam secundum rationem difficultis, in quo excedit temperantia.

Ad tertium dicendum, quod illa communitas quæ aliquid pertinet ad multitudinem hominum, magis facit ad excellentiam bonitatis, quam illa quæ consideratur secundum quod aliquid frequenter occurrit: in quarum prima excedit fortitudo, in secunda temperantia. Unde simpliciter fortitudo est potior; licet quoad aliquid possit dici temperantia potior non solum fortitudine, sed etiam iustitia.

#### QUAESTIO CXLI.

*De vitiis quæ adversantur temperantiæ, in quatuor articulis divisa.*

**D**Einde considerandum est de vitiis oppositis temperantiæ: & circa hoc queruntur quatuor.

Primo, utrum insensibilitas sit peccatum.

Se-

Secundo, utrum intemperantia sit vitium puerile.

Tertio de comparatione intemperantiae ad timiditatem.

Quarto, utrum vitium intemperantiae sit maxime opprobriofum.

## ARTICULUS I. 691

*Utrum insensibilitas sit vitium.*

*II. Esic. lect. 8. & III. lect. 21.*

**A**D primum sic proceditur. Videtur quod insensibilitas non sit vitium. Dicuntur enim insensibiles qui deficiunt circa delectationes tactus. Sed in his penitus defecere videtur esse laudabile, & virtuosum: dicitur enim Dan. x. 2. *In diebus illis ego Daniel iugebam trium hebdomadarum tempus: panem desiderabilem non comedi; & caro, & vinum non introierunt in os meum; sed neque unguento unctus sum.* Ergo insensibilitas non est peccatum.

2. Præterea. *Bonum hominis est secundum rationem esse*, secundum Dionysium xv. cap. de div. Nom. (par. xv. lect. 22.) Sed abstinere ab omnibus delectabilibus tactus, maxime promouet hominem in bono rationis: dicitur enim Dan. x. 27. *quod pueris qui utebantur leguminibus, dedit Deus scientiam, & disciplinam in omni libro, & sapientia.* Ergo insensibilitas, quæ universaliter repellit huiusmodi delectationes, non est vitiosa.

3. Præterea. Illud per quod maxime receditur a peccato, non videtur esse vitiosum. Sed hoc est potissimum remedium abstinendi a peccato, quod aliquis fugiat delectationes; quod pertinet ad insensibilitatem: dicit enim Philosophus in II. Ethicor. (cap. ult. a med.) *quod abiciens delectationem minus peccamus.* Ergo insensibilitas non est aliquid vitiosum.

Sed contra. Nihil opponitur virtuti nisi vitium. Sed insensibilitas virtuti temperantiae opponitur, ut patet per Philosophum in II. Ethicor. (cap. vii.) & in III. (cap. xi.) Ergo insensibilitas est vitium.

Respondeo dicendum, quod omne illud quod contrariatur ordini naturali, est vitiosum. Natura autem delectationem apposuit operationibus necessariis ad vitam hominis. Et ideo naturalis ordo requirit ut homo intantum huiusmodi delectationibus utatur, quantum necessa-

rium est salutis humanæ vel quantum ad conservationem individui, vel quantum ad conservationem speciei. Si quis ergo intantum delectationem refugeret quod prætermitteret ea quæ sunt necessaria ad conservationem naturæ, peccaret, quasi ordini naturali repugnans. Et hoc pertinet ad vitium insensibilitatis.

Sciendum tamen, quod ab huiusmodi delectationibus consequentibus huiusmodi operationes quandoque laudabile, vel etiam necessarium est abstinere propter aliquem finem; sicut propter sanitatem corporalem aliqui abstinere a quibusdam delectationibus ciborum, potuum, & venereorum; & etiam propter alius officii executionem, sicut athletas, & milites necesse est a multis delectationibus abstinere, ut officium proprium exequantur. Et similiter poenitentes, ad recuperandam animæ sanitatem, abstinencia delectabilium quasi quadam dieta utuntur; & homines volentes contemplationi, & rebus divinis vacare, oportet quod se magis a carnalibus desideriis abstrahant. Nec aliquid prædictorum ad insensibilitatis vitium pertinet, quia sunt secundum rationem rectam.

Ad primum ergo dicendum, quod Daniel illa abstinencia a delectabilibus utebatur, non quasi propter se abhorrens delectationes ut secundum se malas, sed propter aliquem finem laudabilem, ut scilicet idoneum se ad altitudinem contemplationis redderet, abstinendo scilicet a corporalibus delectationibus. Unde & statim ibi subditur de revelatione facta.

Ad secundum dicendum, quod quia ratione homo uti non potest sine sensitivis potentiis, quæ indigent organo corporali, ut in I. habitum est (quest. lxxxiv. art. 7. & 8.) necesse est quod homo sustentet corpus, ad hoc quod ratione utatur. Sustentatio autem corporis fit per operationes delectabiles. Unde non potest esse bonum rationis in homine, si abstinere ab omnibus delectationibus. Secundum tamen quod homo in exequendo actum rationis plus vel minus indiget corporali virtute, secundum hoc plus vel minus necesse habet delectabilibus corporalibus uti. Et ideo homines qui hoc officium assumpserunt ut contemplationi vacent, & bonum spirituale quasi quadam spiritali propagatione in alios transmittant, a multis delectabilibus laudabiliter abstinere, a quibus illi quibus ex officio competit operibus cor-

poralibus, & generationi carnali vacare, laudabiliter non abstinere.

Ad tertium dicendum, quod delectatio fugienda est ad vitandum peccatum, non totaliter, sed ut ultra non quærat quam necessitas requirat.

## ARTICULUS II. 692

*Utrum intemperantia sit puerile peccatum.*

III. Ethic. lē. ult.

**A**D secundum sic proceditur. Videtur quod intemperantia non sit puerile peccatum. Quia super illud Matth. xvi. 11. *Nisi conversi fueritis, & efficiamini sicut parvuli* &c. dicit Hieronymus (sup. illud, *Quicumque humiliteris se*) quod parvulus non perleverat in iracundia, lætus non meminit, videns pulchram, mulierem non delectatur: "quod contrariatur intemperantiae. Ergo intemperantia non est puerile peccatum.

2. Præterea. Pueri non habent nisi concupiscentias naturales. Sed circa naturales concupiscentias parum aliqui peccant per intemperantiam, ut Philosophus dicit in III. Ethic. (cap. xi.) Ergo intemperantia non est peccatum puerile.

3. Præterea. Pueri sunt fovendi, & nutriendi. Sed concupiscentia, & delectatio, circa quæ est intemperantia, est semper diminuenda, & extirpanda, secundum illud ad Coloss. 111. 5. *Mortificate membra vestra (a) super terram, quæ sunt concupiscentia* &c. Ergo intemperantia non est puerile peccatum.

Sed Contra est quod Philosophus dicit III. Ethicor. (cap. ult. in med.) quod nomen intemperantiæ referimus ad puerilia peccata.

Respondeo dicendum, quod aliquid dicitur esse puerile dupliciter. Uno modo quia convenit pueris: & sic Philosophus non intendit dicere, quod peccatum intemperantiæ sit puerile. Alio modo secundum quamdam similitudinem: & hoc modo peccata intemperantiæ puerilia dicuntur. Peccatum enim intemperantiæ est peccatum superflux concupiscentiæ, quæ assimilatur puero quoad tria.

Primo quidem quantum ad id quod uterque appetit. Sicut enim puer, ita & concupiscentia appetit aliquid turpe. Cuius ratio est, quia pulchrum in rebus humanis attenditur, prout aliquid est ordinatum secundum rationem. Unde

Tullius dicit in I. de offic. (in tit. *Duplex decorum, generale, & speciale*) quod *pulchrum est quod consentaneum est hominis excellentiæ in eo in quo natura eius a reliquis animalibus differt*. Puer autem non attendit ad ordinem rationis; & similiter concupiscentia non audit rationem, ut dicitur in VII. Eth. (cap. vi. a princ.) Secundo conveniunt quantum ad eventum. Puer enim, si suæ voluntati dimittitur, crescit in propria voluntate: unde Eccli. xxx. 8. dicitur: *Equus indomitus evadit durus, & filius remissus evadit præceps*. Ita etiam & concupiscentia, si ei latishat, maius robur accipit. Unde Augustinus dicit in VIII. Confess. (cap. v.) *Dum servitur libidini, facta est consuetudo; & dum consuetudini non resistitur, facta est necessitas*. Tercio quantum ad remedium quod utrique præbatur. Puer enim emendatur per hoc quod coercetur: unde dicitur Proverb. xxiii. 13. *Noli subtrahere a puero disciplinam.... Tu virga percuties eum, & animam eius de inferno liberabis*. Et similiter dum concupiscentiæ resistitur, reducit ad debitum honestatis modum. Et hoc est quod Augustinus dicit in VI. Musicæ (cap. xi. cir. fin.) quod *mente in spiritualia superbia, atque ibi fixa, & manente, consuetudinis, scilicet carnalis concupiscentiæ, impetus frangitur, & paulatim repressus extinguitur: maior enim erat, cum sequeretur; non omnino nullus, sed certe minor, cum refrenamus*. Et ideo Philosophus dicit in III. Ethic. (cap. ult. in fin.) quod *quemadmodum puerum oportet secundum præceptum paedagogi vivere, sic & (b) concupiscentiæ consonare rationi*.

Ad primum ergo dicendum, quod ratio illa procedit secundum illum modum quo puerile dicitur id quod in pueris invenitur. Sic autem non dicitur peccatum intemperantiæ puerile, sed secundum similitudinem, ut dictum est (in cor. art.)

Ad secundum dicendum, quod concupiscentia aliqua potest dici naturalis dupliciter. Uno modo secundum genus suum; & sic temperantia, & intemperantia sunt circa concupiscentias naturales: sunt enim circa concupiscentias ciborum, & venererum, quæ ordinantur ad conservationem naturæ. Alio modo potest dici concupiscentia naturalis quantum ad speciem eius quod natura ad sui conservationem requirit; & sic non

(a) *Vulgata quæ sunt super terram, fornicationem, immunditiam, libidinem, concupiscentiam malam* &c. (b) *ita msi, & dicit passim. Edit, Patav, cum Garcia concupiscentiam*.

non multum contingit peccare circa naturales concupiscentias: natura enim non requirit nisi id per quod subvenitur necessitati naturæ, in cuius desiderio non contingit esse peccatum, nisi solum secundum quantitatis excessum. Et secundum hoc solum peccatur circa naturalem concupiscentiam, ut Philosophus dicit in III. Ethic. (cap. xi.) Alia vero circa quæ plurimum peccatur, sunt quædam concupiscentiæ incitamenta, quæ hominum curiositas adinvenit; sicut curiose preparati cibi, & mulieres ornatæ. Et quamvis ista non multum requirant pueri, nihilominus tamen intemperantia dicitur puerile peccatum, ratione iam dicta (in cor. art.).

Ad tertium dicendum, quod id quod ad naturam pertinet, in pueris est augmentandum, & fovendum; quod autem pertinet ad defectum rationis in eis, non est fovendum, sed emendandum, ut dictum est (in cor. art.).

### ARTICULUS III. 693

*Utrum timiditas sit maius vitium quam intemperantia.*

#### II. Eth. lect. 2..

**A**D tertium sic proceditur. Videtur quod timiditas sit maius vitium quam intemperantia. Ex hoc enim aliud quod vitium vituperatur quod opponitur bono virtutis. Sed timiditas opponitur fortitudini, quæ est nobilior virtus quam temperantia, cui opponitur intemperantia, ut ex supradictis patet (art. præc. & quæst. præc. art. 8.) Ergo timiditas est maius vitium quam intemperantia..

2. Præterea. Quanto aliquis deficit in eo quod difficilius vincitur, tanto minus vituperatur: unde Philosophus dicit in VII. Ethic. (cap. vii. a. med.) quod si quis a fortibus, & superexcellens delectationibus vincitur, vel tristitia non est admirabile, sed condonabile. Sed difficilius videtur vincere delectationes quam alias passiones: unde in II. Eth. (cap. iii. ad fi.) dicitur quod difficilius est contra voluptatem pugnare quam contra iram, quæ videtur esse fortior quam timor. Ergo intemperantia, quæ vincitur a delectatione, minus peccatum est quam timiditas, quæ vincitur a timore.

3. Præterea. De ratione peccati est quod sit voluntarium. Sed timiditas est

magis voluntaria quam intemperantia: nullus enim concupiscit intemperatus esse; aliqui autem concupiscunt fugere periculum mortis; quod pertinet ad timiditatem. Ergo timiditas est peccatum gravius quam intemperantia.

Sed contra est quod Philosophus dicit in III. Ethic. (cap. xxi. in princ.) quod *intemperantia magis assimilatur voluntario quam timiditas*. Ergo plus habet de ratione peccati.

Respondeo dicendum, quod unum vitium potest alteri comparari dupliciter: uno modo ex parte ipsius materiæ, vel obiecti; alio modo ex parte ipsius hominis peccantis: & utroque modo intemperantia est gravius vitium quam timiditas.

Primo namque ex parte materiæ. Nam timiditas refugit pericula mortis, ad quæ vitanda inducit maxima necessitas conservandæ vitæ. Intemperantia autem est circa delectationes, quarum appetitus non est adeo necessarius ad vitæ conservationem, quia, ut dictum est (art. præc. ad 2.) intemperantia magis est circa quasdam (a) appositas delectationes, seu concupiscentias, quam circa concupiscentias, seu delectationes naturales. Quanto autem illud quod commovet ad peccandum, videtur esse magis necessarium, tanto peccatum levius est. Et ideo intemperantia est gravius vitium quam timiditas ex parte obiecti, sive materiæ moventis.

Similiter etiam ex parte ipsius hominis peccantis; & hoc triplici ratione. Primo quidem quia quanto ille qui peccat, magis est compos suæ mentis, tanto gravius peccat: unde alienatis non imputantur peccata. Timores autem, & tristitiæ graves, & maxime in periculis mortis, stupefaciunt mentem hominis: quod non facit delectatio, quæ movet ad intemperantiam. Secundo quia quanto aliquod peccatum est magis voluntarium, tanto est gravius. Intemperantia autem plus habet de voluntario quam timiditas; & hoc duplici ratione. Uno modo quia ea quæ per timorem fiunt, principium habent ab exteriori impellente: unde non sunt simpliciter voluntaria, sed mixta, ut dicitur in III. Ethic. (cap. i.) Ea autem quæ per delectationem fiunt, sunt simpliciter voluntaria. Alio modo quia ea quæ sunt intemperati, sunt magis voluntaria in particulari, minus autem voluntaria in u-

ni-

(a) Ita cum post, edit, melius nota. Al. oppositas.

niversalis. Nullus enim vellet intemperatus esse; allicitur tamen homo a singularibus delectationibus, quæ intemperatum faciunt hominem. Propter quod ad vitandum intemperantiam maximum remedium est ut non immoretur homo circa singularium considerationem. Sed in his quæ pertinent ad timiditatem, est e converso: nam singularia quæ imminet, sunt minus voluntaria, ut abicere clypeum, & alia huiusmodi; sed ipsum commune est magis voluntarium, puta fugiendo salvari. Hoc autem est simpliciter magis voluntarium quod est magis voluntarium in singularibus, in quibus est actus. Et ideo intemperantia, cum sit simpliciter magis voluntarium quam timiditas, est maius vitium. Tertio quia contra intemperantiam potest magis de facili remedium adhiberi quam contra timiditatem: eo quod delectationes ciborum, & venereorum, circa quas est intemperantia, per totam vitam occurrunt; & sine periculo potest homo circa ea exercitari, ad hoc quod sit temperatus: sed pericula mortis rarius occurrunt, & periculosius in his homo exercitatur ad timiditatem fugiendam. Et ideo intemperantia est simpliciter maius peccatum quam timiditas.

Ad primum ergo dicendum, quod excellentia fortitudinis supra temperantiam potest considerari dupliciter. Uno modo ex parte finis, quod pertinet ad rationem boni, quia scilicet fortitudo magis ordinatur ad bonum commune quam temperantia. Ex hac etiam parte timiditas habet quandam excellentiam supra intemperantiam, inquantum scilicet per timiditatem aliqui desunt a defensione boni communis. Alio modo ex parte difficultatis, inquantum scilicet difficilius est subire pericula mortis quam abstinere a quibusdam delectabilibus: & quantum ad hoc non oportet quod timiditas præcellat intemperantiam. Sicut enim maioris virtutis est non vinci a fortiori; ita etiam e contrario minoris vitii est a fortiori vinci, & maioris vitii a debiliiori superari.

Ad secundum dicendum, quod amor conservationis vitæ, propter quam vitantur pericula mortis, est multo magis connaturalis quam quæcumque delectationes ciborum, vel venereorum, quæ ad conservationem vitæ ordinantur. Et ideo difficilius est vincere timorem periculorum mortis quam concupiscentiam delectationum, quæ est in cibis, & ve-

neris: cui tamen difficilius est resistere quam iræ, tristitiæ, & timori quorundam aliorum malorum.

Ad tertium dicendum, quod in timiditate consideratur magis voluntarium in universalis, minus tamen in particulari: & ideo in ea est magis voluntarium secundum quid, & non simpliciter.

## ARTICULUS IV. 694

*Utrum peccatum intemperantie sit maxime exprobrabile.*

*Inf. quæst. cxi. art. 1. ad 2. & quæst. cxi. art. 4. ad 2. & 3.*

**A**D quartum sic proceditur. Videtur quod peccatum intemperantie non sit maxime exprobrabile. Sicut enim honor debetur virtuti, ita exprobratio debetur peccato. Sed quædam peccata sunt graviora quam intemperantia, sicut homicidium, blasphemia, & alia huiusmodi. Ergo peccatum intemperantie non est maxime exprobrabile.

2. Præterea. Peccata quæ sunt magis communia, videntur minus esse exprobrabilia, eo quod de his homines minus verecundantur. Sed peccata intemperantie sunt maxime communia, quia sunt circa ea quæ communiter in ulum humanæ vitæ veniunt, in quibus etiam plurimi peccant. Ergo peccata intemperantie non videntur esse maxime exprobrabilia.

3. Præterea. Philosophus dicit in VII. Ethic. (cap. rv. & seq.) quod *temperantia, & intemperantia sunt circa concupiscentias, & delectationes humanas*. Sunt autem quædam concupiscentiæ, & delectationes turpiores concupiscentiis, & delectationibus humanis, quæ dicuntur bestiales, & ægritudinales, ut in eodem Lib. (cap. v.) Philosophus dicit. Ergo intemperantia non est maxime exprobrabilis.

4. Sed contra est quod Philosophus dicit in III. Ethic. (cap. xii. cir. princ.) quod *intemperantia inter alia vitia videtur iuste exprobrabilis esse*.

Respondetur dicendum, quod exprobratio opponi videtur honori, & gloriæ. Honor autem excellentiæ debetur, ut supra habitum est (quæst. cxi. art. 1. & 2.). Gloria autem claritatem importat. Est ergo intemperantia maxime exprobrabilis propter duo. Primo quidem quia maxime repugnat excellentiæ hominis: est enim circa delectationes communes nobis, & bru-

& brutis, ut supra habitum est ( quaest. cxli. art. 2. ad 3. ) Unde in Plal. xlviii. 21. dicitur: *Homo, cum in bonore esset, non intellexit: comparatus est iumentis insipientibus, & similis factus est illis*. Secundo quia maxime repugnat eius claritati, vel pulchritudini, inquantum scilicet in delectationibus circa quas est intemperantia, minus apparet de lumine rationis, ex qua est tota claritas, & pulchritudo virtutis: unde & huiusmodi delectationes dicuntur maxime serviles.

Ad primum ergo dicendum, quod, sicut Gregorius dicit ( implic. Lib. XXXIII. Moral. cap. xi. cir. med. ) *vitia carnalia, quae sub intemperantia continentur, est sunt minoris culpae, sunt tamen maioris infamiae*. Nam magnitudo culpae respicit deordinationem a fine; infamia autem respicit turpitudinem, quae maxime consideratur secundum indecentiam peccantis.

Ad secundum dicendum, quod consuetudo peccati diminuit turpitudinem, & infamiam peccati secundum opinionem hominum, non autem secundum naturam ipsorum vitiatorum.

Ad tertium dicendum, quod cum dicitur intemperantia esse maxime exprobrabilis, est intelligendum inter vitia humana, quae scilicet attenduntur secundum passionem humanae naturae aliquantulum conformes. Sed illa vitia quae excedunt modum humanae naturae, sunt magis exprobrabilia. Et tamen etiam illa videntur reduci ad genus intemperantiae secundum quemdam excessum; sicut si aliquis delectaretur in comestione carniuum humanarum, aut in coitu bestiarum, aut malsulorum.

## QUAESTIO CXLIH.

*De partibus temperantiae in generali.*

**D**Einde considerandum est de partibus temperantiae: & primo de ipsis partibus in generali; secundo de singulis earum in speciali.

## ARTICULUS UNICUS. 695

*Utrum Tullius convenienter assignet partes temperantiae, continentiam, clementiam, & modestiam.*

*Inf. quaest. cxlv. art. 4. & quaest. clvii. art. 3. & quaest. clx. art. 1. & II. dist. xlv. quaest. 11. art. 1. & III. dist. xxxiii. quaest. 111. art. 2.*

**A**D primum sic proceditur. Videtur quod Tullius in sua Rhetorica (Lib. II, de invent. aliquant. ante fi.) inconvenienter assignet partes temperantiae, quas dicit esse *continentiam, clementiam, & modestiam*. Continentia enim contra virtutem dividitur in IV. Ethic. ( cap. ult. ad fi. & Lib. VII. in princ. ) Sed temperantia continetur sub virtute. Ergo continentia non est pars temperantiae.

2. Præterea. Clementia videtur esse mitigativa odii, vel irae. Temperantia autem non est circa huiusmodi, sed circa delectationes tactus, ut dictum est ( quaest. cxli. art. 4. ) Ergo clementia non est pars temperantiae.

3. Præterea. Modestia consistit in exterioribus actibus: unde & Apollolus dicit ad Philip. iv. 5. *Modestia vestra nota sit omnibus hominibus*. Sed actus exteriores sunt materia iustitiae, ut supra habitum est ( quaest. lvi. art. 2. ) Ergo modestia magis est pars iustitiae quam temperantiae.

4. Præterea. Macrobius super somnium Scipionis ( Lib. I. cap. viii. cir. med. ) ponit multo plures temperantiae partes: dicit enim, quod temperantiam sequitur *modestia, verecundia, abstinencia, castitas, honestas, moderatio, parcitas, sobrietas, pudicitia*. Andronicus etiam dicit, quod familiares temperantiae sunt *austeritas, continentia, humilitas, simplicitas, ornatus, bona ordinatio, per se sufficientia*. Videtur ergo insufficienter Tullius enumerasse temperantiae partes.

Respondeo dicendum, quod, sicut supra dictum est ( quaest. xlviii. & cxxviii. ) alicuius virtutis cardinalis triplices partes esse possunt, scilicet integrales, subiectivae, & potentiales. Ex dicuntur partes integrales alicuius virtutis conditiones quas necesse est concurrere ad virtutem: & secundum hoc sunt duae partes integrales temperantiae; scilicet *verecundia*, per quam aliquis refugit turpitudinem temperantiae contrariam; &

*honestas*, per quam scilicet aliquis amat pulchritudinem temperantiae. Nam sicut ex dictis patet ( quæst. cxi. art. 2. ad 3.) præcipue temperantia inter virtutes vendicat sibi quandam decorem, & vitia intemperantiae maxime turpitudinem habent.

Partes autem subiectivæ alicuius virtutis dicuntur species eius. Oportet autem diversificare species virtutum secundum diversitatem materie, vel obiecti. Est autem temperantia circa delectationes tactus, quæ dividuntur in duo genera. Nam quædam ordinantur ad nutrimentum: & in his quantum ad cibum est *abstinentia*, quantum autem ad potum proprie *sobrietas*. Quædam vero ordinantur ad vim generativam: & in his quantum ad delectationem principalem ipsius coitus est *castitas*; quantum autem ad delectationes circumstantes, puta quæ sunt in oculis, tactibus, & amplexibus, attenditur *pudicitia*.

Partes autem potentiales alicuius virtutis principalis dicuntur virtutes secundariæ, quæ modum quem principalis virtus observat circa aliquam principalem materiam, eundem observant in quibusdam aliis materiis, in quibus non est ita difficile. Pertinet autem ad temperantiam moderari delectationes tactus, quas difficillimum est moderari. Unde quæcumque virtus moderationem quamdam operatur in aliqua materia, & refrenationem appetitus in aliquid tendentis, poni potest pars temperantiae, sicut virtus ei adiuncta.

Quod quidem contingit tripliciter: uno modo in interioribus motibus animi; alio modo in exterioribus motibus, & actibus corporis; tertio modo in exterioribus rebus. Præter motum autem concupiscentiæ, quem moderatur, & refrenat temperantia, tres motus inveniuntur in anima in aliquid tendentes. Primum quidem est motus voluntatis commotæ ex impetu passionis: & hunc motum refrenat *continentia*, ex qua fit ut licet homo immoderatas concupiscentias patiatur, voluntas tamen non vincatur. Alius autem motus interior in aliquid tendens est motus spei, & audaciæ, quæ ipsam consequitur: & hunc motum moderatur, sive refrenat *humilitas*. Tertius autem motus est iræ tendens in vindictam, quem refrenat *mansuetudo*, sive *clementia*. Circa motus autem, & actus corporales moderationem, & refrenationem facit *modestia*, quam Androni-

*J. Th. Oper. Tem. XXIII.*

cus in tria dividit. Ad quorum primum pertinet discernere, quid sit faciendum, & quid dimittendum, & quid quo ordine sit agendum, & in hoc firmiter persistere: & quantum ad hoc ponit *bonam ordinationem*. Aliud autem est quod homo in eo quod agit, decentiam observet: & quantum ad hoc ponitur *ornatus*. Tertium autem est in colloquiis amicorum, vel quibuscumque aliis: & quantum ad hoc ponitur *austeritas*. Circa exteriora vero duplex moderatio est adhibenda. Primo quidem ut superflua non requirantur: & quantum ad hoc ponitur a Macrobio *parcitas*, & ab Andronico *per se sufficientia*. Secundo vero ut homo non nimis exquisita requirat: & quantum ad hoc ponit Macrobius *moderationem*, Andronicus vero *simplicitatem*.

Ad primum ergo dicendum, quod continentia differt quidem a virtute, sicut imperfectum a perfecto, ut infra dicitur ( quæst. clv. art. 1. ) Et hoc modo dividitur virtuti. Convenit tamen cum temperantia & in materia, quia est circa delectationes tactus, & in modo, quia in quadam refrenatione consistit. Et ideo convenienter ponitur pars temperantiae.

Ad secundum dicendum, quod clementia, sive mansuetudo non ponitur pars temperantiae propter convenientiam materie, sed quia convenit cum ea in modo refrenandi, & moderandi, ut dictum est ( in corp. art. )

Ad tertium dicendum, quod circa exteriores actus iustitia attendit id quod est debitum alteri. Hoc autem modestia non attendit, sed solum moderationem quandam. Et ideo non ponitur pars iustitiæ, sed temperantiae.

Ad quartum dicendum, quod Tuilius sub modestia comprehendit omnia illa quæ pertinent ad moderationem corporaliū motuum, & exteriorum rerum, & etiam moderationem spei, quam diximus ( in corp. art. ) ad humilitatem pertinere.

#### QUAESTIO CXLIV.

*De partibus temperantiae in speciali, & primo de verecundia, in quatuor articulos divisa.*

**D**Einde considerandum est de partibus temperantiae in speciali: & primo de

de partibus quasi integralibus, quæ sunt verecundia, & honestas.

Circa verecundiam autem quaeruntur quatuor.

Primo, utrum verecundia sit virtus.

Secundo, de quibus sit verecundia.

Tertio, a quibus homo verecundetur.

Quarto, quorum sit verecundari.

## ARTICULUS I. 696

*Utrum verecundia sit virtus.*

III. *dist. xxix. quæst. 1. art. 3. quæst. 2. ad 2. & IV. dist. xiv. quæst. 1. art. 1. quæst. 2. ad 5. & ver. quæst. xxvi. art. 6. ad 15.*

**A**D primum sic proceditur. Videtur quod verecundia sit virtus. Esse enim in medio secundum determinationem rationis est proprium virtutis, ut patet ex definitione virtutis, quæ ponitur in II. Ethic. (cap. vi.) Sed verecundia consistit in tali medio, ut patet per Philosophum ibidem (cap. vii. a med.) Ergo verecundia est virtus.

2. Præterea. Omne laudabile vel est virtus, vel ad virtutem pertinet. Sed verecundia est quoddam laudabile. Non est autem pars alicuius virtutis: non enim est pars prudentiæ, quia non est in ratione, sed in appetitu; neque etiam est pars iustitiæ, quia verecundia passionem quandam importat, iustitia autem non est circa passiones: similiter etiam non est pars fortitudinis, quia ad fortitudinem pertinet perferre, & aggredi, ad verecundiam autem refugere aliquid; neque etiam est pars temperantiæ, quia temperantia est circa concupiscentias, verecundia autem est timor quidam, ut patet per Philosophum in IV. Ethicor. (cap. ult.) & per Damascenum in II. Lib. (orth. fid. cap. xv.) Relinquitur ergo quod verecundia sit virtus.

3. Præterea. Honestum cum virtute convertitur, ut patet per Tullium in I. de offi. (in tit. de temperant. & seq.) Sed verecundia est quoddam parhonestatis: dicit enim Ambrosius in I. de offic. (cap. xliii. a princ.) quod *verecundia socia, ac familiaris est mentis placiditati, proterviam fugiunt, ab omni luxu aliena, sobrietatem diligit, & honestatem fovet, & decorum illud requirit.* Ergo verecundia est virtus.

4. Præterea. Omne vitium opponitur alicui virtuti. Sed quædam vitia opponuntur verecundiæ, scilicet inverecundia,

& inordinatus stupor. Ergo verecundia est virtus.

5. Præterea. Ex actibus similes habitus generantur, ut dicitur in II. Ethic. (cap. 1. & 11.) Sed verecundia importat actum laudabilem. Ergo ex multis talibus actibus causatur habitus. Sed habitus laudabilium operum est virtus, ut patet per Philosophum in I. Ethicor. (cap. vii. a med.) Ergo verecundia est virtus.

Sed contra est quod Philosophus dicit in II. Ethic. (cap. vii.) & in IV. (cap. ult.) verecundiam non esse virtutem.

Respondeo dicendum, quod virtus dupliciter accipitur, proprie scilicet, & communiter. Proprie quidem virtus perfectio quædam est, ut dicitur in VII. Physic. (tex. 17. & 18.) Et ideo omne illud quod repugnat perfectioni, etiam si sit bonum, deficit a ratione virtutis. Verecundia autem repugnat perfectioni: est enim timor alicuius turpis, quod scilicet est exprobrabile. Unde Damascenus dicit (loc. cit. in arg. 2.) quod *verecundia est timor de turpi actu.* Sicut autem spes est de bono possibili, & arduo; ita etiam timor est de malo possibili, & arduo, ut supra habitum est (1. 2. quæst. xl. art. 1. & quæst. xli. art. 2. & quæst. xlii. art. 3.) cum de passionibus ageretur. Ille autem qui est perfectus secundum habitum virtutis, non apprehendit aliquid exprobrabile, & turpe ad faciendum, ut possibile, & arduum, id est difficile ad vitandum; neque etiam actu facit aliquid turpe, unde opprobrium timeat. Unde verecundia, proprie loquendo, non est virtus: deficit enim a perfectione virtutis.

Communiter autem dicitur virtus omne quod est bonum, & laudabile in humanis actibus, vel passionibus: & secundum hoc quandoque verecundia dicitur virtus, cum sit quædam laudabilis passio.

Ad primum ergo dicendum, quod esse in medio non sufficit ad rationem virtutis, quamvis sit una particula posita in virtutis definitione; sed requiritur ulterius quod sit habitus electivus, id est ex electione operans. Verecundia autem non nominat habitum, sed passionem: neque motus eius est ex electione, sed ex impetu quoddam passionis. Unde deficit a ratione virtutis.

Ad secundum dicendum, quod, sicut dictum est (in cor. art.) verecundia est timor



timor turpitudinis, & exprobrationis. Dictum est autem supra (quaest. clix. art. 4.) quod vitium intemperantiae est turpissimum, & maxime exprobrabile. Et ideo verecundia principaliter pertinet ad temperantiam quam ad aliquam aliam virtutem ratione motivi, quod est turpe, non autem secundum speciem passionis, quae est timor. Secundum tamen quod vitia aliis virtutibus opposita sunt turpia, & exprobrabilia, potest etiam verecundia ad alias virtutes pertinere.

Ad tertium dicendum, quod verecundia fovet honestatem, removendo ea quae sunt honestati contraria, non ita quod pertingat ad perfectam rationem honestatis.

Ad quartum dicendum, quod quilibet defectus causat vitium; non autem quodlibet bonum sufficit ad rationem virtutis. Et ideo non oportet quod omne illud cui directe opponitur vitium, sit virtus; quamvis omne vitium opponatur alicui virtuti secundum suam originem. Et sic inverecundia, inquantum provenit ex nimio amore turpitudinum, opponitur temperantiae.

Ad quintum dicendum, quod ex multis virtutibus verecundia causatur habitus virtutis acquisite, per quam aliquis turpiter vitet, de quibus est verecundia, non autem ut aliquis ulterius verecundetur; sed ex illo habitu virtutis acquisite sic se habet aliquis quod magis verecundaretur, si materia verecundiae adesset.

## ARTICULUS II. 697

*Utrum verecundia sit de turpi actu.*

*I. dist. xiv. quaest. 1. art. 5. quaest. 11 ad 5. & ver. quaest. xxvi. art. 4. ad 7. art. 6. ad 15. & Ps. xliiii. co. 6. & IV. Eth. lect. 17.*

**A**D secundum sic proceditur. Videtur quod verecundia non sit de turpi actu. Dicit enim Philosophus in IV. Eth. (cap. ult. in princ.) quod *verecundia est timor ingloriationis*. Sed quandoque illi qui nil turpe operantur, ingloriationem sustinent, secundum illud Psal. lxxiii. 8. *Propter te sustinui opprobrium, operui confusio faciem meam*. Ergo verecundia non est proprietas de turpi actu.

2. Præterea. Illa solum videntur esse turpia quae habent rationem peccati. Sed de quibusdam homo verecundatur quae non sunt peccata, puta si aliquis exerceat servilia opera. Ergo videtur quod

verecundia non sit proprie de turpi actu.

3. Præterea. Operationes virtutum non sunt turpes, sed pulcherrimae, ut dicitur in I. Ethic. (cap. vii. & viii. a med.) Sed quandoque aliqui verecundantur aliqua opera virtutis facere, ut dicitur Luc. ix. 26. *Qui erubuerit me, & meos sermones, hunc filius hominis erubescet &c.* Ergo verecundia non est de turpi actu.

4. Præterea. Si verecundia proprie esset de turpi actu, deberet quod de magis turpibus homo magis verecundaretur. Sed quandoque homo plus verecundatur de his quae sunt minus peccata; cum tamen de gravissimis quibusdam peccatis glorietur, secundum illud Psal. li. 3. *Quid gloriaris in malitia?* Ergo verecundia non proprie est de turpi actu.

Sed contra est quod Damascenus dicit in II. Lib. (orth. Fid. cap. xv.) & Gregorius Nissenus, (vel Nemef. Lib. de nat. hom. cap. xx.) quod *verecundia est timor in turpi actu, vel in turpi perpetrato*.

Respondetur dicendum, quod, sicut supra dictum est (1. 2. quaest. xli. art. 2. & quaest. xlii. art. 3.) cum de passione timoris ageretur, timor proprie est de malo arduo, quod scilicet difficile vitatur. Est autem duplex turpitudinis. Una quidem vitiosa, quae scilicet consistit in deformitate actus voluntarii: & hæc, proprie loquendo, non habet rationem mali ardui: quod enim in sola voluntate consistit, non videtur esse arduum, & elevatum super hominis potestatem; & propter hoc non apprehenditur sub ratione terribilis: & propter hoc Philosophus dicit in II. Rhetor. (cap. v. cir. med.) quod horum malorum non est timor.

Alia autem est turpitudine quasi poenalis; quae quidem consistit in vituperatione alicuius, sicut quaedam claritas gloriæ consistit in honoratione alicuius. Et quia huiusmodi vituperium habet rationem mali ardui, sicut honor habet rationem boni ardui, verecundia, quae est timor turpitudinis, primo, & principaliter respicit vituperium, seu opprobrium. Et quia vituperium proprie debetur vitio, sicut honor virtuti, ideo & ex consequenti verecundia respicit turpitudinem vitiosam. Unde, sicut Philosophus dicit in II. Rhet. (cap. vi. ante med.) *minus homo verecundatur de defectibus qui non ex eius culpa proveniunt*.

Respicit autem verecundia culpam dupliciter: uno modo, ut aliquis desinat vitiosa agere propter timorem vituperii; alio modo, ut homo in turpibus quæ agit, vitet conspectus publicos propter timorem vituperii: quorum primum, secundum Gregorium Nissenum, (loc. cit. in arg. *Sed cont.*) pertinet ad erubescen-  
tiam; secundum ad verecundiam. Unde ipse dicit, quod *qui verecundatur, occul-  
tat se in his quæ agit; qui vero erubescit,  
timet incidere in ingloriationem.*

Ad primum ergo dicendum, quod verecundia respicit proprie ingloriationem, secundum quod debetur culpæ, quæ est defectus voluntarius. Unde Philosophus dicit in II. Rhet. (cap. vi. ante med.) quod *omnia illa homo magis verecundatur quorum ipse est causa.* Opprobria autem quæ inferuntur alicui propter virtutem, virtuosus quidem contemnit, quia indigne sibi irrogantur; sicut de magnanimis Philosophus dicit in IV. Eth. (cap. xii. a med.) & de Apostolis dicitur Act. v. 41. quod *ibant Apostoli gaudentes a conspectu concilii, quoniam digni habiti sunt pro nomine Iesu contumeliam pati.* Ex imperfectione autem virtutis contingit quod aliquis verecundetur de opprobriis quæ sibi inferuntur propter virtutem: quia quanto est aliquis magis virtuosus, tanto magis contemnit exteriora bona, vel mala. Unde dicitur Isa. li. 7. (a) *Noli timere opprobrium hominum.*

Ad secundum dicendum, quod sicut honor, ut supra habitum est (quæst. lxxiii. art. 3.) quamvis non debeat vere nisi soli virtuti, respicit tamen quandam excellentiam; ita etiam vituperium, quamvis debeat proprie soli culpæ, respicit tamen ad minus secundum opinionem hominum quemcumque defectum. Et ideo de paupertate, & ignobilitate, & servitute, & aliis huiusmodi aliquis verecundatur.

Ad tertium dicendum, quod de operibus virtuosus in se consideratis non est verecundia. Contingit tamen per accidens quod aliquis de his verecundetur, vel in quantum habentur ut vitiosa, secundum hominum opinionem; vel in quantum homo refugit in operibus virtutis notam de præsumptione, aut etiam de simulatione.

Ad quartum dicendum, quod quandoque contingit aliqua graviora peccata minus esse verecundabilia: vel quia minus habent de ratione, turpitudinis, sic-

ut peccata spiritualia quam carnalia; vel quia in quodam excessu temporalis boni se habent, sicut magis verecundatur homo de timiditate quam de audacia, & de furto quam de rapina, propter quandam speciem potestatis. Et simile est in aliis.

## ARTICULUS III. 693

*Utrum homo magis verecundetur a personis magis coniunctis.*

**A**D tertium sic proceditur. Videtur quod homo non magis verecundetur a personis magis coniunctis. Dicitur enim in II. Rhet. (cap. vi.) quod *homines magis erubescunt ab illis a quibus volunt in admiratione haberi.* Sed hoc maxime appetit homo a melioribus, qui quandoque non sunt magis coniuncti. Ergo homo non magis erubescit de magis coniunctis.

2. Præterea. Illi videntur esse magis coniuncti qui sunt similium operum. Sed homo non erubescit de suo peccato ab his quos scit simili peccato subiicere: quia, sicut dicitur in II. Rhetor. (cap. vi. cir. med.) *quæ quis ipse facit, hæc proximis non videtur.* Ergo non magis verecundatur a maxime coniunctis.

3. Præterea. Philosophus dicit in II. Rhet. (ibid.) quod *homo magis verecundatur ab his qui propalant multis quod sciunt, sicut sunt irrisores, & fabulorum fictores.* Sed illi qui sunt magis coniuncti, non solent vitia propalare. Ergo ab eis non maxime est verecundandum.

4. Præterea. Philosophus ibidem dicit, quod *homines maxime verecundantur ab eis inter quos in nullo defecerunt, & ab eis a quibus primo aliquid possulant, & quorum nunc primo volunt esse amici.* Huiusmodi autem sunt minus coniuncti. Ergo non magis verecundatur homo de magis coniunctis.

Sed contra est quod dicitur in II. Rhet. (ibid.) quod *eos qui semper ad-  
derunt, homines magis erubescunt.*

Respondeo dicendum, quod cum vituperium honori opponatur, sicut honor importat testimonium quoddam de excellentia alicuius, & præcipue quæ est secundum virtutem; ita etiam opprobrium, cuius timor est verecundia, importat testimonium de defectu alicuius, & præcipue secundum aliquam culpam. Et ideo quanto testimonium alicuius re-

(a) *Pulgara Nolite.*

putatur maioris ponderis, tanto ab eo aliquis magis verecundatur.

Potest autem testimonium aliquid maioris ponderis reputari vel propter eius certitudinem veritatis, vel propter effectum. Certitudo autem veritatis adest testimonio alicuius propter duo. Uno quidem modo propter rectitudinem iudicii; sicut patet de sapientibus, & virtuosis, a quibus homo & magis desiderat honorari, & magis verecundatur. Unde a pueris, & bestis nullus verecundatur, propter defectum recti iudicii, qui est in eis. Alio modo propter cognitionem eorum de quibus est testimonium: quia unusquisque bene iudicat quae cognoscit. Et sic magis verecundamur a personis coniunctis, quae facta nostra magis considerant. A peregrinis autem, & omnino ignotis, ad quos facta nostra non perveniunt, nullo modo verecundamur.

Ex effectu autem est aliquid testimonium magni ponderis propter iuvamentum, vel nocumentum ab eo proveniens: & ideo magis desiderant homines honorari ab his qui possunt eos iuvare, & magis verecundantur ab his qui possunt nocere. Et inde etiam est quod quantum ad aliquid magis verecundamur a personis coniunctis, cum quibus semper sumus conversaturi, quasi ex hoc nobis perpetuum proveniat detrimentum; quod autem provenit a peregrinis, & transiuntibus, quasi cito pertransit.

Ad primum ergo dicendum, quod similis ratio est propter quam verecundamur de melioribus, & magis coniunctis: quia sicut meliorum testimonium reputatur magis efficax propter universalem cognitionem quam habent de rebus, & immutabilem sententiam a veritate; ita etiam familiarium personarum testimonium videtur magis efficax propter hoc quia magis cognoscunt particularia, quae circa nos sunt.

Ad secundum dicendum, quod testimonium eorum qui sunt nobis coniuncti in similitudine peccati, non reformidamus, quia non aestimamus, quod defectum nostrum apprehendant ut aliquid turpe.

Ad tertium dicendum, quod a propalantibus verecundamur propter nocumentum inde proveniens, quod est diffamatio apud multos.

Ad quartum dicendum, quod etiam ab illis inter quos nihil mali fecimus, magis verecundamur propter nocumentum sequens, quia scilicet per hoc amittimus.

*S. Th. Oper. Tom. XIII.*

timus bonam opinionem quam de nobis habebant, & etiam quia contraria iuxta se posita maiora videntur. Unde cum aliquis subito de aliquo quem bonum aestimavit, aliquid turpe percipit, apprehendit hoc ut turpius. Ab illis autem a quibus aliquid de novo postulamus, vel quorum nunc primo volumus esse amici, magis verecundamur propter nocumentum inde proveniens, quod est impedimentum implendae petitionis, & amicitiae consummandae.

## ARTICULUS IV. 699

*Utrum etiam in virtuosis hominibus possit esse verecundia.*

*Psal. xliii. & IV. Ethic. lect. 17.*

**A**D quartum sic proceditur. Videtur quod etiam in virtuosis hominibus possit esse verecundia. Contrariorum enim contrarii sunt effectus. Sed illi qui sunt superabundantis malitiae, non verecundantur, secundum illud Hierem. lxxxiii. *3. Froni mulieris meretricis facta est tibi: noluisse erubescere.* Ergo illi qui sunt virtuosius, magis verecundantur.

2. Praeterea. Philosophus dicit in II. Rhet. (cap. vi. a med.) *quod homines non solum erubescunt vitia, sed etiam signa virtutum: quae quidem contingit etiam esse in virtuosius.* Ergo in virtuosius potest esse verecundia.

3. Praeterea. Verecundia est timor ingloriationis. Sed contingit aliquos virtuosos ingloriosos esse, puta si false diffamantur, vel etiam indigne opprobria patiantur. Ergo verecundia potest esse in homine virtuosius.

4. Praeterea. Verecundia est pars temperantiae, ut dictum est (quasi. prac.) Pars autem non separatur a toto. Cum ergo temperantia sit in homine virtuosius, videtur quod etiam verecundia.

Sed contra est quod Philosophus dicit in IV. Ethic. (cap. ult. in med.) quod *verecundia non est hominis studiis.*

Respondeo dicendum, quod, sicut dictum est (art. 1. & 2. huius quasi.) verecundia est timor alicuius turpitudinis. Quod autem aliquod malum non timeatur, potest propter duplicem rationem contingere: uno modo quia non aestimatur ut malum; alio modo quia non aestimatur ut possibile sibi, vel ut difficile vitari: & secundum hoc verecundia deficit in aliquo dupliciter. Uno modo quia ea quae sunt erubescibilia, non apprehenduntur.

duntur ut turpia : & hoc modo caret verecundia homines in peccatis profundati, quibus sua peccata non displicent, sed magis de eis gloriantur.

Alio modo quia non apprehendunt turpitudinem ut possibilem sibi, vel quasi non facile vitabilem : & hoc modo senes, & virtuosius verecundia carent; sunt tamen sic dispositi, ut si in eis esset aliquid turpe, de hoc verecundarentur. Unde Philosophus dicit in IV. Ethic. (cap. ult. ad fin.) quod *verecundia est ex suppositione studiosi.*

Ad primum ergo dicendum, quod defectus verecundia contingit in pessimis, & optimis viris ex diversis causis, ut dictum est (in corp.) Invenitur autem in his qui mediocriter se habent, secundum quod est in eis aliquid de amore boni, & tamen non sunt totaliter immunes a malo.

Ad secundum dicendum, quod ad virtuosum pertinet non solum vitare vitia, sed etiam ea quae habent speciem vitiorum, secundum illud I. Thessalon. v. 22. *Ab omni specie mala abstinete vos :* & Philosophus dicit in IV. Ethic. (cap. ult.) quod *vitanda sunt virtuoso tam ea quae sunt mala secundum veritatem, quam ea quae sunt mala secundum opinionem.*

Ad tertium dicendum, quod infamationes, & opprobria virtuosus, ut dictum est (art. 1. huius quaest. ad 1.) contemnit, quasi ea quibus ipse non est dignus : & ideo etiam nec de his multum verecundatur. Est tamen aliquis motus verecundiae praeveniens rationem, sicut & ceterarum passionum.

Ad quartum dicendum, quod verecundia non est pars temperantiae, quasi intrans essentiam eius, sed quasi dispositiva se habens ad ipsam : unde Ambrosius dicit in Lib. I. de offic. (cap. xlii.) quod verecundia iacit prima temperantiae fundamenta, in quantum scilicet incutit horrorem turpitudinis.

## QUAESTIO CXLV.

*De honestate,*

*in quatuor articulis divisa.*

**D**Einde considerandum est de honestate : & circa hoc quaeruntur quatuor.

Primo, quomodo honestum se habeat ad virtutem.

Secundo, quomodo se habeat ad decorum.

Tertio, quomodo se habeat ad utile, & delectabile.

Quarto, utrum honestas sit pars temperantiae.

## ARTICULUS I. 700

*Utrum honestum sit idem virtuti.*

*Inf. art. 2. cor. & ad 3. & art. 3. cor.*

**A**D primum sic proceditur. Videtur quod honestum non sit idem virtuti. Dicit enim Tullius in sua Rhet. (Lib. II. de invent. aliquant. ante fi.) *honestum esse quod propter se appetitur.* Virtus autem non appetitur propter seipsam, sed propter felicitatem : dicit enim Philosophus in I. Ethic. (cap. ix. a princ.) quod *felicitas est primum virtutis, & finis.* Ergo honestum non est idem virtuti.

2. Præterea. Secundum Iffidorum (Lib. X. Etymol. ad lit. H.) *honestas dicitur quasi honoris status.* Sed multis aliis debetur honor quam virtuti : nam virtuti proprie debetur laus, ut dicitur in I. Ethic. (cap. xiv.) Ergo honestas non est idem virtuti.

3. Præterea. Principale virtutis consistit in interiori electione, ut Philosophus dicit in VIII. Ethicor. (cap. xlii. in fi.) Honestas autem magis videtur ad exteriorem conversationem pertinere, secundum illud I. ad Corinth. xiv. 40. *Omnia boneſte, & secundum ordinem fiant in vobis.* Ergo honestas non est idem virtuti.

4. Præterea. Honestas videtur consistere in exterioribus divitiis, secundum illud Ecclesi. xi. 14. *Bona, & mala, vita, & mors, paupertas, & honestas, a Deo sunt.* Sed in exterioribus divitiis non consistit virtus. Ergo honestas non est idem virtuti.

Sed contra est quod Tullius dicit in I. de offic. (in tit. de quatuor virtutib.) & in II. Rhetor. (loc. cit. in arg. 1.) dividens honestum in quatuor principales virtutes, in quas etiam dividitur virtus. Ergo honestum est idem virtuti.

Respondendo dicendum, quod, sicut Iffidorus dicit (loc. cit. in arg. 2.) *honestas dicitur quasi honoris status :* unde ex hoc videtur aliquid dici honestum, quod est honore dignum.

Honor autem, ut supra dictum est (quaest. præc. art. 2. ad 2.) excellentiae debetur. Excellentia autem hominis maxime

xime consideratur secundum virtutem, quæ est *dispositio perfecti ad optimum*, ut dicitur in VII. Physic. (tex. 17. & 18.) Et ideo *honestum*, proprie loquendo, in idem refertur cum virtute.

Ad primum ergo dicendum, quod, sicut Philosophus dicit in I. Eth. (cap. vii.) eorum quæ propter se appetuntur, quædam appetuntur solum propter se, & nunquam propter aliud, sicut felicitas, quæ est ultimus finis; quædam vero appetuntur & propter se, in quantum habent in seipsis aliquam rationem bonitatis, etiam si nihil aliud boni per ea nobis accideret, & tamen sunt appetibilia propter aliud, in quantum scilicet perducunt nos in aliquid bonum perfectius: & hoc modo virtutes sunt propter se appetendæ. Unde Tullius dicit in II. Rhetor. (loc. cit. in arg.) quod *quiddam est quod sua vi nos allicit, & sua dignitate trahit, ut virtus, veritas, scientia*. Et hoc sufficit ad rationem honesti.

Ad secundum dicendum, quod eorum quæ honorantur præter virtutem, aliquid est virtute excellentius, scilicet Deus, & beatitudo: & huiusmodi non sunt ita nobis per experientiam nota, sicut virtutes, secundum quas quotidie operamur. Et ideo virtus magis sibi vendicatur nomen honesti. Alia vero quæ sunt infra virtutem, honorantur, in quantum coadiuvant ad opera virtutis, sicut nobilitas, potentia, & divitiæ. Ut enim Philosophus dicit in IV. Ethic. (cap. iii. ante med.) *huiusmodi honorantur a quibusdam; sed secundum veritatem solus bonus est honorandus*. Bonus autem est aliquis secundum virtutem. Et ideo virtuti quidem debetur laus, secundum quod est appetibilis propter aliud; honor autem, prout est appetibilis propter seipsum: & secundum hoc habet rationem honesti.

Ad tertium dicendum, quod, sicut dictum est (in cor. art.) honestum importat debitum honoris. Honor autem est contestatio quædam de excellentia alicuius, ut supra dictum est (quæst. ciii. art. 1. & 2.) Testimonium autem non profertur nisi de rebus notis. Interior autem electio non innoscit homini nisi per exteriores actus. Et ideo exterior conversatio habet rationem honesti, secundum quod est demonstrativa interioris rectitudinis. Et propter hoc radicaliter honestas consistit in interiori electione, significative autem in exteriori conversatione.

Ad quartum dicendum, quod quia secundum vulgarem opinionem excellentia divitiarum facit hominem dignum honore, inde est quod quandoque nomen honestatis ad exteriorem prosperitatem transferretur.

## ARTICULUS II. 707

*Utrum honestum sit idem quod decorum.*

*Inf. art. 4. corp.*

**A**D secundum sic proceditur. Videtur quod honestum non sit idem quod decorum. Ratio enim honesti sumitur ex appetitu: nam honestum est quod per se appetitur. Sed decorum magis respicit conspectum, cui placet. Ergo decorum non est idem quod honestum.

2. Præterea. Decor quamdam claritatem requirit, quæ pertinet ad rationem gloriæ; honestum autem respicit honorem. Cum ergo honor, & gloria differant, ut supra dictum est (quæst. ciii. art. 1. ad 3.) videtur quod etiam honestum differat a decoro.

3. Præterea. Honestum est idem virtuti, ut supra dictum est (art. præc.) Sed aliquis decor contrariatur virtuti: unde dicitur Ezech. xvi. 15. *Habens fiduciam in pulchritudine tua fornicata es in nomine tuo*. Ergo honestum non est idem decoro.

Sed contra est quod Apostolus dicit in I. ad Corinth. xii. 23. *Quæ inhonesta sunt nostra, abundantiorum honestatem habent; honesta autem nostra nullius egent*. Vocat autem ibi inhonesta membra turpia, honesta autem membra pulchra. Ergo honestum, & decorum idem esse videntur.

Respondeo dicendum, quod, sicut accipi potest ex verbis Dionysii cap. iv. de div. Nom. (part. 1. lect. 5. & 6.) ad rationem pulchri, sive decori concurrunt & claritas, & debita proportio. Dicit enim, quod Deus dicitur *pulcher*, sicut *universorum consonantia, & claritatis causa*. Unde pulchritudo corporis in hoc consistit quod homo habeat membra corporis bene proportionata cum quadam debiti coloris claritate. Et similiter pulchritudo spiritualis in hoc consistit quod conversatio hominis, sive actio eius sit bene proportionata secundum spiritualem rationis claritatem.

Hoc autem pertinet ad rationem honesti, quod diximus (art. præc.) idem esse virtuti, quæ secundum rationem

moderatur omnes res humanas. Et ideo *honestum est idem spirituali decori*. Unde Augustinus dicit in Lib. lxxxiii. Q. (quæst. xxx. parum a princ.) *Honestum voco intelligibilem pulchritudinem, quam spirituales nos proprie dicimus: & postea subdit, quod multa sunt pulchra visibilia, quæ minus proprie honesta appellantur.*

Ad primum ergo dicendum, quod obiectum movens appetitum est bonum apprehensum: quod autem in ipsa apprehensione apparet decorum, accipitur ut conveniens, & bonum. Et ideo dicit Dionysius iv. cap. de div. Nom. (part. i. lect. 3. & part. iii. lect. 14.) *quod omnibus est pulchrum, & bonum amabile.* Unde & ipsum honestum, secundum quod habet spirituale decorum, appetibile redditur: unde & Tullius dicit in l. de offi. (immediate ante tit. de 4. virt. in princ.) *Formam ipsam, & tamquam faciem honesti vides, quæ si oculis cerneretur, mirabiles amores, ut ait Plato, excitaret sapientiæ.*

Ad secundum dicendum, quod, sicut supra dictum est (quæst. ciii. art. 1. ad 3.) gloria est effectus honoris. Ex hoc enim quod aliquis honoratur, vel laudatur, redditur clarus in oculis aliorum. Et ideo sicut idem est honorificum, & gloriosum; ita etiam idem est honestum, & decorum.

Ad tertium dicendum, quod obiectio illa procedit de pulchritudine corporali: quamvis possit dici, quod etiam propter pulchritudinem spirituales aliquis spiritualiter fornicatur, in quantum de ipsa honestate superbit, secundum illud Ezech. xxviii. 17. *Elevatum est cor tuum in decore tuo: perdidisti sapientiam tuam in decore tuo.*

### ARTICULUS III. 702

*Utrum honestum differat ab utili, & delectabili.*

I. P. quæst. v. art. 6.

**A**D tertium sic proceditur. Videtur quod honestum non differat ab utili, & delectabili. Dicitur enim honestum quod propter se appetitur. Sed delectatio propter se appetitur: *ridiculum enim videtur querere, propter quid aliquis velit delectari*, ut Philosophus dicit in X. Ethic. (cap. 11. parum a princ.) Ergo honestum non differat a delectabili.

2. Præterea. Divitiæ sub bono utili

continentur: dicit enim Tullius in II. Rhetor. (Lib. II. de invent. aliquante ante fi.) *Est aliquid non propter suam vim, & naturam, sed propter fructum, & utilitatem appetendum, quod pecunia est.* Sed divitiæ habent rationem honestatis: dicitur enim Eccli. xi. 14. *Paupertas, & honestas, idest divitiæ, a Deo sunt: & xiii. cap. 2. Pondus super se tollit qui honestiori, idest ditioni, se communicat.* Ergo honestum non differat ab utili.

3. Præterea. Tullius probat in Lib. II. de offi. (tit. 2. de utilis.) quod *nihil potest esse utile quod non sit honestum: & hoc idem habetur per Ambrosium in Lib. II. de offi. (cap. vi.)* Ergo utile non differat ab honesto.

Sed contra est quod Augustinus dicit in Lib. lxxxiii. Q. (quæst. xxx. cir. princ.) *Honestum dicitur quod propter se ipsum appetendum est; utile autem quod ad aliquid aliud referendum est.*

Respondetur dicendum, quod honestum concurret in idem subiectum cum utili, & delectabili, a quibus tamen differt ratione.

Dicitur enim aliquid honestum, sicut dictum est (arg. præc.) in quantum habet quendam decorem ex ordinatione rationis. Hoc autem quod est secundum rationem ordinatum, est naturaliter conveniens homini. Unumquodque autem naturaliter delectatur in suo convenienti. Et ideo honestum est naturaliter homini delectabile; sicut de operatione virtutis Philosophus probat in I. Ethicor. (cap. viii.) Non tamen omne delectabile est honestum: quia potest etiam aliquid conveniens esse secundum sensum, & non secundum rationem. Sed hoc delectabile est præter hominis rationem, quæ perficit naturam ipsius. Ipsa etiam virtus, quæ secundum se honesta est, refertur ad aliud sicut ad finem, scilicet ad felicitatem. Et secundum hoc idem subiecto est honestum, & utile, & delectabile. Sed ratione differunt: nam honestum dicitur, secundum quod aliquid habet quamdam excellentiam dignam honore propter spirituale pulchritudinem; delectabile autem, in quantum quietat appetitum; utile autem, in quantum refertur ad aliud. In plus tamen est delectabile quam utile, & honestum: quia omne utile, & honestum est aliquoties delectabile, sed non convertitur, ut dicitur in II. Ethic. (cap. iii. a med.)

Ad primum ergo dicendum, quod honestum dicitur quod propter se appetitur

appetitu rationali, qui tendit in id quod est conveniens rationi. Delectabile autem propter se appetitur appetitu sensitivo.

Ad secundum dicendum, quod divitiæ vocantur nomine honestatis secundum opinionem multorum, qui divitias honorant; vel in quantum ordinantur organicè ad actus virtutum, ut dictum est (art. 1. hu. quæst. ad 2.)

Ad tertium dicendum, quod intentio Tullii, & Ambrosii est dicere, quod nihil potest esse simpliciter & vere utile, quod repugnat honestati: quia oportet quod repugnet ultimofini hominis, quod est bonum secundum rationem: quamvis possit forte esse utile secundum quid respectu alicuius finis particularis. Non autem intendunt dicere, quod omne utile in se consideratum pertingat ad rationem honesti.

## ARTICULUS IV. 703

*Utrum honestas debeat poni pars temperantiae*

**A**D quartum sic proceditur. Videtur quod honestas non debeat poni pars temperantiae. Non enim est possibile quod idem respectu eiusdem sit pars, & totum. Sed *temperantia est pars honestatis*, ut Tullius dicit in II. Rhetor. (Lib. II. de invent. aliquant. ante fi.) Ergo honestas non est pars temperantiae.

2. Præterea. Elzéar III. cap. III. dicitur, quod *vinum omnia præcordia facit honesta*. Sed usus vini, præcipue superfluus, de quo ibi loqui videtur, magis pertinet ad intemperantiam quam ad temperantiam. Ergo honestas non est pars temperantiae.

3. Præterea. Honestum dicitur quod est honore dignum. Sed *iusti, & fortes maxime honorantur*, ut dicit Philoſophus in I. Rhetoric. (cap. 11. a princ.) Ergo honestas non pertinet ad temperantiam, sed magis ad iustitiam, & fortitudinem: unde & Eleazarus dixit, ut dicitur II. Machab. vii. 28. *Fortiter pro gravissimis, ac sanctissimis legibus honesta morte perungar*.

Sed contra est quod Macrobius (Lib. I. in somn. Scip. cap. viii.) honestatem ponit partem temperantiae: Ambrosius etiam in I. de offic. (cap. xliii.) temperantiae specialiter honestatem attribuit.

Respondeo dicendum, quod, sicut supra dictum est (art. 2. hu. quæst.) honestas est quædam spiritualis pulchritudo. Pulchro autem opponitur turpe. Opposita autem maxime se invicem manifestant. Et ideo ad temperantiam specialiter honestas pertinere videtur, quæ id quod est homini turpissimum, & indecentissimum, repellit, scilicet brutales voluptates. Unde & in ipso nomine temperantiae maxime intelligitur bonum rationis, cuius est moderari, & temperare concupiscentias pravas. Sic ergo honestas, prout speciali quadam ratione temperantiae attribuitur, ponitur pars eius, non quidem subiectiva, vel sicut virtus adiuncta, sed pars integralis ipsius, sicut quædam eius conditio.

Ad primum ergo dicendum, quod temperantia ponitur pars subiectiva honesti, prout sumitur in sua communitate: sic autem non ponitur temperantia pars.

Ad secundum dicendum, quod vinum in ebriis facit præcordia honesta secundum eorum reputationem, quia videtur eis quod sint magni, & honorandi.

Ad tertium dicendum, quod iustitiæ, & fortitudini debetur maior honor quam temperantiæ, propter maioris boni excellentiam; sed temperantiæ debetur maior honor propter prohibitionem vitiourum magis exprobrabilium, ut ex dictis patet (in corp. art.) Et sic honestas magis attribuitur temperantiæ secundum regulam Apostoli I. ad Corinth. xii. 23. quod *inhonestia nostra maiorem habent honestatem*, scilicet removens quod inhonestum est.

## QUAESTIO CXLVI.

*De abstinentia,  
in duos articulos divisa.*

**D**Einde considerandum est de partibus subiectivis temperantiae: & primo de his quæ sunt circa delectationes ciborum; secundo de his quæ sunt circa delectationes venereorum.

Circa primum considerandum est de abstinentia, quæ est circa cibos, & potus; & de sobrietate, quæ est specialiter circa potum.

Circa abstinentiam autem consideranda sunt tria. Primo de ipsa abstinentia. Secundo de actu eius, qui est ieiunium. Tertio de opposito vicio, quod est gula.

Circa abstinentiam autem quæruntur duo,

Pri-

Primo, utrum abſtinentia ſit virtus.  
Secundo, utrum ſit virtus ſpecialis.

## ARTICULUS I. 704

*Utrum abſtinentia ſit virtus.*

*Sup. quaest. cxlii.*

**A**D primum ſic proceditur. Videtur quod abſtinentia non ſit virtus. Dicit enim Apoſtolus I. ad Corinth. xv. 20. *Non eſt regnum Dei in ſermone, ſed in virtute.* In abſtinentia autem non conſiſtit regnum Dei: dicit enim Apoſtolus ad Rom. xiv. 17. *Non eſt regnum Dei eſca, & potus: ubi dicit Gloſſa ( Auguſtini Lib. II. Qq. Evang. quaest. xi. ante med. )* nec in abſtinendo, nec in manducando do eſſe iuſtitiam. Ergo abſtinentia non eſt virtus.

2. Præterea. Auguſtinus dicit in X. Confeſſ. (cap. xxxi. a princ.), ad Deum loquens: *Hoc me docuiſti, ut quemadmodum medicamenta, ſic alimenta ſumpturus accedam.* Sed medicamenta moderari non pertinet ad virtutem, ſed ad artem medicinæ. Ergo pari ratione moderari alimenta, quod pertinet ad abſtinentiam, non eſt actus virtutis, ſed artis.

3. Præterea. Omnis virtus in medio conſiſtit, ut habetur in II. Ethic. (cap. vi. & vii.) Abſtinentia autem non videtur in medio conſiſtere, ſed in deſectu, cum ex ſubtractione nominetur. Ergo abſtinentia non eſt virtus.

4. Præterea. Nulla virtus excludit aſſam. Sed abſtinentia excludit patientiam: dicit enim Gregorius in Paſſor. (par. III. cap. xx. parum ante med.) quod *abſtinentiam mentes plerumque impatientia excutit a ſinu tranquillitatis*: ibidem etiam dicit, quod *cogitationes abſtinentium nonnumquam ſuperbie culpa tranſiſcit*: & ita excludit humilitatem. Ergo abſtinentia non eſt virtus.

Sed contra eſt quod dicitur II. Pet. i. 5. *Miniſtrate in fide veſtra virtutem, in virtute autem ſcientiam, in ſcientia autem abſtinentiam*: ubi abſtinentia aliis virtutibus connumeratur. Ergo abſtinentia eſt virtus.

Reſpondeo dicendum, quod abſtinentia ex ſuo nomine importat ſubtractionem ciborum. Dupliciter ergo nomen abſtinentiæ accipi poteſt. Uno modo ſecundum quod abſolute ciborum ſubtractionem designat: & hoc modo abſtinentia non designat neque virtutem, neque actum

virtutis, ſed quoddam indiſſerens. Alio modo poteſt accipi, ſecundum quod eſt ratione regulata: & tunc ſignificat vel habitum virtutis, vel actum. Et hoc ſignificatur in præmiſſa auctoritate Petri, ubi dicitur, *in ſcientia eſſe abſtinentiam miniſtrandam*, ut ſcilicet homo a cibis abſtineat, prout oportet pro congruentia hominum cum quibus vivit, & perſonæ ſuæ, & pro valetudinis ſuæ neceſſitate.

Ad primum ergo dicendum, quod uſus ciborum, & eorum abſtinentia, ſecundum ſe conſiderata, non pertinent ad regnum Dei: dicit enim Apoſtolus I. ad Corinth. viii. 8. *Eſca nos non commendat Deo: neque enim ſi non manducaverimus, deficiemus; neque ſi manducaverimus, abundabimus*, ſcilicet ſpiritualiter. Utrumque autem eorum, ſecundum quod ſit rationabiliter ex fide, & dilectione Dei, pertinet ad regnum Dei.

Ad ſecundum dicendum, quod moderatio ciborum ſecundum quantitatem, & qualitatem, pertinet ad alteram medicinæ in comparatione ad valetudinem corporis; ſed ſecundum interiores affectiones in comparatione ad bonum rationis pertinet ad abſtinentiam. Unde Auguſtinus dicit in Lib. II. de Qq. Evang. (quaest. xi. ante med.) *Non intereſt omnino, ſcilicet ad virtutem, quid alimentorum, vel quantum quis accipiat, dummodo id faciat pro congruentia hominum cum quibus vivit, & perſonæ ſuæ, & pro valetudinis ſuæ neceſſitate; ſed quanta facilitate, (a) & ſerenitate animi his careat, cum oportet, vel neceſſe eſt cavere.*

Ad tertium dicendum, quod ad temperantiam pertinet reſrenare delectationes quæ nimis animum ad ſe alliciunt, ſicut ad fortitudinem pertinet firmare animum contra timores a bono rationis repellentes. Et ideo ſicut laus fortitudinis conſiſtit in quodam exceſſu, & ex hoc denominantur omnes partes fortitudinis; ita etiam laus temperantiæ conſiſtit in quodam deſectu, & ex hoc ipſa, & omnes partes eius denominantur. Unde & abſtinentia, quia eſt pars temperantiæ, denominatur a deſectu; & tamen conſiſtit in medio, inquantum eſt ſecundum rationem rectam.

Ad quartum dicendum, quod illa virtus proveniunt ex abſtinentia, prout non eſt ſecundum rationem rectam. Ratio enim recta facit abſtinere ſicut oportet, ſcilicet cum hilaritate mentis, & pro-

(a) Ita cum mſi, Noldanus, & edit. ex poſterioribus. Al. ſeracitate.



propter quod oportet, scilicet propter gloriam Dei, non propter gloriam suam.

ARTICULUS II. 705

*Utrum abstinentia sit specialis virtus.*

**A**D secundum sic proceditur. Videtur quod abstinentia non sit specialis virtus. Omnis enim virtus secundum se ipsam est laudabilis. Sed abstinentia non est secundum se laudabilis: dicit enim Gregorius in Pastor. (par. III. cap. xx. a med.) quod *virtus abstinentiae non nisi ex aliis virtutibus commendatur*. Ergo abstinentia non est specialis virtus.

2. Præterea. Augustinus (Fulgentius) dicit de fide ad Petrum (cap. xlii.) quod *abstinentia sanctorum est a cibo, & potu, non quia aliqua creatura Dei sit mala, sed pro sola corporis castigatione*. Hoc autem pertinet ad castitatem, ut ex ipso nomine apparet. Ergo abstinentia non est virtus specialis a castitate distincta.

3. Præterea. Sicut homo debet esse contentus moderato cibo, ita & moderata veste, secundum illud I. Timoth. ult. 8. *Habentes alimenta, & quibus tegamur, his contenti simus*. In moderatione autem vestium non est aliqua specialis virtus. Ergo neque abstinentia, quæ est moderativa alimentorum.

Sed contra est quod Macrobius (Lib. I. in somn. Scip. cap. viii.) ponit abstinentiam specialem partem temperantiae.

Respondeo dicendum, quod, sicut supra dictum est (quæst. cxxxvi. art. 1. & quæst. cxli. art. 3.) virtus moralis conservat bonum rationis contra impetus passionum: & ideo ubi invenitur specialis ratio qua passio abstrahit a bono rationis, ibi necesse est esse specialem virtutem. Delectationes autem ciborum naturæ sunt abstrahere hominem a bono rationis, tum propter earum magnitudinem, tum etiam propter necessitatem ciborum, quibus homo indiget ad vitæ conservationem, quam maxime homo desiderat. Et ideo abstinentia est specialis virtus.

Ad primum ergo dicendum, quod virtutes oportet esse connexas, ut supra dictum est (1. 2. quæst. lxx. art. 1.) Et ideo una virtus adiuvatur, & commendatur ex alia, sicut iustitia ex fortitudine. Et per hunc etiam modum virtus abstinentiæ commendatur ex castitatis virtutibus.

Ad secundum dicendum, quod per abstinentiam corpus castigatur, non solum contra illecebras luxuriæ, sed etiam contra illecebras gulæ: quia dum homo abstinere, magis redditur fortis ad impugnationes gulæ vincendas, quæ tanto fortiores sunt, quanto magis homo eis cedit. Et tamen non prohibetur per hoc abstinentiam esse specialem virtutem, quod ad castitatem valet, quia una virtus ad aliam iuvat.

Ad tertium dicendum, quod usus vestimentorum est introductus ab arte, usus autem ciborum a natura: & ideo magis debet esse virtus specialis circa moderationem ciborum quam circa moderationem vestimentorum.

QUAESTIO CXLVII.

*De ieiunio,*

*in octo articulis divisa.*

**D**Einde considerandum est de ieiunio: & circa hoc quaeruntur octo.

Primo, utrum ieiunium sit actus virtutis.

Secundo, cuius virtutis sit actus.

Tertio, utrum cadat sub præcepto.

Quarto, utrum aliqui excusentur ab observatione huius præcepti.

Quinto de tempore ieiunii.

Sexto, utrum semel comedere requiratur ad ieiunium.

Septimo de hora comestionis ieiunantium.

Octavo de cibis a quibus debent abstinere.

ARTICULUS I. 706

*Utrum ieiunium sit actus virtutis.*

*Sup. quæst. cxlvi. art. 1. & IV. dist. xv. quæst. III. art. 1. quæst. 2.*

**A**D primum sic proceditur. Videtur quod ieiunium non sit actus virtutis. Omnis enim actus virtutis Deo est acceptus. Sed ieiunium non semper est Deo acceptum, secundum illud Isaïæ lviii. 3. *Quare ieiunavimus, & non aspexisti?* Ergo ieiunium non est actus virtutis.

2. Præterea. Nullus actus virtutis recedit a medio virtutis. Sed ieiunium recedit a medio virtutis: quod quidem in virtute abstinentiæ accipitur secundum hoc ut subveniatur necessitati naturæ, cui per ieiunium aliquid subtrahitur:

tur: alioquin non ieiunantes non haberent virtutem abstinentiae. Ergo ieiunium non est actus virtutis.

3. Præterea. Id quod communiter omnibus convenit, & bonis, & malis, non est actus virtutis. Sed ieiunium est huiusmodi: quilibet enim, antequam comedat, ieiunus est. Ergo ieiunium non est actus virtutis.

Sed contra est quod connumeratur aliis virtutum actibus II. ad Corinth. vi. 5. ubi Apostolus dicit: *In ieiuniis, in scientia, in castitate* &c.

Respondetur dicendum, quod ex hoc aliquis actus est virtuosus quod per rationem ordinatur ad aliquod bonum honestum. Hoc autem convenit ieiunio: assumitur enim ieiunium principaliter ad tria. Primo quidem ad concupiscentias carnis reprimendas: unde Apostolus dicit in auctoritate inducta: *In ieiuniis, in castitate*: quia per ieiunia castitas conservatur. Ut enim Hieronymus dicit (Lib. II. cont. Iovin. cap. vi. in fin.) *sine Cerere, & Baccho friget Venus*, id est per abstinentiam cibi, & potus temperat luxuria. Secundo assumitur ad hoc quod mens liberius eleveetur ad sublimia contemplanda: unde dicitur Dan. x. quod post ieiunium trium hebdomadarum revelationem accepit a Deo. Tertio ad satisfaciendum pro peccatis: unde dicitur Ios. 11. 12. *Convertimini ad me in toto corde vestro, in ieiunio, in fletu, & planctu*.

Et hoc est quod Augustinus dicit in quodam sermone de oratione, & ieiunio (ccxxx. de temp.) *Ieiunium purgat animam, mentem sublevat, propriam carnem spiritui subiecit, cor facit contritum, & humiliatum, concupiscentie nebulas dissipat, libidinum ardores extinguit, castitatis verum lumen accendit*. Unde patet quod ieiunium est actus virtutis.

Ad primum ergo dicendum, quod contingit quod aliquis actus qui ex genere suo est virtuosus, ex aliquibus circumstantiis adiunctis reddatur vitiosus: unde ibidem dicitur: *Ecce in diebus ieiunii vestri invenitur voluntas vestra*: & paulo post subditur: *Ad hies, & contentiones ieiunatis, & percussis pugno imple*. Quod exponens Gregorius in Pastor. (part. III. cap. xx. a med.) dicit: „Voluntas, ad lætitiā pertinet, pugnis ad iram. „Incaustum ergo per abstinentiam corpus „atteritur, si inordinatis motibus diutius, „la mens vitii dissipatur. Et Augustinus in prædicto serm. dicit, quod „ieiun-

„nium verbositate non amat, divitiis superfluitatem iudicat, superbiam spernit, humilitatem commendat, præstat homini seipsum intelligere quod est „infirmum, & fragile.“

Ad secundum dicendum, quod medium virtutis non accipitur secundum quantitatem, sed secundum rationem rectam, ut dicitur in II. Ethic. (cap. vi.) Ratio autem iudicat quod propter aliquam specialem causam aliquis hominum sumat de cibo quam sibi competere secundum statum communem; sicut propter infirmitatem vitandum, aut ad aliqua opera corporalia expeditius agenda. Et multo magis ratio recta hoc ordinat ad spiritualia mala vitanda, & bona prosequenda. Non tamen ratio recta tantum de cibo subtrahit, ut natura conservari non possit: quia, ut Hieronymus dicit (hab. cap. Non immoderiter. de consecrationib. dist. v.) *non differt utrum magno, vel parvo tempore te interimas: quia de rapina holocaustum offert qui vel ciborum nimia egessat, vel manducandi, vel somni penuria immoderate corpus affligit*. Similiter etiam ratio recta non tantum de cibo subtrahit ut homo reddatur impotens ad debita opera peragenda: unde dicit Hieronymus (loc. cit.) *quod rationalis homo dignitatem amittit, qui vel ieiunium caritati, vel vigiliis sensus integritati præfert*.

Ad tertium dicendum, quod ieiunium naturæ, quo quis dicitur ieiunus, antequam comedat, consistit in pura negatione, unde non potest poni actus virtutis; sed solum illud ieiunium quo quis ex rationabili proposito a cibis aliquantulum abstinere. Unde primum dicitur ieiunium ieiuni; secundum vero ieiunium ieiunantis, quasi ex proposito aliquid agentis.

## ARTICULUS II. 706

*Utrum ieiunium sit actus abstinentiæ.*

IV. dist. xv. quæst. 111. art. 1. quæst. 3. per tot. & quæst. 5. ad 2. & quod. 111. art. 12. ad 3.

**A**D secundum sic proceditur. Videtur quod ieiunium non sit actus abstinentiæ. Quia super illud Matth. xviii. *Hoc genus demoniorum &c.* dicit Glossa (ord. Bedæ Lib. III. comment. cap. viii. in fin.) „ieiunium non solum est „ab eis, sed a cunctis illecebris abstinere.“ Sed hoc pertinet ad omnem vir-

virtutem. Ergo ieiunium non est actus specialiter abstinētiæ.

2. Præterea. Gregorius dicit homil. Quadrag. (xvi. in Evang. a med.) quod ieiunium quadragesimale est decima totius anni. Sed dare decimas est actus religionis, ut supra habitum est (quæst. lxxxvii. art. 1.) Ergo ieiunium est actus religionis, & non abstinētiæ.

3. Præterea. Abstinētia est pars temperantiæ, ut dictum est (quæst. præc. & quæst. cxlii.) Temperantia autem contra fortitudinem dividitur, ad quam pertinet molestias sustinere: quod maxime videtur esse in ieiunio. Ergo ieiunium non est actus abstinētiæ.

Sed contra est quod Isidorus dicit (Lib. VI. Etymol. cap. xviii. ad fin.) quod ieiunium est parsimonia victus, abstinētiaque ciborum.

Respondeo dicendum, quod eadem est materia habitus, & actus. Unde omnis actus virtuosus qui est circa aliquam materiam, ad illam virtutem pertinet quæ medium in illa materia constituit. Ieiunium autem attenditur in cibis, in quibus medium adinvenit abstinētia. Unde manifestum est quod ieiunium est abstinētiæ actus.

Ad primum ergo dicendum, quod ieiunium proprie dictum consistit in abstinendo a cibis; sed metaphorice dictum consistit in abstinendo a quibuslibet nocivis, quæ maxime sunt peccata.

Vel potest dici, quod etiam ieiunium proprie dictum est abstinētia ab omnibus illecebris: quia per quælibet vitia adiuncta definit esse actus virtuosus, ut dictum est (art. præc. ad 1.)

Ad secundum dicendum, quod nihil prohibet actum unitus virtutis pertinere ad aliam virtutem, secundum quod ad eius finem ordinatur, ut ex supradietis patet (quæst. præc. art. 2. ad 2. & 1.2. quæst. xviii. art. 7.) Et secundum hoc nihil prohibet, ieiunium pertinere ad religionem, vel ad castitatem, vel ad quamcumque aliam virtutem.

Ad tertium dicendum, quod ad fortitudinem, secundum quod est specialis virtus, non pertinet perferre quascumque molestias, sed solum illas quæ sunt circa periculum mortis. Sufferre autem molestias quæ sunt ex defectu delectabilium tactus, pertinet ad temperantiam, & ad partes eius: & tales sunt molestiæ ieiunii.

## ARTICULUS III. 708.

*Utrum ieiunium sit in præcepto.*

IV. dist. xv. quæst. 111. art. 1. quæst. 4. & quæst. 5. ad 2. & art. 2. quæst. 1.

**A**D tertium sic proceditur. Videtur quod ieiunium non sit in præcepto. Præcepta enim non dantur de operibus supererogationum, quæ cadunt sub consilio. Sed ieiunium est opus supererogationis: alioquin ubique, & semper æqualiter esset observandum. Ergo ieiunium non cadit sub præcepto.

2. Præterea. Quicumque transgreditur præceptum, peccat mortaliter. Si ergo ieiunium esset in præcepto, omnes non ieiunantes mortaliter peccarent: per quod videretur magnus laqueus hominibus esse iniectus.

3. Præterea. Augustinus dicit in Lib. de vera religione (cap. xviii. parum ante med.) quod ab ipsa Dei sapientia hominibus assumpto, a quo in libertatem vocati sumus, pauca sacramenta saluberrima constituta sunt, quæ societatem christiani populi, hoc est sub uno Deo liberæ multitudinis, continerent. Sed non minus videtur libertas populi christiani impediri per multitudinem observantium, quam per multitudinem sacramentorum: dicit enim Augustinus in Lib. ad inquisitiones Iaquarii (epist. lv. al. cxix. cap. xix. cir. fin.) quod quidam ipsam religionem nostram, quam manifestissimis, & paucissimis celebrationum sacramentis Dei misericordia voluit esse liberam, servilibus premunt oneribus. Ergo videtur quod non debuit per Ecclesiam ieiunium sub præcepto institui.

Sed contra est quod Hieronymus ad Lucinium (epist. xxviii. cir. fin.) dicit de ieiuniis loquens: *Unaqueque provincia abundet in suo sensu, & præcepta maiorum leges apostolicas arbitretur.* Ergo ieiunium est in præcepto.

Respondeo dicendum, quod sicut ad sæculares Principes pertinet præcepta legalia iuris naturalis determinativa tractare de his quæ pertinent ad utilitatem communem in temporalibus rebus; ita etiam ad Prælatos ecclesiasticos pertinet ea statuta præcipere quæ ad utilitatem communem fidelium pertinent in spiritualibus bonis.

Dictum est autem (art. 1. huius quæst.) quod ieiunium utile est ad delectionem, & cohibitionem culparum, & ad elevationem.

nem mentis in spiritualia. Unusquisque autem ex naturali ratione tenetur tantum ieiuniis uti, quantum sibi necessarium est ad praevidenda. Et ideo ieiunium in communi cadit sub praecepto legis naturae; sed determinatio temporis, & modi ieiunandi secundum convenientiam, & utilitatem populi christiani, cadit sub praecepto iuris positivi, quod est a praelatis Ecclesiae institutum: & hoc est ieiunium Ecclesiae; aliud vero est naturae.

Ad primum ergo dicendum, quod ieiunium secundum se consideratum non nominat aliquid eligibile, sed penale quoddam. Redditur autem eligibile, secundum quod est utile ad finem aliquem. Et ideo absolute consideratum non est de necessitate praecepti; sed est de necessitate praecepti unicuique tali remedio indigenti. Et quia multitudo hominum ut plurimum indiget tali remedio, tum quia in multis omnes offendimus, ut dicitur Iacobi 111. 2. tum etiam quia caro concupiscit adversus spiritum, ut dicitur ad Galat. v. 17. conveniens fuit ut Ecclesia aliqua ieiunia statueret ab omnibus communiter observanda, non quasi praecepto subiciens id quod simpliciter ad supererogationem pertinet, sed quasi in speciali determinans id quod est necessarium in communi.

Ad secundum dicendum, quod praecepta quae per modum communis statuti proponuntur, non eodem modo obligant omnes, sed secundum quod requiritur ad finem quem legislator intendit: cuius auctoritatem si aliquis transgrediendo statutum contemnat, vel hoc modo transgrediatur quod impediatur finis quem intendit, peccat mortaliter talis transgressor; si autem ex aliqua rationabili causa quis statutum non servet, praecipue in casu in quo etiam legislator accessit, non decerneret esse servandum, talis transgressor non constituitur peccatum mortale. Et inde est quod non omnes qui non servant ieiunia Ecclesiae, peccant mortaliter.

Ad tertium dicendum, quod Angustinus ibi loquitur de his quae neque sacramenta Scripturarum auctoritatibus continentur, nec in Conciliis Episcoporum statuta inveniuntur, nec consuetudine universalis Ecclesiae roborata sunt. Ieiunia vero quae sunt in praecepto, sunt in Conciliis Episcoporum statuta, & consuetudine universalis Ecclesiae roborata. Nec sunt contra libertatem populi fide-

lis; sed magis sunt utilia ad impediendum servitutem peccati, quae repugnat libertati spirituali, de qua dicitur ad Gal. v. 13. *Vos enim fratres in libertatem vocati estis, tantum ne libertatem detis in occasionem carnis.*

## ARTICULUS IV. 703

*Utrum omnes ad ieiunia Ecclesiae teneantur.*

*Inf. art. 7. ad 3. & IV. dis. xv. quest. 111. art. 2. quest. 1. 2. 3. & 4.*

**A**D quartum sic proceditur. Videtur teneantur. Praecepta enim Ecclesiae obligant, sicut Dei praecepta, secundum illud Luc. x. 16. *Qui vos audit, me audit.* Sed ad praecepta Dei servanda omnes tenentur. Ergo & similiter omnes tenentur ad servanda ieiunia quae sunt ab Ecclesia instituta.

2. Praeterea. Maxime videntur excusari pueri a ieiunio propter aetatem. Sed pueri non excusantur; dicitur enim Ier. 11. 15. *Sanctificate ieiunium:* & postea: *Congregare parvulos, & iugentes ubera.* Ergo multo magis omnes alii ad ieiunia tenentur.

3. Praeterea. Spiritualia sunt temporalibus preferenda, & necessaria non necessariis. Sed opera corporalia ordinantur ad lucrum temporale: peregrinatio etiam, etsi ad spiritualia ordinetur, non est necessitatis. Cum ergo ieiunium ordinetur ad spirituales utilitates, & necessitatem habeat ex statuto Ecclesiae, videtur quod non sint ieiunia Ecclesiae praetermittenda propter peregrinationem, vel propter corporalia opera.

4. Praeterea. Magis est aliquid faciendum ex propria voluntate quam ex necessitate, ut patet per Apostolum II. ad Corinth. ix. Sed pauperes solent ex necessitate ieiunare propter defectum alimentorum. Ergo multo magis debent ex propria voluntate ieiunare.

5. Sed contra videtur quod nullus iustus teneatur ieiunare. Praecepta enim Ecclesiae non obligant contra doctrinam Christi. Sed Dominus dixit Luc. v. 34. quod (a) non possunt filii sponsi ieiunare, quamdiu cum ipsis est sponsus: est autem cum omnibus iustus spiritualiter eos inhabitans: unde Dominus dicit Matth. ult. 20. *Eccce ego vobiscum sum usque ad consummationem saeculi.* Ergo iusti ex statu-

(a) Valgata: Numquid potestis filios sponsi, dum cum illis est sponsus, facere ieiunare?

tuto Ecclesiae non obligantur ad ieiunandum.

Respondere dicendum, quod, sicut supra dictum est (1. 2. quæst. xc. art. 2. & quæst. xcvi. art. 2. & 6.) statuta communia proponuntur, secundum quod multitudinè conveniunt. Et ideo legislator in eis statuendis attendit id quod communiter habetur, & in pluribus accidit. Si quid autem (a) ex speciali causa in aliquo invenitur, quod observantiae statuti repugnet, non intendit talem legislator ad statuti observantiam obligare. In quo tamen est discretio adhibenda. Nam si causa sit evidens, per seipsum licite potest homo statuti observantiam præterire, præsertim consuetudine interveniente, vel si non posset de facili recursus ad superiorem haberi. Si vero causa sit dubia, debet aliquis ad superiorem recurrere, qui habet potestatem in talibus dispensandi. Et hoc observandum est (b) in ieiuniis ab Ecclesia institutis, ad quæ omnes communiter obligantur, nisi in eis fuerit aliquod speciale impedimentum.

Ad primum ergo dicendum, quod præcepta Dei sunt præcepta iuris naturalis, quæ secundum se sunt de necessitate salutis. Sed statuta Ecclesiae sunt de his quæ non per se sunt de necessitate salutis, sed solum ex institutione Ecclesiae. Et ideo possunt esse aliqua impedimenta, propter quæ aliqui ad observanda ieiunia huiusmodi non tenentur.

Ad secundum dicendum, quod in pueris maxime est evidens causa non ieiunandi: tum propter debilitatem naturæ, ex qua provenit quod indigent frequenti cibo, & non multo simul assumpto; tum etiam quia indigent multo nutrimento propter necessitatem augmenti, quod fit de residuo alimentis. Et ideo quamdiu sunt in statu augmenti, quod est ut in pluribus usque ad finem tertii septennii, non tenentur ad ecclesiastica ieiunia observanda. Conveniens tamen est ut etiam in hoc tempore se ad ieiunandum exerceant, plus vel minus secundum modum suæ ætatis. Quandoque tamen magna tribulatio imminente, in signum penitentiae arctioris etiam pueris ieiunia indicuntur; sicut etiam de iumentis legitur Ionæ iii. 7. *Homines, & iumenta non gustent quidquam, nec aquam bibant.*

Ad tertium dicendum, quod circa peregrinos, & operarios distinguitur idum vi-

detur. Quia si peregrinatio, & operis labor commode differri possit, aut diminui absque detrimento corporalis salutis, & exterioris status, qui requiritur ad conservationem corporalis, vel spiritualis vitæ, non sunt propter hoc Ecclesiae ieiunia prætermittenda. Si autem imminet necessitas statim peregrinandi, & magnas dietas faciendi, vel etiam multum laborandi, vel propter conservationem vitæ corporalis, vel propter aliquid necessarium ad vitam spiritualem, & simul cum hoc non possunt Ecclesiae ieiunia observari, non obligatur homo ad ieiunandum: quia non videtur fuisse intentio Ecclesiae statuents ieiunia, ut per hoc impediret alias pias, & magis necessarias causas. Videtur tamen in talibus recurrendum esse ad superioris dispensationem; nisi forte ubi est ita consuetum: quia ex hoc ipso quod prælati dissimulant, videtur annuere.

Ad quartum dicendum, quod pauperes qui possunt sufficienter habere quod eis sufficiat ad unam comestionem, non excusantur propter paupertatem a ieiuniis Ecclesiae; a quibus tamen excusantur illi qui frustatim elemosynas mendicant, qui non possunt simul habere quod eis ad victum sufficiat.

Ad quintum dicendum, quod illud verbum Domini tripliciter potest exponi. Uno modo secundum Chrysostomum (hom. xxxi. in Matth. a med.) qui dicit, quod discipuli, qui filii sponsi dicuntur, adhuc imbecillius dispositi erant: unde vestimento veteri comparantur. Et ideo in præsentia corporali Christi erant magis fovendi in quadam dulcedine, quam in austeritate ieiunii exercendi. Et secundum hoc magis convenit ut cum imperfectis, & novitiis in ieiuniis dispenseretur, quam cum antiquioribus, & perfectis, ut patet in Glossa (ord.) super illud Psal. cxxx. *Sicut ablatus est super matrem suam.* Alio modo potest dici secundum Hieronymum (hab. ex Beda Lib. II. comment. in Luc. cap. v. a med.) quod Dominus ibi loquitur de ieiunio veterum observantiarum. Unde per hoc significat Dominus, quod Apostoli non erant in veteribus observantiis detinendi, quos oportebat gratiæ novitate perfundi. Tertio modo secundum Augustinum (Lib. II. de consens. Evangelist. cap. xxvii. prope fi.) qui distinguit duplex ieiunium. Quorum unum pertinet ad humilitatem tribulationis: & hoc

non

(a) Ita mss. & ed. passim. Al. ex causa.

(b) Ita idem mss. & ed. Al. desin.

non competit viris perfectis, qui dicuntur filii sponsi: unde ubi Lucas dicit, *Non possunt filii sponsi ieiunare*, dicit Matth. (cap. ix. 15.) *Non possunt filii sponsi lugere*. Aliud autem est quod pertinet ad gaudium mentis in spiritualia suspensæ: & tale ieiunium convenit perfectis.

## ARTICULUS V. 710

*Utrum convenienter determinentur tempora ieiunii Ecclesiæ.*

IV. dist. xv. q. 1. c. 111. art. 3. quæst. 1.

**A**D quintum sic proceditur. Videtur quod inconvenienter determinentur tempora ieiunii Ecclesiæ. Christus enim legitur Matth. iv statim post baptismum ieiunium inchoasse. Sed nos Christum imitari debemus, secundum illud I. Corinth. iv. 16. *Imitatores mei estote, sicut & ego Christi*. Ergo & nos debemus ieiunium peragere statim post Epiphaniam, in qua baptismus Christi celebratur.

2. Præterea. Cæremonialia veteris legis non licet in nova lege observare. Sed ieiunia in quibusdam determinatis mensibus pertinent ad solemnitates veteris legis: dicitur enim Zachar. viii. 19. *Ieiunium quarti, & ieiunium quinti, & ieiunium septimi, & ieiunium decimi erit domui Indæ in gaudium, & letitiam, & in solemnitates præclaras*. Ergo ieiunia specialium mensium, quæ dicuntur quatuor temporum, in Ecclesiâ inconvenienter observantur.

3. Præterea. Secundum Augustinum in Lib. II. de consensu Evangelist. (cap. xxvii. ad fi.) sicut est ieiunium afflictionis, ita est ieiunium exultationis. Sed maxime exultatio spiritualis imminet fidelibus ex Christi resurrectione. Ergo in tempore (a) Quinquagesimæ, quod Ecclesiâ solemnizatur propter dominicam resurrectionem, in diebus dominicalibus, in quibus memoria resurrectionis agitur, debent aliqua ieiunia indici.

Sed contra est communis Ecclesiæ consuetudo.

Respondeo dicendum, quod, sicut supra dictum est (art. 1. & 3. h. quæst.) ieiunium ad duo ordinatur, scilicet ad

deletionem culpæ, & ad elevationem mentis in superna. Et ideo illis temporibus specialiter fuerunt ieiunia indicenda in quibus oportebat homines a peccato purgari, & mentem fidelium elevari in Deum per devotionem: quæ quidem præcipue imminet ante paschalem solemnitatem, in qua & culpæ per baptismum relaxantur, qui solemnitatem in vigilia Paschæ celebratur, quando recolitur dominica sepultura, quia per baptismum consequimur Christo in mortem, ut dicitur ad Rom. vi. In festo etiam Paschæ oportet maxime mentem hominis per devotionem elevari ad æternitatis gloriam, quam Christus resurgendo inchoavit: & ideo in immediate ante solemnitatem paschalem Ecclesiâ statuit esse ieiunandum: & eadem ratione in vigiliis præcipuarum festivitatum, in quibus præparari nos oportet ad festa futura devoto celebranda. Similiter etiam consuetudo ecclesiastica habet ut in singulis quartis anni sacri ordines conferantur: (b) ad quorum susceptionem oportet per ieiunium præparari & eos qui ordinant, & illos qui ordinandi sunt, & etiam totum populum, pro cuius utilitate ordinantur. Unde & legitur Lucæ vi. quod Dominus ante discipulorum electionem exivit in montem orare: quod exponens Ambrosius (sup. illud, *Et erat pernoctans*) dicit: *Quid te facere convenit, cum vis aliquod officium pietatis adoriri, quando Christus missurus Apostolos prius oravit?*

Ratio autem numeri, quantum ad quadragesimale ieiunium, est triplex secundum Gregorium (hom. xvi. in Evang. a med.) Primo quidem quia virtus Decalogi per libros quatuor sancti Evangelii impletur: denarius etenim quater ductus in quadragenarium surgit. Vel quia in hoc mortali corpore ex quatuor elementis subsistimus, per cuius voluntatis præceptis dominicis contrainus, quæ per Decalogum sunt accepta. Unde dignum est ut eandem carnem quaterdecies affligamus. Vel quia ita offerre contendimus Deo decimas dierum: dum enim per trecentos & sexaginta quinque dies annus ducitur, nos autem per triginta & sex dies affligimur (qui sunt ieiunabiles in tex septimanis Quadragesimæ) quasi anni nostri decimas Deo damus.

Se-

(a) In margini est. *Alcan. legitur paschali, & mox pro quod in textu habetur in quo.* (b) Ita per Gregorium edit. omnes quas vidimus. *Edicere plures, & edic. vultas sacri ordines conferantur: & in cuius signum Dominus quatuor millia hominum de septem populis sativit, per quos significatur annus (Edit. Rom. significatur anni) novi testamenti, ut Hieronymus dicit ibidem. Hac adiectura prius paravit Gesta, quæ Flavio, & Nestorio fecit fuit.*

Secundum Augustinum autem (Lib. II. de doctr. Christi. cap. xvi. a med.) additur quarta ratio. Nam creator est Trinitas, Pater, & Filius, & Spiritus sanctus: creaturae vero invisibili debetur ternarius numerus: diligere enim iubemur Deum ex toto corde, & ex tota anima, & ex tota mente; creaturae vero visibili debetur quaternarius propter calidum, & frigidum, humidum, & siccum. Sic ergo per denarium significantur omnes res: qui si ducatur per quaternarium, qui competit corpori, per quod administratio geritur, quadragesimum numerum coniecit.

Singula vero ieiunia quatuor temporum tribus diebus continentur propter numerum mensium, qui competit cuilibet tempori; vel propter numerum sacrorum ordinum, qui in his temporibus conferuntur.

Ad primum ergo dicendum, quod Christus baptismo non indiguit propter seipsum, sed ut nobis baptismum commendaret. Et ideo sibi non competebar ut ante baptismum suum ieiunaret, sed post baptismum, ut nos invitaret ad ieiunandum ante nostrum baptismum.

Ad secundum dicendum, quod Ecclesia non servat ieiunia quatuor temporum nec omnino eisdem temporibus quibus Iudei, nec etiam propter causas easdem. Illi enim ieiunabant in Iulio, qui est quartus mensis ab Aprili, quem primum habent, quia tunc Moyses descendens de monte Sinai tabulas legis confregit, (Exod. xxxii.) & iuxta Hieremiam muri primum rupti sunt civitatis (Hierem. xxxix.) In quinto autem mense, qui apud nos vocatur Augustus, quia cum propter exploratores seditio esset orta in populo, iussi sunt in montem non ascendere (Num. xiv.) & in hoc mense a Nabuchodonosor (Hierem. lii.) & post a Tito templum Hierosolymis est incensum. In septimo vero, qui appellatur October, Godolias occisus est, & reliquiae populi dissipatae (Hierem. xli.). In decimo vero mense, qui apud nos Ianuarius dicitur, populus cum Ezechiele in captivitate positus audivit templum esse subversum. (Ezech. iv.)

Ad tertium dicendum, quod ieiunium exultationis ex instinctu Spiritus sancti procedit, qui est spiritus libertatis: & ideo hoc ieiunium sub praecepto cadere non debet. Ieiunia ergo quae praecepto Ecclesiae insinuantur, sunt magis ieiunia afflictionis, quae non conveniunt in die-

bus laetitiae. Propter quod non est ieiunium ab Ecclesia institutum in toto paschali tempore, nec etiam in diebus dominicis: in quibus si quis ieiunaret contra consuetudinem populi christiani, quae, ut Augustinus dicit (epist. xxxvi. al. lxxxvi. parum a princ.) est pro lege habenda, vel etiam ex aliquo errore (sicut Manichaei ieiunant, quasi necessarium tale ieiunium arbitrantur) non esset a peccato immunis. Quamvis ipsum ieiunium secundum se consideratum omni tempore sit laudabile, secundum quod Hieronymus dicit ad Lucinum (epist. xxviii. ad h. & hab. cap. Utinam dist. lxxvi.) Utinam omni tempore ieiunare possimus.

## ARTICULUS VI. 711

Utrum requiratur ad ieiunium quod homo tantum semel comedat.

IV. dist. viii. quest. 1. art. 4. quest. 2. ad 2. & dist. xv. quest. iiii. art. 4. quest. 1. & 2.

AD sextum sic proceditur. Videtur quod non requiratur ad ieiunium quod homo tantum semel comedat. Ieiunium enim, ut dictum est (art. 2. huius quest.) est actus virtutis abstinentiae, quae quidem non minus observat debitam quantitatem cibi, quam comestionis numerum. Non autem taxatur ieiunantibus quantitas cibi. Ergo nec numerus comestionis taxari debet.

2. Praeterea. Sicut homo nutritur cibo, ita & potu: unde & potus ieiunium solvit, propter quod non possumus post potum Eucharistiam accipere. Sed non est prohibitum quin pluries bibamus diversis horis diei. Ergo etiam non debet esse prohibitum ieiunantibus quin pluries comedant.

3. Praeterea. Electuaria quidam cibi sunt; quae tamen a multis in diebus ieiunii post comestionem sumuntur. Ergo unitas comestionis non est de ratione ieiunii.

Sed in contrarium est communis consuetudo populi christiani.

Respondeo dicendum, quod ieiunium ab Ecclesia instituitur ad concupiscentiam refrenandam; ita tamen quod natura salvetur. Ad hoc autem sufficere videtur unica comestio, per quam homo potest naturae satisfacere; & tamen concupiscentiae aliquid detrahatur, diminuen-

do comestionis vices. Et ideo Ecclesiae

M

mo-

J. Tb. O. r. Tom. XXIII.

moderatione statutum est ut semel in die a ieiunantibus comedatur.

Ad primum ergo dicendum, quod quantitas cibi non potuit eadem omnibus taxari propter diversas corporum complexionem, ex quibus contingit quod unus maiori, alter minori cibo indiget; sed ut plurimum omnes possunt naturam satisficere per unicam comestionem.

Ad secundum dicendum, quod duplex est ieiunium. Unum quidem naturae, quod requiritur ad Eucharistiae sumptionem; & hoc solvitur per quemlibet potum, etiam aquae, post quem etiam non licet Eucharistiam sumere. Est autem aliud ieiunium Ecclesiae, quod dicitur *ieiunium ieiunantis*: & istud non solvitur nisi per ea quae Ecclesia interdicere intendit instituendo ieiunium. Non autem intendit Ecclesia interdicere abstinentiam potus; qui magis sumitur ad alterationem corporis, & digestionem ciborum assumptorum, quam ad nutritionem, licet aliquo modo nutriet: & ideo licet pluries ieiunantes bibere. Si autem quis immoderate potu utatur, potest peccare, & meritum ieiunii perdere; sicut etiam si immoderate cibum in una comestione assumat.

Ad tertium dicendum, quod electuaria etiam aliquo modo nutrant, non tamen principaliter assumuntur ad nutrimentum, sed ad digestionem ciborum. Unde non solvunt ieiunium, sicut nec altarium medicinarum assumptio; nisi forte aliquis in fraudem electuaria in magna quantitate assumat per modum cibi.

#### ARTICULUS VII. 723

*Utrum hora nona convenienter taxetur ad comedendum his qui ieiunant.*

*IV. dist. xv. quest. III. art. 3. quest. 3.*

**A**D septimum sic proceditur. Videtur taxetur ad comedendum his qui ieiunant. Status enim novi Testamenti est perfectior quam status veteris Testamenti. Sed in veteri Testamento ieiunabant usque ad vespere: dicitur enim Levit. xxiii. 32. *Sabbatum est: affigetis animas vestras*; & postea sequitur: *A vespere usque ad vespere celebrabitis sabbata vestra*. Ergo multo magis in novo Testamento ieiunium debet indicii usque ad vespere.

2. Præterea, ieiunium ab Ecclesia institutum omnibus imponitur. Sed non omnes possunt determinate cognoscere horam nonam. Ergo videtur quod taxatio horae nonae non debeat cadere sub statuto ieiunii.

3. Præterea, ieiunium est adus virtutis abstinentiae, ut supra dictum est (art. 2. hu. quest. 11). Sed virtus moralis non eodem modo accipit medium quoad omnes: quia quod est multum uni, est parum alteri, ut dicitur in II. Ethic. (cap. vi.) Ergo non debet ieiunantibus taxari hora nona.

Sed contra est quod Concilium Chalcedonense dicit: (hab. in quodam Concil. capitulari incerti Auctoris, loci, & tem. can. xxxix. to. 9. Concil. Vid. cap. Solent, de Consecrat. dist. 1.) *In Quadragesima nullatenus credendi sunt ieiunare qui ante manducaverint quam vespertinum celebretur officium*: quod quadragesimali tempore post nonam dicitur. Ergo usque ad nonam est ieiunandum.

Respondeo dicendum, quod, sicut dictum est (art. 1. & 5. hu. quest.) ieiunium ordinatur ad deletionem, & cohibitionem culpae. Unde oportet quod aliquid addat supra communem consuetudinem; ita tamen quod per hoc non multum natura gravetur. Est autem debita, & communis consuetudo comedendi hominis circa horam sextam: tunc quia iam videtur, esse completa digestio nocturno tempore naturali calore interioris revocato propter frigus noctis circumstantis, & diffusio humoris per membra, cooperante ad hoc calore diei usque ad summum Solis ascensum: tunc etiam quia tunc præcipue natura corporis humani indiget iuvare contra exteriorum aeris calorem, ne humores interioris adurantur. Et ideo ut ieiunans aliquam afflictionem sentiat pro culpae satisfactione, conveniens hora comedendi taxatur ieiunantibus circa horam nonam.

Convenit etiam ista hora mysterio passionis Christi, quæ completa fuit hora nona, quando *inclinato capite, tradidit spiritum*. Ieiunantes enim, dum suam carnem affligunt, passioni Christi conformantur, secundum illud ad Galat. v. 24. *Qui autem Christi sunt, carnem suam crucifixerunt cum vitiis, & concupiscentiis*.

Ad primum ergo dicendum, quod status veteris Testamenti comparatur nocti; status vero novi Testamenti, diei, secundum illud ad Rom. xiii. 12. *Nox*

*per-*



*præcessit, dies autem appropinquavit.* Et ideo in veteri Testamento ieiunabant usque ad noctem, non autem in novo Testamento.

Ad secundum dicendum, quod ad ieiunium requiritur hora determinata, non secundum lubricum examinationem, sed secundum grossam estimationem: sufficit enim quod sit circa horam novam: & hoc de facili quilibet cognoscere potest.

Ad tertium dicendum, quod modicum augmentum, vel etiam modicus defectus non multum potest nocere. Non est autem magnum temporis spatium quod est ab hora sexta, in qua communiter homines comedere consueverunt, usque ad horam novam, quæ ieiunantibus determinatur. Et ideo talis taxatio temporis non multum potest alicui nocere, cuiuscumque conditionis existat: vel si forte propter infirmitatem, vel ætatem, aut aliquid huiusmodi, hoc eis in magnum gravamen cecideret, esset cum eis in ieiunio dispensandum, vel ut aliquantulum prævenirent horam.

# ARTICULUS VIII. 713

*Utrum convenienter ieiunantibus indicatur abstinentia a carnibus, & ovis, & lacticiis.*

IV. dist. xv. quæst. III. art. 4. quæst. 2.

**A**D octavum sic proceditur. Videtur quod inconvenienter ieiunantibus indicatur abstinentia a carnibus, ovis, & lacticiis. Dicitur etenim supra (art. 6. hu. quæst.) quod ieiunium est institutum ad concupiscentias carnis refrenandas. Sed magis concupiscentiam provocat potus vini quam esus carniū, secundum illud Proverb. xx. 1. *Luxuriosa res est vinum:* & ad Ephes. v. 18. *Nolite inebriari vino, in quo est luxuria.* Cum ergo non interdicitur ieiunantibus potus vini, videtur quod non debeat interdici esus carniū.

2. Præterea. Aliqui pisces ita delectabiliter comeduntur, sicut quedam animalium carnes. Sed concupiscentia est appetitus delectabilis, ut supra habitum est (1. 2. quæst. xxx. art. 1.) Ergo in ieiunio, quod est institutum ad concupiscentiam refrenandam, sicut non interdicitur esus piscium, ita non debet interdici esus carniū.

3. Præterea. In quibusdam ieiuniorum

diebus aliqui ovis, & caseo utuntur. Ergo pari ratione in ieiunio quadragesimali talibus homo uti potest.

Sed contra est communis fidelium consuetudo.

Respondeo dicendum, quod, sicut supra dictum est (art. 6. hu. quæst.) ieiunium ab Ecclesia est institutum ad refrenandas concupiscentias carnis, quæ quidem sunt delectabilium secundum tactum, quæ consistunt in cibis, & venereis. Et ideo illos cibos Ecclesia ieiunantibus interdixit qui & in comedendo maximam habent delectationem, & iterum maxime hominem ad venera provocant. Huiusmodi autem sunt carnes animalium in terra (a) quiescentium, & respirantium, & quæ ab eis procedunt, sicut lacticia ex gressibilibus, & ova ex avibus. Quia enim huiusmodi magis conformentur humano corpori, plus delectant, & magis conferunt ad humani corporis nutrimentum: & sic ex eorum comestione plus superfluit, ut veretur in materiam feminis, cuius multiplicatio est maximum incitamentum luxuriæ. Et ideo ab his cibis præcipue ieiunantibus Ecclesia statuit esse abstinendum.

Ad primum ergo dicendum, quod ad actum generationis tria concurrunt; scilicet calor, spiritus, & humor. Ad calorem quidem maxime cooperatur vinum, & alia calefacientia corpus; ad spiritus autem videntur cooperari inflativa; sed ad humorem maxime cooperatur usus carniū, ex quibus multum de alimento generatur. Alteratio autem caloris, & multiplicatio spirituum cito transit; sed substantia humoris diu manet. Et ideo magis interdicitur ieiunantibus usus carniū quam vini, vel leguminum, quæ sunt inflativa.

Ad secundum dicendum, quod Ecclesia ieiunium instituens intendit ad id quod communius accidit. Esus autem carniū est magis delectabilis communiter quam esus piscium; quamvis in quibusdam aliter se habeat. Et ideo Ecclesia magis ieiunantibus prohibuit esum carniū quam esum piscium.

Ad tertium dicendum, quod ova, & lacticia ieiunantibus interdiciuntur, in quantum sunt ex animalibus exorta carnes habentibus. Unde principaliter interdiciuntur carnes quam ova, vel lacticia. Similiter etiam inter alia ieiunia solemnius est quadragesimale ieiunium: tum quia observatur ad imitationem Christi

(a) *La cum cod. Alcan. alijsque Theologi & Nicolai, Al. nascentium.*

fi: tum etiam gula per ipsum disponitur ad redemptionis nostrae mysteria devote celebrantia. Et ideo in quolibet ieiunio interdicitur ei carnium; in ieiunio autem quadragesimali interdicitur universaliter etiam ova, & lactinia: circa quorum abstinentiam in aliis ieiuniis diversae consuetudines existunt apud diversos; quas quisque observare debet secundum morem eorum inter quos conversatur. Unde Hieronymus dicit (epist. xxviii. ad Lucinium sub. fi.) de ieiuniis loquens: *Unaqueque provincia abundet in suo sensu, & praecepta maiorum leges apostolicas arbitretur.* (a)

## QUAESTIO CXLVIII.

De gula,

in sex articulos divisa.

**D**Einde considerandum est de gula: & circa hoc quaeruntur sex.

Primo, utrum gula sit peccatum.

Secundo, utrum sit peccatum mortale.

Tertio, utrum sit maximum peccatorum.

Quarto de speciebus eius.

Quinto, utrum sit vitium capitale.

Sexto de filiabus eius.

## ARTICULUS I.

714

Utrum gula sit peccatum.

Mal. quæst. xiv. art. 1. 2. &amp; 3.

**A**D primum sic proceditur. Videtur enim quod gula non sit peccatum. Dicitur enim Dominus Matth. xv. xi. *Quod in-*

*trat in os, non inquinat hominem.* Sed gula est circa cibos, qui intrant in hominem. Cum ergo omne peccatum coinquinat hominem, videtur quod gula non sit peccatum.

2. Præterea. Nullus peccat in eo quod vitare non potest. Sed gula consistit in immoderantia cibi, quam non potest homo vitare: dicit enim Gregorius XXX. Moral. (cap. xiv. ante med.) *Quia per esum voluptas necessitati miscetur; quid necessitas petas, & quid voluptas suppetat ignoratur: & Augustinus dicit in X. Confess. (cap. xxxi. sub fi.) Quis est, Domine, qui aliquantulum extra metas necessitatis cibum non sumit? Ergo gula non est peccatum.*

3. Præterea. In quolibet genere peccati primus motus est peccatum. Sed primus motus sumendi cibum non est peccatum: alioquin fames, & sitis essent peccata. Ergo gula non est peccatum.

Sed contra est quod Gregorius XXX. Moral. (cap. xxi. aliquant. a princ.) dicit, quod *ad conficiendum spirituales agnis non assurgitur, nisi prius intra nosmet ipsos hostis positis, gula videlicet appetitus, edomatur.* Sed interior hostis hominis est peccatum. Ergo gula est peccatum.

Respondeo dicendum, quod gula non nominat quemlibet appetitum edendi, & bibendi, sed inordinatum.

Dicitur autem appetitus inordinatus ex eo quod recedit ab ordine rationis, in quo bonum virtutis moralis consistit. Ex hoc autem dicitur aliquid esse peccatum quod virtuti contrariatur. Unde manifestum est quod gula est peccatum. (b)

Ad

(a) Hucusque S. Thomas; hoc vero in textu addit Nicolaus. Unde iterum Gregorius ut supra inter innumera vitia contra quæ oppositis virtutibus pugnant, gulam ponit, & mentem ipsam dicit sub gravi confusione detineri a spiritualibus exercitiis cogitativis repelli, quando infirma in carnis prælio gula gladiis confusa superatur: quia cum se profertur parvis respicit, confingere cum maioribus conatur. Et in Libro de cura pastoralis part. iii. admo. 20. Unde, inquit, hosti callido, qui primi hominis sensum in concupiscentia pami aperit, sed in peccati laqueo retinet, divina voce dicitur: *Peccote ac ventre repes* (Gen. 3.) *ut si aperte dixeretur: Cogitatione et infirmitate super humana corda dominabuntur &c.* Et Basilus in serm. de abstinencia verum: *Cave ne te adversarius simili argua primum parvorum peccata circumveniat, & quam primum de parvis deliciis appetat: nam qui callida estia obsequia sua malitiose illam spoliavit, nihil est quod iam veritate ne te per hoc profectissimum venenum inficiat.*

(b) Nicolaus in textu addit quæ sequuntur. Hinc licet olim in ieiunio non a carnibus tantum, sed & a vino abstinere (præsertim vero in ieiunio Quadragesimæ) Christiani solerent; facilius tamen subinde circa viam abstinentiam quam carnium generaliter dispensatum est, ut iam uti liceat vino, sed non carnibus, quorum usus hec communiter omnibus nunquam fuit. Quod autem simul cum carnium abstinentia contingeretur olim abstinentia vini, patet ex verbis Augustini dicentis Dominica 1. Quadragesimæ serm. 1. *Qui abstinentia non a carnibus, quibus (alitis diebus) utitur; qui non abstinentia a vino, quæ medicata uti licet; qui vitamus quæ aliquando ferunt; in primis fugiamus peccata, quæ nunquam ferunt; & serm. 3. Cessat vino, vel carnis, ut qui nobis vicinus fuit, acis, saltem per panem sua vitamus & Dominus.* Item ex verbis Hieronymi super 2. cap. Danielis, ubi dicitur panem desiderabilem non comedite, nec introisse vinum sub carnem in os eius; hoc exemplo docemur tempore ieiunii a cibis delicatioribus abstinere (quod igitur nunc patet diu panem desiderabilem) nec carnes comedere; nec vinum libere. Item ex verbis Basilii hom. 1. de ieiunio. (quo ieiunium Quadragesimæ intelligit) *Carnes non edis, & a vino abstinis &c.* Item ex verbis Theophylli Alexandrini epist. 3. paschali universis Aegypti Episcopis directæ: *Neququam in diebus*

Quæ

Ad primum ergo dicendum, quod id quod intrat in hominem per modum cibi, secundum suam substantiam, & naturam, non conquinat hominem spiritualiter. Sed Iudæi, contra quos Dominus loquitur, & Manichæi opinabantur, quod aliqui cibi immundos facerent, non propter figuram, sed propter propriam naturam. Inordinata autem ciborum concupiscentia spiritualiter hominem conquinat.

Ad secundum dicendum, quod, sicut dictum est (in corp. art.) vitium gulæ non consistit in substantia cibi, sed in concupiscentia non regulata ratione. Et ideo si aliquis excedat in quantitate cibi, non propter concupiscentiam cibi, sed æstimans id sibi necessarium esse, non pertinet hoc ad gulam, sed ad aliquam imperitiam. Sed hoc solum pertinet ad gulam quod aliquis propter concupiscentiam cibi delectabilis scienter excedat mensuram in edendo.

Ad tertium dicendum, quod duplex est appetitus. Unus quidem naturalis, qui pertinet ad vires animæ vegetabilis, in quibus non potest esse virtus, & vitium, eo quod non possint subici rationi: unde & vis appetitiva dividitur contra reventivam, digestivam, & expulsiuam: & ad talem appetitum pertinet esuries, & sitis. Est autem & alius appetitus sensitivus, in cuius concupiscentia vitium gulæ consistit. Unde primus motus gulæ importat inordinationem in appetitu sensitivo, quæ non est sine peccato.

## ARTICULUS II. 715

*Utrum gula sit peccatum mortale.*

*Inf. quest. cliv. art. 2. ad 6. & mal. quest. xlv. art. 2. & Rom. xlii. lect. 3. & Gal. v. lect. 4.*

**A**D secundum sic proceditur. Videtur quod gula non sit peccatum mortale. Omne enim peccatum mortale contrariatur alicui præcepto Decalogi: quod

*5. Th. Oper. Tom. XXIII.*

de gula non videtur. Ergo gula non est peccatum mortale.

2. Præterea. Omne peccatum mortale contrariatur caritati, ut ex supra dictis patet (quæst. cxxxix. art. 3.) Sed gula non opponitur caritati neque inquantum ad dilectionem Dei, neque inquantum ad dilectionem proximi. Ergo gula non est peccatum mortale.

3. Præterea. Augustinus dicit in sermone de purgatorio: *Quoties aliqui in cibo, aut potu plus accipit quam necesse est, ad minuta peccata pertinere noverit.* Sed hoc pertinet ad gulam. Ergo gula computatur inter minuta, idest inter venialia peccata.

4. Sed contra est quod Gregorius dicit in XXX. Moral. (cap. xlii. cir. med.) *Dominante gule vitio, omne quod homines fortiter egerunt, perdunt; & dum ventris non restringitur, simul cunctæ virtutes obruuntur.* Sed virtus non tollitur nisi per peccatum mortale. Ergo gula est peccatum mortale.

Respondeo dicendum, quod, sicut dictum est (art. præc.) vitium gulæ proprie consistit in concupiscentia inordinata. Ordo autem rationis concupiscentiam ordinantis dupliciter tolli potest: uno modo quantum ad ea quæ sunt ad finem, prout scilicet non sunt ita commensurata ut sint proportionata fini; alio modo quantum ad ipsum finem, prout scilicet concupiscentia hominem avertit a fine debito. Si ergo inordinatio concupiscentiæ accipiat in gula secundum aversionem a fine ultimo, sic gula erit peccatum mortale. Quod quidem contingit quando delectationi gulæ inhæret homo tamquam fini, propter quem Deum contemnit, paratus scilicet contra præcepta Dei agere, ut delectationes huiusmodi assequatur.

Si vero in vitio gulæ intelligatur inordinatio concupiscentiæ tantum secundum ea quæ sunt ad finem, utpote quia nimis concupiscit delectationes ciborum, non tamen ita quod propter hoc faceret

M 3 ret

*Quadragesima vini pendulum suspensus, nec in precinetu belli, ubi necessarius labor, & sudor est, adulæ carnis delectatur. Qui autem legum præcepta custodians, ignorans vinum in ieiunio, ipsum carnis respiciat. Ac licet addat Voces Danielis in Babylone abstinentis exemplum nobis fortitudinis reliquiss, ut avrem deinceps atarum doceret ieiuniarum tempore a carnis, & vini abstinendum; abstinentia tamen carnis magis visa est Ecclesiæ necessaria quam abstinentia vini ad ieiunii rationem; & sic in vino, non in carnis dispensavit. Unde abstinentia vini modo in ieiunio consiliū tantum est, non præcept, sicut & abstinentia piscium; a lequibus tamen olim abstinuissē Christianos in ieiunio illo Chrysostomus indicat hom. 3. ad populum; & similiter aridi cibi, hoc est panis, & aqua, quibus ultima hebdomada Quadragesimæ ante Paschatis diem vescabantur. Cum sola ergo abstinentia generale carnis in præcepto remissit ut a lacte, caseo, & ab ovīs in ieiunio Quadragesimæ communiter debeat abstinere, quia nimirum per ista ut qui per istos d'it a carnis animalium abstinent, ab omnibus atque a ferocissimæ carnis trahant originem, ita nemus, sicut in IV. Part. Decretorum cap. xlix. legitur Ivo Carnotensis. Quarevis nunc satis communiter in aliquibus locis propter necessitatem in lactis & casei abstinentia dispensetur,*

ret aliquod contra legem Dei; est peccatum veniale.

Ad primum ergo dicendum, quod vitium gulæ habet quod sit peccatum mortale, inquantum avertit a fine ultimo: & secundum hoc per quamdam reductionem opponitur præcepto de sanctificatione sabbati, in quo præcipitur quies in fine ultimo. Non enim omnia peccata mortalia directe contrariantur præceptis Decalogi, sed solum illa quæ iniustitiam continent: quia præcepta Decalogi specialiter pertinent ad iustitiam, & partes eius, ut supra habitum est (quæst. cxxii. art. 1.)

Ad secundum dicendum, quod inquantum avertit a fine ultimo, contrariatur gula dilectioni Dei, qui est super omnia, sicut finis ultimus, diligendus: & secundum hoc solum gula est peccatum mortale.

Ad tertium dicendum, quod illud verbum Augustini intelligitur de gula, inquantum importat inordinationem concupiscentiæ solum circa ea quæ sunt ad finem.

Ad quartum dicendum, quod gula dicitur virtutes auferre, non tam propter se, quam etiam propter vitia quæ ex ea oriuntur. Dicit enim Gregorius in Pastoralis (par. iii. cap. xx. aliquant. a princ.) *Dum venter per ingluviem tenditur, virtutes anime per luxuriam destruntur.*

### ARTICULUS III. 716

*Utrum gula sit maximum peccatorum.*

**A**D tertium sic proceditur. Videtur quod gula sit maximum peccatorum. Magnitudo enim peccati ex magnitudine pœnæ consideratur. Sed peccatum gulæ est gravissime punitum: dicit enim Chrysostomus (hom. xlii. sic in Matth. aliquant. a princ.) *Adam in temperantia ventris expulsi a paradiso: diluvium, quod fuit tempore Noe, ipsa fecit, & pœnam Sodomorum, secundum illud Ezech. xvi. 49. Hec fuit iniquitas sororis tue Sodome, saturitas panis &c.* Ergo peccatum gulæ est maximum peccatorum.

2. Præterea. Causa in quolibet genere est porior. Sed gula videtur esse causa aliorum peccatorum: quia super illud Psal. cxxxv. *Qui percussit Aegyptum cum primogeniis eorum*, dicit Glossa (ord.

Cassiod.) „Luxuria, concupiscentia, superbia sunt ea quæ primo venter generat.“ Ergo gulæ est gravissimum peccatorum.

3. Præterea. Post Deum homo debet seipsum maxime diligere, ut supra habitum est (quæst. xxv. art. 4.) Sed per vitium gulæ homo infert sibi ipsi nocuentum: dicitur enim Eccli. xxxvii. 34. *Propter crapulam multi obierunt.* Ergo gula est maximum peccatorum, ad minus præter peccata quæ sunt contra Deum.

Sed contra est quod vitia carnalia, inter quæ computatur gula, secundum Gregorium (implic. Lib. XXXIII. Moral. cap. xi. ante med.) sunt minoris culpæ.

Respondeo dicendum, quod gravitas alicuius peccati potest tripliciter considerari. Primo quidem, & principaliter secundum materiam in qua peccatur: & secundum hoc peccata quæ sunt circa res divinas, sunt maxima. Unde secundum hoc vitium gulæ non est maximum: est enim circa ea quæ ad sustentationem corporis spectant.

Secundo autem ex parte peccantis: & secundum hoc peccatum gulæ magis alleviatur quam aggravetur, tum propter necessitatem assumptionis ciborum, tum etiam propter difficultatem discernendi, & moderandi id quod in talibus convenit.

Tertio vero modo ex parte effectus consequentis: & secundum hoc vitium gulæ habet quamdam magnitudinem, inquantum ex ea occasionantur diversa peccata.

Ad primum ergo dicendum, quod illæ pœnæ referuntur magis ad vitia quæ sunt consecuta ex gula, vel ad gulæ radicem, quam ad ipsam gulam. Nam primus homo expulsus est de paradiso propter superbiam, ex qua processit ad actum gulæ. Diluvium autem, & pœna Sodomorum sunt inducta propter peccata luxuriæ procedentia ex gula occasionaliter.

Ad secundum dicendum, quod ratio illa procedit ex parte peccatorum quæ ex gula oriuntur. Non autem oportet quod causa sit porior, nisi in causis per se. Gula autem non est causa illorum vitiorum per se, sed quasi per accidens, & per occasionem.

Ad tertium dicendum, quod gulofus non intendit suo corpori nocuentum inferre, sed in cibo delectari. Si autem nocuentum corporis sequatur, hoc est per

per accidens. Unde hoc non directe pertinet ad gravitatem gulæ: cuius culpam tamen aggravatur, si quis corporale detrimentum incurrat propter immoderatam cibi sumptionem.

ARTICULUS IV. 717

*Utrum convenienter species gulæ distinguantur secundum has quinque conditiones, præpropre, laute, nimis, ardentier, studiose.*

1. 2. quæst. lxxii. art. 9. cor. & ad 3. & IV. dist. xv. quæst. lxi. art. 4.

**A**D quartum sic proceditur. Videtur quod inconvenienter species gulæ distinguantur a Gregorio, qui XXX. Moral. (cap. xlii. a med.) dicit: *Quinque modis nos gulæ vitium tentat: aliquando namque indigentia tempora prævenit; aliquando lautiores cibos querit; aliquando quæ sumenda sunt, præparari accuratius appetit; aliquando in ipsa quantitate sumendi mensuram refectiois excedit; aliquando ipso æstu immensi desiderii aliquis peccat: & continentur in hoc verfu:*

*Præpropre, laute, nimis, ardentier, studiose.*

Prædicta enim diversificantur secundum diversas circumstantias. Sed circumstantiæ, cum sint accidentia actuum, non diversificant speciem. Ergo secundum prædicta non diversificantur species gulæ.

2. Præterea. Sicut tempus est quædam circumstantia, ita & locus. Si ergo secundum tempus una species gulæ accipitur, videtur quod pari ratione secundum locum, & alias circumstantias.

3. Præterea. Sicut temperantia observat debitas circumstantias, ita etiam & alie virtutes morales. Sed in vitiis quæ opponuntur aliis virtutibus moralibus, non distinguuntur species secundum diversas circumstantias. Ergo nec in gula.

Sed contra est verbum Gregorii indudum.

Respondendo dicendum, quod, sicut dictum est (art. 1. huius quæst.) gula importat inordinatam concupiscentiam edendi. In esu autem duo considerantur, scilicet ipse cibus qui comeditur, & eius comestio. Potest ergo inordinatio concupiscentiæ attendi dupliciter. Uno quidem modo quantum ad ipsum cibum qui

sumitur: & sic quantum ad substantiam, vel speciem cibi querit aliquis cibos *lautes*, idest pretiosos; quantum ad qualitatem, querit cibos nimis accurate præparatos, idest *studiose*; quantum autem ad quantitatem, excedit *nimis* in edendo.

Alio vero modo attenditur inordinatio concupiscentiæ quantum ad ipsam sumptionem cibi: vel quia prævenit debitum tempus comedendi, quod est *præpropre*: vel quia non servat modum debitum in edendo, quod est *ardenter*.

liidius vero (Lib. II. de sum. bono cap. xlii. ad fi.) comprehendit primum, & secundum sub uno, dicens quod gulosus excedit in cibo secundum *quid*, quantum, *quomodo*, & *quando*.

Ad primum ergo dicendum, quod corruptio diversarum circumstantiarum facit diversas species gulæ, propter diversa motiva, ex quibus moralium species diversificantur. In eo enim qui querit lautos cibos, excitatur concupiscentia ex ipsa specie cibi; in eo vero qui præoccupat tempus, deordinatur concupiscentia propter impatientiam moræ: & idem patet in aliis.

Ad secundum dicendum, quod in loco, & in aliis circumstantiis non invenitur aliud differens motivum pertinens ad usum cibi, quod faciat aliam speciem gulæ.

Ad tertium dicendum, quod in quibuscumque aliis vitiis diversæ circumstantiæ habent diversa motiva, oportet accipi diversas species vitiorum secundum diversas circumstantias. Sed hoc non contingit in omnibus, ut supra dictum est (1. 2. quæst. lxxii. art. 9.)

ARTICULUS V. 718

*Utrum gula sit vitium capitale.*

Mal. quæst. xlii. art. 1. cor. & ad 6. & quæst. xlii. art. 3. cor. & quæst. xiv. art. 4.

**A**D quintum sic proceditur. Videtur quod gula non sit vitium capitale. Vitia enim capitalia dicuntur ex quibus alia oriuntur secundum rationem causæ finalis. Sed cibus, circa quem est gula, non habet rationem finis: non enim propter se queritur, sed propter corporis nutritionem. Ergo gula non est vitium capitale.

2. Præterea. Vitium capitale aliquam principalitatem habere videtur in ratione peccati. Sed hoc non competit gula,

læ: quia videtur esse secundum suum genus minimum peccatorum, utpote plus appropinquans ad id quod est secundum naturam. Ergo gula non videtur esse vitium capitale.

3. Præterea. Peccatum contingit ex hoc quod aliquis recedit a bono honesto propter aliquid utile præsentis vitæ, vel delectabile sensui. Sed circa bona quæ habent rationem utilis, ponitur unum tantum vitium capitale, scilicet avaritia. Ergo & circa delectationes videtur esse ponendum unum tantum vitium capitale. Ponitur autem luxuria, quæ est maius vitium quam gula, & circa maiores delectationes. Ergo gula non est vitium capitale.

Sed contra est quod Gregorius XXXI. Moral. (cap. xvii. a med.) computat gulam inter vitia capitalia. (a)

Respondetur dicendum, quod, sicut supra dictum est (1. 2. quæst. lxxxiv. art. 3.) vitium capitale dicitur ex quo alia vitia oriuntur secundum rationem causæ finalis, inquantum scilicet habet finem multum appetibilem: unde ex eius appetitu homines provocantur multipliciter ad peccandum. Ex hoc autem aliquis finis redditur multum appetibilis quod habet aliquam de conditionibus felicitatis, quæ est naturaliter appetibilis.

Pertinet autem ad rationem felicitatis delectatio, ut patet in 1. Ethic. (cap. viii.) & in X. (cap. xii. vii. & viii.). Et ideo vitium gulæ, quod est circa delectationes tactus, quæ sunt præcipuæ inter alias, convenienter ponitur inter vitia capitalia.

Ad primum ergo dicendum, quod ipse cibis ordinatur quidem ad aliquid utile ad finem; sed quia ille finis, scilicet conservatio vitæ, est maxime appetibilis, quæ sine cibo conservari non potest, inde etiam est quod ipse cibis est maxime appetibilis: & ad hoc fertur labor humanæ vitæ ordinatur, secundum illud Eccle. vi. 7. *Omnis labor hominis in ore eius*. Et tamen magis gula videtur esse circa delectationes cibi quam circa cibos: propter quod, ut Augustinus dicit in Lib. de vera religione (cap. lxi. cir. princ.) quibus vilis corporis salus est, malum vesci, in quo scilicet delectatio est, quem saturari; cum

*omnis finis illius voluptatis sit non fruire, atque elurire.*

Ad secundum dicendum, quod finis in peccato accipitur ex parte conversionis; sed gravitas peccati accipitur ex parte aversionis. Et ideo non oportet vitium capitale quod habet finem maxime appetibilem, habere magnam gravitatem.

Ad tertium dicendum, quod delectabile est appetibile secundum se: & ideo secundum eius diversitatem ponuntur duo vitia capitalia, scilicet gula, & luxuria. Utile autem ex se non habet rationem appetibilis, sed secundum quod ad aliud ordinatur: & ideo in omnibus utilibus videtur esse una ratio appetibilitatis. Et propter hoc circa huiusmodi non ponitur nisi unum vitium capitale.

## ARTICULUS VI. 719

*Utrum convenienter assignentur gulæ quinque filie, scilicet inepta lætitia, scurrilitas, immunditia, multiloquium, & hebetudo mentis circa intelligentiam.*

*Mal. quæst. xiv. art. 4.*

**A**D sextum sic proceditur. Videtur quod inconvenienter assignentur gulæ quinque filie, scilicet *inepta lætitia, scurrilitas, immunditia, multiloquium, hebetudo mentis circa intelligentiam*. Inepta enim lætitia consequitur omne peccatum, secundum illud Proverb. 21. 24. *Qui lætatur, cum male fecerint, & exultant in rebus pessimis*. Similiter etiam hebetudo mentis invenitur in omni peccato, secundum illud Proverb. xiv. 22. *Errant qui operantur malum*. Ergo inconvenienter ponuntur filie gulæ.

2. Præterea. Immunditia, quæ maxime consequitur gulam, videtur ad vomitum pertinere, secundum illud Isa. xxviii. 8. *Omnes mensæ repletae sunt vomitu, sordibusque*. Sed hoc non videtur esse peccatum, sed poena peccati, vel etiam aliquid utile vel consilio cadens, secundum illud Eccle. xxxi. 25. *Si coactus fueris in edendo multum, surge e medio, & vomit, & refrigerabit te*. Ergo non debet poni inter filias gulæ.

3. Præterea. Isidorus (Lib. II. de sum. bon. cap. xlii. ad fin. & Lib. X. Etym. ad lit. 5.) ponit scurrilitatem filiam lu-

xii-

(a) Sic persequitur in textu Nicolai. Sic enim in cap. xvii. vel xxi. *Vitiorum regina superbia cum devotum plene exasperat, max illud septem principalibus vitiis quasi quibusdam suis ducibus ducendam trahit. Radix quippe cuncti mali superbia est; prima autem soboles eius principalia septem vitia de hac vincta radice proficiunt, scilicet inanis gloria, invidia, ira, tristitia (vel accidia) ventris ingluvis (vel gula) luxuria &c.*

xuriæ. Non ergo debet poni inter filias gulæ.

Sed contra est quod Gregorius XXXI. Moral. ( cap. xviii. a med. ) has filias gulæ assignat.

Respondeo dicendum, quod, sicut dictum est ( art. 1. 2. & 3. hu. quæst. ) gula proprie consistit. circa immoderatam delectationem quæ est in cibis, & potibus. Et ideo illa vitia inter filias gulæ computantur quæ ex immoderata delectatione cibi, & potus consequuntur.

Quæ quidem possunt accipi vel ex parte animæ, vel ex parte corporis. Ex parte autem animæ quadrupliciter. Primo quidem quantum ad rationem, cuius acies hebetatur ex immoderatione cibi, & potus: & quantum ad hoc ponitur filia gulæ *beberedo sensus circa intelligentiam*, propter fumositates ciborum perturbantes caput; sicut e contrario abstinentia consistit ad sapientiæ perceptionem, secundum illud Eccle. 11. 3. *Cogitavi in corde meo abstrahere a vino carnem meam, ut animum meum transferrem ad sapientiam*. Secundo quantum ad appetitum, qui multipliciter deordinatur per immoderantiam cibi, & potus, quasi sopito gubernaculo rationis: & quantum ad hoc ponitur *inepta lætitia*, quia omnes aliæ inordinatæ passionēs ad læticiam, & tristitiam ordinantur, ut dicitur in II. Eth. ( cap. v. ) Et hoc est quod dicitur III. Esdræ 121. *quod vinum omnem mentem convertit in securitatem, & iucunditatem*. Tertio quantum ad inordinatum verbum: & sic ponitur *multiloquium*: quia, ut Gregorius dicit in Past. ( part. 111. cap. xx. in princ. ) *nisi gulæ deditos immoderata loquacitas raperet, dives ille qui epulatus quotidie splendide dicitur, in lingua gravius non arderet*. Quarto quantum ad inordinatum actum: & sic ponitur *scurrilitas*, idest iocularitas quædam proveniens ex defectu rationis, quæ sicut non potest cohibere verba, ita non potest cohibere exteriores gestus: unde ad Eph. v. super illud, *Aut stultiloquium, aut scurrilitas*, dicit Glossa ( interl. ) quod „ a stultis curialitas dicitur, idest iocularitas, quæ risum movere solet. ” Quamvis possit utrumque horum referri ad verba in quibus contingit peccare vel ratione superfluitatis, quod pertinet ad *multiloquium*, vel ratione inhonestatis, quod pertinet ad *scurrilitatem*.

Ex parte autem corporis ponitur *immunditia*, quæ potest attendi sive secundum inordinatam emissionem quarumcumque superfluitatum, vel specialiter quantum ad emissionem seminis. Unde super illud ad Eph. v. *Fornicatio autem, & omnis immunditia* &c. dicit Glossa ( interl. ) „ idest incontinentia „ pertinens ad libidinem quocumque modo. ”

Ad primum ergo dicendum, quod lætitia quæ est de actu peccati, vel sine, consequitur omne peccatum, maxime quod procedit ex habitu; sed lætitia vaga incomposita, quæ hic dicitur *inepta*, præcipue oritur ex immoderata sumptione cibi, vel potus. Similiter etiam dicendum, quod hebetudo sensus quantum ad eligibilia communiter invenitur in omni peccato; sed hebetudo sensus circa speculabilia maxime procedit ex gula, ratione iam dicta ( in corp. art. )

Ad secundum dicendum, quod licet utilis sit vomitus post superfluum comestionem; tamen vitiosum est quod aliquis huic necessitati se subdat per immoderantiam cibi, vel potus. Potest tamen absque culpa vomitus procurari ex consilio medicinæ in remedium alieuius languoris.

Ad tertium dicendum, quod scurrilitas procedit quidem ex actu gulæ, non autem ex actu luxuriæ, sed ex eius voluntate: & ideo ad utrumque vitium potest pertinere.

## QUAESTIO CXLIX.

### De sobrietate,

#### in quatuor articulos divisa.

**D**Einde considerandum est de sobrietate, & vitio opposito, scilicet ebrietate: & circa sobrietatem queruntur quatuor.

Primo, quæ sit materia sobrietatis.

Secundo, utrum sit specialis virtus.

Tertio, utrum usus vini sit licitus.

Quarto, quibus præcipue competat sobrietas.

## ARTICULUS I. 720

### Utrum materia sobrietatis sit potus.

#### Sup. quæst. cxxiii.

**A**D primum sic proceditur. Videtur quod materia sobrietatis non sit potus. Dicitur enim ad Rom. xii. 3. *Non plus sapere quam oportet sapere, sed sapere ad sobrietatem*. Ergo sobrietas est etiam

etiam circa sapientiam, & non solum circa potum.

2. Præterea. Sap. viii. 7. dicitur de Dei sapientia, quod *sobrietatem, & prudentiam docet, iustitiam, & virtutem*: ubi sobrietatem ponit pro temperantia. Sed temperantia non solum est circa potus, sed etiam circa cibos, & venerea. Ergo sobrietas non est solum circa potus.

3. Præterea. Nomen sobrietatis a mensura sumptum esse videtur. Sed in omnibus quæ ad nos pertinent, debemus mensuram servare, ut dicitur ad Titum ii. 12. *Sobrie, & iuste, & pie vivamus in hoc seculo*: ubi dicit Glossa (interl.), *Sobrie* in nobis: " & l. ad Timoth. ii. 9. dicitur: *Mulieres in habitu ornato, cum verecundia, & sobrietate ornantes se*: & sic videtur sobrietas esse non solum in interioribus, sed etiam in his quæ pertinent ad exteriorem habitum. Non ergo propria materia sobrietatis est potus.

Sed contra est quod dicitur Eccli. xxxi. 32. *Aqua vita hominibus vinum in sobrietate: si bibas illud moderate, eris sobrius*.

Respondendo dicendum, quod virtutes quæ ab aliqua generali conditione virtutis nominantur, illam materiam sibi specialiter vendicant in qua difficillimum, & optimum est conditionem eius observare; sicut fortitudo pericula mortis, & temperantia delectationes tactus. Nomen autem sobrietatis sumitur a mensura: dicitur enim aliquis sobrius, quasi *briam*, id est mensuram, servans. Et ideo illam materiam specialiter sibi sobrietas adscribit in qua maxime laudabile est mensuram servare.

Huiusmodi autem est potus inebriare valens: quia eius usus menturatus multum confert, & modicus excessus multum lædit, quia impedit usum rationis magis etiam quam excessus cibi. Unde Eccli. xxxi. 37. *Sanitas est anime, & corporis sobrius potus. Vinum multum potatum irrationem, & iram, & ruinas multas facit*. Et ideo specialiter sobrietas attenditur circa potum, non quicumque, sed eum qui sua fumositatem natus est caput conturbare, sicut vinum, & omne quod inebriare potest.

Communiter autem sumendo nomen sobrietatis, potest in quacumque materia dici, sicut & supra dictum est (quæst. cxxxi. art. 2. & quæst. cxi. art. 2.) de fortitudine, & temperantia.

Ad primum ergo dicendum, quod sicut vinum materiale inebriat corporaliter; ita etiam metaphorice consideratio sapientie dicitur potus inebrians, propter hoc quod sua delectatione animum allicit, secundum illud Psal. xxii. 5. *Calix meus inebrians quam præclarus est!* Et ideo circa contemplationem sapientie per similitudinem quamdam sobrietas dicitur.

Ad secundum dicendum, quod omnia quæ ad temperantiam proprie pertinent, necessaria sunt præsentī vitæ, & eorum excessus nocet. Et ideo in omnibus necessarium est adhibere mensuram, quod pertinet ad officium sobrietatis: propter quod nomine sobrietatis temperantia significatur. Sed modicus excessus in potu plus nocet quam in aliis: & ideo sobrietas specialiter est circa potum.

Ad tertium dicendum, quod quamvis mensura in omnibus requiratur, non tamen sobrietas proprie in omnibus dicitur, sed in quibus mensura est maxime necessaria.

## ARTICULUS II. 721

*Utrum sobrietas sit per se virtus specialis.*

II. Cor. v. lē. 3. & Tit. ii. lē. 3.

AD secundum sic proceditur. Videtur quod sobrietas non sit per se quædam specialis virtus. Abstinencia enim attenditur & circa cibos, & circa potus. Sed circa cibos non est specialiter aliqua specialis virtus. Ergo nec sobrietas, quæ est circa potum, est aliqua specialis virtus.

2. Præterea. Abstinencia, & gula sunt circa delectationes tactus, inquantum sensus est alimenti. Sed cibus, & potus simul cedunt in alimentum, simul enim indiget animal nutriri humido, & sicco. Ergo sobrietas, quæ est circa potum, non est specialis virtus.

3. Præterea. Sicut in his quæ ad nutritionem pertinent distinguitur cibus a potu; ita etiam distinguuntur diversa genera ciborum, & diversa genera potuum. Si ergo sobrietas esset per se quædam specialis virtus, videtur quod circa quamlibet differentiam potus, vel cibi sit quædam specialis virtus: quod est inconvenientis. Non ergo videtur quod sobrietas sit specialis virtus.

Sed contra est quod Macrobius (Lib. I. in somn. Scip. cap. viii.) ponit sobrietatem specialem partem temperantie.

Re-



Respondeo dicendum, quod, sicut supra dictum est (quaest. cxlvi. art. 2.) ad virtutem moralem pertinet conservare bonum rationis contra ea quibus potest impediri. Et ideo ubi invenitur speciale impedimentum rationis, ibi necesse est esse speciale virtutem ad illud removendum. Potus autem inebrians habet specialem rationem impediendi usum rationis, inquantum scilicet perturbat cerebrum sua fumositate. Et ideo ad removendum hoc impedimentum rationis requiritur specialis virtus, quae est sobrietas.

Ad primum ergo dicendum, quod cibus, & potus communiter impedire possunt bonum rationis, absorbendo eam per immoderantiam delectationis: & quantum ad hoc communiter circa cibum, & potum est abstinencia. Sed potus inebriare valens impedit specialia ratione, ut dictum est (in corp. art.) & ideo requirit specialem virtutem.

Ad secundum dicendum, quod virtus abstinenciae non est circa cibos, & potus, inquantum sunt nutritiva, sed inquantum impediunt rationem. Et ideo non oportet quod specialitas virtutis attendatur secundum rationem nutritionis.

Ad tertium dicendum, quod in omnibus potibus inebriare valentibus est una & eadem ratio impediendi rationis usum: & sic illa potum diversitas per accidens se habet ad virtutem: & propter hoc secundum huiusmodi diversitatem virtutes non diversificantur. Et eadem ratio est de diversitate ciborum.

### ARTICULUS III. 723

*Utrum usus vini totaliter sit illicitus.*

**A**D tertium sic proceditur. Videtur quod usus vini totaliter sit illicitus. Sine sapientia enim non potest aliquis esse in statu salutis: dicitur enim Sap. vii. 28. *Neminem diligit Deus nisi eum qui eum sapientia inhabitat*: & infra cap. 11. 29. *Per sapientiam sanati sunt qui cumque placuerunt tibi, Domine, a principio*. Sed usus vini impedit sapientiam: dicitur enim Eccle. 31. 3. *Cogitavi in corde meo abstrahere a vino carnis meae, ut transferrem animum meum ad sapientiam*. Ergo potus vini est universaliter illicitus.

2. Præterea, Apostolus dicit ad Rom.

xiv. 21. *Bonum est non manducare carnem, & non bibere vinum, neque in quo frater tuus offenditur, aut scandalizatur, aut infirmatur*. Sed cessare a bono virtutis est vitiosum, & similiter fratribus scandalum ponere. Ergo uti vino est illicitum.

3. Præterea, Hieronymus dicit (Lib. I. cont. Iovin. cap. ix. in fin. & hab. cap. *Ab exordio dist. xxxv.*) quod *vinum cum carnibus post diluvium est dedicatum; Christus autem venit in fine seculorum, & extremitatem retraxit ad principium*. Ergo tempore christianæ legis videtur esse illicitum uti vino.

Sed contra est quod Apostolus dicit I. ad Tim. v. 23. *Non adhuc aquam bibere, sed modico vino utere propter stomachum tuum, & infirmitates tuas frequentes*: & Eccle. xxxi. 36. dicitur *Exultatio animæ, & cordis vinum moderate potatum*.

Respondeo dicendum, quod nullus cibus, vel potus secundum se consideratus est illicitus, secundum sententiam Domini dicentis Matth. xv. 11. *Non quod intrat in os, coarctat hominem*. Et ideo bibere vinum, secundum se loquendo, non est illicitum.

Potest tamen reddi illicitum per accidens: quandoque quidem ex conditione bibentis, quia vino de facili læditur, vel quia ex speciali voto obligatur ad vinum non bibendum; quandoque autem ex modo bibendi, quia scilicet mensuram in bibendo excedit; quandoque autem ex parte aliorum, qui ex hoc scandalizantur.

Ad primum ergo dicendum, quod sapientia potest haberi dupliciter. Uno modo secundum modum communem, prout sufficit ad salutem; & sic non requiritur ad sapientiam habendam quod aliquis a vino omnino abstineat, sed quod abstineat ab immoderato usu vini. Alio modo secundum quandam perfectionis gradum; & sic requiritur in aliquibus ad perfectam sapientiam percipiendam, quod omnino a vino abstineant, secundum condiciones quarundam personarum, & locorum.

Ad secundum dicendum, quod Apostolus non simpliciter dicit, bonum esse abstinere a vino, sed in casu in quo ex hoc aliqui scandalizantur.

Ad tertium dicendum, quod Christus retrahit nos a quibusdam sicut omnino illicitis, a quibusdam vero sicut ab impediementis perfectionis: & hoc modo re-

tra-

trahit aliquos a vino propter studium perfectionis, sicut & a divitiis, & aliis huiusmodi.

## ARTICULUS IV. 723

*Utrum sobrietas magis requiratur in maioribus personis.*

*I. Tim. 11. 12.*

**A**D quod sic proceditur. Videtur quod sobrietas magis requiratur in maioribus personis. Senectus enim excellentiam quamdam homini præstat: unde senibus honor, & reverentia debetur, secundum illud Levit. xix. 32. *Coramcano capite consurge, & honora personam senis.* Sed Apostolus specialiter senes dicit esse ad sobrietatem exhortandos, secundum illud ad Tit. 11. 2. *Senes, ut sobrii sint.* Ergo sobrietas maxime requiritur in excellentioribus personis.

2. Præterea. Episcopus in Ecclesia excellentissimum gradum habet; cui per Apostolum indicitur sobrietas, secundum illud 1. ad Tim. 111. 2. *Oportet Episcopum irreprehensibilem esse, unius uxoris virum, sobrium, prudentem &c.* Ergo sobrietas maxime requiritur in personis excellentioribus.

3. Præterea. Sobrietas importat abstinentiam a vino. Sed vinum interdicitur Regibus, qui tenent summum locum in humanis rebus; conceditur autem his qui sunt in statu desolationis, secundum illud Proverb. xxxi. 4. *Noli Regibus dare vinum:* & postea subdit: *Dare ficeram meretricibus, & vinum his qui amaro animo sunt.* Ergo sobrietas magis requiritur in excellentioribus personis.

Sed contra est quod Apostolus dicit 1. ad Tim. 111. 11. *Mulierem similiter pudicam, sobriam &c.* & ad Tim. 11. 6. dicitur: *Iuvenes similiter hortare ut sobrii sint.*

Respondendo dicendum, quod virtus habet habitudinem ad duo: uno quidem modo ad contraria vitia quæ excludit, & concupiscentias quas refrenat; alio modo ad finem in quem perducit. Sic ergo aliqua virtus magis requiritur in aliquibus duplici ratione. Uno modo quia in eis est maior pronitas ad concupiscentias, quas oportet per virtutem refrenari, & ad vitia, quæ per virtutem tolluntur: & secundum hoc sobrietas maxime requiritur in iuvenibus, & mulieribus: quia in iuvenibus viget concupiscentia delictabilis propter fervorem æta-

tis; in mulieribus autem non est sufficiens robur mentis ad hoc quod concupiscentiis resistant. Unde secundum Valerium Maximum (Lib. 11. cap. 2. n. 3.) mulieres apud Romanos antiquitus non bibebant vinum.

Alio vero modo sobrietas magis requiritur in aliquibus, utpote magis necessaria ad propriam operationem ipsorum. Vinum autem immoderate sumptum præcipue impedit usum rationis: & ideo senibus, in quibus ratio debet vigere ad aliorum eruditionem, & Episcopis, seu quibuslibet Ecclesiæ ministris, qui mente devota debent spiritualibus officiis insistere, & Regibus, qui per sapientiam debent populum subditum gubernare, specialiter sobrietas indicitur.

Et per hoc patet responsio ad obiecta.

## QUAESTIO CL.

*De ebrietate,*

*in quatuor articulos divisa.*

**D**Einde considerandum est de ebrietate.

Circa hoc quaeruntur quatuor. Primo, utrum ebrietas sit peccatum. Secundo, utrum sit peccatum mortale.

Tertio, utrum sit gravissimum peccatum.

Quarto, utrum excuset a peccato.

## ARTICULUS I. 724

*Utrum ebrietas sit peccatum.*

*Mal. quæst. xiv. art. 4. ad 2. & ad Tit. 11. 12. 1. fin. & 111. Erb. 12. fin.*

**A**D primum sic proceditur. Videtur quod ebrietas non sit peccatum. Omne enim peccatum habet aliud peccatum sibi oppositum; sicut timiditatem audacia, & pusillanimitatem præsumptio opponitur. Sed ebrietas nullum peccatum opponitur. Ergo ebrietas non est peccatum.

2. Præterea. Omne peccatum est voluntarium. Sed nullus vult esse ebrius, quia nullus vult privari usu rationis. Ergo ebrietas non est peccatum.

3. Præterea. Quicumque est alteri causa peccandi, peccat. Si ergo ebrietas esset peccatum, sequeretur quod illi qui alios invitant ad potum, quo inebriantur,

ut,

tur, peccarent: quod videtur esse valde durum.

4. Præterea. Omnibus peccatis correctio debetur. Sed ebriis non adhibetur correctio: dicit enim Gregorius, quod cum venia suo ingenio sunt relinquendi, ne deteriores fiant, si a tali consuetudine evellantur. Ergo ebrietas non est peccatum.

Sed contra est quod Apollolus dicit ad Roman. xiii. 13. Non in comestationibus, & ebrietatibus.

Respondendo dicendum, quod ebrietas dupliciter potest accipi. Uno modo prout significat ipsum defectum hominis, qui accidit ex multo vino potato, ex quo fit ut non sit compos rationis: & secundum hoc ebrietas non nominat culpam, sed defectum pœnalem consequentem ex culpa. Alio modo ebrietas potest nominare actum quo quis in hunc defectum incidit: qui potest causare ebrietatem dupliciter. Uno modo ex nimia vini fortitudine præter opinionem bibentis: & sic etiam ebrietas potest accidere sine peccato, præcipue si non ex negligentia hominis contingit: & sic creditur Noe inebriatus fuisse, ut legitur Gen. ix. Alio modo ex inordinata concupiscentia, & usu vini: & sic ebrietas ponitur esse peccatum, & continetur sub gula, sicut species sub genere. Dividitur enim gula in comestationem, & ebrietatem, quæ prohibet Apollolus in auctoritate inducta.

Ad primum ergo dicendum, quod, sicut Philosophus dicit in III. Ethic. (cap. xi. cir. med.) insensibilitas, quæ opponitur temperantiae, non multum contingit. Et ideo tam ipsam, quam omnes eius species, quæ opponuntur diversis speciebus temperantiae, nomine carent. Unde & vitium quod opponitur ebrietati, inordinatum est: & tamen si quis sciens intantum a vino abstineret, ut naturam multum gravaret, a culpa immunis non esset.

Ad secundum dicendum, quod obiectio illa procedit de defectu consequenti, qui est involuntarius; sed immoderatus usus vini est voluntarius: in quo peccati ratio consistit.

Ad tertium dicendum, quod sicut ille qui inebriatur, excusatur a peccato, si ignorat fortitudinem vini; ita etiam ille qui invitat aliquem ad bibendum, excusatur a peccato, si ignoret talem esse conditionem bibentis, ut ex hoc potu inebrietur. Sed si ignorantia desit, neuter a peccato excusatur.

Ad quartum dicendum, quod aliquando correctio peccatoris est intermittenda, ne fiat inde deterior, ut supra dictum est (quæst. xxxiii. art. 6.) Unde Augustinus dicit in epistola ad Aurelium Episcopum (xxii. al. lxiv. parum ante med.) de comestationibus, & ebrietatibus loquens: Non asperz, quantum existimo, non dure, non imperiose ista tolluntur; sed magis docendo quam iubendo, magis monendo quam minando: sic enim agendum est cum multitudine peccantium; severitas autem exercenda est in peccata paucorum.

## ARTICULUS II. 725

Utrum ebrietas sit peccatum mortale.

1. 2. quæst. lxxxviii. art. 3. & II. dist. xxiv. quæst. ii. art. 6. cor. & mal. quæst. ii. art. 8. ad 3. & Rom. xiii. lect. 3.

AD secundum sic proceditur. Videtur quod ebrietas non sit peccatum mortale. Augustinus enim (alius Auctor) in sermone de purgatorio (olim xli. de Sanctis nunc civ. in Append. parum a princ.) dicit, ebrietatem esse peccatum mortale, si sit assidua. Sed assiduitas importat circumstantiam, quæ non trahit in aliam speciem peccati: & sic non potest in infinitum aggravare, ut de veniali faciat mortale, sicut ex supradictis patet (1. 2. quæst. lxxxviii. art. 5.) Ergo si alias ebrietas non est peccatum mortale, nec etiam hoc modo erit peccatum mortale.

2. Præterea. Augustinus dicit in eodem sermone: Quoties aliquis in cibo, aut potu plus accipit quam necesse est, ad minuta peccata noverit pertinere. Peccata autem minuta dicuntur venialia. Ergo ebrietas, quæ causatur ex immoderato potu, est peccatum veniale.

3. Præterea. Nullum peccatum mortale est faciendum propter medicinam. Sed aliqui superflue bibunt secundum consilium medicinæ, ut postea per vomitum purgentur; & ex hoc superfluo potu sequitur ebrietas. Ergo ebrietas non est peccatum mortale.

Sed contra est quod in Canonibus Apostolorum (can. xli. & xlii. to. i. Concil.) legitur: Episcopus, aut Presbyter, aut Diaconus aleæ, aut ebrietati deserviens, aut desinat, aut deponatur; Subdiaconus autem, aut Lector, aut Cantor simi-

simi-

*similia faciens, aut definat, aut communi-  
one privetur: similiter & laicus.* Sed  
tales poenae non intelliguntur nisi pro pec-  
cato mortali. Ergo ebrietas est peccatum  
mortale.

Respondeo dicendum, quod culpa e-  
brietatis, sicut dictum est (art. praec.)  
consistit in immoderato usu, & concu-  
piscencia vini. Hoc autem contingit esse  
tripliciter.

Uno modo sic quod nesciat potum ef-  
fe immoderatum, & inebriare potentem:  
& sic ebrietas potest esse sine peccato,  
ut dictum est (art. praec.)

Alio modo sic quod aliquis percipiat  
potum esse immoderatum, non tamen  
aestimetur potum esse inebriare potentem:  
& sic ebrietas potest esse cum peccato  
veniali.

Tertio modo potest esse quod aliquis  
bene advertat, potum esse immodera-  
tum, & inebriantem, & tamen magis  
vult ebrietatem incurrere quam a potu  
abstinere: & talis proprie dicitur ebrius;  
quia moralia recipiunt speciem non ab  
his quae per accidens eveniunt praeter  
intentionem, sed ab eo quod est per se  
intentum. Et sic ebrietas est peccatum  
mortale: quia secundum hoc homo vo-  
lens, & sciens privare se usu rationis,  
quod secundum virtutem operatur, &  
peccata declinat, & sic peccat mortali-  
ter, periculo peccandi se committens.  
Dicit enim Ambrosius in Lib. de Pa-  
riarchis (seu Lib. I. de Abraham cap.  
vi. non procul a fin.) *Vitandam disci-  
mus ebrietatem, per quam vitia cavere  
non possumus. Nam quae sobrii cavemus,  
per ebrietatem ignorantes committimus.*  
Unde ebrietas, per se loquendo, est pec-  
catum mortale.

Ad primum ergo dicendum, quod as-  
siduitas facit ebrietatem esse peccatum  
mortale, non propter solam iterationem  
actus, sed quia non potest esse quod ho-  
mo assidue inebrietur, quin sciens & vo-  
lens ebrietatem incurrat, dum multoties  
experitur fortitudinem vini, & suam ha-  
bitatem ad ebrietatem.

Ad secundum dicendum, quod plus  
sumere in cibo, & potu quam neces-  
sit, pertinet ad vitium gulae, quae non  
semper est peccatum mortale; sed plus  
sumere in potu scienter usque ad ebie-  
ritatem, hoc est peccatum mortale. Un-  
de Augustinus dicit in X. Confess. (cap.  
xxx. ante med.) *Ebrietas longe est a me-  
miserereberis, ne appropinquet tibi: crapu-  
la autem nonnumquam subrepsit servo tuo.*

Ad tertium dicendum, quod, sicut di-  
ctum est (quaest. cxli. art. 6.) cibus, &  
potus est moderandus, secundum quod  
comperit corporis valetudini. Et ideo  
sicut quandoque contingit ut cibus, vel  
potus, qui est moderatus sano, sit su-  
perfluous infirmo; ita etiam potest e con-  
verso contingere ut ille qui est super-  
fluous sano, sit moderatus infirmo. Et  
hoc modo cum aliquis multum comedit,  
vel bibit secundum consilium medicinae  
ad vomitum provocandum, non est re-  
putandus superfluous cibus, vel potus.

Nec tamen ad vomitum provocandum  
requiritur quod sit potus inebrians, quia  
etiam potus aquae tepidae vomitum cau-  
sat: & ideo propter hanc causam non  
excusaretur aliquis ab ebrietate.

### ARTICULUS III. 726

#### *Utrum ebrietas sit gravissimum peccatum.*

Ad tertium sic proceditur. Videtur  
quod ebrietas sit gravissimum pec-  
catum. Dicit enim Chrysostomus (hom.  
lviii. in Matth. inter med. & fin.) quod  
*nihil ita est demoni amicum, sicut ebie-  
ritas, & lascivia, quae est mater omnium  
vitiatorum.* Et in Decr. dicitur dist. xxxv.  
(cap. ix.) *Ante omnia Clericis vitetur  
ebrietas, quae omnium vitiatorum fomes, &  
nutrix est.*

2. Praeterea. Ex hoc dicitur aliquid  
esse peccatum, quod bonum rationis ex-  
cludit. Sed hoc maxime facit ebrietas.  
Ergo ebrietas est maximum peccatum.

3. Praeterea. Magnitudo culpae ex ma-  
gnitudine poenae ostenditur. Sed ebrietas  
videtur esse maxime punita: dicit enim  
Ambrosius (Lib. de Elia & ieiun. cap. v.  
ante med.) quod non esset in homine ser-  
vitus, si non fuisset ebrietas. Ergo ebie-  
ritas est maximum peccatum.

Sed contra est quod secundum Grego-  
rium (Lib. XXXIII. Moral. cap. xi. au-  
te med. implic.) vitia spiritualia sunt  
maiora quam carnalia. Sed ebrietas con-  
tinetur inter vitia carnalia. Ergo non  
est maximum peccatum.

Respondeo dicendum, quod ex hoc di-  
citur aliquid esse malum, quod privat bo-  
num. Unde quanto maius est bonum quod  
privatur per malum, tanto malum gravius  
est. Manifestum est autem quod bonum di-  
vinum est maius quam bonum huma-  
num. Et ideo peccata quae sunt directe  
contra Deum, sunt graviora peccato e-  
brie-

brietatis, quod directe opponitur bono rationis humanæ.

Ad primum ergo dicendum, quod ad peccata intemperantiæ maxime homo habet pronitatem, propter hoc quod huiusmodi concupiscentiæ, & delectationes connaturales nobis sunt: & secundum hoc dicuntur huiusmodi peccata esse maxime amica diabolo, non quia sint aliis graviora, sed quia sunt apud homines frequentiora.

Ad secundum dicendum, quod bonum rationis impeditur dupliciter: uno modo per id quod est contrarium rationi; alio modo per id quod auferit usum rationis. Plus autem habet de ratione mali id quod contrariatur rationi, quam quod ad horam usum rationis auferit: usus enim rationis potest esse & bonus, & malus, qui tollitur per ebrietatem; sed bona virtutum, quæ tolluntur per ea quæ contrariantur rationi, sunt semper bona.

Ad tertium dicendum, quod servitus est consecuta ex ebrietate occasionaliter, inquantum Cham maledictionem servitutis in sua posteritate accepit propter hoc quod irrifre pacem inebriatum; non autem servitus fuit directe poena ebrietatis.

#### ARTICULUS IV. 727

*Utrum ebrietas excuset a peccato.*

1. 2. *quæst. lxxvi. art. 4. ad 2. & 4. & II. dist. xxii. quæst. 11. art. 2. ad 2.*

**A**D quantum sic proceditur. Videtur quod ebrietas non excuset a peccato. Dicit enim Philosophus in III. Eth. (cap. v. ante med.) quod *ebrius meretur duplices multationes*. Ergo ebrietas magis aggravat peccatum quam excuset.

2. Præterea. Non excusatur peccatum per peccatum, sed magis augetur. Ebrietas autem est peccatum. Ergo non excusat a peccato.

3. Præterea. Philosophus dicit in VI. Ethic. (cap. v.) quod sicut ratio hominis ligatur per ebrietatem, ita ligatur per concupiscentiam. Sed concupiscentia non excusat a peccato. Ergo etiam neque ebrietas.

Sed contra est quod Loth excusatur ab incestu propter ebrietatem, ut Augustinus dicit contra Faustum (Lib. XXII. cap. xlv.)

Respondeo dicendum, quod in ebrietate duo attenduntur, sicut dictum est (art. 1. hu. quæst.) scilicet defectus consequens, & actus præcedens. Ex parte autem defectus consequentis, in quo ligatur usus rationis, ebrietas habet excusare a peccato, inquantum causat involuntarium per ignorantiam. Sed ex parte actus præcedentis videtur esse distinguendum: quia si ex actu illo præcedente subsecuta est ebrietas sine peccato, tunc peccatum sequens totaliter excusatur a culpa; sicut forte accidit de Loth.

Si autem actus præcedens fuit culpabilis, sic non totaliter aliquis excusatur a peccato sequenti, quod scilicet redditur voluntarium ex voluntate præcedentis actus, inquantum scilicet aliquis dans operam rei illicitæ incidit in sequens peccatum.

Diminuitur tamen peccatum sequens, sicut & diminuitur ratio voluntarii. Unde Augustinus dicit contra Faustum (loc. sup. cit.) quod *Loth culpandus est, non quantum ille incestus, sed quantum ebrietas meruit*.

Ad primum ergo dicendum, quod Philosophus non dicit, quod mereatur graviores multationem ebrius, sed quod mereatur duplicem multationem propter duplex peccatum.

Vel potest dici, quod loquitur secundum legem cuiusdam Pittaci, qui, ut dicitur in II. Politic. (in fi.) statuit quod ebrii, si percuterent, plus punirentur quam sobrii, quia (a) pluries iniuriantur: in quo, ut Aristoteles ibidem dicit, videtur magis respexisse ad utilitatem, scilicet ut cohererentur iniuriæ, quam ad veniam, quam oportet habere de ebriis, propter hoc quod non sunt sui compotes.

Ad secundum dicendum, quod ebrietas habet excusare peccatum, non ex parte quæ est peccatum, sed ex parte defectus consequentis, ut dictum est (in corp. art.)

Ad tertium dicendum, quod concupiscentia non totaliter ligat rationem, sicut ebrietas, nisi forte sit tanta quod faciat hominem insanire.

Et tamen passio concupiscentiæ diminuit peccatum: quia levius est ex infirmitate quam ex malitia peccare.

#### QUAE-

(1) Ita communis. Niciasus plures. Theolog. ita supplendum censet: quia plures, dum sunt ebrii, quam dum sunt sobrii, iniuriantur.

## QUAESTIO CLI.

De castitate,

in quatuor articulos divisa.

**D**Einde considerandum est de castitate: & primo de ipsa virtute castitatis; secundo de virginitate, quæ est pars castitatis; tertio de luxuria, quæ est vitium oppositum.

Circum primum queruntur quatuor.

Primo, utrum castitas sit virtus.

Secundo, utrum sit virtus generalis.

Tertio, utrum sit virtus distincta ab abstinentia.

Quarto, quomodo se habeat ad pudicitiam.

## ARTICULUS I. 728

Utrum castitas sit virtus.

III. Ethic. lect. 22.

**A**D primum sic proceditur. Videtur quod castitas non sit virtus. Loquimur enim nunc de virtute animæ. Sed castitas videtur ad corpus pertinere: dicitur enim aliquis castus ex eo quod aliquammodo se habet ad usum quarundam corporis partium. Ergo castitas non est virtus.

2. Præterea. Virtus est habitus voluntarius, ut dicitur in II. Ethic. (cap. iv. & vi.) Sed castitas non videtur esse aliquid voluntarium, cum per violentiam auferri videatur mulieribus violentè oppressis. Ergo videtur quod castitas non sit virtus.

3. Præterea. Nulla virtus est in infidelibus. Sed aliqui infideles sunt casti. Non ergo castitas est virtus.

4. Præterea. Frustrum a virtutibus distinguuntur. Sed castitas inter frustus ponitur, ut patet ad Gal. v. Ergo castitas non est virtus.

Sed contra est quod Augustinus dicit in Lib. de decem chordis (cap. xii. a med.) Cum debeas in virtute præcedere uxorem, quoniam castitas est virtus; tu sub uno impetu libidinis cadis, & vis uxorem tuam esse videlicet.

Respondeo dicendum, quod nomen castitatis sumitur ex hoc quod per rationem concupiscentia castigatur, quæ ad modum pueri est reseranda, ut patet per Philosophum in III. Ethic. (cap. ult.) In hoc autem ratio virtutis humanæ consistit quod fit aliquid secun-

dum rationem modificatum, ut ex supra dictis patet (1. 2. quæst. lxxv. art. 1.) Unde manifestum est castitatem esse virtutem.

Ad primum ergo dicendum, quod castitas consistit quidem in anima sicut in subiecto, sed materiam habet in corpore. Pertinet enim ad castitatem ut leuandum iudicium rationis, & electionem voluntatis aliquis moderate utatur corporalibus membris.

Ad secundum dicendum, quod, sicut Augustinus dicit in I. de civ. Dei (cap. xviii. post med.) *propositio animi permanente, per quod etiam corpus sanctificari meruit, nec ipsi corpori auferat sanctitatem violentia libidinis alienæ, quam servat perseverantia continentie suæ*: & ibidem dicit, quod est virtus animi, quæ comitem habet fortitudinem, quæ potius quælibet mala tolerare, quam malo consentire decessit.

Ad tertium dicendum, quod, sicut Augustinus dicit in IV. contra Iulianum (cap. xii. inter princ. & med.) *abstinet ut sit in aliquo vera virtus, nisi fuerit iustus; abstinet autem ut sit iustus vere, nisi vivat ex fide*. Et ideo concludit, quod in infidelibus neque est vera castitas, neque aliqua alia virtus, quia scilicet non referuntur ad debitum finem: & sicut ibidem subdit (parum ante med.) *non officiis, id est actibus, sed finibus a virtutibus discernuntur virtutes*.

Ad quartum dicendum, quod castitas, inquantum est quidem secundum rationem operans, habet rationem virtutis; inquantum autem habet delectationem in suo actu, connumeratur inter fructus.

## ARTICULUS II. 729

Utrum castitas sit virtus generalis.

**A**D secundum sic proceditur. Videtur quod castitas sit virtus generalis. Dicit enim Augustinus in Lib. de mendacio (cap. xx. a med.) quod *castitas animi est ordinatus animi motus, non subdens maiora minoribus*. Sed hoc pertinet ad quamlibet virtutem. Ergo castitas est generalis virtus.

2. Præterea. Nomen castitatis a castigatione sumitur. Sed quilibet motus appetitivæ partis debet castigari a ratione. Cum ergo per quamlibet virtutem moralem retineatur aliquis appetitivus motus, videtur quod quælibet virtus moralis sit castitas.

3. Præ-

3. Præterea. Castitati fornicatio opponitur. Sed fornicatio videtur ad omne genus peccati pertinere: dicitur enim in Psal. lxxix. 26. (a) *Perdes omnes qui fornicantur abs te*. Ergo castitas est generalis virtus.

Sed contra est quod Macrobius (Lib. I. in somn. Scip. cap. viii.) ponit eam partem temperantiae.

Respondetur dicendum, quod nomen castitatis dupliciter accipitur. Uno modo proprie: & sic est quedam specialis virtus habens specialem materiam, scilicet concupiscentias delectabilem, quæ sunt in venereis. Alio modo nomen castitatis accipitur metaphorice. Sicut enim in corporis commixtione consistit delectatio venereorum, circa quam proprie est castitas, & oppositum vitium, scilicet luxuria; ita etiam in quadam spirituali coniunctione mentis ad res aliquas consistit quedam delectatio, circa quam est quedam spiritualis castitas metaphorice dicta, vel etiam spiritualis fornicatio similiter metaphorice dicta. Si enim mens hominis delectetur in spirituali coniunctione ad id cui debet coniungi, scilicet ad Deum, & abstinere se delectabiliter aliis coniungatur contra debitum divini ordinis, dicitur castitas spiritualis, secundum illud II. ad Corinth. xi. 2. *Respondi vos uni viro virginem castam exhibere Christo*. Si autem delectabiliter contra debitum divini ordinis coniungatur mens quibuscunque aliis rebus, dicitur fornicatio spiritualis, secundum illud Hierem. iii. 1. *Tu autem fornicata es cum amatoribus multis*. Et hoc modo accipiendo castitatem castitas est generalis virtus: quia per quamlibet virtutem retrahitur mens humana ne rebus illicitis delectabiliter coniungatur.

Principaliter tamen ratio huius castitatis consistit in caritate, & in aliis virtutibus theologicis, quibus mens hominis coniungitur Deo.

Ad primum ergo dicendum, quod ratio illa procedit de castitate metaphorice dicta.

Ad secundum dicendum, quod, sicut supra dictum est (art. præc. & quest. cxlxi. art. 2.) concupiscentia delectabilis maxime assimilatur puero, eo quod appetitus delectabilis est nobis connaturalis, & præcipue delectabilium secundum tactum, quæ ordinantur ad conservationem naturæ. Et inde est quod si nutria-

tut horum delectabilium concupiscentia, per hoc quod ei consentiatur, maxime augebitur; sicut puer, qui suæ voluntati relinquitur. Et sic concupiscentia horum delectabilium maxime indiget castigari: & ideo circa huiusmodi concupiscentias antonomastice dicitur castitas; sicut & fortitudo est circa ea in quibus maxime indigemus animi firmitate.

Ad tertium dicendum, quod obiectio illa procedit de fornicatione spirituali metaphorice dicta, quæ opponitur castitati spirituali, ut dictum est (in corp. art.)

# ARTICULUS III. 730

*Utrum castitas sit virtus distincta ab abstinentia.*

II. dist. xxiv. quæst. 11. art. 1. ad 1. & vir. quæst. 1. art. 4. cor. fin.

**A**D tertium sic proceditur. Videtur quod castitas non sit virtus distincta ab abstinentia. Quia circa materiam unius generis sufficit una virtus. Sed unius generis videtur esse quæ pertinent ad unum sensum. Cum ergo delectatio ciborum, circa quam est abstinentia, & delectatio venereorum, circa quam est castitas, pertineant ad tactum, videtur quod castitas non sit alia virtus ab abstinentia.

2. Præterea. Philosophus in III. Ethic. (cap. ult.) omnia vitia intemperantiæ assimilat puerilibus peccatis, quæ castigatione indigent. Sed castitas nominatur a castigatione vitiolorum oppositorum. Ergo cum per abstinentiam cohibeantur quedam vitia intemperantiæ, videtur quod abstinentia sit castitas.

3. Præterea. Delectationes aliorum sensuum pertinent ad temperantiam, in quantum ordinantur ad delectationes tactus, circa quas est temperantia. Sed delectationes ciborum, circa quas est abstinentia, ordinantur ad delectationes venereorum, circa quas est castitas: unde dicit Hieronymus (epist. cxlvii. ad Amund. aliquant. a princ. & sup. illud ad Tit. i. *Non vinolentum, non percussorem &c.*) *Venter, & genitalia sibi metipsum vicina sunt, ut ex vicinitate membrorum confederatio intelligatur viriorum*. Ergo abstinentia, & castitas non sunt virtutes ab invicem distinctæ.

Sed contra est quod Apostolus II. ad Corinth. vi. connumerat castitatem ie-

N in-

S. Tb. Oper. Tom. XXIII.

(a) Vulgata Perdes omnes.

iuniis, quæ ad abſtinentiam pertinent.

Reſpondeo dicendum, quod, ſicut dictum eſt (quaest. cxli. art. 4.) temperantia eſt proprie circa concupiſcentias delectationum tactus: & ideo oportet ut ubi ſunt diverſæ rationes delectationis, ibi ſint diverſæ virtutes ſub temperantia comprehenſæ.

Delectationes autem proportionantur operationibus, quarum ſunt perfectiones, ut dicitur in IX. Ethic. (cap. vii.) Manifestum eſt autem quod alterius generis ſunt operationes pertinentes ad uſum ciborum, quibus natura individui conſervatur, & operationes pertinentes ad uſum veneriorum, quibus conſervatur natura ſpeciei. Et ideo caſtikas, quæ eſt circa delectationes veneriorum, eſt virtus diſtincta ab abſtinentia, quæ eſt circa delectationes ciborum.

Ad primum ergo dicendum, quod temperantia non conſiſtit principaliter circa delectationes tactus quantum ad iudicium ſenſus de tangibilibus, quod eſt eiſdem rationis in omnibus, ſed quantum ad iſum uſum tangibilem, ut dicitur in III. Ethic. (cap. x.) Eſt autem alia ratio utendi cibis, & potibus, & veneris. Et ideo oportet eſſe diverſas virtutes, licet ſint uniſenſus.

Ad ſecundum dicendum, quod delectationes veneræ ſunt vehementiores, & magis opprimentes rationem quam delectationes ciborum: & propter hoc magis indigent caſtigatione, & reſtinatione: quia ſi eis conſentitur, magis ex hoc increſcit viſ concupiſcentiæ, & deicitur virtus mentis. Unde Auguſtinus dicit in I. Soliloq. (cap. x. cir. med.) *Nihil eſſe ſentio quod magis ex arte deiciat animum virilem, quam blandimenta femineæ, corporumque ille contactus ſine quo uxor haberi non poſſeſt.*

Ad tertium dicendum, quod delectationes aliorum ſenſuum non pertinent ad naturam hominis conſervandam, niſi prout ordinantur ad delectabilia tactus: & ideo circa huiuſmodi delectationes non eſt aliqua alia virtus ſub temperantia comprehenſa. Sed delectationes ciborum, quamvis aliquantulum ordinantur ad delectationes veneriorum, tamen etiam per ſe ordinantur ad vitam hominis conſervandam: & ideo etiam per ſe habent ſpeciale virtutem; quamvis illa virtus quæ abſtinentia dicitur, ordinat aſum ſuum ad finem caſticitatis.

## ARTICULUS IV. 731

*Utrum pudicitia pertineat ſpecialiter ad caſticitatem.*

*Sup. quaest. cxlii.*

**A**D quartum ſic proceditur. Videtur quod pudicitia non pertineat ſpecialiter ad caſticitatem. Dicit enim Auguſtinus in I. de civit. Dei (cap. xviii. a princ.) quod *pudicitia eſt quadam virtus anima*. Non ergo eſt aliquid ad caſticitatem pertinens, ſed eſt per ſeipſam virtus a caſtitate diſtincta.

2. Præterea. Pudicitia a pudore dicitur, qui videtur idem eſſe verecundia. Sed verecundia ſecundum Damascenum (Lib. II. orth. Fid. cap. xv.) eſt de turpi actu; quod convenit omni actui vitioſo. Ergo pudicitia non magis pertinet ad caſticitatem quam ad alias virtutes.

3. Præterea. Philoſophus dicit in III. Ethic. (cap. xii. a princ.) quod *omnis inſemperantia generaliter eſt maxime improbabilis*. Sed ad pudicitiam pertinere videtur fugere ea quæ improbabilia ſunt. Ergo pudicitia pertinet ad omnes partes temperantiæ, non autem ſpecialiter ad caſticitatem.

Sed contra eſt quod Auguſtinus dicit in Lib. de perſeverantia (cap. xx. paulo a princ.) *Prædicanda eſt pudicitia, ut ab eo qui habet aures audiendi, nihil genitalibus membris illicitum perpetretur*. Sed uſus genitalium membrorum proprie pertinet ad caſticitatem. Ergo pudicitia proprie ad caſticitatem pertinet.

Reſpondeo dicendum, quod, ſicut dictum eſt (in arg. 2.) nomen pudicitia a pudore ſumitur, in quo verecundia ſignificatur. Et ideo oportet quod pudicitia proprie ſit circa illa de quibus homines magis verecundantur. Maxime autem verecundantur homines de actibus veneris, ut Auguſtinus dicit in XIV. de civit. Dei (cap. xviii.) itantum quod etiam concubitus coniugalis, qui honeſtate nuptiarum decoratur, verecundia non careat: & hoc ideo quia motus genitalium membrorum non ſubſcitur imperio rationis, ſicut motus aliorum exteriorum membrorum. Verecundatur autem homo non ſolum de illa commixtione veneris, ſed etiam de quibuſcumque ſignis eius, ut Philoſophus dicit in II. Lib. Rhet. (cap. vi. poſt



post med.) Et ideo pudicitia attenditur proprie circa venerea, & praecipue circa signa venereorum, sicut sunt aspectus impudici, oscula, & tactus. Et quia haec magis solent deprehendi, ideo pudicitia magis respicit huiusmodi exteriora signa; castitas autem magis ipsam veneram commixtionem. Et ideo pudicitia ad castitatem ordinatur, non quasi virtus ab ipsa distincta, sed sicut exprimens castitatis circumstantiam quamdam. Interdum tamen unum pro alio ponitur.

Ad primum ergo dicendum, quod Augustinus ibi accipit pudicitiam pro castitate.

Ad secundum dicendum, quod quamvis omnia vitia habeant turpitudinem quamdam, specialiter tamen vitia intemperantiae, ut ex supra dictis patet (quaest. cxlxi. art. 4.).

Ad tertium dicendum, quod inter vitia intemperantiae praecipue sunt exprobrabilia peccata venerea, tum propter inobedientiam genitalium membrorum; tum etiam propter hoc quod ratio ab huiusmodi maxime absorbetur.

## QUAESTIO CLII.

*De virginitate.*

*in quinque articulos divisa.*

**D**Einde considerandum est de virginitate: & circa hoc quaeruntur quinque.

Primo, in quo consistat virginitas.

Secundo, utrum sit licita.

Tertio, utrum sit virtus.

Quarto de excellentia eius respectu matrimonii.

Quinto de excellentia eius respectu aliarum virtutum.

## ARTICULUS I. 732

*Utrum virginitas consistat in integritate carnis.*

*IV. dist. xxxiii. quaest. lxxi. art. 1. & dist. xxxiv. quaest. 1. art. 4. ad 5. & dist. xlv. quaest. v. art. 3. quaest. 1 cor. & ad 4. & quol. v. art. 24. ad 2. & quolib. vi. art. 18. cor.*

**A**D primum sic proceditur. Videtur quod virginitas non consistat in integritate carnis. Dicit enim Augustinus in Lib. de nuptiis, & concupiscentia

(hab. in Lib. de sancta virginit. cap. xlii. in princ.) quod *virginitas est in carne corruptibili incorruptionis perpetua medietate*. Sed meditatio non pertinet ad carnem. Ergo virginitas non consistit in carne.

2. Praeterea. Virginitas pudicitiam quamdam importat. Sed Augustinus dicit in 1. de civitate Dei (cap. xviii. a princ.) quod *pudicitia consistit in anima*. Ergo virginitas non consistit in carnis incorruptione.

3. Praeterea. Carnis integritas videtur consistere in signaculo vaginalis pudoris. Sed quandoque absque virginitate praedictio frangitur illud signaculum: dicit enim Augustinus in 1. de civit. Dei (loc. cit.) quod *illa membra possunt diversis casibus vulnerata vim perpeti & medici quandoque saluti opitulantes hac ibi faciunt quae horret aspectus: obsterit etiam virgini cuiusdam integritatem manu velut explorans, dum inspicit, perdidit: & subdit: Non opinor, quemquam tam stulte sapere, ut huius peritiae aliquid existimet etiam de ipsius corporis sanctitate, quomodo membra illius integritate iam perdidit*. Ergo virginitas non consistit in carnis incorruptione.

4. Praeterea. Corruptio carnis maxime in feminis resolutione consistit; quae potest fieri sine concubitu, vel in dormiendo, vel etiam vigilando. Sed sine concubitu non videtur periri virginitas: dicit enim Augustinus in Lib. de virginit. (cap. xlii. in princ.) quod *virginalis integritas, & per ipsam continentiam ab omni concubitu immunitas, angelica portio est*. Ergo virginitas non consistit in carnis incorruptione.

Sed contra est quod Augustinus in eodem Lib. (cap. xlii. in fin.) dicit, quod *virginitas est continentia, qua integritas carnis ipsi creatori animae, & carnis votetur, consecratur, servatur*.

Respondeo dicendum, quod nomen virginitatis a virore sumptum videtur: & sicut illud dicitur virens, & in suo virore persistere, quod non est ex superabundantia caloris adustione expertum; ita etiam virginitas hoc importat, quod persona cui inest, immunis sit a concupiscentiae adustione, quae esse videtur in consummatione maxime delectationis corporalis, qualis est venereorum delectatio. Unde Ambrosius dicit in Lib. 1. de virginibus (inter princ. & med.) quod *castitas virginalis est experta contagionis integritas*.

In delectatione autem venereorum tria est considerare: unum quidem quod est ex parte corporis, scilicet violatio signaculi virginalis; aliud autem est in quo coniungitur id quod est animæ, cum eo quod est corporis, scilicet ipsa resolutio seminis delectationem sensibilem causans; tertium autem est solum ex parte animæ; scilicet propositum perveniendi ad talem delectationem. In quibus tribus id quod primo positum est, per accidens se habet ad moralem actum, qui non consideratur per se, nisi secundum ea quæ sunt animæ; secundum vero materialiter se habet ad actum moralem, nam sensibiles passionem sunt materia moralium actuum; tertium vero se habet formaliter, & complete, quia ratio moralium in eo quod est rationis, complete.

Quia ergo virginitas dicitur per remotionem prædictæ corruptionis, consequens est quod integritas membri corporalis per accidens se habet ad virginitatem; ipsa autem immunitas a delectatione, quæ consistit in seminis resolutione, se habet materialiter; ipsum autem propositum perpetuo abstinendi a tali delectatione, se habet formaliter, & complete in virginitate.

Ad primum ergo dicendum, quod illa definitio Augustini tangit quidem in recto id quod est formale in virginitate. Nam per *meditationem* intelligitur propositum rationis; quod autem additur, *perpetua*, non sic intelligitur quod oporteat virginem semper actu talem meditationem habere, sed quia hoc debet in proposito genere, ut perpetuo in hoc perseveret. Id vero quod est materiale, tangitur in obliquo, cum dicitur, *in corruptionis in carne corruptibili*; quod additur ad offendendam virginitatis difficultatem: nam si caro corrupta non posset, non esset difficile perpetuam incorruptionis meditationem habere.

Ad secundum dicendum, quod pudicitia est quidem essentialiter in anima, materialiter autem in carne; & similiter virginitas. Unde Augustinus dicit in Lib. de virginitate (cap. viii.) quod *licet virginitas in carne servetur*, ac per hoc corporalis sit; *tamen spiritualis est, quam sovet, & servat continentia pietatis*.

Ad tertium dicendum, quod, sicut dictum est (in cor. art.) integritas corporalis membri per accidens se habet ad

virginitatem, inquantum scilicet per hoc quod ex proposito voluntatis abstinetur quis a delectatione venerea, remanet integritas in membro corporeo. Unde si contingat quod per alium modum aliquo casu membri integritas corrumpatur, non magis præiudicat virginitati quam si corrumpatur manus, aut pes.

Ad quartum dicendum, quod delectatio quæ est ex seminis resolutione, dupliciter potest contingere. Uno modo ut procedat ex mentis proposito: & sic tollit virginitatem, sive fiat per concubitum, sive absque concubitu. Facit autem mentionem Augustinus de concubitu, quia huiusmodi resolutio communitur; & naturaliter ex concubitu causatur. Alio modo potest provenire præter propositum mentis, vel in dormiendo, vel per violentiam illatam, cui mens non consentit, quamvis caro delectationem experiat, vel etiam ex infirmitate naturæ, ut patet in his qui fluxum seminis patiuntur: & sic non perditur virginitas, quia talis pollutio non accidit per impudicitiam, quam virginitas excludit.

## ARTICULUS II. 733

## Utrum virginitas sit illicita.

*Inf. art. 3. & 4. & IV. dist. xxxi. quæst. 111 art. 2. ad 2. & 3. & mal. quæst. xv. art. 2. ad 13. & vir. quæst. 1. art. 13. ad 6. & 11. Ethic. lect. 2. fin.*

**A**D secundum sic proceditur. Videtur enim quod virginitas sit illicita. Omne enim quod contrariatur præcepto legis naturæ, est illicitum. Sed sicut præceptum legis naturæ ad conservationem individui est, quod tangitur Genes. 11. 16. (a) *De omni ligno quod est in paradiso, comedet; ita etiam præceptum legis naturæ est ad conservationem speciei, quod ponitur Genes. 1. 28. Crescite, & multiplicamini, & replete terram*. Ergo sicut peccaret qui abstinere ab omni cibo, utpote faciens contra bonum individui; ita etiam peccat qui omnino abstinere ab actu generationis, utpote faciens contra bonum speciei.

2. Præterea. Omne illud quod recedit a medio virtutis, videtur esse vitiosum. Sed virginitas recedit a medio virtutis, ab omnibus delectationibus venereis abstinentis: dicit enim Philosophus in II. Ethic. (cap. 11. a med. & Lib. III.

capa

42) *Vulgata: Ex omni ligno paradisi comedet.*

cap. xi.) quod qui omni voluptate potitur, neque ab una recedit, intemperatus est; qui autem omnes fugit, sicut agrestis, insensibilis est. Ergo virginitas est aliquid vitiosum.

3. Præterea. Pœna non debetur nisi vitio. Sed apud antiquos puniebantur secundum leges illi qui semper cœlibem vitam ducebant, ut Maximus Valerius dicit (Lib. II. cap. iv. num. 2.) unde & Plato secundum Augustinum in Lib. de vera religione (cap. xxi. ad fin.) sacrificasse naturæ dicitur, ut perpetua eius continentia tamquam peccatum aboleretur. Ergo virginitas est peccatum.

Sed contra est quod nullum peccatum recte cadit sub consilio. Sed virginitas recte cadit sub consilio: dicitur enim I. ad Corinth. vii. 25. De virginibus autem præceptum Domini non habeo, consilium autem do. Ergo virginitas non est aliquid illicitum.

Respondeo dicendum, quod in humanis actibus illud est vitiosum quod est præter rectam rationem. Habet autem hoc recta ratio ut his quæ sunt ad finem, utatur aliquis secundum eam mensuram quæ congruit fini. Est autem triplex hominis bonum, ut dicitur in I. Ethic. (cap. viii. a princ.) unum quidem quod consistit in exterioribus rebus, puta divitiis; aliud autem quod consistit in bonis corporis; tertium autem quod consistit in bonis animæ: inter quæ etiam bona contemplativæ vitæ sunt potiora bonis vitæ activæ, ut Philosophus probat in X. Ethic. (cap. vii.) & Dominus dicit Luc. x. 43. *Maria optimam partem elegit.* Quorum bonorum exteriora quidem ordinantur ad ea quæ sunt corporis; ea vero quæ sunt corporis, ad ea quæ sunt animæ; & ulterius ea quæ sunt vitæ activæ, ad ea quæ sunt vitæ contemplativæ.

Pertinet igitur ad rectitudinem rationis ut aliquis utatur exterioribus bonis secundum eam mensuram quæ competit corpori: & similiter de aliis. Unde si quis abstinere ab aliquibus possidendis quæ alias esset bonum possidere, ut consulat saluti corporali, vel etiam contemplationi veritatis, non esset hoc vitiosum, sed secundum rationem rectam.

Et similiter si quis abstinere a delectationibus corporalibus, ut liberius vacet contemplationi veritatis, pertinet hoc ad rectitudinem rationis. Ad hoc autem pia virginitas ab omni delectatione venerea abstinere, ut liberius divinæ con-

*S. Tb. Oper. Tom. XXIII.*

templationi vacet: dicit enim Apostolus I. ad Corinth. vii. 34. *Mulier innupta, & virgo cogitat quæ Domini sunt, ut sit sancta & corpore, & spiritu: quæ autem nupta est, cogitat quæ mundi sunt, & quomodo placeat viro.* Unde relinquatur quod virginitas non est aliquid vitiosum, sed potius laudabile.

Ad primum ergo dicendum, quod præceptum habet rationem debiti, ut supra dictum est (quæst. cxxi. art. 1.) Dupliciter autem aliquid est debitum. Uno modo, ut impleatur ab uno: & hoc debitum sine peccato præteriri non potest. Aliud autem est debitum implendum a multitudine: & ad tale debitum implendum non tenetur quilibet de multitudine: multa enim sunt multitudini necessaria, ad quæ implenda unus non sufficit; sed implentur a multitudine, dum unus hoc, alius illud facit. Præceptum igitur legis naturæ homini datum de commestione, necesse est quod ab unoquoque impleatur: aliter enim individuum conservari non posset. Sed præceptum datum de generatione respicit totam multitudinem hominum, cui necessarium est non solum quod multiplicetur corporaliter, sed etiam quod spiritualiter proficiat. Et ideo sufficienter providetur humanæ multitudini, si quidam carnali generationi operam dent; quidam vero ab hac abstinentes, contemplationi divinorum vacent ad totius humani generis pulchritudinem, & salutem: sicut etiam in exercitu quidam castra custodiunt, quidam signa deferunt, quidam gladiis decertant: quæ tamen omnia debita sunt multitudini, sed per unum impleri non possunt.

Ad secundum dicendum, quod ille qui abstinere ab omnibus delectationibus præter rationem rectam, quasi delectationes secundum se abhorrens, est insensibilis, sicut agrestis. Virgo autem non abstinere ab omni delectatione, sed solum a delectatione venerea: & ab hac abstinere secundum rationem rectam, ut dictum est (in cor. art.) Medium autem virtutis non secundum quantitatem, sed secundum rationem rectam determinatur ut dicitur in II. Ethicor. (cap. vi.) Unde de magnanimo dicitur in IV. Ethic. (cap. xii. parum a princ.) quod est magnanimitas extremus, eo autem quod ut oportet, medius.

Ad tertium dicendum, quod leges feruntur secundum ea quæ ut in pluribus accidunt. Hoc autem rarum erat

N 3

apud

apud antiquos ut aliquis amore veritatis contentandæ ab omni delectatione venerea abstinere: quod solus Plato legitur fecisse: unde non sacrificavit, quasi hoc peccatum reputaret, sed perverſæ opinioni civium cedens, ut ibidem Augustinus dicit.

### ARTICULUS III. 734

#### *Utrum virginitas sit virtus.*

*Inf. quæst. clv. art. 1. cor. & ad 5. & IV. dist. xxxiii. quæst. 111. art. 2. & dist. xlix. quæst. v. art. 3. quæst. 1. co. & II. Etb. lect. 2. fin.*

**A**D tertium sic proceditur. Videtur quod virginitas non sit virtus. Nulla enim virtus inest nobis a natura, ut Philosophus dicit in II. Eth. (cap. 1.) Sed virginitas inest nobis a natura: quilibet enim mox natus virgo est. Ergo virginitas non est virtus.

2. Præterea. Quicumque habet unam virtutem, habet omnes, ut supra habitum est (1. 2. quæst. lxi. art. 1.) Sed aliqui habent alias virtutes, qui non habent virginitatem: alioquin cum sine virtute nullus ad regnum cælorum perveniat, nullus sine virginitate ad ipsum posset pervenire: quod esset matrimonium dampnare. Ergo virginitas non est virtus.

3. Præterea. Omnis virtus restituitur per poenitentiam. Sed virginitas non reparatur per poenitentiam: unde Hieronymus dicit (epist. xxii. ad Eustoch. de custod. virginis. cap. 11. cir. med.) *Cum cetera Deus possit, non potest virginem post ruinam reparare*. Ergo videtur quod virginitas non sit virtus.

4. Præterea. Nulla virtus perditur sine peccato. Sed virginitas perditur sine peccato, scilicet per matrimonium. Ergo virginitas non est virtus.

5. Præterea. Virginitas dividitur virginitati, & pudicitie coniugali. Sed neutrum illorum ponitur virtus. Ergo virginitas non est virtus.

Sed contra est quod Ambrosius dicit in Lib. I. de virginibus. (aliquant. a princ.) *Invitat virginitatis amor ut aliquid de virginitate dicamus, ne veluti transitu quodam perfricta videatur, quæ principalis est virtus*.

Respondendo dicendum, quod, sicut supra dictum est (art. 1. hu. quæst.) in virginitate est sicut formale, & completivum, propositum perpetuo abstinendi

a delectatione venerea: quod quidem propositum laudabile redditur ex fine, inquantum scilicet hoc sit ad vacandum rebus divinis. Materiale autem in virginitate est integritas carnis abique omni experimento venereæ delectationis.

Manifestum est autem quod ubi est specialis materia boni, habens specialem excellentiam, ibi invenitur specialis ratio virtutis: sicut patet in magnificentia, quæ est circa magnos sumptus, & ex hoc est specialis virtus a liberalitate distincta, quæ communiter se habet circa omnem pecuniarium usum.

Hoc autem quod est conservare se immunitatem ab experimento venereæ voluptatis, habet quandam excellentiam laudis supra hoc quod est conservare se immunitatem ab inordinatione venereæ voluptatis. Et ideo virginitas est quædam specialis virtus habens se ad castitatem sicut magnificentia ad liberalitatem.

Ad primum ergo dicendum, quod homines ex sua nativitate habent id quod est materiale in virginitate, scilicet integritatem carnis immunitatem ab experimento venereorum; non tamen habent id quod est formale in virginitate, ut scilicet habeant propositum servandi huiusmodi integritatem propter Deum: & ex hoc habet rationem virtutis. Unde Augustinus dicit in Lib. de virginis. (cap. xi. in princ.) *Nec nos hoc in virginibus prædicamus, quod virgines sunt, sed quod Do dicite pia continentia virgines sunt*.

Ad secundum dicendum, quod connectio virtutum accipitur secundum illud quod est formale in virtutibus, id est secundum caritatem, vel secundum prudentiam, ut supra habitum est (quæst. cxxxix. art. 3. ad 2.) non autem secundum id quod est materiale in virtutibus. Nihil enim prohibet alicui virtuoso suppetere materiam unius virtutis, non autem materiam alterius; sicut pauper habet materiam temperantiae, non autem materiam magnificentiae. Et hoc modo alicui habenti alias virtutes deest materia virginitatis, id est prædicta integritas carnis; tamen potest id quod est formale in virginitate, habere, ut scilicet habeat in præparatione mentis, prædictæ integritatis conservandæ propositum, si hoc sibi competere; sicut pauper potest in præparatione animi habere propositum magnificos sumptus faciendi, si sibi competere; & similiter ille qui est in prosperitate, habet in præparatione animi pro-

propositum aduersa æquanimitè tolerandi : & sine hac præparatione animi non potest esse aliquid virtuosus.

Ad tertium dicendum, quod virtus per pœnitentiam reparari potest quantum ad id quod est formale in virtute, non autem quantum ad id quod est materiale in ipsa. Non enim si quis magnificus consumpserit diuitias suas, per pœnitentiam peccati restituntur ei diuitiæ. Et similiter ille qui virginatatem peccando amisit, per pœnitentiam non recuperat virginatatis materiam, sed recuperat virginatatis propositum. Circa materiam autem virginatatis est aliquid quod miraculose reparari poterit diuinitus, scilicet integritas membri, quam dicimus accidentaliter se ad virginatatem habere; aliud autem est quod nec miraculose reparari potest, ut scilicet qui expertus est venæpræm veneremur, fiat non expertus. Non enim Deus potest facere ut ea quæ facta sunt, non sine facta, ut in primo habitu est (quæst. xxv. art. 4.)

Ad quartum dicendum, quod virginitas, secundum quod est virtus, importat propositum voto firmitatem integritatis perpetuo seruandæ. Dicit enim Augustinus in Lib. de virgin. (cap. viii. in fin.) quod per virginatatem integritas carnis ipsi creatori animæ, & carnis vœtur, conseruatur, seruatur. Unde virginitas, secundum quod est virtus, nunquam amittitur nisi per peccatum.

Ad quintum dicendum, quod castitas coniugalis ex hoc solo habet laudem quod abstinet ab illicitis voluptatibus : unde non habet aliquam excellentiam supra communem castitatem. Viduitas autem addit quidem aliquid supra castitatem communem; non tamen peruenit ad id quod est perfectum in materia ista, scilicet ad omnimodam immunitatem venereæ voluptatis; sed sola virginitas. Et ideo sola virginitas ponitur virtus specialis supra castitatem, sicut magnificentia supra liberalitatem.

#### ARTICULUS IV. 735

*Utrum virginitas sit excellentior matrimonio.*

IV. diff. xxx. quæst. ii. art. 3. ad 6. & diff. xxxiii. quæst. iiii. art. 2. ad 5. & art. 3. ad 1. & 3.

**A**D quartum sic proceditur. Videtur quod virginitas non sit excellentior matrimonio. Dicit enim Augustinus in

Lib. de bono coniugali (cap. xxi. in fin.) *Non impar meritum est continentie in Ioanne, qui nullas expertus est nuptias, & in Abraham, qui filios generauit.* Sed maioris virtutis maius est meritum. Ergo virginitas non est potior virtus quam castitas coniugalis.

2. Præterea. Ex virtute dependet laus virtuosi. Si ergo virginitas præferretur continentie coniugali, videtur esse consequens quod quilibet virgo esset laudabilior qualibet coniugata. Hoc autem est falsum. Ergo virginitas non præferretur coniugio.

3. Præterea. Bonum commune potius est bono privato, ut patet per Philosophum in I. Ethicor. (cap. ii. ad fin.) Sed coniugium ordinatur ad bonum commune: dicit enim Augustinus in Lib. de bono coniugali (cap. xvi. in princ.) *Quod est cibis ad salutem hominis, hoc est concubitus ad salutem humani generis: virginitas autem ordinatur ad bonum speciale, ut scilicet vident tribulationem carnis, quam sustinent coniugari, sicut patet per Apostolum I. ad Cor. vii.* Ergo virginitas non est potior continentia coniugali.

Sed contra est quod dicit Augustinus in Lib. de virgin. (cap. xix. in fin.) *Et certa ratione, & sanctorum Scripturarum auctoritate nec peccatum esse nuptias invenimus; nec eas bono aut virginis continentie, vel etiam vidualis æquamus.*

Respondetur dicendum, quod, sicut patet in Lib. I. Hieronymi contra Iovinianum (non remore a princ.) hic error fuit Ioviniani, qui posuit, virginatatem non esse matrimonio præferendam.

Qui quidem error præcipue destruitur & exemplo Christi, qui & matrem virginem elegit, & ipse virginatatem seruauit; & ex doctrina Apostoli, qui I. ad Corinth. vii. virginatatem consuluit tanquam melius bonum; & etiam ratione, tum quia bonum diuinitus est potius humano bono, tum quia bonum animæ præfertur bono corporis, tum etiam quia bonum contemplatiuæ vitæ præfertur bono actiuæ. Virginitas autem ordinatur ad bonum animæ secundum vitam contemplatiuam, quod est cogitare ea quæ sunt Dei; coniugium autem ordinatur ad bonum corporis, quod est corporalis multiplicatio generis humani; & pertinet ad vitam actiuam: quia vir, & mulier in matrimonio vi-

ventes necesse habent cogitare quæ sunt mundi, ut patet per Apostolum I. ad Corinth. vii.

Unde indubitanter virginitas præferenda est continentie coniugali.

Ad primum ergo dicendum, quod meritum non solum pensatur ex genere actus, sed magis ex animo operantis. Habuit autem animus Abraham sic dispositum, ut paratus esset virginitatem servare, si esset temporis congruum: ex quo meritum continentie coniugalis in ipso æquatur merito continentie virginalis in Ioanne, respectu præmii substantialis, non autem respectu præmii accidentalis. Unde Augustinus dicit in Lib. de bono coniugali (cap. xxi. in fin.) quod *Ioannis calibatus, & Abraham conubium pro temporum distributione Christo militaverunt; sed continentiam Ioannes & in opere, Abraham vero in solo habitu habebat.*

Ad secundum dicendum, quod licet virginitas sit melior quam continentia coniugalis; potest tamen coniugatus melior esse quam virgo, duplici ratione. Primo quidem ex parte castitatis, si scilicet ille qui est coniugatus, habeat animum magis paratum ad virginitatem servandam, si oporteret, quam ille qui est actu virgo. Unde Augustinus instruit virginem in Libro de bono coniugali (cap. xxi. ante med.) ut dicat: *Ego non sum melior quam Abraham, sed melior est castitas quam calibus castitas nuptiarum.* Et rationem postea subdit, dicens: *Quod enim nunc ago, melius ille agisset, si tunc agendum esset: quod autem illi egerunt, sic ego non agerem, etiam si nunc agendum esset.* Secundo quia forte ille qui non est virgo, habet aliquam excellentiorem virtutem. Unde Augustinus dicit in Lib. de virginis. (cap. xlv. in fi.) *Unde scis virgo, quamvis sollicita que sunt Domini, ne forte propter aliquam fieri incognitam mentis infirmitatem nondum sit matura martyria; illa vero mulier cui se præferre gestabas, iam possit bibere calicem dominice passionis?*

Ad tertium dicendum, quod bonum commune potius est bono privato, si sit eiusdem generis; sed potest esse quod bonum privatum sit melius secundum suum genus. Et hoc modo virginitas Deo dicata præfertur secunditati carnali. Unde Augustinus dicit in Lib. de virginis. (cap. ix. in princ.) quod *secunditas carnis etiam illarum que in hoc tempore nihil aliud ad in coniugio quam pro-*

*lem requirunt, quam mancipienti Christo pro amissa virginitate compensare non possent credenda est.*

## ARTICULUS V. 736

*Utrum virginitas sit maxima virtutum.*

*Inf. quest. clv. art. 1. & quest. clxxxv. art. 4. & IV. dist. lxxi. quest. lxxi. art. 3. & III. cont. cap. cxxxiv.*

**A**D quintum sic proceditur. Videtur quod virginitas sit maxima virtutum. Dicit enim Cyprianus in Lib. de virginis. (seu de de habitu virgin. non remote a princ.) *Nunc nobis ad virginis sermo est, quarum quo sublimior est gloria, eo est maior cura. Flos ille ecclesiastici germinis, decus, atque orna mentum gratie spiritualis, illustrior portio gregis Christi.*

2. Præterea. Maius præmium debetur maiori virtuti. Sed virginitati debetur maximum præmium, scilicet fructus centesimus, ut patet Matth. xxi. in Glossa (ord. Hieron. sup. illud, *Qui vero in terram bonam.*) Ergo virginitas est maxima virtutum.

3. Præterea. Tanto aliqua virtus est maior, quanto per eam aliquis Christo magis conformatur. Sed maxime aliquis conformatur Christo per virginitatem, dicitur enim Apocal. xiv. 4. de virginibus, quod *sequuntur agnum, & quocumque ierit: & quod cantant canticum novum, quod nemo alius poterat dicere.* Ergo virginitas est maxima virtutum.

Sed contra est quod Augustinus dicit in Libro de virginis. (cap. xlv. in fi.) *Nemo, quantum puto, ausus fuerit virginitatem præferre (a) martyrio: & in eodem Lib. (cap. xlv. in princ.) dicit: Præclarissimum testimonium perhibet ecclesiastica auctoritas, in qua fidelibus notum est, qui loco Martyris, & quo desunt sanctimonialia ad altaris sacramenta recipiunt. Per quod datur intelligi, quod martyrium virginitati præferatur, & similiter monasterii status.*

Respondeo dicendum, quod aliquid potest dici excellentissimum dupliciter. Uno modo in aliquo genere. & sic virginitas est excellentissima, scilicet in genere castitatis: transcendit enim & castitatem vidualem, & coniugalem. Et quia castitati antonomastice attribuitur decor, ideo virginitati per consequens attribuitur excellentissima pulchritudo. Unde

(a) Ita cum Augustinus edit. Patav. Mss. & edit. D. Thoma postea innotuit.

Unde & Ambrosius dicit in Lib. de virginibus ( parum a med. ) *Pulchritudinem quis potest maiorem estimare decore virginis, quae amatur a Rege, probatur a iudice, dedicatur Domino, consecratur Deo?*

Alio modo potest dici aliquid excellentissimum simpliciter: & sic virginitas non est excellentissima virtutum. Semper enim finis excellit id quod est ad finem; & quanto aliquid efficacius ordinatur ad finem, tanto melius est. Finis autem, ex quo virginitas laudabilis rediit, est vacare rebus divinis, ut dictum est (art. præc.) Unde ipsa virtutes theologicae, & etiam virtus religiosa, quarum actus est ipsa occupatio circa res divinas, præferuntur virginitati. Similiter etiam vehementius operantur, ad hoc quod inhaereant Deo, martyres, qui ad hoc postponunt propriam vitam, & viventes in monasteriis, qui ad hoc postponunt propriam voluntatem, & omnia quae possunt habere, quam virgines, quæ ad hoc postponunt venerant voluptatem. Et ideo virginitas non simpliciter est maxima virtutum.

Ad primum ergo dicendum, quod virgines sunt illustrior portio gregis Christi; & est earum sublimior gloria per comparisonem ad viduas, & coniugatas.

Ad secundum dicendum, quod centesimus fructus attribuitur virginitati, secundum Hieronymum, propter excellentiam quam habet ad viduitatem, cui attribuitur sexagesimus, & ad matrimonium, qui attribuitur tricesimus. Sed, sicut Augustinus dicit in Lib. I. de quaestionibus Evangel. (cap. ix. in princ.) *centesimus fructus est martyrum, sexagesimus virginum, & tricesimus coniugatorum.* Unde ex hoc non sequitur quod virginitas sit simpliciter maxima virtutum omnium, sed solum in aliis gradibus calcatis.

Ad tertium dicendum, quod virgines sequuntur Agnum, quocumque ierit, quia imitantur Christum, non solum in integritate mentis, sed etiam in integritate carnis, ut Augustinus dicit in Lib. de virginit. (cap. xxvii. a med.) Et ideo in pluribus sequuntur Agnum; non tamen oportet quod magis de propinquo, quia aliae virtutes faciunt propinquius inhaerere Deo per imitationem mentis. Canticum autem novum, quod solae virgines cantant, est gaudium quod habent de integritate carnis servata.

## QUAESTIO CLIII.

De vitio luxuriae,

in quinque articulos divisa.

**D**Einde considerandum est de vitio luxuriae, quod opponitur castitati: & primo de ipsa in generali; secundo de speciebus eius.

Et circa primum quaeruntur quinque.

Primo, quæ sit materia luxuriae.

Secundo, utrum omnis concubitus sit illicitus.

Tertio, utrum luxuria sit peccatum mortale.

Quarto, utrum luxuria sit vitium capitale.

Quinto de filiabus eius.

## ARTICULUS I. 737

*Utum materia luxuriae sint solum concupiscentia, & delectationes venereae.*

I. Esb. cap. v. leß. 2.

**A**D primum sic proceditur. Videtur quod materia luxuriae non solum sint concupiscentiae, & delectationes venereae. Dicit enim Augustinus in Lib. II. Confess. (cap. vi. a med) quod *luxuria ad satietatem, atque abundantiam se cupit vocari.* Sed satietas pertinet ad cibos, & potus, abundantia autem ad divitias. Ergo luxuria non est proprie circa concupiscentias, & voluptates venereas.

1. Præterea. Proverb. xx. 1. dicitur: *Luxuriosa res est vinum.* Sed vinum pertinet ad delectationem cibi, & potus. Ergo circa ea maxime videtur luxuria esse.

3. Præterea. Luxuria dicitur esse libidinosa voluptatis appetitus. Sed libidinosa voluptas non solum est in venereis, sed etiam in multis aliis. Ergo luxuria non est solum circa concupiscentias, & voluptates venereas.

Sed contra est quod dicitur in Lib. de vera religione (cap. xii. a med) de luxuriosis: *Qui seminat in carne, de carne metes corruptionem.* Sed seminatio carnis fit per voluptates venereas. Ergo ad has pertinet luxuria.

Respondetur dicendum, quod, sicut Isidorus dicit in Lib. X. Etymol. (ad lit. L.) *luxuriosus aliquis dicitur, quasi solu-*

tus

*lus in voluptates.* Maxime autem voluptates venereæ animi hominis solvunt: & ideo circa voluptates venereas maxime luxuria consideratur.

Ad primum ergo dicendum, quod sicut temperantia principaliter quidem & proprie est circa delectationes tactus; dicitur autem ex consequenti, & per similitudinem quendam in quibusdam aliis materiis: ita etiam luxuria principaliter quidem est in voluptatibus venereis, quæ maxime & præcipue animum hominis resolvunt; secundario autem dicitur in quibuscumque aliis ad excessum pertinentibus. Unde ad Galat. v. dicit Glossa (interl. sup. illud, *Luxuria, idolorum servitus* &c.) quod „luxuria est quælibet superfluitas.“

Ad secundum dicendum, quod vinum dicitur res luxuriosa vel secundum hunc modum quo in qualibet materia abundantia ad luxuriam refertur, vel inquantum superfluus usus vini incentivum voluptati venereæ præbet.

Ad tertium dicendum, quod etsi libidinosæ voluptas in aliis materiis dicitur; tamen specialiter hoc nomen sibi vindicat venereæ delectationes, in quibus etiam specialiter libido dicitur, ut Augustinus dicit in XIV. de civ. Dei (cap. xv. ad fin. & cap. xvi. in princ.)

## ARTICULUS II. 738

*Utrum nullus actus venereus possit esse sine peccato.*

*Mal. quæst. xv. art. 1.*

**A**D secundum sic proceditur. Videtur quod nullus actus venereus possit esse sine peccato. Nihil enim videtur impedire virtutem nisi peccatum. Sed omnis actus venereus maxime impedit virtutem: dicit enim Augustinus in I. Soliloquiorum (cap. x. ante med.) *Nihil esse sentio quod magis ex arce deticiat animum virilem quam blandimenta femineæ, corporumque ille contactus.* Ergo nullus actus venereus videtur esse sine peccato.

1. Præterea. Ubicumque invenitur aliquid superfluum, per quod a bono rationis receditur, hoc est vitiosum: quia virtus corrumpitur per superfluum, & diminuitur, ut dicitur II. Ethic. (cap. ii. & vi.) Sed in quolibet actu venereo aliquid superfluitas delectationis, quæ intantum absorbet rationem, quod impossibile est aliquid intelligere in ipsa, ut Phi-

losophus dicit in VII. Ethic. (cap. xi. a med.) & sicut Hieronymus dicit (epist. xi. ad Ageruch. de Monogamia. parum a med. & hab. cap. *Connubia*, xxxii. quæst. ii.) in illo actu spiritus prophetiæ non rangebat corda Prophetarum. Ergo nullus actus venereus potest esse sine peccato.

3. Præterea. Causa potior est quam effectus. Sed peccatum originale in parvulis trahitur a concupiscentia, sine qua actus venereus esse non potest, ut patet per Augustinum in Lib. I. de nuptiis, & concupiscentia (cap. xxiv.) Ergo nullus actus venereus potest esse sine peccato.

Sed contra est quod Augustinus dicit in Lib. de bono coniugali (cap. xxv. cir. princ.) *Satis responsum est hæreticis, si tamen capiunt, non esse peccatum quod neque contra naturam committitur, neque contra morem, neque contra præceptum:* & loquitur de actu venereo quod antiqui patres pluribus coniugibus utebantur. Ergo non omnis actus venereus est peccatum.

Respondeo dicendum, quod peccatum in humanis actibus est quod est contra ordinem rationis. Habet autem hoc rationis ordo ut qualibet convenienter ordinet in suum finem. Et ideo non est peccatum, si per rationem homo utatur rebus aliquibus ad finem ad quem sunt, modo & ordine convenienti, dummodo ille finis sit aliquid vere bonum.

Sicut autem est vere bonum quod conservetur corporalis natura unius individui; ita etiam est quoddam bonum excellens quod conservetur natura speciei humanæ. Sicut autem ad conservationem vitæ unius hominis ordinatur usus ciborum, ita etiam ad conservationem totius humani generis usus venereorum.

Unde Augustinus dicit in Lib. de bono coniugali (cap. xvi. in princ.) *Quod est cibis ad salutem hominis, hoc est concubitus ad salutem generis.* Et ideo sicut usus ciborum potest esse absque peccato, si fiat debito modo & ordine, secundum quod competit saluti corporis; ita etiam & usus venereorum potest esse absque omni peccato, si fiat debito modo, & ordine, secundum quod est convenientis ad finem generationis humanæ.

Ad primum ergo dicendum, quod aliquid potest impedire dupliciter virtutem. Uno modo quantum ad communem statum virtutis: & sic non impeditur virtus nisi per peccatum. Alio modo quantum ad perfectum virtutis statum: & sic

pot-



potest impediri virtus per aliquid quod non est peccatum, sed est minus bonum. Et hoc modo usus feminæ deicit animum non a virtute, sed ab arce, id est perfectione virtutis. Unde Augustinus dicit in Lib. de bono coniugali (cap. VIII. a med.) Sicut bonum erat quod Martha faciebat occupata circa ministerium Sanctorum, sed melius quod Maria audiens verbum Dei; ita etiam bonum Susannæ in castitate coniugali laudamus, sed tamen ei bonum viduæ Annæ, ac multo magis Mariæ virginis anteponi-  
mus.

Ad secundum dicendum, quod, sicut supra dictum est (quæst. præc. art. 2. ad 2. & 1. 2. quæst. LXV. art. 2.) medium virtutis non attenditur secundum quantitatem, sed secundum quod convenit rationi rectæ. Et ideo abundantia delectationis, quæ est in actu venereo secundum rationem ordinato, non contrariatur medio virtutis. Et præterea ad virtutem non pertinet, quantum sensus exterior delectetur, quod consequitur corporis dispositionem, sed quantum appetitus interior ad huiusmodi delectationes afficiatur. Nec ex hoc etiam quod ratio non potest liberum actum rationis ad spiritualia considerata simul cum illa delectatione habere, ostenditur quod actus ille sit virtuti contrarius. Non enim est virtuti contrarium, si rationis actus aliquando intermitteretur pro aliquo quod secundum rationem fit: alioquin quod aliquis se somno tradit, esset contra virtutem. Hoc tamen quod concupiscentia, & delectatio venereorum non subiacet imperio, & moderationi rationis, provenit ex pœna primi peccati, in quantum scilicet ratio rebellis Deo meruit habere suam carnem rebellem, ut patet per Augustinum XIII. de civitate Dei (cap. XLII.).

Ad tertium dicendum, quod, sicut Augustinus ibidem dicit (loc. cit. in arg.) ex concupiscentia carnis, quæ regeneratis non imputatur in peccatum, tamquam ex filia peccati proles nascitur, originali obligata peccato. Unde non sequitur quod actus ille sit peccatum, sed quod in illo actu sit aliquid pœnale a peccato primo derivatum.

## ARTICULUS III. 739

*Utrum luxuria quæ est circa actus venereos, possit esse peccatum.*

Sup. quæst. XXXV. art. 3. cor. 1. & quæst. XXXVI. art. 3. cor. & IV. dist. XXXIII. quæst. 1. art. 3. quæst. 2. & 3. & mal. quæst. XV. art. 2. & I. Cor. VII. lect. 3.

**A**D tertium sic proceditur. Videtur quod luxuria quæ est circa actus venereos, non possit esse aliquod peccatum. Per actum enim venereum semen emittitur, quod est superfluum alimenti, ut patet per Philosophum in Lib. I. de generatione animalium (cap. XVIII. a med. & cap. XIX.) Sed in emissionem aliarum superfluitatum non attenditur aliquod peccatum. Ergo neque circa actus venereos potest esse aliquod peccatum.

2. Præterea. Quilibet potest licite uti, ut libet, eo quod suum est. Sed in actu venereo homo non utitur nisi eo quod suum est, nisi forte in adulterio, vel rapto. Ergo in usu venereo non potest esse peccatum; & ita luxuria non erit peccatum.

3. Præterea. Omne peccatum habet vitium oppositum. Sed luxuriæ nullum vitium videtur esse oppositum. Ergo luxuria non est peccatum.

Sed contra est quod causa est potior suo effectu. Sed vinum prohibetur propter luxuriam, secundum illud Apostoli ad Ephes. v. 18. Nolite inebriari vino, in quo est luxuria. Ergo luxuria est prohibita.

Præterea. Galat. v. enumeratur inter opera carnis.

Respondeo dicendum, quod quanto aliquid est magis necessarium, tanto magis oportet ut circa illud rationis ordo servetur. Unde per consequens magis est vitiosum, si ordo rationis prætermittatur. Usus autem venereorum, sicut dictum est (art. præc.) est valde necessarius ad bonum commune, quod est conservatio humani generis. Et ideo circa hoc maxime attendi debet rationis ordo; & per consequens si quid circa hoc fit, præter id quod ordo rationis habet, vitiosum erit. Hoc autem pertinet ad rationem luxuriæ ut ordinem, & modum rationis excedat circa venerea. Et ideo absque dubio luxuria est peccatum.

Ad primum ergo dicendum, quod, sicut Philosophus in eodem Libro dicit (loc. cit.

cit. in arg.) *semen est superfluum, quod indiget*: dicitur enim superfluum ex eo quod residuum est operationis virtutis nutritivæ, tamen indiget eo ad opus virtutis generativæ. Sed alia superfluitates humani corporis sunt, quibus non indiget: & ideo non refert, qualitercumque emittantur, salva decencia convictus humani. Sed non est simile in feminis emissionem, quæ taliter debet fieri ut conveniat fini, ad quem eo indiget.

Ad secundum dicendum, quod, sicut Apostolus dicit I. ad Cor. vi. 20. contra luxuriam loquens: *Empii estis pretio magno. Glorificate ergo, & portate Deum in corpore vestro*. Ex eo ergo quod aliquis inordinate suo corpore utitur per luxuriam, iniuriam facit Deo, qui est principalis dominus corporis nostri. Unde & Augustinus dicit in Lib. de decem chordis (cap. x. cir. med.) *Deus, qui sic gubernat servos suos ad utilitatem illorum, non ad suam, hoc iussit, hoc præcepit, ne per illecebras, & illicitas voluptates corruas templum eius, quod esse cœpisti*.

Ad tertium dicendum, quod oppositum luxuriæ non contingit in multis, eo quod homines magis sunt proni ad delectationes, & tamen oppositum vitium continetur sub infirmitate: & accidit hoc vitium in eo qui intantum delectatur mulierum utum, quod etiam uxori debitum non reddit.

#### ARTICULUS IV. 740

*Utrum luxuria sit vitium capitale.*

*Mal. quæst. xv. art. 4.*

**A**D quartum sic proceditur: Videtur quod luxuria non sit vitium capitale. Luxuria enim videtur idem esse immunditiæ, ut patet per Glossam (interl. super illud, *Omni immunditia*) ad Ephes. v. Sed immunditia est filia gulæ, ut patet per Gregorium XXXI. Moral. (cap. xvii. a med.) Ergo luxuria non est vitium capitale.

2. Præterea. Sidorus dicit in Lib. II. de summo bono (cap. xxxix. in princ.) quod sicut per superbiam mentis itur in prostitutionem libidinis; ita per humilitatem mentis salva sit castitas carnis. Sed contra rationem capitalis vitii esse videtur quod ex alio vitio oriatur. Ergo luxuria non est vitium capitale.

3. Præterea. Luxuria causatur ex desperatione, secundum illud Ephes. iv. 19.

*Qui desperantes, semetipsos tradiderunt impuditiæ*. Sed desperatio non est vitium capitale; quinimmo ponitur filia acedie, ut supra habitum est (quæst. xxxv. art. 4. ad 2.) Ergo multo minus luxuria est vitium capitale.

Sed contra est quod Gregorius XXXI. Moral. (cap. xvii. a med.) ponit luxuriam inter vitia capitalia.

Respondeo dicendum, quod, sicut ex dictis patet (quæst. cxlviii. art. 5. & 1. 2. quæst. lxxxiv. art. 3. & 4.) vitium capitale est quod habet finem multum appetibilem; ita quod ex eius appetitu homo procedat ad multa peccata perpetranda, quæ omnia ex illo vitio tamquam ex principali oriuntur. Finis autem luxuriæ est delectatio venereorum, quæ est maxima. Unde huiusmodi delectatio est maxime appetibilis secundum appetitum sensitivum, tum propter vehementiam delectationis, tum etiam propter connaturalitatem huiusmodi concupiscentiæ. Unde manifestum est quod luxuria est vitium capitale.

Ad primum ergo dicendum, quod immunditia secundum quoddam, quæ ponitur filia gulæ, est quædam immunditia corporalis, ut supra dictum est (quæst. cxlviii. art. 6.) & sic obiectio non est ad propositum.

Si vero accipiatur pro immunditia luxuriæ, sic dicendum, quod ex gula causatur materialiter, inquantum scilicet gula ministrat materiam corporalem luxuriæ; non autem secundum rationem causæ finalis, secundum quam potissime attenditur origo aliorum vitiorum ex vitiiis capitalibus.

Ad secundum dicendum, quod, sicut supra dictum est (quæst. cxxxix. art. 4.) cum de inani gloria ageretur, superbia ponitur communis mater omnium peccatorum: & ideo etiam vitia capitalia ex superbia oriuntur.

Ad tertium dicendum, quod a delectationibus luxuriæ præcipue aliqui abstergent propter spem futuræ gloriæ; quam desperatio subtrahit: & ideo causat luxuriam, sicut removens prohibens, non sicut per se causa; quod requiri videtur ad vitia capitalia.

## ARTICULUS V. 741

*Utrum convenienter dicantur esse filia luxuriae, cecitas mentis, inconsideratio, praecipitatio, inconstantia, amor sui, odium Dei, affectus praesentis saeculi, & horror futuri.*

Sup. quest. lxxxviii. art. 6. & mal. quest. viii. art. 2. co. & quest. xliiii. art. 3. & quest. xv. art. 4.

**A**D quantum sic proceditur. Videtur quod inconvenienter dicantur esse filiae luxuriae, cecitas mentis, inconsideratio, praecipitatio, inconstantia, amor sui, odium Dei, affectus praesentis saeculi, horror, vel desperatio futuri. Quia cecitas mentis, & inconsideratio, & praecipitatio pertinent ad imprudentiam, quae invenitur in omni peccato, sicut & prudentia in omni virtute. .... Ergo non debent poni speciales filiae luxuriae.

2. Praeterea. Constantia ponitur pars fortitudinis, ut supra habitum est (quest. cxxviii. & quest. cxxvii. art. 3.) Sed luxuria non opponitur fortitudini, sed temperantiae. Ergo inconstantia non est filia luxuriae.

3. Praeterea. *Amor sui usque ad contemptum Dei est principium omnis peccati*, ut patet per Augustinum XIV. de civitate Dei (cap. ult. in princ.) Non ergo debet poni filia luxuriae.

4. Praeterea. Indorus (comment. in Deut. cap. xvi. cir. med.) ponit quatuor, scilicet *turpis loquax, scurrilia, ludicra, multiloquia*. Ergo praedicta enumeratio videtur esse superflua.

Sed contra est auctoritas Gregorii XXXI. Moral. (cap. xvii. a med.)

Respondetur dicendum, quod quando inferiores potentiae vehementer afficiuntur ad sua obiecta, consequens est quod superiores vires impediuntur, & deordinentur in suis actibus. Per vitium autem luxuriae maxime appetitus inferior, scilicet concupiscibilis, vehementer intendit suo obiecto, scilicet delectabili, propter vehementiam passionis, & delectationis. Et ideo consequens est quod per luxuriam maxime superiores vires deordinentur, scilicet ratio, & voluntas.

Sunt autem rationis quatuor actus in agendis. Primo quidem simplex intelligentia, quae apprehendit aliquem finem ut bonum; & hic actus impeditur per luxuriam, secundum illud Dan. xlii. 56. *Species deceps te, & concupiscentia sub-*

*vertis cor tuum.* Et quantum ad hoc ponitur *cecitas mentis*. Secundus actus est consilium de his quae sunt agenda propter finem; & hic etiam impeditur per concupiscentiam luxuriae. Unde Terentius dicit in Eunuchus (act. 1. scena 1. a prae.) loquens de amore libidinoso: *Quae res in se neque consilium, neque modum ullum habet, eam consilio regere non potest.* Et quantum ad hoc ponitur *praecipitatio*, quae importat lubricationem consilii, ut supra habitum est (quest. lxxxviii. art. 3.). Tertius actus est iudicium de agendis; & hic etiam impeditur per luxuriam. Dicitur enim Dan. xlii. 9. de lenibilibus luxuriosis: *Averterunt sensum suum. .... ut non recordarentur iudiciorum iustorum.* Et quantum ad hoc ponitur *inconsideratio*. Quartus autem actus est praecceptum rationis de agendo, qui etiam impeditur per luxuriam, in quantum scilicet homo impeditur ex impetu concupiscentiae, ne exequatur id quod decrevit esse faciendum. Et quantum ad hoc ponitur *inconstantia*. Unde Terentius dicit in Eunuchus (loc. cit.) de quodam, qui dicebat se recessurum ab amica: *Hec verba una falsa lacrymula restringit.*

Ex parte autem voluntatis consequitur duplex actus inordinatus. Quorum unus est appetitus finis; & quantum ad hoc ponitur *amor sui*, quantum scilicet ad delectationem, quam inordinate appetit; & per oppositum ponitur *odium Dei*, in quantum scilicet prohibet delectationem concupitam. Alius autem est appetitus eorum quae sunt ad finem; & quantum ad hoc ponitur *affectus praesentis saeculi*, in quo scilicet aliquis vult frui voluptate; & per oppositum ponitur *desperatio futuri saeculi*, quia dum nimis detinetur carnalibus delectationibus, non curat pervenire ad spirituales, sed festinat eas.

Ad primum ergo dicendum, quod, sicut Philosophus dicit in VI. Eth. (cap. v. a med.) *intemperantia maxime corrumpit prudentiam*; & ideo vitia opposita prudentiae maxime oriuntur ex luxuria, quae est praecipua intemperantiae species.

Ad secundum dicendum, quod constantia in arduis, & terribilibus ponitur pars fortitudinis; sed constantiam habere in abstinendo a delectabilibus pertinet ad continentiam, quae ponitur pars temperantiae, sicut supra dictum est (quest. cxliiii.) & ideo inconstantia, quae ci-

opponitur, ponitur filia luxuriæ: & tamen etiam prima inconstancia ex luxuria causatur, inquantum emollit cor hominis, & effeminatum reddit, secundum illud Olee 14. 11. *Fornicatio, & vinum, & ebrietates auferunt cor.* Et Vegetius dicit in Lib. 1. de re militari (cap. 111. in fi.) quod minus mortem metuit qui minus deliciarum novit in vita. Nec oportet, sicut sæpe dictum est (quæst. xxxv. art. 4. ad 2. & quæst. cxviii. art. 8. ad 2. & quæst. cxlviii. art. 6.) quod filia vitii capitalis cum eo in materia conveniant.

Ad tertium dicendum, quod amor sui quantum ad quæcumque bona, quæ sibi aliquis appetit, est commune principium peccatorum; sed quantum ad hoc specialiter quod aliquis appetit sibi delectabilia carnis, ponitur amor sui filia luxuriæ.

Ad quartum dicendum, quod illa quæ Isidorus ponit, sunt quidam inordinati actus exteriores, & præcipue ad locutionem pertinentes. In qua est aliquid inordinatum quadrupliciter. Uno modo propter materiam; & sic ponitur *scurrilologia*: quia enim ex abundantia cordis os loquitur, ut dicitur Match. xxi. 34. luxuriosi, quorum cor est turpibus concupiscentiis plenum, de facili ad turpia verba prorumpunt. Secundo ex parte causæ: quia enim luxuria inconsiderationem, & præcipationem causat, consequens est quod faciat prorumpere in verba leviter, & inconsiderate dicta, quæ dicuntur *scurrilia*. Tertio quantum ad finem: quia enim luxuriosus delectationem quærit, verba sua ad delectationem ordinat; & sic prorumpit in verba ludrica. Quarto quantum ad sententiam verborum, quam pervertit luxuria propter cæcitatem mentis, quam causat; & sic prorumpit in *hæsiologia*, utpote cum suis verbis præter delectationes quas appetit, quibuscumque aliis rebus.

#### QUAESTIO CLIV.

##### De luxuriæ partibus,

##### in duodecim articulis divisa.

**D**Einde considerandum est de luxuriæ partibus: & circa hoc quærentur duodecim.

Primo de divisione partium luxuriæ. Secundo, utrum fornicatio simplex sit peccatum mortale.

Tertio, utrum sit maximum peccatum.

Quarto, utrum in tactibus, & osculis, & aliis huiusmodi illecebris consistat peccatum mortale.

Quinto, utrum nocturna pollutio sit peccatum.

Sexto de stupro.

Septimo de raptu.

Octavo de adulterio.

Nono de incestu.

Decimo de sacrilegio.

Undecimo de peccato contra naturam.

Duodecimo de ordine gravitatis in prædictis speciebus.

#### ARTICULUS I. 742.

*Utrum convenienter assignentur sex species luxuriæ, scilicet fornicatio simplex, adulterium, incestus, stuprum, raptus, & vitium contra naturam.*

IV. dist. xli. art. 4. quæst. 1. & 2. & mal. quæst. xv. art. 3.

**A**D primum sic proceditur. Videtur quod inconvenienter assignentur sex species luxuriæ, scilicet fornicatio simplex, adulterium, incestus, stuprum, raptus, & vitium contra naturam. Diverſas enim materiæ non diversificat speciem. Sed prædicta divisio sumitur secundum materiæ diversitatem, prout scilicet aliquis commiscetur coniugatæ, vel virgini, vel alterius conditionis mulieri. Ergo videtur quod per hoc species luxuriæ non diversificentur.

2. Præterea. Species vitii unius non videntur diversificari per ea quæ pertinent ad aliud vitium. Sed adulterium non differt a simplici fornicatione, nisi in hoc quod aliquis accedit ad eam quæ est alterius, & sic iniustitiam committit. Ergo videtur quod adulterium non debet poni species luxuriæ.

3. Præterea. Sicut contingit quod aliquis commiscetur mulieri quæ est alteri viro per matrimonium obligata, ita etiam contingit quod aliquis commiscetur mulieri quæ est obligata Deo per votum. Sicut ergo adulterium ponitur species luxuriæ, ita etiam sacrilegium species luxuriæ poni debet.

4. Præterea. Ille qui est matrimonio iunctus, non solum peccat, si ad aliam mulierem accedat, sed etiam si sua coniuge inordinate utatur. Sed hoc peccatum sub luxuria continetur. Ergo de-

deberet inter species luxuriæ computari.

5. Præterea. Apostolus II. ad Cor XII. 21. dicit: *Ne iterum, cum venero, humiliet me Deus apud vos, & lugeam multos ex his qui ante peccaverunt, & non egerunt poenitentiam super immunditia, & fornicatione, & impudicitia quam gesserunt.* Ergo videtur quod etiam immunditia, & impudicitia debeant poni species luxuriæ, sicut & fornicatio.

6. Præterea. Divisum non dividitur dividendis. Sed luxuria dividitur prædictis: dicitur enim Gal. v. 19. *Manifesta sunt opera carnis, quæ sunt: fornicatio, immunditia, impudicitia, luxuria.* Ergo videtur quod inconvenienter fornicatio ponatur species luxuriæ.

Sed contra est quod prædicta divisio ponitur in Decret. xxxvi. quest. 1. (in appendice Grat. ad C. *Lex illa*).

Respondendo dicendum, quod, sicut dictum est (quest. præc. art. 2. & 3.) peccatum luxuriæ consistit in hoc quod aliquis non secundum rectam rationem delectatione venerea utitur. Quod quidem contingit dupliciter: uno modo secundum materiam in qua huiusmodi delectationem querit; alio modo secundum quod materia debita existente, non observantur aliæ debite conditiones.

Et quia circumstantia, inquantum huiusmodi, non dat speciem actui morali, sed eius species sumitur ab obiecto, quod est materia actus; ideo oportuit species luxuriæ assignari ex parte materiae, vel obiecti. Quæ quidem potest non convenire rationi rectæ dupliciter. Uno modo quia habet repugnantiam ad finem venerei actus: & sic inquantum impeditur generatio prolis, est vitium contra naturam, quod est in omni actu venereo ex quo generatio sequi non potest; inquantum autem impeditur debita educatio, & promotio prolis natæ, est fornicatio simplex, quæ est soluta cum soluta.

Alio modo materia in qua exercetur actus venereus, potest esse non conveniens rationi rectæ per comparisonem ad alios homines: & hoc dupliciter. Primo quidem ex parte ipsius femine cui aliquis commiscetur, quia ei debitus honor non servatur: & sic est incestus, qui consistit in abusu mulierum consanguinitate, vel affinitate iunctarum. Secundo ex parte eius in cuius potestate est femina; quæ si est in potestate viri, est adulterium; si autem est in pote-

state patris, est stuprum, si non inferatur violentia; raptus autem, si inferatur.

Diversificantur autem istæ species magis ex parte feminæ quam viri: quia in actu venereo femina se habet sicut patiens, & per modum materiae, vir autem per modum agentis. Dictum est autem (in arg. 1.) quod prædictæ species secundum differentiam materiae assignantur.

Ad primum ergo dicendum, quod prædicta diversitas materiae habet annexam diversitatem formalem obiecti, quæ accipitur secundum diversos modos repugnantiae ad rationem rectam, ut dictum est (in cor. art.)

Ad secundum dicendum, quod nihil prohibet, in eodem actu diversorum vitiorum deformitates concurrere, ut supra dictum est (1. 2. quest. xviii. art. 7.) & hoc modo adulterium continetur sub luxuria, & sub iniustitia. Nec deformitas iniustitiæ omnino per accidens se habet ad luxuriam: ostenditur enim luxuria gravior, quæ inquantum concupiscentiam sequitur, quod etiam in iniustitiam ducat.

Ad tertium dicendum, (a) quod quia mulier vovens continentiam, quoddam spirituale matrimonium facit cum Deo; sacrilegium, quod committitur in violatione talis mulieris, est quoddam adulterium spirituale: & similiter alii modi sacrilegii reducuntur ad alias species luxuriæ.

Ad quartum dicendum, quod peccatum coniugari cum sua uxore non est secundum indebitam materiam, sed secundum alias circumstantias, quæ non constituunt speciem moraliæ actus, ut dictum est (in corp. & 1. 2. quest. xviii. art. 2.)

Ad quintum dicendum, quod, sicut Glossa (interl.) dicit ibidem, immunditia ponitur pro luxuria contra naturam; impudicitia autem est quæ fit cum liberis a viro, unde videtur ad stuprum pertinere.

Vel etiam potest dici, quod impudicitia pertinet ad quoddam actus circumstantes actum venereum, sicut sunt oscula, tactus, & alia huiusmodi.

Ad sextum dicendum, quod luxuria sumitur ibidem pro quacumque superfluitate, ut Glossa (interl.) ibidem dicit.

A R-

(a) Ita possim. Nec minus quod mulier, & non cum Deo; & ideo sacrilegium &c.

## ARTICULUS II. 743

*Utrum fornicatio simplex sit peccatum mortale.*

*IV. dist. xli. art. 4. quest. 1. cor. & quest. 2. cor. & ad 2.*

**A**D secundum sic proceditur. Videtur quod fornicatio simplex non sit peccatum mortale. Ea enim quae simul connumerantur, videntur esse unius rationis. Sed fornicatio connumeratur quibudam quae non sunt peccata mortalia: dicitur enim Añ. xv. 20. (a) *Abstineas vos ab immolatis simulacrorum, & sanguine, & suffocato, & fornicatione.* Illorum autem usus non est peccatum mortale, secundum illud I. ad Tim. iv. 4. *Nihil reiiciendum est quod cum gratia vivit actione percipitur.* Ergo fornicatio non est peccatum mortale.

2. Præterea. Nullum mortale peccatum cadit sub præcepto divino. Sed Osee i. 2. præcipitur Domino: *Vade, sume tibi uxorem fornicationum, & fac sibi fornicationum.* Ergo fornicatio non est peccatum mortale.

3. Præterea. Nullum peccatum mortale in Scriptura sacra abique reprehensione commemoratur. Sed fornicatio simplex commemoratur in Scriptura in antiquis patribus sine reprehensione; sicut legitur Gen. xvi. de Abraham, quod accessit ad Agar ancillam suam; & infra cap. xxx. legitur de Iacob, quod accessit ad ancillas uxorum suarum Balam, & Zelpham; & infra cap. xxxviii. legitur, quod Iudas accessit ad Thamar, quam æstimavit meretricem. Ergo fornicatio simplex non est peccatum mortale.

4. Præterea. Omne peccatum mortale contrariatur caritati. Sed fornicatio simplex non contrariatur caritati neque quantum ad dilectionem Dei, quia non est directe peccatum contra Deum, nec etiam quantum ad dilectionem proximi, quia per hoc homo nulli homini facit injuriam. Ergo fornicatio simplex non est peccatum mortale.

5. Præterea. Omne peccatum mortale ducit in perditionem æternam. Hoc autem non facit fornicatio simplex: quia super illud I. ad Timoth. iv. *Pietas ad omnia utilis est*, dicit Glossa Ambrosii: „Omnia summa disciplinae christianæ in

„misericordia, & pietate est: quam a-  
„liquis sequens, si lubricum carnis pa-  
„tiatur, sine dubio vapulabit, sed non  
„peribit.“ Ergo fornicatio simplex non  
est peccatum mortale.

6. Præterea. Sicut Augustinus dicit in Lib. de bono coniug. (cap. xvi. in princ.) *quod est cibus ad salutem corporis, hoc est concubitus ad salutem generis.* Sed non omnis inordinatus usus ciborum est peccatum mortale. Ergo nec omnis inordinatus concubitus: quod maxime videtur de fornicatione simplici, quæ minima est inter species enumeratas.

Sed contra est quod dicitur Tob. iv. 13. *Attende tibi ab omni fornicatione, & præter uxorem tuam numquam patiaris crimen scire.* Crimen autem importat peccatum mortale. Ergo fornicatio, & omnis concubitus qui est præter uxorem, est peccatum mortale.

Præterea. Nihil excludit a regno Dei nisi peccatum mortale. Fornicatio autem excludit, ut patet per Apostolum ad Gal. v. 21. ubi præmissa fornicatione, & quibudam aliis vitiis, subdit: *Qui talia agunt, regnum Dei non consequentur.* Ergo fornicatio simplex est peccatum mortale.

Præterea. In Decretis dicitur xxii. quest. 1. (cap. Prædicandum:) *Nesse debent, talem de periurio penitentiam imponi debere, qualem de adulterio, & fornicatione, & de homicidio sponte commissio, & de ceteris criminalibus vitiis.* Ergo fornicatio simplex est peccatum criminale, seu mortale.

Respondeo dicendum, quod abique omni dubio tenendum est, quod fornicatio simplex sit peccatum mortale, non obstante quod Deut. xxiii. super illud, *Non erit meretrix etc.* dicit Glossa (ord. Augustini Lib. de Qq. in Deut. quest. xxxvii.) „ad meretrices prohibet accedere, quarum est venialis turpitudine.“ Non enim debet dici *venialis*, sed *venalis*, quod est proprium meretricum.

Ad huius autem evidentiam considerandum est, quod peccatum mortale est omne peccatum quod committitur directe contra vitam hominis. Fornicatio autem simplex importat inordinationem quæ vergit in nocentium vitæ eius qui est ex tali concubitu nasciturus. Videmus enim in omnibus animalibus in quibus ad educationem proles requiritur cura maris, & feminae, quod in eis non est

(a) *Poltrax* Scribere ad eos ut abstinere se a contaminationibus simulacrorum, & fornicatione & suffocato, & sanguine.

est vagus concubitus, sed maris ad certam feminam, inam, vel plures; sicut patet in omnibus avibus: secus autem est in animalibus in quibus sola femina sufficit ad educationem fetus, in quibus est vagus concubitus; ut patet in canibus, & huiusmodi aliis animalibus. Manifestum est autem quod ad educationem hominis non solum requiritur cura matris, a qua nutritur, sed multo magis cura patris, a quo est instruendus, & defendendus, & in bonis tam interioribus, quam exterioribus promovendus. Et ideo contra naturam hominis est quod utatur vago concubitu; sed oportet quod sit maris ad determinatam feminam, cum qua permaneat non per modicum tempus, sed diu, vel etiam per totam vitam. Et inde est quod naturaliter inest maribus in specie humana sollicitudo de certitudine proles, quia eis imminet educatio proles. Hæc autem certitudo tolleretur, si esset vagus concubitus. Hæc autem determinatio certæ feminæ matrimonium vocatur: & ideo dicitur esse de iure naturali.

Sed quia concubitus ordinatur ad bonum commune totius humani generis, bona autem communia cadunt sub determinatione legis, ut supra habitum est (1. 2. quæst. xc. art. 2.) consequens est quod ista coniunctio maris ad feminam, quæ matrimonium dicitur, lege aliqua determinetur. Qualiter autem sit apud nos determinatum, in tertia parte huius Operis dicitur, (quam non absolvit: vid. Supplem. quæst. I. & seq. & IV. dist. xxvi. & seq.) cum de matrimonii sacramento tractabitur. Unde cum fornicatio sit concubitus vagus, utpote præter matrimonium existens, est contra bonum proles educandæ: & ideo est peccatum mortale. Nec obstat, si aliquis fornicando aliquam cognoscens sufficienter provideat proli de educatione: quia id quod cadit sub legis determinatione, iudicatur secundum id quod communiter accidit, & non secundum id quod in aliquo casu potest accidere.

Ad primum ergo dicendum, quod fornicatio illis consummatur, non quia habeat eandem rationem culpæ cum aliis, sed quantum ad hoc quod ex his quæ ibi ponuntur, similiter poterat diffidium generari inter Iudæos, & Gentiles, & eorum unanimis consensus impediri. Quia apud Gentiles fornicatio simpliciter non reputabatur illicita propter corruptionem naturalis rationis; Iudæi autem ex lege

*§. Th. Oper. Tom. XXIII.*

divina instructi, eam illicitam reputabant. Alia vero quæ ibi ponuntur, Iudæi abominabantur propter consuetudinem legalis conversationis. Unde Apostoli era Gentilibus interdixerunt, non quasi secundum se illicita, sed quasi Iudæis abominabilia, ut etiam supra dictum est (1. 2. quæst. ciii. art. 4. ad 3.)

Ad secundum dicendum, quod fornicatio dicitur esse peccatum, inquantum est contra rationem rectam. Ratio autem hominis recta est, secundum quod regulatur voluntate divina, quæ est prima, & summa regula. Et ideo quod homo facit ex voluntate Dei, eius præcepto obediens, non est contra rationem rectam, quamvis videatur esse contra communem ordinem rationis: sicut etiam non est contra naturam quod miraculose fit virtute divina, quamvis sit contra communem cursum naturæ. Et ideo sicut Abraham non peccavit, filium innocentem volendo occidere, propter hoc quod obedivit Deo, quamvis hoc secundum se consideratum sit communiter contra rectitudinem rationis humanæ; ita etiam Olee non peccavit fornicando ex præcepto divino. Nec talis concubitus proprie fornicatio debet dici, quamvis fornicatio nominetur referendo ad cursum communem. Unde Augustinus dicit III. Confess. (cap. viii. a princ.) *Cum Deus aliquid contra morem, aut patrum quorumlibet iubet, etsi nunquam ibi factum est, faciendum est: & postea subdit: Sicut enim in potestatibus societatis humane maior potestas minori ad obediendum præponitur; ita Deus omnibus.*

Ad tertium dicendum, quod Abraham, & Iacob ad ancillas accesserunt, non non quasi fornicatio concubitu, ut infra patebit (non completiv: vid. IV. Sent.) cum de matrimonio agetur. Iudam autem non est necessarium a peccato excusare, qui etiam auctor fuit venditionis Ioseph.

Ad quartum dicendum, quod fornicatio simplex contrariatur dilectioni proximi, quantum ad hoc quod repugnat bono proles nascituræ, ut ostensum est (in cor. art.) dum scilicet dat operam generationi, non secundum quod convenit proli nascituræ.

Ad quintum dicendum, quod per opera pietatis ille qui lubricum carnis patitur, liberatur a perditione æterna, inquantum per huiusmodi opera disponitur ad hoc quod gratiam consequatur, per

O

quam

quam poeniteat, & in quantum per huiusmodi opera satisfaciit de lubrico carnis commisso; non autem ita quod si in lubrico carnis perseveret impenitens usque ad mortem, per pietatis opera liberetur.

Ad sextum dicendum, quod ex uno concubitu potest unus homo generari. Et ideo inordinatio concubitus, quae impedit bonum prolis nascituræ, ex ipso genere actus est peccatum mortale, & non solum ex inordinatione concupiscentiæ. Ex una autem comestione non impeditur bonum totius vitæ unius hominis: & ideo gulæ actus ex suo genere non est peccatum mortale; esset tamen, si quis scienter cibum comederet, qui totam conditionem vitæ eius immutaret, sicut patet de Adam. Nec tamen fornicatio est minimum peccatorum quæ sub luxuria continentur: minus enim est concubitus cum uxore qui fit ex libidine.

### ARTICULUS III. 744

*Utrum fornicatio sit gravissimum peccatum.*

*Mal. quest. 1. art. 1. ad 3. & quest. 11. art. 10. cor. & quest. xv. art. 2. ad 6.*

**A**D tertium sic proceditur. Videtur quod fornicatio sit gravissimum peccatum. Tanto enim videtur peccatum gravius, quanto ex maiori libidine procedit. Sed maxima libido est in fornicatione: dicitur enim in Glossa (interim plicite sup. illud, *Melius est nubere*) 1. ad Corinth. vii. quod *ardor libidinis in luxuria est maximus*. Ergo videtur quod fornicatio sit gravissimum peccatum.

2. Præterea. Tanto aliquis magis peccat, quanto in rem sibi magis coniunctam delinquit; sicut gravius peccat qui percutit patrem, quam qui percutit extraneum. Sed, sicut dicitur 1. Corinth. vii. *qui fornicatur, in corpus suum peccat*, quod est homini coniunctissimum. Ergo videtur quod fornicatio sit gravissimum peccatum.

3. Præterea. Quanto aliquod bonum est maius, tanto peccatum quod contra illud committitur, videtur esse gravius. Sed peccatum fornicationis videtur esse contra bonum totius humani generis, ut patet ex prædictis (art. præc.) est etiam contra Christum, secundum illud 1. ad

Corinth. vi. 15. *Tollens membra Christi, faciam membra meretricis?* Ergo fornicatio est gravissimum peccatum.

Sed contra est quod Gregorius dicit (implic. Lib. XXXIII. Moral. cap. xi. parum ante med.) quod *peccata carnalia sunt minoris culpe quam peccata spiritalia*.

Respondeo dicendum, quod gravitas alicuius peccati potest attendi dupliciter: uno modo secundum se; alio modo secundum accedens. Secundum se quidem attenditur gravitas peccati ex ratione suæ speciei, quæ consideratur secundum bonum cui peccatum opponitur. Fornicatio autem est contra bonum hominis nascituri. Et ideo est gravius peccatum secundum speciem suam peccatis quæ sunt contra bona exteriora, sicut est furtum, & alia huiusmodi; minus est autem peccatis quæ sunt directe contra Deum, & peccato quod est contra vitam hominis iam nati, sicut est homicidium.

Ad primum ergo dicendum, quod libido quæ aggravat peccatum, est quæ consistit in inclinatione voluntatis. Libido autem quæ est in appetitu sensitivo, diminuit peccatum: quia quanto alicuius ex maiori passione impulsus peccat, tanto levius est peccatum. Et hoc modo libido in fornicatione est maxima. Et inde est quod Augustinus dicit in Lib. de agone christiano, (id hab. express. serm. ccl. de tem. cap. xi. ante. med.) quod *inter omnia Christianorum certamina duriora sunt praelia castitatis, ubi est quotidiana pugna, & rara victoria*. Et Isidorus dicit in Lib. II. de summo bono (cap. xxxix. cir. fin.) quod *magis per carnis luxuriam humanum genus subditur diabolo quam per aliquod aliud*, quia scilicet difficilius est vincere vehementiam huiusmodi passionis.

Ad secundum dicendum, quod ille qui fornicatur, dicitur peccare in corpus suum, non solum quia fornicationis delectatio consummatur in carne, quod etiam in gula accidit; sed etiam quia contra bonum proprii corporis agit qui fornicatur, in quantum scilicet indebite resolvit illud, & inquinat, & alteri commisset. Nec tamen propter hoc sequitur quod fornicatio sit gravissimum peccatum: quia ratio in homine prævalet corpori: unde si sit peccatum magis repugnans rationi, gravius erit.

Ad tertium dicendum, quod peccatum fornicationis est contra bonum speciei humanæ, in quantum impedit generationem



nem singularem unius hominis nascituri. Magis autem pertingit ad rationem speciei qui actu iam participat speciem, quam qui est potentia homo: & secundum hoc etiam homicidium est gravius quam fornicatio, & omnes luxuriae species, tamquam magis bono speciei humanae repugnans. Bonum etiam divinum est maius bono speciei humanae: & ideo etiam peccata quae sunt contra Deum, sunt maiora. Nec fornicatio est directe peccatum in Deum, quasi fornicator Dei offensam intendat, sed ex consequenti, sicut & omnia peccata mortalia. Sicut autem membra corporis nostri sunt membra Christi; ita etiam & spiritus noster est unum cum Christo, secundum illud I. ad Corinth. vi. 17. *Qui adhaeret Deo, unus spiritus est.* Unde etiam peccata spiritualia sunt magis contra Christum quam fornicatio.

## ARTICULUS IV. 745

*Utrum in tactibus, & osculis consistat peccatum mortale.*

1. 2. quæst. lxxiv. art. 10. & ver. quæst. xv. art. 4. cor. & mal. quæst. xv. art. 2. ad 18. & Eph. v.

**A**D quartum sic proceditur. Videtur quod in tactibus, & osculis non consistat peccatum mortale. Apostolus enim ad Ephes. v. 3. dicit: *Fornicatio autem, & omnis immunditia, aut avaritia nec inominetur in vobis, sicut decet sanctos*: subdit autem, *aut turpitudine*. Glossa (interlin. retus ms.) ut in osculis, & amplexibus; *aut stultiloquium*, ut blanda verba; *aut scurrilitas*, quæ a stultis curialitas dicitur, id est iocularitas: postea autem subdit: *Hoc enim scitote intelligentes, quod omnis fornicator, aut immundus, aut avarus, quod est idolorum servitus, non habet hereditatem in regno Christi, & Dei.* Ubi non replicat de turpitudine, sicut nec de stultiloquio, aut scurrilitate. Ergo ista non sunt peccata mortalia.

2. Præterea. Fornicatio dicitur esse peccatum mortale ex hoc quod per eam impeditur bonum proles generandæ, & educandæ. Sed ad hoc nihil operantur oscula, & tactus, sive amplexus. Ergo in his non contingit esse peccatum mortale.

3. Præterea. Illa quæ secundum se sunt peccata mortalia, numquam possunt bene fieri. Sed oscula, & tactus, & hu-

ijsmodi possunt quandoque fieri absque peccato. Ergo non sunt secundum se peccata mortalia.

Sed contra. Minus est aspectus libidinosus quam tactus, amplexus, vel osculum. Sed aspectus libidinosus est peccatum mortale, secundum illud Matth. v. 28. *Qui viderit mulierem ad concupiscendum eam, iam merchatus, est eam in corde suo.* Ergo multo magis osculum libidinosum, & alia huiusmodi sunt peccata mortalia.

Præterea. Cyprianus ad Pomponium de virginitate (Lib. I. epist. xi. cir. med.) dicit: *Certe ipse concubitus, ipse amplexus, ipsa consabulatio, & osculatio, & concitamentum duorum surpis & sœda dormitio, quantum decoretur & criminis conficitur!* Ergo per prædicta homo fit reus criminis, id est peccati mortalis.

Respondeo dicendum, quod aliquid dicitur esse peccatum mortale dupliciter. Uno modo secundum speciem suam: & hoc modo osculum, amplexus, vel tactus, secundum suam rationem non nominant peccatum mortale: possunt enim hæc absque libidine fieri vel propter consuetudinem patriæ, vel propter aliquam necessitatem, aut rationabilem causam.

Alio modo dicitur aliquid esse peccatum mortale ex sua causa; sicut ille qui dat elemosynam, ut aliquem inducat ad hæresim, mortaliter peccat propter intentionem corruptam. Distinctum autem supra (1. 2. quæst. lxxiv. art. 7. & 8.) quod consensus in delectationem peccati mortalis est peccatum mortale, & non solum consensus in actum. Et ideo cum fornicatio sit peccatum mortale, & multo magis aliæ luxuriæ species, consequens est quod consensus in delectationem talis peccati sit peccatum mortale, & non solum consensus in actum. Et ideo cum oscula, & amplexus huiusmodi propter delectationem huiusmodi fiant, consequens est quod sint peccata mortalia; & sic solum dicuntur libidinosi. Unde huiusmodi, secundum quod libidinosi sunt, sunt peccata mortalia.

Ad primum ergo dicendum, quod Apostolus ideo non refert illa tria, quia non habent nomen peccati, nisi secundum quod ordinantur ad præcedentia.

Ad secundum dicendum, quod oscula, & tactus, quamvis secundum se non impediunt bonum proles humanæ, procedunt tamen ex libidine, quæ est radix huiusmodi impediendi; & ex hoc habent rationem peccati mortalis.

Ad tertium dicendum, quod ratio illa concludit, quod huiusmodi non sunt peccata secundum suam speciem.

## ARTICULUS V. 746

*Utrum pollutio nocturna sit peccatum.*

III. P. *quest. lxxx. art. 7. cor. & IV. dist. viii. qn. 1. art. 4. quest. 1. ad 1. & quest. 2. per tot. & opusc. lxxv. cap. xvi.*

**A**D quodcumque sic proceditur. Videtur quod nocturna pollutio sit peccatum. Meritum enim, & demeritum habent fieri circa idem. Sed dormiens potest mereri; sicut patet de Salomone, qui dormiens a Domino donum sapientiae impetravit, ut dicitur III. Reg. iii. & II. Paral. 1. Ergo in dormiendo potest aliquis demereri: & ita videtur quod nocturna pollutio sit peccatum.

2. Præterea. Quicumque habet usum rationis, potest peccare. Sed in dormiendo aliquis habet usum rationis: quia frequenter aliquis in somnis ratiocinatur, & prælegit unum alteri, consentiens, vel dissentiens. Ergo in dormiendo potest aliquis peccare: & ita propter somnum nocturna pollutio non impeditur quin sit peccatum, cum ex genere actus sit peccatum.

3. Præterea. Frustra increpatur, & instruitur qui non potest agere secundum rationem, vel contra rationem. Sed homo in somnis instruitur a Deo, & increpatur, secundum illud Iob xxxiii. 15. *Per somnium in visione nocturna, (a) quando sopor solet occupare homines, tunc aperis aures virorum, & erudis eos instruis disciplina.* Ergo in somnis potest aliquis agere secundum rationem, vel contra rationem, quod est bene agere, vel peccare: & sic videtur quod nocturna pollutio sit peccatum.

Sed contra est quod Augustinus dicit XII. super Gen. ad liter. (cap. xv. in roed.) *Ipsa phantasia, qua fit in cogitatione sermonantis, cum ita expressa fuerit in visione somnantis, ut inter illam, & veram commixtionem corporum non discernatur, continuo movetur caro, & sequitur quod cum motum sequi soles, cum hoc tam sine peccato fiat, quam sine peccato a vigilantibus dicitur, quod ut diceretur, sine dubio cogitatum est.*

Respondendo dicendum, quod nocturna pollutio dupliciter potest considerari. Uno modo secundum se: & hoc modo

non habet rationem peccati. Omne enim peccatum dependet ex iudicio rationis: quia etiam primus motus sensualitatis non habet quod sit peccatum, nisi inquantum iudicio rationis reprimi potest: & ideo, sublato iudicio rationis, tollitur ratio peccati. In dormiendo autem ratio non habet liberum iudicium. Nullus enim est dormiens qui non intendat aliquibus similitudinibus phantasmatum, velut rebus ipsis, ut patet ex his quæ in primo dicta sunt (quest. lxxxv. art. 8.) Et ideo id quod agit homo dormiens, qui non habet liberum iudicium rationis, non imputatur ei ad culpam, sicut nec illud quod agit furiosus, aut amens.

Alio modo potest considerari nocturna pollutio per comparisonem ad suam causam. Quæ potest esse triplex. Una quidem corporalis. Cum enim humor feminialis superabundat in corpore, vel cum facta est humoris resolutio vel per nimiam calefactionem corporis, vel per quamcumque aliam commotionem, somniat dormiens ea quæ pertinent ad expulsionem huiusmodi humoris abundantis, vel resoluti; sicut etiam contingit, quando natura gravatur ex aliqua alia superfluitate, ita quod quandoque formantur in imaginatione phantasmatum pertinentia ad emissionem talium superfluitatum. Si igitur superabundantia talis humoris sit ex causa culpabili, (puta cum causata est ex superfluitate cibi, vel potus) tunc nocturna pollutio habet rationem culpæ ex sua causa. Si autem superabundantia, vel resolutio talis humoris non sit ex aliqua causa culpabili, tunc nocturna pollutio non est culpabilis nec in se, nec in sua causa.

Alia vero causa nocturnæ pollutionis potest esse animalis, & interior; puta cum ex cogitatione præcedenti contingit aliquem dormientem pollui. Cogitatio autem quæ in vigilia præcessit, quandoque est puzæ speculativa, puta cum aliquis causa disputationis cogitat de peccatis carnalibus; quandoque autem est cum aliqua affectione vel concupiscentiæ, vel horroris. Contingit autem magis pollutio nocturna ex cogitatione carnalium vitiorum, quæ sunt cum concupiscentia talium delectationum, quia ex hoc remanet quoddam vestigium, & inclinatio in anima, ita quod dormiens facilius inducitur in sua imaginatione ad

(a) Vulgata quando inquit sopor super homine,

ad assentiendum actibus ex quibus sequitur pollutio. Et secundum hoc Philosophus dicit in I. Ethic. (cap. ult. a med.) quod *inquantum paulatim pertranseunt quidam motus a vigilantibus ad dormientes, meliora sunt phantasmata studioforum quam quorumlibet* : & Augustinus dicit XII. super Gen. ad lit. (cap. xv ad fin.) quod *propter bonam animae affectionem quadam eius merita etiam in omnis clarent*. Et sic patet quod nocturna pollutio habet rationem culpæ ex parte suæ causæ. Quandoque tamen contingit quod præcedenti cogitatione carnalium actuum, etiam speculativa, vel si sit cum horrore, sequitur in somnis pollutio : & tunc non habet rationem culpæ nec in se, nec in sua causa.

Tertia vero causa est spiritualis extrinseca, puta cum ex operatione demonis commoventur phantasmata dormientis in ordine ad talem effectum. Et hoc quidem quandoque est cum peccato præcedenti, scilicet negligentia præparandi se contra demonis illusiones : unde & in sero cantatur :

*Hosiusque nostrum comprime,  
Ne polluantur corpora.*

Quandoque vero est absque omni culpa hominis ex sola nequitia demonis ; sicut in Collationibus Patrum (collat. xxii. cap. vi.) legitur de quodam, qui semper in diebus festis pollutionem nocturnam patiebatur, hoc diabolo procurante, ut impediretur a sacra communione. Sic igitur patet quod nocturna pollutio numquam est peccatum, sed quandoque est sequela peccati præcedentis.

Ad primum ergo dicendum, quod Salomon non meruit in dormiendo sapientiam a Deo ; sed fuit signum præcedentis desiderii, propter quod dicitur talis petitio Deo placuisse, ut Augustinus dicit XII. super Gen. ad lit. (cap. xxv. in fi.)

Ad secundum dicendum, quod secundum quod vires sensitivæ interiores magis vel minus opprimuntur a somno propter vaporis turbulentiam, vel puritatem, secundum hoc illius rationis magis vel minus impeditur in dormiendo. Semper tamen quantum ad aliquid impeditur, ut non possit omnino liberum iudicium habere, ut in prima parte dictum est (quæst. lxxxiv. art. 8.) Et ideo non imputatur ei ad culpam quod tunc agit.

Ad tertium dicendum, quod apprehensio rationis non ita impeditur in somno, s. Tb. Oper. Tom. XXIII.

sicut eius iudicium, quod perficitur per conversionem ad sensibilia, quæ sunt prima principia cogitationis humane. Et ideo nihil prohibet hominem secundum rationem apprehendere aliquid de novo in dormiendo vel ex ipsis reliquiis præcedentium cogitationum, & phantasmatibus oblatis, vel etiam ex revelatione divina, aut immisione Angeli boni, vel mali.

## ARTICULUS VI. 747

*Utrum stuprum debeat poni una species luxuriæ.*

*Sup. art. 1. cor. & IV. dist. xli. art. 4. & 2. cor. & mal. quæst. xv. art. 3. cor.*

**A**D sextum sic proceditur. Videtur quod stuprum non debeat poni una species luxuriæ. Stuprum enim importat illicitam virginum deflorationem, ut habetur in Decretis xxxvi. quæst. 1. (in appendice Grat. ad c. *Lex illa*.) Sed hoc potest esse soluti cum soluta ; quod pertinet ad fornicationem. Ergo stuprum non debet poni species luxuriæ a fornicatione distincta.

2. Præterea. Ambrosius dicit in Lib. de Patriarchis (seu Lib. I. de Abraham cap. iv. inter princ. & med.) *Nemo sibi blandiatur de legibus hominum : omne stuprum adulterium est*. Sed specierum ex opposito diversarum una non continetur sub alia. Cum ergo adulterium ponatur species luxuriæ, videtur quod stuprum species luxuriæ poni non debeat.

3. Præterea. Inferre alicui iniuriam videtur magis ad iniustitiam quam ad luxuriam pertinere. Sed ille qui stuprum committit, iniuriam facit alteri, scilicet patri puellæ quam corrumpit, qui potest ad animum suum iniuriam revocare, & agere actione iniuriarum contra stupratorem. Ergo stuprum non debet poni species luxuriæ.

Sed contra est quod stuprum proprie consistit in actu venereo quo virgo defloratur. Cum igitur luxuria proprie sit circa venerea, videtur quod stuprum sit species luxuriæ.

Respondeo dicendum, quod ubi circa materiam alicuius vitii occurrit aliqua specialis deformitas, ibi debet poni determinata species illius vitii. Luxuria autem est peccatum circa venerea exilens, ut supra dictum est (quæst. præc. art. 1. & 4.) in virgine autem sub custodia pa-

tris existente quædam deformitas specialis occurrit, si corruptatur: tum ex parte puellæ, quæ ex hoc quod violatur nulla passione coniugali præcedente, & impeditur a legitimo matrimonio confectando, & ponitur in via meretriciandi, a quo retraheretur, ne signaculum virginittis amitteret: tum etiam ex parte patris, qui de eius custodia sollicitudinem gerit, secundum illud Eccli. xlii. 11. *Super filiam luxuriam confirmam custodiam, ne quando faciat te in opprobrium venire iuvenis.* Et ideo manifestum est quod stuprum, quod importat illicitam virginum deflorationem sub cura parentum existentium, est determinata luxuriæ species.

Ad primum ergo dicendum, quod quamvis virgo sit soluta a vinculo matrimonii, non tamen est soluta a patris potestate. Habet etiam speciale impedimentum fornicarii concubitus virginittatis signum, quod non debet nisi per matrimonium auferri. Unde stuprum non est fornicatio simplex, sed fornicatio est concubitus qui fit cum meretricibus, id est mulieribus iam corruptis, ut patet per Glossam (interl.) II. ad Corinth. xii. super illud, *Qui non egerunt penitentiam super immunditia, & fornicatione &c.*

Ad secundum dicendum, quod Ambrosius ibi aliter accipit stuprum, prout scilicet communiter accipitur pro omni peccato luxuriæ. Unde stuprum ibi nominat concubitus viri coniugati cum quacumque alia muliere præter uxorem: quod patet ex hoc quod subdit: *Nec viro licet quod mulieri non licet.* Et hoc modo etiam accipitur Numer. v. 13. ibi dicitur: *Si later adulterium, & testibus argui non potest, quia non est inventa in stupro &c.*

Ad tertium dicendum, quod nihil prohibet unum peccatum ex adiunctione alterius deformius fieri. Fit autem deformius peccatum luxuriæ: ex peccato iniustitiæ: quia videtur concupiscentia esse inordinatio, quæ a delectabili non abstinere, ut iniuriam vitet. Habet autem duplicem iniuriam annexam. Unam quidem ex parte virginis, quam etsi non vi corruptat, tamen eam seducit; & sic tenetur ei satisfacere. Unde dicitur Exod. xxi. 16. *Si seduxerit quis virginem non dnm desponsatam domicerique cum ea, dotabit eam, & habebit uxorem.* Si autem pater virginis dare noluerit, reddet pecuniam iuxta modum dotis quam virgines accipere consueverunt. Aliam vero

iniuriam facit patri puellæ: unde & ei secundum legem tenetur ad poenam. Dicitur enim Deuter. xxi. 28. *Si invenerit vir puellam virginem, quæ non habet sponsum, & apprehendens concubuerit cum illa, & res ad iudicium venerit, dabit qui dormivit cum ea, patri puellæ quinquaginta sicles argenti, & habebit eam uxorem: & quia humiliavit illam, non poteris dimittere eam cunctis diebus vite sue: & hoc ideo ne videatur ludibrium fecisse, ut Augustinus dicit (in Lib. Qq. in Deut. quæst. xxxiv.)*

## ARTICULUS VII. 748

*Utrum raptus sit species luxuriæ distincta a stupro.*

*Sup. art. 1. cor. & IV. dist. xli. art. 4. quæst. 3. cor. fin. & quæst. 2. cor. & ad 6. & mal. quæst. xv. art. 3. cor.*

**A**D septimum sic proceditur. Videtur quod raptus non sit species luxuriæ distincta a stupro. Dicit enim Iudorus in Lib. V. Etymol. (cap. xxvi. ante med.) quod *stuprum idest raptus, proprie est illicitus coitus a corruptendo dictus: unde & qui raptus ponitur, stupro fruatur.* Ergo videtur quod raptus non debeat poni species luxuriæ a stupro distincta.

2. Præterea. Raptus videtur quandam violentiam importare: dicitur enim in Decretis xxxvi. quæst. 1. (in append. Grat. ad cap. *Plex illa*) quod *raptus committitur, cum puella violenta a domo patris abducitur, ut corrupta in uxorem habeatur.* Sed hoc quod violentia alicui interatur, per accidens se habet ad luxuriam, quæ per se respicit delectationem concubitus. Ergo videtur quod raptus non debeat poni determinata species luxuriæ.

3. Præterea. Peccatum luxuriæ per matrimonium cohibetur: dicitur enim I. ad Corinth. vii. 2. *Propter fornicationem unusquisque suam uxorem habeat.* Sed raptus impedit matrimonium sequens: dicitur enim in Concilio Meldensi: (habet. cap. *Placuit*, xxxvi. quæst. 11.) *Placuit ut hi qui rapiunt feminas, vel furantur, vel seducunt, eas nullatenus habeant uxores, quantumvis eas postmodum nuptialiter cum consensu parentum suorum susceperint.* Ergo raptus non est determinata species luxuriæ.

4. Præterea. Aliquis potest cognoscere suam sponfam absque peccato luxuriæ: Sed raptus potest committi, si aliquis

vio-

violenter sponsam suam auferat de domo parentum, & eam carnaliter cognoscit. Ergo raptus non debet poni determinata species luxuriæ.

Sed contra est quod *raptus est illicitus*, ut Iidorus dicit (Lib. V. Erym. cap. xxvi. ante med.) Sed hoc pertinet ad peccatum luxuriæ. Ergo raptus est species luxuriæ.

Respondendo dicendum, quod raptus, prout nunc de eo loquimur, est species luxuriæ: & quandoque quidem in idem concurrat cum stupro; quandoque autem invenitur raptus sine stupro; quandoque vero stuprum sine rapto.

Concurrunt quidem in idem, quando aliquis violentiam infert ad virginem illicite deslorandam. Quæ quidem violentia quandoque infertur tam ipsi virgini, quam patri; quandoque autem infertur patri, sed non virgini, puta cum ipsa consentit ut per violentiam de domo patris abstrahatur. Differt etiam violentia, & raptus alio modo: quia quandoque puella violenter abducitur a domo parentum, & violenter corrumpitur; quandoque autem est violentia abducatur, non tamen violenter corrumpitur, sed de voluntate virginis, siue corrumpatur fornicario concubitu, siue matrimoniali: qualitercumque enim violentia adit, salvatur ratio raptus. Invenitur autem raptus sine stupro; puta si aliquis rapiat viduam, vel puellam corruptam. Unde Symachus Papa dicit (in epist. v. ad Cæsarium cap. xv. Tom. IV. Concil. & hab. cap. Raptores xxxvi. quæst. II.) *Raptores viduarum, vel virginum ob immanitatem facinoris tanti detestamur*. Stuprum vero sine rapto invenitur, quando aliquis absque violentiæ illatione virginem illicite deslorat.

Ad primum ergo dicendum, quod quia raptus plerumque cum stupro in idem concurrat, ideo quandoque unum pro alio ponitur.

Ad secundum dicendum, quod illatio violentiæ videtur procedere ex magnitudine concupiscentiæ, ex qua aliquis non refugit (a) periculo se iniicere violentiæ inferendæ.

Ad tertium dicendum, quod aliter est dicendum de rapto puellarum quæ sunt aliis desponsatæ, & aliter de rapto illarum quæ non sunt aliis desponsatæ. Illæ enim quæ sunt aliis desponsatæ, restituendæ sunt suis sponsis, qui in eas

ex ipsa desponsatione ius habent; illæ autem quæ non sunt aliis desponsatæ, primo restituendæ sunt patris potestati; & tunc de voluntate parentum licite possunt eas in uxores accipere. Si autem aliter fiat, illicite matrimonium contrahitur: tenetur enim qui quancumque rem rapit, ad eius restitutionem. Nec tamen raptus dirimit matrimonium iam contractum, etsi impediatur contrahendum. Quod autem dicitur in prædicto Concilio, dictum est in detestationem illius criminis, & est abrogatum. Unde Hieronymus (hab. cap. *Tria*, xxxvi. quæst. II. sed in Hieronymo non occurrit.) contrarium dicit. *Tria*, inquit, *coniugia legitima in Scripturis leguntur. Primum est, virgo casta in virginitate viro data legitime. Secundum est, virgo in civitate deprehensa a viro, & illi per vim copulata, si voluerit pater eius, dotabit eam esse vir, quantum iudicaverit pater, & dabit pretium pudicitie eius. Tertium autem est, quando auferitur ei, & traditur alteri de voluntate patris*. Vel potest intelligi de illis quæ sunt aliis desponsatæ, & maxime per verba de presenti.

Ad quartum dicendum, quod sponsus ex ipsa desponsatione habet aliquod ius in sua sponsa: & ideo quamvis peccet violentiam inferendo, excusatur tamen a crimine raptus. Unde Gelasius Papa dicit (hab. cap. *Lex*, xxxvi. quæst. I.) *Lex illa præteritorum Principum ibi raptum dicitur esse commissum, ubi puella, de cuius ante nuptiis nihil actum fuerat, videbatur abducta*.

## ARTICULUS VIII. 749

*Utrum adulterium sit determinata species luxuriæ ab aliis distincta.*

IV. dist. xli. art. 4. quæst. 2. cor. & mal. quæst. xv. art. 3. cor.

**A**D octavum sic proceditur. Videtur quod adulterium non sit determinata species luxuriæ ab aliis distincta. Dicitur enim adulterium ex eo quod aliquis ad alteram accedit præter suam, sicut dicit quædam Glossa super Exodus (ord. sup. illud cap. xx. *Non mæchaberis*: & est Aug. in Lib. Qg. sup. Exod. quæst. lxxi. a med.) Sed alia mulier præter suam potest esse diversarum conditionum, scilicet vel virgo, vel in potestate

O 4

(a) Ita Theologi Nicolaus, & edit. Patav. Mss. pericula, se iniicere. Edit. Rom. periculo se iniicere. Tunc; jam legendum forte quincant; periculum se iniicere violentiam inferendo.

estate patris existens, vel meretrix, vel cuiuscumque alterius conditionis. Ergo videtur quod adulterium non sit species luxuriæ ab aliis distincta.

2. Præterea. Hieronymus dicit (Lib. I. cont. Iovin. prope fin. & hab. cap. Origo, xxxii. quæst. iv.) *Nilil interesse, ex qua causa quis insanit: unde Sextus Pythagoricus in sententiis: Adulter, inquit, est amator ardentior in suam uxorem, & pari ratione in quamlibet aliam mulierem. Sed in omni luxuria est amor ardentior debito. Ergo adulterium invenitur in omni luxuria. Non ergo debet poni luxuriæ species.*

3. Præterea. Ubi est eadem ratio deformitatis, ibi non videtur esse alia species peccati. Sed in stupro, & adulterio videtur esse eadem ratio deformitatis, quia utrobique violatur mulier alienæ potestati subiecta. Ergo adulterium non est determinata species luxuriæ ab aliis distincta.

Sed contra est quod Leo Papa dicit (id hab. Aug. Lib. de bono coniug. cap. xv. Vide append. Grat. ad cap. *Ille autem*, xxxii. quæst. v.) quod *adulterium committitur, cum proprie libidinis insinatus, vel alieno consensu cum altero, vel altera contra pactum conjugale concumbitur.* Sed hoc importat specialem deformitatem luxuriæ. Ergo adulterium est determinata species luxuriæ.

Respondeo dicendum, quod adulterium, sicut ipsum nomen sonat, est accessus ad alienum torum. In quo quidem dupliciter contra castitatem, & humanæ generationis bonum aliquis delinquit. Primo quidem inquantum accedit ad mulierem non sibi matrimonio copulatam; quod requiritur ad bonum prolis propriæ educandæ. Alio modo quia accedit ad mulierem alteri per matrimonium copulatam; & sic impedit bonum prolis alienæ. Eadem ratio est de muliere coniugata quæ per adulterium corrumpitur. Unde dicitur Eccli. xxi. 32. *Omnia mulier relinquens virum suum... peccabit. Primo enim in lege Altissimi incredibilis fuit, in qua scilicet præcipitur, Non mœchaberis: & secundo in virum suum deliquit, in quo facit contra certitudinem prolis eius: Tertio in adulterio fornicata est, & ex alio viro filios statuit sibi, quod est contra bonum propriæ prolis. Sed primum est commune in omnibus peccatis mortalibus; alia vero duo specialiter pertinent ad deformitatem adulterii. Unde manifestum est quod*

adulterium est determinata species luxuriæ, utpote specialem deformitatem habens circa actus venereos.

Ad primum ergo dicendum, quod si ille qui habet uxorem, ad aliam accedat, peccatum eius potest denominari vel ex parte sua; & sic semper est adulterium, quia contra fidem matrimonii agit: vel ex parte mulieris ad quam accedit; & sic quandoque est adulterium, puta cum coniugatus accedit ad uxorem alterius: quandoque autem habet rationem stupri, vel alicuius alterius, secundum diversas condiciones mulierum ad quas accedit. Dicitur est autem supra (art. 2. hu. quæst.) quod species luxuriæ accipiuntur secundum diversas mulierum condiciones.

Ad secundum dicendum, quod matrimonium specialiter est ordinatum ad bonum humanæ prolis, sicut dictum est (art. 2. hu. quæst.) Adulterium autem specialiter matrimonio contrariatur, inquantum violat matrimonii fidem, quam quis coniugi debet. Et quia ille qui est ardentior amator uxoris, facit contra bonum matrimonii, inhoneste eo utens, licet fidem non violat, ideo aliquoties potest adulter nominari, & magis ille qui est ardentior amator alterius mulieris.

Ad tertium dicendum, quod uxor est in potestate viri, sicut et matrimonium copulata; puella autem est sub potestate patris, sicut per eum matrimonio copulanda. Et ideo alio modo contra bonum matrimonii est peccatum adulterii, alio modo peccatum stupri. & propter hoc ponuntur diversæ luxuriæ species. De aliis autem ad adulterium pertinentibus dicetur in tertia parte (quam non absolvit: vid. IV. dist. xli.) cum de matrimonio tractabitur.

## ARTICULUS IX. 750

*Utrum incestus sit determinata species luxuriæ.*

Sup. art. 1. corp. & IV. dist. xli. art. 4. quæst. 1. & 2. corp. & mal. quæst. xv. art. 3. corp.

Ad nonum sic proceditur. Videtur quod incestus non sit species determinata luxuriæ. Incestus enim dicitur per privationem castitatis. Sed castitati universaliter opponitur luxuria. Ergo videtur quod incestus non sit species luxuriæ, sed sit universaliter ipsa luxuria.

2. Præ-

3. Præterea. In Decretis dicitur xxxvi. quæst. 1. ( in append. Grat. ad cap. *Lex illa* ) quod *incestus est consanguinearum, vel affinium abusus*. Sed affinitas differt a consanguinitate. Ergo incestus non est una species luxuriæ, sed plures.

3. Præterea. Illud quod de se non importat aliquam deformitatem, non constituit aliquam determinatam speciem vitii. Sed accedere ad consanguineas, vel affines, non est secundum se deformis; alias nullo tempore licuisset. Ergo incestus non est determinata species luxuriæ.

Sed contra est quod species luxuria distinguuntur secundum conditiones mulierum quibus aliqui abutuntur. Sed in incestu importatur specialis conditio mulierum, quia est abusus consanguinearum, vel affinium, ut dictum est ( in arg. 2. & art. 1. hu. quæst. ) Ergo incestus est determinata species luxuriæ.

Respondendo dicendum, quod, sicut dictum est ( art. 1. & 6. hu. quæst. ) ibi necesse est inveniri determinatam speciem luxuriæ, ubi invenitur aliquid repugnans usui debito venerorum. In usu autem consanguinearum, vel affinium invenitur aliquid incongruum commixtioni veneræ triplici ratione. Primo quidem quia naturaliter homo debet quandam honorificentiam parentibus, & per consequens aliis consanguineis, qui ex eisdem parentibus de propinquo originem trahunt; intantum quod apud antiquos, ut Maximus Valerius refert ( Lib. II. cap. 1. n. 7. ) non erat fas filium simul cum patre balneari, ne scilicet se invicem nudos conspicerent. Manifestum est autem secundum prædicta ( quæst. cxlii. art. 4. & quæst. cli. art. 4. ) quod in actibus veneris maxime consistit quædam turpitudine honorificentia contraria: unde de his homines verecundantur. Et ideo incongruum est quod talis commixtio veneræ fiat talium personarum ad invicem. Et hæc causa videtur exprimi Levit. xviii. 7. ubi dicitur: *Mater tua est: non revelabis turpitudinem eius*. Et idem postea dicitur in aliis. Secunda ratio est, quia personas sanguine coniunctas necesse est ad invicem simul conversari. Unde si homines non arcerentur a commixtione veneræ, nimia opportunitas daretur hominibus veneræ commixtionis; & sic animi hominum nimis emollescerent per luxuriam. Et ideo in veteri lege illæ personæ specialiter videntur prohibita esse quæ necesse est simul commorari.

Tertia ratio est, quia per hoc impediretur multiplicatio amicorum. Dum enim homo uxorem extraneam accipit, iunguntur sibi quadam speciali amicitia omnes consanguinei uxoris, ac si essent consanguinei tui. Unde Augustinus dicit XV. de civitate Dei ( cap. xvi. cir. princ. ) *Habita est ratio rectissima caritatis, ut homines, quibus esset utilis, atque bonæ concordia, diversarum vicissitudinum vinculis nederentur, nec unus in una multis haberet, sed singule spargerentur in singulos*. Addit autem Aristoteles quartam rationem in II. Polit. ( cap. ii. cir. med. ) quia cum naturaliter homo consanguineam diligat, si adderetur amor, qui est ex commixtione veneræ, fieret nimis ardor amoris, & maximum libidinis incentivum; quod castitati repugnat. Unde manifestum est quod incestus est determinata luxuria species.

Ad primum ergo dicendum, quod abusus coniunctarum personarum maxime induceret corruptelam castitatis, tum propter opportunitatem, tum etiam propter nimium ardorem amoris, ut dictum est ( in corp. art. ) Et ideo antononmassice abusus talium personarum vocatur *incestus*.

Ad secundum dicendum, quod persona affinis coniungitur alicui propter personam consanguinitate coniunctam: & ideo quia unum est propter alterum, eiusdem rationis inconvenientiam facit consanguinitas, & affinitas.

Ad tertium dicendum, quod in commixtione personarum coniunctarum aliquid est quod est secundum se indecens, & repugnans naturali rationi; sicut quod commixtio fiat inter parentes, & filios, quorum est per se, & immediata cognatio: nam filii naturaliter honorem debent parentibus. Unde Philosophus dicit in IX. de animal. ( cap. xlvii. ) quod quidam equus, quia deceptus fuit ut matri commiseretur, seipsum præcipitavit quasi præ horrore, eo quod etiam animalibus aliquibus inest naturalis reverentia ad parentes. Aliæ vero personæ quæ non coniunguntur secundum seipsum, sed per ordinem ad parentes, non habent ita ex seipsis indecentiam; sed variatur circa hoc decencia, vel indecentia secundum consuetudinem, & legem humanam, vel divinam: quia, ut dictum est ( art. 2. hu. quæst. ) usus venerorum, qui ordinatur ad bonum commune, subiacet legi. Et ideo, sicut

sicut Augustinus dicit in XV. de civitate Dei ( cap. xvi. cir. princ. ) *commixtio fororum, & fratrum quanto fuit antiquior, compellente necessitate, tanto postea facilia est damnabilior, religione prohibente.*

## ARTICULUS X. 751

*Utrum sacrilegium possit esse species luxurie.*

Sup. art. 1. ad 3. & IV. dist. xli. quæst. 1. art. 4. quæst. 2. ad 7.

**A**D decimum sic proceditur. Videtur quod sacrilegium non possit esse species luxurie. Eadem enim species non invenitur sub diversis generibus non sub alternatim positis. Sed sacrilegium est species irreligiositatis, ut supra dictum est ( quæst. xcix. art. 1. ) Ergo sacrilegium non potest poni species luxurie.

2. Præterea. In Decret. xxxvi. quæst. 1. ( in appendice Grat. ad cap. *Lex illa* ) sacrilegium non ponitur inter alia quæ ponuntur species luxurie. Ergo videtur quod non sit luxurie species.

3. Præterea. Sicut per luxuriam contingit aliquid fieri contra aliquam rem sacram, ita etiam per alia vitiorum genera. Sed sacrilegium non ponitur species gulæ, aut alterius alicuius huiusmodi vitii. Ergo etiam non debet poni species luxurie.

Sed contra est quod Augustinus dicit XV. de civ. Dei ( cap. xvi. a med. ) *quod si iniquum est avaritie possidendi transgredi limitem agrorum, quanto est iniquius libidine concubendi subvertere limitem morum?* Sed transgredi limitem agrorum in rebus sacris est peccatum sacrilegii. Ergo pari ratione subvertere limitem morum libidine concubendi in rebus sacris facit sacrilegii vitium. Sed libido concubendi pertinet ad luxuriam. Ergo sacrilegium est luxurie species.

Respondendo dicendum, quod, sicut supra dictum est ( implic. quæst. xcix. art. 1. & art. 2. ad 2. & 1. 3. quæst. xviii. art. 7. ) actus unius virtutis, vel vitii ordinatus ad finem alterius, assumit speciem illius; sicut furtum quod propter adulterium committitur, transit in speciem adulterii. Manifestum est autem quod observatio castitatis, secundum quod ordinatur ad cultum Dei, sit actus religionis, ut patet in illis qui vovent, & servant virginitatem, ut patet per

Augustinum in Lib. de virginitate ( cap. viii. ) Unde manifestum est quod etiam luxuria, secundum quod violat aliquid ad divinum cultum pertinens, pertinet ad speciem sacrilegii, & secundum hoc sacrilegium potest poni species luxurie.

Ad primum ergo dicendum, quod luxuria, secundum quod ordinatur ad finem alterius vitii, efficitur illius vitii species. Et sic aliqua luxurie species potest etiam esse species irreligiositatis, sicut cuiusdam superioris generis.

Ad secundum dicendum, quod ibi enumerantur illa quæ sunt species luxurie secundum seipsa. Sacrilegium autem est species luxurie, secundum quod ordinatur ad alterius vitii finem; & potest concurrere cum diversis luxurie speciebus. Si enim aliquis abutatur persona coniuncta sibi secundum spiritualem cognitionem, committit sacrilegium ad modum incestus. Si autem abutatur virgine Deo sacrata, inquantum est sponsa Christi, est sacrilegium per modum adulterii. Inquantum vero est sub spiritualis patris cura constituta, erit quoddam spirituale stuprum; & si violentia inferatur, erit spiritualis raptus; qui etiam secundum leges civiles gravius punitur quam alius raptus. Unde Iulianus Imperator dicit ( Lib. *Si quis*, cap. de Episcop. & Cleric. ) *Si quis non dicam rapere, sed attentare tantummodo matrimonii coniungendi causa sacratissimas virgines ausus fuerit, capitali, pena feriatur.*

Ad tertium dicendum, quod sacrilegium committitur in re sacrata. Res autem sacrata est vel persona (a) sacrata, quæ concupiscitur ad concubitus; & sic pertinet ad luxuriam: vel quæ concupiscitur ad possidendum; & sic pertinet ad iniustitiam. Potest etiam ad iram pertinere sacrilegium; puta si aliquis ex ira iniuriam inferat personæ sacrae, vel si gulose cibum sacrum assumat, sacrilegium committit. Specialius tamen sacrilegium attribuitur luxurie, quæ opponitur castitati, ad cuius observantiamque personæ specialiter consecrantur.

(a) *ita passim. Cod. Vatican. sacra.*



ARTICULUS XI. 752

*Utrum vitium contra naturam sit species luxurie.*

*IV. dist. xli. quæst. 1. art. 4. quæst. 2.*

**A**D undecimum sic proceditur. Videtur quod vitium contra naturam non sit species luxurie. Quia in prædicta enumeratione specierum luxurie (art. 1. hu. quæst.) nulla fit mentio de vitio contra naturam. Ergo non est species luxurie.

2. Præterea. Luxuria opponitur virtuti; & ita sub malitia continetur. Sed vitium contra naturam non continetur sub malitia, sed sub bestialitate, ut patet per Philosophum in VII. Ethic. (cap. v.) Ergo vitium contra naturam non est species luxurie.

3. Præterea. Luxuria consistit circa actus ad generationem humanam ordinatos, ut patet ex supradictis (quæst. præc. art. 1.) Sed vitium contra naturam consistit circa actus ex quibus non potest generatio sequi. Ergo vitium contra naturam non est species luxurie.

Sed contra est quod II. Cor. xii. connumeratur aliis luxurie speciebus, ubi dicitur: *Et non egerunt penitentiam super immunditia, & fornicatione, & impudicitia*: ubi dicit Glossa (interl.), „*Immunditia*, idest luxuria contra naturam.

Respondetur dicendum, quod, sicut supra dictum est (art. 6. & 9. hu. quæst.) ibi est determinata luxurie species ubi specialis ratio deformitatis occurrit, quæ facit indecentem actum venereum. Quod quidem potest esse dupliciter. Uno quidem modo quia repugnat rationi rectæ; quod est commune in omni vitio luxurie. Alio modo quia etiam super hoc repugnat ipsi ordini naturali venerei actus, qui convenit humanæ speciei, quod dicitur *vitium contra naturam*. Quod quidem potest pluribus modis contingere. Uno quidem modo, si absque omni concubitu causa delectationis venereæ pollutio procuretur; quod pertinet ad peccatum *immunditiæ*, quam quidam *mollitiam* vocant. Alio modo si fiat per concubitum ad rem non eiusdem speciei, quod vocatur *bestialitas*. Tercio si fiat per concubitum ad non debitum sexum, puta masculi ad masculum, vel feminæ ad feminam, ut Apostolus dicit ad Rom. 1. quod dicitur *So-*

*domiticum vitium*. Quarto si non servetur naturalis modus concumbendi aut quantum ad instrumentum non debitum, aut quantum ad alios monstruosos, & bestiales concumbendi modos.

Ad primum ergo dicendum, quod ibi enumerantur species luxurie quæ non repugnant humanæ naturæ: & ideo prætermittitur vitium contra naturam.

Ad secundum dicendum, quod bestialitas differt a malitia, quæ humanæ virtuti opponitur per quemdam excessum circa eandem materiam: & ideo ad idem genus reduci potest.

Ad tertium dicendum, quod luxuriosus non intendit generationem humanam, sed delectationem veneream, quam potest aliquis experiri sine iactibus ex quibus sequitur humana generatio. Et hoc est quod quæritur in vitio contra naturam.

ARTICULUS XII. 753

*Utrum vitium contra naturam sit maximum peccatum inter species luxurie.*

*Inf. quæst. clxx. art. 1. ad 3. & 1. 2. quæst. lxxiii. art. 7. cor. & IV. dist. xli. quæst. 1. art. 4. quæst. 3. cor. fi.*

**A**D duodecimum sic proceditur. Videtur quod vitium contra naturam non sit maximum peccatum inter species luxurie. Tanto enim aliquod peccatum est gravius, quanto magis contrariatur caritati. Sed magis videntur contrariari caritati proximi adulterium, & stuprum, & raptus, quæ vergunt in iniuriam proximi, quam peccata contra naturam, per quæ nullus alteri iniuriatur. Ergo peccatum contra naturam non est maximum inter species luxurie.

2. Præterea. Illa peccata videntur esse gravissima quæ contra Deum committuntur. Sed sacrilegium directe committitur contra Deum, quia vergit in iniuriam divini cultus. Ergo sacrilegium est gravius peccatum quam vitium contra naturam.

3. Præterea. Tanto aliquod peccatum videtur esse gravius, quanto exercetur in personam quam magis diligere debemus. Sed secundum ordinem caritatis magis debemus diligere personas nobis coniunctas, quæ polluuntur per incestum, quam personas extraneas, quæ interdum polluuntur per vitium contra naturam.

Er-

Ergo incestus est gravius peccatum quam vitium contra naturam.

4. Præterea . Si vitium contra naturam est gravissimum, videtur quod tanto sit gravius, quanto est magis contra naturam. Sed maxime videtur esse contra naturam peccatum immunditiæ, seu molitiei, quia hoc videtur esse maxime secundum naturam ut alterum sit agens, & alterum sit patiens. Ergo secundum hoc immunditia esset gravissimum inter vitia contra naturam. Hoc autem est falsum. Ergo vitia contra naturam non sunt gravissima inter peccata luxuriæ.

Sed contra est quod Augustinus dicit in Libro de adult. coniugiis ( hab. in Lib. de bono coniug. cap. ix. & xi. & hab. cap. *Adulterii* xxxii. quæst. vii. ) quod omnium horum vitiorum, scilicet quæ ad luxuriam pertinent, pessimum est quod contra naturam fit.

Respondeo dicendum, quod in quolibet genere pessima est principii corruptio, ex quo alia dependent. Principia autem rationis sunt ea quæ sunt secundum naturam: nam ratio, præsuppositis his quæ sunt a natura determinata, disponit alia secundum quod convenit. Et hoc apparet tam in speculativis, quam in practiis. Et ideo sicut in speculativo error circa ea quorum cognitio est homini naturaliter indita, est gravissimus, & turpissimus; ita in agendis agere contra ea quæ sunt secundum naturam determinatam, est gravissimum, & turpissimum. Quia ergo in vitiis quæ sunt contra naturam, transgreditur homo id quod est secundum naturam determinatum circa usum venereum, inde est quod in tali materia hoc peccatum est gravissimum.

Post quod est *incestus*, qui, sicut dictum est ( art. 9. hu. quæst. ) est contra naturalem reverentiam quam personis coniunctis debemus. Per alias autem luxuriæ species præteritur solum id quod est secundum rationem rectam determinatum, ex præsuppositione tamen naturalium principiorum. Magis autem repugnat rationi quod aliquis veneris utatur, non solum contra id quod convenit proli generandæ, sed etiam cum iniuria alterius. Et ideo *fornicatio simplex*, quæ committitur sine iniuria alterius personæ, est minima inter species luxuriæ. Maior autem iniuria est, si quis abutatur muliere alterius potestati subiecta ad usum generationis, quam

ad solam custodiam. Et ideo *adulterium* est gravius quam *stuprum*: & utrumque aggravatur per violentiam. Propter quod *raptus virginis* est gravius quam *stuprum*, & *raptus uxoris* quam *adulterium*. Et hæc omnia etiam aggravantur secundum rationem *sacrilegii*, ut supra dictum est ( art. 10. hu. quæst. ad 2. )

Ad primum ergo dicendum, quod sicut ordo rationis rectæ est ab homine, ita ordo naturæ est ab ipso Deo. Et ideo in peccatis contra naturam, in quibus ipse ordo naturæ violatur, fit iniuria ipsi Deo ordinatori naturæ. Unde Augustinus dicit in III. Confess. ( cap. viii. cir. princ. ) *Flagitia quæ sunt contra naturam, ubique, ac semper detestanda, atque punienda sunt; qualia Sodomitatum fuerunt: quæ si omnes gentes facerent, omnes eodem criminis reatu divina lege tenerentur, quæ non sic fecit homines, ut se illo uterentur modo Violatur quippe ipsa societas quæ cum Deo nobis esse debet; cum eadem natura, cuius ille auctor est, libidinis pervertitate colluitur.*

Ad secundum dicendum, quod etiam vitia contra naturam sunt contra Deum, ut dictum est ( in solut. præc. ) & tanto sunt graviora quam sacrilegii corruptela, quanto ordo naturæ humanæ inditus est prior, & stabilior quam quilibet alius ordo superadditus.

Ad tertium dicendum, quod unicuique individuo magis est coniuncta natura speciei quam quodcumque aliud individuum. Et ideo peccata quæ sunt contra naturam speciei, sunt graviora.

Ad quartum dicendum, quod gravitas in peccato magis attenditur ex abusu alicuius rei quam ex omissione debiti usus. Et ideo inter vitia quæ sunt contra naturam, infimum locum tenet peccatum immunditiæ, quod consistit in sola omissione concubitus ad alterum. Gravissimum autem est peccatum *bestialitatis*: quia non servatur debita species. Unde super illud Gen. xxxvii. *Accusavit fratres suos crimine pessimo*, dicit Glossa ( interl. ) quod „ cum pecoribus „ miscebantur. „ Post hoc autem est vitium *Sodomiticum*, cum ibi non servetur debitus sexus. Post hoc autem est peccatum ex eo quod non servatur debitus modus concubendi; magis autem non sit debitum vas, quam si sit inordinatio secundum aliqua alia pertinentia ad modum concubitus.

QUAE.

## QUAESTIO CLV.

*De partibus potentialibus temperantiae,  
& primo de continentia,  
in quatuor articulos divisa.*

Postea considerandum est de partibus potentialibus temperantiae: & primo de continentia; secundo de clementia; tertio de modestia.

Circa primum considerandum est de continentia, & de incontinentia.

Circa continentiam quaeruntur quatuor.

Primo, utrum continentia sit virtus.

Secundo, quae sit materia eius.

Tertio, quod sit eius subiectum.

Quarto de comparatione eius ad temperantiam.

## ARTICULUS I. 754

*Utrum continentia sit virtus.*

1. 2. *quest. lxxxv. art. 3. ad 2. & III. P. quest. vii. art. 2. ad 3. & per quest. xiv. art. 1. cor. fin.*

**A**D primum sic proceditur. Videtur quod continentia non sit virtus. Species enim non dividitur generi. Sed continentia dividitur virtuti, ut patet per Philosophum in VII. Ethic. (cap. 1. in princ. & cap. ix.) Ergo continentia non est virtus.

2. Praeterea. Nullus utendo virtute peccat: quia secundum Augustinum in Lib. II. de lib. arbit. (cap. xviii. & xix.) *virtus est qua nemo male utitur*. Sed aliquis contiundo potest peccare; puta si desideret aliquid bonum facere, & ab eo se contineat. Ergo continentia non est virtus.

3. Praeterea. Nulla virtus retrahit hominem a licitis, sed solum ab illicitis. Sed continentia retrahit hominem a licitis: dicit enim Glossa (interl. sup. illud, *Fides, modestia &c.*) Gal. v. quod per continentiam aliquis se etiam a licitis abstinere. Ergo continentia non est virtus.

Sed contra. Omnis habitus laudabilis videtur esse virtus. Sed continentia est huiusmodi: dicit enim Andronicus, quod *continentia est habitus invictus a delectatione*. Ergo continentia est virtus.

Respondeo dicendum, quod nomen continentiae dupliciter sumitur a diversis. Quidam enim continentiam nomi-

nant per quam aliquis ab omni delectatione venerea abstinere: unde & Apostolus ad Galat. v. continentiam calitatem coniungit. Et sic continentia perfecta principalis quidem est virginitas, secundaria vero viduitas. Unde secundum hoc eadem ratio est de continentia quae de virginitate, quam supra diximus virtutem (quest. clii. art. 3.)

Alii vero dicunt, continentiam esse per quam aliquis resistit concupiscentiis pravis, quae in eo vehementes existunt: & hoc modo accipit Philosophus continentiam in VII. Ethic. Hoc etiam modo accipitur continentia in Collationibus Patrum (collat. xii. cap. x. & xr.) Hoc autem modo continentia habet aliquid de ratione virtutis, inquantum scilicet ratio firmata est contra passiones, ne ab eis deducatur; non tamen attingit ad perfectam rationem virtutis moralis, secundum quam etiam appetitus sensibilis subditur rationi sic ut in eo non insurgant vehementes passiones rationi contrariae. Et ideo Philosophus dicit in IV. Ethic. (cap. ult.) quod *continentia non est virtus, sed quaedam mixta*, inquantum scilicet habet aliquid de virtute, & in aliquo deficit a virtute. Largius tamen accipiendum nomen virtutis pro quolibet principio laudabilem operum, possumus dicere, continentiam esse virtutem.

Ad primum ergo dicendum, quod Philosophus continentiam dividit virtuti quantum ad hoc in quo deficit a virtute.

Ad secundum dicendum, quod homo proprie est id quod est secundum rationem. Et ideo ex hoc dicitur aliquis in seipso se tenere, quod tenet se in eo quod convenit rationi. Quod autem pertinet ad perversitatem rationis, non est conveniens rationi. Unde ille solus vere continens dicitur qui tenet se in eo quod est secundum rationem rectam, non autem in eo quod est secundum rationem perversam. Rationi autem rectae opponuntur concupiscentiae pravae, sicut & rationi perversae opponuntur concupiscentiae bonae. Et ideo proprie & vere continens est qui persistit in ratione recta, abstinens a concupiscentiis pravis; non autem qui persistit in ratione perversa, abstinens a concupiscentiis bonis; sed hic magis potest dici obstinatus in malo.

Ad tertium dicendum, quod Glossa ibi loquitur de continentia secundum primum.

munis modum, secundum quem continentia nominat quamdam virtutem perfectam, quæ non solum abstinere ab illicitis bonis, sed etiam a quibuscumque licitis minus bonis, ut totaliter intendatur perfectioribus bonis.

## ARTICULUS II. 755

*Utrum materia continentie sint concupiscentie delectationum tactus.*

**A**D secundum sic proceditur. Videtur quod materia continentie non sint concupiscentie delectationum tactus. Dicit enim Ambrosius in I. de offic. (cap. xlvii. cit. princ.) *Generale decorum ita est, ac si equabilem formam, atque universitatem honestatis habeat in omni actu continentem.* Sed non omnis actus humanus pertinet ad delectationes tactus. Ergo continentia non est solum circa concupiscentias delectationum tactus.

3. Præterea. Nomen continentie ex hoc sumitur quod aliquis tenet se in bono rationis rectæ, sicut dictum est (art. præc.) Sed quædam aliæ passionnes vehementius abducunt hominem a ratione recta quam concupiscentie delectabilium tactus; sicut timor periculorum mortis, qui stupefacit hominem; & ira, quæ est infanæ similis, ut Seneca dicit (Lib. I. de ira cap. 1.) Ergo continentia non dicitur proprie circa concupiscentias delectationum tactus.

3. Præterea. Tullius dicit in II. Rhetor. (seu de invent. aliquant. ante fi.) *quod continentia est per quam cupiditas consilii gubernatione regitur.* Cupiditas autem magis consuevit dici divitiarum, quam delectabilium tactus, secundum illud I. ad Timoth. ult. 10. *Radix omnium malorum est cupiditas.* Ergo continentia non est proprie circa concupiscentias delectationum tactus.

4. Præterea. Delectationes tactus non solum sunt in rebus venereis, sed etiam in usu ciborum. Sed continentia solum circa usum venereorum consuevit dici. Ergo non est propria materia eius concupiscentia delectationum tactus.

5. Præterea. Inter delectationes tactus quædam sunt non humanæ, sed bestiales, tam in cibis, utpote si quis delectetur in esu carnum humanarum, quam etiam in venereis, puta in abusu bestiarum, vel puerorum. Sed circa huiusmodi non est continentia, ut dicitur in VII. Ethic. (cap. v.) Non ergo propria ma-

teria continentie sunt concupiscentie delectationum tactus.

Sed contra est quod Philosophus dicit in VII. Ethic. (cap. xv.) quod *continentia, & incontinentia sunt circa eandem, circa quæ temperantia, & intemperantia.* Sed temperantia, & intemperantia sunt circa concupiscentias delectationum tactus, ut supra habitum est (quæst. cxli. art. 4.) Ergo etiam continentia, & incontinentia sunt circa eandem materiam.

Respondeo dicendum, quod nomen continentie refrenationem quamdam importat, inquantum scilicet tenet se aliquis ne passionibus sequatur. Et ideo proprie continentia dicitur circa illas passionnes quæ impellunt ad aliquid prosequendum, in quibus laudabile est ut ratio retrahat hominem a prosequendo; non autem proprie est circa illas passionnes quæ important retractionem quamdam, sicut timor, & alia huiusmodi. In his enim laudabile est firmitatem servare in prosequendo quod ratio dicit, ut supra dictum est (quæst. cxxxiii. art. 3. & 4.)

Est autem considerandum, quod naturales inclinationes principia sunt omnium supervenientium, ut supra dictum est (elicitur ex quæst. xxvi. art. 1. 7. & 8.) Et ideo passionnes tanto vehementius impellunt ad aliquid prosequendum, quanto magis sequuntur inclinationem naturæ; quæ præcipue inclinat ad ea quæ sunt sibi necessaria vel ad conservationem individui, sicut sunt cibi, vel ad conservationem speciei, sicut sunt actus venerei, quorum delectationes ad tactum pertinent. Et ideo continentia, & incontinentia proprie dicuntur circa concupiscentias delectationum tactus.

Ad primum ergo dicendum, quod sicut nomen temperantie potest communiter accipi in quacumque materia; proprie tamen dicitur in illa materia in qua est optimum hominem refrenari: ita etiam continentia proprie dicitur in materia in qua est optimum, & difficillimum contineri, scilicet in concupiscentiis delectationum tactus; communiter autem, & secundum quid potest dici in quacumque alia materia: & hoc modo utitur Ambrosius nomine continentie.

Ad secundum dicendum, quod circa timorem non proprie laudatur continentia, sed magis firmitas animi, quam fortitudo importat. Ira autem impetum quidem facit ad aliquid prosequendum;

dum; iste tamen impetus magis sequitur apprehensionem animalem, prout scilicet aliquis apprehendit se esse ab alio laetum, quam inclinationem naturalem. Et ideo dicitur quidem aliquis secundum quid continens iræ, non tamen simpliciter.

Ad tertium dicendum, quod huiusmodi exteriora bona, sicut honores, divitiæ, & huiusmodi, ut Philosophus dicit in VII. Ethic. (cap. iv. a princ.) videntur quidem secundum se esse eligibilia, non autem quasi necessaria ad conservationem naturæ. Et ideo circa ea non dicimus simpliciter aliquos continentes, vel incontinentes, sed secundum quid, apponendo quod sint continentes, vel incontinentes lucri, vel honoris, vel alicuius huiusmodi. Et ideo vel Tullius communiter usus est nomine continentis, prout comprehendit sub se etiam continentiam secundum quid; vel accipit cupiditatem strictè pro concupiscentia delectabilium tactus.

Ad quartum dicendum, quod delectationes venerorum sunt vehementiores quam delectationes ciborum: & ideo circa venerea magis consuevimus continentiam, & incontinentiam dicere, quam circa cibos; licet secundum Philosophum circa utrumque possit dici.

Ad quintum dicendum, quod continentia est bonum rationis humanæ: & ideo attenditur circa passiones quæ possunt esse homini connaturales. Unde Philosophus dicit in VII. Ethic. (cap. v. a med.) quod si aliquis tenens prurum concupiscat eum vel comedere, vel ad venerorum inconvenientem delectationem, sive sequatur concupiscentiam, sive non, non dicitur simpliciter continens, (a) sed secundum quid.

## ARTICULUS III. 756

*Utrum subiectum continentis sit vis concupiscibilis.*

Sup. quæst. lxxx. art. 5. ad 3. & 1. 2. quæst. lxxiii. art. 3. ad 2. & III. dist. xxxiii. quæst. xi. art. 4. quæst. 2. & VII. Eth. lect. 10.

**A**D tertium sic proceditur. Videtur quod subiectum continentis sit vis concupiscibilis. Subiectum enim alicuius virtutis oportet esse proportionatum materis. Sed materia continentis, sicut

dictum est (art. præc.) sunt concupiscentiæ delectabilium tactus, quæ pertinent ad vim concupiscibilem. Ergo continentia est in vi concupiscibili.

2. Præterea. Opposita sunt circa idem. Sed incontinentia est in concupiscibili, cuius passiones superant rationem: dicit enim Andronicus, quod *incontinentia est malitia concupiscibilis, secundum quam eligit pravas delectationes, prohibente rationali*. Ergo & continentia pari ratione est in concupiscibili.

3. Præterea. Subiectum virtutis humanæ vel est ratio, vel vis appetitiva, quæ dividitur in voluntatem, concupiscibilem, & irascibilem. Sed continentia non est in ratione, quia sic esset virtus intellectualis; neque etiam in voluntate, quia continentia est circa passiones, quæ non sunt in voluntate; nec etiam est in irascibili, quia non est proprie circa passiones irascibiles, ut dictum est (art. præc. ad 2.). Ergo relinquitur quod sit in concupiscibili.

Sed contra. Omnis virtus in aliqua potentia existens aufert malum actum illius potentis. Sed continentia non aufert malum actum concupiscibilis: habet enim continens concupiscentias parvas, ut Philosophus dicit in VII. Ethicor. (cap. ix. cir. fi.) Ergo continentia non est in concupiscibili.

Respondeo dicendum, quod omnis virtus in aliquo subiecto existens facit illud differre a dispositione quam habet, dum subiicitur opposito vicio. Concupiscibilis autem eodem modo se habet in eo qui est continens, & in eo qui est incontinens, quia in utroque prorumpit in concupiscentias pravas vehementes. Unde manifestum est quod continentia non est in concupiscibili sicut in subiecto.

Similiter etiam ratio eodem modo se habet in utroque: quia tam continens, quam incontinens habet rationem rectam; & utroque extra passionem existens gerit in proposito concupiscentias illicitas non sequi. Prima autem differentia eorum invenitur in electione: quia continens, quantumvis patiarur vehementes concupiscentias, tamen eligit non sequi eas propter rationem; incontinens autem eligit sequi eas, non obstante contradictione rationis. Et ideo oportet quod continentia sit sicut in subiecto in illa vi animæ cuius actus est electio: & hæc est voluntas, ut supra habitum est (1. a. quæst. lxxx. art. 1.)

Ad

(1) Forte huic communiori lectioni addendum vel incontinent, Nec minus pro se sequatur &c. habet & non sequatur concupiscentiam, non dicitur &c.

Ad primum ergo dicendum, quod continentia habet materiam concupiscentias delectationum tactus, non sicut quas moderetur (quod pertinet ad temperantiam, quæ est in concupiscibili) sed est circa eas, quasi eis resistens. Unde oportet quod sit in alia vi, quia resistentia est alterius ad alterum.

Ad secundum dicendum, quod voluntas media est inter rationem, & concupiscibilem, & potest ab utroque moveri. In eo autem qui est continens, movetur a ratione; in eo autem qui est incontinens, movetur a concupiscibili. Et ideo continentia potest attribui rationi sicut primo moventi, & incontinentia concupiscibili; quamvis utrumque immediate pertineat ad voluntatem sicut ad proprium subiectum.

Ad tertium dicendum, quod licet passionem non sint in voluntate sicut in subiecto, est tamen in potestate. voluntatis eis resistere: & hoc modo voluntas continens resistit concupiscentiis.

#### ARTICULUS IV. 757

*Utrum continentia sit melior quam temperantia.*

**A**D quartum sic proceditur. Videtur quod continentia sit melior quam temperantia. Dicitur enim Eccli. xxvi. 20. *Omnis ponderatio non est digna continentis anime.* Ergo nulla virtus potest continentie adæquari.

2. Præterea. Quanto aliqua virtus meretur maius præmium, tanto potior est. Sed continentia videtur mereri maius præmium: dicitur enim II. ad Timoth. ii. 5. *Non (a) coronabitur, nisi qui legitime certaverit:* magis autem certat continens, qui patitur vehementes passiones, & concupiscentias pravas, quam temperatus, qui non habet eas vehementes. Ergo continentia est potior virtus quam temperantia.

3. Præterea. Voluntas est dignior potentia quam vis concupiscibilis. Sed continentia est in voluntate, temperantia autem in vi concupiscibili, ut ex dictis patet (art. præc. in corp. & ad 1.) Ergo continentia est potior virtus quam temperantia.

Sed contra est quod Tullius (Lib. II. de invent. aliquant. ante fi.) & Andronicus ponunt continentiam adiunctam temperantiz sicut principali virtuti.

Respondeo dicendum, quod, sicut supra dictum est (art. i. hu. quæst.) nomen continentie dupliciter accipitur. Uno modo, secundum quod importat cessationem ab omnibus delectationibus venereis: & sic fumendo nomen continentie, continentia est potior temperantia simpliciter dicta, ut patet in his quæ supra dicta sunt (quæst. clxi. art. 5.) de præminencia virginitatis ad castitatem simpliciter dictam.

Alio modo potest accipi nomen continentie, secundum quod importat resistentiam rationis ad concupiscentias pravas, quæ sunt in homine vehementes: & secundum hoc temperantia est multo potior quam continentia: quia bonum virtutis laudabile est ex eo quod est secundum rationem. Plus autem viget bonum rationis in eo qui est temperatus, in quo etiam ipse appetitus sensitivus est subiectus rationi, & quasi a ratione edomitus, quam in eo qui est continens, in quo appetitus sensitivus vehementer resistit rationi per concupiscentias pravas.

Unde continentia comparatur ad temperantiam sicut imperfectum ad perfectum.

Ad primum ergo dicendum, quod auctoritas illa potest dupliciter intelligi. Uno modo, secundum quod accipitur continentia, prout abstinere ab omnibus venereis: & hoc modo dicitur, quod *omnis ponderatio non est digna anime continentis* in genere castitatis: quia nec etiam secunditas carnis, quæ quaeritur in matrimonio, adæquatur continentie virginali, vel viduali, ut supra dictum est (quæst. clxi. art. 4. & 5.)

Alio modo potest intelligi, secundum quod nomen continentie sumitur communiter pro omni abstinencia a rebus illicitis: & sic dicitur, quod *omnis ponderatio non est digna anime continentis*, quia non recipit æstimationem auri vel argenti, quæ commutantur ad pondus.

Ad secundum dicendum, quod magnitudo concupiscentie, seu debilitas eius ex duplici causa procedere potest. Quandoque enim procedit ex causa corporali. Quidam enim ex naturali complexionem sunt magis proni ad concupiscendum quam alii; & iterum quidam habent opportunitates delectationum concupiscentiam inflammantes magis paratas quam alii. Et talis debilitas concupiscentie diminuit meritum; magnitudo vero augeat. Quando-

(a) *Vulgata coronatur.*

doque vero debilitas, vel magnitudo concupiscentiæ provenit ex causa spiritali laudabili, puta ex vehementia caritatis, vel fortitudine rationis, sicut est in homine temperato. Et hoc modo debilitas concupiscentiæ augeat meritum rationis suæ causæ; magnitudo vero minuit.

Ad tertium dicendum, quod voluntas propinquior est rationi quam vis concupiscentis. Unde bonum rationis, ex quo virtus laudatur, maius esse ostenditur ex hoc quod pertingit non solum usque ad voluntatem, sed etiam usque ad vim concupiscentibilem, quod accidit in eo qui est temperatus, quam si pertingat solum ad voluntatem, ut accidit in eo qui est continens.

## QUAESTIO CLVI.

*De incontinentia,  
in quatuor articulos divisa.*

Postea considerandum est de incontinentia: & circa hoc quaeruntur quatuor.

Primo, utrum incontinentia pertineat ad animam, vel ad corpus.

Secundo, utrum incontinentia sit peccatum.

Tertio de comparatione incontinentiæ ad intemperantiam.

Quarto, quis fit turpior, utrum incontinens iræ, vel incontinens concupiscentiæ.

## ARTICULUS I. 758

*Utrum incontinentia pertineat ad  
animam, an ad corpus.*

Ad primum sic proceditur. Videtur quod incontinentia non pertineat ad animam, sed ad corpus. Diverfitas enim sexuum non est ex parte animæ, sed ex parte corporis. Sed diverfitas sexuum facit diverfitatem circa incontinentiam: dicit enim Philosophus in VII. Ethic. (cap. v. ante med.) quod mulieres non dicuntur neque continentes, neque incontinentes. Ergo incontinentia non pertinet ad animam, sed ad corpus.

2. Præterea. Id quod pertinet ad animam, non sequitur corporis complexionem. Sed incontinentia sequitur corporis complexionem: dicit enim Philosophus in VII. Eth. (cap. vii. in fin.) quod maxime acuti, id est cōplexici, &

*J. Tb. Opp. Tom. XXIII.*

*melancholici secundum irrefrenatam concupiscentiam sunt incontinentes.* Ergo incontinentia pertinet ad corpus.

3. Præterea. Victoria magis pertinet ad eum qui vincit, quam ad eum qui vincitur. Sed ex hoc dicitur aliquis esse incontinens, quod caro concupiscens adversus spiritum superat ipsum. Ergo incontinentia magis pertinet ad carnem quam ad animam.

Sed contra est quod homo differt a bestiis principaliter secundum animam. Differt autem secundum rationem continentiam, & incontinentiam: bestias enim dicimus neque continentes, neque incontinentes, ut patet per Philosophum in VII. Ethic. (cap. iii. & v. a med.) Ergo incontinentia maxime est ex parte animæ.

Respondeo dicendum, quod unumquodque attribuitur magis ei quod est causa per se, quam ei quod solum occasionem præstat. Id autem quod est ex parte corporis, solum occasionem præstat incontinentiæ: ex dispositione enim corporis potest contingere quod insurgant passionnes vehementes in appetitu sensitivo, qui est virtus corporis organici. Sed huiusmodi passionnes, quantumcumque vehementes, non sunt sufficiens causa incontinentiæ: sed occasio sola, eo quod durante usu rationis, semper homo potest passionibus resistere.

Si vero passionnes adeo insurgant quod totaliter auferant usum rationis, sicut accidit in his qui propter vehementiam passionum amentiam incurrunt, non remanebit ratio continentiam, neque incontinentiam: quia non salvatur in eis iudicium rationis, quod continens servat, & incontinens deserit. Et sic relinquitur quod per se causa incontinentiæ sit ex parte animæ, quæ ratione passionibus non resistit.

Quod quidem fit duobus modis, ut Philosophus dicit in VII. Ethic. (cap. vii. non procul a fi.) Unomodo, quando anima passionibus cedit, antequam ratio consiliatur: quæ quidem vocatur irrefrenata incontinentia, vel pravolatio. Alio modo, quando non permanet homo in his quæ consiliata sunt, eo quod debilitas est firmatus in eo quod ratio iudicavit: unde hæc incontinentia vocatur debilitas. Et sic patet quod incontinentia principaliter ad animam pertinet.

Ad primum ergo dicendum, quod anima humana est corporis forma, & habet quoddam vires corporeis organici utentes: quæ-

P

quæ-

quarum operationes aliquid conferunt etiam ad illa opera animæ quæ sunt sine corporeis instrumentis, idest ad actum intellectus, & voluntatis, inquantum scilicet intellectus a sensu accipit, & voluntas impellitur a passione appetitus sensitivi. Et secundum hoc quia semina secundum corpus habet quandam debilem complexionem, fit ut in pluribus quodetiam debiliter inhæreat quibuscumque inhæret; etsi raro in aliquibus aliter accidat, secundum illud Proverb. ult. 10. *Mulierem fortem quis inveniet?* Et quia id quod est parvum, vel debile, reputatur quasi nullum, inde est quod Philosophus loquitur de mulieribus, quasi non habentibus iudicium rationis firmum, quamvis in aliquibus mulieribus contrarium accidat. Et propter hoc dicit, quod mulieres non dicimus continentes, quia non ducuntur quasi habentes solidam rationem, sed ducuntur quasi de facili sequentes passiones.

Ad secundum dicendum, quod ex impetu passionis contingit quod aliquis statim sequatur passionem ante consilium rationis. Impetus autem passionis provenire solet vel ex velocitate, sicut in choleris, vel ex vehementia, sicut in melancholicis, qui propter terrestrem complexionem vehementissime inflammantur; sicut e contrario contingit quod aliquis non perferat in eo quod consiliatum est, ex eo quod debiliter inhæret propter molliorem complexionem, ut de mulieribus dictum est (in solut. præc.) quod etiam videtur in phlegmaticis contingere propter eandem causam, sicut etiam in mulieribus. Hæc autem accidunt, inquantum ex complexione corporis datur aliqua incontinentiæ occasio, non autem causa sufficiens, ut dictum est (in cor. art.)

Ad tertium dicendum, quod concupiscentia carnis in eo qui est incontinens, superat spiritum non ex necessitate, sed per quandam negligentiam spiritus non resistentis fortiter.

## ARTICULUS II. 759

*Utrum incontinentia sit peccatum.*

**A**D secundum sic proceditur. Videtur quod incontinentia non sit peccatum. Quia, ut Augustinus dicit in Lib. III. de lib. arb. (cap. xviii. parum a princ.) *nullus peccat in eo quod vitare*

*non potest*. Sed incontinentiam nullus potest ex seipso vitare, secundum illud Sap. viii. 21. (a) *Scio quod non possum esse continens, nisi Deus det*. Ergo incontinentia non est peccatum.

2. Præterea. Omne peccatum in ratione videtur consistere. Sed in eo qui est incontinens, vincitur iudicium rationis. Ergo incontinentia non est peccatum.

3. Præterea. Nullus peccat ex eo quod Deum vehementer amat. Sed ex vehementia divini amoris aliquis fit incontinens: dicit enim Dionysius iv. cap. de div. Nom. (par. i. lect. 10.) *quod Paulus per incontinentiam divini amoris dixit: Vivo ego, iam non ego*. Ergo incontinentia non est peccatum.

Sed contra est quod connumeratur aliis peccatis II. Timoth. vii. 3. ubi dicitur: *Criminatos, incontinentes, immixtos etc.* Ergo incontinentia est peccatum.

Respondendo dicendum, quod incontinentia potest attendi circa aliquid tripliciter. Uno modo proprie, & simpliciter: & sic incontinentia attenditur circa concupiscentias delectationum tactus, sicut & intemperantia, ut supra dictum est de continentia (quæst. præc. art. 2.) Et hoc modo incontinentia est peccatum ex duplici ratione: uno modo ex eo quod incontinens recedit ab eo quod est secundum rationem; alio modo ex eo quod se immergit quibusdam turpibus delectationibus. Et ideo Philosophus dicit in VII. Ethic. (cap. viii. a med.) *quod incontinentia vituperatur non solum ut peccatum, quod scilicet est per recessum a ratione, sed sicut malitia quædam, inquantum pravas concupiscentias sequitur*.

Alio modo incontinentia attenditur circa aliquid, proprie quidem inquantum homo recedit ab eo quod est secundum rationem, sed non simpliciter; puta cum aliquis non servat modum rationis in concupiscentia honoris, divitiarum, & aliorum huiusmodi, quæ secundum se videntur esse bona: circa quæ non est incontinentia simpliciter, sed secundum quid, sicut supra de continentia dictum est (quæst. præc. art. 2. ad 3.) Et sic incontinentia est peccatum, non ex eo quod aliquis ingerat se pravis concupiscentiis, sed ex eo quod non servet modum debitum rationis etiam in concupiscentia rerum per se appetendarum.

Tertio modo incontinentia dicitur esse

cir-

(a) *Valgata*: Et ut scilicet &c. ad illud Dominum,



circa aliquid non proprie, sed secundum similitudinem; puta circa concupiscentias eorum quibus non potest aliquid male uti, puta circa concupiscentias virtutum: circa quas potest aliquid dici incontinentens esse per similitudinem: quia sicut ille qui est incontinentens, totaliter ducitur per concupiscentiam malam; ira aliquid totaliter ducitur per concupiscentiam bonam, quæ est secundum rationem. Et talis incontinentia non est peccatum, sed pertinet ad perfectionem virtutis.

1. Ad primum ergo dicendum, quod homo potest vitare peccatum, & facere bonum, non tamen sine divino auxilio, secundum illud Ioan. xv. 5. *Sine me nihil potestis facere*. Unde per hoc quod homo indiget divino auxilio ad hoc quod sit continens, non excluditur quin incontinentia sit peccatum: quia, ut dicitur in III. Ethic. (cap. xii. a med.) *que per amicos possumus, aliquantulum per nos possumus*.

Ad secundum dicendum, quod in eo qui est incontinentens, vincitur iudicium rationis, non quidem ex necessitate, quod auferret rationem peccati, sed ex negligentia quadam hominis non firmiter intendentis ad resistendum passioni per iudicium rationis quod habet.

Ad tertium dicendum, quod ratio illa procedit de incontinentia per similitudinem dicta, & non proprie.

### ARTICULUS III. 760

*Utrum incontinentens plus peccet quam intemperatus.*

1. 2. *quest. lxxviii. art. 3. cor. & II. dist. xliiii. quest. 1. art. 4. cor. & ver. quest. xxiv. art. 10. corp. & I. Ethic. lect. 3. & Lib. VII. lect. 4.*

**A**D tertium sic proceditur. Videtur quod incontinentens plus peccet quam intemperatus. Tanto enim aliquid videtur gravius peccare, quanto magis contra conscientiam agit, secundum illud Lucæ xii. 47. (a) *Servus sciens voluntatem domini sui, & non faciens, plagis vapulabit multis* &c. Sed incontinentens magis videtur agere contra conscientiam quam intemperatus: quia, ut dicitur in VII. Eth. (cap. xii.) incontinentens sciens quam prava sunt quæ concupiscit, nihilominus agit propter passionem; intem-

peratus autem iudicat ea quæ concupiscit, esse bona. Ergo incontinentens gravius peccat quam intemperatus.

2. Præterea. Quanto aliquod peccatum gravius est, tanto videtur esse minus sanabile: unde & peccata in Spiritum sanctum, quæ sunt gravissima, dicuntur esse irremissibilia. Sed peccatum incontinentiæ videtur esse insanabilius quam peccatum intemperatiæ: sanatur enim peccatum alicuius per admonitionem, & correctionem; quæ nihil videtur conferre incontinenti, qui scit se male agere, & nihilominus male agit; intemperato autem videtur quod bene agat, & sic aliquid ei conferre possit admonitio. Ergo videtur quod incontinentens gravius peccet quam intemperatus.

3. Præterea. Quanto aliquid ex maiori libidine peccat, tanto gravius peccat. Sed incontinentens peccat ex maiori libidine quam intemperatus: quia incontinentens habet vehementes passiones, & concupiscentias, quas non semper habet intemperatus. Ergo incontinentens magis peccat quam intemperatus.

Sed contra est quod imprenitentia aggravat omne peccatum: unde Augustinus in Lib. de verb. Dom. (serm. xr. cap. xii. & xlii.) dicit, quod *imprenitentia est peccatum in Spiritum sanctum*. Sed, sicut Philosophus dicit in VII. Eth. (cap. vii. & viii. in princ.) *intemperatus non est peccator, immanet enim electioni; incontinentens autem omnis est peccator*. Ergo intemperatus gravius peccat quam incontinentens.

Respondeo dicendum, quod peccatum secundum Augustinum (in Lib. de duab. animab. cap. x & xi.) præcipue in voluntate consistit. *Voluntas enim est quæ peccatur, & velle vivitur*. Et ideo ubi est maior inclinatio voluntatis ad peccandum, ibi est gravius peccatum. In eo autem qui est intemperatus, voluntas inclinatur ad peccandum ex propria electione, quæ procedit ex habitu per consuetudinem acquisito; in eo autem qui est incontinentens, voluntas inclinatur ad peccandum ex aliqua passione. Et quia passio cito transit, habitus autem est qualitas difficile mobilis; inde est quod incontinentens statim penitet, transeunte passione: quod non accidit de intemperato; quinimo gaudet se peccasse, eo quod operatio peccati est sibi facta naturalis secundum habitum. Unde de

P 2 his

(a) *Palgas*: Servus qui cognovit voluntatem domini sui, & non preparavit, & non fecit secundum voluntatem eius, vapulabit multis.

his dicitur Proverb. 11. 14. quod *Letantur, cum male fecerint, & exultant in rebus pessimis*. Unde patet, quod intemperatus est multo peior quam incontinentens, ut etiam Philosophus dicit in VII. Ethic. (cap. vii. ante med.)

Ad primum ergo dicendum, quod ignorantia intellectus quandoque quidem praedit inclinationem appetitus, & cautat eam: & sic quanto est maior ignorantia, tanto magis peccatum diminuit, vel totaliter exulat, inquantum cautat involuntarium. Alio modo e converso ignorantia rationis sequitur inclinationem appetitus: & talis ignorantia quanto est maior, tanto peccatum est gravius, quia ostenditur inclinatio appetitus esse maior. Ignorantia autem tam incontinentis, quam intemperati provenit ex eo quod appetitus est in aliquid inclinatus sive per passionem, sicut in incontinentem, sive per habitum, sicut in intemperatum. Maior autem ignorantia causatur hoc in intemperato quam in incontinente: & uno quidem modo quantum ad durationem: quia in incontinente durat illa ignorantia solum passione durante, sicut accessio febris tertianae durat durante commotione humoris; ignorantia autem intemperati durat assidue propter permanentiam habitus, unde assimilatur phthisi, (*φθίσις*) vel cuicumque morbo continuo, ut Philosophus dicit in VII. Ethicor. (cap. viii. circ. princ.) Alio autem modo est maior ignorantia intemperati quanto ad id quod ignoratur. Nam ignorantia incontinentis attenditur quantum ad aliquod particulare eligibile, prout scilicet aestimat hoc nunc esse eligendum; sed intemperatus habet ignorantiam circa ipsum finem, inquantum scilicet iudicat hoc esse bonum, ut irrefrenate concupiscentias sequatur. Unde Philosophus dicit in VII. Ethic. (cap. vii. ante med. & cap. viii. in fi.) quod *incontinentens est melior intemperato, quia salvatur in eo optimum principium, scilicet recta aestimatio de fine*.

Ad secundum dicendum, quod ad sanationem incontinentis non sufficit sola cognitio, sed requiritur interius auxilium gratiae concupiscentiam mitigantis; & adhibetur etiam exterius remedium admonitionis, & correctionis, ex quibus aliquis incipit concupiscentiam resistere, ex quo concupiscentia debilitatur, ut supra dictum est (quaest. cxlii. art. 2.) Et eisdem etiam modis potest sanari intemperatus. Sed difficilius est eius sa-

natio propter duo. Quorum primum est ex parte rationis, quae corrupta est circa aestimationem ultimi finis; quod se habet sicut principium in demonstrativis. Difficilius autem reducitur ad veritatem ille qui errat circa principium, & similiter in operativis ille qui errat circa finem. Aliud autem est ex parte inclinationis appetitus; quae in intemperato est ex habitu, qui difficile tollitur; inclinatio autem incontinentis est ex passione, quae facilius reprimi potest.

Ad tertium dicendum, quod libido voluntatis, quae auget peccatum, maior est in intemperato quam in incontinente, ut ex dictis patet (in cor. art.) Sed libido concupiscentiae appetitus sensitivi quandoque maior est in incontinente: quia incontinentens non peccat nisi ex gravi concupiscentia; sed intemperatus etiam ex levi concupiscentia peccat, & quandoque eam praevent. Et ideo Philosophus dicit in VII. Ethic. (cap. vii. & viii. circ. med.) quod *magis intemperatum vituperamus, quia non concupiscens, vel quiete, id est remissa, concupiscens persequitur delectationes. Quid enim faceret, si adesset concupiscentia iuvenilis?*

#### ARTICULUS IV. 761

*Utrum incontinentens irae sit peior quam incontinentens concupiscentiae.*

*Inf. quaest. clviii. art. 4. cor. & III. dist. xxvi. quaest. 1. art. 2. cor. & ver. quaest. xxv. art. 2. cor. & VII. Ethic. lect. 6. princ.*

**A**D quartum sic proceditur. Videtur quod incontinentens irae sit peior quam incontinentens concupiscentiae. Quanto enim difficilius est resistere passioni, tanto incontinentia videtur esse levior: unde Philosophus dicit in VII. Ethic. (cap. vii. a med.) *Non enim si quis a fortibus, & superexcedentibus delectationibus vincitur, vel tristis, est admirabile, sed condonabile*. Sed, sicut Heraclitus dixit, *difficilius est pugnare contra concupiscentiam quam contra iram*. Ergo levior est incontinentia concupiscentiae quam incontinentia irae.

2. Praeterea. Si passio propter suam vehementiam totaliter auferat iudicium rationis, omnino excusatur aliquis a peccato, sicut patet in eo qui incidit ex passionem in furiam. Sed plus remanet de iudicio rationis in eo qui est incontinentens

nens iræ, quam in eo qui est incontinentens concupiscentiæ: iratus enim aliquantulum audit rationem, non autem concupiscentia, ut patet per Philosophum in VII. Ethic. (cap. vi. in princ.) Ergo incontinentens iræ est peior quam incontinentens concupiscentiæ.

3. Præterea. Tanto aliquod peccatum est gravius, quanto est periculosius. Sed incontinentia iræ videtur esse periculosior, quia perducit hominem ad maius peccatum, scilicet ad homicidium, quod est gravius peccatum quam adulterium, ad quod perducit concupiscentiæ incontinentia. Ergo incontinentia iræ est gravius quam incontinentia concupiscentiæ.

Sed contra est quod Philosophus dicit in VII. Ethic. (cap. vi.) quod minus turpis est incontinentia iræ quam incontinentia concupiscentiæ.

Respondendo dicendum, quod peccatum incontinentiæ potest considerari dupliciter. Uno modo ex parte passionis, ex qua ratio superatur: & sic incontinentia concupiscentiæ turpior est quam incontinentia iræ, quia motus concupiscentiæ habet maiorem inordinationem quam motus iræ.

Et hoc propter quatuor, quæ Philosophus tangit in VII. Ethic. (loc. cit.) Primo quidem quia motus iræ participat aliquantulum rationem, in quantum scilicet iratus tendit ad vindicandum iniuriam sibi factam, quod aliquantulum ratio distat, sed non perfecte, quia non intendit debiti modum vindictæ; sed motus concupiscentiæ totaliter est secundum sensum, & nullo modo secundum rationem. Secundo quia motus iræ magis consequitur corporis complexionem propter velocitatem motus cholerae, quæ tendit ad iram: unde magis est in promptu quod ille qui est secundum complexionem corporis dispositus ad irascendum, irascatur, quam quod ille qui dispositus est ad concupiscendum, concupiscat: unde etiam frequentius ex iracundis nascuntur iracundi, quam ex concupiscentibus concupiscentes. Quod autem provenit ex naturali corporis dispositione, reputatur magis venia dignum. Tertio quia ira querit manifeste operari; sed concupiscentia querit latebras, & dolose subintrat. Quarto quia concupiscentia delectabiliter operatur; sed iratus quasi quadam tristitia præcedente coactus.

Alio modo potest considerari peccatum incontinentiæ quantum ad malum  
5. Th. Oper. Tom. XXXIII.

in quod quis incidit a ratione discedens: & sic incontinentia iræ est ut plurimum gravior, quia ducit in ea quæ pertinent ad proximi nocumentum.

Ad primum ergo dicendum, quod difficilior est assidue pugnare contra delectationem quam contra iram, quia concupiscentia est magis continua; sed ad horam difficilior est resistere iræ propter eius impetum.

Ad secundum dicendum, quod concupiscentia dicitur esse sine ratione, non quia totaliter auferat usum rationis, sed quia in nullo procedit secundum iudicium rationis: & ex hoc est turpior.

Ad tertium dicendum, quod ratio illa procedit ex parte eorum in quæ continens deducitur.

## QUAESTIO CLVII.

*De clementia, & mansuetudine,*

*in quatuor articulos divisa.*

Postea considerandum est de clementia, & mansuetudine, & vitiis oppositis.

Circa ipsas autem virtutes quæruntur quatuor.

Primo, utrum clementia, & mansuetudo sint idem.

Secundo, utrum utraque earum sit virtus.

Tertio, utrum utraque earum sit pars temperantiæ.

Quarto de comparatione earum ad alias virtutes.

## ARTICULUS I. 762

*Utrum clementia, & mansuetudo sint penitus idem.*

*Inf. art. 4. ad 3. & III. dist. XXXIII. quest. 111. art. 2. quest. 1. ad 2.*

Ad primum sic proceditur. Videtur quod clementia, & mansuetudo sint penitus idem. Mansuetudo enim est moderativa irarum, ut Philosophus dicit in IV. Ethicor. (cap. v.) Ira autem est appetitus vindictæ. Cum ergo clementia sit lenitas superioris adversus inferiorem in constituendis penis, ut Seneca dicit in II. de clementia (cap. 111. cir. princ.) per penas autem fiat vindicta, videtur quod clementia, & mansuetudo sint idem.

2. Præterea. Tullius dicit in II. Rhetor.

tor. (Lib. II. de invent. aliquant. ante fi.) quod *clementia est virtus per quam animus temere concitatus in odium alicuius, benignitate retinetur*: & sic videtur quod clementia sit moderativa odii. Sed odium, ut Augustinus dicit (epist. cexi. al. cix. inter med. & fi.) causatur ab ira, circa quam est mansuetudo, & clementia. Ergo videtur quod clementia, & mansuetudo sint penitus idem.

3. Præterea. Idem vitium non contrariatur diversis virtutibus. Sed idem vitium opponitur mansuetudini, & clementia, scilicet crudelitati. Ergo videtur quod mansuetudo, & clementia sint penitus idem.

Sed contra est quod secundum prædictam definitionem Senecæ, *clementia est lenitas superioris adversus inferiorem*. Mansuetudo autem non solum est superioris ad inferiorem, sed cuiuslibet ad quemlibet. Ergo mansuetudo, & clementia non sunt penitus idem.

Respondeo dicendum, quod, sicut dicitur in II. Ethic. (cap. iii. ante med.) virtus moralis consistit circa passiones, & actiones. Passiones autem interiores sunt exteriorum actionum principia, aut etiam impedimenta. Et ideo virtutes, quæ moderantur passiones, quodammodo concurrunt in eundem effectum cum virtutibus, quæ moderantur actiones, licet specie differant: sicut ad iustitiam proprie pertinet cohibere hominem a furto; ad quod aliquis inclinatur per inordinatum amorem, vel concupiscentiam pecuniæ, quæ moderatur per liberalitatem: & ideo liberalitas concurret cum iustitia in hoc effectu qui est abstinere a furto. Et hoc etiam considerandum est in proposito. Nam ex passione iræ provocatur aliquis ad hoc quod graviores inferat pœnam; ad clementiam autem pertinet directe quod sit diminutiva pœnarum: quod quidem impediri posset per excessum iræ.

Et ideo mansuetudo, in quantum refrenat impetum iræ, concurret in eundem effectum cum clementia; differunt tamen ab invicem, in quantum clementia est moderativa exterioris punitionis, mansuetudo autem proprie diminuit passionem iræ.

Ad primum ergo dicendum, quod mansuetudo proprie respicit ipsum vindictæ appetitum; sed clementia respicit ipsas pœnas, quæ exterius adhibentur ad vindictam.

Ad secundum dicendum, quod affectus hominis inclinatur ad minorationem co-

rum quæ homini per se non placent. Ex hoc autem quod aliquis amat aliquid, provenit quod non placet ei per se pœna eius, sed solum in ordine ad aliud, puta ad iustitiam, vel ad correctionem eius qui puniatur. Et ideo ex amore provenit quod aliquis sit promptus ad diminuendum pœnas, (quod pertinet ad clementiam) & ex odio impeditur talis diminutio. Et propter hoc Tullius dicit, quod *animus concitatus in odium*, scilicet ad gravius puniendum, *per clementiam retinetur*, ne scilicet acriorem pœnam inferat, non quod clementia sit directe odii moderativa, sed pœnæ.

Ad tertium dicendum, quod mansuetudini, quæ est directe circa iras, proprie opponitur vitium iracundiæ, quod importat excessum iræ; sed crudelitatis importat excessum in puniendo. Unde dicit Seneca in II. de clementia (cap. iv.) quod *crudeliter vocantur qui puniendi causam habent, modum tamen non habent*. Qui autem in pœnis hominum propter se delectantur, etiam sine causa, possunt dici sævi, vel feri, quasi affectum humanum non habentes, ex quo naturaliter homo diligit hominem.

## ARTICULUS II. 763

*Utrum tam clementia, quam mansuetudo sit virtus.*

*Inf. art. 3. cor. & III. dist. xxvi. quæst. 11. art. 2. ad 4.*

**A**D secundum sic proceditur. Videtur quod neque clementia, neque mansuetudo sit virtus. Nulla enim virtus alteri virtuti opponitur. Sed utraque videtur opponi severitati, quæ est quædam virtus. Ergo neque clementia, neque mansuetudo est virtus.

2. Præterea. Virtus corrumpitur per superfluum, & diminutum. Sed tam clementia, quam mansuetudo in quadam diminutione consistunt: nam clementia est diminutiva pœnarum, mansuetudo autem est diminutiva iræ. Ergo neque clementia, neque mansuetudo est virtus.

3. Præterea. Mansuetudo, sive mititas ponitur Matth. v. inter beatitudines, & inter fructus ad Galat. v. Sed virtutes differunt & a beatitudinibus, & a fructibus. Ergo non continentur sub virtute.

Sed contra est quod dicit Seneca in II.

II. de clementia (cap. v. in princ.) *Clementia, & mansuetudinem omnes viri boni praestabunt*. Sed virtus est proprie quae pertinet ad bonos viros: nam *virtus est quae bonum facit habentem, & opus eius bonum reddit*, ut dicitur II. Ethic. (cap. vi.) Ergo clementia, & mansuetudo sunt virtutes.

Respondendo dicendum, quod ratio virtutis moralis consistit in hoc quod appetitus rationi subdatur, ut patet per Philosophum in I. Ethic. (cap. ult.) Hoc autem servatur tam in clementia, quam in mansuetudine. Nam clementia, diminuendo poenas, aspicit ad rationem, ut Seneca dicit in II. de clementia (cap. v. a princ.) similiter etiam mansuetudo secundum rationem rectam moderatur iras, ut dicitur in IV. Ethicor. (cap. v.) Unde manifestum est quod tam clementia, quam mansuetudo est virtus.

Ad primum ergo dicendum, quod mansuetudo non directe opponitur severitati: nam mansuetudo est circa iras, severitas autem attenditur circa exteriorem inflectionem poenarum. Unde secundum hoc videretur magis opponi clementiae, quae etiam circa exteriorem punitionem consideratur, ut dictum est (art. praec.) Non tamen opponitur, eo quod utrumque est secundum rationem rectam. Nam severitas inflexibilis est circa inflectionem poenarum, quando hoc recta ratio requirit; clementia autem diminutiva est poenarum etiam secundum rationem rectam, quando scilicet oportet, & in quibus oportet. Et ideo non sunt opposita, quia non sunt circa idem.

Ad secundum dicendum, quod secundum Philosophum in IV. Ethic. (cap. v. in princ.) habitus qui medium tenet in ira, est inordinatus: & ideo virtus nominatur a diminutione irae, quae significatur nomine mansuetudinis: eo quod virtus propinquior est diminutioni quam superabundantiae, propter hoc quod naturalius est homini appetere vindictam iniuriarum illatarum, quam ab hoc deficere, quia vix alicui nimis parvae videntur iniuriae sibi illatae, ut dicit Sallustius (in coniur. Catil. ante med. orat. Caesar.) Clementia autem est diminutiva poenarum, non quidem in respectu ad id quod est secundum rationem rectam, sed in respectu ad id quod est secundum legem communem, quam respicit iustitia legalis; sed propter aliqua particularia considerata clementia diminuit poenas quasi decernens hominem non esse magis

puniendum. Unde dicit Seneca in II. de clementia (cap. ult. a med.) *Clementia hoc primum praestat ut quos dimittit, nihil aliud illos pati debuisset pronuntiare; venia vero debita poenae remissa est*. Ex quo patet quod clementia comparatur ad severitatem, sicut epicheia ad iustitiam legalem, cuius pars est severitas quantum ad inflectionem poenarum secundum legem; differt tamen clementia ab epicheia, ut infra dicitur (art. seq. ad 1.)

Ad tertium dicendum, quod beatitudines sunt actus virtutum; fructus autem sunt delectationes de actibus virtutum: & ideo nihil prohibet mansuetudinem poni & virtutem, & beatitudinem, & fructum.

### ARTICULUS III. 764

*Utrum praedictae virtutes sint partes temperantiae.*

*Sup. quest. cxlxi. & infr. quest. cxli. art. 4. cor. & II. dist. xlv. quest. ii. art. 1. ad 3. & III. dist. xxxiii. quest. i. art. 2.*

**A**D tertium sic proceditur. Videtur quod praedictae virtutes non sint partes temperantiae. Clementia enim est diminutiva poenarum, ut dictum est (art. praec.) Hoc autem Philosophus in V. Ethic. (cap. x.) attribuit epicheiae, quae pertinet ad iustitiam, ut supra habitum est (quest. cxx. art. 2.) Ergo videtur quod clementia non sit pars temperantiae.

2. Praeterea. Temperantia est circa concupiscentias. Mansuetudo autem, & clementia non respiciunt concupiscentias, sed magis iram, & vindictam. Non ergo debent poni partes temperantiae.

3. Praeterea. Seneca dicit in II. de clementia (cap. iv. cir. med.) *Cui voluptati levitia est, possumus insaniam vocare*. Hoc autem opponitur clementiae, & mansuetudini. Cum ergo insania opponatur prudentiae, videtur quod clementia & mansuetudo sint partes prudentiae magis quam temperantiae.

Sed contra est quod Seneca dicit in II. de clement. (cap. i. cir. princ.) *quod clementia est temperantia animi in potestate ulciscendi*. Tullius etiam (Lib. II. de invent. aliquant. ante li.) ponit clementiam partem temperantiae.

Respondendo dicendum, quod partes assignantur

signatur virtutibus principalibus, secundum quod imitantur ipsas in aliquibus materiis secundariis quantum ad modum, ex quo principaliter dependet laus virtutis, unde & nomen accipit: sicut modus, & nomen iustitiae in quadam equalitate consistit; fortitudinis autem in animi quadam firmitate; temperantiae autem in quadam refrenatione, in quantum scilicet refrenat concupiscentias vehementissimas delectationum tactus. Clementia autem, & mansuetudo similiter in quadam refrenatione consistunt, quia scilicet clementia est diminutiva poenarum, mansuetudo vero est mitigativa irae, ut ex dictis patet (art. 1. & 2. praec.).

Et ideo tam clementia, quam mansuetudo adiunguntur temperantiae sicut virtuti principali: & secundum hoc ponuntur partes temperantiae.

Ad primum ergo dicendum, quod in diminutione poenarum sunt consideranda duo. Quorum unum est quod diminutio poenarum fiat secundum intentionem legislatoris, licet non secundum verba legis; & secundum hoc pertinet ad epicheiam. Aliud autem est quadam moderatio affectus, ut homo non utatur sua potestate in iussione poenarum; & hoc proprie pertinet ad clementiam. Propter quod Seneca dicit (Lib. II. de clement. cap. 111. cir. princ.) quod *clementia est temperantia animi in potestate ulciscendi*. Et haec quidem moderatio animi provenit ex quadam dulcedine affectus, qua quis abhorret omne illud quod potest alium contristare. Et ideo dicit Seneca (loc. cit.) quod *clementia est quadam lenitas animi*: nam e converso austeritas animi videtur esse in eo qui non veretur alios contristare.

Ad secundum dicendum, quod adiunctio virtutum secundariorum ad principales magis attenditur secundum modum virtutis, qui est quasi forma eius, quam secundum materiam. Mansuetudo autem, & clementia conveniunt cum temperantia in modo, ut dictum est (in cor. art.) licet non convenient in materia.

Ad tertium dicendum, quod infania dicitur per corruptionem sanitatis. Sicut autem sanitas corporalis corrumpitur per hoc quod corpus recedit a debita complexione humanae speciei; ita etiam infania secundum animam accipitur per hoc quod anima humana recedit a debita dispositione humanae speciei. Quod quidem contingit & secundum rationem,

puta cum aliquis usum rationis amittit; & quantum ad vim appetitivam, puta cum aliquis amittit affectum humanum, secundum quem homo est naturaliter homini amicus, ut dicitur in VIII. Ethic. (cap. 1.) Infania autem quae excludit usum rationis, opponitur prudentiae. Sed quod aliquis delectetur in praeis hominum, dicitur esse infania, quia per hoc videtur homo privatus affectu humano, quem sequitur clementia.

#### ARTICULUS IV. 765

*Utrum clementia, & mansuetudo sint potissimae virtutes.*

**A**D quartum sic proceditur. Videtur quod clementia, & mansuetudo sint potissimae virtutes. Laus enim virtutis consistit praecipue in hoc quod ordinat hominem ad beatitudinem, quae in Dei cognitione consistit. Sed mansuetudo maxime ordinat hominem ad Dei cognitionem: dicitur enim Iacobi 1. 21. *In mansuetudine suscipite instum verbum*: & Eccli. v. 13. *Esse mansuetus ad audiendum verbum Dei*: & Dionysius dicit in epist. ad Demophilum (quae est viii. in princ.) *Moses propter multam mansuetudinem Dei apparitione dignum habuit*. Ergo mansuetudo est potissima virtutum.

2. Praeterea. Tanto virtus aliqua videtur esse potior, quanto magis acceptatur a Deo, & ab hominibus. Sed mansuetudo maxime videtur acceptari a Deo: dicitur enim Eccli. 1. 34. quod *beneficium est Deo fides, & mansuetudo*: unde & specialiter ad suae mansuetudinis imitationem Christus nos invitat, dicens (Matth. xi. 29.) *Discite a me, quia mitis, & humilis corde*: & Hilarius dicit (can. iv. in Matth. parum a princ.) quod *per mansuetudinem mentis nostrae habitavit Christus in nobis*. Est etiam hominibus acceptissima: unde dicitur Eccli. 111. 19. *Fili, in mansuetudine perfice opera tua, & super hominum gloriam diligis*: propter quod & Proverb. xx. 28. dicitur, quod *clementia thronus regis roboratur*. Ergo mansuetudo, & clementia sunt potissimae virtutes.

3. Praeterea. Augustinus dicit in Lib. I. de serm. Dom. in monte (cap. 11. a princ.) quod *mites sunt qui cedunt improbitatibus, & non resistunt malo, sed vincunt in bono malo*. Hoc autem videtur pertinere ad misericordiam, vel pietatem, quae videtur esse potissima virtus.

tutum : quia super illud I. ad Timoth. xv. *Pietas ad omnia utilis est*, dicit Glossa Ambrosii, quod „ summa religionis „ christianae in pietate consistit. „ Ergo mansuetudo, & clementia sunt maximae virtutes.

Sed contra est, quia non ponuntur virtutes principales, sed adiunguntur alteri virtuti quasi principaliori.

Respondeo dicendum, quod nihil prohibet aliquas virtutes non esse potissimas simpliciter, nec quoad omnia, sed secundum quid, & in aliquo genere. Non autem est possibile quod clementia, & mansuetudo sint potissimae virtutes simpliciter : quia laus earum attenditur in hoc quod retrahunt a malo, inquantum scilicet diminuunt iram, vel poenam. Perfectius autem est consequi bonum quam carere malo. Et ideo virtutes quae simpliciter ordinant in bonum, sicut fides, spes, caritas, & etiam prudentia, & iustitia, sunt simpliciter maiores virtutes quam clementia, & mansuetudo.

Sed secundum quid nihil prohibet clementiam, & mansuetudinem habere quamdam excellentiam inter virtutes quae resistunt affectionibus pravis. Nam ira, quam mitigat mansuetudo, propter suum impetum maxime impedit animum hominis ne libere iudicet veritatem : & propter hoc mansuetudo maxime facit hominem esse compotem sui. Unde dicitur Eccli. x. 31. *Fili in mansuetudine serva animam tuam*. Quamvis concupiscentiae delectationum tactus sint turpiores, & magis continue infestent : propter quod temperantia magis ponitur virtus principalis, ut ex dictis patet (quæst. cxli. art. 7. ad 2.) Clementia vero in hoc quod dimittit poenas, maxime videtur accedere ad caritatem, quae est potissima virtutum, per quam bona operamur ad proximos, & eorum mala impedimus.

Ad primum ergo dicendum, quod mansuetudo praeparat hominem ad Dei cognitionem removendo impedimentum ; & hoc dupliciter : primo quidem, faciendo hominem compotem sui per diminutionem irae, ut dictum est (in corp. art.) alio modo quia ad mansuetudinem pertinet quod homo non contradicat verbis veritatis ; quod plerumque aliqui faciunt ex commotione irae. Et ideo Augustinus dicit in II. de doctr. christ. (cap. vii. a princ.) *Miscere est non contradicere divinae Scripturae, sive intellectui, si aliqua vitia nostra percussit, hoc non intellectui,*

*quasi nos melius sapere, veriusque percipere possemus.*

Ad secundum dicendum, quod mansuetudo, & clementia reddunt hominem Deo, & hominibus acceptum, secundum quod concurrunt in eundem effectum cum caritate, quae est maxima virtutum, scilicet in subtrahendo mala proximorum.

Ad tertium dicendum, quod misericordia, & pietas conveniunt quidem cum mansuetudine, & clementia, inquantum concurrunt in eundem effectum, qui est prohibere mala proximorum ; differunt tamen quantum ad motivum : pietas enim movet mala proximorum ex reverentia, quam habet ad aliquem superiorem, puta Deum, vel parentem ; misericordia vero movet mala proximorum ex hoc quod in eis aliquis contristatur, inquantum æstimat ea ad se pertinere, ut supra dictum est (quæst. xxx. art. 2.) quod provenit ex amicitia, quae facit amicos de eisdem gaudere, & tristari ; mansuetudo autem hoc facit, inquantum movet iram incitantem ad vindictam ; clementia vero hoc facit ex animi levitate, inquantum iudicat esse æquum ut aliquis non amplius puniatur.

## QUAESTIO CLVIII.

*De iracundia,*

*in octo articulis divisa.*

**P**ostea considerandum est de vitiis oppositis : & primo de iracundia, quae opponitur mansuetudini ; secundo de crudelitate, quae opponitur clementiae.

Circa iracundiam quaeruntur octo.

Primo, utrum irasci possit esse aliquando licitum.

Secundo, utrum ira sit peccatum.

Tertio, utrum sit peccatum mortale.

Quarto, utrum sit gravissimum peccatorum.

Quinto de speciebus irae.

Sexto, utrum ira sit vitium capitale.

Septimo, quae sint filiae eius.

Octavo, utrum habeat vitium oppositum.

*zelum turbat rationis oculum, sed ira per vitium excæcat.* Non est autem contra rationem virtutis ut intermittatur deliberatio rationis in executione eius quod est a ratione deliberatum: quia etiam ars impediretur in suo actu, si dum debet agere, deliberaret de agendis.

Ad tertium dicendum, quod appetere vindictam propter malum eius qui puniendus est, illicitum est; sed appetere vindictam propter vitiolum correptionem, & bonum iustitiæ conservandum, laudabile est: & in hoc potest tendere appetitus sensitivus, in quantum movetur a ratione: & dum vindicta secundum ordinem iudicii fit, a Deo fit, cuius minister est potestas puniens, ut dicitur Rom. xiii.

Ad quartum dicendum, quod Deo assimilari possumus, & debemus in appetitu boni; sed in modo appetendi ei omnino assimilari non possumus, quia in Deo non est appetitus sensitivus, sicut in nobis, cuius motus debet rationi deservire. Unde Gregorius dicit in V. Moral. (loc. sup. cit.) quod tunc robustius ira contra vitia erigitur, cum subdita rationi famulatur.

## ARTICULUS II. 767

*Utrum ira sit peccatum.*

1. dist. xxxvi. art. 1. ad 2. & III. dist. xv. quest. 11. art. 2. quest. 2. co. & mal. quest. xii. art. 2. & Ephes. iv. lect. 1.

**A**D secundum sic proceditur. Videtur quod ira non sit peccatum. Peccando enim demeremur. Sed passionibus non demeremur, sicut nec vituperamur, ut dicitur in II. Ethic. (cap. v. cir. med.) Ergo nulla passio est peccatum. Ira autem est passio, ut supra habitum est (1. 2. quest. xvi. art. 1.) cum de passionibus ageretur. Ergo ira non est peccatum.

2. Præterea. In omni peccato est conversio ad aliquod bonum commutabile. Sed per iram non convertitur aliquis ad aliquod bonum commutabile, sed in malum alicuius. Ergo ira non est peccatum.

3. Præterea. Nullus peccat in eo quod vitare non potest, ut Augustinus dicit (Lib. III. de lib. arb. cap. xix. a princ.) Sed iram homo vitare non potest: quia super illud Psal. iv. *Iraſcimini, & nolite peccare*, dicit Glossa (ord. Cassiod.)

quod „motus iræ non est in potestate nostra.“ Philosophus etiam in VII. Ethicor. (cap. vi. cir. med.) dicit, quod *iratus cum tristitia operatur*: tristitia autem est contraria voluntati. Ergo ira non est peccatum.

4. Præterea. Peccatum est contra naturam, ut Damascenus dicit in II. Lib. (orth. Fid. cap. iv. & xxx.) Sed irasci non est contra naturam hominis, cum sit actus naturalis potentie, quæ est irascibilis: unde & Hieronymus dicit in quadam epistola (ix. ad Salvinam aliquant. ante fi.) quod *irasci est hominis*. Ergo irasci non est peccatum.

Sed contra est quod Apostolus dicit ad Ephes. iv. 31. *Omnis indignatio, & ira tollatur a vobis.*

Respondetur dicendum, quod ira, sicut dictum est (art. præc. & 1. 2. quest. xvi. art. 1.) proprie nominatur quædam passio. Passio autem appetitus sensitivi intantum est bona, in quantum ratione regulatur; si autem ordinem rationis excludat, est mala. Ordo autem rationis in ira potest attendi quantum ad duo. Primo quidem quantum ad appetibile in quod tendit, quod est vindicta. Unde si aliquis appetat quod secundum ordinem rationis habet vindicta, est laudabilis iræ appetitus; & vocatur ira per zelum.

Si autem aliquis appetat quod fiat vindicta qualitercumque contra ordinem rationis (puta si appetat puniri eum qui non meruit, vel ultra quam meruit, vel etiam non secundum legitimum ordinem, vel non propter debitum finem, qui est conservatio iustitiæ, & correctio culpæ,) erit appetitus iræ vitiosus; & nominatur ira per vitium.

Alio modo attenditur ordo rationis circa iram quantum ad modum irascendi, ut scilicet motus iræ non immoderate fervescat nec intus, nec exterius: quod quidem si prætermittatur, non erit ira abique peccato, etiam si aliquis appetat iustam vindictam.

Ad primum ergo dicendum, quod quia passio potest esse regulata ratione, vel non regulata; ideo secundum passionem absolute consideratam non importatur ratio meriti, vel demeriti, seu laudis, vel vituperii; secundum tamen quod est regulata ratione, potest habere rationem meritorii, & laudabilis; & e contrario secundum quod non est regulata ratione, potest habere rationem demeriti, vel vituperabilis. Unde & Philosophus ibidem dicit,



dicit, quod *laudatur, vel vituperatur qui aliquoties irascitur*.

Ad secundum dicendum, quod iratus non appetit malum aliterius propter se, sed propter vindictam, in quam convertitur appetitus eius sicut in quoddam commutabile bonum.

Ad tertium dicendum, quod homo est dominus suorum actuum per arbitrium rationis: & ideo motus qui praevient iudicium rationis, non sunt in potestate hominis in generali, ut scilicet nullus eorum insurgat; quamvis ratio possit quolibet singulariter impedire, si insurgat. Et secundum hoc dicitur, quod motus irae non est in potestate hominis, ita scilicet quod nullus insurgat. Quia tamen aliquoties est in hominis potestate, non totaliter perdit rationem peccati, si sit inordinatus. Quod autem Philosophus dicit, iratum cum tristitia operari, non est sic intelligendum, quasi tristetur de eo quod irascitur, sed quia tristatur de iniuria, quam aestimat sibi illatam; & ex hac tristitia movetur ad appetendum vindictam.

Ad quartum dicendum, quod irascibilis in homine naturaliter subicitur rationi: & ideo actus eius intantum est homini naturalis, inquantum est secundum rationem; inquantum vero est praeter ordinem rationis, est contra hominis naturam.

### ARTICULUS III. 768

*Utrum omnis ira sit peccatum mortale.*

1. 2. *quest. lxxxviii. art. 5. ad 1. & mal. quest. vii. art. 4. ad 1. & quest. xii. art. 3. & Gal. v. lect. 5.*

**A**D tertium sic proceditur. Videtur quod omnis ira sit peccatum mortale. Dicitur enim Iob v. 2. (a) *Vitium stultum interficit iracundia*: & loquitur de interfectione spiritali, a qua denominatur peccatum mortale. Ergo omnis ira est peccatum mortale.

2. Praeterea. Nihil meretur damnationem aeternam nisi peccatum mortale. Sed ira meretur damnationem aeternam: dicit enim Dominus Matth. v. *Omni qui irascitur fratri suo, reus erit iudicio*: ubi dicit Glossa (ord.) quod per illa tria quae ibi canguntur, scilicet *iudicium, concilium, & gebenna*, „diver-“ sa mansiones in aeterna damnatione pro modo peccati signanter exprimun-

„tur“. Ergo ira est peccatum mortale.

3. Praeterea. Quicquid contrariatur caritati, est peccatum mortale. Sed ira de se contrariatur caritati, ut patet per Hieronymum super illud Matth. v. *Qui irascitur fratri suo &c.* ubi dicit, quod „hoc est contra proximi dilectionem.“ Ergo ira est peccatum mortale.

Sed contra est quod super illud Psal. xv. *Irascimini, & nolite peccare*, dicit Glossa (ord. Cassiod.) „Venialis est“, ira quae non perducitur ad effectum.

Respondeo dicendum, quod motus irae potest esse inordinatus, & peccatum dupliciter, sicut dictum est (art. praec.)

Uno modo ex parte appetibilis, utpote cum aliquis appetit iniustam vindictam: & sic ex genere suo ira est peccatum mortale, quia contrariatur caritati, & iustitiae.

Potest tamen contingere quod talis appetitus sit peccatum veniale propter imperfectionem actus. Quae quidem imperfectio attenditur vel ex parte appetentis, puta cum motus irae praevient iudicium rationis; vel etiam ex parte appetibilis, puta cum aliquis appetit in aliquo modico se vindicare, quod quasi nihil est reputandum, ita quod etiam si actu inferatur, non esset peccatum mortale; puta si aliquis parum trahit aliquem puerum per capillos, vel aliquid huiusmodi.

Alio modo potest esse motus irae inordinatus quantum ad modum irascendi, utpote si nimis ardens irascitur interior, vel si nimis exterior manifestet signa irae: & sic ira secundum se non habet ex suo genere rationem peccati mortalis; potest tamen contingere quod sit peccatum mortale, puta si ex vehementia irae aliquis excidat a dilectione Dei, & proximi.

Ad primum ergo dicendum, quod ex illa auctoritate non habetur quod omnis ira sit peccatum mortale, sed quod stulti per iracundiam spiritualiter occiduntur, inquantum scilicet non refrinando per rationem motum irae, dilabuntur in aliqua peccata mortalia, puta in blasphemiam Dei, vel iniuriam proximi.

Ad secundum dicendum, quod Dominus dixit verbum illud de ira, quasi superaddens ad illud verbum legis, *Qui occiderit, reus erit iudicio*. Unde loquitur ibi Dominus de motu irae in quo quis appetit proximi occisionem, aut quam-

(a) *Irascitur*: Vere fultum.

cumque gravem lationem : cui appetitui si consensus rationis superveniat, absque dubio erit peccatum mortale .

Ad tertium dicendum, quod in illo casu in quo ira contrariatur caritati, est peccatum mortale; sed hoc non semper accidit, ut ex dictis patet ( in corp. )

ARTICULUS IV. 169

*Utrum ira sit gravissimum peccatum .*

1. 2. *quest. xlv. art. 6. & mal. quest. xii. art. 4.*

**A**D quartum sic proceditur . Videtur quod ira sit gravissimum peccatum . Dicit enim Chrysostomus ( hom. xlvii. in Ioan. ad fi. ) quod *nihil est turpius visu furentis, & nihil deformius sereno visu, & multo magis anima* . Ergo ira est gravissimum peccatum .

2. Præterea . Quanto aliquid peccatum est magis nocivum, tanto videtur esse peius : quia, sicut Augustinus dicit in Eucherid. ( cap. xii. ) *malum dicitur aliquid, quia nocet* . Ira autem maxime nocet, quia auferit homini rationem, per quam est dominus sui ipsius : dicit enim Chrysostomus ( loc. cit. ) quod *inter iram, & insaniam nihil differt, sed temporarius quidam daemon est; immo quam qui demonio vexatur, gravior* . Ergo ira est gravissimum peccatum .

3. Præterea . Interiores motus diiudicantur secundum exteriores effectus . Sed effectus iræ est homicidium, quod est gravissimum peccatum . Ergo ira est gravissimum peccatum .

Sed contra est quod ira comparatur ad odium, sicut feltuca ad trabem : dicit enim Augustinus in Regula ( epist. cxxi. al. cx. aliquant. ante fi. ) *Ne ira crescat in odium, & trabem faciat de feltuca* . Non ergo ira est gravissimum peccatum .

Respondendo dicendum, quod, sicut dictum est ( art. 1. & 2. hu. quest. ) inordinatio iræ secundum duo attenditur, scilicet secundum indebitum appetibile, & secundum indebitum modum irascendi . Quantum igitur ad appetibile, quod iratus appetit, videtur esse ira minimum peccatorum : appetit enim ira malum poenæ alicuius sub ratione boni, quod est vindicta : & ideo ex parte mali quod appetit, convenit peccatum iræ cum illis peccatis quæ appetunt malum

proximi, puta cum invidia, & odio : sed odium appetit absolute malum alterius, inquantum huiusmodi ; invidus autem appetit malum alterius propter appetitum propriæ gloriæ ; sed iratus appetit malum alterius sub ratione iustitæ vindictæ . Ex quo patet quod odium est gravius quam invidia, & invidia quam ira : quia peius est appetere malum sub ratione mali, quam sub ratione boni ; & peius est appetere malum sub ratione boni exterioris, quod est honor, vel gloria, quam sub ratione reſtitutionis iustitiæ .

Sed ex parte boni, sub cuius ratione iratus appetit malum, convenit ira cum peccato concupiscentiæ, quod tendit in aliquod bonum . Et quantum ad hoc etiam absolute loquendo peccatum iræ videtur esse minus quam concupiscentiæ, quanto melius est bonum iustitiæ, quod appetit iratus, quam bonum delectabile, vel utile, quod appetit concupiscens . Unde Philosophus dicit in VII. Ethicor. ( cap. vi. ) quod *incontinens concupiscentia est turpius quam incontinens ira* .

Sed quantum ( a ) ad inordinationem, quæ est secundum modum irascendi, ira habet quandam excellentiam propter vehementiam, & velocitatem sui motus, secundum illud Proverb. xxvii. 4. *Ira non habet misericordiam, nec erumpens furor : & impetum concitati spiritus ferre quis poterit ?* Unde Gregorius dicit in V. Moral. ( cap. xxx. ante med. ) *Ire sue stimulis accensum cor palpitat, corpus tremat, lingua se præpedit, facies ignescit, exasperantur oculi, & nequaquam recognoscuntur notæ : lingua quidem clamorem format, sed sensus quid loquatur ignorat* .

Ad primum ergo dicendum, quod Chrysostomus loquitur de turpitudine quantum ad gestus exteriores, qui proveniunt ex impetu iræ .

Ad secundum dicendum, quod ratio illa procedit secundum inordinatum ( b ) motum iræ, qui provenit ex eius impetu, ut dictum est ( in corp. art. )

Ad tertium dicendum, quod homicidium non minus provenit ex odio, vel invidia quam ex ira ; ira tamen levior est, inquantum attendit rationem iustitiæ, ut dictum est ( in corp. )

AR-

( a ) Ita cum mss. plurimis edit. passim . Al. ad inordinationem, ( b ) Ita cum add. Alcan. & Rom. edit. plurimi, Nicolai cum add. Cambr. & Paris. modum.

## ARTICULUS V. 770

*Utrum Philosophus convenienter determinet species iracundiae, dicens, quod iracundorum quidam sunt acuti, quidam amari, & quidam difficiles.*

1. 2. quæst. xlv. art. 2. & IV. Eth. lect. 13.

**A**D quintum sic proceditur. Videtur quod inconvenienter determinentur species iracundiae a Philosopho in IV. Ethicor. (cap. v.) ubi dicit, quod *iracundorum quidam sunt acuti, quidam amari, quidam difficiles, five graves*. Quia secundum ipsum *amari* dicuntur quorum *ira difficile solvitur, & multo tempore manet*. Sed hoc videtur pertinere ad circumstantiam temporis. Ergo videtur quod etiam secundum alias circumstantias possunt accipi aliae species iræ.

2. Præterea. *Difficiles, five graves* dicit (ibid.) esse quorum *ira non commutatur sine cruciatu, vel punitione*. Sed hoc etiam pertinet ad insolubilitatem iræ. Ergo videtur quod idem sint *difficiles, & amari*.

3. Præterea. Dominus Matth. v. ponit tres gradus iræ, cum dicit, *qui irascitur fratri suo, & qui dixerit fratri suo, Racha, & qui dixerit fratri suo, Fatue*: qui quidem gradus ad prædictas species non referuntur. Ergo videtur quod prædicta divisio iræ non sit conveniens.

Sed contra est quod Gregorius Nyssenus (vel Nemes. Lib. de nat. hom. cap. xxi.) dicit, quod tres sunt irascibilitatis species; scilicet *ira*, quæ vocatur *fellea*, & *mania*, quæ vocatur *insania*, & *furor*. Quæ tria videntur esse eadem tribus præmissis. Nam *iram felleam* dicit esse quæ principium, & motum habet, quod Philosophus (loc. sup. cit.) attribuit acutis; *maniam* vero dicit esse iram quæ permanet, & in vetustatem devenit, quod Philosophus attribuit amaris; *furorem* autem dicit esse iram quæ observat tempus in supplicium, quod Philosophus attribuit difficultibus. Et eandem etiam divisionem ponit Damascenus in II. Lib. (orth. Fid. cap. xvi.) Ergo prædicta distinctio Philosophi non est inconvenientis.

Respondeo dicendum, quod prædicta distinctio potest referri vel ad passionem iræ, vel etiam ad ipsum peccatum iræ. Quomodo autem reiteratur ad passionem iræ, supra habitum est (1. 2. quæst. xlv. art. 8.) cum de passione iræ age-

retur. Et sic præcipue videtur poni a Gregorio Nysseno, & Damasceno. Nunc autem oportet accipere distinctionem harum specierum, secundum quod pertinent ad peccatum iræ, prout ponitur a Philosopho.

Potest autem inordinatio iræ ex duobus attendi. Primo quidem ex ipsa iræ origine: & hoc pertinet ad acutos, qui nimis cito irascuntur, & ex qualibet levi causa.

Alio modo ex ipsa iræ duratione, eo scilicet quod ira nimis perseverat: quod quidem potest esse dupliciter. Uno modo quia causa iræ, scilicet iniuria illata, nimis manet in memoria hominis: unde ex hoc homo diutius tristitiam concipit; & ideo sunt sibi ipsi *graves, & amari*. Alio modo contingit ex parte ipsius vindictæ, quam aliquis obstinato appetitu querit: & hoc pertinet ad *difficiles, five graves*, qui non dimittunt iram, quousque puniantur.

Ad primum ergo dicendum, quod in speciebus prædictis non principaliter consideratur tempus, sed facilitas hominis ad iram, vel firmitas in ira.

Ad secundum dicendum, quod utriusque, scilicet *amari, & difficiles*, habent iram diuturnam, sed propter aliam causam. Nam *amari* habent iram permanentem propter permanentiam tristitiæ, quam inter viscera tenent clausam: & quia non prorumpunt ad exteriora iracundiae signa, non possunt persuaderi ab aliis, nec ex seipsis recedunt ab ira, nisi prout diuturnitate temporis aboletur tristitia, & sic deficit ira. Sed in *difficilibus* est ira diuturna propter vehementem desiderium vindictæ: & ideo tempore non digeritur, sed per solam punitionem quiescit.

Ad tertium dicendum, quod gradus iræ quos Dominus ponit, non pertinent ad diversas iræ species, sed accipiuntur secundum processum humani actus. In quibus primo aliquid in corde concipitur; & quantum ad hoc dicit: *Qui irascitur fratri suo*. Secundum autem est, cum per aliqua signa exteriora manifestatur exterius, etiam antequam prorumpat in effectum; & quantum ad hoc dicit: *Qui dixerit fratri suo Racha*, quod est interiectio irascens. Tertius gradus est, quando peccatum interior conceptum ad effectum perducitur. Est autem effectus iræ nocumentum alterius sub ratione vindictæ: minimum autem nocumentorum est quod fit solo verbo: & id.

& ideo quantum ad hoc dicit: *Qui dixerit fratri suo, Falue*. Et sic patet quod secundum addit supra primum, & tertium supra utrumque. Unde si primum est peccatum mortale in casu in quo Dominus loquitur, sicut dictum est (art. 3. hu. quæst. ad 2.) multo magis alia. Et ideo singulis eorum ponuntur correspondentia aliqua pertinentia ad condemnationem. Sed in primo ponitur iudicium, quod minus est: quia, ut Augustinus dicit (Lib. 1. de serm. Dom. in monte cap. ix. a med.) *in iudicio adhuc defensionis locus datur*; in secundo vero ponit (a) consilium; in quo iudices inter se conferunt, quo supplicio damnari oporteat: in tertio ponit gehennam ignis, quæ est certa damnatio.

# ARTICULUS VI. 771

*Utrum ira debeat poni inter vitia capitalia.*

*Sup. quæst. xxxiv. art. 5. & mal. quæst. xviii. art. 2. cor. & ad 21. & 22. & quæst. xii. art. 5.*

**A**D sextum sic proceditur. Videtur quod ira non debeat poni inter vitia capitalia. Ira enim ex tristitia nascitur. Sed tristitia est vitium capitale, quod dicitur acedia. Ergo ira non debet poni vitium capitale.

2. Præterea. Odium est gravius peccatum quam ira. Ergo magis debet poni vitium capitale quam ira.

3. Præterea. Super illud Proverb. xxix. *Vir iracundus provocat rixas*, dicit Glossa (ord.) „lanua est omnium vitiorum“, iracundia: qua clausa, virtutibus in„trinfecus dabitur quies; aperta autem, ad omne facinus armabitur animus.“ Nullum autem vitium capitale est principium omnium peccatorum, sed quorundam determinate. Ergo ira non debet poni inter vitia capitalia.

Sed contra est quod Gregorius XXXI. Moral. (cap. xvii. a med.) ponit iram inter vitia capitalia.

Respondeo dicendum, quod, sicut ex præmissis patet (1. 2. quæst. lxxxiv. art. 3. & 4.) vitium capitale dicitur ex quo multa vitia oriuntur. Habet autem hoc ira quod ex ea multa vitia oriri possunt duplici ratione. Primo ex parte sui obiecti, quod multum habet de ratione appetibilis, inquantum scilicet vindicta appetitur sub ratione iusti, vel honesti,

quod sua dignitate allicit, ut supra habitum est (art. 4. hu. quæst.) Alio modo ex suo impetu, quo mentem præcipitat ad inordinata quæcumque agenda. Unde manifestum est quod ira est vitium capitale.

Ad primum ergo dicendum, quod illa tristitia ex qua oritur ira, ut plurimum non est acedia vitium, sed passio tristitiæ, quæ consequitur ex iniuria illata.

Ad secundum dicendum, quod, sicut ex supradictis patet (1. 2. quæst. lxxxiv. art. 3. & 4.) ad rationem vitii capitalis pertinet quod habeat finem multum appetibilem, ut sic propter appetitum eius multa peccata committantur. Ira autem, quæ appetit malum sub ratione boni, habet finem magis appetibilem quam odium, quod appetit malum sub ratione mali: & ideo magis est vitium capitale ira quam odium.

Ad tertium dicendum, quod ira dicitur esse ianua vitiorum per accensum, scilicet removendo prohibens, id est impediendo iudicium rationis, per quod homo retrahitur a malis; directe autem, & per se est causa aliquorum specialium peccatorum, quæ dicuntur filiae eius.

# ARTICULUS VII. 772

*Utrum convenienter assignentur sex filiae iræ, scilicet rixa, tumor mentis, contumelia, & clamor, indignatio, & blasphemia.*

*Sup. quæst. xxxvii. art. 2. ad 1. & quæst. xli. art. 2. & mal. quæst. xii. art. 5. cor.*

**A**D septimum sic proceditur. Videtur quod inconvenienter assignentur sex filiae iræ; quæ sunt rixa, tumor mentis, contumelia, clamor, indignatio, blasphemia. Blasphemia enim ponitur ab hūdoro filia superbiæ (Lib. comment. in Deut. cap. xvi.) Non ergo debet poni filia iræ.

2. Præterea. Odium nascitur ex ira, ut Augustinus dicit in Regula (epist. cxi. al. cix. aliquant. ante fi.) Ergo debet numerari inter filias iræ.

3. Præterea. Tumor mentis videtur idem esse quod superbia. Superbia autem non est filia alicuius vitii, sed mater omnium vitiorum, ut Gregorius dicit XXXI. Moral. (cap. xvii. a med.) Ergo

(a) Ita mss. & editi, quasi videmus, amos libri. An, concilium? ut Matth. v.

go tumor mentis non debet numerari inter filias iræ.

Sed contra est quod Gregorius XXXI. Moral. (ibid.) assignat has filias iræ.

Respondeo dicendum, quod ira potest tripliciter considerari. Uno modo secundum quod est in corde; & sic ex ira nascuntur duo vitia. Unum quidem ex parte eius contra quem homo irascitur, quem reputat indignum ut sibi tale quid fecerit: & sic ponitur *indignatio*. Aliud autem vitium est ex parte sui ipsius, in quantum scilicet excogitat diversas vias vindictæ, & talibus cogitationibus animum suum replet, secundum illud Iob xv. 2. *Numquid sapiens . . . implebit ardore stomachum suum?* Et sic ponitur *tumor mentis*.

Alio modo consideratur ira, secundum quod est in ore; & sic ex ira duplex inordinatio procedit. Una quidem secundum hoc quod homo in modo loquendi iram suam demonstrat, sicut dictum est (art. 5. huius quæst. ad 3.) de eo qui dicit fratri suo, *Racha*: & sic ponitur *clamor*, per quem intelligitur inordinata, & confusa locutio. Alia etiam est inordinatio, secundum quod aliquis prorumpit in verba iniuriola: quæ quidem si sint contra Deum, erit *blasphemia*; si autem contra proximum, *contumelia*.

Tertio modo consideratur ira, secundum quod procedit usque ad factum; & sic ex ira oriuntur *vixæ*, per quas intelliguntur omnia nocumenta quæ facto proximis inferuntur ex ira.

Ad primum ergo dicendum, quod blasphemia in quam aliquis prorumpit deliberata mente, procedit ex superbia hominis contra Deum se erigentis: quia, ut dicitur Eccli. x. 34, *initium superbiæ hominis apostatare a Deo*; id est, recedere a veneratione eius, est prima superbiæ pars: & ex hoc oritur blasphemia. Sed blasphemia in quam aliquis prorumpit ex commotione animi, procedit ex ira.

Ad secundum dicendum, quod odium est aliquando nascitur ex ira, tamen habet aliquam priorem causam, ex qua directius oritur, scilicet tristitiam; sicut e contrario amor nascitur ex delectatione. Ex tristitia autem illata quandoque in iram, quandoque in odium aliquis movetur. Unde convenientius fuit quod odium poneretur oriri ex aecidia quam ex ira.

Ad tertium dicendum, quod tumor mentis non accipitur hic pro superbia,

sed pro quodam conatu, sive audacia hominis intentantis vindictam: audacia autem est vitium fortitudini oppositum.

## ARTICULUS VIII. 773

*Utrum sit aliquod vitium oppositum iracundia proveniens ex defectu iræ.*

**A**D octavum sic proceditur. Videtur quod non sit aliquod vitium oppositum iracundia, proveniens ex defectu iræ. Nihil enim est vitiosum per quod homo Deo assimilatur. Sed per hoc quod homo omnino est sine ira, assimilatur Deo, qui cum tranquillitate iudicat. (Sap. xii. 18.) Ergo non videtur quod sit vitiosum omnino ira carere.

2. Præterea. Defectus eius quod ad nihil est utile, non est vitiosus. Sed motus iræ ad nihil est utilis, ut probat Seneca in Lib. quem fecit de ira (scilicet Lib. I. cap. xii.) Ergo videtur quod defectus iræ non sit vitiosus.

3. Præterea. *Malum hominis*, secundum Dionysium (cap. iv. de div. Nom. part. iv. lect. 22.) est præter rationem esse. Sed subtrahendo omni motu iræ, adhuc remanet integrum iudicium rationis. Ergo nullus defectus iræ vitium causat.

Sed contra est quod Chrysostomus (alius Auctor) dicit super Matth. (hom. xi. in op. imperf. inter princ. & med.) *Qui cum causa non irascitur, peccat. Patientia enim irrationabilis vitia seminat, negligentiam nutrit, et non solum malos, sed etiam bonos invitat ad malum.*

Respondeo dicendum, quod ira dupliciter potest intelligi. Uno modo ut est simplex motus voluntatis, quo aliquis non ex passione, sed ex iudicio rationis poenam intelligit: & sic defectus iræ absque dubio est peccatum. Et hoc modo ira accipitur in verbis Chrysostomi, qui dicit ibidem: *Iracundia quæ cum causa est, non est iracundia, sed iudicium. Iracundia enim proprie intelligitur commotio passionis.* Qui autem cum causa irascitur, ira illius non est ex passione: ideo iudicare dicitur, non irasci.

Alio modo accipitur ira pro motu appetitus sensitivi, qui est cum passione, & transmutatione corporali. Et hic quidem motus ex necessitate consequitur in homine ad simplicem motum voluntatis: quia naturaliter appetitus inferior sequitur motum appetitus superioris, nisi aliquid repugnet. Et ideo non potest totaliter

liter deficere motus iræ in appetitu sensitivo, nisi per subtractionem, vel debilitatem voluntarii motus. Et ideo ex consequenti etiam defectus passionis iræ vitiosus est, sicut & defectus voluntarii motus ad puniendum secundum iudicium rationis.

Ad primum ergo dicendum, quod ille qui totaliter non irascitur, cum debet irasci, imitatur quidem Deum quantum ad carentiam passionis, non autem quantum ad hoc quod Deus ex iudicio punit.

Ad secundum dicendum, quod passio iræ utilis est, sicut & omnes alii motus appetitus sensitivi, ad hoc quod homo promptius exequatur id quod ratio dicit: alioquin frustra esset in homine appetitus sensitivus, cum tamen natura nihil faciat frustra.

Ad tertium dicendum, quod in eo qui ordinate agit, iudicium rationis non solum est causa simplicis motus voluntatis, sed etiam passionis appetitus sensitivi, ut dictum est (in cor. art.) Et ideo sicut remotio effectus est signum remotio- nis causæ, ita etiam remotio iræ est signum remotiois iudicii rationis.

## QUAEST. CLIX.

### De crudelitate,

#### in duos articulos divisa.

**D**einde considerandum est de crudelitate: & circa hoc quaeruntur duo. Primo, utrum crudelitas opponatur clementiae.

Secundo de comparatione eius ad severitatem, vel feritatem.

## ARTICULUS I. 774

### Utrum crudelitas opponatur clementiae.

#### Inf. art. 2. ad 1.

**A**D primum sic proceditur. Videtur quod crudelitas non opponatur clementiae. Dicit enim Seneca in II. de clementia (cap. iv.) quod illi vocantur *crudeles*, qui excedunt modum in puniendo: quod contrariatur iustitiae. Clementia autem non ponitur pars iustitiae, sed temperantia. Ergo crudelitas non videtur opponi clementiae.

2. Praeterea. Hierem. vi. 23. dicitur: *Crudelis est, & non miserebitur*: & sic videtur quod crudelitas opponatur misericordiae. Sed misericordia non est idem clementiae, ut supra dictum est.

S. Th. Oper. Tem. XXIII.

(quaest. clvii. art. 4. ad 3.) Ergo crudelitas non opponitur clementiae.

3. Praeterea. Clementia consideratur circa inflictionem poenarum, ut dictum est (quaest. clvii. art. 1.) Sed crudelitas consideratur in subtractione beneficiorum, secundum illud Proverb. xi. 17. *Qui autem crudelis est, etiam propinquos abiciit*. Ergo crudelitas non opponitur clementiae.

Sed contra est quod dicit Seneca in II. de clementia (cap. iv. in princ.) quod *opponitur clementiae crudelitas, quae nihil aliud est quam atrocitas animi in exigendis poenis*.

Respondeo dicendum, quod nomen crudelitatis a cruditate sumptum esse videtur. Sicut autem ea quae sunt cocta, & digesta, solent habere suavem, & dulcem saporem; ita illa quae sunt cruda, habent horribilem, & asperum saporem. Dictum est autem supra (quaest. clvii. art. 3. ad 1. & art. 4. ad 3.) quod clementia importat quandam animi lenitatem, sive dulcedinem, per quam aliquis est diminutivus poenarum. Unde directe crudelitas clementiae opponitur.

Ad primum ergo dicendum, quod sic diminutio poenarum quae est secundum rationem, pertinet ad epicheiam; sed imple dulcedo affectus, ex qua homo ad hoc inclinatur, pertinet ad clementiam; ita etiam superexcessus poenarum, quantum ad id quod exterius agitur, pertinet ad iniustitiam; sed quantum ad austeritatem animi, per quam aliquis est promptus ad poenas augendas, pertinet ad crudelitatem.

Ad secundum dicendum, quod misericordia, & clementia conveniunt in hoc quod utraque refugit, & abhorret miseriam alienam; aliter tamen, & aliter: nam ad misericordiam pertinet miseriam subvenire per beneficii collationem; ad clementiam autem pertinet miseriam diminueri per subtractionem poenarum: & quia crudelitas superabundantiam in exigendis poenis importat, directius opponitur clementiae quam misericordiae; tamen propter similitudinem harum virtutum accipitur quandoque crudelitas pro immisericordia.

Ad tertium dicendum, quod crudelitas ibi accipitur pro immisericordia, ad quam pertinet beneficium non largiri.

Quamvis etiam dici possit, quod ipsa beneficii subtractio quaedam poena est.

## ARTICULUS II. 775

*Utrum crudelitas a saevitia, sive feritate differat.*

*Sup. quest. cclvii. art. 1. ad 3.*

**A**D secundum sic proceditur. Videtur quod crudelitas a saevitia, sive feritate non differat. Uni enim virtuti ex una parte unum vitium videtur esse oppositum. Sed clementiae per superabundantiam opponitur & saevitia, & crudelitas. Ergo videtur quod saevitia, & crudelitas sint idem.

2. Præterea. Iudorus dicit in Lib. X. Etymolog. (ad lit. J.) quod *severus dicitur quasi saevus & verus, quia sine pietate tenet iustitiam*: & sic saevitia videtur excludere remissionem poenarum in iudiciis; quod pertinet ad pietatem. Hoc autem dictum est (art. præc. ad 1.) ad crudelitatem pertinere. Ergo crudelitas est idem quod saevitia.

3. Præterea. Sicut virtuti opponitur aliquod vitium in excessu, ita etiam in defectu; quod quidem contrariatur & virtuti quæ est in medio, & vitio quod est in excessu. Sed idem vitium ad defectum pertinet opponitur & crudelitati, & saevitiæ, videlicet remissio, vel dissolutio: dicit enim Gregorius XX. Moral. (cap. viii. ante med.) *Sit amor, sed non emolliens; sit rigor, sed non exasperans; sit zelus, sed non immoderate saeviens; sit pietas, sed non plus quam expedit parcens*. Ergo saevitia est idem crudelitati.

Sed contra est quod Seneca dicit in II. de clementia (cap. iv. cir. med.) quod *ille qui non est lesus, nec peccatori irascitur, non dicitur crudelis, sed ferus, sive saevus*.

Respondeo dicendum, quod nomen saevitiæ, & feritatis a similitudine ferarum accipitur, quæ etiam dicuntur saevæ. Huiusmodi enim animalia nocent hominibus, ut ex eorum corporibus pascantur, non ex aliqua iustitiæ causa, cuius consideratio pertinet ad solam rationem. Et ideo, proprie loquendo, feritas, vel saevitia dicitur, secundum quam aliquis in poenis inferendis non considerat aliquam culpam eius qui punitur, sed solum hoc quod delectatur in hominum cruciatur. Et sic patet quod continetur sub bestialitate: nam talis delectatio non

est humana, sed bestialis, proveniens vel ex mala consuetudine, vel ex corruptione naturæ, sicut & aliæ huiusmodi bestiales affectiones.

Sed crudelitas non solum attendit culpam in eo qui punitur, sed excedit modum in puniendo: & ideo crudelitas differt a saevitia, sive feritate, sicut malitia humana differt a bestialitate, ut dicitur in VII. Ethic. (cap. v.)

Ad primum ergo dicendum, quod clementia est virtus humana: unde directe ipsi opponitur crudelitas, quæ est malitia humana. Sed saevitia, vel feritas continetur sub bestialitate: unde non directe opponitur clementiæ, sed superexcellenti virtuti, quam Philosophus (Lib. VII. Ethic. cir. princ.) vocat heroicam, vel divinam, quæ secundum nos videtur pertinere ad dona Spiritus sancti. Unde potest dici, quod saevitia directe opponitur dono pietatis.

Ad secundum dicendum, quod severus non dicitur simpliciter saevus, quia hoc sonat in vitium; sed dicitur saevus circa (a) veritatem propter aliquam similitudinem saevitiæ, quæ non est diminutiva poenarum.

Ad tertium dicendum, quod remissio in puniendo non est vitium, nisi inquantum prætermittitur iordo iustitiæ, quo aliquis deberet puniri propter culpam, quam excedit crudelitas. Saevitia autem penitus hunc ordinem non attendit. Unde remissio punitionis directe opponitur crudelitati, non autem saevitiæ.

## QUAESTIO CLX.

*De modestia,  
in duos articulos divisa.*

**D**Einde considerandum est de modestia: & primo de ipsa in communi; secundo de singulis quæ sub ea continentur.

Circa primum quaeruntur duo.

Primo, utrum modestia sit pars temperantiae.

Secundo, quæ sit materia modestiæ.

(a) id. severitatem.

## ARTICULUS I. 776

*Utrum modestia sit pars temperantiae.*

*Sup. quaest. cxliii. & II. dist. xlv. quaest. 111. art. 1. ad 3. & III. dist. xxxiii. quaest. 111. art. 2. quaest. 2. co. & ad 3. & ad Tit. 3.*

**A**D primum sic proceditur. Videtur quod modestia non sit pars temperantiae. Modestia enim a modo dicitur. Sed in omnibus virtutibus requiritur modus: nam virtus ordinatur ad bonum: bonum autem, ut Augustinus dicit in Lib. de natura boni (cap. 111.) consistit in modo, specie, & ordine. Ergo modestia est generalis virtus. Non ergo debet poni pars temperantiae.

2. Præterea. Laus temperantiae videtur consistere præcipue in quadam moderatione. Ex hac autem sumitur nomen modestiae. Ergo modestia est idem quod temperantia, & non pars eius.

3. Præterea. Modestia videtur consistere circa proximorum correctionem, secundum illud II. ad Timoth. 11. 24. *Servum Dei non oportet litigare, sed mansuetum esse ad omnes, cum modestia corripientem eos qui resistunt veritati.* Sed correctio delinquentium est actus iustitiae, vel caritatis, ut supra habitum est (quaest. xxxiii. art. 1. & 2.) Ergo videtur quod modestia magis sit pars iustitiae quam temperantiae.

Sed contra est quod Tullius (Lib. II. de invent. aliquant. ante fi.) ponit modestiam partem temperantiae.

Respondeo dicendum, quod, sicut supra dictum est (quaest. cxli. art. 4. & quaest. clvii. art. 3.) temperantia moderationem adhibet circa ea in quibus difficillimum est moderari, scilicet circa concupiscentias delectationum tactus. Ubicumque autem est aliqua virtus specialiter circa aliquod maximum, oportet esse aliam virtutem circa ea quae mediocriter se habent, eo quod oportet quantum ad omnia vitam hominis secundum virtutes esse regularam, sicut supra dictum est (quaest. cxxxiv. art. 3. ad 1.) quod magnificentia est circa magnos sumptus pecuniarum; præter quam est necessaria liberalitas, quae sit circa mediocres sumptus. Unde necessarium est quod sit quaedam virtus moderativa in aliis mediocribus, in quibus non est ita difficile moderari; & hæc virtus vocatur

modestia, & adiungitur temperantiae tamquam principali.

Ad primum ergo dicendum, quod nomen commune quandoque appropriatur his quæ sunt infima, sicut nomen commune Angelorum appropriatur infimo ordini Angelorum: ita etiam & modus, qui communiter observatur in qualibet virtute, appropriatur specialiter virtuti quæ in minimis modum ponit.

Ad secundum dicendum, quod aliqua indigent temperatione propter suam vehementiam; sicut forte vinum temperatur; sed moderatio requiritur in omnibus: & ideo temperantia magis se habet ad passiones vehementes, modestia vero ad mediocres.

Ad tertium dicendum, quod modestia accipitur ibi modo communiter sumpto, prout requiritur in omnibus virtutibus.

## ARTICULUS II. 777

*Utrum modestia sit solum circa exteriores actiones.*

*Inf. quaest. clxviii. art. 1. & III. dist. xxxiii. quaest. 111. art. 2. quaest. 1. ad 3.*

**A**D secundum sic proceditur. Videtur quod modestia sit solum circa exteriores actiones. Interiores enim motus passionum aliis noti esse non possunt. Sed Apostolus ad Philip. xv. 5. mandat ut *modestia nostra nota sit omnibus hominibus.* Ergo modestia est solum circa exteriores actiones.

2. Præterea. Virtutes quæ sunt circa passiones, distinguuntur a virtute iustitiae, quæ est circa operationes. Sed modestia videtur esse una virtus. Si ergo est circa operationes exteriores, non erit circa aliquas interiores passiones.

3. Præterea. Nulla virtus una & eadem est circa ea quæ pertinent ad appetitum, quod est proprium virtutum moralium, & circa ea quæ pertinent ad cognitionem, quæ est proprie virtutum intellectualium, neque etiam circa ea quæ pertinent ad irascibilem, & concupiscibilem. Si ergo modestia est una virtus, non potest esse circa omnia prædicta.

Sed contra. In omnibus prædictis oportet observare modum, a quo modestia dicitur. Ergo circa omnia prædicta est modestia.

Respondeo dicendum, quod, sicut dictum est (art. præc.) modestia differt a



temperantia in hoc quod temperantia est moderativa eorum quæ difficillimum est refrenare, modestia autem est moderativa eorum quæ in hoc mediocriter se habent. Diversimode autem aliqui de modestia videntur esse locuti. Ubicumque enim consideraverunt aliquam specialem rationem boni, vel difficultatis in moderando, illud subtraxerunt modestiæ, relinquentes modestiam circa minora. Manifestum est autem omnibus quod refrenatio delectationum tactus specialem quamdam difficultatem habet. Unde omnes temperantiam a modestia distinxerunt.

Sed præter hoc Tullius (Lib. II. de invent. aliquant. ante fi.) consideravit, quoddam speciale bonum esse in moderatione pœnarum: & ideo etiam clementiam subtraxit modestiæ, ponens modestiam circa omnia quæ relinquuntur moderanda. Quæ quidem videtur esse quatuor. Quorum unum est motus animi ad aliquam excellentiam, quam moderatur *humilitas*. Secundum autem est desiderium eorum quæ pertinent ad cognitionem; & hoc moderatur *studiositas*, quæ opponitur curiositati. Tertium autem quod pertinet ad corporales motus, & actiones; ut scilicet decenter, & honeste fiant tam in his quæ serio, quam in his quæ ludo aguntur. Quartum autem est quod pertinet ad exteriorem apparatus, puta in vestibus, & in aliis huiusmodi.

Sed circa quedam eorum alii posuerunt quasdam speciales virtutes; sicut Andronicus mansuetudinem, simplicitatem, humilitatem, & alia huiusmodi, de quibus supra dictum est (quæst. cxlii.) Aristoteles autem (Lib. IV. Ethic. cap. viii.) circa delectationem ludorum posuit *eutrapeliam*: quæ omnia continentur sub modestia, secundum quod a Tullio accipitur.

Et hoc modo modestia se habet non solum circa exteriores actiones, sed etiam circa interiores.

Ad primum ergo dicendum, quod Apostolus loquitur de modestia, prout est circa exteriora; & tamen etiam interiorum moderatio manifestari potest per quædam exteriora signa.

Ad secundum dicendum, quod sub modestia continentur diversæ virtutes, quæ a diversis assignantur. Unde nihil prohibet modestiam esse circa ea quæ requirunt diversas virtutes. Et tamen non est tanta diversitas inter partes modestiæ ad

invicem, quanta est iustitiæ, quæ est circa operationes, ad temperantiam, quæ est circa passionem: quia in actionibus, & passionibus in quibus non est aliqua excellens difficultas ex parte materiæ, sed solum ex parte moderationis, non attenditur virtus, nisi una, scilicet secundum rationem moderationis.

Et per hoc patet etiam responsio ad tertium.

## QUAESTIO CLXI.

*De speciebus modestiæ, & primo de humilitate, in sex articulos divisa.*

Postea considerandum est de speciebus modestiæ: & primo de humilitate, & superbia, quæ ei opponitur; secundo de studiositate, & curiositate ipsi opposita; tertio de modestia, secundum quod est in verbis, vel in factis; quarto de modestia, secundum quod est circa exteriorum cultum.

Circa humilitatem quaeruntur sex.

Primo, utrum humilitas sit virtus.

Secundo, utrum consistat in appetitu, vel in iudicio rationis.

Tertio, utrum aliquis per humilitatem se debeat omnibus subscicere.

Quarto, utrum fit pars modestiæ, vel temperantiæ.

Quinto de comparatione eius ad alias virtutes.

Sexto de gradibus humilitatis.

## ARTICULUS I. 778

*Utrum humilitas sit virtus.*

*Sup. clx. art. 2. & in præsentii quæst. art. 2. & 4. cor.*

Ad primum sic proceditur. Videtur quod humilitas non sit virtus. Virtus enim importat rationem boni. Sed humilitas videtur importare rationem mali pœnalis, secundum illud Plal. civ. 16. *Humiliaverunt in compedibus pedes eius.* Ergo humilitas non est virtus.

2. Præterea. Virtus, & vitium opponuntur. Sed humilitas quandoque sonat in vitium: dicitur enim Eccl. xix. 23. *Est qui nequiter se humiliat.* Ergo humilitas non est virtus.

3. Præterea. Nulla virtus opponitur alii virtuti. Sed humilitas videtur opponi virtuti magnanimitatis, quæ tendit

in magna, humilitas autem ipsa refugit. Ergo videtur quod humilitas non sit virtus.

4. Præterea. *Virtus est dispositio perfecta*, ut dicitur in VII. Phys. (tex. 17. & 18.) Sed humilitas videtur esse imperfectiorum: unde & Deo non convenit humiliari, quia nulli subiici potest. Ergo videtur quod humilitas non sit virtus.

5. Præterea. Omnis virtus moralis est circa actiones, & passionēs, ut dicitur in II. Ethic. (cap. III.) Sed humilitas non connumeratur a Philosopho inter virtutes quæ sunt circa passionēs; nec etiam continetur sub iustitia, quæ est circa actiones. Ergo videtur quod non sit virtus.

Sed contra est quod Origenes dicit, exponens illud Luc. 1. *Respexit humilitatem ancille sue*: (hom. VIII. in Luc. a med.) „Proprie in Scripturis una de virtutibus humilitas prædicatur: ait quippe Salvator: Discite a me, quia mitis sum, & humilis corde.“

Respondeo dicendum, quod, sicut supra dictum est (1. 2. quæst. XXIII. art. 2.) cum de passionibus ageretur, bonum arduum habet aliquid unde attrahit appetitum, scilicet ipsam rationem boni; & habet aliquid retrahens, scilicet ipsam difficultatem adipiscendi; secundum quorum primum insurgit motus spei, & secundum aliud motus desperationis. Dictum est autem supra (1. 2. quæst. IX. art. 4.) quod circa motus appetitivos qui se habent per modum impulsionis, oportet esse virtutem moralem moderantem, & refrenantem; circa illos autem qui se habent per modum retractionis, & resiliitionis, ex parte appetitus, oportet esse virtutem moralem firmantem, & impellentem. Et ideo circa appetitum boni ardui necessaria est duplex virtus. Una quidem quæ temperet, & refrenet animum, ne immoderate tendat in excelsa; & hoc pertinet ad virtutem humilitatis. Alia vero quæ firmet animum contra desperationem, & impellat ipsum ad perfectionem magnorum secundum rationem rectam: & hæc est magnanimitas. Et sic patet quod humilitas est quedam virtus.

Ad primum ergo dicendum, quod, sicut Hieronymus dicit in Lib. X. Etymol. (ad lit. H.) *humilis dicitur quasi humi accubans*, id est imis inherens. Quod quidem contingit dupliciter. Uno modo ex principio extrinseco, puta cum aliquis ab

alio deicitur: & sic humilitas est poena. Alio modo a principio intrinseco: & hoc potest fieri quandoque quidem bene, puta cum aliquis considerans suum defectum, tenet se in infimis secundum suum modum, sicut Abraham dixit ad Dominum Gen. XVIII. 27. *Loquar ad Domum meam, cum sim pulvis, & cinis*; & hoc modo humilitas ponitur virtus: quandoque autem potest fieri male, puta cum homo honorem suum non intelligens, comparat se iumentis insipientibus, & similis fit illis.

Ad secundum dicendum, quod, sicut dictum est (in sol. præc.) humilitas, secundum quod est virtus, in sui ratione importat quandam laudabilem defectum in ima. Hoc autem quandoque fit solum secundum signa exteriora secundum fictionem: unde hæc est falsa humilitas, de qua Augustinus dicit in quadam epist. (implic. epist. cxlxx. al. lxx. quæst. VII. vers. fi.) quod est magna superbia, quia scilicet videtur tendere ad excellentiam gloriæ. Quandoque autem fit secundum interiorum motum animæ: & secundum hoc humilitas proprie ponitur virtus: quia virtus non consistit in exterioribus, sed principaliter in interiori electione mentis, ut patet per Philosophum in Lib. II. Ethic. (cap. v. a med.)

Ad tertium dicendum, quod humilitas reprimit appetitum ne tendat in magna præter rationem rectam; magnanimitas autem animum ad magna impellit secundum rationem rectam. Unde patet quod magnanimitas non opponitur humilitati; sed conveniunt in hoc quod utraque est secundum rationem rectam.

Ad quartum dicendum, quod perfectum dicitur aliquid dupliciter. Uno modo simpliciter, in quo scilicet nullus defectus invenitur nec secundum suam naturam, nec per respectum ad aliquid aliud: & sic solus Deus est perfectus, cui secundum naturam divinam non competit humilitas, sed solum secundum naturam assumptam. Alio modo potest dici aliquid perfectum secundum quid, puta secundum suam naturam, aut statum, aut tempus: & hoc modo homo virtuosus est perfectus; cuius tamen perfectio in comparatione ad Deum deficiens invenitur, secundum illud Isa. xl. 17. *Omnes gentes, quasi non sint, sic sunt coram eo*: & sic cuilibet homini potest convenire humilitas.

Ad quintum dicendum, quod Philosophus intendebat agere de virtutibus, ten-

cundum quod ordinantur ad vitam civilem, in qua subiectio unius hominis ad alterum secundum legis ordinem determinatur: & ideo continetur sub iustitia legali. Humilitas autem, secundum quod est specialis virtus, praecipue respicit subiectionem hominis ad Deum, propter quam etiam aliis humiliando se subiicit.

## ARTICULUS II. 779

*Utrum humilitas consistat circa appetitum.*

*Inf. art. 6. cor. & quaest. clxv.  
art. 3. ad 2.*

**A**D secundum sic proceditur. Videtur quod humilitas non consistat circa appetitum, sed magis circa iudicium rationis. Humilitas enim superbiae opponitur. Sed superbia maxime consistit in his quae pertinent ad cognitionem: dicit enim Gregorius XXXIV. Moral. (cap. xviii. cir. princ.) *quod superbia, cum exterior usque ad corpus extenditur, prius per oculos (a) indicatur: unde & in Plal. cxxx. i. dicitur: Domine, non est exaltatum cor meum, neque elati sunt oculi mei: oculi autem maxime deserviunt cognitioni. Ergo videtur quod humilitas maxime sit circa cognitionem, per quam de se aliquis aestimat parva.*

2. Praeterea. Augustinus dicit in Lib. de virginis. (cap. xxxi. in med.) *quod humilitas pene tota disciplina christiana est.* Nihil ergo quod in disciplina christiana continetur, repugnat humilitati. Sed in disciplina christiana admonemur ad appetendum meliora, secundum illud I. ad Cor. xii. 31. *Aemulamini charismata meliora.* Ergo ad humilitatem non pertinet reprimere appetitum arduorum, sed magis aestimationem.

3. Praeterea. Ad eandem virtutem pertinet refrenare superfluum motum, & firmare animum contra superfluum retractionem; sicut eadem fortitudo est quae refrenat audaciam, & quae firmat animum contra timorem. Sed magnanimitas firmat animum contra difficultates quae accidunt in prosecutione magnorum. Si ergo humilitas refrenaret appetitum magnorum, sequeretur quod humilitas non esset virtus distincta a magnanimitate: quod paret esse falsum. Non ergo humilitas consistit circa appetitum

magnorum, sed magis circa aestimationem.

4. Praeterea. Andronicus ponit humilitatem circa exteriorem cultum: dicit enim, quod humilitas est *habitus non superabundans sumptibus, & preparationibus.* Ergo non est circa motum appetitus.

Sed contra est quod Augustinus dicit in libro de poenitentia, (qui est hom. ult. inter l. cap. i. in med.) *quod humilis est qui eligit abiici in domo Domini magis quam habitare in tabernaculis peccatorum.* Sed electio pertinet ad appetitum. Ergo humilitas consistit circa appetitum magis quam circa aestimationem.

Respondetur dicendum, quod, sicut dictum est (art. praec.) ad humilitatem proprie pertinet ut aliquis reprimat seipsum, ne feratur in ea quae sunt supra se. Ad hoc autem necessarium est ut aliquis cognoscat id in quo deficit a proportionem eius quod suam virtutem excedit. Et ideo cognitio proprii defectus pertinet ad humilitatem, sicut regula quaedam directiva appetitus.

Sed in ipso appetitu consistit humilitas essentialiter. Et ideo dicendum est, quod humilitas proprie est directiva, & moderativa motus appetitus.

Ad primum ergo dicendum, quod extollentia oculorum est quoddam signum superbiae, in quantum excludit reverentiam, & timorem: consueverunt enim timentes, & verecundati maxime oculos deprimere, quasi non audentes se aliis comparare. Non autem ex hoc sequitur quod humilitas essentialiter circa cognitionem consistat.

Ad secundum dicendum, quod tendere in aliqua maiora est proprium virum confidentia, humilitati contrariatur; sed quod aliquis ex confidentia divini auxilii in maiora tendat, hoc non est contra humilitatem; praetertim cum ex hoc aliquis magis (b) apud Deum exaltetur, quod ei se magis per humilitatem subiicit. Unde Augustinus dicit in Lib. de poenitentia (loc. cit. in arg. *Sed contr.*) *Aliud est levare se ad Deum, aliud est levare se contra Deum. Qui ante illum se proicit, ab illo erigitur; qui adversus illum se erigit, ab illo proicitur.*

Ad tertium dicendum, quod in fortitudine invenitur eadem ratio refrenandi audaciam, & firmandi animum contra timorem: utriusque enim ratio est ex hoc quod homo bonum rationis de-

(a) Al. iudicatur. (b) Ita mss. & edidit omnes libri quos vidimus, Theologi legendum credunt ad Deum.

debet periculis mortis præferre. (a) Sed in refrenando præsumptionem spei, quod pertinet ad humilitatem, & in firmando animum contra desperationem, quod pertinet ad magnanimitatem, est alia & alia ratio. Nam ratio firmandi animum contra desperationem est adeptio proprii boni, ne scilicet desperando homo se indignum reddat bono quod sibi compete- bat; sed in reprimendo præsumptionem spei, ratio præcipua sumitur ex reverentia divina, ex qua contingit ut homo non plus sibi attribuat quam sibi competat secundum gradum quem est a Deo sortitus. Unde humilitas præcipue videtur importare subiectionem hominis ad Deum: & propter hoc Augustinus in Lib. I. de ferm. Domini in monte (cap. xv. a princ.) humilitatem, quam intelligit per paupertatem spiritus, attribuit dono timoris, quo homo Deum revere- tur. Et inde est quod fortitudo aliter se habet ad audaciam, quam humilitas ad spem. Nam fortitudo plus utitur au- dacia quam eam reprimat: unde superabundantia est ei similior quam defectus. Humilitas autem plus reprimat (b) spem, vel induciam de seipso quam ea utatur: unde magis opponitur sibi superabundantia quam defectus.

Ad quartum dicendum, quod superabundantia in exterioribus sumptibus, & preparationibus solet ad quamdam instantiam fieri, quæ per humilitatem re- primitur: & quantum ad hoc secunda- rio consistit in exterioribus, prout sunt signa interioris appetitivi motus.

### ARTICULUS III. 780

*Utrum homo debeat se omnibus per humilitatem subicere.*

*Inf. art. 6. ad 1. & Philip. 11.*

**A**D tertium sic proceditur. Videtur quod homo non debeat se omnibus per humilitatem subicere. Quia, sicut dictum est (art. præc. ad 3.) humilitas præcipue consistit in subiectione hominis ad Deum. Sed id quod debetur Deo, non est homini exhibendum, ut patet in omnibus actibus latræ. Ergo homo per humilitatem non debet se homini subicere.

2. Præterea. Augustinus dicit in Lib. de natra, & gratia (cap. xxxiv. ante med.) *Humilitas collocanda est in parte veritatis, non in parte falsitatis.* Sed aliqui sunt in supremo statu, qui si se inferioribus subicerent, absque falsitate hoc fieri non posset. Ergo homo non debet se omnibus per humilitatem subicere.

3. Præterea. Nullus debet facere id quod vergat in detrimentum salutis alterius. Sed si quis per humilitatem se alteri subiciat, quandoque hoc vergeret in detrimentum illius cui se subicit, qui ex hoc superbiat, vel eum contemneret: unde Augustinus dicit in Regula (sc. epist. cxxxi. al. cix. vers. fin.) *Ne dum nimium servatur humilitas, regendi frangatur auctoritas.* Ergo homo per humilitatem non debet omnibus se subicere.

Sed contra est quod dicitur Philip. 11. 3. *In humilitate superiores sibi invicem arbitantes.*

Respondeo dicendum, quod in homine duo possunt considerari, scilicet id quod est Dei, & id quod est hominis. Homini autem est quicquid pertinet ad defectum; sed Dei est quicquid pertinet ad salutem, & perfectionem, secundum illud Oleez xiii. 9. (c) *Perditio tua, Israel, ex te est: ex me tantum auxilium tuum.* Humilitas autem, sicut dictum est (art. 1. hu. quæst. ad 5. & art. 2. ad 3.) proprie respicit reverentiam, qua homo Deo subicitur: & ideo quilibet homo secundum id quod suum est, debet se cuilibet proximo subicere quantum ad id quod est Dei in ipso; non autem hoc requirit humilitas ut aliquis id quod est Dei in seipso, subiciat ei quod apparet esse Dei in altero. Nam illi qui dona Dei participant, cognoscunt ea se habere, secundum illud 1. ad Cor. 11. 12. *Ut sciamus quæ a Deo donata sunt nobis.* Et ideo absque præiudicio humilitatis possunt dona quæ ipsi acceperunt, præferre donis Dei quæ aliis apparent collata; sicut Apostolus ad Ephes. 11. 5. dicit: *Aliis generationibus non est agnitus filius hominum, sicut nunc revelatum est sanctis Apostolis eius.*

Similiter etiam non hoc requirit humilitas ut aliquis id quod est suum in seipso,

Q 4

(a) Ita cum edd. Alcan. aliisque edd. passim. Ed. Rom. & in refrenando præsumptionem spei & cum tum adhibito puncto affirmatoriis. Est alia & alia ratio. (b) Ita cum edd. Tarrac. & Alcan. edd. Patav. an. 1712. *specime*. Mediatas: spem & induciam de seipso quam utatur unde magis opponitur ei abundantia quam defectus. Ed. Rom. Humilitas autem plus reprimat spem de seipso, quam ea utatur unde magis opponitur sibi. (c) *Perdita tua, Israel, tantummodo in me auxilium tuum.*

pfo, subiciat ei quod est hominis in proximo; alioquin oporteret ut quilibet reputaret se magis peccatorem quolibet alio; cum tamen Apostolus absque praeiudicio humilitatis dicat Galat. 15. 15. *Nos natura Iudei, & non ex gentibus peccatores.*

Potest tamen aliquis reputare aliquid boni esse in proximo quod ipse non habet, vel aliquid mali in se esse quod in alio non est, ex quo se potest ei subiacere per humilitatem.

Ad primum ergo dicendum, quod (a) non debemus solum Deum revereri in seipso, sed etiam quod est eius, debemus revereri in quolibet; non tamen eo modo reverentiae quo reveremur Deum. Et ideo per humilitatem debemus nos subiacere omnibus proximis propter Deum, secundum illud I. Pet. 15. 13. *Subiecti estote omni humane creature propter Deum*; latrariam tamen soli Deo debemus exhibere.

Ad secundum dicendum, quod si nos praeferamus id quod est Dei in proximo, ei quod est proprium in nobis, non possumus incurrere falsitatem. Unde super illud Philip. 11. *Superiores sibi invicem arbitantes*, dicit Glossa (ord. Aug. in Lib. lxxxiii. Qq. quest. lxxr. a med.) „Non hoc ita debemus aestimare, ut nos aestimare fingamus; sed vere aestimemus posse esse aliquid occultum in alio, quo nobis superior sit, etiam si bonum nostrum, quo illo videmur superiores esse, non sit occultum.“

Ad tertium dicendum, quod humilitas, sicut & ceterae virtutes, praecipue interius in anima consistit. Et ideo potest homo secundum interiorem actum animae alteri se subiacere, sine hoc quod occasione habeat alicuius quod pertineat ad detrimentum suae salutis. Et hoc est quod Augustinus dicit in Regula (sc. epist. cccxi. al. cix. prope fin.) *Timore coram Deo praelatus subfatus sit pedibus vestris*. Sed in exterioribus humilitatis actibus, sicut & in actibus ceterarum virtutum, est debita moderatio adhibenda, ne possint vergere in detrimentum alterius. Si autem aliquis quod debet faciat, & alii ex hoc occasionem sumant peccati, non imputatur humiliter agenti: quia ille non scandalizatur, quamvis alter scandalizetur.

## ARTICULUS IV. 781

*Utrum humilitas sit pars modestiae, vel temperantiae.*

*Sup. quest. clx. art. 2. corp. & III. dist. xxxiiii. quest. 111. art. 2. quest. 3. corp.*

**A**D quartum sic proceditur. Videtur quod humilitas non sit pars modestiae, vel temperantiae. Humilitas enim praecipue respicit reverentiam, qua quis subiicitur Deo, ut dictum est (art. praec.) Sed ad virtutem theologicam pertinet quod habeat Deum pro obiecto. Ergo humilitas magis debet poni virtus theologica quam pars temperantiae, seu modestiae.

2. Praeterea. Temperantia est in concupiscibili; humilitas autem videtur esse in irascibili, sicut & superbia, quae ei opponitur, cuius obiectum est arduum. Ergo videtur quod humilitas non sit pars temperantiae, vel modestiae.

3. Praeterea. Humilitas, & magnanimitas circa eadem sunt, ut ex supradictis patet (art. 1. hu. quest. ad 3. & quest. cxxix. art. 3. ad 4.) Sed magnanimitas non ponitur pars temperantiae, sed magis fortitudinis, ut supra habitum est (quest. cxxix. art. 5.) Ergo videtur quod humilitas non sit pars temperantiae, vel modestiae.

Sed contra est quod Origenes dicit super Lucam (hom. viii. a med.) *Si vir nomen huius audire virtutis, quomodo a Philosophis etiam appelletur, auscultet eandem esse humilitatem, quam respiciit Deus, quae ab illis purpura dicitur, id est mensura, vel moderatio*; quae manifeste pertinet ad modestiam, vel temperantiam. Ergo humilitas est pars modestiae, vel temperantiae.

Respondeo dicendum, quod, sicut supra dictum est (quest. cxxviii. & quest. cxxix. art. 5. & quest. clvii. art. 3.) in assignando partes virtutibus praecipue attenditur similitudo quantum ad modum virtutis. Modus autem temperantiae, ex quo maxime habet laudem, est refrenatio, vel repressio impetus alicuius passionis. Et ideo omnes virtutes refrenantes, sive reprimentes impetus aliquarum affectionum, vel actiones moderantes, ponuntur partes temperantiae. Sicut autem mansuetudo reprimat mo-

tum

(a) *Hic videtur edis, nisi, autem sic non solum debemus Deum revereri.*

tum iræ, ita etiam humilitas reprimat motum spei, qui est motus spiritus in magna tendentis. Et ideo sicut mansuetudo ponitur pars temperantiæ, ita etiam humilitas.

Unde & Philosophus in IV. Ethicor. (cap. 111. parum a princ.) eum qui tendit in parva secundum suum modum, dicit non esse magnanimum, sed temperatum, quem nos humilem dicere possumus. Et inter alias partes temperantiæ, ratione superius dicta (quaest. præc. art. 1.) continetur sub modestia, prout Tullius de ea loquitur (Lib. II. de invent. aliquant. ante fin.) in quantum scilicet humilitas nihil est aliud quam quedam moderatio spiritus. Unde I. Pet. 111. 4. dicitur: *In incorruptibilitate quieti, & modesti spiritus.*

Ad primum ergo dicendum, quod virtutes theologice, quæ sunt circa ultimum finem, qui est primum principium in appetibilibus, sunt causæ omnium aliarum virtutum. Unde ex hoc quod humilitas causatur ex reverentia divina, non excluditur quin humilitas sit pars modestiæ, vel temperantiæ.

Ad secundum dicendum, quod partes principalibus virtutibus assignantur, non secundum convenientiam in subiecto, vel in materia, sed secundum convenientiam in modo formali, ut dictum est (quaest. cxxxvii. art. 2. ad 1. & quaest. clvrr. art. 3. ad 2.) Et ideo licet humilitas sit in irascibili sicut in subiecto; ponitur tamen pars modestiæ, & temperantiæ propter modum.

Ad tertium dicendum, quod licet magnanimitas, & humilitas in materia convenient; differunt tamen in modo, ratione cuius magnanimitas ponitur pars fortitudinis, humilitas autem pars temperantiæ.

## ARTICULUS V. 782

*Utrum humilitas sit potissima virtutum.*

*IV. dist. xxxiii. quaest. 111. art. 3. ad 6.*

**A**D quintum sic proceditur. Videtur quod humilitas sit potissima virtutum. Dicit enim Chrysostomus (implic. hom. v. de incomprehensibili Dei natura, prope fin.) exponens illud quod dicitur Lucæ xviii. de Phariseo, & Publicano, quod *si mixta desideris humilitas tam facile currit, ut iustitiam superbiæ coniunctam transeat; si iustitia coniunxerit*

*eam, quo non ibit? Afflēt ipsi tribunali divino in medio Angelorum.* Et sic patet quod humilitas præfertur iustitiæ. Sed iustitia est præclarissima omnium virtutum, & includit in se omnes virtutes, ut patet per Philosophum V. Ethicor. (cap. 1. a med.) Ergo humilitas est maxima virtutum.

2. Præterea. Augustinus dicit in Lib. de verb. Dom. (serm. x. cap. 1.) *Cogitas magnam fabricam construere celsitudinis? De fundamento prius cogita humilitatis.* Ex quo videtur quod humilitas sit fundamentum omnium virtutum. Ergo videtur esse potior aliis virtutibus.

3. Præterea. Maiori virtuti maius debetur præmium. Sed humilitati maximum debetur præmium: quia *qui se humiliat exaltabitur*, ut dicitur Lucæ xiv. 11. Ergo humilitas est maxima virtutum.

4. Præterea. Sicut Augustinus dicit in Lib. de vera relig. (cap. xvi. non procul a fin.) *totā vitā Christi in terris per hominem, quem suscipere dignatus est, disciplina morum fuit.* Sed præcipue humilitatem suam imitandam proposuit, dicens (Matth. xi. 29.) *Discite a me, quia mitis sum, & humilis corde.* & Gregorius dicit in Pastor. (part. rrr. cap. 1. admonit. 18. parum a princ.) quod *argumentum redemptionis nostræ inventa est humilitas Dei.* Ergo humilitas videtur esse maxima virtutum.

Sed contra est quod caritas præfertur omnibus virtutibus, secundum illud Coloss. 111. 14. *Super omnia caritatem habete.* Non ergo humilitas est maxima virtutum.

Respondeo dicendum, quod bonum humanæ virtutis in ordine rationis consistit: qui quidem principaliter attenditur respectu finis, unde virtutes theologice, quæ habent ultimum finem pro obiecto, sunt potissimæ: secundario autem attenditur prout secundum rationem finis ordinantur ea quæ sunt ad finem.

Et hæc quidem ordinatio essentialiter consistit in ipsa ratione ordinante, participative autem in ipso appetitu per rationem ordinato: quam quidem ordinationem universaliter facit iustitia, præsertim legalis. Ordinationi autem facit hominem bene subiectum humilitas in universalium quantum ad omnia; quælibet autem alia virtus quantum ad aliquam materiam specialem. Ideo post virtutes theologicas, & virtutes intellectuales,

les, quæ respiciunt ipsam rationem, & post iustitiam, præsertim legalem, potior ceteris est humilitas.

Ad primum ergo dicendum, quod humilitas iustitiæ non præfertur, sed iustitiæ cui superbia coniungitur, quæ iam desinit esse virtus; sicut & contrario peccatum per humilitatem remittitur. Nam de Publicano dicitur Luc. xviii. 14. quod merito humilitatis descendit iustificatus in domum suam. Unde & Chrysostomus dicit (loc. cit. in arg.) *Geminas bigas mihi accommodes; alteram quidem superbiam, & iustitiam; alteram vero peccati, & humilitatis: & videbis peccatum prævertens iustitiam non propriis, sed humilitatis vincere viribus; aliud vero car videbis devictum non fragilitate iustitiæ, sed mole, & timore superbie.*

Ad secundum dicendum, quod sicut ordinata virtutum congregatio per quandam similitudinem ædificio comparatur, ita etiam illud quod est primum in acquisitione virtutum, fundamento comparatur, quod primum in ædificio iacet. Virtutes autem vere infunduntur a Deo. Unde primum in acquisitione virtutum potest accipi dupliciter. Uno modo per modum removentis prohibens; & sic humilitas primum locum renet, inquantum scilicet expellit superbiam, cui Deus resistit, & præbet hominem subditum, & paratum ad suscipiendum influxum divinæ gratiæ, inquantum evacuat inflationem superbiam. Unde dicitur Iacobi iv. 6. quod Deus superbis resistit, humilibus autem dat gratiam. Et secundum hoc humilitas dicitur spiritalis ædificii fundamentum. Alio modo est aliquid primum in virtutibus directe, per quod scilicet iam ad Deum acceditur. Primus autem accessus ad Deum est per fidem, secundum illud Hebr. xi. 6. *Accedentem ad Deum oportet credere.* Et secundum hoc hies ponitur fundamentum nobiliori modo, quam humilitas.

Ad tertium dicendum quod contentamenti terrena promittuntur cælestia, sicut contentmentibus divitiis terrenas promittuntur cælestes thesauri, secundum illud Matth. vi. 19. *Nolite vobis thesaurizare thesauros in terra, sed thesaurizare vobis thesauros in celo.* Et similiter contentmentibus mundi gaudia promittuntur consolationes cælestes, secundum illud Matth. v. 3. *Beati qui lugent, quoniam ipsi consolabuntur.* Et eodem modo humilitati promittitur spiritalis exaltatio,

non quia sola ipsam mereatur, sed quia eius est proprium continere sublimitatem terrenam. Unde Augustinus dicit in Libro de penitentia (qui est hom. ult. inter l. cap. i. a med.) *Ne putes, eum qui se humiliat, semper iacere, cum dictum sit, Exaltabitur: & ne opineris, eius exaltationem in oculis hominum per sublimitates fieri corporales.*

Ad quartum dicendum, quod ideo Christus præcipue nobis humilitatem commendavit, quia per hoc maxime removetur impedimentum humanæ salutis, quæ consistit in hoc quod homo ad cælestia, & spiritalia tendat, a quibus homo impeditur, dum in terrenis magnificari studet. Et ideo Dominus, ut impedimentum salutis auferret, exteriorum cellitudinem contemnendam monstravit per humilitatis exempla. Et sic humilitas est quasi quedam dispositio ad liberum accessum hominis in spiritalia, & divina bona. Sicut ergo perfectio est potior dispositione; ita etiam caritas, & aliæ virtutes, quibus homo directe movetur in Deum, sunt potiores humilitate.

#### ARTICULUS VI. 783

*Utrum convenienter distinguantur secundum B. Benedictum duodecim gradus humilitatis, scilicet corde, & opere semper humilitatem ostendere defixis in terram aspectibus &c.*

*Inf. quæst. clix. art. 4. ad 4. & Matth. 231.*

AD sextum sic proceditur. Videtur quod inconvenienter distinguantur duodecim gradus humilitatis, qui in Regula B. Benedicti (cap. vii.) ponuntur. Quorum primus est corde, & corpore semper humilitatem ostendere, defixis in terram aspectibus: secundus, ut pauca verba, rationabilia loquatur aliquis non clamorosa voce: tertius, ut non sit facilis, aut promptus in risum: quartus, taciturnitas usque ad interrogationem: quintus, tenere quod habet communis monasterii regula: sextus, credere, & pronuntiare se omnibus viliores: septimus, ad omnia indignum, & inutilem se consistere, & credere: octavus, confessio peccatorum: nonus, per obedientiam in duris, & asperis patientiam amplecti: decimus, ut cum obedientia se subdat maiori: undecimus, ut voluntatem propriam non desistere imple-

re : duodecimbus , ut Deum timeat , & memor sit omnium quæ præcepit . Enumerantur enim hic quædam quæ ad alias virtutes pertinent , sicut obedientia , & patientia ; enumerantur etiam aliqua quæ ad falsam opinionem pertinere videntur , quæ nulli virtuti potest competere , scilicet quod aliquis pronuntiet se omnibus viliorum , & quod ad omnia indignum , & inutilem se confiteatur , & credat . Ergo inconvenienter ista ponuntur inter gradus humilitatis .

2. Præterea . Humilitas ab interioribus ad exteriora procedit , sicut & ceteræ virtutes . Inconvenienter ergo præmittuntur in præmissis gradibus illa quæ pertinent ad exteriores actus , his quæ pertinent ad interiores .

3. Præterea . Anselmus in Lib. de similitudinibus ( a cap. xcix. usque ad cviii. ) ponit septem humilitatis gradus : quorum primus est , *contemptibilem se esse cognoscere* : secundus , *de hoc dolere* : tertius , *hoc confiteri* : quartus , *hoc persuadere* , ut scilicet hoc velis credi : quintus , *ut patienter sustineat hoc dici* : Sextus , *ut patienter contemptibiliter se tradari* : septimus , *ut hoc amet* . Ergo videntur præmissi gradus esse superflui .

4. Præterea . Matth. iii. dicit Glossa ( ord. super illud , *Implere omnem iustitiam* : ) *Perfecta humilitas tres habet gradus* . Primus est , *subdere se maiori* , & non præferre se æquali ; qui est sufficiens : secundus est , *subdere se æquali* , nec præferre se minori ; & hic dicitur abundans : tertius gradus est , *subesse minori* , in quo est omnis iustitia . Ergo præmissi gradus videntur esse superflui .

5. Præterea . Augustinus dicit in Lib. de virginit. ( cap. xxxi. ante med. ) *Mensura humilitatis cuique ex mensura ipsius magnitudinis data est* , cui est periculosa superbia , quæ amplius amplioribus insidatur . Sed mensura magnitudinis humanæ non potest sub certo numero graduum determinari . Ergo videtur quod non possint determinati gradus humilitatis assignari .

Respondeo dicendum , quod , sicut ex supra dictis patet ( art. 2. hu. quæst. ) humilitas essentialiter in appetitu consistit , secundum quod aliquis refrenat impetum animi sui , ne inordinate tendat in magna ; sed regulam habet in cognitione , ut scilicet aliquis non se existimet supra id esse quod est : & utriusque principium , & radix est reverentia quam quis habet ad Deum . Ex interiori au-

tem dispositione humilitatis procedunt quædam exteriora signa in verbis , & factis , & gestibus , quibus id quod interiorius latet , manifestatur , sicut & in ceteris virtutibus accidit . Nam ex *visu cognoscitur vir* , & *ab occurso faciei sensatus* , ut dicitur Eccli. xix. 26 . Et ideo in prædictis gradibus humilitatis ponitur aliquid quod pertinet ad humilitatis radicem , scilicet duodecimbus gradus , quod est , *ut homo Deum timeat* , & *memor sit omnium quæ præcipit* .

Ponitur etiam aliquid pertinens ad appetitum , ne scilicet in propriam excellentiam inordinate tendat : quod quidem fit tripliciter . Uno modo , ut homo non sequatur propriam voluntatem : quod pertinet ad undecimum gradum . Alio modo , ut regulet eam secundum superioris arbitrium : quod pertinet ad gradum decimum . Tertio modo , ut ab hoc non desistat propter dura , & aspera , quæ occurrunt : & hoc pertinet ad nonum .

Ponuntur etiam quædam pertinentia ad exultationem hominis recognoscentis suum defectum ; & hoc tripliciter . Uno quidem modo per hoc quod proprios defectus recognoscat , & confiteatur : quod pertinet ad octavum gradum . Secundo , ut ex consideratione sui defectus aliquis insufficientem se existimet ad maiora : quod pertinet ad septimum . Tertio , ut quantum ad hoc alios sibi præterat : quod pertinet ad sextum .

Ponuntur etiam quædamque pertinent ad exteriora signa : quorum unum est in factis , ut scilicet homo non recedat in suis operibus a via communi ; quod pertinet ad quintum . Alii duo sunt in verbis , ut scilicet homo non præcipiat tempus loquendi : quod pertinet ad quartum ; nec excedat modum in loquendo ; quod pertinet ad secundum . Alia vero consistunt in exterioribus gestibus , puta in reprimendo extolentiam oculorum ; quod pertinet ad primum : & in cohibendo exteriorum risum , & alia inepta laticet signa ; quod pertinet ad tertium .

Ad primum ergo dicendum , quod aliquis abique fallitate potest se credere , & pronuntiare omnibus viliorum secundum defectus occultos , quos in se recognoscit , & dona Dei , quæ in aliis latent . Unde Augustinus dicit in Lib. de virginit. ( cap. lii. parum a med. ) *Existimate aliquos in oculis superiores , quibus estis in manifesto meliores* . Similiter etiam abique fallitate potest aliquis confiteri , & credere ad omnia se inutilem esse , & indi-



dignum per proprias vires, ut sufficientiam suam totam in Deum referat, secundum illud II. ad Corinth. 111. 3. *Non quod sufficientes simus aliquid cogitare a nobis, quasi ex nobis, sed sufficientia nostra ex Deo est.* Non est autem inconveniens quod ea quæ ad alias virtutes pertinent, humilitati adscribantur: quia sicut unum vitium oritur ex alio, ita naturali ordine actus unius virtutis procedit ex actu alterius.

Ad secundum dicendum, quod homo ad humilitatem pervenit per duo. Primo quidem & principaliter per gratiam donum: & quantum ad hoc interiora præcedunt exteriora. Aliud autem est humanum studium, per quod homo prius exteriora cohibet, postmodum pertingit ad extirpandum interiorem radicem: & secundum hunc ordinem assignantur hic humilitatis gradus.

Ad tertium dicendum, quod omnes gradus quos Anselmus ponit, reducuntur ad opinionem, & manifestationem, & voluntatem propriæ abiectionis. Nam primus gradus pertinet ad cognitionem proprii defectus. Sed quia vituperabile esset, si quis proprium defectum amaret, hoc per secundum gradum excluditur. Sed ad manifestationem sui defectus pertinent tertius, & quartus gradus; ut scilicet aliquis non solum simpliciter suum defectum enuntiet, sed etiam persuadeat. Alii autem tres gradus pertinent ad appetitum, qui excellentiam exterioriorem non querit, sed exteriorem abiectionem vel æquanimiter patitur, sive in verbis, sive in factis: quia, sicut Gregorius dicit in Registro (Lib. 11. Indict. x. epist. xxiv.) *non grande est iis nos esse humiles a quibus honoramur, quia & hoc seculares quilibet faciunt; sed illis maxime humiles esse debemus a quibus aliqua patimur: & hoc pertinet ad quintum, & sextum gradum: vel etiam desideranter exterioriorem abiectionem amplectitur: quod pertinet ad septimum gradum.* Et sic omnes isti gradus continentur sub sexto, & septimo superius enumeratis.

Ad quartum dicendum, quod illi tres gradus accipiuntur, non ex parte ipsius rei, id est secundum naturam humilitatis, sed per comparationem ad gradus hominum, qui sunt vel maiores, vel minores, vel æquales.

Ad quintum dicendum, quod etiam illa ratio procedit de gradibus humilitatis, non secundum ipsam naturam rei, se-

cundum quam assignantur præmissi gradus, sed secundum diversas hominum condiciones.

## QUAESTIO CLXII.

De superbia,  
in octo articulos divisa.

Postea considerandum est de superbia: & primo de superbia in communi; secundo de peccato primi hominis, quod ponitur esse superbia.

Circa primum queruntur octo.

Primo, utrum superbia sit peccatum.

Secundo, utrum sit vitium speciale.

Tertio, in quo sit sicut in subiecto.

Quarto de speciebus eius.

Quinto, utrum sit peccatum mortale.

Sexto, utrum sit gravissimum omnium peccatorum.

Septimo de ordine eius ad alia peccata.

Octavo, utrum debeat poni vitium capitale.

## ARTICULUS I. 784

Utrum superbia sit peccatum.

1. 2. quæst. lxxxiv. art. 2. & mal. quæst. viii. art. 2. ad 16. & Ps. xlv.

**A**D primum sic proceditur. Videtur quod superbia non sit peccatum. Nullum enim peccatum est repositum a Deo. Promittit enim Deus quod ipse facturus est; non est autem actor peccati. Sed superbia connumeratur inter repositum divinas: dicitur enim Isa. lx. 15. *Ponamte in superbiam seculorum, gaudium in generationem & generationem.* Ergo superbia non est peccatum.

2. Præterea. Appetere divinam similitudinem non est peccatum: hoc enim naturaliter appetit quilibet creatura, & in hoc optimum eius consistit, & præcipue hoc convenit rationali creaturæ, quæ facta est ad imaginem & similitudinem Dei. Sed, sicut dicitur in Lib. Sentent. Prosperi (sent. ccxcii.) *superbia est amor propriæ excellentiæ, per quam homo Deo assimilatur, qui est excellentissimus: unde dicit Augustinus in 11. Confess. (cap. vi. ante med.) Superbia celsitudinem imitatur, cum tu sis unus super omnia Deus excelsus.* Ergo superbia non est peccatum.

3. Præterea. Peccatum non solum

con-

contrariatur virtuti, sed etiam oppositio vicio, ut patet per Philosophum in II. Ethic. (cap. viii.) Sed nullum vitium invenitur oppositum esse superbiz. Ergo superbia non est peccatum.

Sed contra est quod dicitur Tob. iv. 14. *Superbiam nunquam in tuo sensu, aut in tuo verbo dominari permittas.*

Respondeo dicendum, quod superbia nominatur ex hoc quod aliquis per voluntatem tendit supra id quod est. Unde dicit Isidorus in Lib. X. Etymol. (ad lit. S.) *Superbus dicitur est, quia super vult videri quam est*: qui enim vult supergredi quod est, superbus est. Habet autem hoc ratio recta ut voluntas uniuscuiusque feratur in id quod est proportionatum sibi. Et ideo manifestum est quod superbia importat aliquid quod ad versatur rationi rectæ.

Hoc autem facit rationem peccati: quia secundum Dionysium cap. iv. de div. Nomin. (part. iv. lect. 22.) *malum anime est præter rationem esse*. Unde manifestum est quod superbia est peccatum.

Ad primum ergo dicendum, quod superbia dupliciter accipi potest. Uno modo ex eo quod supergreditur regulam rationis: & sic dicimus eam esse peccatum. Alio modo potest superbia nominari simpliciter a superexcessu: & secundum hoc omne superexcedens potest nominari superbia: & ita repromittitur a Deo superbia, quasi quidam superexcessus bonorum. Unde & Glossa Hieronymi (super illud Isa. lxi.) *Vos autem Sacerdotes* dicit ibidem, quod est superbia bona, & mala.

Quamvis etiam dici possit, quod superbia ibi accipitur materialiter pro abundantia rerum, de quibus possunt homines superbiere.

Ad secundum dicendum, quod eorum quæ naturaliter homo appetit, ratio est ordinatrix: & ita si aliquis a regula rationis recedit vel in plus, vel in minus, erit talis appetitus vitiosus, sicut patet de appetitu cibi, qui naturaliter desideratur. Superbia autem appetit excellentiam in excessu ad rationem rectam. Unde Augustinus dicit in XIV. de civ. Dei (cap. xiii. scilicet. princ.) quod *superbia est perverse celsitudinis appetitus*. Et inde est etiam quod, sicut Augustinus dicit in XIX. de civ. Dei (cap. xiii. a med.) *superbia perterse imitatur Deum: odit namque cum sociis equalitatem sub illo, sed imponere vult sociis dominationem suam pro illo.*

Ad tertium dicendum, quod superbia directe opponitur virtuti humilitatis, quæ quodammodo circa eadem cum magnanimitate existit, ut supra dictum est (quaest. præc. art. 1. ad 3.) Unde vitium quod opponitur superbiz, in defectum vergens, propinquum est vitio pusillanimitatis, quæ opponitur magnanimitati secundum defectum. Nam sicut ad magnanimitatem pertinet impellere animum ad magna contra desperationem; ita ad humilitatem pertinet retrahere animum ab inordinato appetitu magnorum contra presumptionem. Pusillanimitas autem, si importet defectum a prosecutione magnorum, proprie opponitur magnanimitati per modum defectus; si autem importet applicationem animi ad aliqua viliora quam hominem deceant, opponitur humilitati secundum defectum, utrumque enim ex animi parvitate procedit: sicut & e contrario superbia potest secundum superexcessum & magnanimitati, & humilitati opponi, secundum rationes diversas: humilitati quidem, secundum quod subiectionem aspernatur; magnanimitati autem, secundum quod inordinatè ad magna se extendit. Sed quia superbia superioritatem quamdam importat, directius opponitur humilitati; sicut & pusillanimitas, quæ importat parvitatem animi in magna tendentis, directius opponitur magnanimitati.

## ARTICULUS II. 785

Utrum superbia sit speciale peccatum.

Inf. art. 8. cor. & 1. 2. quæst. lxxxiv. art. 2 & II. dist. v. quæst. 1. art. 3. cor. & dist. xlii. quæst. 11. art. 3. ad 2. & mal. quæst. viii. art. 2.

**A**D secundum sic proceditur. Videtur quod superbia non sit speciale peccatum. Dicit enim Augustinus in Lib. de natura, & gratia (cap. xxix. parum a princ.) quod *sine superbia appellatione nullum peccatum invenies*: & Prosper dicit in Lib. III. de vita contemplativa (cap. 11. parum a princ.) quod *nullum peccatum sine superbia potest, vel potuit esse, aut poterit*. Ergo superbia est generale peccatum.

2. Præterea. Iob xxxiii. super illud, *Ut avertat hominem ab iniquitate*, dicit Glossa (ord.) quod, contra conditorem rem superbiere, est eius præcepta peccando transcendere. Sed secundum

Am-

Ambrosium ( Lib. de parad. cap. viii. parum ante med. ) *omne peccatum est transgressio legis divinae, & celestium inobedientia mandatorum*. Ergo omne peccatum est superbia.

3. Præterea. Omne peccatum speciale alicui speciali virtuti opponitur. Sed superbia opponitur omnibus virtutibus : dicit enim Gregorius XXXIV. Moral. ( cap. xviii. a princ. ) *Superbia nequam est unius virtutis extinctione contenta : contra cuncta animæ membra se erigit, & quasi generatis, ac pestifer morbus corpus omne corrumpit* : & lūdorus dicit in Lib. II. de summo bono ( cap. xxxviii. a med. ) *quod est ruina omnium virtutum*. Ergo superbia non est speciale peccatum.

4. Præterea. Omne peccatum speciale habet specialem materiam. Sed superbia habet generale materiam : dicit enim Gregorius XXXIV. Moral. ( cap. xviii. ante med. ) *quod alter intumescit auro, alter eloquio, alter infimis & terrenis rebus, alter summis celestibusque virtutibus*. Ergo superbia non est speciale peccatum, sed generale.

Sed contra est quod Augustinus dicit in Libro de natura, & gratia ( cap. xxix. cir. med. ) *Querat diligenter, & inveniet secundum legem Dei superbiam esse peccatum multum discretum ab aliis vitiis*. Genus autem non distinguitur a suis speciebus. Ergo superbia non est generale peccatum, sed speciale.

Respondeo dicendum, quod peccatum superbiæ dupliciter potest considerari. Uno modo secundum propriam speciem : quam habet ex ratione proprii obiecti : & hoc modo superbia est speciale peccatum, quia habet speciale obiectum : est enim inordinatus appetitus propriæ excellentiæ, ut dictum est ( art. præc. ) Alio modo potest considerari secundum redundantiam quamdam in alia peccata : & secundum hoc habet quamdam generalitatem, inquantum scilicet ex superbia oriri possunt omnia peccata, duplici ratione : uno modo per se, inquantum scilicet alia peccata ordinantur ad finem superbiæ, qui est propria excellentia, ad quam potest ordinari omne id quod quis inordinate appetit ; alio modo indirecte, & quasi per accidens, scilicet removendo prohibens, inquantum scilicet homo per superbiam contemnit divinam legem, per quam prohibetur a peccando, secundum illud Hierem. xi. 20. *Confrigisti iugum, rupisti vincula, dixisti, Non serviam*.

Sciendum tamen, quod ad hanc generalitatem superbiæ pertinet quod omnia vitia interdum ex superbia oriri possint ; non autem ad eam pertinet quod omnia vitia semper ex superbia oriantur. Quavis enim omnia præcepta legis possit quis transgredi qualicumque peccato ex contemptu, qui pertinet ad superbiam ; non tamen semper ex contemptu aliquis præcepta divina transgreditur, sed quandoque ex ignorantia, quandoque ex infirmitate. Et inde est quod, sicut Augustinus dicit in Lib. de natura, & gratia ( cap. xxix in med. ) *multa perperam sunt quæ non sunt superbe*.

Ad primum ergo dicendum, quod Augustinus illa verba inducit in Lib. de nat. & gratia, non ex sua persona, sed ex persona aliterius, contra quem disputat. Unde & postmodum improbat ea, ostendens quod non semper ex superbia peccatur.

Potest tamen dici, quod auctoritates illæ intelliguntur quantum ad exteriorum effectum superbiæ, qui est transgredi præcepta, quod invenitur in quolibet peccato ; non autem quantum ad interiorum actum superbiæ, qui est contemptus præcepti. Non enim semper peccatum fit ex contemptu, sed quandoque ex ignorantia, quandoque ex infirmitate, ut dictum est ( in cor. art. )

Ad secundum dicendum, quod quandoque aliquis committit aliquod peccatum secundum effectum, sed non secundum affectum ; sicut ille qui ignoranter occidit patrem, committit parricidium secundum effectum, sed non secundum affectum, quia hoc non intendebat : & secundum hoc transgredi præceptum Dei, dicitur esse contra Deum superbire, secundum effectum quidem semper, non autem semper secundum affectum.

Ad tertium dicendum, quod peccatum aliquod potest corrumpere virtutem dupliciter. Uno modo per directam contrarietatem ad virtutem : & hoc modo superbia non corrumpit quamlibet virtutem, sed solum humilitatem, sicut & quodlibet aliud speciale peccatum corrumpit specialem virtutem sibi oppositam, contrarium agendo. Alio modo peccatum aliquod corrumpit virtutem, abutendo ipsa virtute, & sic superbia corrumpit quamlibet virtutem, inquantum scilicet ex ipsis virtutibus sumit occasionem superbiendi, sicut ex quibuslibet aliis rebus ad excellentiam

len-

lentiam pertinentibus. Unde non sequitur quod sit generale peccatum.

Ad quartum dicendum, quod superbia attendit specialem rationem obiecti, quæ tamen inveniri potest in diversis materiis: est enim inordinatus amor propriæ excellentiæ: excellentia autem in diversis rebus potest inveniri.

## ARTICULUS III. 786

*Utrum superbia sit in irascibili sicut in subiecto.*

*Mal. quæst. VIII. art. 3. & ver. quæst. 1. art. 3. ad 10.*

**A**D tertium sic proceditur. Videtur sicut quod superbia non sit in irascibili sicut in subiecto. Dicit enim Gregorius XXIII. Moral. (cap. x. ante med.) *Obflaculum veritatis tumor mentis est: quia dum inflat, obnubilat.* Sed cognitio veritatis non pertinet ad irascibilem, sed ad vim rationalem. Ergo superbia non est in irascibili.

2. Præterea. Gregorius dicit XXIV. Moral. (cap. vii. a med.) quod *superbi non eorum vitam considerant quibus se humiliando possunt, sed quibus superbiendo se præferant: & sic videtur quod superbia ex indebita consideratione procedat.* Sed consideratio non pertinet ad irascibilem, sed potius ad rationalem. Ergo superbia non est in irascibili, sed potius in rationali.

3. Præterea. Superbia non solum querit excellentiam in rebus sensibilibus, sed etiam in rebus spiritualibus, & intelligibilibus: ipsa autem principaliter consistit in contemptu Dei, secundum illud Eccli. x. 14. *Initium superbiæ hominis apostatare a Deo.* Sed irascibilis, cum sit pars appetitus sensitivi, non potest se extendere in Deum, & in intelligibilia. Ergo superbia non potest esse in irascibili.

4. Præterea. Ut dicitur in Lib. Sententiar. Properi (sent. ccxcii.) *Superbia est amor propriæ excellentiæ.* Sed amor non est in irascibili, sed in concupiscibili. Ergo superbia non est in irascibili.

Sed contra est quod Gregorius in II. Moral. (cap. xxvi. parum a princ.) ponit contra superbiæ donum timoris. Timor autem pertinet ad irascibilem. Ergo superbia est in irascibili.

Respondeo dicendum, quod subiectum cuiuslibet virtutis, vel vitii oportet inquirere ex proprio obiecto. Non enim potest esse aliud obiectum habitus, vel actus, nisi quod est obiectum potentie, quæ utrique subicitur. Proprium autem obiectum superbiæ est arduum: est enim appetitus propriæ excellentiæ, ut dictum est (art. 1. & 2. præc.) Unde oportet quod superbia aliquo modo ad vim irascibilem pertineat.

Sed irascibilis dupliciter accipi potest. Uno modo proprie: & sic est pars appetitus sensitivi, sicut & ira proprie sumpta, est quædam passio appetitus sensitivi. Alio modo potest accipi irascibilis largius, scilicet ut pertineat etiam ad appetitum intellectivum, cui etiam quandoque attribuitur ira, prout scilicet attribuiamus iram Deo, & Angelis, non quidem secundum passionem, sed secundum iudicium (a) iustitiæ iudicantis: & tamen irascibilis sic communiter dicta non est potentia distincta a concupiscibili, ut patet ex his quæ in primo dicta sunt (quæst. lxx. art. 4. & quæst. lxxxii. art. 5. ad 1. & 2.).

Si ergo arduum, quod est obiectum superbiæ, esset solum aliquod sensibile, in quod posset tendere appetitus sensitivus, oporteret quod superbia esset in irascibili, quæ est pars appetitus sensitivi. Sed quia arduum, quod respicit superbiæ, communiter invenitur & in sensibilibus, & in spiritualibus rebus; necesse est dicere, quod subiectum superbiæ sit irascibilis non solum proprie sumpta, prout est pars appetitus sensitivi, sed etiam communius accepta, prout invenitur in appetitu intellectivo. Unde & in dæmonibus superbia ponitur.

Ad primum ergo dicendum, quod cognitio veritatis est duplex. Una pure speculativa: & hanc superbia indirecte impedit, subtrahendo causam. Superbus enim neque Deo intellectum suum subicit, ut ab eo veritatis cognitionem percipiat, secundum illud Matth. xi. 23. *Abcondisti hæc a sapientibus, & prudentibus, idest a superbis, qui sibi sapientes, & prudentes videntur, & revelasti ea parvulis, idest humilibus: neque etiam ab hominibus addiscere dignatur; cum tamen dicatur Eccli. vi. 34. Si inclinaveris aurem tuam, scilicet humiliter audiendo, excipies doctrinam.* Alia autem est cognitio veritatis, scilicet affectiva: & talem cognitionem veritatis dire-

(1) Apud Nicolai deß iustitia.

pirectè impedit superbia : quia superbi dum delectantur in propria excellentia, excellentiam veritatis fastidiunt, ut Gregorius dicit XXIII. Moral. ( cap. x. cir. med. ) quod *superbi, est secreta quædam intelligendo percipiunt, eorum dulcedinem experiri non possunt ; & si noverunt quomodo sunt, ignorant quomodo sapiunt*. Unde & Proverb. xi. 2. dicitur : *Ubi humilitas, ibi sapientia*.

Ad secundum dicendum, quod, sicut supra dictum est ( quæst. præc. art. 1. & 2. ) humilitas attendit ad regulam rationis rectæ, secundum quam aliquis veram æstimationem de se habet. Hanc autem regulam rectæ rationis non attendit superbia, sed de se maiora existimat quam sint : quod contingit ex inordinato appetitu propriæ excellentiæ : quia quod aliquis vehementer desiderat, facile credit ; & hoc etiam eius appetitus in altiora fertur quam sibi conveniat. Et ideo quæcunque conferunt ad hoc quod aliquis æstimet se supra id quod est, inducunt hominem ad superbiam : quorum unum est, quod aliquis consideret defectus aliorum ; sicut e contra Gregorius ibidem dicit, quod *sancti viri virtutum consideratione vicissim sibi alios præferunt*. Ex hoc ergo non habetur quod superbia sit in rationali, sed quod aliqua causa eius in ratione existat.

Ad tertium dicendum, quod superbia non est solum in irascibili, secundum quod est pars appetitus sensitivi, sed prout communis irascibilis accipitur, ut dictum est ( in cor. art. )

Ad quartum dicendum, quod, sicut Augustinus dicit XIV. de civit. Dei ( cap. vii. a med. & cap. ix. ) *amor præcedit omnes alias animi affectiones, & est causa earum* : & ideo potest poni pro qualibet aliarum affectionum. Et secundum hoc superbia dicitur esse *amor propriæ excellentiæ*, inquantum ex amore causatur inordinata præsumptio alios superandi ; quod propriè pertinet ad superbiam.

## ARTICULUS IV. 787

*Utrum convenienter a Gregorio assignentur quatuor superbiæ species, scilicet æstimare bonum a seipso habere, sibi datum desuper credere pro suis acceptis meritis, iactare se habere quod non habet, & despectis ceteris singulariter videri appetere habere quod habet.*

II. dist. xxiv. quæst. 11. art. 4. & mal. quæst. viii. art. 4. & I. Cor. iv. lect. 2. & II. Eisd. lect. 3.

**A**D quartum sic proceditur. Videtur quod inconvenienter assignentur quatuor superbiæ species, quas Gregorius assignat XXIII. Moral. ( cap. iv. ) dicens : *Quatuor quippe sunt species, quibus omnis tumor arrogantium demonstratur ; cum bonum aut a semetipsis habere se æstimant ; aut si sibi datum desuper credunt, pro suis se hoc accepisse meritis putant : aut certe cum iactant se habere quod non habent ; aut despectis ceteris, singulariter videri appetunt habere quod habent*. Superbia enim est vitium distinctum ab infidelitate, sicut etiam humilitas est virtus distincta a fide. Sed quod aliquis æstimet bonum se non habere a Deo, vel quod bonum gratiæ habeat ex meritis propriis, ad infidelitatem pertinet. Ergo non debet poni species superbiæ.

2. Præterea. Idem non debet poni species diversorum generum. Sed iactantia ponitur species mendacii, ut supra habitum est ( quæst. ex. art. 3. & quæst. cxii. ) Ergo non debet poni species superbiæ.

3. Præterea. Quædam alia videntur ad superbiam pertinere, quæ hic non connumerantur : dicit enim Hieronymus quod *nihil est tam superbum, quam ingratum videri* : & Augustinus dicit XIV. de civit. Dei ( cap. xiv. ) quod *excusare se de peccato commisso ad superbiam pertinet*. Præsumptio etiam, qua quis tendit ad assequendum aliquid quod supra se est, maxime ad superbiam pertinere videtur. Non ergo sufficienter prædicta divisio comprehendit superbiæ species.

4. Præterea. Inveniuntur alix divisiones superbiæ. Dividit enim Anselmus ( in Lib. de similitudinib. cap. xxii. & seq. ) exaltationem superbiæ, dicens, quod *quædam est in voluntate, quædam in sermone, & quædam in operatione*. Bernardus

nardus etiam (tract. de grad. humilit. cap. x. & seq.) ponit duodecim gradus superbiae; qui sunt *curiositas, mentis levitas, inepta letitia, iactantia, singularitas, arrogantia, praesumptio, defensio peccatorum, simulata confessio, rebellio, libertas peccandi, consuetudo*: quae non videntur comprehendi sub speciebus a Gregorio assignatis. Ergo videtur quod inconvenienter assignentur.

In contrarium (a) sufficit auctoritas Gregorii.

Respondendo dicendum, quod, sicut supra dictum est (art. 1. & 3. hu. quaest.) superbia importat immoderatum excellentiae appetitum, qui scilicet non est secundum rationem rectam. Est autem considerandum, quod quilibet excellentia consequitur aliquod bonum habitum. Quod quidem potest tripliciter considerari. Uno modo secundum se. Manifestum est enim quod quanto maius est bonum quod quis habet, tanto per hoc excellentiam maiorem consequitur. Et ideo cum aliquis attribuit sibi maius bonum quam habeat, consequens est quod eius appetitus tendat in excellentiam propriam ultra modum sibi convenientem: & sic est tertia species superbiae, cum scilicet aliquis iactat se habere quod non habet.

Allo modo ex parte causae, prout scilicet excellentius est quod aliquod bonum inest alicui a seipso quam quod inest ei ab alio. Et ideo cum aliquis aestimat bonum quod habet ab alio, ac si haberet a seipso, fertur per consequens appetitus eius in propriam excellentiam supra suum modum. Est autem dupliciter aliquis causa sui boni, uno modo efficienter, alio modo meritorie: & secundum hoc sumuntur duae primae superbiae species, scilicet cum quis a semetipso habere aestimat quod a Deo habet, vel cum propriis meritis sibi datum deinde credit.

Tertio modo ex parte modi habendi, prout excellentior aliquis redditur ex hoc quod bonum aliquod excellentius ceteris possidet: unde ex hoc etiam fertur inordinate appetitus in propriam excellentiam: & secundum hoc sumitur quarta superbia species, quae est, cum aliquis, aliis despectis, singulariter vult videri.

Ad primum ergo dicendum, quod vera aestimatio potest corrumpi dupliciter: uno modo in universalis; & sic in his quae ad fidem pertinent, corrumpitur

*S. Tb. Oper. Tom. XXXIII.*

(2) *At sufficit.*

vera aestimatio per infidelitatem: alio modo in aliquo particulari eligibili; & hoc non facit infidelitatem; sicut ille qui fornicatur, aestimat pro tempore illo bonum esse sibi fornicari; nec tamen est infidelis, sicut esset, si in universali diceret, fornicationem esse bonum. Et ita etiam est in proposito: nam dicere in universali aliquod bonum esse quod non est a Deo, vel gratiam hominibus pro meritis dari, pertinet ad infidelitatem; sed quod aliquis ex inordinato appetitu propriae excellentiae ita de bonis suis gloriatur, ac si ea a se haberet, vel ex meritis propriis, pertinet ad superbiam, & non ad infidelitatem, proprie loquendo.

Ad secundum dicendum, quod iactantia ponitur species mendacii quantum ad exteriorem actum, quo quis falso sibi attribuit quod non habet; sed quantum ad interiorem cordis arrogantiam ponitur a Gregorio species superbiae.

Ad tertium dicendum, quod ingratus est qui sibi attribuit quod ab alio habet: unde duae primae superbiae species ad ingratitudinem pertinent. Quod autem aliquis se excuset de peccato quod habet, pertinet ad tertiam speciem: quia per hoc aliquis attribuit sibi bonum innocentiae, quod non habet. Quod autem aliquis praesumptuose tendat in id quod supra ipsum est, praecipue videtur ad quartam speciem pertinere, secundum quam aliquis vult aliis praeferrari.

Ad quartum dicendum, quod illa tria quae ponit Anselmus, accipiuntur secundum progressum peccati cuiuslibet; quod primo corde concipitur, secundo ore profertur, tertio opere perficitur. Illa autem duodecim quae ponit Bernardus, sumuntur per oppositum ad duodecim gradus humilitatis, de quibus supra habitum est (quaest. praec. art. 6.) Nam primus gradus humilitatis est, corde, & corpore semper humilitatem ostendere, dehis in terram aspectibus: cui opponitur curiositas, per quam aliquis curioso ubique, & inordinate circumspicit. Secundus gradus humilitatis est ut pauca verba, & rationabilia loquatur aliquis non clamorosa voce: contra quem opponitur levitas mentis, per quam scilicet hominibus superbe se habet in verbo. Tertius gradus humilitatis est ut non sit facilis, & promptus in risu: cui opponitur inepta letitia. Quartus gradus humilitatis est taciturnitas usque ad interrogationem: cui op-

R po-

ponitur *inastantia*. Quintus gradus humilitatis est *tenere quod communis regula monasterii habet*: cui opponitur *singularitas*, per quam scilicet aliquis sanctior vult apparere. Sextus gradus humilitatis est *credere, & pronuntiare se omnibus viliorum*: cui opponitur *arrogantia*, per quam scilicet homo se aliis praefert. Septimus gradus humilitatis est *ad omnia inutilem, & indignum se consistere, & credere*: cui opponitur *presumptio*, per quam scilicet aliquis reputat se sufficientem ad maiora. Octavus gradus humilitatis est *confessio peccatorum*: cui opponitur *defensio eorumdem*. Nonus gradus humilitatis est *in duris, & asperis patientiam amplecti*: cui opponitur *simulata confessio*, per quam scilicet aliquis non vult subire poenam pro peccatis, quae simulata confitetur. Decimus gradus humilitatis est *obedientia*: cui opponitur *rebellio*. Undecimus gradus humilitatis est *ut homo non delectetur facere propriam voluntatem*: cui opponitur *libertas*, per quam scilicet homo delectatur libere facere quod vult. Ultimus autem gradus humilitatis est *timor Dei*: cui opponitur *peccandi consuetudo*, quae implicat Dei contemptum. In his autem duodecim gradibus tanguntur non solum superbiae species, sed etiam quaedam antecedentia, & consequentia, sicut etiam supra de humilitate dictum est (quaest. praec. art. 6.)

## ARTICULUS V. 788

*Utrum superbia sit peccatum mortale.*

IV. dist. xxxiii. quaest. 1. art. 3.  
quaest. 2. ad 3.

**A**D quantum sic proceditur. Videtur quod superbia non sit peccatum mortale. Quia super illud Psal. vii. *Domine Deus meus, si feci istud*, dicit Glossa (ordin. Augustini:) „scilicet universale peccatum, quod est superbia.“ Si igitur superbia esset peccatum mortale, omne peccatum esset mortale.

2. Praeterea. Omne peccatum contrariatur caritati. Sed superbia non videtur contrariari caritati neque quantum ad dilectionem Dei, neque quantum ad dilectionem proximi: quia excellentia, quam quis inordinate per superbiam appetit, non semper contrariatur honori Dei, aut utilitati proximi. Ergo superbia non est peccatum mortale.

3. Praeterea. Omne peccatum mortale contrariatur virtuti. Sed superbia non contrariatur virtuti, sed potius ex ea oritur: quia, ut Gregorius dicit XXXIV. Moral. (cap. xviii. ante med.) *aliquando homo ex summis, celestibusque virtutibus intumescit*. Ergo superbia non est peccatum mortale.

Sed contra est quod Gregorius in eodem Lib. (ibid. cir. fin.) dicit, quod *evidentissimum probetur signum superbiae est; ac contra humilitas electorum*. Sed homines non sunt reprobi pro peccatis venialibus. Ergo superbia non est peccatum veniale, sed mortale.

Respondeo dicendum, quod superbia humilitati opponitur. Humilitas autem proprie respicit subiectionem hominis ad Deum, ut supra dictum est (quaest. praec. art. 1. ad 5.) Unde e contrario superbia proprie respicit defectum huius subiectionis, secundum scilicet quod aliquis se extollit supra id quod est sibi praestitum secundum divinam regulam, vel mensuram, contra id quod Apostolus dicit II. ad Cor. x. 13. *Nos autem non in immensum gloriabimur, sed secundum mensuram, qua mensus est nobis Deus*. Et ideo dicitur Eccli. x. 14. *quod initium superbiae hominis est apostatare a Deo*: quia scilicet in hoc radix superbiae consideratur quod homo aequaliter non subiicitur Deo, & regulae ipsius.

Manifestum est autem quod hoc ipsum quod est non subiici Deo, habet rationem peccati mortalis, hoc enim est averti a Deo: unde consequens est quod superbia secundum genus suum sit peccatum mortale.

Sicut tamen in aliis quae ex suo genere sunt peccata mortalia (puta fornicatione, & adulterio) sunt aliqui motus qui sunt peccata venialia propter eorum imperfectionem, quia scilicet praeveniunt rationis iudicium, & sunt praeter eius consensum; ita etiam & circa superbiam accidit quod aliqui motus superbiae sunt peccata venialia, dumtaxat ratio non consentit.

Ad primum ergo dicendum, quod, sicut supra dictum est (art. 1. hu. quaest.) superbia non est universale peccatum per suam essentiam, sed per quandam redundantiam, inquantum scilicet ex superbia omnia peccata oriri possunt. Unde non sequitur quod omnia peccata sint mortalia, sed solum quando oriuntur ex superbia completa, quam diximus esse peccatum mortale.

Ad secundum dicendum, quod superbia semper quidem contrariatur dilectioni divine, inquantum scilicet superbus non se subiciit divine regulæ, prout debet; & quandoque etiam contrariatur dilectioni proximi, inquantum scilicet aliquis inordinate se præfert proximo, aut ab eius subiectione se subtrahit: in quo etiam derogatur divine regulæ, ex qua sunt hominum ordines instituti, prout scilicet unus eorum sub alio esse debet.

Ad tertium dicendum, quod superbia non oritur ex virtutibus sicut ex causa per se, sed sicut ex causa per accidens, inquantum scilicet aliquis ex virtutibus occasione superbiæ sumit. Nihil autem prohibet quin unum contrariorum sit alterius causa per accidens, ut dicitur in VIII. Phisic. (tex. 8.) Unde etiam de ipsa humilitate aliqui superbiunt.

## ARTICULUS VI. 789

*Utrum superbia sit gravissimum peccatorum.*

*Inf. art. 7. ad 4. & Psal. xviii. fin. & II. Cor. xii. leſſ. 3.*

**A**D sextum sic proceditur. Videtur quod superbia non sit gravissimum peccatorum. Quanto enim aliquod peccatum difficilius cavetur, tanto videtur esse levius. Sed superbia difficillime cavetur: quia, sicut Augustinus dicit in Regula, (scilicet epist. cxi. al. cix. ante med.) *cetera peccata in malis operibus exercentur, ut fiant; superbia autem bonis operibus insidiatur, ut pereant.* Ergo superbia non est gravissimum peccatorum.

2. Præterea. Maius malum maiori bono opponitur, ut Philosophus dicit in VIII. Eth. (cap. x. cir. princ.) Sed humilitas, cui opponitur superbia, non est maxima virtutum, ut supra habitum est (quæst. præc. art. 5.) Ergo & vitia quæ opponuntur maioribus virtutibus, puta infidelitas, desperatio, odium Dei, homicidium, & alia huiusmodi, sunt graviora peccata quam superbia.

3. Præterea. Maius malum non punitur per minus malum. Sed interdum superbia punitur per alia peccata, ut patet ad Rom. i. 28. ubi dicitur, quod Philosophi per elationem cordis traditi sunt in reprobum sensum, ut faciant que non conveniunt. Ergo superbia non est gravissimum peccatorum.

Sed contra est quod super illud Psal. cxviii. *Superbi inique agebant usquequaque*, dicit Glossa (interl. implic. & Ambrosi. octonar. vii. in hunc. Pl.) „Ma- ximum peccatum in homine est superbia.“

Respondeo dicendum, quod in peccato duo attenduntur, scilicet conversio ad commutabile bonum, quæ materialiter se habet in peccato; & aversio a bono incommutabili, quæ est formalis, & completa ratio peccati. Ex parte autem conversionis non habet superbia quod sit maximum peccatorum: quia celsitudo, quam superbus inordinate appetit, secundum suam rationem non habet maximam repugnantiam ad bonum virtutis.

Sed ex parte aversionis superbia habet maximam gravitatem: quia in aliis peccatis homo a Deo avertitur vel propter ignorantiam, vel propter infirmitatem, sive propter desiderium cuiuscumque alterius boni; sed superbia habet aversionem a Deo ex hoc ipso quod non vult Deo, & eius regulæ subiacere. Unde Boetius dicit, quod *cum omnia vitia fugiant a Deo, sola superbia se Deo opponit.* Propter quod etiam specialiter dicitur Iacobi iv. 6. quod *Deus superbis resistit.* Et ideo averti a Deo, & eius præceptis, quod est quasi consequens in aliis peccatis, per se ad superbiam pertinet, cuius actus est Dei contemptus. Et quia id quod est per se, potius est eo quod est per aliud; consequens est quod superbia sit gravissimum peccatorum secundum suum genus, quia excedit in aversione, quæ formaliter complet peccatum.

Ad primum ergo dicendum, quod aliquod peccatum difficile cavetur dupliciter. Uno modo propter vehementiam impugnationis; sicut ira vehementer impugnat propter suum impetum; & adhuc difficilius est resistere concupiscentiæ propter eius connaturalitatem, ut dicitur in II. Ethic. (cap. ix. non procul a fine.) Et talis difficultas vitandi peccatum gravitatem peccati diminuit: quia quanto aliquis minoris tentationis impetu cadit, tanto gravius peccat, ut Augustinus dicit. Alio modo difficile est vitare aliquod peccatum propter eius latentiam; & hoc modo superbiæ difficile est vitare, quia etiam ex ipsis bonis occasione sumit, ut dictum est (art. præc. ad 3.) Et ideo signanter Augustinus dicit, quod *bonis operibus insidiatur*; & in Psal. cxli. 4. dicitur: *In via hac, qua ambulabam, absconderunt superbi la-*

R 2 quæcum



quum mihi. Et ideo motus superbiae occulte subrepens non habet maximam gravitatem, antequam per iudicium rationis deprehendatur; sed postquam deprehensus fuerit per rationem, tunc facile evitatur tum ex consideratione propriae infirmitatis, secundum illud Eccli. x. 9. *Quid superbis terra, & cinis?* tum etiam ex consideratione magnitudinis divinae, secundum illud Iob xv. 13. *Quid tumet contra Deum spiritus tuus?* tum etiam ex imperfectione bonorum de quibus superbit homo, secundum illud Isaïæ xl. 6. *Omnis caro senuit, & omnis gloria eius quasi flos agri:* & infra cap. lxiv. 6. *Quasi pannus menstruatus universa iusticie nostrae.*

Ad secundum dicendum, quod oppositio vitii ad virtutem attenditur secundum obiectum, quod consideratur ex parte conversionis: & secundum hoc superbia non habet quod sit maximum peccatorum, sicut nec humilitas quod sit maxima virtutum. Sed ex parte aversionis est maximum, utpote aliis peccatis magnitudinem præstans: nam per hoc ipsum infidelitatis peccatum gravius redditur, si ex superbia contemptu procedat, quam si ex ignorantia, vel infirmitate proveniat. Et idem dicendum est de desperatione, & aliis huiusmodi.

Ad tertium dicendum, quod sicut in syllogismis ducentibus ad impossibile quandoque aliquis convincitur per hoc quod ducitur ad inconvenientem magis manifestum; ita etiam ad convincendum superbiam hominum Deus aliquos punit, permittens eos ruere in peccata carnalia; quæ etsi sint minora, tamen manifestiorem turpitudinem continent. Unde Hieronymus dicit in Libro II. de summo bono (cap. xxxviii.) *omni vitio deteriores esse superbiam, seu propter hoc quod a summis personis, & primis assumitur, seu quod de opere iustitie & virtutis exoritur, minusque culpa eius sentitur. Luxuria vero carnis ideo notabilis omnibus est, quoniam statim per se turpis est; & tamen, dispensante Deo, superbia minor est. Sed qui destinetur superbia, & non sentit, labitur in carnis luxuriam, ut per hanc humiliatus a confusione exurgat.*

Ex quo etiam patet gravitas ipsius superbiae. Sicut enim medicus sapiens in remedium maioris morbi patitur infirmum in leviori morbo incidere; ita etiam peccatum superbiae gravius esse offenditur ex hoc ipso quod pro eius re-

medio Deus permittit ruere homines in alia peccata.

## ARTICULUS VII. 790

*Utrum superbia sit primum omnium peccatorum.*

II. Cor. xii. lect. 4.

**A**D septimum sic proceditur. Videtur quod superbia non sit primum omnium peccatorum. Primum enim saluatur in omnibus consequentibus. Sed non omnia peccata sunt cum superbia, nec oriuntur ex superbia: dicit enim Augustinus in Lib. de natura, & gratia (cap. xxix in medi.) quod *multa peccata sunt quæ non sunt superbe*. Ergo superbia non est primum omnium peccatorum.

2. Præterea. Eccli. x. 14. dicitur, quod *initium superbie est apostatare a Deo*. Ergo apostasia a Deo est prius quam superbia.

3. Præterea. Ordo peccatorum esse videtur secundum ordinem virtutum. Sed humilitas non est prima virtutum, sed magis fides. Ergo superbia non est primum peccatorum.

4. Præterea. II. ad Tim. iii. 13. dicitur: *Mali homines, & seductores proficiunt in peius*: & ita videtur, quod principium malicie hominis non sit a maximo peccatorum. Sed superbia est maximum peccatorum, ut dictum est (art. præc.) Non est igitur primum peccatorum.

5. Præterea. Id quod est secundum apparentiam, & fictionem, est posterius eo quod est secundum veritatem. Sed Philosophus dicit in III. Ethic. (cap. vii. cir. medi.) quod *superbus est filiorum fortitudinis, & audacie*. Ergo vitium audacie est prius vitio superbie.

Sed contra est quod dicitur Eccli. x. 19. *Initium omnis peccati est superbia*.

Respondetur dicendum, quod illud quod est per se, est primum in quolibet genere. Dictum est autem supra (art. præc.) quod aversio a Deo, quæ formaliter complet rationem peccati, pertinet ad superbiam per se, ad alia autem peccata ex consequenti: & inde est quod superbia habet rationem primi peccati, & est etiam principium omnium peccatorum, ut supra dictum est (1. 2. quæst. lxxxiv. art. 2.) cum de causis peccati ageretur, ex parte aversionis, quæ est principalior in peccato.

Ad

Ad primum ergo dicendum, quod superbia dicitur esse omnis peccati initium, non quia quodlibet peccatum singulariter ex superbia oriatur, sed quia quodlibet genus peccati natum est ex superbia oriri.

Ad secundum dicendum, quod apostatae a Deo dicitur esse superbiae humanae initium, non quasi aliquod aliud peccatum a superbia existens, sed quia est prima superbiae pars. Dicitur est enim (art. 5. hu. quaest.) quod superbia principaliter respicit subiectionem divinam, quam contemnit; ex consequenti autem contemnit subiaci creaturae propter Deum.

Ad tertium dicendum, quod non oportet esse eundem ordinem virtutum, & vitiolorum. Nam vitium est corruptivum virtutis. Id autem quod est primum in generatione, est postremum in corruptione. Et ideo sicut fides est prima virtutum; ita infidelitas est ultimum peccatorum, ad quam homo quandoque per alia peccata perducitur. Unde super illud Psal. cxxxvi. *Exinanite, exinanite usque ad fundamentum in ea*, dicit Glossa, quod „coacervatione vitiolorum subreptit dissidentia:“ & Apostolus dicit I. ad Timoth. 1. 19. *quod quidam repellentes conscientiam bonam circa fidem naufragaverunt*.

Ad quartum dicendum, quod superbia dicitur esse gravissimum peccatorum ex eo quod per se competit principio, ex quo attenditur gravitas in peccato. Et ideo superbia causat gravitatem aliorum peccatorum. Contingit ergo ante superbiam esse aliqua peccata (a) leviora, quae etiam ex ignorantia, vel infirmitate committuntur. Sed inter graviora peccata primum est superbia, sicut causa, per quam alia peccata aggravantur. Et quia id quod est primum in causando peccata, est etiam ultimum in recedendo; ideo super illud Psal. xviii. *Emundabor a delicto maximo*, dicit Glossa (interl.) „hoc est a delicto superbiae, quod est ultimum redeuntibus ad Deum, & primum recedentibus a Deo.“

Ad quintum dicendum, quod Philosophus ponit superbiam circa actionem fortitudinis, non quia solum in hoc consistat, sed quia per hoc homo reputat magis se posse excellentiam apud homines consequi, si audax, vel fortis videatur.

## ARTICULUS VIII. 791

*Utrum superbia debeat poni vitium capitale.*

**A**D octavum sic proceditur. Videtur quod superbia debeat poni vitium capitale. Isidorus enim (Lib. Comment. in Deut. cap. xvi.) & Cassianus (Lib. V. de institut. Cenob. cap. 1. & Lib. XII.) enumerant superbiam inter vitia capitalia.

2. Præterea. Superbia videtur esse idem inani gloriae, quia utraque excellentiam querit. Sed inanis gloria ponitur vitium capitale. Ergo etiam superbia debet poni vitium capitale.

3. Præterea. Augustinus dicit in Libro de virginitate (cap. xxxi. cir. med.) quod *superbia invidiam parit, nec unquam est sine tali comite*. Sed invidia ponitur vitium capitale, ut supra dictum est (quaest. xxxvi. art. 4.) Ergo multo magis superbia.

Sed contra est quod Gregorius XXXI. Moralium (cap. xvii. a. med.) non enumerat superbiam inter vitia capitalia.

Respondeo dicendum, quod, sicut ex supradictis patet (art. 2. hu. quaest. & art. 5. ad 1.) superbia dupliciter considerari potest: uno modo secundum se, prout scilicet est quoddam speciale peccatum; alio modo, secundum quod habet quandam universalem influentiam in omnia peccata. Capitalia autem vitia

nuntur esse quaedam specialia peccata, quibus multa genera peccatorum oriuntur. Et ideo quidam considerantes superbiam, secundum quod est quoddam speciale peccatum, connumeraverunt eam aliis vitiis capitalibus.

Gregorius vero considerans universalem eius influentiam, quam habet in omnia vitia, ut dictum est (art. 2. hu. quaest.) non connumeravit eam aliis capitalibus vitiis, sed posuit eam reginam omnium vitiolorum, & matrem: unde (b) dicit in XXXI. Moralium (loc. sup. cit.) *Ipse vitiolorum regina superbia, cum devictum plene cor cepit, mox illud septem principalibus vitiis, quasi quibusdam suis ducibus, devastandum tradit, ex quibus vitiolorum multitudines oriuntur*.

Et per hoc pater responso ad primum.

Ad secundum dicendum, quod superbia

*S. Tb. Oper. Tom. XXIII.*

(a) Nictalms graviora. (b) At, hic repetitur Gregorius.

bia non est idem inani gloriæ, sed causa eius. Nam superbia inordinate excellentiam appetit; sed inanis gloria appetit excellentiæ manifestationem.

Ad tertium dicendum, quod ex hoc quod invidia, quæ est vitium capitale, oritur ex superbia, non sequitur quod superbia sit vitium capitale; sed quod sit aliquid principalius capitalibus vitiis.

### QUAESTIO CLXIII.

*De peccato primi hominis,  
in quatuor articulos divisa.*

**D**Einde considerandum est de peccato primi hominis, quod fuit per superbiam: & primo de peccato eius; secundo de pœna peccati; tertio de tentatione, qua inductus est ad peccandum.

Circa primum quaeruntur quatuor.

Primo, utrum primum peccatum hominis fuerit superbia.

Secundo, quid primus homo peccando appetierit.

Tertio, utrum eius peccatum fuerit gravius omnibus aliis peccatis.

Quarto, quis plus peccaverit, utrum vir, vel mulier.

### ARTICULUS I. 792

*Utrum primi hominis peccatum  
fuerit superbia.*

*Inf. art. 3. & 4. cor. & III. P. quest. 1. art. 3. co. & II. dist. xxii. quest. 1. art. 1. & mal. quest. viii. art. 7. ad 12. 13. & 16. & Rom. v. lecti. 5. fin. & I. Tim. 11. fin.*

**A**D primum sic proceditur. Videtur quod superbia non fuerit primi hominis peccatum. Dicit enim Apostolus ad Rom. v. 19. quod *per inobedientiam unius hominis peccatores constituti sunt multi*. Sed primi hominis peccatum est ex quo omnes peccatores constituti sunt originali peccato. Ergo inobedientia fuit primum hominis peccatum, & non superbia.

2. Præterea. Ambrosius dicit super Luc. (cap. iv. super illud *Dixit autem illi diabolus*) quod eo ordine diabolus Christum tentavit, quo primum hominem deiecit. Sed Christus primo tentatus est de gula, ut patet Matth. 1v. 3. cum ei dictum est: *Si filius Dei es, dic ut lapides isti panes fiant*. Ergo primum

peccatum primi homini non fuit superbia, sed gula.

3. Præterea. Homo, diabolo suggerente, peccavit. Sed diabolus tentans hominem scientiam reppromisit, ut patet Gen. 22. Ergo prima inordinatio hominis fuit per appetitum scientiæ, quod pertinet ad curiositatem. Ergo curiositas fuit primum peccatum, & non superbia.

4. Præterea. Super illud I. ad Tim. 11. *Mulier seducta in prævaricatione fuit*, dicit Glossa (ordin. Augustini Lib. XI. sup. Gen. ad lit. cap. ult. a med.) „Hanc seductionem appellavit proprie „Apostolus, per quam id quod suadebatur, cum falsum esset, verum esse „putatum est; scilicet quod Deus lignum illud ideo tangere prohibuerit „quod sciebat eos, si tetigissent, velut „deos futuros, tamquam eis Divinitatem invideret, qui eos homines fecerant. „Sed hoc credere pertinet ad infidelitatem. Ergo primum peccatum hominis fuit infidelitas, & non superbia.

Sed contra est quod dicitur Eccli. x 15. *Initium omnis peccati superbia*. Sed peccatum primi hominis est initium omnis peccati, secundum illud Rom. v. 12. *Per unum hominem peccatum in hunc mundum intravit*. Ergo primum peccatum hominis fuit superbia.

Respondendo dicendum, quod ad unum peccatum multi notus concurrere possunt: inter quos ille habet rationem primi peccati in quo primo inordinatio invenitur. Manifestum est autem quod primo invenitur inordinatio in motu interiori animæ quam in actu exteriori corporis: quia, ut Augustinus dicit in I. de civ. Dei (cap. xviii. a med.) *non amittitur corporis sanctitas, manente animæ sanctitate*. Inter motus autem interiores prius movetur appetitus in finem quam in id quod quaeritur propter finem: & ideo ibi fuit primum peccatum hominis, ubi potuit esse primus appetitus inordinati finis. Sic autem homo erat in statu innocentie institutus, ut nulla esset rebellio carnis ad spiritum. Unde non potuit esse prima inordinatio appetitus humani ex hoc quod appetierit aliquid sensibile bonum, in quo carnis concupiscentia tendit præter ordinem rationis. Relinquitur igitur quod prima inordinatio appetitus humani fuit ex hoc quod aliquid bonum spirituale inordinatè appetiit. Non autem inordinate appe-

## ARTICULUS II. 793

*Utrum superbia primi hominis fuerit in hoc quod appetierit divinam similitudinem.*

*Is. xvii. lect. 2.*

tivisset, appetendo id secundum suam mensuram ex divina regula praestitutam. Unde relinquitur quod primum peccatum hominis fuit in hoc quod appetiit quoddam spirituale bonum supra suam mensuram; quod pertinet ad superbiam.

Unde manifestum est quod primum peccatum primi hominis fuit superbia.

Ad primum ergo dicendum, quod hoc quod homo non obediit divino praecepto, non fuit propter se ab eo volitum: quia hoc non posset contingere, nisi praesupposita inordinatione voluntatis. Relinquitur ergo quod voluerit propter aliquid aliud. Primum autem quod in ordinare voluit, fuit propria excellentia: & ideo inobedientia in eo causata fuit ex superbia. Et hoc est quod Augustinus dicit ad Orosium (in dialog. Q. 9. lxx. quat. iv. ante med.) quod *homo elatus superbia, suasioni serpentis obediens, praecipua Dei contemptor.*

Ad secundum dicendum, quod in peccato primorum parentum etiam gula locum habuit. Dicitur enim Gen. 3. 6. *Vidit mulier quod lignum esset bonum ad vescendum, & pulchrum oculis, aspectuque delectabile; & tulit de fructu eius, & comedit.* Non tamen ipsa bonitas, & pulchritudo cibi fuit primum motivum ad peccandum, sed potius suasio serpentis, qui dixit: *Apertientur oculi vestri, & eritis sicut dii*: quod appetendo superbiam mulier incurrit. Et ideo peccatum gula derivatum est ex peccato superbiae.

Ad tertium dicendum, quod appetitus scientiae causatus fuit in primis parentibus ex inordinato appetitu excellentiae: unde & in verbis serpentis praemittitur: *Eritis sicut dii*: & postea subditur: *Scientes bonum, & malum.*

Ad quartum dicendum, quod, sicut Augustinus dicit XI. super Genesim ad lit. (cap. xxx. a. med.) *verbis serpentis mulier non crederet, a bona, atque utili re divinitus se fuisse prohibito, nisi iam inest mens amor ille propriae possessatis, & quaedam de se superbia praesumptio.* Quod non est sic intelligendum, quasi superbia praecesserit suasionem serpentis, sed quia statim post suasionem serpentis invaluit mentem eius elatio, ex qua consecutum est ut crederet verum esse quod daemon dicebat.

**A**D secundum sic proceditur. Videtur quod superbia primi hominis non fuerit in hoc quod appetierit divinam similitudinem. Nullus enim peccat appetendo id quod sibi competit secundum suam naturam. Sed similitudo Dei competit homini secundum suam naturam: sicutur enim Genes. 1. 26. *Faciamus hominem ad imaginem & similitudinem nostram.* Ergo non peccavit divinam similitudinem appetendo.

2. Praeterea. In hoc videtur primus homo divinam similitudinem appetivisse, ut scientia boni, & mali potiretur: hoc enim ei a serpente fugebatur: *Eritis sicut dii, scientes bonum, & malum.* Sed appetitus scientiae est homini naturalis, secundum illud Philosophi in princip. Metaphys. *Omnes homines natura scire desiderant.* Ergo non peccavit appetendo divinam similitudinem.

3. Praeterea. Nullus sapiens eligit id quod est impossibile. Primus autem homo sapientia praeditus erat, secundum illud Ecclesi. xvii. 5. *Disciplina intellectus replevit illos.* Cum ergo omne peccatum consistat in appetitu deliberato, qui est electio, videtur quod primus homo non peccaverit appetendo aliquid impossibile. Sed impossibile est esse hominem similem Deo, secundum illud Exod. xv. 17. *Quis similis tui in fortibus, Domine?* Ergo primus homo non peccavit appetendo divinam similitudinem.

Sed contra est quod super illud Psalm. lxxviii. *Quae non rapui, tunc exolvebam*, dicit Augustinus (est in Glossa ordin.) „Adam, & Eva rapere voluerunt Divinitatem, & perdidit felicitatem.“

Respondeo dicendum, quod duplex est similitudo. Una omnimode aequiparantiae: & hanc similitudinem ad Deum primi parentes non appetierunt: quia talis similitudo ad Deum non cadit in apprehensione, praecipue sapientis.

Alia autem est similitudo imitationis, qualis possibilis est creaturae ad Deum, inquantum videlicet participat aliquid de similitudine ipsius secundum suam modum.

dum. Dionysius enim dicit in ix. cap. de divin. Nom. (a med. lect. 3.) *Eadem similia sunt Deo, & dissimilia: illud quidem secundum contingentem imitationem; hoc autem, secundum quod causata minus habent a causa.* Quodlibet autem bonum in creatura existens est quædam participata similitudo primi boni. Et ideo ex hoc ipso quod homo appetit aliquid spirituale bonum supra suam mensuram, ut dictum est (art. præc.) consequens est quod appetierit divinam similitudinem inordinate.

Considerandum tamen est, quod appetitus est proprie rei non habitæ. Bonum autem spirituale, secundum quod creatura rationalis divinam participat similitudinem, potest secundum tria attendi. Primo quidem secundum ipsum esse naturæ: & talis similitudo ab ipso creationis principio fuit impressa & homini, de quo dicitur Gen. 1. 26. quod *Deus fecit hominem ad imaginem & similitudinem suam, & Angelo, de quo dicitur Ezech. xxviii. 12. Tu signaculum similitudinis.* Secundo vero quantum ad cognitionem: & hanc etiam similitudinem in sui creatione Angelus accepit: unde in præmissis verbis cum dictum esset, *Tu signaculum similitudinis*, statim subditur, *Plenus sapientia.* Sed primus homo in sua creatione istam similitudinem nondum actu adeptus erat, sed solum in potentia. Tercio quantum ad potestatem operandi: & hanc similitudinem nondum erant in actu assecuti neque Angelus, neque homo in ipso creationis principio: quia utrique restabat aliquid agendum, quo ad beatitudinem pervenirent.

Et ideo cum uterque (scilicet diabolus, & primus homo) inordinate divinam similitudinem appetierit, neuter eorum peccavit appetendo similitudinem naturæ. Sed primus homo peccavit principaliter appetendo similitudinem Dei quantum ad scientiam boni, & mali, sicut serpens ei suggessit, ut scilicet per virtutem propriæ naturæ determinaret sibi quid esset bonum, & quid malum ad agendum; vel etiam ut per seipsum præcognosceret quid sibi boni, vel mali esset futurum: & secundario peccavit appetendo similitudinem Dei quantum ad propriam potestatem operandi, ut scilicet virtute propriæ naturæ operaretur ad beatitudinem consequendam. Unde Augustinus dicit XI. super Gen. ad lit. (cap. xxx. cir. med.) quod *menti mulieris inhaerens amor propriæ*

*potestatis.* Sed diabolus peccavit appetendo similitudinem Dei quantum ad potestatem. Unde Augustinus dicit in Libro de vera religione (cap. xiiii. cir. med.) quod *magis voluit sua potentia frui quam Dei.* Verumtamen quantum ad aliquid uterque Deo æquiparari appetiit, in quantum scilicet uterque sibi inniri voluit, contempto divinæ regulæ ordine.

Ad primum ergo dicendum, quod ratio illa procedit de similitudine naturæ, ex cuius appetitu homo non peccavit, ut dictum est.

Ad secundum dicendum, quod appetere similitudinem Dei absolute quantum ad scientiam, non est peccatum; sed appetere huiusmodi similitudinem inordinate, id est supra mensuram suam, peccatum est. Unde super illud Pl. lxx. *Deus, quis similis erit tibi?* dicit Augustinus (est in Glosia ord.) „Qui per se vult esse, ut „Deus a nullo est, perverse vult „esse similis Deo, ut diabolus, qui non „luit esse sub eo, & homo, qui ut ser- „vus noluit teneri præcepto.“

Ad tertium dicendum, quod ratio illa procedit de similitudine æquiparantiæ.

### ARTICULUS III. 794

*Utrum peccatum primorum parentum fuerit ceteris gravius.*

1. 2. quæst. lxxxiii. art. 3. cor. & II. dist. xxxi. quæst. 11. art. 2. & dist. xxxiii. in exposit. lit. ad 1. & 2.

**A**D tertium sic proceditur. Videtur quod peccatum primorum parentum fuerit ceteris gravius. Dicit enim Augustinus XIV. de civit. Dei (cap. xv. non remote a princ.) *Magna fuit in peccando iniquitas, ubi tanta fuit non peccandi facilitas.* Sed primi parentes maximam habuerunt facilitatem ad non peccandum, quia nihil habebant intrinsecus quod eos ad peccandum impelleret. Ergo peccatum primorum parentum fuit ceteris gravius.

2. Præterea. Pœna proportionatur culpæ. Sed peccatum primorum parentum gravissime est punitum, quia per ipsum mors introivit in hunc mundum, ut Apostolus dicit ad Rom. v. 12. Ergo peccatum illud fuit gravius ceteris peccatis.

3. Præterea. Primum in quolibet genere videtur esse maximum, ut dicitur in

in II. Metaphysicæ (tex. iv.) Sed peccatum primorum parentum fuit primum inter alia peccata hominum. Ergo fuit maximum.

Sed contra est quod Origenes dicit (Lib. I. Periarch. cap. III. in fi.) *Non arbitror quod aliquis ex his qui in summo perfectoque constituerint gradu, ad subitum evacuetur, aut decidat; sed paulatim, & per partes defluere eum necesse est.* Sed primi parentes in summo, perfectoque gradu consistebant. Non ergo eorum primum peccatum fuit maximum omnium peccatorum.

Respondeo dicendum, quod duplex gravitas in peccato attendi potest: una quidem ex ipsa specie peccati, sicut dicimus, adulterium esse gravius peccatum simplici fornicatione; alia autem est gravitas peccati, quæ attenditur secundum aliquam circumstantiam loci, vel personæ, aut temporis. Prima autem gravitas essentialior est peccato, & principalior: unde secundum eam magis peccatum dicitur grave quam secundum aliam. Dicendum est igitur, quod peccatum primi hominis non fuit gravius omnibus aliis peccatis humanis secundum speciem peccati. Etsi enim superbia secundum suum genus habeat quamdam excellentiam inter alia peccata; maior tamen est superbia qua quis Deum negat, vel blasphemat, quam superbia qua quis inordinate divinam similitudinem appetit; qualis fuit superbia primorum parentum, ut dictum est (art. præc.)

Sed secundum conditionem personarum peccantium, peccatum illud habuit maximam gravitatem propter perfectionem status ipsorum. Et ideo dicendum est, quod illud peccatum fuit quidem secundum quid gravissimum, non tamen simpliciter.

Ad primum ergo dicendum, quod illa ratio procedit de gravitate peccati ex circumstantia peccantis.

Ad secundum dicendum, quod magnitudo poenæ quæ consecuta est ad illud primum peccatum, non correspondet ei secundum quantitatem propriæ speciei, sed inquantum fuit primum: quia ex hoc interrupta est innocentia primi status, qua subiecta, deordinata est tota natura humana.

Ad tertium dicendum, quod in his quæ sunt per se ordinata, oportet id quod est primum, esse maximum. Talis autem ordo non attenditur in peccatis, sed unum per accidens sequitur post al-

liud. Unde non sequitur quod primum peccatum sit maximum.

## ARTICULUS IV. 795

*Utrum peccatum Adæ fuerit gravius quam peccatum Evæ.*

II. dist. XXII. quæst. 1. art. 3.

**A**D quartum sic proceditur. Videtur quod peccatum Adæ fuerit gravius quam peccatum Evæ. Dicitur enim I. ad Tim. II. 14. *quod Adam non est seductus, mulier autem est seducta in pravaricatione fuit: & sic videtur quod peccatum mulieris fuerit ex ignorantia, peccatum autem viri ex certa scientia.* Sed huiusmodi peccatum est gravius, secundum illud Luc. XII. 47. *Ille servus qui cognovit voluntatem domini sui... & non fecit secundum voluntatem eius, vapulabit multis; qui autem non cognovit, & fecit digna plagis, vapulabit paucis.* Ergo Adam gravius peccavit quam Eva.

2. Præterea. Augustinus dicit in Libro de decem chordis (cap. III. a med.) *Si caput est vir, melius debet vivere, & præcedere in omnibus bonis factis, maxime uxorem suam, ut illa imitetur virum.* Sed ille qui melius debet facere, si peccet, gravius peccat. Ergo Adam gravius peccavit quam Eva.

3. Præterea. Peccatum in Spiritum sanctum videtur esse gravissimum. Sed Adam in Spiritum sanctum videtur peccasse, quia peccavit cogitans de divina misericordia; quod pertinet ad peccatum presumptionis. Ergo videtur quod Adam gravius peccavit quam Eva.

Sed contra est quod poena respondet culpæ. Sed mulier est gravius punita quam vir, ut patet Gen. III. Ergo gravius peccavit quam vir.

Respondeo dicendum, quod, sicut dictum est (art. præc.) gravitas peccati principalius attenditur secundum peccati speciem quam secundum peccati circumstantiam. Dicendum est ergo, quod si consideremus conditionem personæ utriusque, scilicet mulieris, & viri, peccatum viri est gravius, quia erat perfectior muliere.

Sed quantum ad ipsum genus peccati utriusque peccatum æqualiter dicitur, quia utriusque peccatum fuit superbia. Unde Augustinus dicit XI. super Gen. ad lit. (cap. XXXV. a med.) *quod mulier ex-*  
*cusa-*

*cusavit peccatum suum impuri sexu, sed pari fasce.*

Sed quantum ad speciem superbiz gravius peccavit mulier, triplici ratione. Primo quidem quia maior elatio fuit mulieris quam viri: mulier enim creditur verum esse quod serpens suasit, scilicet quod Deus prohibuerit ligni esum, ne ad eius similitudinem pervenirent: & ita dum per esum ligni vetiti Dei similitudinem consequi voluit, superbia eius ad hoc se erexit quod contra Dei voluntatem aliquid voluit obtinere. Sed vir non creditur hoc esse verum: unde non voluit consequi divinam similitudinem contra Dei voluntatem; sed in hoc superbivit, quod voluit eam consequi per seipsum. Secundo quia mulier non solum ipsa peccavit, sed etiam viro peccatum suggessit: unde peccavit & in Deum, & in proximum. Tercio in hoc quod peccatum viri diminutum est ex hoc quod in peccatum *consensit amabili quadam benevolentia, qua plerumque fit ut offendatur Deus, ne homo ex amico fiat inimicus; quod cum facere non debuisse divine sententie iustus exitus indicavit*, ut Augustinus dicit XI. super Gen. ad lit. (cap. ult. a med.) Et sic patet quod peccatum mulieris fuit gravius quam peccatum viri.

Ad primum ergo dicendum, quod illa seductio mulieris ex precedenti elatione subsecuta est. Et ideo talis ignorantia non excusat, sed aggravat peccatum, inquantum scilicet ignorando in maiorem elationem erecta est.

Ad secundum dicendum, quod ratio illa procedit ex circumstantia conditionis personæ, ex qua peccatum viri fuit gravius secundum quid.

Ad tertium dicendum, quod vir non cogitavit de divina misericordia usque ad contemptum divine iustitiæ, quod facit peccatum in Spiritum sanctum; sed quia, ut Augustinus dicit XIV. de civit. Dei (cap. xi. cir. fi.) *inexpertus divine severitatis credidit illud peccatum esse veniale, id est de facili remissibile.*

## QUAESTIO CLXIV.

*De panis peccati primi hominis,*

*in duos articulos divisa.*

**D**Einde considerandum est de pœna primi peccati: & circa hoc quaeruntur duo.

Primo de morte, quæ est pœna communis.

Secundo de aliis particularibus pœnis, quæ in Genesi assignantur.

## ARTICULUS I. 796

*Utrum mors sit pœna peccati primorum parentum.*

1. 2. *quest. lxxxv. art. 3. & II. dist. xxx. quest. 1. art. 1. & III. dist. xvi. quest. 1. art. 1. & IV. prol. princ. & dist. iv. quest. 1. art. 1. quest. 3. & IV. con. cap. 11. & mal. quest. xv. art. 4. & opusc. 111. cap. cxcvii. cxcviii. cexli. & cexlii. & Rom. v. lect. 3. & Hebr. ix. fin.*

**A**D primum sic proceditur. Videtur quod mors non sit pœna peccati primorum parentum. Id enim quod est homini naturale, non potest dici pœna peccati, quia peccatum non perficit naturam, sed vitiat. Mors autem est homini naturalis; quod patet ex hoc quod corpus eius ex contrariis componitur, & ex hoc etiam quod mortale ponitur in definitione hominis. Ergo mors non est pœna peccati primorum parentum.

2. Præterea. Mors, & alii corporales defectus similiter inveniuntur in homine, sicut & in aliis animalibus, secundum illud Eccl. 111. 19. *Unus interitus est hominis, & inmentorum, & æqua utriusque conditio.* Sed in animalibus brutis mors non est pœna peccati. Ergo etiam neque in hominibus.

3. Præterea. Peccatum primorum parentum fuit specialius personarum. Sed mors consequitur totam humanam naturam. Ergo non videtur esse pœna peccati primorum parentum.

4. Præterea. Omnes æqualiter derivant a primis parentibus. Si igitur mors esset pœna peccati primorum parentum, sequeretur quod omnes homines æqualiter mortem paterentur: quod patet esse falsum, quia quidam citius aliis, & gravius moriuntur. Ergo mors non est pœna primi peccati.

5. Præterea. Malum pœnz est a Deo, ut supra habitum est (I. P. quest. xlix. art. 2.) Sed mors non videtur esse a Deo: dicitur enim Sap. 1. 13. *quod Deus mortem non fecit.* Ergo mors non est pœna primi peccati.

6. Præterea. Pœnz non videntur esse meritoriz: nam meritum continetur sub bono, pœna autem sub malo. Sed mors quan-

quandoque est meritoria, sicut patet de morte Martyrum. Ergo videtur quod mors non sit poena.

7. Præterea. Poena videtur esse afflictiva. Sed mors non potest esse afflictiva, ut videtur: quia quando mors est, eam homo non sentit; quando autem non est, sentiri non potest. Ergo mors non est poena peccati.

8. Præterea. Si mors esset poena peccati, statim fuisset ad peccatum consecuta. Sed hoc non est verum: nam primi parentes post peccatum diu vixerunt, ut patet Gen. iv. Ergo mors non videtur esse poena peccati.

Sed contra est quod Apostolus dicit ad Rom. v. 12. *Per unum hominem peccatum in hunc mundum intravit, & per peccatum mors.*

Respondendo dicendum, quod si aliquis propter culpam suam privetur aliquo beneficio sibi dato, carentia illius beneficii est poena culpæ illius. Sicut autem in primo dictum est (quæst. xcv. art. 1. & quæst. xcvi. art. 1.) homini in sua prima institutione hoc beneficium fuit collatum divinitus, ut quamdiu mens eius esset Deo subiecta, interiores vires animæ subicerentur rationali menti, & corpus animæ subiceretur. Sed quia mens hominis per peccatum a divina subiectione recessit, consecutum est ut nec interiores vires totaliter subicerentur rationi: unde tanta consecuta est rebellio carnalis appetitus ad rationem, ut nec etiam corpus totaliter subiceretur animæ: unde consequitur mors, & alii corporales defectus. Vita enim, & incolumitas corporis consistit in hoc quod subiciatur animæ, sicut perfectibile suæ perfectioni. Unde per oppositum mors, & ægritudo, & quilibet corporalis defectus pertinet ad defectum subiectionis corporis ad animam.

Unde patet quod sicut rebellio carnalis appetitus ad spiritum est poena peccati primorum parentum; ita etiam & mors, & omnes corporales defectus.

Ad primum ergo dicendum, quod naturale dicitur quod ex principiis naturæ causatur. Naturæ autem per se principia sunt forma, & materia. Forma autem hominis est anima rationalis, quæ est de se immortalis; & ideo mors non est naturalis homini ex parte suæ formæ. Materia autem hominis est corpus tale quod est ex contrariis compositum, ad quod sequitur ex necessitate corruptibilitas; & quantum ad hoc mors est homini na-

turalis. Hæc autem conditio in natura humani corporis est consequens ex necessitate materiæ: quia oportebat corpus humanum esse organum tactus, & per consequens medium inter tangibilia; & hoc non poterat esse, nisi esset ex contrariis compositum, ut patet per Philosophum in II. de Anima (tex. lxx. & seq.) Non autem est conditio secundum quam materia adaptetur formæ: quia si esset possibile, cum forma sit incorruptibilis, potius oporteret materiam incorruptibilem esse; sicut quod terra sit ferrea, competit formæ, & actioni eius, ut per duritiem sit apta ad secundum; sed quod sit potens rubiginem contrahere, consequitur ex necessitate talis materiæ, & non secundum electionem agentis: nam si artifex posset, faceret ex ferro terram quæ rubiginem contrahere non posset. Deus autem, qui est conditor hominis, omnipotens est: unde ademit suo beneficio ab homine primitus instituto necessitatem moriendi ex tali materia consequentem: quod tamen beneficium subtrahitum est per peccatum primorum parentum. Et sic mors & est naturalis propter conditionem materiæ, & est poenalis propter amissionem divini beneficii præservantis a morte.

Ad secundum dicendum, quod similitudo illa hominis ad alia animalia attenditur quantum ad conditionem materiæ, id est quantum ad corpus ex contrariis compositum, non autem quantum ad formam: nam anima hominis est immortalis, brutorum vero animalium animæ sunt mortales.

Ad tertium dicendum, quod primi parentes fuerunt a Deo instituti non solum sicut quædam personæ singulares, sed sicut quædam principia totius humanæ naturæ ab eis ad posteros derivandæ simul cum beneficio divino præservante a morte. Et ideo per eorum peccatum tota humana natura in posteris tali beneficio destituta mortem incurrit.

Ad quartum dicendum, quod aliquis defectus ex peccato consequitur dupliciter. Uno modo per modum poenæ taxatæ a iudice: & talis defectus æqualis debet esse in his ad quos æqualiter pertinet peccatum. Alius autem defectus est qui ex huiusmodi poena per accidens consequitur, sicut quod aliquis pro culpa sua excecatus cadat in viam: & talis defectus culpæ non proportionatur, nec ab homine iudice penatur, qui non potest sortitos eventus præcognoscere.



re. Sic ergo pœna taxata pro primo peccato proportionaliter ei respondens fuit substractio divini beneficii, quo relictus, & integritas humanæ naturæ conservabatur. Defectus autem consequentes substructionem huiusmodi beneficii sunt mors, & aliæ pœnalitates præsentis vitæ. Et ideo non oportet huiusmodi pœnas æquales esse in his ad quos equaliter pertinet primum peccatum. Verum quia Deus præsciens est omnium futurorum eventuum, ex dispositione divinæ præscientiæ, & providentiæ huiusmodi pœnalitates diversimode in diversis inveniuntur: non quidem propter aliqua merita, vel demerita præcedentia hanc vitam, ut Origenes potuit (Lib. II. Periarch. cap. ix. a med.) hoc enim est contra id quod dicitur Rom. ix. 11. *Cum nondum aliquid boni, aut mali e- gissent:* & etiam est contra hoc quod in primo ostensum est (quæst. xlvii. art. 3. & quæst. lxxv. art. 7. & quæst. xc. art. 4.) quod anima non est creata ante corpus: sed vel in pœnam paternorum peccatorum, in quantum filius est quædam res patris, unde frequenter parentes puniuntur in prole; vel etiam propter remedium salutis eius qui huiusmodi pœnalitatibus subditur, ut scilicet per hoc a peccatis arceatur, aut etiam de virtutibus non superbiat, & per patientiam coronetur.

Ad quintum dicendum, quod mors dupliciter potest considerari. Uno modo secundum quod est quoddam malum humanæ naturæ: & sic non est ex Deo, sed est defectus quidam incidens ex culpa humana. Alio modo potest considerari, secundum quod habet quandam rationem boni, prout scilicet est quædam iusta pœna: & sic est a Deo. Unde Augustinus dicit in Lib. I. Retrahat. (cap. xxi. cir. med. & cap. xxv. parum a princ.) quod Deus non est auctor mortis, nisi in quantum est (a) mors pœna.

Ad sextum dicendum, quod, sicut Augustinus dicit XIII. de civit. Dei (cap. v. ad fi.) *quemadmodum iniusti male utuntur non tantum malis, verum etiam bonis; ita iusti bene utuntur non tantum bonis, sed etiam malis. Hinc fit ut & mali male lege utantur, quamvis lex sit bonum, & boni bene moriantur, quamvis sit mors malum.* In quantum igitur sancti bene morte utuntur, fit eis mors meritoria.

Ad septimum dicendum, quod mors

dupliciter accipi potest. Uno modo pro ipsa privatione vitæ: & sic mors sentiri non potest, cum sit privatio sensus, & vitæ; & sic non est pœna sensus, sed pœna damni. Alio modo secundum quod nominat ipsam corruptionem, quæ terminatur ad privationem prædictam. De corruptione autem, sicut & de generatione dupliciter loqui possumus. Uno modo, secundum quod est terminus alterationis: & sic in ipso instanti quo primo privatur vita, dicitur inesse mors: & secundum hoc etiam mors non est pœna sensus. Alio modo corruptio potest accipi cum alteratione præcedente, prout dicitur aliquis mori, dum movetur in mortem; sicut dicitur aliquid generari, dum movetur in generatum esse: & sic mors potest esse aïhiſtiva.

Ad octavum dicendum, quod, sicut Augustinus dicit XI. super Gen. ad lit. (cap. xxxii.) *Hec mors ea die accidit qua factum est quod Deus creavit: quia ex tunc morbidam qualitatem, & mortiferam primi parentes in corpore mortali contraxerunt.* Vel, sicut dicit Lib. I. de peccatorum meritis, & remissione (cap. xvi. cir. med.) *quamvis annos multos primi parentes posſea vixerint, illo tamen die mori ceperunt quo mortis legem, qua in senium veteraſcerent, acceperunt.*

## ARTICULUS II. 797

*Utrum convenienter particulares pœnæ primorum parentum determinentur in Scriptura.*

II. dist. xxxix. quæst. 1. art. 5.

**A**D secundum sic proceditur. Videtur quod inconvenienter particulares pœnæ primorum parentum determinentur in Scriptura. Non enim debet assignari ut pœna peccati id quod etiam sine peccato esset. Sed dolor in partu esset, ut videtur, etiam sine peccato: hoc enim requirit dispositio semine fetus, ut proles nasci non possit sine dolore parentis: similiter etiam subiectio mulieris ad virum consequitur ad perfectionem virilis lexis, & imperfectionem muliebris: germinatio etiam spinarum, & tribulorum ad naturam terræ pertinet, quæ fuisset etiam sine peccato. Non ergo huiusmodi sunt convenientes pœnæ primi peccati.

2. Præterea. Id quod pertinet ad dignitatem alicuius, non videtur ad pœnam

(a) *Niclaus omittit mors.*

nam eius pertinere. Sed multiplicatio conceptus pertinet ad dignitatem mulieris. Ergo non debet poni quasi mulieris poena.

3. Præterea. Poena peccati primorum parentum ad omnes derivatur, sicut de morte dictum est (art. præc.) Sed non omnium mulierum multiplicantur conceptus, nec omnes viri in sudore vultus sui pane vescuntur. Non ergo istæ sunt convenientes poenæ primi peccati.

4. Præterea. Locus paradisi propter hominem factus erat. Sed nihil debet esse frustra in rerum ordine. Ergo videtur quod non fuerit conveniens hominis poena quod a paradiso excluderetur.

5. Præterea. Locus ille paradisi terrestris de se dicitur esse inaccessibilis. Frustra ergo apposita sunt alia impedimenta, ne homo illuc reverteretur, scilicet Cherubin, & gladius flammeus, atque versatilis.

6. Præterea. Homo post peccatum statim necessitati mortis fuit addictus; & ita beneficio ligni vitæ non poterat ad immortalitatem reparari. Frustra ergo ei usus ligni vitæ interdicitur, cum dicitur Gen. 3. 22. (a) *Videte ne forte sumat de ligno vitæ, & vivat æternum.*

7. Præterea. Insultare misero, videtur misericordiae, & clementiae repugnare, quæ maxime in Scriptura Deo attribuitur, secundum illud Psal. cxlv. 9. *Miserationes eius super omnia opera eius.* Ergo inconvenienter ponitur, Deum insultasse primis parentibus per peccatum iam in miseriam deductis, ubi dicitur (Gen. 3. 22.) *Ecce Adam quasi unus ex nobis factus est sciens bonum, & malum.*

8. Præterea. Vestitus ad necessitatem hominis pertinet, sicut & cibus, secundum illud I. ad Timoth. ult. 8. *Habentes alimenta, & quibus tegamur, his contenti sumus.* Ergo sicut cibus primis parentibus fuit attributus ante peccatum, ita etiam & vestitus attribui debuit. Inconvenienter ergo post peccatum dicitur eis Deus tunicas pelliceas fecisse.

9. Præterea. Poena quæ alicui peccato adhibetur, debet plus habere in malo quam emolumentum quod quis ex peccato consequitur; alioquin per poenam non deterreretur quis a peccato. Sed primi parentes ex peccato consecuti sunt quod eorum oculi aperirentur, ut dicitur Gen. 3. 11. Hoc autem præponde-

rat in bono omnibus malis poenalibus, quæ ponuntur ex peccato consecuta. Inconvenienter ergo describuntur poenæ peccatum primorum parentum consequentes.

In contrarium est quod huiusmodi poenæ sunt divinitus taxatæ a Deo, quomodo facit in numero, pondere, & mensura, ut dicitur Sap. x3.

Respondendo dicendum, quod, sicut dictum est (art. præc.) primi parentes propter suum peccatum privati sunt beneficio divino, quo humanæ naturæ integritas in eis conservabatur, per cuius subtractionem humana natura in defectus poenales incidit. Et ideo dupliciter puniti fuerunt. Primo quidem quantum ad hoc quod subtractum fuit eis id quod integritatis statui competeat, scilicet locus terrestris paradisi: quod significatur Gen. 3. 23. cum dicitur: *Etemisti eum Deus de paradiso voluptatis.* Et quia ad illum statum primæ innocentie per seipsum sedire non poterat, convenienter apposita sunt impedimenta, ne rediret ad ea quæ primo statui competeant, scilicet a cibo, ne sumeret de ligno vitæ, & a loco, collocavit enim Deus ante paradisum Cherubin, & flammeum gladium.

Secundo autem puniti fuerunt quantum ad hoc quod attributa sunt eis ea quæ naturæ conveniunt tali beneficio destitutæ: & hoc quidem quantum ad corpus, & quantum ad animam. Quantum quidem ad corpus, ad quod pertinet differentia sexus, alia poena attributa est mulieri, alia viro. Mulieri quidem attributa est poena secundum duo, propter quæ viro coniungitur; quæ sunt generatio prolis, & communicatio operum pertinentium ad domesticam conversationem. Quantum autem ad generationem prolis punita fuit dupliciter. Primo quidem quantum ad tædia, quæ sustinet portando prolem conceptam: & hoc significatur cum dicitur (Gen. 3. 16.) *Multiplicabo ærumnas tuas, & conceptus tuos:* & quantum ad dolorem quem patitur in pariendo: & quantum ad hoc dicitur: *In dolore paries.* Quantum vero ad domesticam conversationem punitur secundum hoc quod subiacetur dominationi viri per hoc quod dicitur: *Sub viri potestate eris.* Sicut autem ad mulierem pertinet ut subdatur viro in his quæ ad domesticam conversationem pertinent; ita ad virum pertinet

(a) In Vulgata desit Videre.

net quod necessaria vitæ procuret. Et circa hoc punitur tripliciter. Primo quidem per terræ sterilitatem, cum dicitur: *Maledicta terra in opere tuo*. Secundo per laboris anxietatem, sine qua fructus terræ non percipit: unde dicitur: *In labore comedes ex ea cunctis diebus vitæ tuæ*. Tercio quantum ad impedimenta quæ proveniunt terram colentibus: unde dicitur: *Spinæ, & tribulos germinabis tibi*.

Similiter etiam ex parte animæ tripliciter eorum poena describitur. Primo quidem quantum ad confusionem, quam passi sunt de rebellionem carnis ad spiritum: unde dicitur: *Aperi sunt oculi amborum, & cognoverunt se esse nudos*. Secundo quantum ad increpationem propriæ culpæ: per hoc quod dicitur: *Ecce Adam factus est quasi unus ex nobis*. Tercio quantum ad commemorationem futuræ mortis, secundum quod ei dictum est: *Pulvis es, & in pulverem reverteris*. Ad quod etiam pertinet quod Deus fecit eis tunicas pelliceas in signum mortalitatis eorum.

Ad primum ergo dicendum, quod in statu innocentie fuisset partus absque dolore: dicit enim Augustinus in XIV. de civit. Dei (cap. xxvi. cir. med.) *Sicut ad pariendum non doloris gemitus, sed matutinitatis impulsus semine relaxaret; ita ad festandum, & concipiendum non libidinis appetitus, sed voluntarius usus naturam utramque coniungeret*. Subiectio autem mulieris ad virum intelligenda est in poenam mulieris esse inducenda, non quantum ad regimen (quia etiam ante peccatum vir caput mulieris fuisset, & eius gubernator extitisset) sed prout mulier contra propriam voluntatem nunc necesse habet viri voluntati parere. Spinæ autem, & tribulos terra germinasset, si homo non peccasset, in cibum animalium, non autem in hominis poenam: quia scilicet propter eorum exortum nullus labor, aut punitio homini operanti in terra accideret, ut Augustinus dicit III. super Gen. ad lit. (cap. xviii.) *Quamvis Alcuinus dicat, quod ante peccatum terra omnino spinas, & tribulos non germinasset. Sed primum est melius*.

Ad secundum dicendum, quod multando conceptum inducitur in poenam mulieris, non propter ipsam procreationem proles, quæ etiam ante peccatum fuisset, sed propter multitudinem affli-

ctionum, quas mulier patitur ex hoc quod poreat solum conceptum. Unde signanter coniungitur: *Multiplicabo ærumnas tuas, & conceptus tuos*.

Ad tertium dicendum, quod illæ poenæ aliquantulum ad omnes pertinent. Quæcumque enim mulier concipit, necesse est quod ærumnas patiatur, & cum dolore pariat; præter B. Virginem, quæ sine corruptione concepit, & sine dolore peperit: quia eius conceptio non fuit secundum legem naturæ a primis parentibus derivata. Si autem aliqua non concipit, neque parit, patitur sterilitatis defectum, qui præponderat poenæ prædictis. Similiter etiam oportet ut quicumque terram operatur, in sudore vultus comedat panem: & ipsi qui per se agriculturam non exercent, in aliis laboribus occupantur: homo enim nascitur ad laborem, ut dicitur Job v. 7. (a) & sic panem ab aliis in sudore vultus elaboratum manducant.

Ad quartum dicendum, quod locus ille paradisi terrestris, quævis non serviat homini ad usum, servit tamen ei ad documentum; dum cognoscit, propter peccatum se tali loco fuisse privatum; & dum per ea quæ corporaliter in illo paradiso sunt, instruitur de his quæ pertinent ad paradisi celestem, quo aditus homini præparatur per Christum.

Ad quintum dicendum, quod, salvis spiritualis sensus mysteriis, ille locus præcipue videtur esse inaccessibilis propter vehementiam æstus in locis intermediis ex propinquitate Solis: & hoc significatur per flammæum gladium, qui versatilis dicitur propter proprietatem motus circularis huiusmodi æstus causantis. Et quia motus corporalis creaturæ disponitur ministerio Angelorum, ut patet per Augustinum III. de Trinit. (cap. iv. ante med.) convenienter etiam simul cum gladio versatilis Cherubin adiungitur ad custodiendam viam heni vitæ. Unde Augustinus dicit in XI. super Gen. ad lit. (cap. xi. in fin.) *Hoc per celestes utique potestates etiam in paradiso visibili factum esse credendum est, ut per angelicum ministerium esset illic quadam ignea custodia*.

Ad sextum dicendum, quod homo si post peccatum de ligno vitæ comessisset, non propter hoc immortalitatem recuperasset, sed beneficio illius cibi potuisset vitam magis prolongare. Unde quod dicitur:

(a) Ita mss. & edidit passim. Nescimus qui ab aliis in sudore vultus elaboratur, Theologus videtur legendum & sic panem cum aliis in sudore vultus manducant.

## ARTICULUS I. 798

*Utrum fuerit conveniens ut homo a diabolo tentaretur.*

dicitur, *Et vivat in aeternum*, sumitur ibi aeternum pro diuturno. Hoc autem non expediebat homini ut in miseria huius vitae diutius permaneret.

Ad septimum dicendum, quod, sicut Augustinus dicit XI. super Gen. ad lit. (cap. xxxix. a med.) *verba haec Dei non tam sunt primis parentibus infulsantis, quam ceteros, ne ita superbiat, deterrentur, propter quos ista conscripta sunt: quia scilicet non solum Adam non fuit factus, qualis fieri voluit, sed nec illud ad quod factus fuerat, conservavit.*

Ad octavum dicendum, quod vestitus necessarius est homini secundum statum praesentis miseriae propter duo. Primo quidem propter defectum ab exterioribus nocementis, puta intemperati caloris, & frigoris; secundo ad tegumentum ignominiae, ne turpitudine membrorum appareat, in quibus praecipue manifestatur rebellio carnis ad spiritum. Haec autem duo in primo statu non erant: quia in statu illo corpus hominis non poterat per aliquod extrinsecum laedi, ut in primo dictum est (quaest. xcvi. art. 2.) Nec etiam erat in statu illo aliqua turpitudine in corpore hominis, quae ad confusionem induceret. Unde dicitur Gen. 11. 25. *Erant autem uterque nudus, Adam scilicet, & uxor eius, & non erubescabant.* Alia autem ratio de cibo est, qui est necessarius ad fomentum caloris naturalis, & ad corporis augmentum.

Ad nonum dicendum, quod, sicut Augustinus dicit XI. super Gen. ad lit. (cap. xxxi.) *non est credendum quod primi parentes essent producti clausis oculis; praecipue cum de muliere dicatur, quod vidit lignum, quod esset pulchrum, & bonum ad vescendum.* Aperti ergo sunt oculi amborum ad aliquid intuendum, & cogitandum quod antea nunquam advertebant, scilicet ad invicem concupiscendum, quod ante non fuerat.

## QUAESTIO CLXV.

*De tentatione primorum parentum, in duos articulos divisa.*

**D**einde considerandum est de tentatione primorum parentum: circa quam quaeruntur duo.

Primo, utrum fuerit conveniens quod a diabolo homo tentaretur.

Secundo de modo, & ordine, illius tentationis.

**A**D primum sic proceditur. Videtur quod non fuerit conveniens ut homo a diabolo tentaretur. Eadem enim poena finalis debetur peccato angeli, & peccato hominis, secundum illud Matth. xxv. 41. *Ite maledicti in ignem aeternum, qui parati estis diabolo, & angelis eius.* Sed primum peccatum angeli non fuit ex aliqua tentatione exteriori. Ergo nec primum peccatum hominis debuit esse ex aliqua exteriori tentatione.

2. Præterea. Deus praecius futurorum sciebat quod homo per tentationem demonis in peccatum deliceretur; & sic bene sciebat quod non expediebat ei quod tentaretur. Ergo videtur quod nec fuerit conveniens quod permitteret eum tentari.

3. Præterea. Quod aliquis impugnatorum habeat, ad poenam pertinere videtur; sicut & e contrario pertinere videtur ad primum quod impugnatio subtrahatur, secundum illud Proverb. xvi. 7. *Cum placuerint Domino via hominis, inimicos quoque eius convertet ad pacem.* Sed poena non debet praecedere culpam. Ergo inconveniens fuit quod homo ante peccatum tentaretur.

Sed contra est quod dicitur Eccli. xxxiv. 11. *Qui tentatus non est, qualis scit?*

Respondetur dicendum, quod divina sapientia disponit omnia suavis, ut dicitur Sap. viii. 1. in quantum scilicet sua providentia singulis attribuit quae eis competunt secundum suam naturam: quia, ut dicit Dionysius iv. cap. de div. Nomin. (par. iv. a med. lect. 23.) *providentia non est naturam corrumpere, sed salvare.* Hoc autem pertinet ad conditionem humanæ naturæ ut ab aliis creaturis iuvaretur, vel impediri possit.

Unde conveniens fuit ut Deus hominem in statu innocentiae & tentari permitteret per malos angelos, & iuvaretur cum faceret per bonos. Ex speciali enim beneficio gratiae hoc erat ei collatum ut nulla creatura exterior ei posset nocere contra propriam voluntatem, per quam etiam tentationi demonis resistere poterat.

Ad primum ergo dicendum, quod supra naturam humanam est aliqua natura, in qua potest malum culpae inveniri;

vi; non autem supra naturam angelicam. Tentare autem inducendo ad malum, non est nisi iam depravati per culpam. Et ideo conveniens fuit ut homo per angelum malum tentaretur ad peccandum; sicut etiam secundum ordinem naturæ per Angelum bonum promovetur ad perfectionem. Angelus autem a suo superiori, scilicet a Deo, in bono perfici potuit, non autem ad peccandum induci: quia, sicut dicitur Iacobi 1. 13. *Deus intentator inolorum est.*

Ad secundum dicendum, quod sicut Deus sciebat quod homo per tentationem in peccatum esset deiiciendus; ita etiam sciebat quod per liberum arbitrium resistere poterat tentatori. Hoc autem requirebat condicio naturæ ipsius ut propriæ voluntati relinqueretur, secundum illud Eccli. xv. 14. *Deus reliquit hominem in manu consilii sui.* Unde Augustinus dicit XI. super Gen. ad lit. (cap. xv. ante med.) *Non mihi videtur magna laudis futurum fuisse hominem, si propterea posset bene vivere, quia nemo male vivere suaderet; cum & in natura posset, & in potestate haberet velle non consentire suadenti.*

Ad tertium dicendum, quod impugnatio cui cum difficultate resistitur, pœnalis est. Sed homo in statu innocentie poterat absque omni difficultate tentationi resistere: & ideo impugnatio tentatoris eis pœnalis non fuit.

## ARTICULUS II. 799

*Utrum fuerit conveniens modus, & ordo primæ tentationis.*

*L. P. quæst. xli. art. 4. cor.*

**A**D secundum sic proceditur. Videtur quod non fuerit conveniens modus, & ordo primæ tentationis. Sicut enim ordine naturæ angelus erat superior homine, ita & vir erat perfectior muliere. Sed peccatum pervenit ab angelo ad hominem. Ergo pari ratione debet pervenire a viro in mulierem, ut scilicet mulier per virum tentaretur, & non e converso.

1. Præterea. Tentatio primorum parentum fuit per suggestionem. Potest autem diabolus etiam suggerere homini absque alia exteriori sensibili creatura. Cum ergo primi parentes essent spirituali mente præditi, minus sensibilibus quam intelligibilibus inherentes, convenientius fuisse quod solum spirituali tentatio-

ne homo tentaretur quam exteriori.

3. Præterea. Non potest convenienter aliquis malum suggerere nisi per aliquod apparens bonum. Sed multa alia animalia habent maiorem apparentiam boni quam serpens. Non ergo convenienter tentatus fuit homo a diabolo per serpentem.

4. Præterea. Serpens est animal irrationale. Sed animali irrationali non competit sapientia, nec locutio, nec pœna. Ergo inconvenienter inducitur lepens (Gen. 3. 1.) *esse callidior cunctis animalibus, vel prudentissimus omnium bestiarum*, secundum aliam translationem (LXX. Interp.) Inconvenienter etiam inducitur fuisse mulieri locutus, & a Deo punitus.

Sed contra est quod id quod est primum in aliquo genere, debet esse proportionatum his quæ in eodem genere consequuntur. Sed in quolibet genere peccati invenitur ordo primæ tentationis, in quantum videlicet præcedit in sensualitate, quæ per serpentem signatur, peccati concupiscentia; in ratione inferiori, quæ signatur per mulierem, delectatio; in ratione superiori, quæ signatur per virum, consensus peccati, ut Augustinus dicit XII. de Trinic. (cap. xii.) Ergo congruus fuit ordo primæ tentationis.

Respondeo dicendum, quod homo compositus est ex duplici natura, intellectiva scilicet, & sensitiva. Et ideo diabolus in tentatione hominis usus est incitamento ad peccandum dupliciter. Uno modo ex parte intellectus, in quantum promisit Divinitatis similitudinem per scientiæ adeptionem, quam homo naturaliter desiderat. Alio modo ex parte sensus; & sic usus est his sensibilibus rebus, quæ maximam habent affinitatem ad hominem, partim quidem in eadem specie tentans virum per mulierem, partim vero in eodem genere tentans mulierem per serpentem, partim vero ex genere propinquo proponens pomum ligni vetiti ad edendum.

Ad primum ergo dicendum, quod in actu tentationis diabolus erat sicut principale agens; sed mulier assumebatur quasi instrumentum tentationis ad deiiciendum virum: tum quia mulier erat infirmior viro, unde magis seduci poterat; tum etiam quia propter coniunctionem eius ad virum, maxime per eam diabolus poterat virum seducere. Non autem est eadem ratio principalis agens, &

instrumenti: nam principale agens oportet esse potius; quod non requiritur in agente instrumentalium.

Ad secundum dicendum, quod suggestio, quia spiritualiter diabolus homini aliquid suggerit, offendit diabolum plus habere potestatis in homine quam habeat suggestio exterior: quia per suggestionem interiorem immutatur a diabolo saltem hominis phantasia; sed per suggestionem exteriorem immutatur sola exterior creatura. Diabolus autem minimum potestatis habebat in hominem ante peccatum: & ideo non potuit eum interiori suggestionem, sed solum exteriori tentare.

Ad tertium dicendum, quod, sicut Augustinus dicit XI super Genesim ad lit. (cap. III.) non debemus opinari quod serpentem sibi, per quem tentaret, diabolus eligeret; sed cum esset in illo decipiendi cupiditas, nonnisi per illud animal potuit per quod posse permissus est.

Ad quartum dicendum, quod, sicut Augustinus dicit XI super Genesim ad lit. (cap. XXVIII. & XXIX.) serpens diabolus est prudentissimus, vel callidissimus, propter astutiam diaboli, qui in illo agebat dolum; sicut dicitur prudens, vel astuta lingua, quam prudens, vel astutus movet ad aliquid prudenter, vel astute suadendum. Neque etiam serpens verborum sonos intelligebat qui ex illo fiebant ad mulierem: neque enim conversa credenda est anima eius in naturam rationalem: quandoquidem nec ipsi homines, quorum rationalis natura est, cum demon in eis loquitur, sciunt quid loquantur. Sic ergo locutus est serpens homini, sicut asina in qua sedebat Balaam, locuta est homini; nisi quod illud fuit opus diabolicum, hoc angelicum. (Cap. XXXVI. cit. med.) Unde serpens non est interrogatus, cur hoc fecerit: quia non in sua natura ipse hoc fecerat, sed diabolus in illo, qui iam ex peccato suo igni destinatus fuerat sempiterno. Quod autem serpenti dicitur, ad eum qui per serpentem operatus est, refertur. Et, sicut rursus Augustinus dicit in Lib. II. super Gen. contra Manichæos (cap. XVII. & XVIII. & hab. in Glossa ordin.) nunc quidem etiam serpens, scilicet diaboli, dicitur qua nobis cadendus est, non ea que ultimo iudicio reservatur. Per hoc enim quod ei dicitur, Maledictus es inter omnia animalia, S. Tb. Oper. Tom. XXIII.

„ & bestias terræ, “ *pecora illi præponuntur, non in potestate, sed in conversatione naturæ suæ: quia pecora non amiserunt beatitudinem aliquam celestem, quam nunquam habuerunt; sed in sua natura, quam acceperunt, perierunt vitam. Dicitur etiam ei, „ Peccatore, & „ ventre repes “ (secundum aliam litteram (LXX. Interp.) Ubi nomine peccatoris significatur superbia, quia ibi dominatur imperus animæ; nomine autem ventris significatur carnale desiderium, quia hæc pars mollior sentitur in corpore. His autem rebus serps ad eos quos vult decipere. Quod autem dicitur, „ Terram „ comedes cunctis diebus vitæ tuæ, “ duobus modis intelligi potest. Vel ad te pertinebunt, quos terrena cupiditate deciperis, id est peccatores, qui terræ nomine significantur: (a) vel certe tertium genus tentationis his verbis figuratur, quod est curiositas: terram enim qui manducat, profunda, & tenebrosa penetrat. Per hoc autem quod inimicitie ponuntur inter ipsum, & mulierem, ostenditur nos non posse a diabolo tentari, nisi per illam animalalem partem, quæ quasi mulieris imaginem (b) in homine gerit, sive ostendit. Semen autem diaboli est perversa suggestio, semen mulieris fructus boni operis, quod perversæ suggestioni resistit. Et ideo observat serpens plantam mulieris, ut si quando in illicita labitur, delectatio illam capiat; & illa observat caput eius, ut eum in ipso initio male suggestionis excludat.*

## QUAESTIO CLXVI.

De studiofate,  
in duos articulos divisa.

Postea considerandum est de studiofate, & curiositate sibi opposita. Circa studiofatem autem queruntur duo.

Primo, quæ sit materia studiofatis.

Secundo, utrum sit par temperantiæ.

S

A R-

(a) Ita cum msi. & Nicolai idie. Parau, vel tertium genus tentationis, id est cupiditatis, his verbis hæc in col. Alcan. desit certo. (b) Ita p. m. Nicolai in homine ostendit: & in fine addit Hicunque Augustinus.

## ARTICULUS I. 808

*Utrum materia studiositatis sit proprie cognitio.*

*Sup. quæst. clx. art. 2. cor. & inf. quæst. clxvii. art. 1. cor.*

**A**D primum sic proceditur. Videtur quod materia studiositatis non sit proprie cognitio. Studiosus enim dicitur aliquis ex eo quod adhibet studium aliquibus rebus. Sed in qualibet materia debet homo studium adhibere, ad hoc quod recte faciat quod est faciendum. Ergo videtur quod non sit specialis materia studiositatis cognitio.

2. Præterea. Studiositas curiositati opponitur. Sed curiositas, quæ a cura dicitur, potest esse etiam circa ornatum vestium, & circa alia huiusmodi, quæ pertinent ad corpus: unde Apostolus dicit ad Rom. xiii. 14. *Carnis curam ne feceritis in desideriiis*. Ergo studiositas non est solum circa cognitionem.

3. Præterea Hierem. vi. 13. dicitur: *A minore usque ad maiorem omnes avaritiæ student*. Sed avaritia non est proprie circa cognitionem, sed magis circa possessionem divitiarum, ut supra dictum est (quæst. cxviii. art. 2.) Ergo studiositas, quæ a studio dicitur, non est proprie circa cognitionem.

Sed contra est quod dicitur Proverb. xxvii. 11. *Stude sapientiæ, fili mi, & lætificæ cor meum, ut possis respondere exprobranti sermonem*. Sed eadem studiositas est quæ laudatur ut virtus, & ad quam lex invitat. Ergo studiositas est proprie circa cognitionem.

Respondetur dicendum, quod studium proprie importat vehementem applicationem mentis ad aliquid. Mens autem non applicatur ad aliquid, nisi cognoscendo illud. Unde per prius mens applicatur ad cognitionem, secundario autem applicatur ad ea in quibus homo per cognitionem dirigitur. Et ideo studium per prius respicit cognitionem, & per posterius quæcumque alia, ad quæ operanda directione cognitionis indigemus.

Virtutes autem proprie sibi attribuunt illam materiam circa quam primo & principaliter sunt, sicut fortitudo pericula mortis, & temperantia delectationem tactus. Et ideo studiositas proprie dicitur circa cognitionem.

Ad primum ergo dicendum, quod cir-

ca alias materias non potest aliquid recte fieri, nisi secundum quod est præordinatum per rationem cognoscentem. Et ideo per prius studiositas cognitionem respicit, cuiusque materię studium adhibeatur.

Ad secundum dicendum, quod ex effectu hominis trahitur mens eius ad intendendum his ad quæ afficitur, secundum illud Matth. vi. 21. *Ubi est thesaurus tuus, ibi est & cor tuum*. Et quia circa ea quibus caro fovetur, maxime homo afficitur, consequens est quod cognitio hominis versetur circa ea quibus caro fovetur, ut scilicet homo inquirat, qualiter optime possit carni suæ subvenire: & secundum hoc curiositas ponitur circa ea quæ ad carnem pertinent ratione eorum quæ pertinent ad cognitionem.

Ad tertium dicendum, quod avaritia inhiat ad lucra conquirenda; ad quod maxime necessaria est quedam peritia terrenarum rerum: & secundum hoc studium attribuitur his quæ ad avaritiam spectant.

## ARTICULUS II. 809

*Utrum studiositas sit pars temperantiæ.*

**A**D secundum sic proceditur. Videtur quod studiositas non sit pars temperantiæ. Studiosus enim dicitur aliquis secundum studiositatem. Sed universaliter omnis virtuosus, vocatur studiosus, ut patet per Philosophum, qui frequenter sic utitur nomine studiosi (hab. ter Lib. IX. Ethic. cap. iv. & his cap. viii. & septies cap. ix. & Lib. I. magn. Moral. cir. princ. iuxta Græc. lit.) Ergo studiositas est generalis virtus, & non est pars temperantiæ.

2. Præterea. Studiositas, sicut dictum est (art. præc.) ad cognitionem pertinet. Sed cognitio non pertinet ad virtutes morales, quæ sunt in appetitiva animæ parte, sed magis ad intellectuales, quæ sunt in parte cognoscitiva: unde & sollicitudo est actus prudentiæ ut supra habitum est (quæst. xlvii. art. 9.) Ergo studiositas non est pars temperantiæ.

3. Præterea. Virtus quæ ponitur pars alicuius principalis virtutis, assimilatur ei quantum ad modum. Sed studiositas non assimilatur temperantiæ quantum ad modum: quia temperantiæ novem sumitur ex quadam reformatione, vnde

ru:

magis opponitur vitio, quod est in excessu; nomen autem studiositatis sumitur e contrario ex applicatione animæ ad aliquid, unde magis videtur opponi vitio quod est in defectu, scilicet negligentie studendi, quam vitio quod est in excessu, scilicet curiositati: unde propter horum similitudinem dicit Iudorus in Lib. X. Etym. (ad lit. S.) quod *studiosus dicitur quasi studii curiosus*. Ergo studiositas non est pars temperantiæ.

Sed contra est quod Augustinus dicit in Lib. de moribus Ecclesiæ (cap. XXI. cir. princ.) *Curiosi esse probibemur, quod magnum temperantiæ munus est*. Sed curiositas prohibetur per studiositatem moderatam. Ergo studiositas est pars temperantiæ.

Respondendo dicendum, quod, sicut supra dictum est (quæst. cxli. art. 1. 2. & 3.) ad temperantiam pertinet moderari motum appetitus, ne superflue tendat in id quod naturaliter concupiscitur. Sicut autem naturaliter homo concupiscit delectationes ciborum, & venereorum secundum naturam corporalem; ita secundum animam naturaliter desiderat cognoscere aliquid: unde & Philosophus dicit in princip. Met. quod *omnes homines naturaliter scire desiderant*.

Moderatio autem huiusmodi appetitus pertinet ad virtutem studiositatis: unde consequens est quod studiositas sit pars potentialis temperantiæ, sicut virtus secundaria ei adiuncta ut principali virtuti; & comprehenditur sub modestia, ratione superius dicta (quæst. clx. art. 2.)

Ad primum ergo dicendum, quod prudentia est completiva omnium virtutum moralium, ut dicitur in VI. Ethic. (cap. ult.) In quantum ergo cognitio prudentiæ ad omnes virtutes pertinet, intantum nomen studiositatis, quæ proprie circa cognitionem est, ad omnes virtutes derivatur.

Ad secundum dicendum, quod actus cognoscitivæ virtutis imperatur a vi appetitiva, quæ est motiva omnium virtutum, ut supra dictum est (1. 2. quæst. 11. art. 1.) Et ideo circa cognitionem duplex bonum potest attendi. Unum quidem quantum ad ipsum actum cognitionis: & tale bonum pertinet ad virtutes intellectuales, ut scilicet homo circa singula æstimet verum. Aliud autem bonum est quod pertinet ad actum appetitivæ virtutis, ut scilicet homo habeat appetitum rectum applicandi vim

cognoscitivam sic, vel aliter, ad hoc, vel ad illud. Et hoc pertinet ad virtutem studiositatis. Unde computatur inter virtutes morales.

Ad tertium dicendum, quod, sicut Philosophus dicit in II. Ethic. (cap. ult.) ad hoc quod homo fiat virtuosus, oportet quod fervet se ab his ad quæ maxime inclinat natura: & ideo est quod quia natura præcipue inclinat ad timendum mortis pericula, & ad sectandum delectabilia carnis; ideo laus virtutis fortitudinis præcipue consistit in quadam firmitate persistendi contra huiusmodi pericula, & laus virtutis temperantiæ in quadam refrenatione a delectabilibus carnis. Sed quantum ad cognitionem est in homine contraria inclinatio: quia ex parte animæ inclinat homo ad hoc quod cognitionem rerum desideret: & sic oportet ut laudabiliter homo huiusmodi appetitum refrenet, ne immoderate rerum cognitioni intendant. Ex parte vero naturæ corporalis homo inclinat ad hoc ut laborem inquirendi scientiam vitet. Quantum ergo ad primum, studiositas in refrenatione consistit; & secundum hoc ponitur pars temperantiæ. Sed quantum ad secundum, laus virtutis huiusmodi consistit in quadam vehementia intentionis ad scientiam rerum percipiendam: & ex hoc nominatur. Primum autem est essentialius huic virtuti quam secundum: nam appetitus cognoscendi per se respicit cognitionem, ad quam ordinatur studiositas; sed labor attendendi est impedimentum quoddam cognitionis: unde respicitur (a) ab hac virtute per accidens, quasi removendo prohibens.

## QUAESTIO CLXVII.

De curiositate,

in duos articulos divisa.

Postea considerandum est de curiositate: & circa hoc quaruntur duo.

Primo, utrum vitium curiositatis possit esse in cognitione intellectiva.

Secundo, utrum sit in cognitione sensitiva.

[a] Ita cum mss. Alcan. & Camer. edisi posuim. Al. in hac virtute.



## ARTICULUS I. 802

*Utrum circa cognitionem intellectivam possit esse curiositas.*

III. diff. xxxv. quæst. 11. art. 3. quæst. 3.

**A**D primum sic proceditur. Videtur quod circa cognitionem intellectivam non possit esse curiositas. Quia secundum Philosophum in II. Ethicor. (cap. vi. a med.) in his quæ secundum se sunt bona, vel mala, non possunt accipi medium, & extrema. Sed cognitio intellectiva secundum se est bona: in hoc enim perfectio hominis videtur consistere, ut intellectus eius de potentia reducat in actum; quod fit per cognitionem veritatis: dicit etiam Dionysius xv. cap. de div. Nom. (par. iv. lect. 22.) quod *bonum anime humane est secundum rationem esse*, cuius perfectio in cognitione veritatis consistit. Ergo circa cognitionem intellectivam non potest esse vitium curiositatis.

2. Præterea. Illud per quod homo assimilatur Deo, & quod a Deo consequitur, non potest esse malum. Sed quantumque abundantia cognitionis a Deo est, secundum illud Eccli. 1. 1. *Omnis sapientia a Domino Deo est*: & Sap. vii. 17. dicitur: *Ipse dedit mihi horum quæ sunt scientiam veram, ut sciam dispositionem orbis terrarum, & virtutes elementorum &c.* Per hoc etiam homo Deo assimilatur, quod veritatem cognoscit: quia *omnia nuda, & aperta sunt oculis eius*, ut habetur ad Hebræos xv. 13. unde I. Reg. 11. 3. dicitur, quod *Deus scientiarum Dominus est*. Ergo quantumcumque abundet cognitio veritatis, non est mala, sed bona. Appetitus autem boni non est vitiosus. Ergo circa intellectivam cognitionem veritatis non potest esse vitium curiositatis.

3. Præterea. Si circa aliquam intellectivam cognitionem posset esse curiositatis vitium, præcipue esset circa philosophicas scientias. Sed eis intendere non videtur esse vitiosum: dicit enim Hieronymus super Daniele (cap. 1. sup. illud, *Proposuit autem &c.* & hab. cap. *Qui de mensa dist. xxxvii.*) *Qui de mensa, & vino Regis noluerunt comedere, ne polluantur, si sapientiam, atque doctrinam Babiloniorum scirent esse peccatum, numquam acquiescerent discere quod non licebat*. Et Augustinus dicit in II. de

doctrina christiana (cap. xl. in princ.) quod *si qua vera Philosophi dixerunt, ab eis sunt, tamquam ab iniustis possessoribus, in usum nostrum vendicanda*. Non ergo circa cognitionem intellectivam potest esse curiositas vitiosa.

Sed contra est quod Hieronymus dicit (sup. illud Ephes. iv. *Non ambulatis in vanitate*: ) *Nonne nobis videtur in vanitate sensus, & obscuritate mentis ingredi, qui diebus ac noctibus in dialectica arte torquetur, qui physicis persequitur oculos trans celum levat*? Sed vanitas sensus, & obscuritas mentis est vitiosa. Ergo circa intellectivas scientias potest esse curiositas vitiosa.

Respondeo dicendum, quod, sicut dictum est (quæst. præc. art. 1.) studio sita non est directe circa ipsam cognitionem, sed circa appetitum, & studium cognitionis acquirendæ. Aliter autem est iudicandum de ipsa cognitione veritatis, & aliter de appetitu, & studio veritatis cognoscendæ. Ipsa enim veritatis cognitio, per se loquendo, bona est; potest autem per accedens esse mala, ratione scilicet alius consequentis, vel inquantum aliquis de cognitione veritatis superbit, secundum illud I. ad Cor. vii. 1. *Scientia inflat*; vel inquantum homo utitur cognitione veritatis ad peccandum.

Sed ipse appetitus, vel studium cognoscendæ veritatis potest habere rectitudinem, vel perversitatem. Uno quidem modo, prout aliquis tendit suo studio in cognitionem veritatis, prout per accedens iungitur ei malum; sicut illi qui student ad scientiam veritatis, ut exinde superbiant. Unde Augustinus dicit in Lib. de morib. Eccles. (cap. xxi. ante med.) *Sunt qui desertis virtutibus, & nescientes quid sit Deus, & quanta maiestas semper eodem modo manentis naturæ, magnum aliquid esse agere putant, si universam ipsam corporis molem, quam mundum nuncupamus, curiosissime, intensissimeque perquirant*. Unde etiam tanta superbia gignitur, ut in ipso celo, de quo sepe disputant, similibet habitare videantur. Similiter etiam illi qui student addiscere aliquid ad peccandum, vitiosum studium habent, secundum illud Hierem. ix. 5. *Docuerunt linguam suam loqui mendacium; ut inique agerent, laboraverunt*.

Alio autem modo potest esse vitium ea ipsa inordinatione appetitus, & studii ad discendam veritatem; & hoc quod

drum

tripliciter. Uno modo inquantum per studium minus utile retrahuntur a studio quod eis ex necessitate incumbit: unde Hieronymus dicit (epist. cxlvi. ad Damal. de filio prodigo ante med.). *Sacerdotes, dimissis Evangelis, & Prophetis, videmus comædiaz legere, & a matoria bucolicorum versuum verba cantare.* Alio modo inquantum rudet aliquis addicere ab eo a quo non licet; sicut patet de his qui aliqua futura a demonibus perquirunt; quæ est superstitiosa curiositas: unde Augustinus dicit in libro de vera religione (cap. xv. in fi.). *Nescio, an Philosophi impedirentur a fide vitio curiositatis in percontandis demonibus.* Tertio quando homo appetit cognoscere veritatem circa creaturas, non referendo ad debitum finem, scilicet ad cognitionem Dei: unde Augustinus dicit in Libro de vera religione (cap. xxix. a princ.) quod in consideratione creaturarum non est vana, & perturbata curiositas excedenda, sed gradus ad immortalia, & semper manentia faciendus. Quarto modo inquantum aliquis studet ad cognoscendum veritatem supra proprium ingenii facultatem: quia per hoc homines de facili in errores labuntur: unde dicitur Eccli. xii. 22. *Altiora te ne quaeris, & fortiora te ne scrutatus fueris, & in pluribus operibus eius ne fueris curiosus;* & postea sequitur: *Multos enim supplantavit suspicio eorum, & in vanitate detinuit sensus eorum.*

Ad primum ergo dicendum, quod bonum hominis consistit in cognitione veri; non tamen summum hominis bonum consistit in cognitione cuiuslibet veri, sed in perfecta cognitione summæ veritatis, ut patet per Philosophum in X. Ethic. (cap. vii. & viii.) Et ideo potest esse vitium in cognitione aliquorum verorum, secundum quod talis appetitus non debito modo ordinatur ad cognitionem summæ veritatis, in qua consistit summa felicitas.

Ad secundum dicendum, quod etsi ratio illa (a) ostendit, quod cognitio veritatis secundum se bona sit; non tamen per hoc excluditur quin possit aliquis cognitione veritatis abuti ad malum, vel etiam inordinate cognitionem veritatis appetere: quia etiam oportet appetitum hominis debito modo regulatum esse.

Ad tertium dicendum, quod studium Philosophiæ secundum se est licitum, & laudabile propter veritatem quam Philo-

sophi perceperunt, Deo illis revelante, ut dicitur ad Roman. i. Sed quia quidam Philosophi abutuntur ad fidei impugnationem, ideo Apostolus dicit ad Colos. ii. 8. *Videte ne quis vos decipiat per Philosophiam, & inanem fallaciam secundum traditionem hominum, & non secundum Christum;* & Dionysius dicit in epistola ad Polycarpum (parum ante med.) de quibusdam Philosophis, quod *divinis non sancte contra divina utuntur, per sapientiam Dei sentientes expellere divinam venerationem.*

## ARTICULUS II. 803

*Utrum vitium curiositatis sit circa sensitivam cognitionem.*

**A**D secundum sic proceditur. Videtur quod vitium curiositatis non sit circa sensitivam cognitionem. Sicut enim aliqua cognoscuntur per sensum visus, ita etiam aliqua cognoscuntur per sensum tactus, & gustus. Sed circa tangibilia, & gustabilia non ponitur vitium curiositatis, sed magis vitium luxuriæ, & gulæ. Ergo videtur quod nec circa ea quæ cognoscuntur per visum, sit vitium curiositatis.

2. Præterea. Curiositas videtur esse in inspectione ludorum: unde Augustinus dicit in VI. Confess. (cap. viii. in med.) quod quodam pugne casu cum clamor ingens totius populi vehementer Asipium pulsasset, curiositate visus aperuit oculos. Sed inspectio ludorum non videtur esse vitiosa: quia huiusmodi inspectio delectabilis redditur propter representationem, in quo homo naturaliter delectatur, ut Philosophus dicit in sua Poetica (cap. ii.) Non ergo circa sensibilibus cognitionem est vitium curiositatis.

3. Præterea. Ad curiositatem pertinere videtur actus proximorum perquirere, ut dicit Beda (sup. illud I. Ioan. ii. *Concupiscentia carnis &c.*) Sed perquirere facta aliorum non videtur esse vitiosum: quia, sicut dicitur Eccli. xvi. 22. *unicuique mandavit Deus de proximo suo.* Ergo vitium curiositatis non est in huiusmodi particularibus sensibilibus cognoscendis.

Sed contra est quod Augustinus dicit in Lib. de vera relig. (cap. xxxviii. cir. med.) quod concupiscentia oculorum reddit homines curiosos. Ut autem

S 3 dicit

dicit Beda ( loc. cit. ) *concupiscentia oculorum est non solum in discendis magis artibus, sed etiam in contemplandis spectaculis, & in dignoscendis, & carpendis vitiis proximorum; quæ sunt quædam particularia sensibilia.* Cum ergo concupiscentia oculorum sit quoddam vitium, sicut etiam superbia vitæ, & concupiscentia carnis, contra quæ dividitur I. Ioan. 11. videtur quod vitium curiositatis sit circa sensibilibus cognitionem.

Respondeo dicendum, quod cognitio sensitiva ordinatur ad duo. Uno enim modo tam in hominibus, quam in aliis animalibus ordinatur ad corporis sustentationem: quia per huiusmodi cognitionem homines, & alia animalia vitant nociva, & conquiritur ea quæ sunt necessaria ad corporis sustentationem. Alio modo specialiter in homine ordinatur ad cognitionem intellectivam vel speculativam, vel praticam.

Apponere ergo studium circa sensibilia cognoscenda, dupliciter potest esse vitiosum. Uno modo inquantum cognitio sensitiva non ordinatur in aliquid utile, sed potius avertit hominem ab aliqua utili consideratione: unde Augustinus dicit in X. Confess. ( cap. xxxv. paulo ante fin. ) *Canem currentem post leporem iam non specio, cum in circo sit. At vero in agro, si casu transeam, avertit me fortassis ab aliqua magna cogitatione, atque ad se convertit illa venatio: & nisi iam mihi demonstrata infirmitate mea cito admoveas, vanus bebesco.*

Alio modo inquantum cognitio sensitiva ordinatur ad aliquod noxium; sicut inspectio mulieris ordinatur ad concupiscendum, & diligens inquisitio eorum quæ ab aliis fiunt, ordinatur ad detrahendum.

Si quis autem cognitioni sensibilibus intendit ordinate propter necessitatem sustentandæ naturæ, vel propter studium intelligendæ veritatis, est virtuosus studiositas circa sensibilem cognitionem.

Ad primum ergo dicendum, quod luxuria, & gula sunt circa delectationem quæ sunt in usu rerum tangibilium; sed circa delectationem cognitionis omnium finis est curiositas, & vocatur concupiscentia oculorum. quia oculi sunt ad cognoscendum in sensibus principales, unde omnia sensibilia videri dicuntur, ut Augustinus dicit in X. Lib. Confess. ( cap. xxxv. a princ. ) & sicut Augu-

stinus ibidem subdit, *ex hoc evidentius discernitur, quid voluptatis, quid curiositatis agatur per sensus, quod voluptas pulchra, suavia, canora, lapida, lenia sectatur; curiositas autem etiam his contraria tenendi causa, non ad subeundam molestiam, sed ad experiendi, (a) noscendique libidinem.*

Ad secundum dicendum, quod inspectio speculorum vitiosa redditur, inquantum per hoc homo fit pronus ad vitia vel lascivizæ, vel crudelitatis, per ea quæ ibi repræsentantur. Unde Chrysostomus dicit ( hom. vi. in Matth. parum ante fin. ) quod *adulteros, & intersecutores constituunt tales inspectiones.*

Ad tertium dicendum, quod prospicere facta aliorum, vel inquirere bono animo, vel ad utilitatem propriam, aut scilicet homo ex bonis operibus proximi provocetur ad melius, vel etiam ad utilitatem illius, ut scilicet corrigatur, si quid ab eo agitur vitiose, secundum regulam caritatis, & debitum officii, est laudabile, secundum illud ad Hebr. x. 24. (b) *Considerate vos invicem in provocationem caritatis, & bonorum operum.* Sed quod aliquis intendat ad consideranda vitia proximorum, ad despiciendum, vel detrahendum, vel saltem inutiliter inquietandum, est vitiosum. Unde dicitur Proverb. xxiv. 15. *Ne insidieris, & quæras impietatem in domo iusti, neque vigilas requiem eius.*

## QUAESTIO CLXVIII.

*De modestia, secundum quod consistit in exterioribus corporis motibus, in quatuor articulos divisa.*

**P**ostea considerandum est de modestia, secundum quod consistit in exterioribus motibus corporis: & circa hoc quaeruntur quatuor.

Primo, utrum in exterioribus motibus corporis, qui serio aguntur, possit esse & virtus, & vitium.

Secundo, utrum possit esse aliqua virtus circa actiones ludi.

Tertio de peccato quod fit in excessu ludi.

Quarto de peccato ex defectu ludi.

(a) Ad noscendique. (b) Vigilate Consideremus invicem &c.

## ARTICULUS I. 804

*Utrum in exterioribus motibus corporis sit aliqua virtus.*

*IV. Ethic. lect. 16. princ.*

**A**D primum sic proceditur. Videtur quod in exterioribus motibus corporis non sit aliqua virtus. Omnis enim virtus pertinet ad spirituales animæ decorem, secundum illud Plal. xlii. 14. *Omnis gloria eius filie Regis ab intus*: Glossa (interl. Aug.) idest „in conspectu scientia.“ Sed motus corporales non sunt ab intus, sed exterius. Ergo circa huiusmodi motus non potest esse virtus.

2. Præterea. Virtutes non insunt nobis a natura, ut patet per Philosophum in II. Ethicor. (cap. 1.) Sed motus corporales exteriores insunt hominibus a natura, secundum quam quidam sunt velocis motus, & quidam tardi motus: & idem est de aliis differentiis exteriorum motuum. Ergo circa tales motus non attenditur aliqua virtus.

3. Præterea. Omnis virtus moralis est circa actiones quæ sunt ad alterum, sicut iustitia, vel circa passionem, sicut temperantia, & fortitudo. Sed exteriores motus corporales non sunt ad alterum, neque etiam sunt passionem. Ergo circa eos non est aliqua virtus.

4. Præterea. In omni opere virtutis est studium adhibendum, ut supra dictum est (quaest. clxvi. art. 1. arg. 1. & art. 2. ad 1.) Sed adhibere studium in dispositione motuum exteriorum est vituperabile: dicit enim Ambrosius in I. de officiis (cap. xviii. cir. med.) *Est gressus probabilis; in quo sit species austeritatis, gravitatisque pondus, tranquillitatis vestigium; ita tamen si studium desit, atque affectatio; sed motus sit purus, ac simplex.* Ergo videtur quod circa compositionem exteriorum motuum non consistat virtus.

Sed contra est quod decor honestatis pertinet ad virtutem. Sed compositio exteriorum motuum pertinet ad decorem honestatis: dicit enim Ambrosius in I. de offic. (cap. xix. in fi.) *Sicut molliculus, & infractus aue vocis sonum, aut gressum corporis non probat; ita nec agrestem; aut rusticum. Naturam imitemur: effigies eius formula disciplina, forma benehæsit est.* Ergo circa compositionem exteriorum motuum est virtus.

Respondetur dicendum, quod virtus mo-

ralis consistit in hoc quod ea quæ sunt hominis, per rationem ordinantur. Manifestum est autem quod exteriores motus hominis sunt per rationem ordinabiles, ad imperium enim rationis exteriora membra moventur. Unde manifestum est quod circa horum motuum ordinationem virtus moralis consistit.

Ordinatio autem horum motuum attenditur quantum ad duo: uno quidem modo secundum convenientiam personæ; alio modo secundum convenientiam ad exteriores personas, negotia, seu loca. Unde dicit Ambrosius in Lib. I. de officiis (loc. sup. cit.) *Hoc est pulchritudinem vivendi tenere, convenientia cuiusque sexus, & personæ reddere*: & hoc pertinet ad primum. Quantum autem ad secundum subditur: *Hic ordo gestorum optimus, hic ornatus ad omnem actionem accommodatus.*

Et ideo circa huiusmodi exteriores motus ponit Andronicus duo: scilicet *ornatum*, qui respicit convenientiam personæ; unde dicit, quod est *scientia circa decens in motu, & habitudine*: & *bonam ordinationem*, quæ respicit convenientiam ad diversa negotia, & ea quæ circumstant, unde dicit, quod est *experientia separationis*, idest distinctionis actionum.

Ad primum ergo dicendum, quod motus exteriores sunt quædam signa interioris dispositionis, secundum illud Eccli. xix. 27. *Amictus corporis, & risus dentium, & ingressus hominis enuntiant de illo*: & Ambrosius dicit in I. de officiis (cap. xviii. ante med.) quod *habitus mentis in corporis statu cernitur*; & quod *vox quædam animi est corporis motus*.

Ad secundum dicendum, quod quamvis ex naturali dispositione habeat homo aptitudinem ad hanc, vel ad illam dispositionem exteriorum motuum; tamen quod deest naturæ, potest suppleri ex industria rationis. Unde Ambrosius dicit in I. de offic. (cap. xviii. a med.) *Motum naturæ informet: si quid sane in natura vitii est, industria emendet.*

Ad tertium dicendum, quod, sicut dictum est (in resp. ad 1.) exteriores motus sunt quædam signa interioris dispositionis, quæ præcipue attenditur secundum animæ passionem: & ideo moderatio exteriorum motuum requirit moderationem interiorum passionum. Unde Ambrosius dicit in I. de offic. (cap. xviii. ante med.) quod *hinc*, scilicet ex moribus exterioribus; *homo cordis nostri absconditus, aut levior, aut instantior, aut*

*turbidior, aut contra gravior, & coſtanti-  
or, & purior, & maturior eſtimatur.*  
Per motus etiam exteriores alii homines  
de nobis iudicium capiunt, ſecundum il-  
lud Eccli. xix. 26. *Ex viſu cognoscitur vir,  
& ab occuſu faciei cognoscitur ſenſatus.*

Et ideo moderatio exteriorum motuum  
quodammodo ad alios ordinatur, ſecundum  
illud quod Auguſtinus dicit in Regula  
(ſcilicet epiſt. cxxi. al. cix. parum a med.) *In  
omnibus motibus veſtris nihil ſias quod cu-  
iſquam offendat aſpectum, ſed quod ve-  
ſtram decet ſanctitatem.* Et ideo moder-  
atio exteriorum motuum poteſt reduci  
ad duas virtutes, quas Philoſophus tan-  
git in IV. Ethic. (cap. vi. & vii.) In-  
quantum enim per exteriores motus or-  
dinatur ad alios, pertinet exteriorum  
motuum moderatio ad amicitiam, vel  
affabilitatem, quæ attenditur circa deſe-  
ſtationes, & triſtitias, quæ ſunt in ver-  
bis, & factis in ordine ad alios quibus  
homo convivit; inquantum vero exte-  
riores motus ſunt ſigna interioris diſpo-  
ſitionis, pertinet eorum moderatio ad vir-  
tutem veritatis, ſecundum quam aliquis  
talem ſe exhibet in verbis, & factis,  
qualis eſt interior.

Ad quartum dicendum, quod in com-  
poſitione exteriorum motuum ſtadium  
vituperatur, per quod aliquis fictione  
quodam in exterioribus motibus utitur,  
ita quod interiori diſpoſitioni non con-  
veniant. Debet tamen tale ſtadium ad-  
hiberi, ut ſi quid in eis inordinatum eſt,  
corrigatur. Unde Ambroſius dicit in I.  
de officiis (cap. xviii. parum a med.)  
*Arſ deſi, non deſi correctio.*

## ARTICULUS II. 805

*Utrum in ludis poſſit eſſe aliqua virtus.*

IV. diſt. xxvi. queſt. iv. art. i. queſt. i. co. &  
III. cen. cap. xxv. & Iſa. iii. lect. 5.  
princ. & IV. Ethic. lect. 6. princ.

**A**D ſecundum ſic proceditur. Videtur  
quod in ludis non poſſit eſſe aliqua  
virtus. Dicit enim Ambroſius in I. de  
officiis (cap. xxi. 22.) *Dominus ait: Ve-  
re vobis qui ridetis, quia flebitis. Non ſo-  
lum ergo proſuſos, ſed etiam omnes locos  
declinandos arbitror.* Sed illud quod po-  
teſt virtuoſe fieri, non eſt totaliter de-  
clinandum. Non ergo circa ludos poteſt  
eſſe virtus.

2. Præterea. *Virtus eſt quam Deus in  
nobis ſine nobis operatur*, ut ſupra habi-  
tum eſt (i. 2. quæſt. iv. art. 4.) Sed Chry-

ſoſtomus dicit (hom. vi. in Matth. ali-  
quant. ante ſi.) *Non dat Deus ludere, ſed  
diabolus. Audi quid aliquando ludentes  
paſſi ſunt. Sedit populus manducare, &  
bibere, & ſurrexerunt ludere.* Ergo circa  
ludos non poteſt eſſe virtus.

3. Præterea. Philoſophus dicit in X. E-  
thic. (cap. vi. ante med.) quod operationes  
ludi non ordinantur in aliquid aliud.  
Sed ad virtutem requiritur ut propter  
aliud eligens operetur, ſicut patet per  
Philoſophum in II. Ethic. (cap. iv.) Ergo  
circa ludos non poteſt eſſe aliqua virtus.

Sed contra eſt quod Auguſtinus dicit  
in II. Muſicæ (cap. ult. in ſi.) *Volo tan-  
dem tibi parcas: nam ſapientem decet  
interdum remittere aciem rebus agendis  
intentam.* Sed iſta remiſſio animi a re-  
bus agendis fit per ludicra verba, & fa-  
cta. Ergo hiſ uti interdum ad ſapientem,  
& virtuoſum pertinet. Philoſophus  
etiam (Lib. IV. Ethic. cap. viii.) ponit  
virtutem eutrapeliæ circa ludos, quam  
nos poſſumus dicere iucunditatem.

Reſpondeo dicendum, quod ſicut ho-  
mo indiget corporali quiete ad corporis  
reſocillationem, quia non poteſt conti-  
nue laborare propter hoc quod habet  
ſinitam virtutem, quæ determinatis la-  
boribus proportionatur; ita etiam eſt  
ex parte animæ, cuius etiam eſt virtus  
ſinita ad determinatas operationes pro-  
portionata. Et ideo quando ultra mo-  
dum ſuum in aliquas operationes ſe ex-  
tendit, laborat, & ex hoc fatigatur,  
præſertim quia in operationibus animæ  
ſimul etiam laborat corpus, inquantum  
ſcilicet anima intellectiva utitur viribus  
per organa corporea operantibus. Sunt  
autem bona ſenſibilia connaturalia ho-  
mini: & ideo quando anima ſupra ſen-  
ſibilia elevatur, operibus rationis inten-  
ta, naſcitur exinde quædam fatigatio ani-  
malis, ſive homo intendat operibus  
rationis præſticæ, ſive ſpeculativæ; ma-  
gis tamen ſi operibus contemplationis  
intendat, quia per hoc magis a ſenſibi-  
libus elevatur; quamvis forte in aliqui-  
bus operibus exterioribus rationis præ-  
ſticæ maior labor corporis conſiſtat. In  
utriſque tamen tanto aliquis magis al-  
tero fatigatur, quanto vehementius ope-  
ribus rationis intendit. Sicut autem fa-  
tigatio corporalis ſolvitur per corporis  
quietem; ita etiam oportet quod fatiga-  
tio animalis ſolvatur per animæ quie-  
tem.

Quies autem animæ eſt deſectatio, ut  
ſupra habitum eſt (i. 2. quæſt. xxv. art.

2. & quæst. xxxi. art. 1. ad 2.) cum de passionibus ageretur. Et ideo oportet remedium contra fatigationem animalem adhiberi per aliquam delectationem, intermedia intentione ad insilendum studio rationis; sicut in Collationibus Patrum (collat. 24. cap. xxi.) legitur, quod B. Iohannes Evangelista, cum quidam scandalizarentur, quod eum cum discipulis suis ludentem invenirent, dicitur mandasse uni eorum qui arcum gerebat, ut sagittam traheret; quod cum pluries fecisset, quæsit utrum hoc continue facere posset: qui respondit, quod si hoc continue faceret, arcus frangeretur. Unde Beatus Iohannes subintulit, quod similiter animus hominis frangeretur, si numquam a sua intentione relaxaretur. Huiusmodi autem dicta, vel facta, in quibus non quaeritur nisi delectatio animalis, vocantur ludicra, vel iocosa. Et ideo necesse est talibus interdum uti, quasi ad quandam animæ quietem.

Et hoc est quod Philosophus dicit in IV. Ethic. (cap. viii.) quod in huius vitæ conversatione quædam requies cum ludo habetur. Et ideo oportet interdum aliquibus talibus uti. Circa quæ tamen videntur tria esse præcipue cavenda. Quorum primum & principale est quod prædicta delectatio non quaeratur in aliquibus operationibus, vel verbis turpibus, vel nocivis. Unde Tullius dicit in I. de offic. (in tit. de scurrilis. & facer.) quod unum genus iocandi est iliberale, petulans, flagitiosum, obscenum. Aliud autem attendendum est, ut totaliter gravitas animæ resolvatur. Unde Ambrosius dicit in I. de officiis (cap. xx. cir. princ.) Caveamus ne dum relaxare animum volumus, solvamus omnem harmoniam, quasi concentum quendam bonorum operum: & Tullius dicit in I. de off. (immediate ante cap. de scurrilis.) quod sicut pueris non omnem ludendi licentiam damus, sed eam quæ ab honestis actionibus non sit aliena; sic in ipso ioco aliquid probi ingenii lumen eluceat. Tertio autem attendendum est, sicut & in omnibus aliis humanis actionibus, ut congruat personæ, temporis, & loco, & secundum alias circumstantias debite ordinetur, ut scilicet sit tempore, & homini dignus, ut Tullius dicit ibidem (in tit. de scurrilis.) Huiusmodi autem secundum regulam rationis ordinantur. Habitus autem secundum rationem operans est virtus moralis.

Et ideo circa ludos potest esse aliqua

virtus, quam Philosophus (loc. sup. cit.) eutrapeliam nominat: & dicitur aliquis eutrapelus a bona conversione, quia scilicet beue convertit aliqua dicta, vel facta in solatium; & inquantum per hanc virtutem homo resrenatur ab immoderantia ludorum, sub modestia continetur.

Ad primum ergo dicendum, quod, sicut dictum est, in cor. art.) iocosa debent congruere negotiis, & personis: unde & Tullius dicit in I. Rhetor. (sec. de invent. inter princ. & med.) quod quando auditores sunt defatigati, non est inutile ab aliqua re nova, aut ridicula oratorem incipere, si tamen rei dignitas non admittit iocandi facultatem. Doctrina autem sacra maximis rebus intendit, secundum illud Proverb. viii. 6. Audite, quoniam de rebus magnis locutus sum. Unde Ambrosius non excludit universaliter iocum a conversatione humana, sed a doctrina sacra: unde præmittit: Licet interdum honesta ioca, ac suavia sint; tamen ab ecclesiastica abhorrentur regula: quoniam quæ in Scripturis sanctis non reperimus, ea quemadmodum usurpare possumus.

Ad secundum dicendum, quod verbum illud Chrysostomi est intelligendum de illis qui inordinate ludis utuntur, & præcipue eorum qui finem in delectatione ludi constituunt; sicut de quibusdam dicitur Sapientia xv. 12. Assimaverunt esse ludum vitam nostram: contra quos dicit Tullius in I. de officiis (in tit. Fontem esse modestia, ut appetitus obediat rationi: Non ita generati a natura sumus, ut ad ludum, & iocum facti esse videamur, sed ad severitatem potius, & ad quædam studia graviora, atque maiora.

Ad tertium dicendum, quod ipse operationes ludi secundum suam speciem non ordinantur ad aliquem finem; sed delectatio quæ in talibus actibus habetur, ordinatur ad aliquam animæ recreationem, & quietem: & secundum hoc, si fiat moderate, licet uti ludo. Unde Tullius dicit in I. de offic. (loc. cit.) Ludo, & ioco uti quidem licet, sed sicut somno, & quiescentibus ceteris, tum cum gravibus, seriisque rebus satisfecerimus.

## ARTICULUS III. 806

*Utrum in superfluitate ludi possit esse peccatum.*

*IV. Et. l. 16.*

**A**D tertium sic proceditur. Videtur quod in superfluitate ludi non possit esse peccatum. Illud enim quod excusat a peccato, non dicitur esse peccatum. Sed ludus quandoque excusat a peccato: multa enim, si serio fierent, gravia peccata essent, quæ quidem ioco facta vel nulla, vel levia sunt. Ergo videtur quod in superabundantia ludi non sit peccatum.

1. Præterea. Omnia alia vitia reducuntur ad septem vitia capitalia, ut Gregorius dicit XXXI. Moral. (cap. xvii. a med.) Sed superabundantia in ludis non videtur reduci ad aliquod capitulum vitiolorum. Ergo videtur quod non sit peccatum.

3. Præterea. Maxime histriones in ludo videntur superabundare, qui totam suam vitam ordinant ad ludendum. Si ergo superabundantia ludi esset peccatum, tunc omnes histriones essent in statu peccati: peccarent etiam omnes qui eorum ministerio uterentur, vel qui eis aliqua largirentur, tamquam peccati fautores: quod videtur esse falsum: legitur enim in vitis Patrum; (Lib. II. cap. xvi. & Lib. VIII. cap. lxxii.) quod beato Paphnutio revelatum est quod quidam ioculator futurus erat sibi confors in vita futura.

Sed contra est quod super illud Proverb. xiv. *Risus dolore miscbitur, & extrema gaudii luctus occupat*, dicit Glossa (interl.), *luctus perpetuus*. Sed in superfluitate ludi est inordinatus risus, & inordinatum gaudium. Ergo est ibi peccatum mortale, cui soli debetur luctus perpetuus.

Respondetur dicendum, quod in omni eo quod est dirigibile secundum rationem, superfluum dicitur quod regulam rationis excedit; diminutum autem dicitur aliquid, secundum quod deficit a regula rationis. Dictum est autem (art. præc.) quod ludicra; sive iocosa verba, vel facta sunt dirigibilia secundum rationem. Et ideo superfluum in ludo accipitur quod excedit regulam rationis: quod quidem potest esse dupliciter. Uno modo ex ipsa specie actionum quæ assumuntur in ludum: quod quidem iocan-

di genus secundum Tullium (Lib. I. de offic. cit. de scurrilit. & facet.) dicitur esse *illiberale, petulans, flagitiosum, obscenum*, quando scilicet utitur aliquis causa ludi turpibus verbis, vel factis, vel etiam his quæ vergunt in proximi nocumentum, quæ de se sunt peccata mortalia. Et sic patet quod excessus in ludo est peccatum mortale.

Alio autem modo potest esse excessus in ludo secundum defectum debitarum circumstantiarum; puta cum aliqui utuntur ludo vel temporibus, vel in locis indebitis, aut etiam præter convenientiam negotii, seu personæ. Et hoc quidem quandoque potest esse peccatum mortale propter vehementiam affectus ad ludum; cuius delectationem præponit aliquis dilectioni Dei; ita quod contra præceptum Dei, vel Ecclesiæ, talibus ludis uti non refugiat. Quandoque autem est peccatum veniale, puta si aliquis non tantum afficitur ad ludum quod propter hoc velit aliquid contra Deum committere.

Ad primum ergo dicendum, quod aliqua sunt peccata propter solam intentionem, quia scilicet in iniuriam alicuius sunt: quam quidem intentionem excludit ludus, cuius intentio ad delectationem fertur, non ad iniuriam alicuius: & in talibus ludus excusat a peccato, vel peccatum diminuit. Quædam vero sunt quæ secundum suam speciem sunt peccata, sicut homicidium, fornicatio, & similia: & talia non excusantur per ludum; quinimmo ex his ludus redditur flagitiosus, & obsecratus.

Ad secundum dicendum, quod superfluitas in ludo pertinet ad ineptam lætitiā, quam Gregorius (loc. cit. in arg.) dicit esse filiam gule: Unde Exod. xxxii. 6. dicitur: *Sedit populus manducare, & bibere, & surrexerunt ludere*.

Ad tertium dicendum, quod, sicut dictum est (art. præc.) ludus est necessarius ad conversationem humanæ vitæ. Ad omnia autem quæ sunt utilia conversationi humanæ, deputari possunt aliqua officia licita. Et ideo etiam officium histrionum; quod ordinatur ad solatium hominibus exhibendum, non est secundum se illicitum: nec sunt in statu peccati, dummodo moderate ludo utantur, id est non utendo aliquibus illicitis verbis, vel factis ad ludum, & non adhibendo ludum negotiis, & temporibus indebitis. Et quamvis in rebus hu-

tanis non utantur alio officio per comparationem ad alios homines; tamen per comparationem ad seipsos, & ad Deum, alias habent seriosas, & virtuosas operationes; puta dum orant, & suas passionem, & operationes componunt, & quandoque etiam pauperibus elemosinas largiuntur. Unde illi qui moderate eis subveniunt, non peccant, sed iuste faciunt, mercedem ministerii eorum eis tribuendo. Si qui autem superflue sua in tales consumunt, vel etiam sustentant illos hiltiones qui illicitis ludis utuntur; peccant, quasi eos in peccato foventes. Unde Augustinus dicit super Ioannes (tract. c. ante med.) quod *donare res suas histrionibus, vitium est immane, non virtus*; nisi forte aliquis hiltio esset in extrema necessitate, in qua esset ei subveniendum: dicit enim Ambrosius in Lib. de officiis (ut refertur cap. Pasce dist. lxxxvi.) *Pasce fame morientem: quisquis enim pascendo hominem servare poteris, si non paveris, occidisti.*

## ARTICULUS IV. 807

*Utrum in defectu ludi consistat aliquod peccatum.*

IV. Eth. lect. 16.

**A**D quartum sic proceditur. Videtur quod in defectu ludi non consistat aliquod peccatum. Nullum enim peccatum indicitur poenitenti. Sed Augustinus dicit (in Lib. de vera, & falsa poenit. cap. xv. a med.) de poenitente loquens: *Cobibeat se a ludis & a spectaculis seculi qui perfectam consequi vult remissionis gratiam.* Ergo in defectu ludi non est aliquod peccatum.

2. Præterea. Nullum peccatum ponitur in commendatione Sanctorum. Sed in commendatione quorundam ponitur quod a ludo abstinuerunt: dicitur enim Hierem. xv. 17. *Non sedi in concilio ludantium*; & Tob. 111. 17. dicitur: *Numquam cum ludentibus miscui me: neque cum his qui in levitate ambulant, participem me prabui.* Ergo in defectu ludi non potest esse peccatum.

3. Præterea. Andronicus ponit austeritatem, quam inter virtutes numerat, esse habitum, secundum quem aliqui nec afferunt aliis delectationes colloquutionum, nec ab his recipiunt. Sed hoc pertinet ad defectum ludi. Ergo defectus lu-

di magis pertinet ad virtutem quam ad vitium.

Sed contra est quod Philosophus in II. Ethic. (cap. vii.) & in IV. (cap. viii.) ponit defectum in ludo esse vitium.

Respondeo dicendum, quod omne quod est contra rationem in rebus humanis, vitium est. Est autem contra rationem ut aliquis se aliis onerosum exhibeat, puta dum nihil delectabile exhibet, & etiam aliorum delectationes impedit. Unde Seneca dicit (Lib. de iv. virtutib. cap. de continentia ante med.) *Sic te geras sapienter, quod nullus te habeat tamquam asperum, nec contemnatur quasi vilem.* Illi autem qui in ludo deiciunt, nec ipsi dicunt aliquid ridiculum, & dicentibus molesti sunt, quia scilicet moderatos aliorum ludos non recipiunt. Et ideo tales vitiosi sunt, & dicuntur *duri*, & *agressi*, ut Philosophus dicit in IV. Ethic. (cap. vii.)

Sed quia ludus est utilis propter quietem, & delectationem; delectatio autem, & quies non propter se queruntur in humana vita, sed propter operationem, ut dicitur in X. Ethic. (cap. vi.) ideo defectus ludi minus est vitiosus quam ludi superexcessus. Unde Philosophus dicit in IX. Ethic. (cap. x. ante med.) quod pauci amici propter delectationem sunt habendi, quia parum de delectatione sufficit ad vitam quasi pro condimento, sicut parum de sale sufficit in cibo.

Ad primum ergo dicendum, quod quia poenitentibus luctus indicitur pro peccatis, ideo interdicitur eis ludus. Nec hoc pertinet ad vitium defectus, quia hoc ipsum est secundum rationem quod in eis ludus diminuatur.

Ad secundum dicendum, quod Hieremias ibi loquitur secundum congruentiam temporis, cuius status magis ludum requirebat: unde subdit: *Solus sedebam, quoniam amaritudine repleti me.* Quod autem dicitur Tob. 111. pertinet ad ludum superfluum: quod patet ex eo quod sequitur: *Neque cum his qui in levitate ambulant, participem me prabui.*

Ad tertium dicendum, quod austeritas, secundum quod est virtus, non excludit omnes delectationes, sed superfluas, & inordinatas: unde videtur pertinere ad affabilitatem, quam Philosophus (Lib. IV. Ethic. cap. vi.) *amicitiam* nominat, vel ad eutrapeliam, sive iucunditatem: & tamen nominat, & definit eam sic secundum convenientiam ad



ad temperantiam, cuius est delectationes reprimere.

## QUAESTIO CLXIX.

De modestia,

in duos articulos divisa.

**D**Einde considerandum est de modestia, secundum quod consistit in exteriori apparatu, & circa hoc quaeruntur duo.

Primo, utrum circa exteriorem apparatum possit esse virtus, & vitium.

Secundo, utrum mulieres peccent mortaliter in superfluo ornatu.

### ARTICULUS I. 808

*Utrum circa exteriorem ornatum possit esse virtus, & vitium.*

*Ans. quest. clxxxvii. art. 6. cor. & quod. x. art. 14. & opusc. lxxx. cap. viii. & Matib. x. & 1. Ethic.*

**A**D primum sic proceditur. Videtur quod circa exteriorem ornatum non possit esse virtus, & vitium. Exterior enim ornatus non inest nobis a natura: unde & secundum diversitatem temporum, & locorum variatur: unde Augustinus dicit in III. de doctrina christi. (cap. xii. ad fi.) quod *talares, & manicatas tunicas habere apud veteres Romanos flagitium erat; nunc autem bono loco natis non eas habere flagitium est.* Sed, sicut Philosophus dicit in II. Ethic. (cap. 1.) naturaliter inest nobis aptitudo ad virtutes. Ergo circa huiusmodi non est virtus, & vitium.

2. Præterea. Si circa exteriorem cultum esset virtus, & vitium, oporteret quod superfluitas in talibus esset vitiosa, & etiam defectus vitiosus. Sed superfluitas in cultu exteriori non videtur esse vitiosa, quia etiam sacerdotes & ministri altaris in sacro ministerio pretiosissimis vestibus utuntur: similiter etiam defectus in talibus non videtur esse vitiosus, quia in laudem quorundam dicitur ad Heb. xi. 37. *Circueverunt in melioribus, & in pellibus caprinis.* Non ergo videtur quod in talibus possit esse virtus, & vitium.

3. Præterea. Omnis virtus aut est theologica, aut moralis, aut intellectualis. Sed circa huiusmodi non consistit virtus intellectualis, quæ perficitur in aliqua cognitione veritatis: similiter etiam

nec est ibi virtus theologica, quæ habet Deum pro obiecto: nec est etiam ibi aliqua virtutum moralium, quas Philosophus tangit (Lib. II. Ethic. cap. vii.) Ergo videtur quod circa huiusmodi cultum non possit esse virtus, & vitium.

Sed contra. Honestas ad virtutem pertinet. Sed in exteriori cultu consideratur quædam honestas: dicit enim Ambrosius in I. de officio. (cap. xix.) *Decor corporis non fit affectu, sed naturalis, simplex, neglectus magis quam expetitus, non pretiosus, & albensibus adiutus vestimentis, sed communibus, ut honestati, vel necessitati nihil desit, nihil accedat nitore.* Ergo in exteriori cultu potest esse virtus, & vitium.

Respondetur dicendum, quod in ipsis rebus exterioribus, quibus homo utitur, non est aliquod vitium, sed ex parte hominis, qui immoderate utitur eis. Quæ quidem immoderantia potest esse dupliciter. Uno quidem modo per comparationem ad consuetudinem hominum cum quibus aliquis vivit: unde dicit Augustinus in III. Confess. (cap. viii. a princ.) *Que contra mores hominum sunt flagitia, pro morum diversitate vitanda sunt; ut pactum inter se civitatis, aut gentis consuetudine, vel lege firmatum nullius civis, aut peregrini libidine violetur: turpis est enim omnis pars universo suo non congruens.*

Alio modo potest esse immoderantia in usu talium rerum ex inordinato affectu utentis; ex quo quandoque contingit quod homo nimis libidinosè talibus utatur, sive secundum consuetudinem eorum cum quibus vivit, sive præter eorum consuetudinem. Unde Augustinus dicit in III. de doctrina christi. (cap. xii. in fi.) *In usu rerum abesse oportet libidinem: quæ non solum ipsa eorum, inter quos vivit, consuetudine nequiter abutitur; sed etiam sæpe fines eius egreditur, sordiditatem suam, quæ inter claustra morum solemnium latitabat, flagitiosissima eruptione manifestat.*

Contingit autem ista inordinatio affectus tripliciter quantum ad superabundantiam. Uno modo per hoc quod aliquis ex superfluo cultu vestium hominum gloriam quaerit, prout scilicet vestes, & alia huiusmodi pertinent ad quemdam ornatum. Unde Gregorius dicit in quadam homilia (xl. in Evang. inter princ. & med.) *Sunt nonnulli qui cultum subtilium, pretiosarumque vestium non putant esse peccatum: quod videlicet si culpa*

*culpa non esset, nequaquam sermo Dei tam vigilanter exprimeret, quod dives qui torquebatur apud inferos, bysso, & purpura indutus fuisset. Nemo quippe vestimenta pretiosa, scilicet excedentia proprium statum, nisi ad inanem gloriam queris. Alio modo secundum quod homo per superfluum cultum vestium quærit delicias, secundum quod vestis ordinatur ad corporis fomentum. Tertio secundum quod nimialis sollicitudinem apponit ad exteriorum vestium cultum, etiamsi non sit aliqua inordinatio ex parte finis. Et secundum hoc Andronicus ponit tres virtutes circa exteriorum cultum: scilicet humilitatem, quæ excludit intentionem gloriæ, unde dicit, quod humilitas est habitus non superabundans in sumptibus, & præparationibus: & per sufficientiam, quæ excludit intentionem deliciarum, unde dicit, quod per se sufficientia est habitus contentus quibus oportet, & determinativa eorum quæ ad vivere conveniunt, secundum illud Apostoli I. ad Timoth. ult. 8. Habentes alimenta, & quibus tegamur, his contenti simus: & simplicitatem, quæ excludit superfluum sollicitudinem talium, unde dicit, quod simplicitas est habitus contentus his quæ contingunt.*

Ex parte autem defectus similiter potest esse duplex inordinatio per affectum. Uno quidem modo ex negligentia hominis, qui non adhibet studium, vel laborem ad hoc quod exteriori cultuatur, secundum quod oportet. Unde Philosophus dicit in VII. Ethic. (cap. VII. a med.) quod ad hoc molliorem pertinet quod aliquis trahat vestimentum per terram, ut non laboret elevando ipsum. Alio modo ex eo quod ipsum defectum exterioris cultus ad gloriam ordinat. Unde dicit Augustinus in Lib. II. de sermone Domini in monte (cap. XII. parum a princ.) non in solo rerum corporearum nitore, atque pompa, sed etiam in ipsis sordibus luctuosus esse posse iactantiam, & eo periculosiorem, quod sub nomine servitutis Dei decipit. Et Philosophus dicit in IV. Ethic. (cap. VII. cir. fi.) quod superabundantia, & inordinatus defectus ad iactantiam pertinet.

Ad primum ergo dicendum, quod quamvis ipse cultus exterior non sit a natura, tamen ad naturalem rationem pertinet ut exteriorum cultum moderetur: & secundum hoc nati sumus hanc virtutem suscipere, quæ exteriorum cultum moderatur.

Ad secundum dicendum, quod ille qui in dignitatibus constituitur, vel etiam ministris altaris, pretiosioribus vestibus quam ceteri induuntur, non propter sui gloriam, sed ad significandam excellentiam sui ministerii, vel cultus divini: & ideo in eis non est vitiosum. Unde Augustinus dicit in III. de doctrina christi. (cap. XII. in princ.) *Quisquis sic utitur exterioribus rebus, ut metas consuetudinis bonorum, inter quos versatur, excedat, aut aliquid significat, aut flagitiosus est, dum scilicet propter delicias, aut ostentationem talibus utitur.* Similiter etiam ex parte defectus contingit esse peccatum. Non tamen semper qui vilioribus quam ceteri vestibus utitur, peccat. Si enim hoc facit propter iactantiam, vel superbiam, ut se ceteris præferat, vitium superstationis est. Si autem hoc facias propter macerationem carnis, vel humiliationem spiritus, ad virtutem temperantiae pertinet. Unde Augustinus dicit in Lib. III. de doct. christi. (loc. cit.) *Quisquis restrictius rebus prætereuntibus utitur quam se habere mores eorum cum quibus vivit, aut temperatus, aut superstitiosus est.* Præcipue autem competit vilibus vestimentis uti his qui alios & verbo, & exemplo ad penitentiam hortantur; sicut fecerunt Prophetae, de quibus Apostolus ibi loquitur. Unde quædam Glossa (ord. super illud, Ipse autem Ioannes &c.) dicit Matth. III. *Qui penitentiam prædicat, habitum penitentiae præterdit.*

Ad tertium dicendum, quod huiusmodi exterior cultus indicium quoddam est conditionis humanæ: & ideo excessus, & defectus, & medium in talibus reduci possunt ad virtutem veritatis, quam Philosophus (loc. cit. in arg.) ponit circa facta, & dicta, quibus aliquid de statu hominis significatur.

## ARTICULUS II. 809

*Utrum ornaus mulierum sit sine peccato mortali.*

*Opus. LVII. cap. VIII. & Isa. III. fin. & I. Cor. VII. lect. 7.*

**A**D secundum sic proceditur. Videtur quod ornaus mulierum non sit sine peccato mortali. Omne enim quod est contra præceptum divinæ legis, est peccatum mortale. Sed ornaus mulierum est contra præceptum divinæ legis: dicitur enim I. Petr. III. 3. *Quartum, scilicet*

licet mulierum, non sit extrinsecus capit-  
latura, aut circumdatio aut, aut indumen-  
ti vestimentorum cultus: ubi dicit Glos-  
sa Cypriani (ord. Lib. de habitu virg.  
cir. med.), Serico, & purpura indu-  
tae, Christum fingere induere non pos-  
sunt: auro, & margaritis adornatae,  
& monilibus, ornamenta mentis, &  
corporis perdidit. Sed hoc non fit  
nisi per peccatum mortale. Ergo ornatus  
mulierum non potest esse sine peccato  
mortali.

2. Præterea. Cyprianus dicit in Li-  
bro de habitu virginum (loc. cit.)  
*Non virgines tantum, aut viduas, sed &  
nuptas puto, & omnes omnino feminas  
admonendas, quod opus Dei, & factu-  
ram eius, & plasma adulterare nullo mo-  
do debeant, adhibito flavo colore, vel ni-  
gro pulvere, vel rubore, aut qualibet linea-  
menta navia corrumpente medicamine.*  
Et postea subdit: Manus Deo inferunt,  
quando illud quod ille formavit, reformare  
contendunt. Impugnatio est ista divini  
operis, prævaricatio est veritatis. Deum vi-  
dicare non poteris, quando oculi tibi non sunt,  
quos Deus fecit, sed quos diabolus infe-  
cit, de inimico tuo compta, cum illo pa-  
rieris astuta. Sed hoc non debetur nisi  
peccato mortali. Ergo ornatus mulieris  
non est sine peccato mortali.

3. Præterea. Sicut non congruit mu-  
lieri quod veste virili utatur; ita etiam  
ei non competit quod inordinato ornatu  
utatur. Sed primum est peccatum: dicitur  
enim Deut. xxii. 5. *Non induatur  
mulier veste virili, nec vir veste mulie-  
bri.* Ergo etiam videtur quod super-  
fluous ornatus mulierum sit peccatum  
mortale.

4. Sed contra est, quia secundum hoc  
videretur quod artifices huiusmodi orna-  
menta præparantes mortaliter pec-  
carent.

Respondendo dicendum, quod circa orna-  
menta mulierum sunt eadem atten-  
denda quæ supra (art. præc.) communi-  
ter dicta sunt circa exteriorem cultum;  
& insuper quoddam aliud speciale, quod  
scilicet muliebri cultus viros ad lasciviam  
provocat, secundum illud Pro-  
verb. vii. 10. *Ecce mulier occurrit illi orna-  
tu meretricis præparata ad decipiendas  
animas.*

Potest tamen mulier licite operam da-  
re ad hoc quod viro suo placeat; ne per  
eius contemptum in adulterium iabatur.  
Unde dicitur I. ad Corinth. vii. 34.  
quod mulier quæ nupta est, cogitat quæ

sunt mundi, quomodo placeat viro. Et id-  
eo si mulier coniugata ad hoc se ornet  
ut viro suo placeat, potest hoc facere  
absque peccato.

Illæ autem mulieres quæ viros non ha-  
bent, nec volunt habere, vel sunt in  
statu non habendi, non possunt absque  
peccato appetere placere virorum aspec-  
tibus ad concupiscendum: quia hoc est  
dare eis incentivum peccandi. Et si qui-  
dem hac intentione se ornent, ut alios  
provocent ad concupiscendum, morta-  
liter peccant; si autem ex quadam levi-  
tate, vel etiam ex quadam vanitate pro-  
pter instantiam quamdam, non semper  
est peccatum mortale, sed quandoque  
veniale. Et eadem ratio quantum ad  
hoc est de viris. Unde Augustinus dicit  
in epist. ad Possidium (ccxlv. al. lxxiii.  
paulo a princ.) *Nolo ut de ornamentis au-  
ri, vel vestis præproprian habearis in  
prohibendo sententiam, nisi in eos qui neque  
coniugati sunt, neque coniugari cupientes,  
cogitare debent quomodo placeant Deo.*  
Illi autem cogitant quæ sunt mundi,  
quomodo placeant vel viri uxoribus, vel mu-  
lieres maritis: nisi quod capillos nudare  
feminas, quas etiam caput velare Aposto-  
lus iubet, nec maritatis decet.

In quo tamen casu possent aliquæ a  
peccato excusari, quando hoc non fieret  
ex aliqua vanitate, sed propter contra-  
riam consuetudinem; quamvis talis con-  
suetudo non sit laudabilis.

Ad primum ergo dicendum, quod, sic-  
ut Glossa (ordin.) ibidem dicit, mulie-  
res eorum qui in tribulatione erant, con-  
temnebant viros; & ut alii placerent,  
se pulchre ornabant: quod fieri Aposto-  
lus prohibet. In quo etiam casu loquitur  
Cyprianus; non autem prohibet,  
mulieres coniugatas ornari, ut placeant  
viris, ne detur eis occasio peccandi cum  
aliis. Unde Apostolus I. ad Timoth. ii.  
9. dicit: *Mulieres in habitu ornato, cum  
verecundia, & sobrietate ornantes se, non  
in tortis crinibus, aut auro, aut magna-  
ritis, aut veste pretiosa: per quod datur  
intelligi, quod subtritus, & moderatus orna-  
tus non prohibetur mulieribus, sed  
superfluous, & inverecondus, & impudi-  
cus.*

Ad secundum dicendum, quod mulie-  
rum fucatio, de qua Cyprianus loquitur,  
est quadam species fictionis, quæ  
non potest esse sine peccato. Unde Augu-  
stinus dicit in epist. ad Possidium (ccxlv.  
al. lxxiii. ante med.) *Fucati pigmentis,  
quo rubicundior, vel candidior appareat,*  
adul-

*adulterina fallacia est: qua non dubito etiam ipsos maritos se nolle decipi, quibus solis, scilicet maritis, permittendae sunt feminae ornari secundum veniam, non secundum imperium. Non semper tamen talis fucatio est cum peccato mortali, sed solum quando fit propter lasciviam, vel in Dei contemptum: in quibus casibus loquitur Cyprianus. Sciendum tamen, quod aliud est fingere pulchritudinem non habitam, & aliud occultare turpitudinem ex aliqua causa proveniente, puta aegritudine, vel aliquo huiusmodi: hoc enim est licitum: quia secundum Apostolum I. ad Corinth. xii. 23. quae putamus ignobiliora membra corporis esse, his honorem abundantiorum circumdamus.*

Ad tertium dicendum, quod, sicut dictum est (art. praec.) cultus exterior debet competere conditioni personae secundum commune consuetudinem. Et ideo de se vitiosum est quod mulier utatur veste virilis, aut e converso: & praecipue quia hoc potest esse causa lasciviae: & specialiter prohibetur in lege (Deut. xxii.) quia Gentiles tali mutatione habitus utebantur ad idololatricae superstitionem. Potest tamen quandoque hoc fieri sine peccato propter aliquam necessitatem, vel causa se occultandi ab hostibus, vel propter defectum alterius vestimenti, vel propter aliquid aliud huiusmodi.

Ad quartum dicendum, quod si qua ars est ad faciendum aliqua opera, quibus homines uti non possunt absque peccato, per consequens artifices talia faciendo peccarent, utpote praebentes directe aliis occasionem peccandi; puta si quis fabricaret idola, vel aliqua ad cultum idololatricae pertinentia. Si qua vero ars sit, cuius operibus homines possunt bene, & male uti (sicut gladii, sagittae, & alia huiusmodi) usus talium artium non est peccatum: & haec solae artes sunt dicendae. Unde Chrysostomus dicit super Matth. (hom. l. a med.) *Eas solum artes oportet vocare quae necessariorum, & eorum quae continent vitam nostram, sunt sributivae, & constrictivae.* Si tamen operibus alicuius artis ut pluries aliqui male utantur, quamvis de se non sint illicitae, sunt tamen per officium Principis a civitate extirpandae secundum documenta Platonis. Quia ergo mulieres licite se possunt ornare, vel ut con-

servent decentiam sui status, vel etiam aliquid superaddere, ut placeant viris, consequens est quod artifices talium ornamentorum non peccant in usu talis artis, nisi forte inveniendū aliqua superflua, & curiosa. Unde Chrysostomus dicit super Matthaeum (loc. cit.) quod etiam ab arte calciorum, & textorum multa abscindere oportet: etenim ad luxuriam deduxerunt, (a) necessitatem eius corrumpentes, artem arti male commiscentes.

## QUAESTIO CLXX.

De praeceptis temperantiae,  
in duos articulos divisa.

**P**ostea considerandum est de praeceptis temperantiae.

Et primo de praeceptis ipsius temperantiae.

Secundo de praeceptis partium eius.

## ARTICULUS I. 810

Utrum praecepta temperantiae convenienter in lege divina tradantur.

1. 2. quæst. c. art. xi. ad 3.

**A**D primum sic proceditur. Videtur quod praecepta temperantiae inconvenienter in lege divina tradantur. Fortitudo enim est potior virtus quam temperantia, ut supra dictum est (quæst. cxli. art. 8. & 1. 2. quæst. lxxvi. art. 4.) Sed nullum praeceptum fortitudinis ponitur inter praecepta Decalogi, quæ sunt potiora legis praecepta. Ergo inconvenienter inter praecepta Decalogi ponitur prohibitio adulterii, quod contrariatur temperantiae, ut ex supradictis patet (quæst. cliv. art. 8.)

2. Præterea. Temperantia non est solum circa venerea, sed etiam circa delectationem ciborum, & potum. Sed inter praecepta Decalogi non prohibetur aliquod vitium pertinens ad delectationem ciborum, & potum, neque etiam pertinens ad aliquam aliam speciem luxuriae. Ergo neque etiam debet poni aliquod praeceptum prohibens adulterium, quod pertinet ad delectationem venereorum.

3. Præterea. Principalis est in intentione legislatoris inducere ad virtutes quam, vitia prohibere: ad hoc enim vi-

tia

(a) Ita cum pluribus codicibus, & editis, verius edit. P. SAV. Neque enim: necessitate superata curiositatem ad male committit artes.

tia prohibentur ut virtutum impedimenta tollantur. Sed præcepta Decalogi sunt principaliora in lege divina. Ergo inter præcepta Decalogi magis debuit poni præceptum aliquod affirmativum directe inducens ad virtutem temperantiae, quam præceptum negativum prohibens adulterium, quod ei directe opponitur.

In contrarium est auctoritas Scripturae (Exod. xx.)

Respondeo dicendum, quod, sicut Apostolus dicit I. ad Timoth. 1. 5. *finis præcepti caritas est*: ad quam duobus præceptis inducimur pertinentibus ad dilectionem Dei, & proximi. Et ideo illa præcepta in Decalogo ponuntur quæ directius ordinantur ad dilectionem Dei, & proximi.

Inter vitia autem temperantiae opposita, maxime dilectioni proximi videtur opponi adulterium, per quod aliquis usurpat sibi rem alienam, abutendo scilicet uxore proximi. Et ideo inter præcepta Decalogi præcipue prohibetur adulterium, non solum secundum quod opere exercetur, sed etiam secundum quod corde concupiscitur.

Ad primum ergo dicendum, quod inter species vitiorum quæ opponuntur fortitudini, nulla est quæ ita directe contrarietur dilectioni proximi, sicut adulterium, quod est species luxuriæ, quæ temperantiae contrariatur: & tamen vitium audaciæ, quod opponitur fortitudini, quandoque solet esse causa homicidii, quod inter præcepta Decalogi prohibetur: dicitur enim Eccli. viii. 18. *Cum audace non eas in via, ne forte graves mala sua in te.*

Ad secundum dicendum, quod gula non directe opponitur dilectioni proximi, sicut adulterium, neque etiam aliqua alia species luxuriæ. Non enim tanta fit iniuria patri per stuprum virginis, quæ non est eius connubio deputata, quanta fit iniuria viro per adulterium uxoris, cuius corporis potestatem ipse habet, non uxor.

Ad tertium dicendum, quod præcepta Decalogi, ut supra dictum est (quæst. cxxii. art. 1.) sunt quædam universalia divinæ legis principia: unde oportet ea esse communia. Non poterant autem aliqua præcepta communia affirmativa de temperantia dari, quia usus eius variatur secundum diversa tempora, sicut Augustinus dicit in Libro de bono coniugali (cap. xv.) & secundum diversas hominum leges, & consuetudines.

## ARTICULUS II. 811

*Utrum convenienter tradantur, in divina lege præcepta de virtutibus annexis temperantiae.*

Ad secundum sic proceditur. Videtur quod inconvenienter tradantur in divina lege præcepta de virtutibus annexis temperantiae. Præcepta enim Decalogi, ut dictum est (art. præc. ad 3.) sunt quædam universalia principia totius legis divinæ. Sed *superbia est initium omnis peccati*, ut dicitur Eccli. x. 15. Ergo inter præcepta Decalogi debuit aliquod poni prohibitivum superbiæ.

2. Præterea. Illa præcepta maxime debent in Decalogo poni per quæ homines maxime inclinantur ad legis impletionem: quia ista videtur principalia. Sed per humilitatem, per quam homo Deo subiicitur, maxime videtur homo disponi ad observantiam divinæ legis: unde obedientia inter gradus humilitatis computatur, ut supra habitum est (quæst. cxxi. art. 6.) & idem etiam videtur esse dicendum de mansuetudine, per quam fit ut homo divinæ Scripturæ non contradicat, ut Augustinus dicit in II. de doctr. christ. (cap. vii. cir. princ.) Ergo videtur quod de humilitate, & mansuetudine aliqua præcepta in Decalogo poni debuerint.

3. Præterea. Dictum est (art. præc.) quod adulterium in Decalogo prohibetur, quia contrariatur dilectioni proximi. Sed etiam inordinatio exteriorum motuum, quæ contrariatur modestiæ, dilectioni proximi opponitur: unde Augustinus dicit in Regula (epist. cxxii. al. cix. cir. med.) *In omnibus motibus vestris nihil fiat quod cuiusquam offendas aspectum.* Ergo videtur quod etiam huiusmodi inordinatio debuit prohiberi per aliquod præceptum Decalogi.

In contrarium sufficit auctoritas Scripturæ.

Respondeo dicendum, quod virtutes temperantiae annexæ dupliciter considerari possunt: uno modo secundum se; alio modo secundum suos effectus. Secundum se quidem non habent directam habitudinem ad dilectionem Dei, vel proximi; sed magis respiciunt quamdam moderationem eorum quæ ad ipsum hominem pertinent.

Quantum autem ad effectus suos, possunt respicere dilectionem Dei, vel proximi:

ximi: & secundum hoc aliqua praecepta in Decalogo ponuntur pertinentia ad prohibendum effectus vitionum oppositorum temperantiae partibus: sicut ex ira, quae opponitur mansuetudini, procedit interdum aliquis ad homicidium (quod in Decalogo prohibetur) aut ad subtrahendum debitum honorem parentibus; quod etiam potest ex superbia provenire, ex qua etiam multi transgrediuntur praecepta primae tabulae.

Ad primum ergo dicendum, quod superbia est initium peccati, sed latens in corde; cuius etiam inordinatio non perpenditur communiter ab omnibus. Unde eius prohibitio non debuit poni inter praecepta Decalogi, quae sunt prima principia per se nota.

Ad secundum dicendum, quod praecepta quae per se inducunt ad observantiam legis, praesupponunt iam legem: unde non possunt esse prima legis, praecepta, ut in Decalogo ponantur.

Ad tertium dicendum, quod inordinatio exteriorum motuum non pertinet ad offensam proximi secundum ipsam speciem actus, sicut homicidium, adulterium, & furtum, quae in Decalogo prohibentur; sed solum secundum quod sunt signa interioris inordinationis, ut supra dictum est (quæst. clxxiii. art. 1. ad 1.)

## QUAESTIO CLXXI.

*De prophetia,  
in sex articulos divisa.*

**P**ostquam dictum est de singulis virtutibus, & vitiis, quae pertinent ad omnium hominum conditiones, & status, nunc considerandum est de his quae specialiter ad aliquos homines pertinent. Invenitur autem differentia inter homines secundum ea quae ad habitus, & actus animae rationalis pertinent, tripliciter. Uno quidem modo secundum diversas gratias gratis datas: quia, ut dicitur I. ad Corinth. xii. *divisiones gratiarum sunt: & alii datur per spiritum sermo sapientiae, alii sermo scientiae* &c. Alia vero differentia est secundum diversas vias, activam scilicet, & contemplativam, quae accipiuntur secundum diversa operationum studia; unde & ibidem dicitur, quod *divisiones operationum sunt*. Aliud enim est studium operationis in Martha, quae sollicita erat, & laborabat circa frequens ministerium, quod pertinet

ad vitam activam: aliud autem est in Maria, quae *sedens secus pedes Domini audiebat verbum illius*; quod pertinet ad contemplativam, ut habetur Lucæ x. Tertio modo secundum diversitatem officiorum, & statuum, prout dicitur ad Ephes. iv. 21. *Et ipse dedit quosdam quidem Apostolos, quosdam autem Prophetas, alios vero Evangelistas, alios autem Pastores, & Doctores*; quod pertinet ad diversa ministeria, de quibus dicitur I. ad Corinth. xii. 5. *Divisiones ministrorum sunt*. Est autem attendendum circa gratias gratis datas, de quibus occurrit consideratio prima, quod quaedam earum pertinent ad cognitionem, quaedam vero ad locutionem, quaedam vero ad operationem. Omnia vero quae ad cognitionem pertinet, sub prophetia comprehendendi possunt. Nam prophetica revelatio se extendit non solum ad futuros hominum eventus, sed etiam ad res divinas, & quantum ad ea quae proponuntur omnibus credenda, quae pertinent ad fidem, & quantum ad altiora mysteria, quae sunt perfectiorum, quae pertinent ad sapientiam. Est etiam prophetica revelatio de his quae pertinent ad spirituales substantias, a quibus vel ad bonum, vel ad malum inducimur; quod pertinet ad discretionem spirituum. Extendit etiam se ad directionem humanorum actuum; quod pertinet ad scientiam, ut infra patebit (quæst. clxxvii.) Et ideo primo occurrit considerandum de prophetia, & de raptu, qui est quidam prophetiae gradus.

De prophetia autem quadruplex consideratio occurrit: quarum prima est de essentia eius; secunda de causa ipsius; tertia de modo prophetiae cognitionis; quarta de divisione prophetiae.

Circa primum quaeruntur sex.

Primo, utrum prophetia pertineat ad cognitionem.

Secundo, utrum sit habitus.

Tertio, utrum sit solum futurorum contingentium.

Quarto, utrum Propheta cognoscat omnia prophetabilia.

Quinto, utrum Propheta discernat ea quae divinitus percipit, ab eis quae proprio spiritu videt.

Sexto, utrum prophetiae possit subesse falsum.

T

A R.

5. Tb. Opr. Tom. XXIII.

## ARTICULUS I. 813

Utrum prophetia pertineat ad cognitionem.

*Inf. art. 2. cor. & III. P. quæst. vii. art. 8. & ver. quæst. xii. ar. 2 & Iſaie 1. princ. & I. cor. xiv. princ. & Heb. xi. lect. 7.*

**A**D primum sic proceditur. Videtur quod prophetia non pertineat ad cognitionem. Dicitur enim Eccli. xlviii. 14. quod corpus Eliſai mortuum prophetavit: & infra cap. xlix. r8. dicitur de Ioseph, quod *essa ipſus viſitata sunt, & poſt mortem prophetaverunt*. Sed in corpore, vel in oſſibus poſt mortem non remanet aliqua cognitio. Ergo prophetia non pertinet ad cognitionem.

2. Præterea. I. ad Cor. xiv. 3. dicitur: *Qui prophetat, hominibus loquitur ad ædificationem*. Sed locutio est effectus cognitionis, non est autem ipsa cognitio. Ergo videtur quod prophetia non pertineat ad cognitionem.

3. Præterea. Omnis cognoscitiva perfectio excludit stultitiam, & insaniam. Sed hæc simul poſſunt eſſe cum prophetia: dicitur enim Oſee ix. 7. *Scitote Iſrael ſtultum prophetam, (a) insanum*. Ergo prophetia non est cognoscitiva perfectio.

4. Præterea. Sicut revelatio pertinet ad intellectum, ita inspiratio videtur pertinere ad affectum, eo quod importat motionem quandam. (Sed prophetia dicitur eſſe *inspiratio*, vel *revelatio*, ſecundum Caſſiodorum ( in prolog. ſuper Pſal. cap. x. ) Ergo videtur quod prophetia non magis pertineat ad intellectum quam ad affectum.

Sed contra est quod dicitur I. Reg. ix. 9. *Qui enim Propheta dicitur hodie, olim vocabatur Videns*. Sed viſio pertinet ad cognitionem. Ergo prophetia ad cognitionem pertinet.

Reſpondeo dicendum, quod prophetia primo & principaliter conſiſtit in cognitione, quia videlicet Prophetæ cognoscunt ea quæ ſunt procul, & remota ab hominum cognitione. Unde poſſunt dici Prophetæ a *pro* pro, quod est procul, & *phano* phano, quod est apparitio, quia ſcilicet eis aliqua quæ ſunt procul, apparent. Et propter hoc, ut

Iſidorus dicit in Lib. VII. Etymolog. (cap. viii.) in veteri teſtamento appellabantur *Videntes*, quia videbant ea quæ ceteri non videbant, & *propheteabant* quæ in mysterio abſcondita erant. Unde & Gentilitas eos appellabat *Vates* a vi mentis.

Sed quia, ut dicitur I. ad Cor. xii. 7. *unicuique datur maniſeſtatio ſpiritus ad utilitatem*: & infra cap. xiv. 12. dicitur: *Ad ædificationem Eccleſiæ querite* ut abundent: inde est quod prophetia ſecundario conſiſtit in locutione, prout Prophetæ ea quæ divinitus edocti cognoscunt, ad ædificationem aliorum annuntiant, ſecundum illud Iſaie xxi. 10. *Quæ audivi a Domino exercituum, Deo Iſrael, annuntiavi vobis*. Et ſecundum hoc, ut Iſidorus dicit in Lib. VII. Etymolog. (cap. viii.) poſſunt dici Prophetæ quali *Præſatores*, eo quod porro ſantur, id est a remotis ſantur, & de futuris vera prædicunt.

Ea autem quæ ſupra humanam cognitionem divinitus revelantur, non poſſunt confirmari ratione humana, (b) quam excedunt ſecundum operationem virtutis divinæ, ſecundum illud Marci ult. 20. *Prædicaverunt ubique, Domino cooperante, & ſermonem confirmante ſequentibus ſignis*. Unde tertio ad prophetiam pertinet operatio miraculorum, quali confirmatio quædam prophetice annuntiationis. Unde dicitur Deuter. ult. 10. *Non surrexit Propheta ultra in Iſrael, ſicut Moſes, quem noſſet Dominus facie ad faciem in omnibus ſignis, atque portentis*.

Ad primum ergo dicendum, quod auctoritates illæ loquuntur de prophetia quantum ad hoc tertium, quod aſſumit ut prophetiæ argumentum.

Ad ſecundum dicendum, quod Apoſtoli ibi loquuntur quantum ad propheticam enuntiationem.

Ad tertium dicendum, quod illi qui dicuntur prophetæ inſani, & ſtulti, non ſunt veri Prophetæ, ſed falſi: de quibus dicitur Hieremiæ xlii. 16. *Noſte audire verba prophetarum, qui prophetant vobis, & decipiunt vos: viſionem cordis ſui loquuntur, non de ore Domini*: & Ezech. xlii. 3. *Hæc dicit Dominus: Ve prophetis inſipientibus, qui ſequuntur ſpiritum ſuum, & nihil vident*.

Ad quartum dicendum, quod in prophet-

(a) Vulgata inſanum virum Colitnalem. (b) Ita cum viſi. vniſſiores ed'ſ. Garcia prius hæc lectiorem inveni quam excedunt, ſed ſecundum operationem &c. quem paſſim ſequitur ali. prophetæ. Theologi ſed operatione virtutis divinæ.

pheta requiritur quod intentio mentis elevetur ad percipiendam divinam. Unde dicitur Ezech. 11. 1. *Fili hominis, sta super pedes tuos, & loquar tecum.* Hæc autem elevatio intentionis fit Spiritu sancto movente: unde ibidem subditur: *Et ingressus est in me spiritus, & statuit me super pedes meos.* Postquam autem intentio mentis elevata est ad superna, percipit divinam. Unde subditur ibidem: *Et audivi loquentem ad me.* Sic igitur ad prophetiam requiritur inspiratio quantum ad mentis elevationem, secundum illud Iob xxxii. 8. *Inspiratio omnipotentis dat intelligentiam; revelatio autem quantum ad ipsam perceptionem divinorum: in quo perficitur prophetia, & per ipsam removetur obcuritatis, & ignorantiae velamen, secundum illud Iob xii. 22. Qui revelat profunda de tenebris.*

## ARTICULUS II. 813

*Utrum prophetia sit habitus.*

1. 2. *quæst. lxxviii. art. 3. ad 3. & III. cont. cap. cliv. fin. & ver. quæst. xii. art. 1. per tot. & art. 13. ad 3. & pot. quæst. vi. art. 4. fin. & quot. xii. art. 27. ad 1.*

**A**D secundum sic proceditur. Videtur quod prophetia sit habitus. Quia, ut dicitur in II. Ethic. (cap. v.) *tria sunt in anima, potentia, passio, & habitus.* Sed prophetia non est potentia, quia sic inesset omnibus hominibus, quibus potentia animæ sunt communes: similiter etiam non est passio, quia passionibus pertinent ad vim appetitivam, ut supra habitum est (1. 2. quæst. xxii. art. 2.) prophetia autem pertinet principaliter ad cognitionem, ut dictum est (art. præc.) Ergo prophetia est habitus.

2. Præterea. Omnis perfectio animæ, quæ non semper est in actu, est habitus. Sed prophetia est quedam animæ perfectio, non autem semper est in actu; alioquin non diceretur dormiens Prophetæ. Ergo videtur quod prophetia sit habitus.

3. Præterea. Prophetia computatur inter gratias gratis datas. Sed gratia est habituale quoddam in anima, ut supra habitum est (1. 2. quæst. cx. art. 2.) Ergo prophetia est habitus.

Sed contra. *Habitus est quo quis agit*

*cum voluerit, ut dicit Commentator in III. de Anima (comment. xviii.)* Sed aliquis non potest uti prophetia, cum voluerit; sicut patet IV. Reg. 111. de Heliſæo, quem cum Iſaſaph de futuris requireret, & prophetie spiritus ei deſceſſet, *psaltem fecit applicari, ut prophetia ad hunc spiritus per laudem psalmodiæ deſcenderet, atque eius animam de venturis repletur, ut Gregorius dicit super Ezech. (hom. 1. inter med. & fin.)* Ergo prophetia non est habitus.

Respondeo dicendum, quod, sicut Apostolus dicit ad Ephes. v. 13. *omne quod manifestatur, lumen est*: quia videlicet sicut manifestatio corporalis visionis fit per lumen corporale; ita etiam manifestatio visionis intellectualis fit per lumen intellectuale. Oportet ergo quod manifestatio proportionetur lumini, per quod fit, sicut effectus proportionatur suæ causæ. Cum ergo prophetia pertineat ad cognitionem, quæ supra naturalem rationem existit, ut dictum est (art. præc.) consequens est quod ad prophetiam requiratur quoddam lumen intellectuale excedens lumen naturalis rationis. Unde Michæ vii. 8. *Cum sederò in tenebris, Dominus lux mea est.*

Lumen autem dupliciter alicui inesse potest: uno modo per modum formæ permanentis, sicut lumen corporale est in Sole, & in igne; alio modo per modum cuiusdam passionis, sive impressionis tranſeuntis; sicut lumen est in aere. Lumen autem propheticum non inest intellectui Prophetæ per modum formæ permanentis: aliasporteret quod semper Prophetæ adesset facultas prophetandi: quod patet esse falsum. Dicit enim Gregorius super Ezechielem (hom. 1. inter med. & fin.) *Aliquando prophetie spiritus deſcendit Prophetis, nec semper eorum mentibus præſto eſt, quatenus cum hunc non habent, se hunc cognoscant ex dono habere, cum habent.* Unde Heliſæus dixit de muliere Sunamite IV. Reg. xv. 27. *Anima eius in amaritudine eſt, & Dominus celavit a me, & non indicavit mihi.*

Et huius ratio est, quia lumen intellectuale in aliquo existens per modum formæ permanentis, & perfectæ, perficit intellectum principaliter ad cognoscendum principium illorum quæ per illud lumen manifestantur: sicut per lumen intellectus agentis præcæpue intellectus cognoscit prima principia omnium illorum quæ naturaliter cognoscuntur. Prin-



cipium autem eorum quæ ad supernaturalem cognitionem pertinent, quæ per prophetiam manifestantur, est ipse Deus, qui per essentiam a Prophetis non videtur; videtur autem a beatis in patria, in quibus huiusmodi lumen inest per modum cuiusdam formæ permanentis, & perfectæ, secundum illud Psal. xxxv. 10. *In lumine tuo videbimus lumen.*

Relinquitur ergo quod lumen propheticum inest animæ Prophetæ per modum cuiusdam passionis, vel impressionis transiens; & hoc significatur Exod. xxxiii. 22. *Cumque transibis gloria mea, ponam te in foramine petre &c.* & III. Reg. xix. 11. dicitur ad Heliam: *Egredere, & sta in monte coram Domino: & ecce Dominus transiit &c.* Et inde est quod sicut aer semper indiget nova illuminatione, ita etiam mens Prophetæ semper indiget nova revelatione; sicut discipulus, qui nondum est adeptus principia artis, indiget ut de singulis instruat. Unde & Isaïæ l. 4. dicitur: *Mane erigis mihi aurem, ut audiam quasi magistrum.* Et hoc etiam ipse modus loquendi prophetiam designat, secundum quod dicitur, quod locutus est Dominus ad talem, vel talem Prophetam; aut quod *factum est verbum Domini*, sive *manus Domini super eum*. Habitus autem est forma permanens. Unde manifestum est quod prophetia, proprie loquendo, non est habitus.

Ad primum ergo dicendum, quod illa divisio Philosophi non comprehendit absolute omnia quæ sunt in anima, sed ea quæ possunt esse principia moralium actuum: qui quandoque sunt ex passione, quandoque autem ex habitu, quandoque autem ex potentia nuda, ut patet in his qui ex iudicio rationis aliquid operantur, antequam habeant habitum. Potest autem prophetia ad passionem reduci, si tamen nomen passionis pro qualibet receptione accipiatur, prout Philosophus dicit in III. de Anima (tex. 12.) quod *intelligere pati quoddam est*. Sic enim in cognitione naturali intellectus possibilis patitur ex lumine intellectus agentis; ita etiam in cognitione prophetica intellectus humanus patitur ex illuminatione divinis luminis.

Ad secundum dicendum, quod sicut in rebus corporalibus, abeunte passione, remanet quædam habitus ad hoc quod iterum patiantur, sicut lignum semel inflammatum facilius iterum inflammatur; ita etiam in intellectu Prophetæ,

cessante actuali illustratione, remanet quædam habitus ad hoc quod facilius iterato illustretur: sicut etiam mens semel ad devotionem excitata, facilius postmodum ad devotionem pristinam revocatur. Propter quod Augustinus in Libro deorando Deum (epist. cxxx. al. cxxv. cap. ix. cir. med.) dicit, esse necessarias crebras orationes, *ne concepta devotio taliter exinguatur.*

Potest tamen dici, quod aliquis dicitur Propheta, etiam cessante actuali prophetica illustratione, ex deputatione divina, secundum illud Hierem. i. 5. *Et Prophetam in gentibus dedi te.*

Ad tertium dicendum, quod omne donum gratiæ hominem elevat ad aliquid quod est supra naturam humanam: quod quidem potest esse dupliciter. Uno modo quantum ad substantiam actus, sicut miracula facere, & cognoscere occulta, & incerta divini sapientie: & ad hos actus non datur homini donum gratiæ habituale. Alio modo est aliquid supra naturam humanam quantum ad modum actus, non autem quantum ad substantiam ipsius; sicut diligere Deum, & cognoscere eum in speculo creaturarum: & ad hoc datur donum gratiæ habituale.

### ARTICULUS III. 24

*Utrum prophetia sit solum futurorum contingentium.*

*Inf. quæst. clxxii. art. 1. corp. fin. & ad 4. & veri. quæst. xlii. art. 2. & Is. 1. princ. & Rom. xlii. lect. 2.*

**A**D tertium sic proceditur. Videtur quod prophetia sit solum futurorum contingentium. Dicit enim Cassiodorus (in prol. super Pl. cap. 1.) quod *prophetia est inspiratio, vel revelatio divina, rerum eventus immobili veritate denuntians*. Sed eventus pertinet ad contingentia futura. Ergo de solis contingentibus futuris fit revelatio prophetica.

2. Præterea. Gratia prophetiæ dividitur contra sapientiam, & fidem, quæ sunt de divinis, & discretionem spirituum, quæ est de spiritibus creatis, & scientiam quæ est de rebus humanis, ut patet I. ad Cor. xii. Habitus autem, & actus distinguuntur secundum obiecta, ut patet per ea quæ supra dicta sunt (1. 2. quæst. lrv. art. 2.) Ergo videtur quod de nullo pertinente ad aliquid horum sit

sit prophetia. Relinquitur ergo quod sit solum de futuris contingentibus.

3. Præterea. Diversitas obiecti causat diversitatem speciei, ut ex supradictis patet (1. 2. quæst. IIV. art. 2.) Si ergo prophetia quædam sit de futuris contingentibus, quædam autem de quibuldam aliis rebus, videtur sequi quod non sit eadem species prophetiæ.

Sed contra est quod Gregorius dicit super Ezech. (hom. 1. cir. princ.) quod prophetia quædam est de futuro; sicut id quod dicitur (Isaia vii.) *Ecce virgo concipiet, & pariet filium*: quædam de præterito; sicut id quod dicitur (Gen. 1.) *In principio creavit Deus cælum, & terram*: quædam de præsentibus; sicut id quod dicitur (1. ad Cor. XIV.) *Si omnes prophetent, invitet autem quis infidelis, occulta cordis eius manifestata sunt.* Non ergo est prophetia solum de contingentibus futuris.

Respondeo dicendum, quod manifestatio, quæ fit per aliquod lumen, ad omnia illa se extendere potest quæ illi lumini subiiciuntur; sicut visio corporalis se extendit ad omnes colores, & cognitio naturalis animæ se extendit ad omnia illa quæ subduntur lumini intellectus agentis. Cognitio autem prophetica est per lumen divinum, quo possunt omnia cognosci tam divina, quam humana, tam spiritalia, quam corporalia: & ideo revelatio prophetica ad omnia huiusmodi se extendit; sicut de his quæ pertinent ad Dei excellentiam, (a) & Angelorum, spirituum ministerio revelatio prophetica facta est Isaia cap. VI. 4. ubi dicitur: *Vidi Dominum sedentem super solium excelsum, & elevatum.* (b) Cuius etiam prophetia continet ea quæ pertinent ad corpora naturalia, secundum illud Isaia XI. 2. *Quis mensus est pugillo aquas?* &c. Continet etiam ea quæ ad mores hominum pertinent, secundum illud Isaia LVIII. 7. *Frangite esuriienti panem tuum* &c. Continet etiam ea quæ pertinent ad futuros eventus, secundum illud Isaia XLVII. 9. *Veniet tibi duo in die una subito, sterilitas, & viduitas.*

Considerandum tamen est, quod quia prophetia est de his quæ procul a nostra cognitione sunt, tanto aliqua magis proprie ad prophetiam pertinent, quanto longius ab humana cognitione existunt.

S. Th. Oper. Tom. XXIII.

Horum autem est triplex gradus. Quorum unus est eorum quæ sunt procul a cognitione huius hominis sive secundum sensum, sive secundum intellectum, non autem a cognitione omnium hominum; sicut sensu cognoscit aliquis homo quæ sunt sibi præsentia secundum locum; quæ tamen alius humano sensui, utpote sibi absentia, non cognoscit. Et sic Helisæus prophetice cognovit quæ Giezi discipulus eius in absentia fecerat, ut habetur IV. Reg. v. & similiter cogitationes cordis unius alteri prophetice manifestantur, ut dicitur I. ad Cor. XIV. & per hunc modum etiam ea quæ unus scit demonstrative, alii possunt prophetice revelari. Secundus autem gradus est eorum quæ excedunt universaliter cognitionem omnium hominum, non quia secundum se non sint cognoscibilia, sed propter defectum cognitionis humanæ; sicut mysterium Trinitatis, quod revelatum est per Seraphim dicentia, *Sanctus, Sanctus, Sanctus* &c. ut habetur Isaia VI. Ultimus autem gradus est eorum quæ sunt procul ab omnium hominum cognitione, quia in seipsis non sunt cognoscibilia; ut contingentia futura, quorum veritas non est determinata. Et quia quod est universaliter, & secundum se, potius est eo quod est particulariter, & per aliud; ideo ad prophetiam propriissime pertinet revelatio eventuum futurorum: unde & nomen prophetiæ sumi videtur. Unde Gregorius dicit super Ezech. (hom. 1. in princ.) *Et cum ideo prophetia dicta sit, quod futura prædicat, quando de præterito, vel præsentis loquitur, rationem sui nominis amittit.*

Ad primum ergo dicendum, quod prophetia ibi definitur secundum id quod proprie significatur nomine prophetiæ: & per hunc etiam modum prophetia dividitur contra alias gratias gratis datus.

Unde patet responsio ad secundum. Quamvis possit dici, quod omnia quæ sub prophetia cadunt, conveniunt in hac ratione quod non sunt ab homine cognoscibilia nisi per revelationem divinam; ea vero quæ pertinent ad sapientiam, & scientiam, & interpretationem sermonum, possunt naturali ratione ab homine cognosci; sed aliorum modo manifestantur per illustrationem

1 3 di-

(a) Ita cum mss. edit. Rom. alique veteres. Recentiores Gaciam sequuntur se legunt & sunt locorum spirituum ministeria revelatio &c. (b) Ita cum mss. Tarras, veteres edit. Cod. Alcan. Eiusd. Theologi, & posteriores edit. Quin.

divini luminis. Fides autem etsi sit de invisibilibus homini, tamen ad ipsam non pertinet eorum cognitio quæ creduntur, sed quod homo per certitudinem assentiat his quæ sunt ab aliis cognita.

Ad tertium dicendum, quod formale in cognitione prophetica est lumen divinum, a cuius unitate prophetia habet unitatem speciei; licet sint diversa, quæ per divinum lumen prophetice manifestantur.

#### ARTICULUS IV. 815

*Utrum Propheta per divinam revelationem cognoscat omnia quæ possunt prophetice cognosci.*

*Ter. quest. xii. art. 1. ad 5. & Rom. xv. lect. 3. in princ.*

**A**D quartum sic proceditur. Videtur quod Propheta per divinam revelationem cognoscat omnia quæ possunt prophetice cognosci. Dicitur enim *Agnos 111. 7. Non faciet Dominus Deus verbum, nisi revelaveris secretum suum ad servos suos Prophetas*. Sed omnia quæ prophetice revelantur, sunt verba divinitus facta. Nihil ergo eorum est quod non reveletur Prophetæ.

2. Præterea. *Dei perfecta sunt opera*, ut dicitur Deuter. xxxiii. 4. Sed prophetia est divina revelatio, ut dictum est (art. præc.) Ergo est perfecta: quod non esset, nisi perfecte omnia prophetabilia prophetice revelarentur: quia perfectum est cui nihil desit, ut dicitur in III. Physic. (tex. 63.) Ergo Prophetæ omnia prophetabilia revelantur.

3. Præterea. Lumen divinum, quod causat prophetiam, est potentius quam lumen naturalis rationis, ex quo causatur humana scientia. Sed homo qui habet aliquam scientiam, cognoscit omnia quæ ad illam scientiam pertinent; sicut Grammaticus cognoscit omnia grammaticalia. Ergo videtur quod Prophetæ cognoscit omnia prophetabilia.

Sed contra est quod Gregorius dicit super Ezech. (hom. r. inter princ. & med.) quod aliquando spiritus prophetie ex præsentis tangit animum prophetantis, & ex futuro nequaquam tangit; aliquando autem ex præsentis non tangit, & ex futuro tangit. Non ergo Propheta cognoscit omnia prophetabilia.

Respondendo dicendum, quod diversa

non est necesse esse simul, nisi propter aliquod unum, in quo connectuntur, & a quo dependent, sicut supra dictum est (1. 2. quest. lxxv. art. 1. & 3.) quod virtutes omnes necesse est esse simul propter prudentiam, vel caritatem. Omnia autem quæ per aliquod principium cognoscuntur, connectuntur in illo principio, & ab illo dependent. Et ideo qui cognoscit perfecte principium secundum totam eius virtutem, simul cognoscit omnia quæ per illud principium cognoscuntur; ignorato autem communi principio, vel communiter apprehenso, nulla necessitas est simul omnia cognoscendi; sed unumquodque eorum per se oportet manifestari, & per consequens aliqua eorum possunt cognosci, & alia non cognosci.

Principium autem eorum quæ divino lumine prophetice manifestantur, est ipsa veritas prima, quam Prophetæ in seipsa non vident. Et ideo non oportet quod omnia prophetabilia cognoscant; sed quilibet eorum cognoscit ex eis aliqua secundum specialem revelationem huius vel illius rei.

Ad primum ergo dicendum, quod Dominus omnia quæ sunt necessaria ad instructionem fidelis populi, revelat Prophetis; non tamen omnia omnibus, sed quædam uni, quædam alii.

Ad secundum dicendum, quod prophetia est sicut quiddam imperfectum in genere divinæ revelationis: unde dicitur I. ad Corinth. xii. 8. quod prophetia evacuabuntur, & quod ex parte prophetamus, id est imperfecte. Perfectio autem divinæ revelationis erit in patria: unde subditur: *Cum veneris quod perfectum est, evacuabitur quod ex parte est*. Unde non oportet quod prophetice revelationi nihil desit, sed quod nihil desit eorum ad quæ prophetia ordinatur.

Ad tertium dicendum, quod ille qui habet aliquam scientiam, cognoscit principia illius scientiæ, ex quibus omnia quæ sunt illius scientiæ, dependent: & ideo qui (a) perfecte habet habitum alicuius scientiæ, scit omnia quæ ad illam scientiam pertinent. Sed per prophetiam non cognoscitur in seipso principium prophetiarum cognitionum, quod est Deus. Unde non est similis ratio.

A R-

(a) Ita vss. & editi possum. Al. imperfecte.

## ARTICULUS V. 816

*Utrum Propheta discernat semper quid dicat per spiritum proprium, & quid per spiritum prophetiæ.*

III. *cons. cap. cliv. & ver. quæst. xii. art. 2. ad 15. & 16.*

**A**D quintum sic proceditur. Videtur quod Propheta discernat semper quid dicat per spiritum proprium, & quid per spiritum prophetiæ. Dicit enim Augustinus in VI. Conf. (cap. xiii. a med.) quod mater sua dicebat discernere se necio quo sapore, quem verbis explicare non poterat, quid interesset inter Deum revelantem, & inter animam suam somniantem. Sed prophetia est revelatio divina, ut dictum est (art. 3. hu. quæst.) Ergo Propheta semper discernit id quod dicit per spiritum prophetiæ, ab eo quod loquitur spiritui proprio.

2. Præterea. Deus non præcipit aliquid impossibile, sicut Hieronymus (Pelagius) dicit (in exposit. Symboli da Damiani versus fi.) Præcipitur autem prophetis Hierem. xxxiii. 28. *Propheta qui habet somnium, narret somnium; & qui habet sermonem meum, loquatur sermonem meum vere.* Ergo Propheta potest discernere quid habeat per spiritum prophetiæ, ab eo quod aliter videt.

3. Præterea. Maior est certitudo quæ est per divinum lumen, quam quæ est per lumen rationis naturalis. (a) Sed per lumen rationis naturalis ille qui habet scientiam, pro certo scit se habere. Ergo ille qui habet prophetiam per lumen divinum, multo magis certus est se habere.

Sed contra est quod Gregorius dicit super Ezech. (hom. 1. inter. med. & fi.) *Sciendum est, quod aliquando Prophetæ sancti, dum consuluntur, ex magno usu prophetandi quædam ex suo spiritu profertur, & se hoc ex prophetiæ spiritu dicere suspiciantur.*

Respondendo dicendum, quod mens Prophetæ dupliciter a Deo instruitur: uno modo per expressam revelationem; alio modo per quendam instinctum occultissimum, quem nescientes humane mentes patiuntur, ut Augustinus dicit II. super Gen. ad lit. (cap. xvii. vers. fi.) De his ergo quæ expresse per spiritum prophetiæ Propheta cognoscit, maximam

certitudinem habet, & pro certo habet quod hæc sunt divinitus sibi revelata: unde dicitur Hierem. xxvi. 15. *In veritate mihi me Dominus ad vos, ut loquerer in aures vestras omnia verba hæc: alioquin si de hoc ipse certitudinem non haberet, fides quæ dictis Prophetarum innititur, certa non esset.* Et signum prophetiæ certitudinis accipere possumus ex hoc quod Abraham admonitus in prophetica visione, se præparavit ad filium unigenitum immolandum: quod nullatenus fecisset, nisi de divina revelatione fuisset certissimus.

Sed ad ea quæ cognoscit per instinctum, aliquando sic se habet ut non plene discernere possit, utrum hæc cogitaverit aliquo divino instinctu, vel per spiritum proprium. Non autem omnia quæ cognoscimus divino instinctu, sub certitudine prophetica nobis manifestantur: talis enim instinctus est quiddam imperfectum in genere prophetiæ. Et hoc modo intelligendum est verbum Gregorii. Ne tamen error ex hoc possit accidere, per spiritum sanctum citius corripit, ab eo quæ vera sunt, audiunt; & semetipsos, quia falsa dixerint, reprehendunt, ut ibidem Gregorius subdit. Primæ autem rationes procedunt quantum ad ea quæ prophetico spiritu revelantur.

Unde patet responsio ad obiecta.

## ARTICULUS VI. 817

*Utrum ea quæ prophetice cognoscuntur, vel annuntiantur, possint esse falsa.*

*Inf. quæst. clxxii. art. 1. cor. & art. 5. ad 3. & art. 6. ad 2. & ver. quæst. xii. art. 3. cor. & art. 10. ad 7.*

**A**D sextum sic proceditur. Videtur quod ea quæ prophetice cognoscuntur, vel annuntiantur, possint esse falsa. Prophetia enim est de futuris contingentibus, ut dictum est (art. 3. hu. quæst.) Sed futura contingentia possunt non evenire; alioquin ex necessitate contingerent. Ergo prophetiæ potest subesse falsum.

2. Præterea. Isaïas propheticæ prænantiavit Ezechia dicens: *Dispone domui tuæ, quia morieris tu, & non vires: & tamen additi sunt vitæ eius postea quindecim anni, ut habetur IV. Reg. xx. 7. & Isaïæ xxxviii. 1. Similiter & Hierem. xlviii. 7. Dominus dicit:*

T 4 Re-

(a) Ita cum plurimis mss. editi passim. Editi novissimi cum aliis quibusdam mss. Ille autem qui habet ceteram, alibi emisit.

*Repenite loquar adversum gentem, & adversum regnum, ut erasiceam, & destruiam, & disperdam illud. Si paenitentiam egerit gens illa a malo suo quod locutus sum adversus eam, agam & ego paenitentiam super malo quod cogitavi ut facerem ei.* Et hoc apparet per exemplum Ninivitarum, secundum illud Ionae 111. 10. *Miseratus est Dominus super malitiam quam dixit ut faceret eis, & non fecit.* Ergo prophetiae potest subesse falsum.

3. Præterea. Omnis conditionalis, cuius antecedens est necessarium absolute, consequens est necessarium absolute: quia ita se habet consequens in conditionalibus ad antecedens, sicut conclusio ad præmissas in syllogismo. Ex necessariis autem nunquam contingit syllogizari nisi necessarium, ut probatur in 1. Posterior. (tex. 17.) Sed si prophetiae non potest subesse falsum, oportet hanc conditionalem esse veram: *Si aliquid est prophetatum, erit.* Huius autem conditionalis antecedens est necessarium absolute, cum sit de præterito. Ergo & consequens erit necessarium absolute: quod est inconveniens: quia sic prophetia non esset contingentium. Falsum est ergo quod prophetiae non possit subesse falsum.

Sed contra est quod Cassiodorus dicit (in prol. in Pl. cap. 1. in princ.) quod *prophetia est inspiratio, vel revelatio divina, rerum eventus immobili veritate denuntians.* Non autem esset immobilis veritas prophetiae, si posset ei falsum subesse. Ergo non potest ei subesse falsum.

Respondeo dicendum, quod, sicut ex dictis patet (art. 1. 3. & 5. huius quæst.) prophetia est quædam cognitio intellectui Prophetæ impressa ex revelatione divina per modum cuiusdam doctrinæ. Veritas autem cognitionis est eadem in discipulo, & in docente: quia cognitio additæ est similitudo cognitionis docente; sicut etiam in rebus naturalibus forma generati est similitudo quædam rationis generantis. Et per hunc etiam modum Hieronymus dicit (implic. super illud Dan. 11. *Respondentes ergo Chaldaei*) quod prophetia est quoddam signum divine præscientie. Oportet igitur eandem esse veritatem prophetiae cognitionis, & enuntiationis, quæ est cognitionis divine, cui impossibile est subesse falsum, ut in 1. dictum est (quæst. xiv. art. 13. & 15. & quæst. xvi. art. 8.) Unde prophetiae non potest subesse falsum.

Ad primum ergo dicendum, quod, sicut in 1. dictum est (quæst. xxix. art. 4.) certitudo divine præscientie non excludit contingentiam singularium futurorum, quia fertur in ea, secundum quod sunt præsentia, & iam determinata ad unum. Et ideo etiam prophetia, quæ est divine præscientie similitudo impressa, vel signum, sua immobili veritate futurorum contingentiam non excludit.

Ad secundum dicendum, quod divina præscientia respicit futura secundum duos: scilicet secundum quod sunt in seipsis, inquantum scilicet ipsa præsentia iter inveniuntur; & secundum quod sunt in suis causis, inquantum scilicet videt ordinem causarum ad effectus. Et quamvis contingentia futura, prout sunt in seipsis, sint determinata ad unum; tamen prout sunt in suis causis, non sunt determinata, quin possint aliter evenire. Et quamvis ista duplex cognitio semper intellectui divino coniungatur; non tamen coniungitur semper in revelatione prophetica: quia impressio agentis non semper ædequat eius virtutem. Unde quandoque revelatio prophetica est impressa quædam similitudo divine præscientie, prout respicit ipsa futura contingentia in seipsis: & talia sic eveniunt, sicut prophetantur, sicut illud Isa. vii. 14. *Ecce virgo concipiet.* Quandoque vero prophetica revelatio est impressa similitudo divine præscientie, prout scilicet cognoscit ordinem causarum ad effectus: & tunc quandoque aliter evenit quam propheteretur; nec tamen prophetiae subest falsum: nam sensus prophetiae est quod inferiorum causarum dispositio sive naturalium, sive humanorum actuum, hoc habet ut talis effectus eveniat. Et secundum hoc intelligitur verbum Isa. xxxviii. 1. dicens: *Morieus, & non vives;* idest, dispositio corporis tui ad mortem ordinatur: & quod dicitur Ionæ 111. 4. *Adhuc quadraginta dies, & Ninive subvertetur;* idest, hoc merita eius exigunt ut subvertatur. Dicitur autem Deus penitere metaphorice, inquantum ad modum penitentis se habet, prout scilicet mutat sententiam, etsi non mutat consilium.

Ad tertium dicendum, quod quia eadem est veritas prophetiae, & divine præscientie, ut dictum est (in cor. ar.) hoc modo illa conditionalis est vera, *Si aliquid est prophetatum, erit*, sicut ista, *Si aliquid est prædictum, erit*: in utraque enim antecedens est impossibile non esse. Unde & consequens est necessarium, non

non

non secundum quod est futurum respectu nostri, sed ut consideratur in suo praesenti, prout subditur praescientiae divinae, ut in primo dictum est (quaest. XIV. art. 13. ad 2.)

## QUAESTIO CLXXII.

*De causa prophetiae,  
in sex articulos divisa.*

**D**einde considerandum est de causa prophetiae.

Circa hoc quaeruntur sex.

Primo, utrum prophetia sit naturalis. Secundo, utrum sit a Deo mediante angelis.

Tertio, utrum ad prophetiam requiratur dispositio naturalis.

Quarto, utrum requiratur bonitas morum.

Quinto, utrum sit aliqua prophetia a demonibus.

Sexto, utrum prophetiae demonum aliquando dicant verum.

## ARTICULUS I. 818

*Utrum prophetia possit esse naturalis.*

*Inf. art. 3. cor. & ver. quaest. XII. art. 3.  
& 4. cor.*

**A**d primum sic proceditur. Videtur quod prophetia possit esse naturalis. Dicit enim Gregorius in IV. Dialogorum (cap. XXVI. in princ.) quod ipsa aliquando animarum vis sua subtilitate aliquid praevideat: & Augustinus dicit in XII. super Gen. ad lit. (cap. XIII.) quod animae humanae, secundum quod a sensibus corporis abstrahitur, competis futura praevideat. Hoc autem pertinet ad prophetiam. Ergo anima naturaliter potest assequi prophetiam.

2. Praeterea. Cognitio animae humanae magis viget in vigilando quam in dormiendo. Sed in dormiendo quidam naturaliter praevident quaedam futura, ut patet per Philosophum in Lib. de somn. & vig. (seu Lib. de divinatione per somn. cap. 11.) Ergo multo magis potest homo naturaliter futura praecognoscere.

3. Praeterea. Homo secundum suam naturam est perfectior animalibus brutis. Sed quaedam animalia bruta habent praecognitionem futurorum ad se pertinentium, sicut formicae praecognoscunt pluvias futuras, quod patet ex hoc quod ante pluviam incipiunt grana in foramen reponere; & similiter pisces pra-

cognoscunt tempestates futuras, ne penditur ex eorum motu, dum loca tempestuosa declinant. Ergo multo magis homines naturaliter praecognoscere possunt futura ad se pertinentia, de quibus est prophetia. Est ergo prophetia a natura.

4. Praeterea. Proverb. XXIX. 18. dicitur: Cum prophetia defecerit, dissipabitur populus: & sic patet quod prophetia est necessaria ad hominum conservationem. Sed natura non deficit in necessariis. Ergo videtur quod prophetia sit a natura.

Sed contra est quod dicitur II. Petr. 1. 21. Non enim voluntate humana allata est aliquando prophetia; sed Spiritus sancto inspirante locuti sunt sancti Dei homines. Ergo prophetia non est a natura, sed ex dono Spiritus sancti.

Respondeo dicendum, quod, sicut supra dictum est (quaest. praec. art. 6. ad 2.) prophetica praecognitio potest esse de futuris dupliciter: uno modo secundum quod sunt in seipsis; alio modo secundum quod sunt in suis causis. Praecognoscere autem futura, secundum quod sunt in seipsis, est proprium divini intellectus, cuius aeternitati sunt omnia praesentia, ut in primo dictum est (quaest. XIV. art. 13.) Et ideo talis praecognitio futurorum non potest esse a natura, sed solum ex revelatione divina.

Futura vero in suis causis possunt praecognosci naturali cognitione etiam ab homine; sicut Medicus praecognoscit sanitatem, vel mortem futuram in aliquibus causis, quarum ordinem ad tales effectus experimento praecognovit.

Et talis cognitio futurorum potest intelligi esse in homine dupliciter a natura. Uno modo sic quod statim anima ex eo quod in seipsa habet, possit praecognoscere futura: & sic, sicut Augustinus dicit XII. super Gen. ad lit. (cap. 13. in princ.) quidam voluerunt, animam humanam habere quandam vim divinationis in seipsa. Et hoc videtur esse secundum opinionem Platonis, qui posuit (in dialogo VI. de Repub. verius si.) quod animae habent omnium rerum cognitionem per participationem idearum; sed ista cognitio obnubilatur in eis per coniunctionem corporis; in quibusdam tamen plus, in quibusdam vero minus, secundum corporis puritatem diversam. Et secundum hoc posset dici, quod homines habentes animas non multum obnubilatas ex corporum unione, pos-

possunt talia futura præcognoscere secundum propriam scientiam. Contra hoc autem obicit Augustinus (loc. cit.) *cur non semper possit vim divinationis habere anima, cum semper velit?*

Sed quia verius esse videtur quod anima ex sensibilibus cognitionem acquirat secundum sententiam Aristotelis, ut in primo dictum est (quæst. lxxxiv. art. 3. 6. & 7.) ideo melius est dicendum alio modo, quod præcognitionem talium futurorum homines non habent, sed acquirere possunt per viam experimentalem, in qua iuvantur per naturalem dispositionem, secundum quod in homine invenitur perfectio virtutis imaginativæ, & claritas intelligentiæ.

Et tamen hæc præcognitio futurorum differt a prima, quæ habetur ex revelatione divina, dupliciter. Primo quidem quia prima potest esse quorumcumque eventuum, (a) & infallibiliter; hæc autem præcognitio, quæ naturaliter haberi potest, est circa quosdam effectus, ad quos se potest extendere experientia humana. Secundo quia prima prophetia est secundum immobilem veritatem; non autem secunda, sed potest ei subesse falsum. Prima autem præcognitio proprie pertinet ad prophetiam, non secunda; quia, sicut supra dictum est (quæst. præc. art. 1.) prophetica cognitio est eorum quæ naturaliter excedunt humanam cognitionem. Et ideo dicendum est, quod prophetia simpliciter dicta non potest esse a natura, sed solum ex revelatione divina.

Ad primum ergo dicendum, quod anima, quando abstrahitur a corporalibus, aptior redditur ad percipiendum influxum spiritualium substantiarum, & etiam ad percipiendum subtiles motus, qui ex impressionibus naturalium causarum in imaginatione humana relinquuntur, a quibus percipiendis anima impeditur, cum fuerit circa sensibilia occupata. Et ideo Gregorius dicit (loc. cit. in arg.) *quod anima, quando appropinquat ad mortem, præcognoscit quadam futura subtilitate suæ naturæ, prout scilicet percipit etiam modicas impressiones; aut etiam cognoscit futura revelatione angelica, non autem propria virtute: quia, ut Augustinus dicit XII. super Gen. ad lit. (cap. xiii. a princ.) si hoc esset, tunc haberet, quandocumque vellet, in sua potestate futura præcognoscere: quod patet esse falsum.*

Ad secundum dicendum, quod cognitio futurorum quæ fit in somniis, est aut ex revelatione spiritualium substantiarum, aut ex causa corporali, ut dictum est (quæst. xcv. art. 6.) cum de divinationibus ageretur. Utrumque autem melius potest fieri in dormientibus quam in vigilantibus: quia anima vigilantis est occupata circa exteriora sensibilia: unde minus potest percipere subtiles impressiones vel spiritualium substantiarum, vel etiam causarum naturalium; quantum tamen ad perfectionem iudicii, plus viget ratio in vigilando quam in dormiendo.

Ad tertium dicendum, quod bruta etiam animalia non habent præcognitionem futurorum eventuum, nisi secundum quod ex suis causis præcognoscuntur; ex quibus eorum phantasia movetur magis quam hominum: quia phantasia hominum, maxime in vigilando, disponitur magis secundum rationem quam secundum impressionem naturalium causarum. Ratio autem facit in homine multo abundantius id quod in brutis facit impressio causarum naturalium; & adhuc magis adjuvat hominem divina gratia prophetias inspirans.

Ad quartum dicendum, quod lumen propheticum se extendit etiam ad directiones humanorum actuum: & secundum hoc prophetia necessaria est ad populi gubernationem, & præcipue in ordine ad cultum divinum, ad quem natura non sufficit, sed requiritur gratia.

## ARTICULUS II. 819

*Utrum prophetica revelatio fiat per Angelos.*

I. P. quæst. cxs. art. 1. & III. cont. cap. cliv. & ver. quæst. xii. art. 8. & Matth. 11. l. 23. 3. fin. & l. 24. 4. & I. Cor. xiv.

**A**D secundum sic proceditur. Videtur quod prophetica revelatio non fiat per Angelos. Dicitur enim Sap. vii. 27. *quod sapientia Dei in animas sanctas se transfert, & amicos Dei, & Prophetas constituit.* Sed amicos Dei constituit immediate. Ergo etiam Prophetas facit immediate, non mediantibus Angelis.

2. Præterea. Prophetia ponitur inter gratias gratias datas. Sed gratia gra-

(a) Ita mss. & alii passim. Theologi reiciuntur visio & infallibilitas, & ista prophetia, vnde dicitur,

gratis datæ sunt a Spiritu sancto, secundum illud ( I. Corinth. xii. 4. ) *Divisiones gratiarum sunt, idem autem Spiritus.* Non ergo prophetica revelatio fit Angelo mediante.

3. Præterea Cassiodorus ( in prol. super Psal. cap. i. ) dicit, quod *prophetia est divina revelatio.* Si autem heret per Angelos, diceretur angelica revelatio. Non ergo prophetia fit per Angelos.

Sed contra est quod Dionysius dicit xv. cap. cæl. Hier. ( parum a med. ) *Divinae visiones gloriose patres nostri adepti sunt per medias caelestes virtutes.* Loquitur autem ibi de visionibus prophetis. Ergo revelatio prophetica fit Angelis mediantibus.

Respondeo dicendum, quod, sicut Apostolus dicit ad Rom. xiii. i. *quæ a Deo sunt, ordinata sunt.* Habet autem hoc Divinitatis ordo, sicut Dionysius dicit ( loc. cit. & cap. v. ecclesiast. Hierarch. inter princ. & med. ) ut infima per media disponat. Angeli autem medii sunt inter Deum & homines, utpote plus participant de perfectione divinæ bonitatis quam homines. Et ideo illuminationes, & revelationes divinæ a Deo ad homines per Angelos deferuntur. Prophetica autem cognitio fit per illuminationem, & revelationem divinam. Unde manifestum est quod fiat per Angelos.

Ad primum ergo dicendum, quod caritas, secundum quam fit homo amicus Dei, est perfectio voluntatis, in quam solus Deus imprimere potest; sed prophetia est perfectio intellectus, in quem etiam Angelus potest imprimere, ut in l. dictum est ( quæst. cxi. art. i. ) & id eo non est similis ratio de utroque.

Ad secundum dicendum, quod gratiæ gratis datæ attribuantur Spiritui sancto sicut primo principio; qui tamen operatur huiusmodi gratias in hominibus mediante ministerio Angelorum.

Ad tertium dicendum, quod operatio instrumenti attribuitur principali agenti, in cuius virtute instrumentum agit. Et quia minister est sicut instrumentum, idcirco prophetica revelatio, quæ fit ministerio Angelorum, dicitur esse divina.

Utrum ad prophetiam requiratur dispositio naturalis.

Ver. quæst. xii. art. 4.

**A**D tertium sic proceditur. Videtur quod ad prophetiam requiratur dispositio naturalis. Prophetia enim recipitur in Propheta secundum dispositionem recipientis: quia super illud Amos i. *Dominus de Sion rugiet*, dicit Glossa Hieronymi ( ord. in princ. comm. ) „ Naturale est ut omnes qui volunt rem „ rei comparare, ex eis rebus sumant „ comparationes quas sunt experti, & „ in quibus sunt nutriti: verbi gratia, „ nautæ suos inimicos ventis, damnum „ naufragio comparant. Sic & Amos, „ qui fuit pastor pecorum, timorem Dei „ rugitui leonis assimilat. “ Sed quod recipitur in aliquo secundum modum recipientis, requirit naturalem dispositionem. Ergo prophetia requirit naturalem dispositionem.

2. Præterea. Speculatio prophetiæ est altior quam scientiæ acquisitæ. Sed indispositio naturalis impedit speculationem scientiæ acquisitæ: multi enim ex indispositione naturali pertingere non possunt ad scientias speculativas capiendas. Multo ergo magis requiritur ad contemplationem propheticam.

3. Præterea. Indispositio naturalis magis impedit aliquam quam impedimentum accidentale. Sed per aliquod accidentale superveniens impeditur speculatio prophetiæ. Dicit enim Hieronymus super Matth. ( hab. hoc express. Orig. hom. vi. in Num. aliquant. a med. quid simile habet & Hieron. in epist. xi. ad Ageruch. a med. ) quod *tempore illo quo coniugales actus geruntur, presentia Spiritus sancti non dabitur, etiam si Prophetæ esse videatur qui officio generationis obsequitur.* Ergo multo magis dispositio naturalis impedit prophetiam: & sic videtur quod bona dispositio naturalis requiratur ad prophetiam.

Sed contra est quod Gregorius dicit in hom. Pentecost. ( xxx. in Evang. inter med. & fin. ) *Implet, scilicet Spiritus sanctus, citbarædum puerum, & Psalmistam facit: implet passorem armeniarum scymoros vellicantem, & Prophetam facit.* Non ergo requiritur aliqua dispositio præcedens ad prophetiam, sed dependet ex sola voluntate Spiritus sancti.



fit: de quo dicitur I. ad Corinth. xii. 17. *Hec omnia operatur unus atque idem Spiritus, dividens singulis prout vult.*

Respondeo dicendum, quod, sicut dictum est (art. 1. huius quæst.) prophetia vere & simpliciter dicta, est ex inspiratione divina; quæ autem est ex causa naturali, non dicitur prophetia nisi secundum quid. Est autem considerandum, quod sicut Deus, qui est causa universalis in agendo, non præexigit materiam, nec aliquam materię dispositionem in corporalibus effectibus; sed simul potest & materiam, & dispositionem, & formam inducere: ita etiam in effectibus spiritualibus non præexigit aliquam dispositionem; sed potest simul cum effectu spirituali inducere dispositionem convenientem, qualis requiritur secundum ordinem naturæ. Et ulterius posset etiam simul per creationem producere ipsum subiectum, ut scilicet & animam in ipsa sui creatione disponderet ad prophetiam, & daret ei gratiam prophetalem.

Ad primum ergo dicendum, quod indifferens est ad prophetiam, quibuscumque similitudinibus res prophetica exprimitur. Et ideo homo ex operatione divina non immutatur circa prophetiam; removetur autem divina virtute, si quid prophetię repugnat.

Ad secundum dicendum, quod speculatio scientię fit ex causa naturali: natura autem non potest operari nisi dispositione præcedente in materia: quod non est dicendum de Deo, qui est prophetię causa.

Ad tertium dicendum, quod aliqua naturalis indispositio, si non removeretur, impedire posset prophetalem revelationem, puta si aliquis esset totaliter sensu naturali destitutus; sicut etiam impeditur aliquis ab actu prophetandi per aliquam vehementem passionem iræ, vel concupiscentię, qualis est in coitu, vel per quamcumque aliam passionem. Sed talem indispositionem naturalem removeret virtus divina, quæ est prophetię causa.

## ARTICULUS IV. 321

*Utrum bonitas morum requiratur ad prophetiam.*

*Ver. quæst. xii. art. 5. & op. xii. cap. ccxxii. & I. Cor. xiii.*

**A**D quartum sic proceditur. Videtur quod bonitas morum requiratur ad prophetiam. Dicitur enim Sap. vii. 27. *quod sapientia Dei (a) per nationes in animas sanctas se transfert, & amicos Dei, & Prophetas constituit.* Sed sanctitas non potest esse sine bonitate morum, & gratia gratum faciente. Ergo prophetia non potest esse sine bonitate morum, & gratia gratum faciente.

2. Præterea. Secreta non revelantur nisi amicis, secundum illud Ioan. xv. 15. *Vos autem dixi amicos, quia omnia quæcumque audivi a Patre meo, nota feci vobis.* Sed Prophetis Deus sua secreta revelat, ut dicitur Amos xii. Ergo videtur quod Prophetæ sint Dei amici: quod non potest esse sine caritate. Ergo videtur quod prophetia non possit esse sine caritate, quæ non est sine gratia gratum faciente.

3. Præterea. Matth. vii. 15. dicitur: *Attendite a falsis prophetis, qui veniunt ad vos in vestimentis ovium, intrinsecus autem sunt lupi rapaces.* Sed quicumque sunt sine gratia (b) interiori, videntur esse lupi rapaces. Ergo omnes sunt falsi prophetæ. Nullus est ergo verus Propheta, nisi bonus per gratiam.

4. Præterea. Philosophus dicit in Libro de somno, & vigilia (seu Lib. de divinat. per somn. qui illi annexus est, a princ.) quod si divinatio somniorum est a Deo, inconveniens est eam immitti quibuslibet, & non optimis viris. Sed constat donum prophetię esse a Deo. Ergo donum prophetię non datur nisi optimis viris.

Sed contra est quod Matth. vii. 23. his qui dixerant: *Domine, nonne in nomine tuo prophetavimus?* respondetur: *Numquam novi vos. Novit autem Dominus eos qui sunt eius*, ut dicitur II. ad Timoth. ii. 19. Ergo prophetia potest esse in his qui non sunt Dei per gratiam.

Respondeo dicendum, quod bonitas morum potest attendi secundum duo: uno quidem modo secundum interiorem

eius

(a) Ita iuxta Vulgatam quidam mss. & edit. omnes recipiunt, *Ced. Alii*, per orationes: al. per nos: quædam per salientes. (b) Al. intrinsecus videntur.

eius radicem, quæ est gratia gratum faciens; alio autem modo quantum ad interiores animæ passionēs, & exteriores actionēs. Gratia autem gratum faciens ad hoc principaliter datur, ut anima hominis Deo per caritatem coniungatur. Unde Augustinus dicit in XV. de Trinitate (cap. xviii. cir. princ.) *Nisi imperiatur cuius Spiritus sanctus, ut eum Dei, & proximi faciat amatorem, ille a sinistra non transferetur ad dexteram.* Unde quicquid potest esse sine caritate, potest esse sine gratia gratum faciente, & per consequens sine bonitate morum. Prophetia autem potest esse sine caritate: quod apparet ex duobus. Primo quidem ex actu utriusque. Nam prophetia pertinet ad intellectum, cuius actus præcedit actum voluntatis, quam perficit caritas: unde & Apostolus I. ad Corinth. xiii. prophetiam connumerat aliis ad intellectum pertinentibus, quæ possunt sine caritate haberi. Secundo ex fine utriusque: datur enim prophetia ad utilitatem Ecclesiæ, sicut & aliæ gratiæ gratis datæ, secundum illud Apostoli I. ad Corinth. xii. 7. *Unicuique datur manifestatio spiritus ad utilitatem.* Non autem ordinatur directe ad hoc quod affectus ipsius Prophetæ coniungatur Deo, ad quod ordinatur caritas. Et ideo prophetia potest esse sine bonitate morum quantum ad propriam radicem huius bonitatis.

Si vero consideremus bonitatem morum secundum passionēs animæ, & actiones exteriores, secundum hoc impeditur aliquis a prophetia per morum malitiam. Nam ad prophetiam requiritur maxima mentis elevatio ad spiritualium contemplationem; quæ quidem impeditur per vehementiam passionum, & per inordinatam occupationem rerum exteriorum. Unde & de filiis Prophetarum legitur IV. Reg. xv. *quod simul habitabant cum Heliſeo, quasi solitariam vitam ducentes, ne mundanis occupationibus impedirentur a dono prophetiæ.*

Ad primum ergo dicendum, quod donum prophetiæ aliquando datur homini & propter utilitatem aliorum, & propter propriæ mentis illustrationem: & hi sunt in quorum animas sapientia divina per gratiam gratum facientem transferens, amicos Dei, & Prophetas eos constituit. Quidam vero consequuntur donum prophetiæ solum ad utilitatem aliorum, qui sunt quasi instrumenta divinæ operationis. Unde Hierony-

mus dicit super Matth. (cap. vii. in illud, *Nonne in nomine tuo prophetavimus?*) *Prophetare, & virtutes facere, & demonia eicere, interdum non est eius meriti qui operatur, sed vel invocatione nominis Christi hoc agit, vel ob condemnationem eorum qui invocant, & utilitatem eorum qui vident, & audiunt, conceditur.*

Ad secundum dicendum, quod Gregorius (hom. xxvii. in Evang. ante med.) exponens illud dicit: *Dum audita superna caelestia amamus, amata iam novimus, quia amor ipse notitia est.* Omnia ergo eis nota fecerat, quia a terrenis desideris immutati amoris summi facibus ardebant. Et hoc modo non revelantur semper secreta divina Prophetis.

Ad tertium dicendum, quod non omnes mali sunt lupi rapaces, sed solum illi qui intendunt aliis nocere. Dicit enim Chrysostomus (alius Auctor) super Matth. (hom. xix. in oper. imperi. antemed.) *quod catholici Doctores, etsi fuerint peccatores, servi quidem carnis dicuntur, non tamen lupi rapaces, quia non habent propositum perdere Christianos.* Et quia prophetia ordinatur ad utilitatem aliorum, manifestum est tales esse falsos Prophetas, quia ad hoc non mittuntur a Deo.

Ad quartum dicendum, quod dona divina non semper dantur optimis simpliciter, sed quandoque illis qui sunt optimi quantum ad talis doni perceptionem. Et sic Deus donum prophetiæ illis dat quibus optimum iudicat dare.

## ARTICULUS V. 322

*Utrum aliqua prophetia sit a demonibus.*

III. contr. cap. cliv.

**A**D quintum sic proceditur. Videtur quod nulla prophetia sit a demonibus. *Prophetia enim est divina revelatio, ut Cassiodorus dicit (in prol. super cap. i.)* Sed illud quod fit a demone, non est divinum. Ergo nulla prophetia potest esse a demone.

2. Præterea. Ad prophetiam cognitionem requiritur aliqua illuminatio, ut supra dictum est (quæst. præc. art. 2.) Sed demones non illuminant intellectum humanum, ut supra dictum est in primo (quæst. cix. art. 3.) Ergo nulla prophetia potest esse a demonibus.

3. Præterea. Non est efficax signum quod etiam ad contraria se habet, Sed pro-

prophetia est signum confirmationis fidei: unde super illud Rom. xii. *Sive prophetiam secundum rationem fidei*, dicit Glossa (ord. Ambrosii in hunc loc.)

Nota, quod in numeratione gratiarum a prophetia incipit, quæ est prima probatio, quod fides nostra sit rationalis: quia credentes accepto Spiritu prophetabant. "Non ergo prophetia a demonibus dari potest."

Sed contra est quod dicitur III. Reg. xviii. 19. *Congrega ad me universum Israel in monte Carmeli, & Prophetas Baal quadringentos quinquaginta, Prophetasque lucorum quadringentos, qui comedunt de mensa Jezabel.* Sed tales erant demonum cultores. Ergo videtur quod etiam a demonibus sit aliqua prophetia.

Respondendo, dicendum, quod, sicut supra dictum est (quaest. præc. art. 1.) prophetia importat cognitionem quamdam procul existentem a cognitione humana. Manifestum est autem, quod intellectus superioris ordinis aliqua cognoscere potest quæ sunt remota a cognitione intellectus inferioris. Supra intellectum autem humanum est non solum intellectus divinus, sed etiam intellectus Angelorum bonorum, & malorum secundum naturæ ordinem. Et ideo quædam cognoscunt demones etiam sua naturali cognitione, quæ sunt remota ab hominum cognitione, quæ possunt hominibus revelare. Simpliciter autem, & maxime remota sunt quæ solus Deus cognoscit.

Et ideo prophetia proprie & simpliciter dicta fit per solam divinam revelationem; sed ipsa revelatio facta per demones potest secundum quid dici prophetia. Unde illi quibus aliquid per demones revelatur, non dicuntur in Scripturis Prophetæ simpliciter, sed cum aliqua additione, puta *Prophetæ falsi*, vel *Prophetæ idolorum*. Unde Augustinus XII. super Genes. ad lit. (cap. xix. cir. fin.) *Cum malus spiritus arripit hominem in hæc, scilicet visa, aut demoniacos facit, aut arreptios, aut falsos Prophetas.*

Ad primum ergo dicendum, quod Casiodorus ibi definit prophetiam proprie & simpliciter dictam.

Ad secundum dicendum, quod demones ea quæ sciunt, hominibus manifestant, non quidem per illuminationem

intellectus, sed per aliquam imaginariam visionem, aut etiam sensibilibiter colloquendo: & in hoc deficit hæc prophetia a vera.

Ad tertium dicendum, quod aliquibus signis etiam exterioribus discerni potest prophetia demonum a prophetia divina. Unde dicit Chrysostomus (alius Auctor) super Matth. (hom. xix. in opere imperfect. parum ante fin.) quod quidam prophetant in spiritu diaboli, quales sunt divinatores; sed etiam discernuntur: quoniam diabolus (a) interdum falsa dicit, Spiritus sanctus numquam. Unde dicitur Deuter. xviii. 21. *Si tacita cogitatione responderis: Quomodo possum intelligere verbum quod Dominus non est locutus? hoc habebis signum: Quod in nomine Domini Prophetæ ille prædixerit, & non evenierit, hoc Dominus non est locutus.*

## ARTICULUS VI. 323

*Utrum Prophetæ demonum aliquando prædicant verum.*

*Inf. quaest. clxxiv. art. 5. ad 4. & III. cont. cap. cxxxiv.*

**A**D sextum sic proceditur. Videtur quod Prophetæ demonum nunquam vera prædicant. Dicit enim Ambrosius (sup. illud I. Cor. xii. *Nemo potest dicere verum*) quod omne verum, a quocumque dicatur, a Spiritu sancto est. Sed Prophetæ demonum non loquuntur a Spiritu sancto: quia non est conventio Christi ad Belial, ut dicitur II. Corinth. vi. 15. Ergo videtur quod tales nunquam vera prædiciant.

2. Præterea. Sicut veri Prophetæ inspirantur a spiritu veritatis, ita Prophetæ demonum inspirantur a spiritu mendacii, secundum illud III. Reg. ult. 22. *Egre diabolus, & ego spiritus mendax in ore omnium Prophetarum eius.* Sed Prophetæ inspirati a Spiritu sancto, nunquam loquuntur falsum, ut supra habitum est (quaest. præc. art. 6.) Ergo Prophetæ demonum nunquam loquuntur verum.

3. Præterea. Ioan. viii. 44. dicitur de diabolo, quod cum loquitur mendacium, ex propriis loquitur: quia diabolus est mendax, & pater eius, id est mendacii. Sed inspirando Prophetas suos, diabolus non loquitur nisi ex propriis: non enim con-

stituitur.

(a) Ita ed. vet. cum inf. Nicolai: interdum verum dicit, Spiritus sanctus nunquam mendax. Ed. Palae, nunquam spiritum mendacium.

fitur minister Dei ad veritatem enuntiandam: quia non est societas luci ad tenebras; ut dicitur II. Corinth. vi. 15. Ergo Prophetæ dæmonum numquam vera prædicunt.

Sed contra est quod Numer. xxii. dicit quædam Glossa (colligitur ex ord. Rabani sup. illud, *Miser ergo muntio*) quod Balaam divinus erat, dæmonum scilicet ministerio, & arte magica nonnumquam futura præconoscere. Sed ipse multa prænuuntiavit vera, sicut est id quod habetur Numer. xxiv. 17. *Orietur stella ex Jacob, & consurget virga de Israel.* Ergo etiam Prophetæ dæmonum prænuuntiant vera.

Respondeo dicendum, quod sicut se habet bonum in rebus, ita verum in cognitione. Impossibile est autem inveniri aliquid in rebus quod totaliter bono privetur. Unde etiam impossibile est esse aliquam cognitionem quæ totaliter sit falsa, absque admixtione alicuius veritatis. Unde & Beda dicit (comment. in Luc. cap. xvi. ante med. sup. illud, *Decem viri leprosi*: & Aug. Lib. II. Q. 9. evangelic. quæst. xl. a princ.) quod nulla falsa est doctrina, quæ non aliquando aliqua vera falsi intermiscet. Unde & ipsa doctrina dæmonum, quæ suos Prophetas instruunt, aliqua vera continet, per quæ receptibilis redditur.

Sic enim intellectus ad falsum deducitur per apparentiam veritatis, sicut voluntas ad malum per apparentiam bonitatis. Unde & Chrysostomus (alius Auditor) dicit super Matth. (hom. xix. in opere imperf. parum ante fin.) *Concessum est diabolo interdum vera dicere, ut mendacium suum rara veritate commendet.*

Ad primum ergo dicendum, quod Prophetæ dæmonum non semper loquuntur ex dæmonum revelatione, sed interdum ex inspiratione divina; sicut manifeste legitur de Balaam, cui dicitur Dominus esse locutus Num. xxii. licet esset Propheta dæmonum: quia Deus utitur etiam malis ad utilitatem bonorum. Unde & per Prophetas dæmonum aliqua vera prænuuntiant: tum ut credibilius fiat veritas, quæ etiam ex adversariis testimonium habet: tum etiam quia cum homines talia credunt, per eorum dicta magis ad veritatem inducuntur. Unde etiam Sibyllæ multa vera prædixerunt de Christo. Sed etiam quando Prophetæ dæmonum a dæmonibus instruuntur, aliqua vera prædicunt: quandoque quidem

virtute propriæ naturæ, cuius auditor est Spiritus sanctus; quandoque etiam revelatione bonorum spirituum, ut patet per Augustinum XII. super Gen. ad lit. (videtur colligi posse ex cap. xix. cir. hn.) Et sic etiam illud verum quod dæmones enuntiant, a Spiritu sancto est.

Ad secundum dicendum, quod verus Propheta semper inspiratur a Spiritu veritatis, in quo nihil est falsitatis, & ideo numquam dicit falsum; Propheta autem falsitatis non semper instruitur a Spiritu falsitatis, sed quandoque etiam inspiratur a Spiritu veritatis. Ipse etiam spiritus falsitatis quandoque enuntiat vera, quandoque falsa, ut dictum est (in corp. art. & ad 1.)

Ad tertium dicendum, quod propria dæmonum dicuntur esse illa quæ habent a seipsis, scilicet mendacia, & peccata; quæ autem pertinent ad propriam naturam, non habent a seipsis, sed a Deo. Per virtutem autem propriæ naturæ quandoque vera prænuuntiant, ut dictum est (in corp. art. & ad 1.) Utitur etiam eis Deus ad veritatis manifestationem per ipsos sciendam, dum divina mysteria eis per Angelos revelantur, ut dictum est (ibid.)

## QUAESTIO CLXXIII.

*De modo prophetice cognitionis, in quatuor articulos divisa.*

**D**Einde considerandum est de modo prophetice cognitionis: & circa hoc quaeruntur quatuor.

Primo, utrum Prophetæ videant ipsam Dei essentiam.

Secundo, utrum revelatio prophetica fiat per influentiam aliquarum specierum, vel per solam influentiam luminis.

Tertio, utrum prophetica revelatio semper sit cum alienatione a sensibus.

Quarto, utrum prophetia semper sit cum cognitione eorum quæ prophetantur.

## ARTICULUS I. 824

*Utrum Prophetæ videant ipsam Dei essentiam.*

*Sup. quæst. clxxi. art. 2. cor. & art. 4. co. & ad 8. & ver. quæst. xii. art. 6. & P[er]l.*

**A**D primum sic proceditur. Videtur quod Prophetæ ipsam Dei essentiam videant. Quia super illud Is. xxxviii. *Dispone domui tue &c.* dicit Glossa (ordin.). „Prophetæ in ipso libro præscientiæ Dei, in quo omnia scripta sunt, legere possunt. “ Sed præscientia Dei est ipsa eius essentia. Ergo Prophetæ vident ipsam Dei essentiam.

2. Præterea. Augustinus dicit in IX. de Trinit.: (cap. vii. in princ.) quod in illa æterna veritate, ex qua temporalia facta sunt omnia, formam secundum quam sumus, & secundum quam operamur, visu mentis aspicimus. Sed Prophetæ inter omnes homines altissimam habent divinorum cognitionem. Ergo ipsi maxime divinam essentiam vident.

3. Præterea. Futura contingentia præcognoscuntur a Prophetis secundum immobilem veritatem. Sic autem non sunt nisi in ipso Deo. Ergo Prophetæ ipsum Deum vident.

Sed contra est quod visio divinæ essentiae non evacuatur in patria. Prophetia autem evacuatur, ut habetur I ad Cor. xiii. Ergo prophetia non fit per visionem divinæ essentiae.

Respondeo dicendum, quod prophetia importat cognitionem divinam ut procul existentem. Unde & de Prophetis dicitur Hebr. xi. quod erant a longe aspicientes. Illi autem qui sunt in patria, in statu beatitudinis existentes, non vident ut a remotis, sed magis quasi ex propinquo, secundum illud Psal. cxxxix. *14. Habitabunt recti cum vultu tuo.* Unde manifestum est quod cognitio prophetica alia est a cognitione perfecta, quæ erit in patria: unde & distinguitur ab ea sicut imperfectum a perfecto, & ea adveniente evacuatur, ut patet per Apostolum I. ad Cor. xiii.

Fuerunt autem quidam qui cognitionem propheticam a cognitione beatorum distinguere volentes, dixerunt quod Prophetæ vident ipsam divinam essentiam, quam vocant *speculum Trinitatis*,

non tamen secundum quod est obiectum beatorum, sed secundum quod sunt in ea rationes futurorum eventuum: quod quidem est omnino impossibile. Deus enim est obiectum beatitudinis secundum ipsam sui essentiam, secundum illud quod Augustinus dicit in V. Confess. (cap. iv. circ. princ.) *Beatus est qui te fecit, etiam si illa, idest creaturas, nesciat.* Non est autem possibile quod aliquis videat rationes creaturarum in ipsa divina essentia, ita quod eam non videat: tum quia ipsa divina essentia est ratio omnium eorum quæ sunt; ratio autem idealis non addit supra divinam essentiam nisi respectum ad creaturam: tum etiam quia prius est cognoscere aliquid in se, quod est cognoscere Deum, ut est obiectum beatitudinis, quam cognoscere illud per comparisonem ad alterum, quod est cognoscere Deum secundum rationes rerum in ipso existentes. Et ideo non potest esse quod Prophetæ videant Deum secundum rationes creaturarum, & non prout est obiectum beatitudinis. Et ideo dicendum est, quod visio prophetica non est visio ipsius divinæ essentiae, neque in ipsa divina essentia vident ea quæ vident, sed in quibusdam similitudinibus, secundum illustrationem divini luminis.

Unde Dionysius dicit in iv. cap. cæl. Hierar. (cir. med.) de visionibus prophetis loquens, quod *sapiens Theologus, visionem illam dicit esse divinam, quæ fit per similitudinem rerum forma corporali carentium ex reductione videndum in divina.* Et huiusmodi similitudines divino lumine illustratæ magis habent rationem speculi quam Dei essentia: nam in speculo resultant species ab aliis rebus; quod non potest dici de Deo. Sed huiusmodi illustratio mentis prophetice potest dici speculum, inquantum resultat ibi similitudo veritatis divinæ præscientiæ, & propter hoc dicitur *speculum æternitatis*, quasi representans Dei præscientiam, qui in sua æternitate omnia præsentialiter videt, ut dictum est (quæst. clxxi. art. 6. ad 3.)

Ad primum ergo dicendum, quod Prophetæ dicuntur inspicere in libro præscientiæ Dei, inquantum ex ipsa præscientia Dei resultat veritas in mentem Prophetæ.

Ad secundum dicendum, quod in prima veritate dicitur homo videre propriam formam, qua existit, inquantum primæ veritatis similitudo refelget in

men

mente humana, ex qua anima habet quod seipsum cognoscat.

Ad tertium dicendum, quod ex hoc ipso quod in Deo futura contingentia sunt secundum immobilem veritatem, potest imprimere menti Prophetae similem cognitionem, absque eo quod Prophetae Deum per essentiam videant.

## ARTICULUS II. 825

*Utrum in prophetica revelatione imprimantur divinitus menti Prophetae novae rerum species, vel solum novum lumen.*

III. cons. cap. cliv. & ver. quæst. xii. art. 7.

**A**D secundum sic proceditur. Videtur quod in prophetica revelatione non imprimantur divinitus menti Prophetae novae rerum species, sed solum novum lumen. Quia, sicut dicit Glossa Hieronymi (ord. in princ. comment.) Amos 1. *Prophetae utuntur similitudinibus rerum in quibus conversati sunt.* Sed si visio prophetica fieret per aliquas species de novo impressas, nihil operaretur ibi præcedens conversatio. Ergo non imprimantur aliquæ species de novo in animam Prophetae, sed solum propheticum lumen.

2. Præterea. Sicut Augustinus dicit XII. super Gen. ad lit. (cap. ix.) *visio imaginaria non facit Prophetam, sed solum visio intellectualis.* Unde etiam Danielis x. i. dicitur, quod *intellectus opus est in visione.* Sed visio intellectualis, sicut in eodem Lib. (cap. v. in fi.) dicitur, non fit per aliquas similitudines, sed per ipsam rerum veritatem. Ergo videtur quod prophetica revelatio non fiat per impressionem aliquarum specierum.

3. Præterea. Per donum prophetie Spiritus sanctus exhibet homini id quod est supra facultatem naturæ humanæ. Sed formare quascunque rerum species potest homo ex facultate naturali. Ergo videtur quod in prophetica revelatione non infundatur aliqua rerum species, sed solum intelligibile lumen.

Sed contra est quod dicitur Osee xii. 10. *Ego visiones multiplicavi (a) eis, & in manibus Prophetarum assimilatus sum.* Sed multiplicatio visionum non fit secundum lumen intelligibile, quod est commune in omni prophetica visione,

S. Tb. Oper. Tom. XXIII.

(a) In Visione dei eis.

sed solum secundum diversitatem specierum, secundum quas etiam est assimilatio. Ergo videtur quod in prophetica revelatione imprimantur novæ species rerum, & non solum intelligibile lumen.

Respondeo dicendum, quod, sicut Augustinus dicit XII. super Gen. ad lit. (cap. ix. circa princ.) *cognitio prophetica maxime ad mentem pertinet.* Circa cognitionem autem humanæ mentis duo oportet considerare, scilicet acceptionem, live repræsentationem rerum, & iudicium de rebus repræsentatis. Quando autem repræsentantur menti humanæ res aliquæ secundum aliquas species, & secundum naturæ ordinem, primo oportet quod species repræsententur sensui, secundo imaginationi, tertio intellectui possibili, qui immutatur a speciebus phantasmatum secundum illustrationem intellectus agentis. In imaginatione autem non solum sunt formæ rerum sensibilem, secundum quod accipiuntur a sensu, sed transmutantur diversimode, vel propter aliquam transmutationem corporalem (sicut accidit in dormientibus, & furiosis) vel etiam secundum imperium rationis disponuntur phantasmata in ordine ad id quod est intelligendum. Sicut enim ex diversâ ordinatione earundem litterarum accipiuntur diverſi intellectus; ita etiam secundum diversam dispositionem phantasmatum resultant in intellectu diversæ species intelligibiles. Iudicium autem humanæ mentis fit secundum vim intellectualis luminis.

Per donum autem prophetie conferatur aliud humanæ menti supra id quod pertinet ad naturalem facultatem, quantum ad utrumque, scilicet & quantum ad iudicium per influxum luminis intellectualis, & quantum ad acceptionem, seu repræsentationem rerum, quæ fit per aliquas species. Et quantum ad hoc secundum potest assimilari doctrina humana revelationi prophetice, non autem quantum ad primum. Homo enim suo discipulo repræsentat aliquas res per signa locutionum; non autem potest interius illuminare, sicut facit Deus.

Horum autem duorum principalius est primum in prophetia: quia iudicium est completivum cognitionis. Et ideo si cui fiat divinitus repræsentatio aliquarum rerum per similitudines imaginarias (ut Pharaoni, & Nabuchodonosor) aut et-

V

iaq

tiam per similitudines corporales (ut Balthasar) non est talis censendus Propheta, nisi illuminetur eius mens ad iudicandum; sed talis apparitio est quiddam imperfectum in genere prophetiae. Unde a quibusdam vocatur (a) extalis prophetiae, sicut & divinatio somniorum. Eric autem Propheta, si lumen quo intellectus eius illuminetur ad iudicandum etiam ea quae ab aliis imaginarie visa sunt, ut patet de Ioseph, qui exposuit somnium Pharaonis. Sed, sicut Augustinus dicit XII. super Gen. ad lit. (cap. ix. in med.) *maxime Propheta est qui utroque praecellit, ut scilicet videat in spiritu corporalium rerum significativas similitudines, & eas vivacitate mentis intelligat.*

Repraesentantur autem divinitus menti Prophetae quandoque quidem mediante sensu exteriori quaedam formae sensibiles, sicut Daniel vidit scripturam parietis, ut legitur Daniel. v. quandoque autem per formas imaginarias, sive omnino divinitus impressas, non per sensum acceptas (puta si alicui caeco nato imprimerentur in imaginatione colorum similitudines) vel etiam divinitus ordinatas ex his quae a sensibus sunt acceptae; sicut Hieremias vidit *illam succensam a facie Aquilonis*, ut habetur Hierem. i. sive etiam imprimendo species intelligibiles ipsi menti, sicut patet de his qui accipiunt scientiam, vel sapientiam infusam, sicut Salomon, & Apostoli. Lumen autem intelligibile quandoque quidem imprimitur menti humanae divinitus ad iudicandum ea quae ab aliis visa sunt; sicut dictum est (hic sup.) de Ioseph, & sicut patet de Apostolis, quibus Dominus aperuit sensum, ut intelligerent Scripturas, ut dicitur Luc. xxiv. 45. & ad hoc pertinet interpretatio sermonum; sive etiam ad iudicandum secundum divinam veritatem ea quae cursu naturali homo apprehendit; sive etiam ad iudicandum veraciter, & efficaciter ea quae agenda sunt, secundum illud Isaia lxiii. 14. *Spiritus Domini director eius fuit.* Sic igitur patet quod prophetica revelatio quandoque quidem fit per solam luminis influentiam, quandoque autem per species de novo impressas, vel aliter ordinatas.

Ad primum ergo dicendum, quod, sicut dictum est (in corp. art.) quandoque in prophetica revelatione divinitus ordinantur species imaginariae praecedentes

ae a sensu, secundum congruentiam ad veritatem revelandam; & tunc conversatio praecedens aliquid operatur ad ipsas similitudines, non autem quando totaliter ab extrinseco imprimuntur.

Ad secundum dicendum, quod visio intellectualis non fit secundum aliquas similitudines corporales, & individuales; fit tamen secundum aliquam similitudinem intelligibilem. Unde Augustinus dicit IX. de Trin. (cap. xi. in princ.) quod *habet animus nonnullam speciei notae similitudinem*: quae quidem similitudo intelligibilis in revelatione prophetica quandoque immediate a Deo imprimitur; quandoque a formis imaginatis refultat secundum adiutorium prophetici luminis: quia ex eisdem formis imaginatis subtilior conspicitur veritas secundum illustrationem altioris luminis.

Ad tertium dicendum, quod quascunque formas imaginatas naturali virtute homo potest formare, absolute huiusmodi formas considerando; non tamen ut sint ordinatae ad repraesentandas intelligibiles veritates, quae hominis intellectum excedunt; sed ad hoc necessarium est auxilium supernaturalis luminis.

### ARTICULUS III. 826

*Utrum visio prophetica semper fiat cum abstractione a sensibus.*

*Per. quæst. xii. art. 9.*

**A**D tertium sic proceditur. Videtur quod visio prophetica semper fiat cum abstractione a sensibus. Dicitur enim Num. xii. 6. *Si quis fuerit inter vos Propheta Domini, in visione apparebo ei, vel per somnium loquar ad illum.* Sed, sicut Glossa dicit in principio Plalterii, *visio quae est per somnia, & visiones, est per ea quae videntur dici, vel fieri*: cum autem aliqua videntur dici, vel fieri, quae non dicuntur, vel fiunt, est alienatio a sensibus. Ergo prophetia semper fit cum alienatione a sensibus.

2. Praeterea. Quando una virtus multum intenditur in operatione sua, alia potentia abstrahitur a suo actu; sicut illi qui vehementer intendunt ad aliquid audiendum, non percipiunt visu ea quae coram ipsis sunt. Sed in visione prophetica est maxime intellectus elevatus, & intenditur in suo actu. Ergo videtur quod semper fiat cum abstractione a sensibus.

3. Prae-

(a) *id.* casus prophetiae.

3. Præterea. Impossibile est idem simul ad oppositas partes converti. Sed in visione prophetica mens convertitur ad accipiendum a superiori. Ergo non potest simul converti ad sensibilia. Necessarium ergo videtur quod revelatio prophetica semper fiat cum abstractione a sensibus.

4. Sed contra est quod dicitur I. ad Cor. xiv. 32. *Spiritus Prophetarum Prophetis subiacent*. Sed hoc esse non posset, si Propheta non esset sui compos, a sensibus alienatus existens. Ergo videtur quod prophetica visio non fiat cum alienatione a sensibus.

Respondeo dicendum, quod, sicut dictum est (art. præc.) prophetica revelatio fit secundum quatuor, scilicet secundum influxum intelligibilis luminis, secundum immisionem intelligibilium specierum, secundum impressionem, vel ordinationem imaginabilium formarum, & secundum expressionem formarum sensibilibus. Manifestum est autem quod non fit abstractio a sensibus, quando aliquid representatur menti Prophetæ per species sensibiles, sive ad hoc specialiter formatas divinitus, sicut rubus ostensus Moyli (Exod. 33.) & scriptura ostensa Danieli (Dan. v.) sive etiam per alias causas productas; ita tamen quod secundum divinam providentiam ad aliquid prophetice significandum ordinetur, sicut per arcam Noe significabatur Ecclesia.

Similiter etiam non est necesse ut fiat alienatio a sensibus exterioribus per hoc quod mens Prophetæ illustratur intelligibili lumine, aut formatur intelligibilibus speciebus: quia in nobis perfectum iudicium intellectus habetur per conversionem ad sensibilia, quæ sunt prima nostræ cognitionis principia, ut in I. habitum est (quæst. lxxxiv. art. 7.)

Sed quando fit revelatio prophetica secundum formas imaginarias, necesse est fieri abstractionem a sensibus, ut talis apparitio phantasmatum non referatur ad ea quæ exterius sentiuntur.

Sed abstractio a sensibus quandoque fit perfecte, ut scilicet nihil homo sensibus percipiat; quandoque autem imperfecte, ut scilicet aliquid percipiat sensibus, non tamen plene discernat ea quæ exterius percipit, ab his quæ imaginabiliter videt. Unde Augustinus dicit XII. super Gen. ad litter. (cap. xvi. ante med.) *Sic videntur, quæ in spiritu sunt, ima-*

*gines corporum, quemadmodum corpora (a) ipsa per corpus; ita ut simul cernatur homo aliquis præsens oculis, & absens alius spiritu, tamquam oculis.*

Talis tamen alienatio a sensibus non fit in Prophetis cum aliqua inordinatione naturæ (sicut in arpepitiis, vel in furiosis) sed per aliquam causam ordinatam, vel naturalem, sicut per somnium, vel spiritualem, sicut per contemplationis vehementiam, sicut de Petro legitur Act. x. quod cum oraret in cœnaculo factus est in excessu mentis; vel virtute divina rapiente, secundum illud Ezech. 1. 3. *Facta est super eum manus Domini.*

Ad primum ergo dicendum, quod auctoritas illa loquitur de Prophetis quibus imprimebantur, vel ordinabantur imaginariæ formæ vel in dormiendo, quod significatur per somnium, vel in vigilando, quod significatur per visionem.

Ad secundum dicendum, quod quando mens intenditur in suo actu circa absentia, quæ sunt a sensibus remota, tunc propter vehementiam intentionis sequitur alienatio a sensibus; sed quando mens intenditur in suo actu circa dispositionem, vel iudicium sensibilibus, non oportet quod a sensibus abstrahatur.

Ad tertium dicendum, quod motus mentis prophetice non est secundum virtutem propriam, sed secundum virtutem superioris influxus. Et ideo quando ex superiori influxu mens Prophetæ inclinatur ad iudicandum, vel disponendum aliquid circa sensibilia, non fit alienatio a sensibus, sed solum quando elevatur mens ad contemplandum aliqua sublimiora.

Ad quartum dicendum, quod spiritus Prophetarum dicuntur esse subiecti Prophetis quantum ad propheticiam enunciationem, de qua ibi Apostolus loquitur, quia scilicet ex proprio sensu loquuntur ea quæ videntur, non mente perturbata, sicut arpepiti (ut dixerunt Priscilla, & Montanus;) sed in ipsa prophetica revelatione potius ipsi subiacentur spiritui prophetice, id est dono prophetico.

(a) Ita communiter, in cod. A'can. & edit. Rom. d. est ipsa.



## ARTICULUS IV. 827

*Utrum Prophetæ semper cognoscant ea quæ prophetant.*

*Hier. xi. leſ. 7.*

**A**D quartum sic proceditur. Videtur ea quæ prophetant semper cognoscant ea quæ prophetant. Quia, ut Augustinus dicit XII. super Genes. ad lit. (cap. ix. in princ.) quibus signa per aliquas rerum corporalium similitudines demonstrabantur in spiritu, nisi accessisset mentis officium, ut etiam intelligerentur, nondum erat prophetia. Sed ea quæ intelliguntur, non possunt esse incognita. Ergo Prophetæ non ignorat ea quæ prophetat.

2. Præterea. Maius est lumen prophetiæ quam lumen naturalis rationis. Sed quicumque lumine naturali habet scientiam, non ignorat ea quæ scit. Ergo quicumque lumine prophetico aliqua enuntiat, non potest ea ignorare.

3. Præterea. Prophetia ordinatur ad hominum illuminationem: unde dicitur II. Pet. i. 19. *Habemus propheticum sermonem, cui bene facitis attendentes, quasi lucernæ lucenti in caliginoso loco.* Sed nihil potest alios illuminare, nisi in se sit illuminatum. Ergo videtur quod Prophetæ prius illuminetur ad cognoscendum ea quæ aliis enuntiat.

Sed contra est quod dicitur Ioan. xi. 51. *Hoc autem a semetipso (Caiphas) non dixit; sed cum esset Pontifex anni illius, prophetavit, quod Iesus moriturus erat pro gente &c.* Sed hoc Caiphas non cognovit. Ergo non omnis qui prophetat, cognoscit ea quæ prophetat.

Respondeo dicendum, quod in revelatione prophetica movetur mens Prophetæ a Spiritu sancto, sicut instrumentum deficientis respectu principalis agentis. Movetur autem mens Prophetæ non solum ad aliquid apprehendendum, sed etiam ad aliquid loquendum, vel ad aliquid faciendum; & quandoque quidem ad omnia tria simul, quandoque autem ad duo horum, quandoque vero ad unum tantum. Et quodlibet horum contingit esse cum aliquo cognitionis defectu. Nam cum mens Prophetæ movetur ad aliquid æstimandum, vel apprehendendum, quandoque quidem inducitur ad hoc quod solum apprehendat rem illam, quandoque autem ulterius ad hoc quod cognoscat hæc sibi esse divinitus revelata.

Similiter etiam quandoque movetur mens Prophetæ ad aliquid loquendum, ita quod intelligat id quod per hæc verba Spiritus sanctus intendit, sicut David, qui dicebat II. Regum xxiii. 2. *Spiritus Domini locutus est per me.* Quandoque autem ille cuius mens movetur ad aliqua verba exprimenda, non intelligit quid Spiritus sanctus per hæc verba intendat, sicut patet de Caipha Ioan. x.

Similiter etiam cum Spiritus sanctus movet mentem alicuius ad aliquid faciendum, quandoque quidem intelligit quid hoc significet, sicut patet de Hieremia, qui abscondit lumbare in Ephraim, ut habetur Hierem. xiii. quandoque vero non intelligit; sicut milites dividentes vestimenta Christi, non intelligebant quid hoc significaret. Cum ergo aliquis cognoscit se moveri a Spiritu sancto ad aliquid æstimandum, vel significandum verbo, vel facto, hoc proprie ad prophetiam pertinet, cum autem movetur, sed non cognoscit, non est perfecta prophetia, sed quidam instinctus propheticus.

Sciendum tamen, quod quia mens Prophetæ est instrumentum deficientis, ut dictum est (in cor. art.) etiam veri Prophetæ non omnia cognoscunt quæ in eorum visis, aut verbis, aut etiam factis Spiritus sanctus intendit.

Et per hoc patet responsio ad obiecta. Nam primæ rationes loquuntur de veris Prophetis, quorum mens divinitus illustratur perfecte.

## QUAESTIO CLXXIV.

*De divisione prophetiæ,  
in sex articulos divisa.*

**D**Einde considerandum est de divisione prophetiæ: & circa hoc quaeruntur sex.

Primo de divisione prophetiæ in suas species.

Secundo, utrum sit altior prophetia quæ est sine imaginaria visione.

Tertio de diversitate graduum prophetiæ.

Quarto, utrum Moyses fuerit excellentissimus Prophetarum.

Quinto, utrum aliquis comprehensor possit esse Prophetæ.

Sexto, utrum prophetia creverit per temporis processum.

## ARTICULUS I. 828

*Utrum convenienter dividatur prophetia in prophetiam praedestinationis Dei, praescientiae, & comminationis.*

*Ver. quæst. xii. art. 10. & Matth. 1. prope fin.*

**A**D primum sic proceditur. Videtur quod inconvenienter dividatur prophetia in Glossa (ord. sup. illud, *Ut adimpleretur quod &c.*) super Matth. 1. *Ecce virgo in utero habebit*: ubi dicitur, quod „prophetia alia est ex praedestinatione Dei, quam necesse est omnibus, modis evenire, ut sine nostro impleretur arbitrio; ut hæc de qua hic agitur: alia est ex praescientia Dei, cui nostrum admiscetur arbitrium: alia est, quæ comminationi dicitur, quæ fit ob signum divinæ animadversionis. “ Illud enim quod consequitur omnem prophetiam, non debet poni ut membrum dividens prophetiam. Sed omnis prophetia est secundum praescientiam divinam, quia *Prophetae legunt in libro praescientiae*, ut dicit Glossa Ita. xxxviii. (ord. sup. illud, *Dispone domus tua.*) Ergo videtur quod non debeat poni una species prophetiae quæ est secundum praescientiam.

2. Præterea. Sicuti aliquid prophetatur secundum comminationem; ita etiam secundum promissionem; & utraque variatur: dicitur enim Hierem. xviii. *7. Repente loquar adversum gentem, & adversum regnum, ut eradicem, & destruiam, & disperdam illud. Si paenitentiam egerit gens illa a malo suo, agam & ego paenitentiam*; & hoc pertinet ad prophetiam comminationis; & postea subdit de prophetia promissionis: *Subito loquar de gente, & regno, ut aedificem, & plantem illud. Si fecerit malum in oculis meis, paenitentiam agam super bono quod locutus sum ut facerem ei.* Ergo sicut ponitur prophetia comminationis, ita debet poni prophetia promissionis.

3. Præterea. Isidorus dicit in Lib. VII. Etym. (cap. viii. declinando ad fin.) prophetiae genera sunt septem. Primum genus est extasis, quod est mentis excessus; sicut vidit Petrus vas submissum de caelo cum variis animalibus. Secundum genus est visio; sicut apud Isaiam dicentem, *Vidi Dominum sedentem &c.* Tertium genus est somnium;

*S. Tb. Oper. Tom. XXIII.*

sicut Iacob scalam dormiens vidit. Quartum genus est *per nubem*; sicut ad Moysen loquebatur Deus. Quintum genus est *vox de caelis*; sicut ad Abraham sonuit dicens: *Ne mittas manum in puerum*. Sextum genus accepta *parabola*; sicut apud Balaam. Septimum genus *repletio Spiritus sancti*, sicut pene apud omnes Prophetas. Poni etiam tria genera visionum: unum secundum oculos corporis; alterum secundum spiritum imaginarium; tertium per intuitum mentis. Sed hæc non exprimuntur in prius dicta divisione. Ergo est insufficientis.

Sed contra est auctoritas Hieronymi, cuius dicitur esse Glossa (inducta in arg. 1.)

Respondeo dicendum, quod species habituum, & actuum in moralibus distinguuntur secundum obiecta. Obiectum autem prophetiae est id quod est in cognitione divina supra humanam facultatem existens. Et ideo secundum horum differentiam prophetia distinguitur in diversas species, secundum prius dictam divisionem.

Dictum est autem supra (quæst. clxx. art. 6. ad 2.) quod futurum est in divina cognitione dupliciter. Uno modo, prout est in sua causa: & sic accipitur prophetia comminationis, quæ non semper impletur; sed per eam prænuntiatur ordo causæ ad effectum, qui quandoque aliis superveniuntibus impeditur.

Alio modo præcognoscit Deus aliqua in seipsis: vel ut fienda ab ipso; & horum est prophetia praedestinationis: quia secundum Damasenum (Lib. II. orth. Fid. cap. xxx. cir. princ.) *Deus praedestinat ea quæ non sunt in nobis: vel ut fienda per liberum arbitrium hominis; & sic est prophetia praescientiae, quæ potest esse bonorum, & malorum: quod non contingit de prophetia praedestinationis, quæ est bonorum tantum.*

Et quia prae destinatio sub praescientia comprehenditur, ideo in Glossa (Cassiodori sup. prolog. Hieronymi, & Glossa ord. sup. illud Matth. 1. *Ut adimpleretur quod &c.*) in principio Pfalterii ponitur tantum duplex prophetiae species, scilicet secundum praescientiam, & secundum comminationem.

Ad primum ergo dicendum, quod praescientia proprie dicitur præcognitio futurorum eventuum, prout in seipsis sunt; & secundum hoc ponitur species prophetiae: prout autem dicitur respectu futurorum eventuum, sive secundum

V 3 quod

Quod in seipsis sunt, sive secundum quod sunt in suis causis, communiter se habet ad omnem speciem prophetiæ.

Ad secundum dicendum, quod prophetia promissionis comprehenditur sub prophetia comminationis, quia eadem est ratio veritatis in utraque. Denominatur tamen magis a comminatione, quia Deus prior est ad relaxandam penam quam ad subrahendum promissa beneficia.

Ad tertium dicendum, quod Isidorus distinguit prophetiam secundum modum prophetandi: qui quidem potest distingui vel secundum potentias cognoscitivas in homine; quæ sunt sensus, imaginatio, & intellectus: & sic sumitur triplex visio, quam ponit tam ipse, quam Augustinus XII. super Gen. ad lit. (cap. vi. & seq.) vel potest distingui secundum differentiam prophetici influxus: qui quidem quantum ad illustrationem intellectus significatur per repletionem Spiritus sancti, quam septimo loco ponit. Quantum vero ad impressionem formarum imaginabilium ponit tria; scilicet *somnium*, quod ponit tertio loco; & *visionem*, quæ fit in vigilando respectu quorumcumque communium, quam ponit in secundo loco; & *extasim*, quæ fit per elevationem mentis in aliqua altiora, quam ponit primo loco. Quantum vero ad sensibilia signa ponit tria: quia sensibile signum aut est aliqua res corporæ exterioris apparens visui, sicut *nubes*, quam ponit quarto loco; aut est vox formata exteriori ad auditum hominis delata, quam ponit quinto loco; aut est vox per hominem formata cum similitudine alicuius rei quod pertinet ad *parabolam*, quam ponit sexto loco.

## ARTICULUS II. 319

*Utrum excellentior sit prophetia quæ habet visionem intellectualem, & imaginariam, quam ea quæ habet visionem intellectualem tantum.*

*Inf. art. 3. cor. & III. P. quæst. xxx. art. 2. ad 1. & ver. quæst. xii. art. 12. & 15. 1.*

**A**D secundum sic proceditur. Videtur quod excellentior sit prophetia quæ habet visionem intellectualem, & imaginariam, quam ea quæ habet visionem intellectualem tantum. Dicit enim Augustinus XII. super Genesim ad lit. (cap. ix. in med.) & habetur in Glossa (ordin.) I. ad Cor. xiv. (super illud, *Spi-*

*ritus autem loquitur mysteria*.) Minus est *Propheta qui rerum quæ significantur, sola ipsa signa in spiritu per verum corporalium imagines videt; & magis est Propheta, qui solo earum intellectu est præditus; sed maxime Propheta est qui in utroque præcellit*. Hoc autem pertinet ad Prophetam qui simul habet intellectualem, & imaginariam visionem. Ergo huiusmodi prophetia est altior.

2. Præterea. Quanto virtus alicuius rei est maior, tanto ad magis distantia se extendit. Sed lumen prophetie principaliter ad mentem pertinet, ut ex dictis patet (quæst. præc. art. 2.) Ergo perfectior videtur esse prophetia quæ derivatur usque ad imaginationem, quam illa quæ existit in solo intellectu.

3. Præterea. Hieronymus in prol. Lib. Reg. (cir. med.) distinguit Prophetas contra Hagiographos. Omnes autem illi quos Prophetas nominat (puta Isaias, Hieremia, & alii huiusmodi) simul cum intellectualem visionem imaginariam habuerunt; non autem illi qui dicuntur Hagiographi, sicut ex inspiratione Spiritus sancti scribentes (sicut Iob, David, Salomon, & huiusmodi.) Ergo videtur quod magis proprie dicuntur Prophetæ illi qui simul habent visionem imaginariam cum intellectualem, quam illi qui habent intellectualem tantum.

4. Præterea. Dionysius dicit 1. cap. cæl. Hierar. (parum ante med.) quod *impossibile est nobis superlucere divinum radium, nisi varietate sacrarum velaminum circumvelatum*. Sed prophetica revelatio fit per immissionem divini radii. Ergo videtur quod non possit esse absque phantasmatum velaminibus.

Sed contra est quod Glossa dicit in principio Psalterii, quod *ille modus prophetiæ dignior est ceteris, quando scilicet ex sola Spiritus sancti inspiratione, remoto omni exteriori adminiculo facti, vel dicti, vel visionis, vel somni, prophætatur*.

Respondendo dicendum, quod dignitas eorum quæ sunt ad finem, præcipue consideratur ex fine. Finis autem prophetiæ est manifestatio alicuius veritatis supra hominem existentis. Unde quanto huiusmodi manifestatio est potior, tanto prophetia est dignior. Manifestum est autem quod manifestatio divine veritatis quæ fit per nudam contemplationem ipsius veritatis, potior est quam illa quæ fit sub similitudine corporalium rerum: magis enim appropinquat ad visionem

patriæ, secundum quam in essentia Dei veritas conspicitur. Et inde est quod prophetia per quam aliqua supernaturalis veritas conspicitur secundum intellectualem visionem, est dignior quam illa in qua veritas supernaturalis manifestatur per similitudinem corporalium rerum, secundum imaginariam visionem.

Et ex hoc etiam ostenditur mens Prophetæ sublimior; sicut in doctrina humana auditor ostenditur esse melioris intellectus, qui veritatem intelligibilem a magistro nude prolatam capere potest, quam ille qui indiget sensibilibus exemplis ad hoc manuduci. Unde in commendationem prophetiæ David dicitur II. Reg. xxiii. 3. *Mibi locutus est fortis Israel: & postea subdit: Sicut lux aurore oriente Sole mane absque nubibus ruralis.*

Ad primum ergo dicendum, quod quando aliqua supernaturalis veritas revelanda est per similitudines corporales, tunc magis est Prophetia qui utrumque habet, scilicet lumen intellectuale, & imaginariam visionem, quam ille qui habet alterum tantum, quia perfectior est prophetia: & quantum ad hoc loquitur Augustinus. Sed illa prophetia in qua revelatur nude intelligibilis veritas, est omnibus potior.

Ad secundum dicendum, quod aliud est iudicium de his quæ propter se quærantur, & de his quæ quærantur propter aliud. In his enim quæ propter se quærantur, quanto virtus agentis ad plura, & remotiora se extendit, tanto potior est; sicut medicus reputatur melior qui plures potest, & magis a sanitate distantes sanare. In his autem quæ non quærantur nisi propter aliud, quanto agens potest ex paucioribus, & propinquioribus ad suum intentum pervenire, tanto videtur esse maioris virtutis; sicut magis laudatur medicus qui per pauciora, & leniora potest sanare infirmum. Visio autem imaginaria in cognitione prophetica non requiritur propter se, sed propter manifestationem intelligibilis veritatis. Et ideo tanto potior est prophetia, quanto minus ea indiget.

Ad tertium dicendum, quod nihil prohibet aliquid esse simpliciter melius, quod tamen minus proprie recipit alicuius prædicationem; sicut cognitio patriæ est nobilior quam cognitio viæ, quæ tamen magis proprie dicitur fides,

propterea quod nomen fidel importat imperfectionem cognitionis. Similiter autem prophetia importat quamdam obscuritatem, & remotionem ab intelligibili veritate: & ideo magis proprie dicuntur Prophetæ qui vident per imaginariam visionem; quamvis illa prophetia sit nobilior quæ est per intellectualem visionem; dummodo tamen sit eadem veritas utrobique revelata. Si vero lumen intellectuale alicui divinitus infundatur, non ad cognoscendum aliqua supernaturalia, sed ad iudicandum secundum certitudinem veritatis divinæ ea quæ humana ratione cognosci possunt, sic talis prophetia intellectualis est intra illam quæ est cum imaginaria visione ducente in supernaturalem veritatem: cuiusmodi prophetiam habuerunt omnes illi qui numerantur in ordine Prophetarum; qui etiam ex hoc specialiter dicuntur Prophetæ, quia prophetico officio fungebantur. Unde ex persona Domini loquebantur, dicentes ad populum: *Hec dicit Dominus*: quod non faciebant illi qui hagiographa conscripserunt; quorum plures loquebantur frequentius de his quæ humana ratione cognosci possunt, non quasi ex persona Dei, sed ex persona propria, cum adiutorio tamen divini luminis.

Ad quartum dicendum, quod illustratio divini radii in vita præsentis non fit sine velaminibus phantasmatum qualliumcumque: quia connaturale est homini secundum statum præsentis vitæ ut non intelligat sine phantasmate. Quandoque tamen sufficienti phantasmata quæ communi aliquo modo a sensibus abstrahuntur; nec exigitur aliqua visio imaginaria divinitus procurata: & sic dicitur revelatio prophetica fieri sine imaginaria visione.

## ARTICULUS III. 830

*Utrum gradus prophetiæ possint distingui secundum visionem imaginariam.*

I. P. quæst. xii. art. ii. ad 1. & IV. dist. xlix. quæst. ii. art. 7. ad 2. & ver. quæst. xii. art. 13. per tot. & art. 14. cor. & I. Cor. xiii. lect. 4.

**A**D tertium sic proceditur. Videtur quod gradus prophetiæ non possint distingui secundum visionem imaginariam. Gradus enim alicuius rei non attenditur secundum id quod est propter aliud, sed secundum id quod est propter

se. In prophetia autem propter se quæritur visio intellectualis, propter aliud autem visio imaginaria, ut supra dictum est (art. præc. ad 2.) Ergo videtur quod gradus prophetiæ non distinguantur secundum imaginariam visionem, sed solum secundum intellectua-

lem.

2. Præterea. Unius Prophetæ videtur esse unus gradus prophetiæ. Sed uni Prophetæ fit revelatio secundum diversas imaginarias visiones. Ergo diversitas imaginariæ visionis non diversificat gradus prophetiæ.

3. Præterea. Secundum Glossam (Cassiod. sup. prolog. Hieron. in Psal.) in principio Placitii, prophetia consistit in dictis, & factis, somnio, & visione. Non ergo debent prophetiæ gradus magis distinguí secundum imaginariam visionem, ad quam pertinet visio, & somnium, quam secundum dicta, & facta.

Sed contra est quod medium diversificat gradus cognitionis; sicut scientia propter quid est altior, eo quod est per nobilius medium quam scientia quia est, vel etiam quam opinio. Sed visio imaginaria in cognitione prophetica est sicut quoddam medium. Ergo gradus prophetiæ distinguí debent secundum imaginariam visionem.

Respondeo dicendum, quod, sicut dictum est (quæst. præc. art. 2.) prophetia in qua per lumen intelligibile revelatur aliqua veritas supernaturalis per imaginariam visionem, medium gradum tenet inter illam prophetiam in qua revelatur supernaturalis veritas absque imaginaria visione, & illam in qua per lumen intelligibile absque imaginaria visione dirigitur homo ad ea cognoscenda, vel agenda quæ pertinent ad humanam conversationem. Magis autem est proprium prophetiæ cognitio quam operatio: & ideo infimus gradus prophetiæ est cum aliquis ex interiori instinctu movetur ad aliqua exterius facienda; sicut de Sampson dicitur Iudicum xv. 14. quod *irruit Spiritus Domini in eum: & sicut solent ad ardorem ignis ligna consumi; ita & vincula, quibus ligatus erat, dissipata sunt, & soluta*. Secundus autem gradus prophetiæ est cum aliquis ex interiori lumine illustratur ad cognoscendum aliqua, quæ tamen non excedunt limites naturalis cognitionis; sicut dicitur de Salomone III. Reg. iv. 32. quod *locutus est parabolas, & dissipavit super signis*

*a cedro quæ est in Libano usque ad hisopum quæ egreditur de pariete, & dispersit de umentis, & volucris, & reptilibus, & piscibus: & hoc totum fuit ex divina inspiratione, nam præmittitur: Dedit Deus sapientiam Salomoni, & prudentiam multam nimis.*

Hi tamen duo gradus sunt infra prophetiam proprie dictam, quia non attingunt ad supernaturalem veritatem. Illa autem prophetia in qua manifestatur supernaturalis veritas per imaginariam visionem, diversificatur primo secundum differentiam somnii, quod fit in dormiendo, & visionis, quæ fit in vigilando, quæ pertinet ad altiore gradum prophetiæ: quia maior vis prophetici luminis esse videtur quæ aliquem occupatum circa sensibilia in vigilando abstrahit ad supernaturalia, quam illa quæ animam hominis abstrahit a sensibilibus invenit in dormiendo.

Secundo autem diversificantur gradus prophetiæ quantum ad expressionem finorum imaginabilium, quibus veritas intelligibilis exprimitur. Et quia signa maxime expressa intelligibilis veritatis sunt verba, ideo altior gradus prophetiæ videtur, quando Propheta audit verba exprimentia intelligibilem veritatem sive in vigilando, sive in dormiendo, quam quando videt aliquas res significativas veritatis, sicut septem spice plenæ significant septem annos ubertatis. (Gen. xli.) In quibus etiam signis tanto videtur prophetia esse altior, quanto signa sunt magis expressa; sicut quando Hieremias vidit incendium civitatis Iub similitudine ollæ succensæ, sicut dicitur Hierem. 1.

Tertio autem ostenditur altior esse gradus prophetiæ, quando Propheta non solum videt signa verborum, vel factorum, sed etiam videt vel in vigilando, vel in dormiendo aliquem sibi colloquentem, aut aliquid demonstrantem: quia per hoc ostenditur quod mens Prophetæ magis appropinquit ad causam revelantem.

Quarto autem potest attendi altitudo gradus prophetiæ ex conditione eius qui videtur. Nam altior gradus prophetiæ est, si ille qui loquitur, vel demonstrat, videatur in vigilando, vel in dormiendo in specie Angelus, quam si videatur in specie hominis: & adhuc altior, si videatur in dormiendo, vel in vigilando in specie Dei, secundum illud Isaïæ vi. 1. *Vidi Dominum sedentem*.

Super omnes autem hos gradus est tertium genus prophetiae, in quo intelligibilis veritas, & supernaturalis absque imaginaria visione ostenditur; quae tamen excedit rationem prophetiae propriae dictae, ut dictum est (art. praec. ad 3.) Et ideo consequens est quod gradus prophetiae propriae dictae distinguantur secundum imaginariam visionem.

Ad primum ergo dicendum, quod discretio luminis intelligibilis non potest a nobis cognosci, nisi secundum quod iudicatur per aliqua signa imaginaria, vel sensibilia. Et ideo ex diversitate imaginatorum perpenditur diversitas intellectualis luminis.

Ad secundum dicendum, quod, sicut supra dictum est (quaest. clxxi. art. 2.) prophetia non est per modum habitus immanentis, sed magis per modum passionis transeuntis. Unde non est inconueniens quod uni & eidem Prophetae fiat revelatio prophetica diversis vicibus secundum diversos gradus.

Ad tertium dicendum, quod dicta, & facta de quibus ibi fit mentio, non pertinent ad revelationem prophetiae, sed ad denuntiationem, quae fit secundum dispositionem eorum quibus denuntiatur id quod Prophetae revelatum est: & hoc fit quandoque per dicta, quandoque per facta. Denuntiationem autem, & operationem miraculorum consequenter se habent ad prophetiam, ut supra dictum est (quaest. clxxi. art. 1.)

ARTICULUS IV. 831

*Utrum Moyses fuerit excellentior omnibus Prophetis.*

*Ver. quaest. xii. art. 9. ad 2. & art. 4. & 1<sup>a</sup>. vii.*

**A**D quantum sic proceditur. Videtur quod Moyses non fuerit excellentior omnibus Prophetis. Dicit enim Glossa in principio Psal. quod David dicitur *Propheta per excellentiam*. Non ergo Moyses fuit excellentissimus omnium.

2. Praeterea. Maiora miracula facta sunt per Iosue, qui fecit stare Solem, & Lunam, ut habetur Iosue x. & per Isaiam, qui fecit retrocedere Solem, ut habetur Isaiæ xxxviii. quam per Moysen, qui diuisit mare rubrum: similiter etiam per Heliam, de quo dicitur Eccli. xlviii. 4. *Quis poterit tibi similiter gloriari, qui sustulisti mortuum ab inferis?*

*vis?* Non ergo Moyses fuit excellentissimus Prophetarum.

3. Praeterea. Matth. xi. 11. dicitur, quod *inter natos mulierum non surrexit maior Ioanne Baptista*. Non ergo Moyses fuit excellentior omnibus Prophetis.

Sed contra est quod dicitur Deuteronom. ult. 10. *Non surrexit Propheta ultra in Israel, sicut Moyses*.

Respondeo dicendum, quod licet quantum ad aliquid aliquis alius Prophetarum fuerit maior Moysen, simpliciter tamen Moyses fuit omnibus aliis maior.

In prophetia enim, sicut ex dictis patet (art. praec. & art. 1. quaest. clxxi.) consideratur & cognitio tam secundum visionem intellectualem, quam secundum visionem imaginariam, & denuntiatio, & confirmatio per miracula. Moyses ergo fuit aliis excellentior. Primo quidem quantum ad visionem intellectualem, eo quod vidit ipsam Dei essentiam, sicut Paulus in raptu, sicut Augustinus dicit XII. super Gen. ad lit. (cap. xxvii.) Unde dicitur Num. xii. 8. *quod palam, non per aenigmata Deum vidit*. Secundo quantum ad imaginariam visionem, quam quasi ad nutum habebat, non solum audiens verba, sed etiam videns loquentem etiam in specie Dei, non solum in dormiendo, sed etiam in vigilando. Unde dicitur Exod. xxxiii. 11. 8. *quod loquebatur ei Dominus facie ad faciem, sicut solet loqui homo ad amicum suum*. Tertio quantum ad denuntiationem: quia loquebatur toti populo fidelium ex persona Dei, quasi de novo legem proponens; alii vero Prophetae loquebantur ad populum in persona Dei, quasi inducentes ad observantiam legis Moysi, secundum illud Malachiae iv. 4. *Memento te legis Moysi serui mei*. Quarto quantum ad operationem miraculorum, quae fecit toti populo infidelium. Unde dicitur Deuter. ult. 10. *Non surrexit ultra Propheta in Israel, sicut Moyses, quem nosse Dominus facie ad faciem in omnibus signis, atque portentis, quae misit per eum ut faceres in terra Aegypti Pharaoni, & omnibus servis eius, uniuersaeque terrae illius*.

Ad primum ergo dicendum, quod propheta David ex propinquo attingit visionem Moysi quantum ad visionem intellectualem, quia uterque accepit revelationem intelligibilis, & supernaturalis veritatis absque imaginaria visione; visio tamen Moysi fuit excellentior quantum

tum ad cognitionem Divinitatis; sed David plenius cognovit, & expressit mysteria incarnationis Christi.

Ad secundum dicendum, quod illa signa illorum Prophetarum fuerunt maiora secundum substantiam facti, sed tamen miracula Moysis fuerunt maiora secundum modum faciendi, quia sunt facta toti populo.

Ad tertium dicendum, quod Ioannes pertinet ad novum Testamentum; cuius ministri praefuruntur etiam ipsi Moysi, quasi magis revelate speculantes, ut habetur II. ad Corinth. III.

#### ARTICULUS V. 832

*Utrum aliquis gradus prophetiae sit etiam in beatis.*

*Sup. quest. clxxxiii. art. 1. cor. & III. P. quest. vii. art. 8. corp. & I. Corinth. xiii. lect. 3.*

**A**D quintum sic proceditur. Videtur quod aliquis gradus prophetiae est etiam in beatis. Moyses enim, ut dictum est (art. praec.) vidit divinam essentiam; qui tamen Propheta dicitur. Ergo pari ratione beati possunt dici Prophetae.

2. Praeterea. Prophetia est divina revelatio. Sed divinae revelationes sunt etiam Angelis beatis. Ergo etiam Angeli beati possunt dici Prophetae.

3. Praeterea. Christus ab instanti conceptionis fuit comprehensor; & tamen ipse Prophetam se nominat Matth. xlii. ubi dicit: *Non est Propheta sine honore, nisi in patria sua.* Ergo etiam comprehensores, & beati possunt dici Prophetae.

4. Praeterea. De Samuele dicitur Eccli. xlii. 23. *Exaltavit vocem eius de terra in prophetia delere impietatem gentis.* Ergo eadem ratione alii Sancti post mortem possunt Prophetae dici.

Sed contra est quod II. Pet. 1. sermo propheticus comparatur lucernae lucens in caliginoso loco. Sed in beatis nulla est caligo. Ergo non possunt dici Prophetae.

Respondeo dicendum, quod prophetia importat visionem quamdam alicuius supernaturalis veritatis, ut procul existens. Quod quidem contingit esse dupliciter. Uno modo ex parte ipsius cognitionis, quia videlicet veritas supernaturalis non cognoscitur in seipsa, sed in aliquibus suis effectibus; & adhuc erit magis procul, si hoc sit per figuras corpora-

lium rerum quam per intelligibiles effectus: & talis maxime est visio prophetica, quae fit per figuras, & similitudines corporalium rerum.

Alio modo visio est procul ex parte ipsius videntis, qui scilicet non est totaliter in ultimam perfectionem adductus, secundum illud II. ad Corinth. v. 6. *Quamdiu in corpore sumus, peregrinamur a Domino.* Neutro autem modo beati sunt procul: unde non possunt dici Prophetae.

Ad primum ergo dicendum, quod visio illa Moysis fuit raptim per modum passionis, non autem permanens per modum beatitudinis: unde adhuc erat videns procul: propter hoc non totaliter talis visio amittit rationem prophetiae.

Ad secundum dicendum, quod Angelis fit revelatio divina, non sicut procul existentibus, sed sicut iam totaliter Deo coniunctis. Unde talis revelatio non habet rationem prophetiae.

Ad tertium dicendum, quod Christus simul erat comprehensor, & viator. In quantum ergo erat comprehensor, non competit sibi ratio prophetiae, sed solum in quantum erat viator.

Ad quartum dicendum, quod etiam Samuel nondum pervenerat ad statum beatitudinis. Unde etiam voluntate Dei ipsa anima Samuelis Sauli eventum belli praenuntiavit, Deo sibi hoc revelante; pertinet ad rationem prophetiae. Non autem est eadem ratio de Sanctis qui sunt modo in patria. Nec obstat quod arte daemonum hoc dicitur factum: quia etsi daemones animam alicuius Sancti evocare non possunt, neque cogere ad aliquid agendum; potest tamen hoc fieri divina virtute, ut dum daemon consultatur, ipse Deus per suum nuntium veritatem enuntiet; sicut per Heliam veritatem respondit nuntiis Regis, qui mittebantur ad consulendum Deum Accaron, ut habetur IV. Reg. 1.

Quamvis etiam dici possit, quod non fuerit anima Samuelis, sed daemon ex persona eius loquens; quem Sapiens Samuelem nominat, & eius praenuntiatio non prophetica, secundum opinionem Saulis, & adstantium, quia ita opinabantur.

## ARTICULUS VI. 833

*Utrum gradus prophetiae variantur secundum temporis processum.*

I. P. quæst. lxxi. art. 5. ad 3. & quæst. xlii. art. 14. ad 1.

**A**D sextum sic proceditur. Videtur quod gradus prophetiae variantur secundum temporis processum. Prophetia enim ordinatur ad cognitionem divinorum, ut ex dictis patet (quæst. præc. art. 2. & 4.) Sed, sicut dicit Gregorius (hom. xvi. in Ezech. aliquant. a med.) *per successionem temporum crevit divine cognitionis augmentum*. Ergo & gradus prophetiae secundum processum temporis debent distingui.

2. Præterea. Revelatio prophetica fit per modum divinæ allocutionis ad hominem. A Prophetis autem ea quæ sunt eis revelata, denuntiantur & verbo, & scripto: dicitur enim I. Reg. iii. 1. quod (a) *ante Samuelem sermo Domini erat pretiosus*, idest rarus; qui tamen postea ad multos factus est: similiter etiam non inveniuntur libri Prophetarum esse conscripti ante tempus Isaïæ, cui dictum est: *Sume tibi librum grandem, & scribe in eo stylo hominis*, ut patet Isaïæ vii. 1. post quod tempus plures Prophetæ suas prophetias conscripserunt. Ergo videtur quod secundum processum temporis profecerit prophetiæ gradus.

3. Præterea. Dominus dicit Matth. xi. 13. *Lex, & Prophetæ usque ad Ioannem prophetaverunt*. Postmodum autem fuit donum prophetiæ in discipulis Christi multo excellentius quam fuerit in antiquis Prophetis, secundum illud ad Ephes. iii. 5. *Altis generationibus non est agnitus filius hominum*, scilicet mysticum Christi, *sicut nunc revelatum est sanctis Apostolis eius, & Prophetis in spiritu*. Ergo videtur quod secundum processum temporis creverit prophetiæ gradus.

Sed contra est quia Moyses fuit excellentissimus Prophetarum, ut dictum est (art. 4. hu. quæst.) qui tamen alios Prophetas præcessit. Ergo gradus prophetiæ non profecit secundum temporis processum.

Respondedo dicendum, quod, sicut dictum est (art. 2. & 4. hu. quæst. & quæst. præc. art. 2. & 4.) prophetia or-

dinatur ad cognitionem divinæ veritatis; per cuius contemplationem non solum in fide instruimur, sed etiam in nostris operibus gubernamur, secundum illud Psal. xlii. 3. *Emitte lucem tuam, & veritatem tuam: ipsa me deduxerunt*. Fides autem nostra in duobus principaliter consistit. Primo quidem in vera Dei cognitione, secundum illud Hebr. xi. 6. *Accedentem ad Deum oportet credere, quia est*. Secundo in mysterio incarnationis Christi, secundum illud Ioan. xiv. 1. *Credidit in Deum, & in me credite*. Si ergo de prophetia loquamur, in quantum ordinatur ad finem Deitatis, sic quidem crevit secundum tres temporum distinctiones; scilicet ante legem, sub lege, & sub gratia. Nam ante legem, Abraham, & alij patres prophetice sunt instructi de his quæ pertinent ad fidem Deitatis. Unde & Prophetæ nominantur, secundum illud Psal. civ. 15. *In Prophetis meis nolite malignari*: quod specialiter dicitur propter Abraham, & Isaac. Sub lege autem facta est revelatio prophetica de his quæ pertinent ad fidem Deitatis, excellentius quam ante: quia iam oportebat circa hoc institui non solum speciales personas, aut quasdam familias, sed totum populum. Unde Dominus dicit Moysi Exod. vi. 2. *Ego Dominus, qui apparui Abraham, Isaac, & Iacob, in Deo omnipotente; & nomen meum Adonai non indicavi eis*: quia scilicet præcedentes patres fuerant instructi in fide de omnipotentia unius Dei; sed Moyses postea plenius fuit instructus de simplicitate divinæ essentiae, cum dictum est ei Exodi iii. 14. *Ego sum qui sum*: quod quidem nomen significatur a Iudæis per hoc nomen *Adonai*, propter venerationem illius ineffabilis nominis. Postmodum vero tempore gratiæ ab ipso Filio Dei revelatum est mysterium Trinitatis, secundum illud Matth. ult. 19. *Euntes docete omnes Gentes, baptizantes eos in nomine Patris, & Filii, & Spiritus sancti*.

In singulis tamen statibus prima revelatio excellentior fuit. Prima autem revelatio ante legem facta est Abraham, cuius tempore coeperunt homines a fide unius Dei deviare ad idololatriam declinando; ante autem non erat necessaria talis revelatio omnibus in cultu unius Dei persistentibus. Isaac vero facta est inferior revelatio, quasi fundata super

(a) *Pulchra*: Sermo Domini erat pretiosus in diebus illis.



super revelatione facta Abraham: unde dictum est ei Gen. xxvi. 24. *Ego sum Deus Abraham patris tui*: & similiter ad Iacob dictum est Gen. xxviii. 12. *Ego sum Deus Abraham patris tui, & Deus Isaac*. Et similiter in statu legis prima revelatio facta Moyli excellentior fuit; supra quam fundatur omnis alia Prophetarum revelatio. Ita etiam in tempore gratiae super revelatione facta Apollolis de fide Unitatis, & Trinitatis fundatur tota fides Ecclesiae, secundum illud Matth. xvi. 18. *Super hanc petram, scilicet confessionis tuae, aedificabo Ecclesiam meam*.

Quantum vero ad fidem incarnationis Christi, manifestum est quod quanto fuerunt Christo propinquiores, live ante, live post, ut plurimum plenius de hoc instructi fuerunt; post tamen plenius quam ante, ut Apollolis dicit ad Ephel. iiii.

Quantum vero ad directionem humanorum actuum, prophetica revelatio diversificata est, non secundum temporis processum, sed secundum conditionem negotiorum: quia, ut dicitur Proverb. xix. 18. *cum defecerit prophetia, dissipabitur populus*. Et ideo quolibet tempore instructi sunt homines divinitus de agendis, secundum quod erat expediens ad salutem electorum.

Ad primum ergo dicendum, quod dictum Gregorii intelligendum est de tempore ante Christi incarnationem, quantum ad cognitionem huius mysterii.

Ad secundum dicendum, quod, sicut Augustinus dicit in XVIII. de civit. Dei (cap. xxvii a med.) *quemadmodum regni Assyriorum primo tempore extitit Abraham, cui promissiones aperte ferent; ita in occidentalis Babylonis, id est Romae urbis, exordio, qua imperante fuerat Christus venturus, in quo implerentur illa promissa oracula Prophetarum, non solum loquentium, verum etiam scribentium in tante rei futurae testimonium solvebantur, scilicet promissiones Abraham factae. Cum enim Prophetae numquam fere desissent populo Israel, ex quo ibi Reges esse ceperunt, in usum tantummodo eorum fuerat, non gentium. Quando autem ea scriptura prophetica manifestus condebatur quae gentibus quandoque prodesset, tunc oportebat incipere quando condebatur haec civitas, scilicet Romana, quae gentibus imperaret. Ideo autem maxime tempore Regum oportuit Prophetas in illo populo abundare, quia tunc populus non op-*

primebatur ab alienigenis, sed proprium Regem habebat: & ideo oportebat per Prophetas eum instrui de agendis, quasi libertatem habentem.

Ad tertium dicendum, quod Prophetarum praenuntiantes Christi adventum, non potuerunturare nisi usque ad Ioannem, qui praesentialiter Christum digito demonstravit: & tamen, ut Hieronymus ibidem dicit, *non hoc dicitur, ut post Ioannem excludat Prophetas. Legimus enim in Actibus Apostolorum, & Agabum prophetasse, & quatuor virgines filias Philippi*. Ioannes etiam librum propheticum conscripsit de fine Ecclesiae: & singulis temporibus non desuerunt aliqui prophetiae spiritum habentes, non quidem ad novam doctrinam fidei deprimendam, sed ad humanorum actuum directionem, sicut Augustinus refert V. de civit. Dei (cap. xxvi. non procul a princ.) quod *Theodosius Augustus ad Ioannem in Aegypti eremo constitutum, quem prophetandi spiritu praeditum fama crebescens didicerat, misit, & ab eo nuntium victoriae certissimum accepit*.

## QUAESTIO CLXXV.

De raptu,

in sex articulos divisa.

**D**Einde considerandum est de raptu: & circa hoc quaeruntur sex. Primo, utrum anima hominis rapiatur ad divina.

Secundo, utrum raptus pertineat ad vim cognoscitivam, vel appetitivam.

Tertio, utrum Paulus in raptu viderit Dei essentiam.

Quarto, utrum fuerit alienatus a sensibus.

Quinto, utrum fuerit totaliter anima a corpore separata in statu illo.

Sexto, quid circa hoc sciverit, & quid ignoraverit.

## ARTICULUS I. 834

Utrum anima hominis rapiatur ad divina.

Ver. quæst. xlii. art. 1. & 11. ad Cor. xlii.

**A**D primum sic proceditur. Videtur quod anima hominis non rapiatur ad divina. Definitur enim a quibusdam raptus

raptus, ab eo quod est secundum naturam, in id quod est supra naturam, vel superioris naturae elevatio. Est autem secundum naturam hominis ut ad divina eleveetur: dicit enim Augustinus in princ. Confess. *Fecisti nos Domine ad te; & inquietum est cor nostrum, donec requiescat in te.* Non ergo hominis anima rapitur ad divina.

2. Præterea. Dionysius dicit viii. cap. de divin. Nom. ( a med. lect. 4. & cap. ix. ad fin. lect. 4. ) quod iustitia Dei in hoc attenditur quod omnibus rebus distribuit secundum suum inodum, & dignitatem. Sed quod aliquis eleveetur supra id quod est secundum naturam, non pertinet ad modum hominis, vel dignitatem. Ergo videtur quod non rapiatur mens hominis a Deo in divina.

3. Præterea. Raptus quamdam violentiam importat. Sed Deus non regit nos per violentiam, & coacte, ut Damascenus dicit ( Lib. II. orth. Fid. cap. xxx. cir. princ. ) Non ergo mens hominis rapitur ad divina.

Sed contra est quod II. ad Corinth. xii. 2. dicit Apostolus: *Scio hominem in Christo gloriam usque ad tertium celum:* ubi dicit Glossa ( ordin. Petri Lombardi ) „ raptum, idest contra naturam elevationem. “

Respondeo dicendum, quod raptus violentiam quamdam importat, ut dictum est ( in arg. 3. ) *Violentum autem dicitur cuius principium est extra, nil conferente eo quod vim patitur*, ut dicitur in III. Ethic. ( cap. 1. a princ. ) Confert autem unumquodque ad id in quod tendit secundum propriam inclinationem vel voluntariam, vel naturalem. Et ideo oportet quod ille qui rapitur ab aliquo exteriori, rapiatur in aliquid quod est diversum ab eo in quod eius inclinatio tendit. Quæ quidem diversitas attenditur dupliciter: uno quidem modo quantum ad finem inclinationis; puta si lapis, qui naturaliter inclinatur ad hoc quod feratur deorsum, proiciatur sursum: alio modo quantum ad modum tendendi; puta si lapis velocius proiciatur deorsum quam sit motus eius naturalis.

Sic igitur & anima hominis dupliciter dicitur rapi in id quod est præter naturam: uno modo quantum ad terminum raptus; puta quando rapitur ad penas, secundum illud Psal. xlii. 23. *Ne quando rapiat, & non sit qui eripiat:* alio modo quantum ad modum homini connaturalem, qui est ut per sensibilia intelli-

gat veritatem. Et ideo quando abstractur a sensibilibus apprehensione, dicitur rapi, etiam si eleveatur ad ea ad quæ naturaliter ordinatur; dum tamen hoc non fiat ex propria intentione; sicut accidit in somno, qui est secundum naturam, unde non potest proprie raptus dici.

Huiusmodi autem abstractio, ad quamcumque fiat, potest ex triplici causa contingere. Uno modo ex causa corporali; sicut accidit in his qui propter aliquam infirmitatem alienationem patiuntur: secundo modo ex virtute demonum; sicut patet in arreptiis: tertio modo ex virtute divina; & sic loquimur nunc de raptu, prout scilicet aliquis spiritus divino eleveatur ad aliqua supernaturalia cum abstractione a sensibus, secundum illud Ezech. viii. 3. *Spiritus elevavit me inter celum & terram, & adduxit me in Hierusalem in visione Dei.*

Sciendum tamen, quod rapi quandoque dicitur aliquis non solum propter alienationem a sensibus, sed etiam propter alienationem ab his quibus intendebat; sicut cum aliquis patitur evagationem mentis præter propositum, Sed hoc non ita proprie dicitur.

Ad primum ergo dicendum, quod naturale est homini ut in divina tendat per sensibilibus apprehensionem, secundum illud Rom. i. 20. *Invisibilia Dei per ea quæ facta sunt, intellecta conspiciuntur.* Sed iste modus, quod aliquis eleveatur ad divina cum abstractione a sensibus, non est homini naturalis.

Ad secundum dicendum, quod ad modum, & dignitatem hominis pertinet quod ad divina eleveatur, ex hoc ipso quod homo factus est ad imaginem Dei. Et quia bonum divinum in infinitum excedit humanam facultatem, indiget homo ut supernaturaliter ad illud bonum capessendum adjuvetur: quod fit per quodcumque beneficium gratiæ. Unde quod sic eleveatur mens a Deo per raptum, non est contra naturam, sed supra facultatem naturæ.

Ad tertium dicendum, quod verbum Damasceni est intelligendum quantum ad ea quæ sunt per hominem facienda; quantum vero ad ea quæ excedunt liberi arbitrii facultatem, necesse est quod homo quædam fortiori operatione eleveatur: quæ quidem quantum ad aliquid potest dici coactio, si scilicet attendatur modus operationis, non autem si attendatur ter-

terminus operationis, in quem natura hominis, & eius intentio ordinatur.

## ARTICULUS II. 835

*Utrum raptus magis pertineat ad vim cognoscitivam quam ad vim appetitivam.*

**A**D secundum sic proceditur. Videtur quod raptus magis pertineat ad vim appetitivam quam ad vim cognoscitivam. Dicit enim Dionysius iv. cap. de div. Nom. (part. i. lect. 10.) *Est autem extasis faciens divinus amor.* Sed amor pertinet ad vim appetitivam. Ergo & extasis, sive raptus.

2. Præterea. Gregorius dicit in II. Dialog. (cap. 112. cir. med.) quod ille qui porcos pavit, vagatione mentis, & immunditie sub semetipso cecidit; Petrus vero, quem Angelus solvit, eiusque mentem in extasi rapuit, non extra se quidem, sed supra semetipsum fuit. Sed ille filius prodigii per affectum in inferiora dilapsus est. Ergo etiam illi qui rapiuntur in superiora, per affectum hoc patiuntur.

3. Præterea. Super illud Psal. xxx. *In te Domine speravi, non confundar in æternum*, dicit Glossa (interl. Aug.) in expositione tituli: „Extasis græce, latine dicitur excessus mentis: qui fit duobus modis, vel povere terrenorum, vel mente rapta ad superna, & inferiorum obliata. Sed pavor terrenorum ad affectum pertinet. Ergo etiam raptus mentis ad superna, qui ex opposito ponitur, pertinet ad affectum.

Sed contra est quod super illud Psal. cxv. *Ego dixi in excessu meo, Omnis homo mendax*, dicit Glossa (ord. Aug.) „Dicitur hic extasis, cum mens non povere alienatur, sed aliqua inspiratione revelationis sursum assumitur. Sed revelatio pertinet ad vim intellectivam. Ergo & extasis, sive raptus.

Respondendo dicendum, quod de raptu dupliciter loqui possumus. Uno modo quantum ad id in quod aliquis rapitur: & sic proprie loquendo, raptus non potest pertinere ad vim appetitivam, sed solum ad cognoscitivam. Dictum est enim (art. præc.) quod raptus est præter propriam inclinationem eius quod rapitur: ipse autem motus appetitivæ virtutis est quædam inclinatio ad bonum appetibile. Unde, proprie loquendo, ex

hoc quod homo appetit aliquid, non rapitur, sed per se movetur.

Alio modo potest considerari raptus quantum ad suam causam: & sic potest habere causam ex parte appetitivæ virtutis. Ex hoc enim ipso quod appetitus ad aliquid vehementer afficitur, potest contingere quod ex violentia affectus homo ab omnibus aliis alienetur. Habet etiam affectum in appetitiva virtute, cum scilicet aliquis delectatur in his ad quæ rapitur. Unde & Apostolus dixit, se raptum non solum ad tertium cælum, quod pertinet ad contemplationem intellectus, sed etiam in paradysum, quod pertinet ad affectum.

Ad primum ergo dicendum, quod raptus addit aliquid supra extasim. Nam extasis importat simpliciter excessum a seipso, secundum quem scilicet aliquis extra suam ordinationem ponitur; sed raptus super hoc addit violentiam quandam. Potest igitur extasis ad vim appetitivam pertinere, puta cum alicuius appetitus tendit in ea quæ extra ipsum sunt: & secundum hoc Dionysius dicit, quod divinus amor facit extasim, in quantum scilicet facit appetitum hominis tendere in res amatas: unde posset subdit, quod etiam ipse Deus, qui est omnium causa, per abundantiam amoris bonitatis extra seipsum fit per providentiam ad omnia existentia. Quamvis etiam si expresse hoc diceretur de raptu, non designaretur, nisi quod amor esset causa raptus.

Ad secundum dicendum, quod in homine est duplex appetitus; scilicet intellectivus, qui dicitur voluntas; & sensitivus, qui dicitur sensualitas. Est autem proprium homini ut appetitus inferior subdatur appetitui superiori, & superior moveat inferiorem. Dupliciter ergo homo secundum appetitum potest fieri extra seipsum. Uno modo quando appetitus intellectivus totaliter in divina tendit, prætermisissis his ad quæ inclinatur appetitus sensitivus: & sic Dionysius dicit in xv. de div. Nom. (loc. cit. in arg.) quod Paulus ex virtute divini amoris extasim faciente dicit: *Præter ego, tam non ego, vivit vero in me Christus*. Alio modo quando prætermisso appetitu superiori, homo totaliter fertur in ea quæ pertinent ad appetitum inferiorem; & sic ille qui porcos pavit, sub semetipso cecidit: & ille excessus, vel extasis plus appropinquat ad rationem raptus quam peius, quia scilicet appetitus superior est

ma-

magis homini proprius. Unde quando homo ex violentia appetitus inferioris abstrahitur a motu appetitus superioris, magis abstrahitur ab eo quod est sibi proprium. Quia tamen non est ibi violentia, eo quod voluntas potest resistere passioni, deficit a vera ratione raptus; nisi forte tam vehementer passio sit quod usum rationis totaliter tollat, sicut contingit in his qui propter vehementiam iræ, vel amoris insaniunt. Considerandum tamen, quod uterque excessus secundum appetitum existens potest causare excessum cognoscitivæ virtutis: vel quia mens ad quendam intelligibilia rapiatur, alienata a sensibus; vel quia rapiatur ad aliquam imaginariam visionem, seu phantasticam apparitionem.

Ad tertium dicendum, quod sicut amor est motus appetitus respectu boni, ita timor est motus appetitus respectu mali. Unde eadem ratione ex utroque potest causari excessus mentis, præsertim cum timor ex amore causetur, sicut Augustinus dicit XIV. de civit. Dei (cap. vii. a med. & cap. ix.)

### ARTICULUS III. 336

*Utrum Paulus in raptu viderit Dei essentiam.*

*Ver. quæst. xlii. art. 2. & II. Cor. xii. l. 1.*

**A**D tertium sic proceditur. Videtur quod Paulus in raptu non viderit Dei essentiam. Sicut enim de Paulo legitur, quod est raptus usque ad tertium cælum; ita & de Petro legitur Act. x. quod cecidit super eum mentis excessus. Sed Petrus in suo excessu non vidit Dei essentiam, sed quendam imaginariam visionem. Ergo videtur quod nec Paulus Dei essentiam viderit.

2. Præterea. Visio Dei facit hominem beatum. Sed Paulus in illo raptu non fuit beatus: alioquin numquam ad vitam huius miseriam rediisset; sed corpus eius fuisset per redundantiam ab anima glorificatum, sicut erit in Sanctis post resurrectionem: quod patet esse falsum. Ergo Paulus in raptu non vidit Dei essentiam.

3. Præterea. Fides, & spes esse non possunt simul cum visione divinæ essentiae, ut habetur I. ad Corinth. xiii. Sed Paulus in statu illo habuit fidem,

& spem. Ergo non vidit Dei essentiam.

4. Præterea. Sicut Augustinus dicit XII. super Gen. ad lit. (cap. vi. & vii.) *secundum visionem imaginariam quædam similitudines corporum videntur.* Sed Paulus in raptu dicitur quædam similitudines vidisse, puta tertii cæli, & paradisi, ut habetur II. ad Cor. xii. Ergo videtur esse raptus ad imaginariam visionem magis quam ad visionem divinæ essentiae.

Sed contra est quod Augustinus determinat in Libro de videndo Deum ad Paulinam (epist. cxlvii. al. cxii. cap. xiii.) quod ipsa Dei substantia a quibusdam videri potuit in hac vita postea, sicut a Moysè, & Paulo, qui raptus audiret ineffabilia verba, quæ non licet homini loqui.

Respondeo dicendum, quod quidam dixerunt, Paulum in raptu non vidisse ipsam Dei essentiam, sed quendam refulgentiam claritatis ipsius. Sed contrarium manifeste Augustinus determinat, non solum in Libro de videndo Deum, (loc. cit.) sed etiam XII. super. Genes. ad lit. (cap. xxviii.) & habetur in Glossa (ord. sup. illud, *Usque ad tertium cælum*) II. ad Corinth. xii. Et hoc etiam ipsa verba Apostoli designant: dicit enim, *se audivisse ineffabilia verba, quæ non licet homini loqui.*

Huiusmodi autem videntur ea quæ pertinent ad visionem beatorum, quæ accedit statum viæ, secundum illud Isa. lxiv. 4. *Oculus non vidit, Deus, absque se, quæ præparasti diligentibus te.* Et id eo convenientius dicitur, quod Deum per essentiam vidit.

Ad secundum dicendum, quod mens humana divinitus rapitur ad contemplandam veritatem divinam tripliciter. Uno modo ut contempletur eam per similitudines quasdam imaginarias: & talis fuit excessus mentis qui cecidit supra Petrum. Alio modo ut contempletur veritatem divinam per intelligibiles effectus; sicut fuit excessus David dicentis (Psal. cxv. 2.) *Ego dixi in excessu meo: Omnis homo mendax.* Tertio modo ut contempletur eam in sua essentia; & talis fuit raptus Pauli, & etiam Moysis: & satis congruentior, nam sicut Moysès fuit primus doctor Iudeorum, ita Paulus fuit primus doctor Gentium.

Ad tertium dicendum, quod divina essentia videri ab intellectu creato non potest nisi per lumen gloriæ, de quo dicitur

citur in Psal. xxxv. 10. *In lumine tuo videbimus lumen*. Quod tamen dupliciter participari potest. Uno modo per modum formæ immanentis : & sic beatos facit Sanctos in patria. Alio modo per modum cuiusdam passionis transeuntis, sicut dictum est (quaest. clxxi. art. 2.) de lumine prophetiæ : & hoc modo lumen illud fuit in Paulo, quando raptus fuit. Et ideo ex tali visione non fuit simpliciter beatus ut fieret redundantia ad corpus, sed solum secundum quid. Et ideo talis raptus aliquo modo ad prophetiam pertinet.

Ad tertium dicendum, quod quia Paulus in raptu non fuit beatus habitualiter, sed solum habuit actum beatorum, consequens est ut simul tunc in eo non fuerit actus fidei ; fuit tamen simul tunc in eo fidei habitus.

Ad quartum dicendum, quod nomine tertii cæli potest uno modo intelligi aliquid corporeum : & sic tertium cælum dicitur cælum empyreum, quod dicitur tertium respectu cæli aerei, & cæli sideris, vel potius respectu cæli sideris, & respectu cæli aquei, sive chrysalini. Et dicitur raptus ad tertium cælum, non quia raptus sit ad videndum similitudinem alicuius rei corporeæ, sed propter hoc quod locus ille est contemplationis beatorum. Unde Glossa (cit. in princ. corp.) dicit II. ad Corinth. xii. quod *cælum tertium est spirituale cælum, ubi Angeli, & sanctæ anime fruuntur Dei contemplatione* : ad quod cum dicit se raptum, signat quod Deus ostendit ei vitam, in qua videndus est in æternum. Alio modo per tertium cælum potest intelligi aliqua visio supermundana : quæ potest dici tertium cælum triplici ratione. Uno modo secundum ordinem potentiarum cognoscitivarum ; ut primum cælum dicatur visio supermundana corporalis, quæ fit per sensum, sicut visa est manus scribens in pariete, Daniel. v. secundum autem cælum sit visio imaginaria, puta quam vidit Isaias, & Ioannes in Apocalypsi ; tertium vero cælum dicatur visio intellectualis, ut Augustinus exponit XII. super Genes. ad lit. (cap. xxviii.) Secundo modo potest dici tertium cælum secundum ordinem cognoscibilem ; ut primum cælum dicatur cognitio cælestium corporum ; secundum cognitio cælestium spirituum ; tertium cognitio ipsius Dei. Tercio modo potest dici tertium cælum contemplatio Dei

secundum gradus cognitionis qua Deus videtur : quorum primus pertinet ad Angelos infimæ hierarchiæ ; secundum ad Angelos mediæ ; tertius ad Angelos supremæ, ut dicit Glossa (cit. in princ. corp.) II. ad Corinth. xii. & quia visio Dei non potest esse sine delectatione, propterea non solum se dicit raptum ad tertium cælum ratione contemplationis, sed etiam in paradisum ratione delectationis consequens.

#### ARTICULUS IV. 837

*Utrum Paulus in raptu fuerit alienatus a sensibus.*

I. P. quaest. xii. art. ii. cor. & ver. quaest. x. art. ii. cor. & quaest. xiii. art. 3. cor. & ad 4. & art. 4. co. & quol. i. art. 1. co. & II. Cor. xii. lect. 1.

**A**D quartum sic proceditur. Videtur quod Paulus in raptu non fuerit alienatus a sensibus. Dicit enim Augustinus XII. super Gen. ad lit. (cap. xxviii. cir. med.) *Cur non credamus quod tanto Apostolo doctore gentium raptio usque ad istam excellentissimam visionem voluerit Deus demonstrare vitam, in qua post hanc vitam (a) vivendum est in æternum* ? Sed in illa vita futura Sancti post resurrectionem videbunt Dei essentiam absque hoc quod fiat abstractio a sensibus corporeis. Ergo nec in Paulo fuit huiusmodi abstractio facta.

2. Præterea. Christus vere viator fuit, & continue visione divinæ essentiae fruebatur ; nec tamen fiebat abstractio a sensibus. Ergo nec fuit necessarium quod in Paulo fieret abstractio a sensibus, ad hoc quod essentiam Dei videret.

3. Præterea. Paulus, postquam Deum per essentiam viderat, memor suit illorum quæ in illa visione confexerat : unde dicebat II. ad Cor. xii. 4. *Audivi arcana verba, quæ non licet homini loqui*. Sed memoria ad partem sensitivam pertinet, ut patet per Philosophum in Lib. de memoria & reminiscencia (cap. i. cir. med.) Ergo videtur quod etiam Paulus videndo Dei essentiam non fuerit alienatus a sensibus.

Sed contra est quod Augustinus dicit XII. super Gen. ad lit. (cap. xxviii. in fi.) *Nisi ab hac vita quisque quodammodo moriatur, sive omnino exiens de corpore, sive aversus, & alienatus a car-*

na-

(a) Ita communiter. Nihil aliud videndus est.

nalibus sensibus, in illam non subuehitur visionem.

Respondendo dicendum, quod divina essentia non potest ab homine videri per aliam vim cognoscitivam quam per intellectum. Intellectus autem humanus non convertitur ad intelligibilia nisi mediantibus phantasmatis, quæ per species intelligibiles a sensibus accipit, & in quibus considerans de sensibilibus iudicat, & ea disponit. Et ideo in omni operatione qua intellectus noster abstrahitur a phantasmatis, necesse est quod abstrahatur a sensibus. Intellectus autem hominis in statu viæ necesse est quod a phantasmatis abstrahatur, si videat Dei essentiam. Non enim per aliquod phantasma potest Dei essentia videri, quinimo nec per aliquam speciem intelligibilem creatam, quia essentia Dei in inninrum excedit non solum omnia corpora, quorum sunt phantasmata, sed etiam omnem intelligibilem creaturam. Oportet autem, cum intellectus hominis elevatur ad altissimam Dei essentiam visionem, ut tota mentis intentio illuc advocetur, ita scilicet quod nihil intelligat aliud ex phantasmatis, sed totaliter feratur in Deum. Unde impossibile est quod homo in statu viæ videat Deum per essentiam sine abstractione a sensibus.

Ad primum ergo dicendum, quod, sicut dictum est (art. præc. arg. 2.) post resurrectionem in beatis Dei essentiam videntibus fiet redundantia ab intellectu ad inferiores vires, & usque ad corpus: unde secundum ipsam regulam divine visionis anima intendit phantasmatis, & sensibilibus. Talis autem redundantia non fit in his qui rapiuntur, sicut dictum est (art. præc. ad 2.) Et ideo non est similis ratio.

Ad secundum dicendum, quod intellectus animæ Christi erat glorificatus per habituale lumen gloriæ, quo divinam essentiam videbat multo amplius quam aliquis Angelus, vel homo. Erat autem viator propter corporis passibilitatem, secundum quam paulo minus ab Angelis minorabatur, ut dicitur ad Hebræos 11. dispensative, & non propter aliquem defectum ex parte intellectus. Unde non est similis ratio de eo, & de aliis viatoribus.

Ad tertium dicendum, quod Paulus, postquam cessavit videre Dei essentiam, memor fuit illorum quæ in illa visione cognoverat per aliquas species intelli-

biles habitualiter ex hoc in eius intellectu relictas; sicut etiam, abeunte sensibili, remanent aliquæ impressiones in anima, quas postea conferens ad phantasmata memoratur. Unde nec totam illam cognitionem aut cogitare poterat, aut verbis exprimere.

## ARTICULUS V. 838

*Utrum anima Pauli in statu illo fuerit totaliter a corpore separata.*

*Inf. art. 6. & re. quæst. XIII. art. 3. cor. & II. Cor. XII. lect. 1. fin.*

**A**D quintum sic proceditur. Videtur quod anima Pauli in statu illo fuerit totaliter a corpore separata. Dicit enim Apostolus II. ad Cor. 5. *Quantum sumus in corpore, peregrinamur a Domino: per fidem enim ambulamus, & non per speciem.* Sed Paulus in statu illo non peregrinabatur a Domino, quia videbat Deum per speciem, ut dictum est (art. 3. hu. quæst.) Ergo non erat in corpore.

1. Præterea. Potentia animæ non potest elevari supra eius essentiam, in qua radicatur. Sed intellectus, qui est potentia animæ, in raptu fuit a corporalibus abstractus per elevationem ad divinam contemplationem. Ergo multo magis essentia animæ fuit separata a corpore.

3. Præterea. Vires animæ vegetabilis sunt magis materiales quam vires animæ sensitivæ. Sed oportebat intellectum abstrahi a viribus animæ sensitivæ, ut dictum est (art. præc.) ad hoc ut raperetur ad videndam divinam essentiam. Ergo multo magis oportebat quod abstraheretur a viribus animæ vegetabilis, quarum operatione cessante, iam nullo modo remanet anima corpori coniuncta. Ergo videtur quod oportuit in raptu Pauli animam totaliter a corpore esse separatam.

Sed contra est quod Augustinus dicit in epist. ad Paulinam de videndo Deum (cxlvi. al. cxlii. cap. xlii. ante med.) *Non incredibile est, etiam quibusdam sanctis nondum ita defunctis, ut sepelienda eorum cadavera remanerent, eis ipsam excellentiam revelationis fuisse concessam, ut scilicet viderent Deum per essentiam.* Non ergo fuit necessarium ut in raptu Pauli anima eius totaliter separaretur a corpore.

Respondendo dicendum, quod, sicut supra dictum est (art. 1. hu. quæst.) in

raptu, de quo nunc loquimur, virtute divina elevatur homo ab eo quod est secundum naturam, in id quod est supra naturam : & ideo duo considerare oportet : primo quidem quid sit homini secundum naturam ; secundo, quid divina virtute in homine sit secundum supra naturam.

Et hoc autem quod anima corpori unitur tamquam naturalis forma ipsius, convenit animæ naturalis habitudo ad hoc quod per conversionem ad phantasmata intelligat : quod quidem ab ea non aufertur divina virtute in raptu, quia non mutatur status eius, ut dictum est (art. 3. hu. quæst. ad 3.) Manente autem hoc statu, aufertur ab anima actualis conversio ad phantasmata, & sensibilia, ne impediatur eius elevatio in id quod excedit omnia phantasmata, ut dictum est (art. præc.) Et ideo in raptu non fuit necessarium quod anima sic separaretur a corpore ut ei non uniretur quasi forma; fuit autem necessarium, intellectum eius abstrahi a phantasmatis, & sensibilibus perceptione.

Ad primum ergo dicendum, quod Paulus in raptu illa peregrinabatur a Domino quantum ad statum, quia adhuc erat in statu viatoris; non autem quoad actum, quod videbat Deum per speciem, ut ex prædictis patet (art. 3. hu. quæst. ad 2. & 3.)

Ad secundum dicendum, quod potentia animæ virtute naturali non elevatur super modum convenientem essentiae eius; virtute tamen divina potest in aliquid altius elevari, sicut corpus per violentiam fortioris virtutis elevatur supra locum convenientem sibi secundum speciem suæ naturæ.

Ad tertium dicendum, quod vires animæ vegetabilis non operantur ex intentione animæ, sicut vires sensitivæ, sed per modum naturæ : & ideo non requiritur ad raptum ab eis abstractio, sicut a potentis sensitivis, per quarum operationes minueretur intentio animæ circa intellectivam cognitionem.

## ARTICULUS VI. 839

*Utrum Paulus ignoraverit, an anima eius fuerit a corpore separata.*

*Ver. quæst. XIII. art. 5. & II. Cor. XII. l. 8. 1. f.*

**A**D sextum sic proceditur. Videtur quod Paulus non ignoraverit, an eius anima fuerit a corpore separata. Dicit enim ipse II. ad Corinth. XII. 2. *Scio hominem in Christo raptum usque ad tertium caelum.* Sed homo nominat compositum ex anima, & corpore : raptus etiam differt a morte. Videtur ergo quod ipse sciverit, animam non fuisse per mortem a corpore separatam, præsertim quia hoc communiter a Doctoribus ponitur.

2. Præterea. Ex eisdem Apostoli verbis patet quod ipse scivit quod raptus fuerit, quia in *tertium caelum*. Sed ex hoc sequitur quod sciverit utrum in corpore fuerit, vel non : quia si scivit tertium caelum esse aliquid corporeum, consequens est quod sciverit animam suam non esse a corpore separatam, quia visio rei corporeæ non potest fieri nisi per corpus. Ergo videtur quod non omnino ignoraverit, an anima fuerit a corpore separata.

3. Præterea. Sicut Augustinus dicit XII. super Gen. ad lit. (cap. XXVIII.) *ipse in raptu vidit illa visione Deum quia vidit Sancti in patria.* Sed Sancti ex hoc ipso quod vident Deum, sciunt an animæ eorum sint a corporibus separatæ. Ergo & Paulus hoc scivit.

Sed contra est quod dicitur II. ad Cor. XII. 3. *Sive in corpore, sive extra corpus nescio, Deus scit.*

Respondetur dicendum, quod huiusmodi questionis veritatem accipere oportet ex ipsis Apostoli verbis, quibus dicit se aliquid scire, scilicet se raptum esse usque ad tertium caelum, & aliquid nescire, scilicet utrum in corpore, aut extra corpus : quod quidem potest intelligi dupliciter. Uno modo ut hoc quod dicitur, *Sive in corpore, sive extra corpus*, non referatur ad ipsum esse hominis rapti, quasi ignoraverit an anima eius esset in corpore, an non; sed ad modum raptus, ut scilicet ignoraverit an corpus eius fuerit simul raptum cum anima in tertium caelum, vel non, sed solum anima; sicut Ezech. VIII. dicitur, quod ad-

adductus est in visionibus Dei in Hierusalem. Et hunc intellectum fuisse cuiusdam Iudaei exprimit Hieronymus in prologo super Daniel. (vers. ii.) ubi dicit: *Denique & Apostolum nostrum* (scilicet dicebat Iudaeus) *non fuisse ausum affirmare se in corpore raptum, sed dixisse: Sive in corpore, sive extra corpus nescio.*

Sed hunc sensum reprobat Augustinus XII. super Gen. ad lit. (cap. ii. iii. iv. & xxviii.) per hoc quod Apostolus dicit, scivisse se esse raptum usque in tertium caelum. Sciebat ergo verum esse tertium caelum id in quod raptus fuit, & non similitudinem imaginariam tertii caeli: alioquin si tertium caelum nominavit phantasma tertii caeli, pari ratione dicere potuit, se in corpore raptum, nominans corpus proprii corporis phantasma, quale apparet in somniis: Si autem sciebat esse vere tertium caelum, sciebat ergo aut esse aliquid spirituale, & incorporeum; & sic non poterat corpus eius illuc capi aut esse aliquid corporeum; & sic anima non posset illuc sine corpore rapti nisi separaretur a corpore. Et ideo oportet secundum alium sensum intelligere, ut scilicet Apostolus sciverit quod fuerit raptus secundum animam, & non secundum corpus, nesciverit tamen qualiter se haberet anima ad corpus, utrum scilicet fuerit sine corpore, vel non.

Sed circa hoc diversimode aliqui loquuntur. Quidam enim dicunt, quod Apostolus scivit quod anima sua erat corpori unita ut forma, sed nescivit utrum esset passus alienationem a sensibus, vel etiam utrum esset facta abstractio ab operibus animae vegetabilis. Sed quod fuerit facta abstractio a sensibus, hoc non potuit ignorare, ex quo scivit se raptum; quod autem fuerit facta abstractio ab operibus animae vegetabilis, non erat tantum aliquid ut de hoc oporteret tam sollicitam fieri mentionem. Unde relinquitur quod nescivit Apostolus, utrum anima eius fuerit coniuncta corpori ut forma, vel a corpore separata per mortem. Quidam autem hoc concedentes dicunt, quod Apostolus tunc non perpendit quando raperetur, quia tota eius intentio conversio erat in Deum; sed postmodum percepit, considerans ea quae viderat. Sed hoc etiam contrariatur verbis Apostoli, qui distinguit inter verba praeteritum a futuro: dicit e-

nim in praesenti se scire quod fuit raptus ante annos quatuordecim, & se in praesenti nescire utrum in corpore fuerit, vel extra corpus.

Et ideo dicendum est, quod & prius, & postea nescivit, utrum eius anima fuerit a corpore separata. Unde Augustinus dicit XII. super Gen. ad lit. (cap. v.) post longam inquisitionem concludens: *Restat ergo fortasse ut hoc ipsum eum ignorasse intelligamus, utrum quando in tertium caelum raptus est, in corpore fuerit anima, quomodo est anima in corpore, cum corpus vivere dicitur sive vigilantis, sive dormientis, sive in extasi a sensibus corporis alienati, an omnino de corpore exierit, ut mortuum corpus iaceret.*

Ad primum ergo dicendum, quod per synecdocham quando pars hominis homo nominatur; & praecipue anima, quae est pars hominis eminentior.

Quamvis etiam possit intelligi, eum quem raptum dicit, non tunc fuisse hominem quando raptus fuit, sed post annos quatuordecim. Unde dicit, *Scio hominem*, non dicit, *Scio raptum hominem*. Nihil etiam prohiberet, mortem divinitus procuratam raptum dici: & sic Augustinus dicit XII. super Gen. ad lit. (cap. iii. a med.) *Dubitante inde Apostolo, quis nostrum inde certus esse audeat?* Unde qui super hoc loquuntur, magis coniecturaliter quam per certitudinem loquuntur.

Ad secundum dicendum, quod Apostolus scivit, vel illud caelum esse quid corporeum, vel aliquid incorporeum a se visum in illo caelo; cum hoc potuerit fieri per intellectum eius, etiam si anima eius non esset a corpore separata.

Ad tertium dicendum, quod visio Pauli in raptu quantum ad aliquid fuit similis visioni beatorum, scilicet quantum ad id quod videbatur; & quantum ad aliquid dissimilis, scilicet quantum ad modum videndi, quia non ita perfecte vidit, sicut Sancti qui sunt in patria. Unde Augustinus dicit XII. super Gen. ad lit. (cap. xxxvi. a med.) *Quamvis Apostolo arrepto a carnis sensibus in tertium caelum hoc desuit ad plenam, perfectamque cognitionem rerum, quae Angelis inest, quod sive in corpore, sive extra corpus esset, nesciebat: hoc utique non deerit receptis corporibus in resurrectione mortuorum, cum corruptibile hoc induitur incorruptione.*



## QUAESTIO CLXXVI.

De gratia linguarum,

in duos articulos divisa.

**D**Einde considerandum est de gratiis gratis datis quæ pertinent ad locutionem: & primo de gratia linguarum; secundo de gratia sermonis sapientiæ, seu scientiæ.

Circa primum quærentur duo.

Primo, utrum per gratiam linguarum homo adificatur scientiam omnium linguarum.

Secundo, de comparatione huius doni ad gratiam prophetiæ.

## ARTICULUS I. 840

*Utrum illi qui consequantur donum linguarum, loquantur omnibus linguis.*

**I. Cor. XIV. leſt. 1. & leſt. 4. a princ.**

**A**D primum sic proceditur. Videtur quod illi qui consequantur donum linguarum, non loquantur omnibus linguis. Illud enim quod divina virtute aliquibus conceditur, optimum est in suo genere; sicut Dominus aquam convertit in vinum bonum, sicut dicitur Ioan. 11. Sed illi qui habuerunt donum linguarum, melius loquebantur in propria lingua: dicit enim Glossa ad Hebr. 1. (ord. sup. argumentum in eam Epist.) non esse mirandum, quod epistola ad Hebræos maiore vellet facundia quam alie; cum naturale sit unicuique plus in sua quam in aliena lingua valere: ceteras enim epistolas Apostolus peregrino, id est Græco, sermone composuit, hanc autem scripsit Hebræica lingua. Non ergo per gratiam gratis datam Apostoli acceperunt scientiam omnium linguarum.

2. Præterea. Natura non facit per multa quod potest fieri per unum; & multo minus Deus, qui ordinatius quam natura operatur. Sed poterat Deus facere ut unam linguam loquentes eius discipuli ab omnibus intelligerentur: unde super illud Act. 11. *Audiebat unusquisque lingua sua illos loquentes*, dicit Glossa (ordin. Bedæ) quod linguis omnibus loquebantur; vel sua (id est Hebræica lingua) loquentes ab omni-

bus intelligebantur, ac si propriis lingularum loquerentur. "Ergo videtur quod non habuerint scientiam loquendi omnibus linguis."

3. Præterea. Omnes gratiæ derivantur a Christo in corpus eius, quod est Ecclesia, secundum illud Ioan. 1. 16. *De plenitudine eius omnes accepimus*. Sed Christus non legitur fuisse locutus nisi una lingua, nec etiam nunc fideles singuli nisi una lingua loquuntur. Ergo videtur quod discipuli Christi non acceperunt ad hoc gratiam ut omnibus linguis loquerentur.

Sed contra est quod dicitur Act. 11. 4. *quod repleti sunt omnes Spiritu sancto, & ceperunt loqui variis linguis, prout Spiritus sanctus dabat eloqui illis*: ubi dicit Glossa Gregorii (hom. xxx. in Evang. parum ante med.) quod "Spiritus sanctus super discipulos in igneis linguis apparuit, & eis omnium linguarum scientiam dedit."

Respondeo dicendum, quod primi discipuli Christi ad hoc fuerunt ab ipso electi ut per universum orbem discurrentes, fidem eius ubique prædicarent, secundum illud Matth. ult. 19. *Euntes docete omnes gentes*. Non autem erat conveniens ut qui mittebantur ad alios instruendos, indigerent ab aliis instrui, qualiter aliis loquerentur, vel qualiter quæ alii loquerentur, intelligerent: præsertim quia isti qui mittebantur, erant unius gentis, scilicet Iudææ, secundum illud Isa. xxvii. 6. *Qui egredientur impetu a Iacob . . . implebunt faciem orbis semine*. Illi etiam qui mittebantur, pauperes, & impotentes erant; nec de facili a principio reperissent qui eorum verba aliis fideliter interpretarentur, vel verba aliorum eis exponerent, maxime quia ad infideles mittebantur. Et ideo necessarium fuit ut super hoc eis divinitus provideretur per donum linguarum; ut sicut gentibus ad idololatriam declinantibus, introducta esset diversitas linguarum, sicut dicitur Gen. xi. ita etiam quando erant gentes ad cultum unius Dei revocandæ, contra huiusmodi diversitatem remedium adhiberetur per donum linguarum.

Ad primum ergo dicendum, quod, sicut dicitur 1. ad Cor. xii. 7. *manifestatio spiritus datur ad utilitatem*: & ideo sufficienter & Paulus, & alii Apostoli fuerunt instructi divinitus in linguis omnium gentium, quantum requirebatur ad fidei doctrinam; sed quantum ad quædam quam-

superadduntur humana arte ad ornatum, & elegantiam locutionis, Apostolus instructus erat in propria lingua, non autem in aliena: sicut etiam in sapientia, & scientia fuerunt sufficienter instructi, quantum requirebat doctrina fidei, non autem quantum ad omnia quae per scientiam acquisitam cognoscuntur, puta de conclusionibus Arithmeticae, vel Geometriae.

Ad secundum dicendum, quod quavis utrumque fieri potuisset, scilicet quod per unam linguam loquentes ab omnibus intelligerentur, aut quod omnibus linguis loquerentur; tamen convenientius fuit quod ipsi omnibus linguis loquerentur, quia hoc pertinebat ad perfectionem scientiae ipsorum, per quam non solum loqui, sed intelligere poterant quae ab aliis dicebantur. Si autem omnes unam eorum linguam intellexissent, hoc vel fuisset per scientiam illorum qui eos loquentes intelligerent, vel fuisset quasi quaedam illusio, dum aliorum verba aliter ad eorum aures perferrentur, quam ipsi ea proferrent: & ideo Glossa (ord. Bedae) dicit Act. 17. quod maiori miraculo factum est quod ipsi omnium linguarum generibus loquerentur: & Paulus dicit I. ad Cor. xiv. 18. *Gratias ago Deo meo, quod omnium vestrum lingua loquor.*

Ad tertium dicendum, quod Christus in propria persona uni soli genti praedicaturus erat, scilicet Iudaeis. Et ideo quavis ipse absque dubio haberet perfectissime scientiam omnium linguarum, non tamen oportuit quod omnibus linguis loqueretur. Ideo autem, ut Augustinus dicit super Ioan. (tract. xxxii. circ. med.) cum & modo Spiritus sanctus accipitur, nemo loquitur linguis omnium gentium, quia iam ipsa Ecclesia linguis omnium gentium loquitur, in qua qui non est, non accipit Spiritum sanctum.

## ARTICULUS II. 841

*Utrum donum linguarum sit excellentius quam gratia prophetiae.*

**A**D secundum sic proceditur. Videtur quod donum linguarum sit excellentius quam gratia prophetiae. Quae enim sunt melioribus propria, videntur esse meliora, secundum Philosophum in III. Topic. (cap. 1. in explicat. loci xxi.) Sed donum linguarum est proprium novi Testamenti: unde cantatur

*S. Tb. Oper. Tom. XXIII.*

in Sequentia Pentecostes: *Ipse hodie Apostolos Christi donans munere insolito, & cunctis inaudito saeculis: prophetia autem magis competit veteri Testamento, secundum illud ad Hebr. 1. 1. Multisariam, multisque modis olim Deus loquens patribus in Prophetis.* Ergo videtur quod donum linguarum sit excellentius quam donum prophetiae.

2. Praeterea. Illud per quod ordinamur ad Deum, videtur excellentius esse eo per quod ordinamur ad homines. Sed per donum linguarum homo ordinatur ad Deum, per prophetiam autem ad homines: dicitur enim I. ad Cor. xiv. 2. *Qui loquitur lingua, non hominibus loquitur, sed Deo... qui autem prophetat, hominibus loquitur ad edificationem.* Ergo videtur quod donum linguarum sit excellentius quam donum prophetiae.

3. Praeterea. Donum linguarum habitualiter permanet in habente ipsum, & homo habet in potestate uti eo cum voluerit: unde dicitur I. ad Cor. xiv. 18. *Gratias ago Deo meo, quod omnium vestrum lingua loquor.* Non autem sic est de dono prophetiae, ut supra dictum est (quaest. clxxi. art. 2.) Ergo donum linguarum videtur esse excellentius quam donum prophetiae.

4. Praeterea. Interpretatio sermonum videtur contineri sub prophetia: quia Scripturae eodem spiritu exponuntur quo sunt editae. Sed interpretatio sermonum I. ad Corinth. xii. ponitur post genera linguarum. Ergo videtur quod donum linguarum sit excellentius quam donum prophetiae, maxime quantum ad aliquam eius partem.

Sed contra est quod Apostolus dicit I. ad Corinth. xiv. 5. *Maior est qui prophetat, quam qui loquitur linguis.*

Respondeo dicendum, quod donum prophetiae excedit donum linguarum tripliciter.

Primo quidem quia donum linguarum refertur ad diversas voces proferendas, quae sunt signa alicuius intelligibilis veritatis, cuius etiam signa sunt quaedam ipsa phantasmata, quae secundum imaginariam visionem apparent. Unde & Augustinus XII. super Gen. ad lit. (cap. viii.) comparat donum linguarum visioni imaginariae. Dictum est autem supra (quaest. clxxi. art. 2.) quod donum prophetiae consistit in ipsa illuminatione mentis ad cognoscendam intelligibilem veritatem. Unde sicut prophetica illu-

X 3

mina-

minatio excellentior est quam imaginaria visio, ut supra habitum est (quæst. clxxiv. art. 2.) ita etiam excellentior est prophetia quam donum linguarum, secundum se consideratum. Secundo quia donum prophetiæ pertinet ad rerum notitiam, quæ est nobilior quam notitia vocum, ad quam pertinet donum linguarum. Tertio quia donum prophetiæ est utilius: & hoc quidem probat Apostolus I. ad Corinth. xiv. tripliciter. Primo quidem quia prophetia est utilior ad ædificationem Ecclesiæ, ad quam qui loquitur linguis, nihil prodest, nisi expositio subsequatur. Secundo quantum ad ipsum loquentem, qui si acciperet ut loqueretur diversis linguis, sine hoc quod intelligeret, quod pertinet ad propheticum donum, mens eius non ædificaretur. Tertio quantum ad infideles, propter quos præcipue esse videtur datum donum linguarum: qui quidem forte eos qui loquerentur linguis, reputarent insanos; sicut & Iudæi reputaverunt ebrios Apostolos linguis loquentes, ut dicitur Act. 11. Per prophetias autem infideles convincuntur, manifestatis absconditis cordis sui.

Ad primum ergo dicendum, quod, sicut supra dictum est (quæst. clxxiv. art. 2. ad 1.) ad excellentiam prophetiæ pertinet quod aliquis non solum illuminetur intelligibili lumine, sed etiam percipiat imaginariam visionem: ita etiam ad perfectionem operationis Spiritus sancti pertinet quod non solum impleat mentem lumine prophetico, & phantasiam imaginaria visione, sicut erat in veteri Testamento; sed etiam exterius linguam erudiat ad varia signa locutionum proferenda: quod totum fit in novo Testamento, secundum illud I. ad Corinth. xiv. 26. *Unusquisque vestrum psalmum habet, doctrinam habet, linguam habet, apocalypsim, id est prophetiæ revelationem, habet.*

Ad secundum dicendum, quod per donum prophetiæ homo ordinatur ad Deum secundum mentem; quod est nobilissimum quam ordinari ad eum secundum linguam. Dicitur autem, quod ille qui loquitur lingua, non loquitur hominibus, id est ad intellectum hominum, vel utilitatem eorum, sed ad intellectum solius Dei, & ad laudem eius. Sed per prophetiam ordinatur aliquis & ad Deum, & ad proximum: unde est perfectius donum.

Ad tertium dicendum, quod revelatio

prophetica se extendit ad omnia supernaturalia cognoscenda: unde ex eius perfectione contingit quod in statu imperfectionis huius vitæ non potest haberi perfecte per modum habitus, sed imperfecte per modum cuiusdam passionis. Sed donum linguarum se extendit ad cognitionem quamdam particularem, scilicet vocum humanarum: & ideo non repugnat imperfectioni huius vitæ quod perfecte, & habitualiter habeatur.

Ad quartum dicendum, quod interpretatio sermonum potest reduci ad donum prophetiæ, inquantum scilicet mens illuminatur ad intelligendum, & exponendum quæcumque sunt in sermonibus obscura, sive propter difficultatem rerum significatarum, sive etiam propter ipsas voces ignotas, quæ proferuntur, sive etiam propter similitudines rerum adhibitas, secundum illud Dan. v. 16. *Audivi de te, quod possis obscura interpretari, & ligata dissolvere.* Unde interpretatio sermonum est potior quam donum linguarum, ut patet per illud quod Apostolus dicit I. ad Corinth. xiv. 5. *Mator est qui prophetat, quam qui loquitur linguis, nisi forte interpreter.* Postponitur autem interpretatio sermonum dono linguarum, quia etiam ad interpretandum diversa linguarum genera interpretatio sermonum se extendit.

## QUAESTIO CLXXVII.

*De gratia gratis data quæ consistit in sermone, in duos articulos divisas.*

**D**Einde considerandum est de gratia gratis data, quæ consistit in sermone, de qua dicit Apostolus I. ad Corinth. xii. 8. *Alii datur per Spiritum sermo sapientiæ, alii sermo scientiæ: & circa hoc quaeruntur duo.*

Primo, utrum in sermone consistat aliqua gratia gratis data.

Secundo, quibus hæc gratia competat.

## ARTICULUS I. 802

*Utrum in sermone consistat aliqua gratia gratis data.*

**A**D primum sic proceditur. Videtur quod in sermone non consistat aliqua gratia gratis data. Gratia enim datur ad id quod excedit facultatem natu-

12.

raz. Sed ex naturali ratione adinventum est ars Rhetorica, per quam aliquis potest sic dicere, ut doceat, ut delectet, ut flectat, sicut Augustinus dicit in IV. de doctr. crist. (cap. xxi. in princ.) Hoc autem pertinet ad gratiam sermonis. Ergo videtur quod gratia sermonis non sit gratia gratis data.

2. Præterea. Omnis gratia ad regnum Dei pertinet. Sed Apostolus dicit I. ad Corinth. xv. 20. *Non in sermone est regnum Dei, sed in virtute.* Ergo in sermone non consistit aliqua gratia gratis data.

3. Præterea. Nulla gratia datur ex meritis: quia *fi ex operibus, iam non est gratia*, ut dicitur ad Rom. xi. 6. Sed sermo datur alicui ex meritis: dicit enim Gregorius (Lib. XI. Mor. cap. ix.) exponens illud Ps. cxviii. *Ne auferas de ore meo verbum veritatis*, quod „verbum veritatis est quod omnipotens Deus facientibus tribuit, & non facientibus tollit.“ Ergo videtur quod donum sermonis non sit gratia gratis data.

4. Præterea. Sicut necesse est quod homo per sermonem pronuntiet ea quæ pertinent ad donum sapientiæ, vel scientiæ; ita etiam ea quæ pertinent ad virtutem fidei. Ergo si ponitur sermo sapientiæ, & sermo scientiæ gratia gratis data, pari ratione deberet poni sermo fidei inter gratias gratis datas.

Sed in contrarium est quod dicitur Eccli. vi. 5. *Lingua eueharis, idest gratiosa, in bono homine (a) abundabit.* Sed bonitas hominis est ex gratia. Ergo etiam gratiositas sermonis.

Respondendo dicendum, quod gratia gratis datae dantur ad utilitatem aliorum, ut supra dictum est (1. 2. quæst. cxi. art. 1. & 4.) Cognitio autem quam aliquis a Deo accipit, in utilitatem alterius converti non potest, nisi mediante locutione. Et quia Spiritus sanctus non deficit in aliquo quod pertineat ad Ecclesiæ utilitatem, etiam providet membris Ecclesiæ in locutione: non solum ut aliquis sic loquatur ut a diversis possit intelligi, quod pertinet ad donum linguarum; sed etiam quod efficaciter loquatur, quod pertinet ad gratiam sermonis.

Et hoc tripliciter. Primo quidem ad instruendum intellectum: quod fit, dum aliquis sic loquitur quod doceat. Secundo ad movendum affectum, ut scilicet

libenter audiat verbum Dei: quod fit, dum aliquis sic loquitur quod auditores delectet: quod non debet aliquis querere propter favorem suum, sed ut homines alliciantur ad audiendum verbum Dei. Tercio ad hoc quod aliquis amet ea quæ verbis significantur, & velit ea implere: quod fit, dum aliquis sic loquitur quod auditorem flectat. Ad quod quidem efficiendum Spiritus sanctus utitur lingua hominis quasi quodam instrumento; ipse autem est qui perficit operationem interioris. Unde Gregorius dicit in hom. Pentecostes (xxx. in Evang. inter princ. & med. & Lib. XXIX. Moral. cap. xiiii.) *Nisi corda auditorum Spiritus sanctus repleat, ad aures corporis vox docentium incassum sonat.*

Ad primum ergo dicendum, quod sicut miraculoſe Deus quandoque operatur quodam excellentiori modo etiam ea quæ natura potest operari; ita etiam Spiritus sanctus excellentiori operatur per gratiam sermonis id quod potest ars operari inferiori modo.

Ad secundum dicendum, quod Apostolus ibi loquitur de sermone qui innititur humanæ eloquentiæ absque virtute Spiritus sancti: unde præmisit: *Cognoſcam non sermonem eorum qui inflati sunt, sed virtutem:* & de seipſo præmisit sup. cap. xi. 4. *Sermo meus. & prædicatio mea non fuit in persuasibilibus humane sapientiæ verbis, sed in ostensione spiritus, & virtutis.*

Ad tertium dicendum, quod, sicut dictum est (in corp. art.) gratia sermonis datur alicui ad utilitatem aliorum. Unde quandoque subtrahitur propter auditoris culpam, quandoque autem propter culpam ipsius loquentis. Bona autem opera utriusque non merentur directe hanc gratiam, sed solum impediunt huius gratiæ impedimenta. Nam etiam gratia gratum faciens subtrahitur propter culpam; non tamen eam meretur aliquis per bona opera, per quæ tollitur tantum gratiæ impedimentum.

Ad quartum dicendum, quod, sicut dictum est (in corp. art.) gratia sermonis ordinatur ad utilitatem aliorum. Quod autem aliquis fidem suam aliis communicet, fit per sermonem scientiæ, sive sapientiæ. Unde Augustinus dicit XIV. de Trinitate (cap. 1. a med.) quod *scire, quemadmodum fides & pias opusculatur, & contra impios defendatur, videtur Apostolus scientiam appellare.* Et id-

X 4

co

(a) *Valga abundat.*

eo non oportuit quod poneret sermonem fidei; sed sufficit ponere sermonem scientiæ, & sapientiæ.

## ARTICULUS II. 843

*Utrum gratia sermonis, sapientiæ, & scientiæ pertineat etiam ad mulieres.*

**A**D secundum sic proceditur. Videtur quod gratia sermonis, sapientiæ, & scientiæ pertineat etiam ad mulieres. Ad huiusmodi enim gratiam pertinet doctrina, sicut dictum est (art. præc.) Sed docere competit mulieri: dicitur enim Proverb. 1v. 3. *Unigenitus sui coram matre mea, & docebat me.* Ergo hæc gratia competit mulieribus.

2. Præterea. Maior est gratia prophetiæ quam gratia sermonis, sicut maior est contemplatio veritatis quam eius enuntiatio. Sed prophetia conceditur mulieribus, sicut legitur Iudic. 1v. de Delbora, & IV. Reg. xxii. de Oida prophetissa uxore Sellum, & Act. xxi. de quatuor filiabus Philippi: Apostolus etiam dicit I. ad Corinth. xi. 5. *Omnes mulier orans, aut prophetans &c.* Ergo videtur quod multo magis gratia sermonis competat mulieri.

3. Præterea. I. Petri 1v. 10. dicitur: *Unusquisque sicut accepit gratiam, in alterutrum illam administrantes.* Sed quædam mulieres accipiunt gratiam sapientiæ, & scientiæ, quam non possunt aliis administrare nisi per gratiam sermonis. Ergo gratia sermonis competit mulieribus.

Sed contra est quod Apostolus dicit I. ad Corinth. xiv. 34. *Mulieres in Ecclesiis taceant: & I. ad Tim. 11. 12. Docere mulieri non permittitur.* Hoc autem præcipue pertinet ad gratiam sermonis. Ergo gratia sermonis non competit mulieribus.

Respondeo dicendum, quod sermone potest aliquis uti dupliciter. Uno modo privatim ad unum, vel paucos, familiariter colloquendo: & quantum ad hoc gratia sermonis potest competere mulieribus.

Alio modo publice alloquendo totam Ecclesiam: & hoc mulieri non conceditur. Primo quidem & principaliter propter conditionem seminei sexus, qui debet esse subditus viro, ut patet Gen. 111. Docere autem, & persuadere publice in Ecclesia non pertinet ad subdi-

tos, sed ad Prælatos; magis tamen viri subditi ex commitione possunt exequi, quia non habent huiusmodi subiectionem ex naturali sexu, sicut mulieres, sed ex aliquo accidentaliter superveniente. Secundo ne animi hominum alliciantur ad libidinem: dicitur enim Eccli. 1x. 11. *Colloquium illius quasi ignis exardescit.* Tertio quia communiter mulieres non sunt in sapientia perfectæ, ut eis possit convenire publica doctrina committi.

Ad primum ergo dicendum, quod illa auctoritas loquitur de doctrina privata, qua mater filium erudit.

Ad secundum dicendum, quod gratia prophetiæ attenditur secundum mentem illuminatam a Deo: ex qua parte non est in hominibus sexuum differentia, secundum illud ad Coloss. 111. 10. *Inducentes novum hominem, qui renovatur secundum imaginem eius, qui creavit eum, ubi non est masculus, neque femina.* Sed gratia sermonis pertinet ad instructionem hominum, inter quos differentia sexuum invenitur. Unde non est similis ratio de utroque.

Ad tertium dicendum, quod gratiam divinitus acceptam diversimode aliqui administrant, secundum diversitatem conditionis ipsorum. Unde mulieres, si gratiam sapientiæ, aut scientiæ habent, possunt eam administrare secundum privatam doctrinam, non autem secundum publicam.

## QUAESTIO CLXXVIII.

*De gratia miraculorum, in duos articulos divisa.*

**D**Einde considerandum est de gratia miraculorum: & circa hoc queruntur duo.

Primo, utrum sit aliqua gratia gratis data facienda miracula.

Secundo, quibus conveniat.

## ARTICULUS I. 844

*Utrum sit aliqua gratia gratis data ad miracula facienda.*

III. contra cap. cliv. & pos. quæst. vi. art. 4 cor. fin. Et art. 9. ad 1. & opusc. 111. cap. cxxii.

**A**D primum sic proceditur. Videtur quod nulla gratia gratis data ordinatur ad miracula facienda. Omnis enim

nim gratia ponit aliquid in eo cui datur. Sed operatio miraculorum non ponit aliquid in anima hominis cui datur: quia etiam ad tactum corporis mortui miracula fiunt, sicut legitur IV. Reg. xiii. 21. quod quidam proiecerunt cadaver in sepulchro Helisei, quod cum tetigisset ossa Helisei, revixit homo, & stetit super pedes suos. Ergo operatio miraculorum non pertinet ad gratiam gratis datam.

2. Præterea. Gratia gratis datae sunt a Spiritu sancto, secundum illud I. ad Corinth. xii. 4. *Divisiones gratiarum sunt, idem autem Spiritus*. Sed operatio miraculorum fit etiam a spiritu immundo, secundum illud Matth. xxiv. 24. *Surgent pseudochristi, & pseudoprophetae, & dabunt signa, & prodigia magna*. Ergo videtur quod operatio miraculorum non pertineat ad gratiam gratis datam.

3. Præterea. Miracula distinguuntur per signa, & prodigia, sive portenta, & per virtutes. Inconvenienter ergo ponitur operatio virtutum potius gratia gratis data, quam operatio prodigiorum, sive signorum.

4. Præterea. Miraculosa reparatio fanitatis per divinam virtutem fit. Ergo non debet distinguere gratia sanitatum ab operatione virtutum.

5. Præterea. Operatio miraculorum consequitur fidem vel facientis, secundum illud I. ad Cor. xiii. 2. *Si habuerit omnem fidem, ita ut montes transferat*; sive etiam aliorum, propter quos miracula fiunt: unde dicitur Matth. xiii. 58. *Et non fecit ibi virtutes multas propter incredulitatem illorum*. Si ergo fides ponitur gratia gratis data, superfluum est præter hoc ponere aliam gratiam gratis datam operationem signorum.

Sed contra est quod Apostolus I. ad Corinth. xii. 9. inter alias gratias gratis datas dicit: *Aliis datur gratia sanitatum, aliis operatio virtutum*.

Respondendo dicendum, quod, sicut supra dictum est (quaest. præc. art. 1.) Spiritus sanctus sufficienter providet Ecclesiae in his quæ sunt utilia ad salutem, ad quod ordinantur gratia gratis datae. Sicut autem oportet quod notitia quam quis divinitus accipit, in notitiam aliorum deducatur per donum linguarum, & per gratiam sermonis; ita necesse est quod sermo prolatus confirmetur, ad hoc quod credibilis fiat. Hoc autem fit per operationem miraculorum, secundum

illud Marc. ult. 20. *Et sermonem confirmante sequentibus signis*. Et hoc rationabiliter. Naturale enim est homini ut veritatem intelligibilem per sensibiles effectus deprehendat. Unde sicut ductu naturalis rationis homo pervenire potest ad aliquam Dei notitiam per effectus naturales; ita per aliquos supernaturales effectus, qui miracula dicuntur, in aliquam supernaturalem cognitionem credendorum homo inducitur. Et ideo operatio miraculorum pertinet ad gratiam gratis datam.

Ad primum ergo dicendum, quod sicut prophetia se extendit ad omnia quæ supernaturaliter cognosci possunt; ita operatio virtutum se extendit ad omnia quæ supernaturaliter fieri possunt: quorum quidem causa est divina omnipotentia, quæ nulli creature communicari potest. Et ideo impossibile est quod principium operandi miracula sit aliqua qualitas habitualiter manens in anima. Sed tamen hoc potest contingere quod sicut mens Prophetæ movetur ex inspiratione divina ad aliquid supernaturaliter cognoscendum; ita etiam mens miracula facientis moveatur ad faciendum aliquid ad quod sequitur effectus miraculi, quod Deus sua virtute facit. Quod quandoque quidem fit præcedente oratione; sicut cum Petrus Tabitam mortuam suscitavit, ut habetur Act. ix. Quandoque etiam non præcedente manitella oratione, sed Deo ad nutum hominis operante; sicut Petrus Ananiam, & Sapphiram mentientes morti increpando tradidit, ut dicitur Act. v. Unde Gregorius dicit in II. Dialogorum (cap. xxx. a med.) quod *Sancti aliquando ex potestate miracula exhibent, aliquando ex postulati one*. Utrolibet tamen modo Deus principaliter operatur, qui utitur instrumentaliter vel interiori motu hominis, vel eius locutione, vel etiam aliquo exteriori actu, seu etiam aliquo contactu corporali corporis etiam mortui. Unde Iosue x. 12. cum Iosue dixisset quasi ex potestate, *Sol contra Gabaon ne movearis*, subditur postea: *Non fuit ante, & postea tam longa dies, obediens Deo voci hominis*.

Ad secundum dicendum, quod ibi loquitur Dominus de miraculis quæ fienda sunt tempore Antichristi: de quibus Apostolus dicit II. ad Thes. ii. 9. quod *adventus Antichristi erit secundum operationem Satanae in omni virtute, & signis, & prodigiis mendacibus*; & sicut Augustinus.

gustinus dicit XX. de civit. Dei ( cap. xix. declinando ad finem ) *ambiguum esse solet , utrum propterea dicta sint signa , & prodigia mendacia , quoniam mortales sensus per phantasmata decepturi essent , ut quod non facit , facere videantur ; an quia illa , etiam si erunt vera prodigia , ad mendacium pertrahant credituros .* Vera autem dicuntur , quia ipsæ res veræ erunt , sicut magi Pharaonis fecerunt veras ranas , & veros serpentes ; non tamen habebunt veram rationem miraculi , quia sicut virtute naturalium causarum , sicut in prima parte ( quest. cxiv. art. 4. ) dictum est . Sed operatio miraculorum , quæ attribuitur gratiæ gratis datæ , sit virtute divina ad hominum utilitatem .

Ad tertium dicendum , quod in miraculis duo possunt attendi . Unum quidem est id quod fit . quod quidem est aliquid excedens facilitatem naturæ : & secundum hoc miracula dicuntur *virtutes* . Aliud est id propter quod miracula fiunt , scilicet ad manifestandum aliquid supernaturale : & secundum hoc communiter dicuntur *signa* ; propter excellentiam autem dicuntur *portenta* , vel *prodigia* , quasi procul aliquid ostendentia .

Ad quartum dicendum , quod gratia sanitatum commemoratur seorsum , quia per eam confertur homini aliquid beneficium , scilicet corporalis sanitatis , præter beneficium commune quod exhibetur in omnibus miraculis , ut scilicet homines adducantur in Dei notitiam .

Ad quintum dicendum , quod operatio miraculorum attribuitur fidei propter duo : primo quidem quia ordinatur ad fidei confirmationem ; secundo quia procedit ex Dei omnipotentia , cui fides ininitur . Et tamen sicut præter gratiam fidei necessaria est gratia sermonis ad fidei instructionem ; ita etiam necessaria est operatio miraculorum ad fidei confirmationem .

## ARTICULUS II. 845

*Utrum mali possint miracula facere .*

I. P. quest. cx. art. 4. ad 2. & III. P. quest. xliii. art. 1. & 4. corp. & pot. quest. vi. art. 5. ad 9. & art. 9. ad 7. & quol. 11. art. 6. ad 4.

**A**D secundum sic proceditur . Videtur quod mali non possint miracu-

la facere . Miracula enim impetrantur per orationem , sicut dictum est ( art. præc. ad 1. ) Sed oratio peccatoris non est exaudibilis , secundum illud Ioan. ix. 31. *Scimus , quia peccatores Deus non audit : & Proverb. xxviii. 9. dicitur : Qui declinat aures suas ne audiat legem , oratio eius erit execrabilis .* Ergo videtur quod mali miracula facere non possint .

2. Præterea . Miracula attribuantur fidei , secundum illud Matth. xvii. 19. *Si habueritis fidem , sicut granum sinapis , dicetis mori huic , Transi hinc , & transibit .* Fides autem sine operibus mortua est , ut dicitur Iacobi 11. 20. & sic non videtur quod habeat propriam operationem . Ergo videtur quod mali , qui non sunt bonorum operum operativi , miracula facere non possint .

3. Præterea . Miracula sunt quædam divina testimonia , secundum illud ad Hebr. 11. 4. *Constituente Deo signis , & portentis , & variis virtutibus : unde & in Ecclesia aliqui canonizantur per testimonia miraculorum .* Sed Deus non potest esse testis falsitatis . Ergo videtur quod mali homines non possint miracula facere .

4. Præterea . Boni sunt Deo coniunctiores quam mali . Sed non omnes boni faciunt miracula . Ergo multo minus mali faciunt .

Sed contra est quod dicit Apostolus I. ad Corinth. xiii. 2. *Si habuero omnem fidem , ita ut montes transferam , caritatem autem non habuero , nihil sum .* Sed quicumque non habet caritatem , est malus : quia hoc solum donum Spiritus sancti est quod dividit inter filios regni , & filios perditionis , ut dicit Augustinus XV. de Trinit. ( cap. xviii. in princ. ) Ergo videtur quod etiam mali possint miracula facere .

Respondeo dicendum , quod miraculorum aliqua quidem sunt non vera , sed phantastica facta , quibus scilicet ludificatur homo , ut videatur ei aliquid quod non est ; quædam vero sunt vera facta , sed non vere habent rationem miraculi , quæ sunt virtute aliquarum naturalium causarum : & hæc duo possunt fieri per dæmones , ut supra dictum est ( art. præc. ad 2. )

Sed vera miracula non possunt fieri nisi virtute divina : operatur enim ea Deus ad hominum utilitatem ; & hoc dupliciter : uno quidem modo ad veritatis prædicatæ confirmationem ; alio modo ad demonstrationem sanctitatis

alt-

alicuius, quam Deus hominibus vult proponere in exemplum virtutis. Primo autem modo miracula possunt fieri per quemcumque qui veram fidem prædicat, & nomen Christi invocat: quod etiam interdum per malos fit. Et secundum hunc modum etiam mali possunt miracula facere. Unde super illud Matth. VII. *Nonne in nomine tuo prophetavimus? &c.* dicit Hieronymus: „Prophetare, vel virtutes facere, & dæmonia eiicere, interdum non est eius meriti qui operatur; sed invocatione nominis Christi hoc agit, ut homines Deum honorent, ad cuius invocationem sunt tanta miracula.“

Secundo autem modo non sunt miracula nisi a Sanctis, ad quorum sanctitatem demonstrandam miracula sunt vel in vita eorum, vel etiam post mortem, sive per eos, sive per alios. Legitur enim Act. XIX. II. quod Deus faciebat virtutes per manus Pauli: & etiam desuper languidos deiecerant a corpore eius sudaria, & recedebant ab eis languores.

Et sic etiam nihil prohiberet, per aliquem peccatorem miracula fieri ad invocationem alicuius Sancti: quæ tamen miracula non dicitur facere ille, sed ille ad cuius sanctitatem demonstrandam hæc fierent.

Ad primum ergo dicendum, quod, sicut supra dictum est (quæst. lxxxiii. art. 16.) cum de oratione ageretur, oratio in impetrando non ininitur merito, sed divinæ misericordiæ, quæ etiam ad malos se extendit: & ideo etiam quandoque peccatorum oratio a Deo exauditur. Unde Augustinus dicit super Ioan. (tract. xlv. inter med. & fin.) quod illud verbum cæcus locutus est, quasi adhuc inmundus, idest nondum perfecte illuminatus, nam peccatores exaudit Deus. Quod autem dicitur, quod oratio non audientis legem est execrabilis, intelligendum est, quantum est ex merito peccatoris; sed interdum impetrat ex misericordia Dei, vel propter salutem eius qui orat, sicut auditus est Publicanus, ut dicitur Lucæ XVIII. vel etiam propter salutem aliorum, & gloriam Dei.

Ad secundum dicendum, quod fides sine operibus dicitur esse mortua quantum ad ipsum credentem, qui per eam non vivit vita gratiæ. Nihil autem prohibet quod res viva operetur per instru-

mentum mortuum, sicut homo operatur per baculum: & hoc modo Deus operatur per fidem hominis peccatoris instrumentaliter.

Ad tertium dicendum, quod miracula semper sunt vera testimonia eius ad quod inducuntur. Unde a malis, qui falsam doctrinam enuntiant, nunquam sunt vera miracula ad confirmationem suæ doctrinæ; quamvis quandoque fieri possint ad commendationem nominis Christi, quod invocant, & in virtute sacramentorum quæ exhibent. Ab his autem qui veram doctrinam enuntiant, sunt quandoque vera miracula ad confirmationem doctrinæ, non autem ad testimoniationem sanctitatis. Unde Augustinus dicit in Lib. lxxxiii. Qg. (quæst. lxxix. a med.) *Alii magi faciunt miracula, alii boni Christiani, alii mali. Magi per privatos contractus cum demonibus; boni Christiani per publicam iustitiam; mali Christiani per signa publicæ iustitiæ.*

Ad quartum dicendum, quod, sicut Augustinus dicit in Lib. lxxxiii. Qg. (loc. cit.) *admonet nos Dominus, ut intelligamus quædam miracula etiam sceleratos homines facere, qualia Sancti facere non possunt: (a) & sicut Augustinus ibidem dicit, ideo non omnibus Sanctis ista attribuantur, ne perniciosissimo errore decipiantur infirmi, æstimantes in talibus factis esse maiora dona quam in operibus iustitiæ, quibus vita æterna comparatur.*

### QUAESTIO CLXXIX.

*De divisione vitæ in activam, & contemplativam, in duos articulos divisa.*

Consequenter considerandum est de vita activa, & contemplativa: ubi quadruplex consideratio occurrit: quarum prima est de divisione vitæ per activam, & contemplativam; secunda de vita contemplativa; tertia de vita activa; quarta de comparatione vitæ activæ ad contemplativam.

Circa primum quaeruntur duo.

Primo, utrum vita convenienter dividatur per activam, & contemplativam.

Secundo, utrum hæc divisio sit sufficiens.

### A R.

(a) Ita edidit possim cum mss. Edit. Rom. aliique veteres. Ad quintum dicendum, quod, sicut ibidem Augustinus dicit &c. cum tamen nullum habeatur quinte lectæ argumentum.



## ARTICULUS I. 846

*Utrum vita convenienter dividatur per activam, & contemplativam.*

III. dist. xxxv. quæst. 1. art. 1. & I.  
Etb. lect. 5.

**A**D primum sic proceditur. Videtur quod vita non convenienter dividatur per activam, & contemplativam. Anima enim est principium vite per suam essentiam: dicit enim Philosophus in II. de Anima (tex. 37.) quod *vivere viventibus est esse*. Actionis autem, & contemplationis principium est anima per suas potentias. Ergo videtur quod vita non convenienter dividatur per activam, & contemplativam.

2. Præterea. Inconvenienter dividitur prius per differentias posterioris. Activum autem, & contemplativum, sive speculativum, & practicum, sunt differentie intellectus, ut patet in III. de Anima (tex. xlv. & xlix.) Vivere autem est prius quam intelligere: nam vivere inest viventibus primo secundum animam vegetabilem, ut patet per Philosophum in II. de Anima (tex. 34. & 39.) Ergo inconvenienter dividitur vita per activam, & contemplativam.

3. Præterea. Nomen vite importat motum, ut patet per Dionysium iv. cap. de div. Nom. (p. 1. lect. 7. & 8.) Sed contemplatio consistit magis in quiete, secundum illud Sap. viii. 16. *Intrans in domum meam conquiescam cum illa*. Ergo videtur quod vita non convenienter dividatur per activam, & contemplativam.

Sed contra est quod Gregorius super Ezech. (hom. xiv. parum ante med.) dicit: *Due sunt vite, in quibus nos Deus omnipotens per sacrum eloquium erudit, activa videlicet, & contemplativa*.

Respondeo dicendum, quod illa proprie dicuntur viventia quæ seipsis moventur, seu operantur. Illud autem maxime convenit alicui per seipsum, quod est proprium ei, & ad quod maxime inclinatur: & ideo unumquodque vivens ostenditur vivere ex operatione sibi maxime propria, ad quam maxime inclinatur; sicut plantarum vita dicitur in hoc consistere quod nutriuntur, (a) & generant; animalium vero in hoc quod sentiunt, & moventur; hominum vero

in hoc quod intelligunt, & secundum rationem agunt. Unde etiam in hominibus vita uniuscuiusque hominis videtur esse id in quo maxime delectatur, & cui maxime intendit; & in quo præcipue vult quilibet convivere amico, ut dicitur in IX. Ethic. (cap. iv. ix. & xii.)

Quia ergo quidam homines præcipue intendunt contemplationi veritatis, quidam vero intendunt principaliter exterioribus actionibus, inde est quod vita hominis convenienter dividitur per activam, & contemplativam.

Ad primum ergo dicendum, quod propria forma uniuscuiusque faciens ipsum esse in actu, est principium operationis propriæ ipsius; & ideo vivere dicitur esse viventium ex eo quod viventia per hoc quod habent esse per suam formam, tali modo operantur.

Ad secundum dicendum, quod vita universaliter sumpta non dividitur per activam, & contemplativam; sed vita hominis, qui speciem sortitur ex hoc quod habet intellectum: & ideo eadem est divisio intellectus, & vite humanæ.

Ad tertium dicendum, quod contemplatio habet quidem quietem ab exterioribus motibus; nihilominus tamen ipsum contemplari est quidam motus intellectus, prout quælibet operatio dicitur motus, secundum quod dicit Philosophus in III. de Anima (tex. 28.) quod sentire, & intelligere sunt motus quidam, prout motus dicitur actus perfecti. Et hoc modo Dionysius iv. cap. de div. Nom. (par. 1. lect. 7.) ponit tres motus animæ contemplantis, scilicet *rectum, circularem, & obliquum*.

## ARTICULUS II. 847

*Utrum vita sufficienter dividatur per activam, & contemplativam.*

Sup. art. 1. & loc. ibi not. & III. cont.  
cap. xcii.

**A**D secundum sic proceditur. Videtur quod vita non sufficienter dividatur per activam, & contemplativam. Philosophus enim in I. Ethic. (cap. v. a princ.) dicit, quod tres sunt vite maxime excellentes, scilicet, *voluptuosa, civilis, quæ videtur esse eadem activæ, & contemplativæ*. Insufficienter ergo videtur dividi vita per activam, & contemplativam.

2. Præ-

(a) a), & generantur.

2. Præterea: Augustinus XIX. de civ. Dei (cap. II. & XIX.) ponit tria vitæ genera; scilicet *otiosum*, quod pertinet ad contemplationem; *actuosum*, quod pertinet ad vitam activam; & addit tertium ex utroque compositum. Ergo videtur quod insufficienter dividatur vita per activam, & contemplativam.

3. Præterea. Vita hominis diversificatur, secundum quod homines diversis actionibus student. Sed plura quam duo sunt humanarum actionum studia. Ergo videtur quod vita debeat in plura membra dividi quam in activum, & contemplativum.

Sed contra est quod istæ duæ vitæ significantur per duas uxores Iacob; activa quidem per Liam, contemplativa vero per Rachel; & per duas mulieres quæ Dominum hospitio receperunt; contemplativa quidem per Mariam, activa vero per Martham, ut Gregorius dicit in VI. Moral. (cap. XVIII. & hom. XIV. in Ezech. ante med.) Non autem esset hæc congrua significatio, si essent plures quam duæ vitæ. Ergo sufficienter dividitur vita per activam, & contemplativam.

Respondendo dicendum, quod, sicut dictum est (art. præc. ad 2.) divisio ista datur de vita humana, quæ quidem attenditur secundum intellectum. Intellectus autem dividitur per activum, & contemplativum: quia finis intellectualis cognitionis vel est ipsa cognitio veritatis, quod pertinet ad intellectum contemplativum; vel est aliqua exterior actio, quod pertinet ad intellectum practicum, sive activum. Et ideo vita etiam sufficienter dividitur per activam, & contemplativam.

Ad primum ergo dicendum, quod vita voluptuosa ponit finem in delectatione corporali, quæ communis est nobis, & brutis. Unde, sicut Philosophus ibidem dicit, est vita bestialis. Propter quod non comprehenditur sub præfenti divisione, prout vita humana dividitur in activam, & contemplativam.

Ad secundum dicendum, quod media conficiuntur ex extremis, & ideo virtute continentur in eis, sicut tepidum in calido, & frigido, & pallidum in albo, & nigro. Et similiter sub activo, & contemplativo comprehenditur id quod est ex utroque compositum. Et tamen sicut in quolibet mixto prædominatur aliquod simplicium; ita etiam in medio generi vitæ superabundat quando-

que quidem contemplativum, quandoque vero activum.

Ad tertium dicendum, quod omnia studia humanarum actionum, si ordinentur ad necessitatem præsentis vitæ secundum rationem rectam, pertinent ad vitam activam, quæ per ordinatas actiones consulit necessitati vitæ præsentis; si autem deserviant concupiscentiæ cuiusque, pertinent ad vitam voluptuosam, quæ non continetur sub vita activa. Humana vero studia, quæ ordinantur ad considerationem veritatis, pertinent ad vitam contemplativam.

## QUAESTIO CLXXX.

*De vita contemplativa,  
in octo articulos divisa.*

**D**Einde considerandum est de vita contemplativa: & circa hoc quaeruntur octo.

Primo, utrum vita contemplativa pertineat tantum ad intellectum, an consistat etiam in affectu.

Secundo, utrum ad vitam contemplativam pertineant virtutes morales.

Tertio, utrum vita contemplativa consistat solum in uno actu, aut in pluribus.

Quarto, utrum ad vitam contemplativam pertineat consideratio cuiuscumque veritatis.

Quinto, utrum vita contemplativa hominis in hoc statu possit elevari usque ad Dei visionem.

Sexto de motibus contemplationis, quos Dionysius assignat IV. cap. de divinis Nominibus.

Septimo de delectatione contemplationis.

Octavo de duratione contemplationis.

## ARTICULUS I. 348

*Utrum vita contemplativa nihil habeat in affectu, sed totum in intellectu.*

*Inf. art. 2. ad 1. & art. 7. ad 2. & III. diff. xxxv. quæst. 1. art. 2. & ver. quæst. XII. art. 11. ad 1.*

**A**D primum sic proceditur. Videtur quod vita contemplativa nihil habeat in affectu, sed totum in intellectu. Dicit enim Philosophus in II. Metaph. (tex. 3.) quod finis contemplationis est veritas. Veritas autem pertinet ad intellectum totaliter. Ergo videtur quod vita

vita contemplativa totaliter in intellectu consistit.

2. Præterea. Gregorius dicit in VI. Moral. (cap. xviii. in princ. & hom. xiv. in Ezech. ante med.) quod *Rachel, quæ interpretatur visum principium, vitam contemplativam significat*. Sed visio principii pertinet proprie ad intellectum. Ergo vita contemplativa proprie ad intellectum pertinet.

3. Præterea. Gregorius dicit super Ezech. hom. xiv. ante med.) quod *ad vitam contemplativam pertinet ab exteriori actione quiescere*. Sed vis affectiva, sive appetitiva inclinat ad exteriores actiones. Ergo videtur quod vita contemplativa non pertineat aliquo modo ad vim appetitivam.

Sed contra est quod Gregorius ibidem ( & Lib. VI. Moral. cap. xviii. ) dicit, quod *contemplativa vita est caritatem Dei, & proximi tota mente retinere, & soli desiderio Conditoris inhaerere*. Sed desiderium, & amor ad vim affectivam, sive appetitivam pertinent, ut supra habitum est ( 1. 2. quæst. xxiii. art. 1. & 4. ). Ergo etiam vita contemplativa habet aliquid in vi affectiva, sive appetitiva.

Respondendo dicendum, quod, sicut dictum est ( quæst. præc. art. 1. ) vita contemplativa illorum esse dicitur qui principaliter intendunt contemplationi veritatis. Intentio autem est actus voluntatis, ut supra habitum est ( 1. 2. quæst. xii. art. 1. ) quia intentio est de fine, qui est voluntatis obiectum. Et ideo vita contemplativa quantum ad ipsam essentiam actionis pertinet ad intellectum; quantum autem ad id quod movet ad exercendam talem operationem, pertinet ad voluntatem, quæ movet omnes alias potencias, & etiam intellectum ad suum actum, ut supra dictum est ( 1. 2. quæst. ix. art. 1. )

Movet autem vis appetitiva ad aliquid inspicendum vel sensibilibiter, vel intelligibilibiter: quandoque quidem propter amorem rei visæ, quia, ut dicitur Math. vi. 21. *ubi est thesaurus tuus, ibi est & cor tuum*: quandoque autem propter amorem ipsius cognitionis, quam quis ex inspectione consequitur. Et propter hoc Gregorius ( hom. xiv. in Ezech. ante med. ) constituit vitam contemplativam in caritate Dei, in quantum scilicet aliquis ex dilectione Dei inardescit ad eius pulchritudinem conspiciendam. Et quia unusquisque delectatur, cum ade-

ptus fuerit id quod amat; ideo vita contemplativa terminatur ad delectationem, quæ est in affectu, ex quo etiam amor intenditur.

Ad primum ergo dicendum, quod ex hoc ipso quod veritas est finis contemplationis, habet rationem boni appetibilis, & amabilis, & delectantis: & secundum hoc pertinet ad vim appetitivam.

Ad secundum dicendum, quod ad ipsam visionem primi principii, scilicet Dei, incitat amor ipsius: unde Gregorius dicit super Ezechiel. ( loc. sup. cit. ) quod *vita contemplativa, calcatis curis omnibus, ad videndam faciem sui Creatoris inardescit*.

Ad tertium dicendum, quod vis appetitiva movet non solum membra corporalia ad exteriores actiones exercendas, sed etiam intellectum ad exercendam operationem contemplationis, ut dictum est ( in corp. art. )

## ARTICULUS II. 849

*Utrum virtutes morales pertineant ad vitam contemplativam.*

*Inf. quæst. clxxx. art. 1. ad 3. & 2. corp. & art. 4. ad 1. & quæst. clxxxii. art. 3. cor. & opusc. xvii. cap. vii. ad 7. & III. cons. cap. xxxvii. fin. & Phys. VII. lect. 6.*

**A**D secundum sic proceditur. Videtur quod virtutes morales pertineant ad vitam contemplativam. Dicit enim Gregorius super Ezech. ( hom. xiv. ante med. ) quod *contemplativa vita est caritatem Dei, & proximi tota mente retinere*. Sed omnes virtutes morales, de quarum actibus dantur præcepta legis, reducuntur ad dilectionem Dei, & proximi: quia plenitudo legis dilectio est, ut dicitur ad Rom. xiii. 10. Ergo videtur quod virtutes morales pertineant ad vitam contemplativam.

2. Præterea. Vita contemplativa præcipue ordinatur ad Dei contemplationem: dicit enim Gregorius super Ezech. ( loc. cit. ) quod *calcatis curis omnibus, ad videndam faciem sui Creatoris animus inardescit*. Sed ad hoc nullus potest pervenire nisi per munditiam, quam causat virtus moralis, dicitur enim Math. v. 8. *Beati mundi corde, quoniam ipsi Deum videbunt*: & ad Hebr. xii. 14. *Pacem sequimini cum omnibus, & sanctimoniam, sine qua nemo videbit Deum*. Er-

Ergo videtur quod virtutes morales pertineant ad vitam contemplativam.

3. Præterea. Gregorius dicit super Ezech. (loc. cit.) quod *contemplativa vita speciosa est in animo* : unde significatur per Rachel, de qua dicitur Gen. xxxix. quod *erat pulchra facie*. Sed pulchritudo animi attenditur secundum virtutes morales, & præcipue secundum temperantiam, ut Ambrosius dicit in I. de offic. (cap. xliii. xlv. & xlv.) Ergo videtur quod virtutes morales pertineant ad vitam contemplativam.

Sed contra est quod virtutes morales ordinantur ad exteriores actiones. Sed Gregorius dicit in VI. Moral. (cap. xviii. & loc. sup. cit.) quod *ad contemplativam vitam pertinet ab exteriori actione quiescere*. Ergo virtutes morales non pertinent ad vitam contemplativam.

Respondeo dicendum, quod ad vitam contemplativam potest aliquid pertinere dupliciter: uno modo essentialiter; alio modo dispositive. Essentialiter quidem virtutes morales non pertinent ad vitam contemplativam: quia finis contemplativæ vitæ est consideratio veritatis. *Ad virtutes autem morales scire quidem*, quod pertinet ad considerationem veritatis, *parvam possessionem habet*, ut Philosophus dicit in II. Ethic. (cap. ii. in princ. & Lib. X. cap. ult.) Unde & ipse in X. Ethic. (cap. vii. & viii.) virtutes morales dicit pertinere ad felicitatem activam, non autem ad contemplativam.

Dispositive autem virtutes morales pertinent ad vitam contemplativam. Impeditur enim actus contemplationis, in quo essentialiter consistit vita contemplativa, & per vehementiam passionum, per quam abstrahitur intentio animæ ab intelligibilibus ad sensibilia, & per tumultus exteriores. Virtutes autem morales impediunt vehementiam passionum, & sedant exteriorum occupationum tumultus. Et ideo virtutes morales dispositive ad vitam contemplativam pertinent.

Ad primum ergo dicendum, quod, sicut supra dictum est (art. præc.) vita contemplativa habet movivum ex parte affectus: & secundum hoc dilectio Dei, & proximi requiritur ad vitam contemplativam. Causæ autem moventes non inurant essentialiter rei, sed disponunt, & perficiunt rem. Unde non sequitur quod virtutes morales essentialiter pertineant ad vitam contemplativam.

Ad secundum dicendum, quod sanctimonia, id est munditia, causatur ex virtutibus quæ sunt circa passiones impediens puritatem rationis; pax autem causatur ex iustitia, quæ est circa operationes, secundum illud Isa. xxxii. 17. *Opus iustitiæ pax*; inquantum scilicet ille qui ab iniuriis aliorum abstinet, subtrahit litigiorum, & tumultuum occasiones. Et sic virtutes morales disponunt ad vitam contemplativam, inquantum causant pacem, & munditiam.

Ad tertium dicendum, quod pulchritudo, sicut supra dictum est (quæst. cxlv. art. 2.) consistit in quadam claritate, & debita proportionem. Utrunque autem horum radicaliter in ratione invenitur: ad quam pertinet & lumen manifestans, & proportionem debitam in aliis ordinare. Et ideo in vita contemplativa, quæ consistit, in actu rationis, per se & essentialiter invenitur pulchritudo; unde & Sap. viii. 2. de contemplatione sapientiæ dicitur: *Amator scientiarum formæ illius*. In virtutibus autem moralibus invenitur pulchritudo participative, inquantum scilicet participant ordinem rationis; & præcipue in temperantia, quæ reprimat concupiscentias maxime lumen rationis obscurantes. Et inde est quod virtus castitatis maxime reddit hominem aptum ad contemplationem, inquantum delectationes venere maxime depriment mentem ad sensibilia, ut Augustinus dicit in Lib. I. Soliloquiorum (cap. x. cir. med.)

### ARTICULUS III. 850

*Utrum ad vitam contemplativam pertineant diversi actus.*

III. dist. xxxv. quæst. 1. art. 2. & IV. dist. v. quæst. iv. art. 2. quæst. 1. ad 2.

Ad tertium sic proceditur. Videtur quod ad vitam contemplativam pertineant diversi actus. Richardus enim de Sancto Victore (Lib. I. de contempl. cap. iiii.) distinguit inter contemplationem, meditationem, & cogitationem. Sed omnia ista videntur ad vitam contemplativam pertinere. Ergo videtur quod vitæ contemplativæ sint diversi actus.

2. Præterea. Apostolus II. ad Corinth. iiii. 18. dicit: *Nos vero revelata facie gloriam Domini speculantes, transformamur in eandem claritatem*. Sed hoc pertinet

tinet ad vitam contemplativam. Ergo præter tria prædicta, etiam speculatio ad vitam contemplativam pertinet.

3. Præterea. Bernardus dicit in Lib. V. de consider. (cap. ult. a med) quod *prima, & maxima contemplatio est admiratio maiestatis*. Sed admiratio secundum Damascenum (Lib. II. orth. Fid. cap. xv.) ponitur species timoris. Ergo videtur quod plures actus ad vitam contemplativam requirantur.

4. Præterea. Ad vitam contemplativam pertinere dicuntur oratio, lectio, & meditatio. Pertinet etiam ad vitam contemplativam auditus: nam de Maria, per quam vita contemplativa significatur, dicitur Lucæ x. 39. quod *sedens secus pedes Domini audiebat verbum illius*. Ergo videtur quod plures actus ad vitam contemplativam requirantur.

Sed contra est quod vita hic dicitur operatio cui homo principaliter intendit. Ergo si plures sunt operationes vitæ contemplativæ, non erit una vita contemplativa, sed plures.

Respondeo dicendum, quod de vita contemplativa nunc loquimur, secundum quod ad hominem pertinet. Hæc autem differentia est inter hominem & Angelum, ut patet per Dionysium vii. cap. de div. Nom. (ante med. lect. 2.) quod Angelus simplici apprehensione veritatem intuetur, homo autem quodam processu ex multis pergit ad intuitum simplicis veritatis. Sic ergo contemplativa vita unum quidem actum habet in quo finaliter perficitur, scilicet contemplationem veritatis, a quo habet unitatem; habet autem multos actus, quibus pervenit ad hunc actum finalem: quorum quidam pertinent ad acceptionem principiorum, ex quibus procedit ad contemplationem veritatis; alii autem pertinent ad deductionem principiorum in veritatem eius cuius cognitio inquiritur; ultimus autem completivus actus est ipsa contemplatio veritatis.

Ad primum ergo dicendum, quod cognitatio secundum Richardum de Sancto Victore (loc. cit. in arg.) videtur pertinere ad multorum inspectionem, ex quibus aliquis colligere intendit unam simplicem veritatem. Unde sub cogitatione comprehendi possunt & perceptiones sensuum ad cognoscendum aliquos effectus, & imaginationes, & discursus rationis circa diversa signa, vel quæcumque perducunt in cognitionem veritatis intente: quamvis secundum Au-

gustinum XIV. de Trinit. (cap. vii.) cognitio dici possit omnis actualis operatio intellectus. Meditatio vero pertinet videtur ad processum rationis ex principis aliquibus pertinentibus ad veritatis alicuius contemplationem: & ad idem pertinet consideratio secundum Bernardum (loc. cit. in arg. 3. & Lib. II. cap. 12.) quamvis secundum Philosophum in III. de Anima omnis operatio intellectus consideratio dicatur. Sed contemplatio pertinet ad ipsum simplicem intuitum veritatis: unde idem Richardus dicit (Lib. I. de contempl. cap. 14. in princ.) quod *contemplatio est perspicax, & liber contuitus animi in res perspicendas; meditatio autem est intuitus animi in veritatis inquisitione occupatus: cogitatio autem est animi respectus ad evagationem pronus*.

Ad secundum dicendum, quod *speculatio*, ut Glossa Augustini (ord. Lib. XV. de Trinit. cap. viii. a princ.) dicit ibidem, *dicatur a speculo, non a specula*. Videre autem aliquid per speculum, est videre causam per effectum, in quo eius similitudo relucet: unde speculatio ad meditationem reduci videtur.

Ad tertium dicendum, quod admiratio est species timoris consequens apprehensionem alicuius rei excedentis nostram facultatem: unde admiratio est actus consequens contemplationem sublimis veritatis. Dicitur enim (art. 1. hu. quæst.) quod contemplatio in affectu terminatur.

Ad quartum dicendum, quod homo ad cognitionem veritatis pertingit dupliciter. Uno modo per ea quæ ab alio accipit: & sic quidem quantum ad ea quæ homo a Deo accipit, necessaria est oratio, secundum illud Sapient. vii. 7. *Invocavi, & venit in me spiritus sapientiæ*; quantum vero ad ea quæ accipit ab homine, necessarius est auditus, secundum quod accipit ex voce loquentis; & lectio, secundum quod accipit ex eo quod per scripturam est traditum. Alio modo necessarium est quod adhibeat proprium studium: & sic requiritur meditatio.

## ARTICULUS IV. 851

*Utrum vita contemplativa solum consistat in contemplatione Dei, an etiam in consideratione cuiuscunque veritatis.*

*Inf. art. 7. corp. & quæst. clxxx. art. 4. ad 2. & quæst. clxxx. art. 2. corp. & 111. dist. xxxv. quæst. 1. art. 2. quæst. 3.*

**A**d quartum sic proceditur. Videtur quod vita contemplativa non solum consistat in contemplatione Dei, sed etiam in consideratione cuiuscunque veritatis. Dicitur enim in Psal. cxxxviii. *14. Mirabilia opera tua, & anima mea cognoscit nimis.* Sed cognitio divinorum operum fit per aliquam contemplationem veritatis. Ergo videtur quod ad vitam contemplativam pertineat non solum divinam veritatem, sed etiam quamlibet aliam contemplari.

2. Præterea. Bernardus in Lib. V. de considerat. (cap. ult. a med.) dicit, quod *prima contemplatio est admiratio maiestatis; secunda est iudiciorum Dei; tertia est beneficiorum ipsius; quarta est promissionum.* Sed inter hæc quatuor solum primum pertinet ad divinam veritatem, alia vero tria pertinent ad effectus ipsius. Ergo vita contemplativa non solum consistit in consideratione divinæ veritatis, sed etiam in consideratione veritatis circa divinos effectus.

3. Præterea. Richardus de Sancto Viatore (Lib. I. de contempl. cap. vi.) distinguit sex species contemplationum: quarum prima est secundum solam imaginationem, dum attendimus res corporales: secunda autem est in imaginatione secundum rationem, prout scilicet sensibilem ordinem, & dispositionem consideramus: tertia est in ratione secundum imaginationem, quando scilicet per inspectionem rerum visibilibus ad invisibilia sublevamur: quarta autem est in ratione secundum rationem, quando scilicet animus intendit invisibilibus, quæ imaginatio non novit: quinta autem est supra rationem, quando ex divina revelatione cognoscimus ea quæ humana ratione comprehendi non possunt: sexta autem est supra rationem, & præter rationem, quando scilicet ex divina illuminatione cognoscimus ea quæ humanæ rationi repugnare videntur, sicut ea quæ dicuntur de mysterio Trinitatis. Sed so-

*5. Tb. Oper. Tom. XXIII.*

lum ultimum videtur ad divinam veritatem pertinere. Ergo contemplatio veritatis non solum respicit divinam veritatem, sed etiam eam quæ in creaturis consideratur.

4. Præterea. In vita contemplativa quaeritur contemplatio veritatis, inquantum est perfectio hominis. Sed quilibet veritas est perfectio humani intellectus. Ergo in qualibet contemplatione veritatis consistit vita contemplativa.

Sed contra est quod Gregorius dicit in VI. Moral. (cap. xviii. ante med.) quod *in contemplatione principium, quod est Deus, quaeritur.*

Respondeo dicendum, quod, sicut iam dictum est (art. 2. huius quæst.) ad vitam contemplativam pertinet aliquid dupliciter: uno modo principaliter; alio modo secundario, vel dispositive. Principaliter quidem ad vitam contemplativam pertinet contemplatio divinæ veritatis, quia huiusmodi contemplatio est finis totius humanæ vitæ. Unde Augustinus dicit in I. de Trinit. (cap. viii. in med.) quod *contemplatio Dei promittitur nobis ut actionum omnium finis, atque eterna perfectio gaudiorum*: quæ quidem in futura vita erit perfecta, quando videbimus Deum facie ad faciem: unde & perfecte beatos faciet. Nunc autem contemplatio divinæ veritatis competit nobis imperfecte, videlicet per speculum, & in enigmate: unde per eam fit nobis quedam inchoatio beatitudinis, quæ hic incipit, ut in futuro continetur. Unde & Philosophus in X. Ethic. (cap. vii. & viii.) in contemplatione optimi intelligibilis ponit ultimam felicitatem hominis.

Sed quia per divinos effectus in Dei contemplationem manuducimur, secundum illud ad Rom. 1. 20. *Invisibilia Dei per ea quæ facta sunt, intellecta conspiciuntur*, inde est quod etiam contemplatio divinorum effectuum secundario ad vitam contemplativam pertinet, prout scilicet ex hoc manuducitur homo in Dei cognitionem. Unde Augustinus dicit in Libro de vera religione (cap. xxix. parum a princ.) quod *in creaturarum consideratione non vana, & peritura curiositas est exercenda; sed gradus ad immortalia, & semper manentia sciendus.*

Sic ergo ex præmissis (art. 3. 2. & 3. præcedentib.) patet quod ordine quodam quatuor ad vitam contemplativam pertinent: primo quidem virtutes morales;

Y

cccln-

secundo autem alii actus præter contemplationem; tertio vero contemplatio divinorum effectuum; quartum vero completivum est ipsa contemplatio divinæ veritatis.

Ad primum ergo dicendum, quod David cognitionem operum Dei quærebat, ut ex hoc manuduceretur in Deum: unde alibi dicit (Psal. cxlii. 5.) *Meditatus sum in omnibus operibus tuis, & in factis manuum tuarum meditabar: expandi manus meas ad te.*

Ad secundum dicendum, quod ex consideratione divinorum iudiciorum manuducitur homo in contemplationem divinæ iustitiæ; ex consideratione autem divinorum beneficiorum, & promissorum manuducitur homo in cognitionem divinæ misericordiæ, seu bonitatis, quasi per effectus exhibitos, vel exhibendos.

Ad tertium dicendum, quod per illa sex designantur gradus quibus per creaturas in Dei contemplationem ascenditur. Nam in primo gradu ponitur perceptio ipsorum sensibilibus: in secundo vero gradu ponitur progressus a sensibilibus ad intelligibilia: in tertio vero gradu ponitur diiudicatio sensibilibus secundum intelligibilia: in quarto vero gradu ponitur absoluta consideratio intelligibilium, in quæ per sensibilia pervenitur: in quinto vero gradu ponitur contemplatio intelligibilium, quæ per sensibilia inveniri non possunt, sed per rationem capi possunt: in sexto gradu ponitur consideratio intelligibilium, quæ ratio nec invenire, nec capere potest; quæ scilicet pertinent ad sublimem contemplationem divinæ veritatis, in qua finaliter contemplatio perficitur.

Ad quartum dicendum, quod ultima perfectio humani intellectus est veritas divina; aliæ autem veritates perducunt intellectum in ordine ad veritatem divinam.

## ARTICULUS V. 339

*Utrum vita contemplativa secundum statum huius vitæ possit pertingere ad visionem divinæ essentiae.*

I. P. quæst. xii. art. 11. & 1. 2. quæst. xciii. art. 2. & III. dist. xxxv. quæst. 11. art. 2. & IV. dist. xlix. quæst. 11. art. 7. & III. con. cap. xlvii. & ver. quæst. x. art. 11. & quod. 1. art. 1.

**A**d quintum sic proceditur. Videtur statum huius vitæ possit pertingere ad visionem divinæ essentiae. Quia, ut habetur Genesis xxxii. 30. Iacob dixit: *Vidi Deum facie ad faciem, & salva facta est anima mea.* Sed visio faciei Dei est visio divinæ essentiae. Ergo videtur quod aliquis per contemplationem in præsentī vitæ possit se extendere ad videndum Deum per essentiam.

2. Præterea. Gregorius dicit in VI. Moral. (cap. xvi. versis fin.) *quod viri contemplativi ad semetipsos introversi redeunt, in eo quod spiritualia rimantur, & nequaquam secum rerum corporalium umbras trahunt, vel fortasse tractas manu discretionis abigunt; sed incircumscriptorum lumen videre cupientes, cunctas circumscriptionis suæ imagines depriment, & in eo quod super se contingere appetunt, vincunt quod sunt.* Sed homo non impeditur a visione divinæ essentiae, quæ est lumen incircumscriptum, nisi per hoc quod necesse habet intendere corporalibus phantasmatis. Ergo videtur quod contemplatio præsentis vitæ potest se extendere ad videndum incircumscriptum lumen per essentiam.

3. Præterea. Gregorius in II. Dialog. (cap. xxxv. a med.) dicit: *Anima videnti Creatorem angustia est omnis creatura. Per ergo Dei, scilicet beatus Benedictus, qui in turri globum igneum, Angelos quoque ad caelum redeuntis videbat, hoc proculdubio cernere nonnisi Dei lumine poterat.* Sed beatus Benedictus adhuc in præsentī vitæ vivebat. Ergo contemplatio præsentis vitæ potest se extendere ad videndam Dei essentiam.

Sed contra est quod Gregorius dicit super Ezech. (hom. xiv. inter med. & fin.) *Quamdiu in hac mortali carne vivitur, nullus ita in contemplationis virtute proficit, ut in ipso incircumscripti luminis radio mentis oculos infingat.*

Respondeo dicendum, quod, sicut Au-

gu-

gustinus dicit XII. super Genesim ad lit. (cap. xxvii. cir. h.) *nemo videns Deum vivit ista vita qua mortaliter vivit in istis sensibus corporis; sed nisi ab hac vita quique quodammodo moriatur, sive omnino exiens de corpore, sive alienatus a carnalibus sensibus, in illam non subvehitur visionem: quæ supra diligentius pertractata sunt (quæst. clxxv. art. 4. & 5.) ubi dictum est de raptu: & in primo, ubi actum est de Dei visione (quæst. xii. art. 11.)*

Sic ergo dicendum est, quod in hac vita potest esse aliquis dupliciter. Uno modo secundum actum, in quantum scilicet actualiter utitur sensibus corporis: & sic nullo modo contemplatio præsentis vitæ potest pertinere ad videndum Dei essentiam.

Alio modo potest esse aliquis in hac vita potentialiter, & non secundum actum, in quantum scilicet anima eius est corpori mortali coniuncta ut forma; ita tamen ut non utatur corporis sensibus, aut etiam imaginatione, sicut accidit in raptu: & sic potest contemplatio huius vitæ pertinere ad visionem divinæ essentiae. Unde supremus gradus contemplationis præsentis vitæ est, quem habuit Paulus in raptu, secundum quem fuit medio modo se habens inter statum præsentis vitæ, & futuræ.

Ad primum ergo dicendum, quod, sicut Dionysius in epistola ad Calum monachum (quæ est i. cir. med.) dicit, *si aliquis videns Deum, intellexit quod vidit, non ipsum vidit, sed aliquid eorum quæ sunt eius.* Et Gregorius dicit super Ezech. (hom. xiv. inter med. & finem) quod *nequaquam omnipotens Deus iam in sua claritate conspicitur; sed quiddam sub illa speculatur anima, unde resota proficiat, & post ad visionis eius gloriam pertingat.* Per hoc ergo quod Iacob dixit, *Vidi Deum facie ad faciem*, non est intelligendum quod Dei essentiam viderit, sed quod formam, scilicet imaginariam, vidit, in qua Deus locutus est ei: vel quia *per faciem quemlibet cognoscimus cognitionem Dei faciem eius vocavit*, sicut Glossa Gregorii (ord. Lib. XXIV. Moral. cap. v. a med.) ibidem dicit.

Ad secundum dicendum, quod contemplatio humana secundum statum præsentis vitæ non potest esse absque phantasmatibus: quia connaturale est homini ut species intelligibiles in phantasmatibus videat, sicut Philosophus dicit in

III. de Anima (tex. 30.) Sed tamen intellectualis cognitio non consistit in ipsis phantasmatibus, sed in eis contemplatur puritatem intelligibilis veritatis: & hoc non solum in cognitione naturali, sed etiam in eis quæ per revelationem cognoscimus. Dicit enim Dionysius ii. cap. cælest. Hierarch. (implic. & cap. i. a med.) quod *Angelorum hierarchias manifestat nobis divina claritas in quibusdam symbolis figuratis, ex cuius virtute resistitur in simplicem radium, idest in simplicem cognitionem intelligibilis veritatis.* Et sic intelligendum est quod Gregorius dicit, quod *contemplantis corporum rerum umbras non secum trahunt*, quia videlicet in eis non sistit eorum contemplatio, sed potius in consideratione intelligibilis veritatis.

Ad tertium dicendum, quod ex verbis illis Gregorii non datur intelligi quod beatus Benedictus Deum in illa visione per essentiam viderit; sed vult ostendere quod quia *videnti Creatorum angustia est omnis creatura*, consequens est quod per illustrationem divini luminis de facili possint quæcumque videri. Unde subdit: *Quamlibet etenim parum de luce Creatoris aspexerit, breve ei fit omne quod creatum est.*

## ARTICULUS VI. 833

*Utrum operatio contemplationis convenienter distinguatur per tres motus, circulares, rectum, & obliquum.*

*Sup. quæst. clxxix. art. 1. ad 3. & ver. quæst. viii. art. 15. ad 3. & quæst. x. art. 8. ad 10. & op. xx. Lib. III. cap. 3. & 3.*

**A**D sextum sic proceditur. Videtur quod inconvenienter operatio contemplationis distinguatur per tres motus, circulares, rectum, & obliquum iv. cap. de div. Nom. (par. i. lect. 7.) Contemplatio enim tantumque quietem pertinet, secundum illud Sap. viii. 16. *Intrans in domum meam conquiescam cum illa.* Sed motus quieti opponitur Non ergo operationes contemplativæ vitæ per motus designari debent.

2. Præterea. Actio contemplativæ vitæ ad intellectum pertinet, secundum quem homo cum Angelis convenit. Sed in Angelis aliter assignat Dionysius hos motus quam in anima: dicit enim, (loc. cit.) motum *circularem* Angeli esse *se-*



eundem illuminationes pulchri, & boni. Motum autem circularem animæ secundum plura determinat: quorum primum est introitus animæ ab exterioribus ad seipsam: secundum est quedam convolutio virtutum ipsius, per quam anima liberatur ab errore, & ab exteriori occupatione: tertium autem est unio ad ea quæ supra se sunt. Similiter etiam differenter describitur motum rectum utriusque. Nam rectum motum Angeli dicitur esse, secundum quod procedit ad subiectorum providentiam: motum autem rectum animæ ponit in duobus: primo quidem in hoc quod progreditur ad ea quæ sunt circa ipsum; secundo autem in hoc quod ab exterioribus ad simplices contemplationes elevatur. Sed etiam motum obliquum diversimode in utrisque determinat. Nam obliquum motum in Angelis assignat ex hoc quod providendo minus habentibus manent in identitate circa Deum: obliquum autem motum animæ assignat ex eo quod anima illuminatur divinis cognitionibus rationaliter, & diffuse. Non ergo videntur convenienter assignari operationes contemplationis per modos prædictos.

3. Præterea. Richardus de Sancto Victore in Lib. I. de contempl. (cap. v.) ponit multas alias differentias motuum, ad similitudinem volatiliū cæli: quorum quedam nunc ad altiora se attollunt, nunc autem in inferiora demerguntur; & hoc sæpius repetere videntur: alia vero dextrorsum, vel sinistrorsum divertunt multoties: quedam vero moventur in anteriorem, vel posteriorem frequentem: alia vero quasi in gyrum vertuntur secundum latiores, vel contrarios circuitus: quedam vero quasi immobiliter suspensa in uno loco manent. Ergo videtur quod non sint solum tres motus contemplationis.

In contrarium est auctoritas Dionysii (cit. in arg. 1.)

Respondetur dicendum, quod, sicut dictum est supra (quest. præc. art. 1. ad 3.) operatio intellectus, in qua contemplatio essentialiter consistit, motus dicitur, secundum quod motus est actus perfecti, ut Philosophus dicit in III. de Anima (tex. 28.) Quia vero per sensibilia in cognitionem intelligibilem devenimus, operationes autem sensibiles sine motu non fiunt; inde est quod etiam operationes intelligibiles quali motus quidam describuntur, & secundum similitudinem diversorum motuum earum differentia assignatur. In motibus autem

corporalibus perfectiores, & primi sunt locales, ut probatur in VIII. Phys. (tex. 55. & 57.) Et ideo sub eorum similitudine potissimæ operationes intelligibiles describuntur. Quorum quidem sunt tres differentie: nam quidam est circularis, secundum quem aliquid movetur uniformiter circa idem centrum; alius autem est rectus, secundum quem aliquid procedit ab uno in aliud; tertius autem est obliquus, quasi compositus ex utroque. Et ideo in operationibus intelligibilibus id quod simpliciter habet uniformitatem, attribuitur motui circulari; operatio autem intelligibilis, secundum quam procedit de uno in aliud, attribuitur motui recto; operatio autem intelligibilis habens aliquid uniformitatis simul cum processu ad diversa, attribuitur motui obliquo.

Ad primum ergo dicendum, quod motus corporales exteriores opponuntur quieti contemplationis, quæ intelligitur esse ab exterioribus occupationibus; sed motus intelligibilium operationum ad ipsam quietem contemplationis pertinent.

Ad secundum dicendum, quod homo convenit in intellectu cum Angelis in genere; sed vis intellectiva est multo altior in Angelo quam in homine: & ideo alio modo oportet hos motus in hominibus, & in Angelis assignare, secundum quod diversimode se habent ad uniformitatem. Intellectus enim Angeli habet cognitionem uniformem secundum duo. Primo quidem quia non acquirit intelligibilem veritatem ex varietate rerum compositarum: secundo quia non intelligit veritatem intelligibilem discursive, sed simplici intuitu. Intellectus vero animæ a sensibilibus rebus accipit intelligibilem veritatem, & cum quodam discursu rationis ipsius eam intelligit. Et ideo Dionysius motum circularem in Angelis assignat, inquantum uniformiter, & indefinenter absque principio, & fine intuentur Deum; sicut motus circularis carens principio, & fine, uniformiter est circa idem centrum. In anima vero, antequam ad istam uniformitatem perveniat, exigitur quod duplex eius difformitas amoveatur. Primo quidem illa quæ est ex diversitate exteriorum rerum, prout scilicet relinquitur exteriora: & hoc est quod primo ponit in motu circulari animæ introitus ipsius ab exterioribus ad seipsam. Secundo autem oportet quod removeatur secunda difformitas, quæ est per discursum rationis.

tionis : & hoc idem contingit, secundum quod omnes operationes animæ reducuntur ad simplicem contemplationem intelligibilis veritatis : & hoc est quod secundo dicit, *quod necessaria est uniformis convolutio intellectualium virtutum ipsius*, ut scilicet cessante discursu, figuratur eius intuitus in contemplatione unius simplicis veritatis. Et in hac operatione animæ non est error ; sicut patet quod circa intellectum primorum principiorum non erratur, quæ simplici intuitu cognoscimus. Et tunc, istis duobus præmissis, tertio ponitur uniformitas conformis Angelis, secundum quod prætermisiss omnibus, in sola Dei contemplatione persistit : & hoc est quod dicit : *Deinde sic uniformis facta unitate*, idest conformiter, unitis virtutibus, ad pulchrum, & bonum manducitur. Motus autem rectus in Angelis accipi non potest secundum id quod in considerando procedat ab uno in aliud, sed solum secundum ordinem suæ providentiæ, secundum scilicet quod Angelus superior inferiores illuminat per medios : & hoc est quod dicit, quod in directum movetur Angeli, quando procedunt ad subiectorum providentiam recta omnia transiunt, idest secundum ea quæ secundum rectum ordinem disponuntur. Sed rectum motum ponit in anima secundum hoc quod ab exterioribus sensibilibus procedit ad intelligibilem cognitionem. Oblivum autem motum ponit in Angelo compositum ex recto, & circulari, in quantum secundum contemplationem Dei inferioribus providet ; in anima autem ponit motum obliquum similiter ex recto, & circulari compositum, prout scilicet illuminationibus divinis ratiocinando utitur.

Ad tertium dicendum, quod illæ diversitates motuum quæ accipiuntur secundum differentiam eius quod est sursum, & deorsum, dextrorsum, & sinistrorsum, ante, & retro, & secundum diversos circuitus, omnes continentur sub motu recto, vel obliquo : nam per omnes designatur discursus rationis. Quod quidem si sit a genere ad speciem, vel a toto ad partem, erit, ut ipse exponit, secundum sursum, & deorsum ; si vero sit ab uno oppositorum in aliud, erit secundum dextrorsum, & sinistrorsum ; si vero sit a causis in effectus, erit ante, & retro ; si vero sit secundum accidentia, quæ circumstant rem propinquam, vel remotam, erit circuitus. Discursus autem

S. Tb. Oper. Tom. XXIII.

rationis, quando est a sensibilibus ad intelligibilia, secundum ordinem naturalis rationis, pertinet ad motum rectum ; quando autem est secundum illuminationes divinas, pertinet ad motum obliquum, ut ex dictis patet (in solut. præc.) Sola autem immobilitas, quam ponit, pertinet ad motum circularem. Unde patet quod Dionysius multo sufficientius, & subtilius motum contemplationis describit.

## ARTICULUS VII. 354

*Utrum contemplatio delectationem habeat.*

1. 2. quæst. III. art. 5. co. & IV. diff. xv. quæst. IV. art. 2. quæst. 2. ad 1.

**A**D septimum sic proceditur. Videtur quod contemplatio delectationem non habeat. Delectatio enim ad vim appetitivam pertinet. Sed contemplatio principaliter consistit in intellectu. Ergo videtur quod delectatio non pertineat ad contemplationem.

2. Præterea. Omnis contentio, & omne certamen impedit delectationem. Sed in contemplatione est contentio, & certamen : dicit enim Gregorius super Ezech. (hom. XIV. inter med. & fin.) quod anima, cum contemplari Deum nititur, velut in quodam certamine posita, modo quasi exuperat, quia intelligendo, & sentiendo de incircumscripto lumine aliquid degustat ; modo succumbit, quia degustando iterum despicit. Ergo vita contemplativa non habet delectationem.

3. Præterea. Delectatio sequitur operationem perfectam, ut dicitur in X. Ethicor. (cap. IV.) Sed contemplatio vitæ est imperfecta, secundum illud I. ad Corinth. XIII. 12. *Videmus nunc per speculum in enigmate*. Ergo videtur quod vita contemplativa delectationem non habeat.

4. Præterea. Læsiō corporalis delectationem impedit. Sed contemplatio inducit læsionem corporalem : unde Genes. XXXII. dicitur, quod Iacob postquam dixerat, *Vidi Dominum facie ad faciem*, claudicabat pede, eo quod tetigerit nervum femoris eius, & obstupuerit. Ergo videtur quod in vita contemplativa non sit delectatio.

Sed contra est quod de contemplatione sapientiæ dicitur Sap. VIII. 16. *Non habet amaritudinem conversatio illius, nec tedium convicius eius, sed letitiam ;*

Y 3

Q

*Et gaudium: & Gregorius dicit super Ezech. (loc. sup. cit.) quod contemplativa vita amabilis valde dulcedo est.*

Respondendo dicendum, quod aliqua contemplatio potest esse delectabilis dupliciter. Uno modo ratione ipsius operationis: quia unicuique delectabilis est operatio sibi conveniens secundum propriam naturam, vel habitum. Contemplatio autem veritatis competit homini secundum suam naturam, prout est animal rationale: ex quo contingit quod *omnes natura scire desiderant*, & per consequens in cognitione veritatis delectantur: & adhuc magis fit hoc delectabile habenti habitum sapientiae, & scientiae, ex quo accidit quod sine difficultate aliquis contemplatur.

Alio modo contemplatio redditur delectabilis ex parte obiecti, in quantum scilicet aliquis rem amatam contemplatur: sicut etiam accidit in visione corporali, quae delectabilis redditur, non solum ex eo quod ipsum videre est delectabile, sed etiam ex eo quod videt quis personam amatam. Quia ergo vita contemplativa praecipue consistit in contemplatione Dei, ad quam movet caritas, ut dictum est (art. 1. hu. quaest. & art. 2. ad 1.) inde est quod in vita contemplativa non solum est delectatio ratione ipsius contemplationis, sed etiam ratione ipsius divini amoris.

Et quantum ad utrumque eius delectatio omnem delectationem humanam excedit. Nam & delectatio spiritalis prior est quam carnalis, ut supra habitum est (1. 2. quaest. xxxi. art. 5.) cum de passionibus ageretur; & ipse amor quo ex caritate Deus diligitur, omnem amorem excedit. Unde & in Pl. xxxiii. 9. dicitur: *Gustate, & videte, quoniam suavis est Dominus.*

Ad primum ergo dicendum, quod vita contemplativa, licet essentialiter consistat in intellectu, principium tamen habet in affectu, in quantum videlicet aliquis ex caritate ad Dei contemplationem incitatur. Et quia finis respondet principio, inde est quod etiam terminus, & finis contemplativae vitae habet esse in affectu, dum scilicet aliquis in visione rei amatæ delectatur, & ipsa delectatio rei viæ amplius excitat amorem. Unde Gregorius dicit super Ezech. (hom. xiv. cir. med.) quod *cum quis ipsum quem amat, videt, in amore ipse amans ignescit.* Et hæc est ultima perfectio contemplativae vitae, ut scilicet

non solum divina veritas videatur, sed etiam ut ametur.

Ad secundum dicendum, quod contentio, vel certamen, quod provenit ex contrarietate exterioris rei, impedit illius rei delectationem. Non enim aliquis delectatur in eo contra quam pugnat, sed in repro quo quis pugnat, cum eam homo adeptus fuerit, ceteris paribus, magis in ea delectatur; sicut Augustinus dicit in VIII. Confes. (cap. 111. ante med.) quod *quanto fuit maius periculum in praelio, tanto maius est gaudium in triumpho.* Non est autem in contemplatione contentio, & certamen ex contrarietate veritatis quam contemplamur, sed ex defectu nostri intellectus, & ex corruptibili corpore, quod nos ad inferiora retrahit, secundum illud Sap. 11. 15. *Corpus quod corrumpitur, aggravat animam, & deprimit terrena inhabitatio sensum multa cogitantem.* Et inde est quod quando homo pergit ad contemplationem veritatis, ardentius eam amat; sed magis odit proprium defectum, & gravitatem corruptibilis corporis, ut dicat cum Apostolo Rom. vii. 24. *In solis ergo homo, quis me liberabit de corpore mortis huius?* Unde & Gregorius dicit super Ezech. (loc. cit. in arg.) *Cum Deus iam per desiderium, & intellectum cognoscitur, omnem in nobis voluptatem cumvis arefacit.*

Ad tertium dicendum, quod contemplatio Dei in hac vita imperfecta est respectu contemplationis patriæ: & similiter delectatio contemplationis viæ est imperfecta respectu delectationis contemplationis patriæ, de qua dicitur in Psal. xxxv. 9. *Torrente voluptatis tuae potabis eos.* Sed contemplatio divinorum quæ habetur in via, etsi sit imperfecta, tamen est delectabilior omni alia contemplatione, quantumcumque perfecta, propter excellentiam rei contemplatæ. Unde Philosophus dicit in I. de partibus animalium (cap. v. cir. princ.) *Accidit circa illas honorabiles emittentes, & divinas substantias, minores nobis existere theorias: sed est secundum modicum attingamus eas, tamen propter honorabilitatem cognoscendi delectabilius aliquid habent quam quæ apud nos emittit.* Et hoc est etiam quod Gregorius dicit super Ezechiel. (loc. sup. cit.) *Contemplativa vita amabilis valde dulcedo est, quæ super semetipsam animam rapit, caelestia aperit, spiritus alia mentis oculis patefacit.*

Ad quartum dicendum, quod Jacob post

post contemplationem uno pede claudicabat, quia *neceſſe eſt ut debilitato amore ſaculi, convaleſcat aliquis ad amorem Dei*, ut Gregorius dicit ſuper Ezechiel. (loc.cit.) Et ideo *poſt agnitionem ſuavitatis Dei unus in nobis poſt ſanum remanet, atque alius claudicat: omnis enim qui uno pede claudicat, ſolum illi pedi inmiſitur quem ſanum habet.*

# ARTICULUS VIII. 855

*Utrum vita contemplativa ſit diuturna.*

I. P. *quaest. xx. art. 4. ad 3. & III. dist. xxxv. quaest. 1. art. 4. quaest. 3.*

**A**D octavum sic proceditur. Videtur quod vita contemplativa non sit diuturna. Vita enim contemplativa essentialiter consistit in his quae ad intellectum pertinent. Sed omnes intellectivae perfectiones huius vitae evacuabuntur, secundum illud I. ad Cor. xiii. 8. *Sive prophetia evacuabuntur, sive lingua cessabunt, sive scientia destruetur.* Ergo vita contemplativa evacuetur.

2. Praeterea. Dulcedinem contemplationis aliquis homo rapit, & pertransiendo degustat: unde Augustinus dicit in X. Confess. (cap. xi. parum antefin.) *Intromissi me in affectum multum inuſatum intrinſus, ad neſcio quam dulcedinem; ſed recido in hac arduoſi ponderibus.* Gregorius etiam in V. Moral. (cap. xxiii. ad fin.) exponens illud Iob xv. *Cum ſpiritus me praesente tranſiret, dicit: „In ſuavitate contemplationis in- timae non diu mens figitur, quia ad ſemetipſam ipſa immenſitate luminis reverberata revocatur.* “ Ergo vita contemplativa non est diuturna.

3. Praeterea. Illud quod non est homini connaturale, non potest esse diuturnum. Vita autem contemplativa est *melior quam ſecundum hominem*, ut Philoſophus dicit in X. Ethic. (cap. vii. ad fin.) Ergo videtur quod vita contemplativa non sit diuturna.

Sed contra est quod Dominus dicit Luc. x. 43. *Maria optimam partem elegit, quae non auferetur ab ea*: quia, ut Gregorius dicit super Ezech. (hom. xlv. a mod.) *contemplatio hic incipit, ut in caeleſti patria perficiatur.*

Reſpondeo dicendum, quod aliquid poſteſt dici diuturnum dupliciter: uno modo ſecundum ſuam naturam; alio modo quoad nos. Secundum ſe quidem manifeſtum eſt quod vita contemplativa

diuturna eſt dupliciter: uno modo, eo quod verſatur circa incorruptibilia, & immobilia; alio modo quia non habet contrarietatem: deſtinationi enim quae eſt in conſiderando, nihil eſt contrarium, ut dicitur in I. Topic. (cap. xiii. in explic. loci 2.)

Sed quoad nos etiam vita contemplativa diuturna eſt: tum quia competit nobis ſecundum actionem incorruptibilis partis animae, ſcilicet ſecundum intellectum; unde poſteſt poſt hanc vitam durare: tum quia in operibus contemplativae corporaliter non laboramus, unde magis in huiusmodi operibus continui perſiſtere poſſumus, ſicut Philoſophus dicit in X. Ethicor. (cap. vii. parum a princ.)

Ad primum ergo dicendum, quod modus contemplandi non eſt idem hic, & in patria; ſed vita contemplativa dicitur manere ratione caritatis, in qua habet & principium, & finem: & hoc eſt quod Gregorius dicit ſuper Ezech. (hom. xiv. poſt med.) *Contemplativa hic incipit, ut in caeleſti patria perficiatur: quia amoris ignis, qui hic ardere incipit, cum ipſum quem amat, viderit, in amore ipſius amplius igneſcit.*

Ad ſecundum dicendum, quod nulla actio poſteſt diu durare in ſui ſummo. Summum autem contemplationis eſt ut attingat ad uniformitatem divinae contemplationis, ut dicit Dionyſius (cap. iv. de divin. Nom. par. 1. leſt. 7. & cap. iii. cael. Hierarch. ante med.) ſicut ſupra poſitum eſt (art. 6. hu. quaest. ad 2.) Unde etſi quantum ad hoc contemplatio diu durare non poſſit, tamen quantum ad alios contemplationis actus poſteſt diu durare.

Ad tertium dicendum, quod Philoſophus dicit, vitam contemplativam eſſe ſupra hominem, quia competit nobis ſecundum hoc quod aliquid divinum eſt in nobis, ſcilicet intellectus, qui eſt incorruptibilis, & impaſſibilis in ſe: & ideo actio eius poſteſt eſſe diuturnior.

## QUAESTIO CLXXXI.

*De vita activa,*

*in quatuor articulos diviſa.*

**D**Einde conſiderandum eſt de vita activa: & circa hoc quaeruntur quatuor.

Y 4

Pri-

Primo, utrum omnia opera virtutum moralium pertineant ad vitam activam.

Secundo, utrum prudentia pertineat ad vitam activam.

Tertio, utrum doctrina pertineat ad vitam activam.

Quarto de diuturnitate vitae activae.

### ARTICULUS I. 896

*Utrum omnes actus virtutum moralium pertineant ad vitam activam.*

*Sup. quaest. lxxx. art. 3. cor. & opusc. xviii. cap. vii. ad 7.*

**A**D primum sic proceditur. Videtur quod non omnes actus virtutum moralium pertineant ad vitam activam. Vita enim activa videtur consistere solum in his quae sunt ad alterum: dicit enim Gregorius super Ezech. (hom. xiv. parum ante med.) quod *activa vita est panem esurienti tribuere*: & in fine, multis enumeratis quae ad alterum pertinent, subdit: *Et quae singulis quibusque expediunt, dispensare*. Sed non per omnes actus virtutum moralium ordinamur ad alios, sed solum secundum iustitiam, & partes eius, ut ex supradictis patet (quaest. lxxxi. art. 1. & 2. & 1. 2. quaest. lx. art. 2. & 3.). Non ergo actus omnium virtutum moralium pertinent ad vitam activam.

2. Praeterea. Gregorius dicit super Ezech. (hom. xiv. a med.) quod *per Liam, quae fuit lippa, sed secunda, significatur vita activa: quae dum occupatur in opere, minus videt; sed dum modo per verbum, modo per exemplum ad imitationem suam proximos accendit, multos in opere bono filias generat*. Hoc autem magis videtur pertinere ad caritatem, per quam diligimus proximum, quam ad virtutes morales. Ergo videtur quod actus virtutum moralium non pertineant ad vitam activam.

3. Praeterea. Sicut supra dictum est (quaest. praec. art. 2.) virtutes morales disponent ad vitam contemplativam. Sed dispositio, & perfectio pertinent ad idem. Ergo videtur quod virtutes morales non pertineant ad vitam activam.

Sed contra est quod Ildorus dicit in Lib. III. de summo bono (cap. xv. parum a princ.) *In activa vita prius per exercitium boni operis cuncta exhaurenda sunt vitia, ut in contemplativa iam pura mentis acie ad contemplandum divinum lumen quisque pertranseat*. Sed cum

haec vitia non exhauriuntur nisi per actus virtutum moralium. Ergo actus virtutum moralium ad vitam activam pertinent.

Respondeo dicendum, quod, sicut supra dictum est (quaest. clxxxix. art. 1.) vita activa, & contemplativa distinguuntur secundum diversa studia hominum intendendum ad diversos fines: quorum unum est consideratio veritatis, quae est finis vitae contemplativae; aliud autem est exterior operatio, ad quam ordinatur vita activa.

Manifestum est autem quod in virtutibus moralibus non principaliter quaeritur contemplatio veritatis, sed ordinantur ad operandum. Unde Philosophus dicit in II. Ethic. (cap. 11. cir. princ. & Lib. X. cap. ult.) quod *ad virtutem quidem scire, parum, aut nihil prodest*. Unde manifestum est quod virtutes morales pertinent essentialiter ad vitam activam. Unde & Philosophus in X. Eth. (cap. vii. & viii.) virtutes morales ordinat ad felicitatem activam.

Ad primum ergo dicendum, quod inter virtutes morales praecipua est iustitia, quae aliquis ad alterum ordinatur; ut Philosophus probat in V. Ethic. (cap. 1. a med.) Unde vita activa describitur per ea quae ad alterum ordinantur, non quia in his solum, sed quia in his principaliter consistit.

Ad secundum dicendum, quod per actus omnium virtutum moralium potest aliquis proximis suo exemplo dirigere ad bonum: quod Gregorius ibi attribuit vitae activae.

Ad tertium dicendum, quod sicut virtus quae ordinatur in finem alterius virtutis, transit quodammodo in speciem eius; ita etiam quando aliquis utitur his quae sunt vitae activae, solum prout disponunt ad contemplationem, comprehenduntur sub vita contemplativa. In his autem qui operibus virtutum moralium intendunt, tamquam secundum se bonis, non autem tamquam disponentibus ad vitam contemplativam, virtutes morales pertinent ad vitam activam.

Quamvis etiam dici possit, quod vita activa dispositio sit ad vitam contemplativam.

## ARTICULUS II. 857

*Utrum prudentia pertineat ad vitam activam.*

*Sup. quæst. lxxx. art. 2. cor. & præsent. quæst. art. 1. corp. & opusc. xviii. cap. vii. ad 7.*

**A**D secundum sic proceditur. Videtur quod prudentia non pertineat ad vitam activam. Sicut enim vita contemplativa pertinet ad vim cognoscitivam, ita activa ad vim appetitivam. Prudentia autem non pertinet ad vim appetitivam, sed magis ad cognitivam. Ergo prudentia non pertinet ad vitam activam.

2. Præterea. Gregorius dicit super Ezech. (hom. xiv. a med.) quod *activa vita, dum occupatur in opere, minus videt*: unde significatur per Liam, quæ lippos oculos habebat. Prudentia autem requirit oculos claros, ut recte iudicet homo de agendis. Ergo videtur quod prudentia non pertineat ad vitam activam.

3. Præterea. Prudentia media est inter virtutes morales, & intellectuales. Sed sicut virtutes morales pertinent ad vitam activam, ut dictum est (art. præc.) ita intellectuales ad contemplativam. Ergo videtur quod prudentia non pertineat neque ad vitam activam, neque ad contemplativam, sed ad medium vivendi genus, quod Augustinus ponit XIX. de civit. Dei (cap. ii. & xix.).

Sed contra est quod Philosophus in X. Ethic. (cap. viii.) prudentiam pertinere dicit ad felicitatem activam, ad quam pertinent virtutes morales.

Respondetur dicendum, quod, sicut supra dictum est (art. præc. ad 3. & i. 2. quæst. xviii. art. 7.) id quod ordinatur ad aliud sicut ad finem, præcipue in moralibus, trahitur ad speciem eius ad quod ordinatur; sicut ille qui *mæchatur, ut furetur, magis dicitur fur quam mæchus*, secundum Philosophum in V. Ethicor. (cap. ii. parum a princ.) Manifestum est autem quod cognitio prudentiæ ordinatur ad operationes virtutum moralium sicut ad finem: est enim *recta ratio agibilium*, sicut dicitur in VI. Ethic. (cap. v.) unde & fines virtutum moralium sunt principia prudentiæ, sicut in eodem libro Philosophus dicit. Sicut ergo dictum est (art. præc. ad 3.) quod

virtutes morales in eo qui ordinatur ad quietem contemplationis, pertinent ad vitam contemplativam; ita cognitio prudentiæ, quæ de se ordinatur ad operationes virtutum moralium, directe pertinet ad vitam activam; si ramen prudentia proprie sumatur, secundum quod Philosophus de ea loquitur.

Si autem sumatur communius, prout scilicet comprehendit qualemcumque humanam cognitionem, sic prudentia quantum ad aliquam sui partem pertinet ad vitam contemplativam, secundum quod Tullius dicit in I. de offi. (in tir. de iv. virtutibus unde omnia officia manant) quod *qui acutissime, & celerissime potest & videre verum, & explicare rationem, is prudentissimus, & sapientissimus vite haberi solet*.

Ad primum ergo dicendum, quod operationes morales specificantur ex fine, ut supra habitum est (i. 2. quæst. xviii. art. 4. & 6.) & ideo ad vitam contemplativam illa cognitio pertinet quæ finem habet in ipsa cognitione veritatis. Cognitio autem prudentiæ, quæ magis habet finem in actu appetitivæ virtutis, pertinet ad vitam activam.

Ad secundum dicendum, quod occupatio exteriorum rerum facit hominem minus videre in rebus intelligibilibus, quæ sunt separata a sensibilibus, in quibus operationes activæ vitæ consistunt; sed tamen occupatio exterior activæ vitæ facit hominem magis clare videre in iudicio agibilium, quod pertinet ad prudentiam, tum propter experientiam, tum propter mentis attentionem: quia *ubi intenderis, ibi ingenium valet*; ut Sallustius dicit (in coniur. Catil. cir. princ. orat. Caesaris).

Ad tertium dicendum, quod prudentia dicitur esse media inter virtutes intellectuales, & morales quantum ad hoc quod: in subiecto convenit cum virtutibus intellectualibus, in materia autem rationaliter convenit cum moralibus. Illud autem tertium vivendi genus medium est inter activam vitam, & contemplativam, quantum ad ea citra quæ occupatur: quia quandoque occupatur in contemplatione veritatis, quandoque autem occupatur circa exteriora.

## ARTICULUS III. 858

*Utrum docere sit actus vitae activa, an contemplativa.*

III. dist. xxxv. quæst. 2. art. 3. quæst. 1. ad 3. & ver. quæst. xi. art. 4.

**A**D tertium sic proceditur. Videtur quod docere non sit actus vitae activæ, sed contemplativæ. Dicit enim Gregorius super Ezech. (hom. v. inter med. & fin.) quod viri perfecti bona celestia, quæ saltem per speculum contemplari poterunt, fratribus denuntiant, eorumque animos in amorem intimæ claritatis accendunt. Sed hoc pertinet ad doctrinam. Ergo docere est actus vitae contemplativæ.

2. Præterea. Ad idem genus vitæ videtur reduci actus, & habitus. Sed docere est actus sapientiæ: dicit enim Philosophus in princ. Metaphys. (cap. 2. a med.) quod *signum scientis est posse docere*. Cum ergo sapientia, vel scientia pertineat ad vitam contemplativam, videtur quod etiam doctrina ad vitam contemplativam pertineat.

3. Præterea. Sicut contemplatio est actus vitæ contemplativæ, ita & oratio. Sed oratio, qua quis orat pro alio, nihilominus pertinet ad vitam contemplativam. Ergo quod aliquis veritatem meditatam in alterius notitiam per doctrinam deducat, videtur ad vitam contemplativam pertinere.

Sed contra est quod Gregorius dicit super Ezech. (hom. xrv. parum ante med.) *Activa vita est panem esurienti tribuere, verbo sapientiæ nescientem docere*.

Respondendo dicendum, quod actus doctrinæ habet duplex obiectum: sit enim doctrina per locutionem; locutio autem est signum audibile interioris conceptus. Est ergo unum obiectum doctrinæ id quod est materia, sive obiectum interioris conceptionis: & quantum ad hoc obiectum quandoque doctrina pertinet ad vitam activam, quandoque ad contemplativam.

Ad activam quidam, quando homo interiorius concipit aliquam veritatem, ut per eam in exteriori actione dirigatur; ad contemplativam autem, quando homo interiorius concipit aliquam veritatem intelligibilem, in cuius consideratione, & amore delectatur. Unde Augustinus dicit in Libro de verb. Domini (serm.

xxvii. cap. 1. cir. fin.) *Eligant sibi partem meliorem, scilicet vitæ contemplativæ, vacent verbo, inbient doctrinæ dulcedini, occupentur circa scientiam salutarem*: ubi manifeste dicit, doctrinam ad vitam contemplativam pertinere.

Aliud vero obiectum doctrinæ est ex parte sermonis audibilis: & sic obiectum doctrinæ est ipse audiens: & quantum ad hoc obiectum omnis doctrina pertinet ad vitam activam, ad quam pertinent exteriores actiones.

Ad primum ergo dicendum, quod auctoritas illa expresse loquitur de doctrina quantum ad materiam, prout versatur circa considerationem, & amorem veritatis.

Ad secundum dicendum, quod habitus, & actus communicant in obiecto: & ideo manifeste illa ratio procedit ex parte materiæ interioris conceptionis. Intantum enim ad sapientem, vel scientem pertinet posse docere, inquantum potest interiorem conceptum verbis exprimere, ad hoc quod possit alium adducere ad intellectum veritatis.

Ad tertium dicendum, quod ille qui orat pro alio, nihil agit erga illum pro quo orat, sed solum erga Deum, qui est intelligibilis veritas; sed ille qui alium docet, aliquid circa eum agit exteriori actione. Unde non est similis ratio de utroque.

## ARTICULUS IV. 859

*Utrum vita activa maneat post hanc vitam.*

I. P. quæst. xx. art. 4. ad 3. & 1. 2. quæst. lxxvii. art. 1. ad 2. & III. dist. xxxv. quæst. 1. art. 4. quæst. 3. & III. cont. cap. lxxiii. fin. & ver. quæst. xi. art. 4. ad 2.

**A**D quartum sic proceditur. Videtur quod vita activa maneat post hanc vitam. Ad vitam enim activam pertinent actus moralium virtutum, ut dictum est (art. 1. hu. quæst.) Sed virtutes morales permanent post hanc vitam, ut Augustinus dicit in XIV. de Trinit. (cap. ix.) Ergo videtur quod vita activa permaneat post hanc vitam.

2. Præterea. Docere alios pertinet ad vitam activam, ut dictum est (art. præc.) Sed in futura vita, in qua similes erimus Angelis, poterit esse doctrina; sicut & in Angelis esse videtur, quorum unus alium illuminat, purgat, & perfectit.

cit; quod refertur ad scientiæ assumptionem, ut patet per Dionysium vii. cap. de cel. hier. (inter med. & fin.) Ergo videtur quod vita activa remaneat post hanc vitam.

3. Præterea. Illud quod de se est durabilius, magis videtur posse post hanc vitam remanere. Sed vita activa videtur esse de se durabilior: dicit enim Gregorius super Ezech. (hom. v. a med.) quod in vita activa fixi permanere possumus; in contemplativa autem intentia mente manere nullo modo valeamus. Ergo multo magis vita activa potest manere post hanc vitam quam contemplativa.

Sed contra est quod Gregorius dicit super Ezech. (hom. xiv. post. med.) Cum præsentis sæculo vita auferatur activa; contemplativa autem hic incipitur, ut in caelesti patria perficiatur.

Respondendo dicendum, quod, sicut supra dictum est (art. i. h. quæst.) vita activa habet finem in exterioribus actibus; qui si referantur ad quietem contemplationis, iam pertinent ad vitam contemplativam; in futura autem vita beatorum cessabit occupatio exteriorum actuum: & si qui actus exteriores sint, referentur ad finem contemplationis. Ut enim Augustinus dicit in fine de civit. Dei, ibi vacabimus, & videbimus; videbimus, & amabimus; amabimus, & laudabimus. Et in eodem libro præmittit (ibid.) quod ibi Deus sine fine videbitur, sine fine laudabitur, sine fine laudabitur: hoc munus, hic affectus, hic actus erit omnibus.

Ad primum ergo dicendum, quod, sicut supra dictum est (1. 2. quæst. lxxvii. art. 1.) virtutes morales manebunt non secundum actus quos habent circa ea quæ sunt ad finem, sed secundum actus quos habent circa finem. Huiusmodi autem actus sunt, secundum quod constituunt quietem contemplationis, quam Augustinus in præmissis verbis significat per vacationem, quæ est intelligenda non solum ab exterioribus tumultibus, sed etiam ab interiori perturbatione passionum.

Ad secundum dicendum, quod vita contemplativa, sicut supra dictum est (quæst. præc. art. 4.) præcipue consistit in contemplatione Dei: & quantum ad hoc unus Angelus alium docet: quia, ut dicitur Matth. xviii. 10. de Angelis pusillorum, qui sunt inferioris ordinis, quod semper vident faciem Patris; sic & in futura vita nullus hominum alium

docebit de Deo, sed omnes videbimus eum sicuti est, ut habetur I. Ioan. iiii. 2. Et hoc est quod Hierem. xxxi. 34. dicitur: Non docebit ultra vir proximum suum, dicens: Cognosce Dominum. Omnes enim cognoscent me a minimo eorum usque ad maximum. Sed de his quæ pertinent ad differentiationem mysteriorum Dei, unus Angelus docet alium, purgando, illuminando, & perficiendo: & secundum hoc habent aliquid de vita activa, quamdiu mundus durat, ex hoc quod administrationi inferioris creaturæ intendunt: quod significatur per hoc quod Iacob vidit Angelos in scala ascendentes (quod pertinet ad contemplationem) & descendentes, quod pertinet ad actionem. Sed, sicut dicit Gregorius II. Moral. (cap. ii. cir. med.) non sic a divina visione foras exeunt, ut interna contemplationis gaudiis priventur. Et ideo in eis non distinguitur vita activa a contemplativa, sicut in nobis, qui per opera vitæ activæ impedimur a contemplatione. Non autem promittitur nobis similitudo Angelorum quantum ad administrationem inferioris creaturæ, quæ nobis non competit secundum ordinem naturæ nostræ, sicut competit Angelis, sed secundum visionem Dei.

Ad tertium dicendum, quod durabilitas vitæ activæ in statu præsentis excedens durabilitatem vitæ contemplativæ, non provenit ex proprietate utriusque vitæ secundum se consideratæ, sed ex defectu nostri, qui ex corporis gravitate retrahimur ab altitudine contemplationis. Unde ibidem subdit Gregorius, quod ipsa sua infirmitate ab immensitate tantæ celsitudinis repulsus animus in semetipso relabatur.

## QUAESTIO CLXXXII.

De comparatione vitæ activæ ad contemplativam,

in quatuor articulos divisa.

**D**Einde considerandum est de comparatione vitæ activæ ad contemplativam: & circa hoc quaeruntur quatuor.

Primo, quæ sit potior, vel dignior.

Secundo, quæ sit maioris meriti.

Tertio, utrum vita contemplativa impediatur per activam.

Quarto de ordine utriusque.



## ARTICULUS I. 860

*Utrum vita activa sit potior quam contemplativa.*

*Inf. quæst. cxxxviii. art. 5. & I. P. quæst. lvi. art. 1. co. & III. diff. xxxv quæst. 1. art. 4. & III. cons. cap. lxi. fin. & cap. cxxxiii. & ver. quæst. xi. art. 4. & opusc. xviii. cap. vii. ad 3.*

**A**D primum sic proceditur. Videtur quod vita activa sit potior quam contemplativa. Quod enim est meliorum, videtur esse honorabilius, & melius, ut Philosophus dicit in III. Topic. (cap. 1. in explic. loci xi.) Sed vita activa pertinet ad maiores, scilicet ad prælatos, qui sunt in honore, & potestate constituti: unde Augustinus dicit XIX. de civit. Dei (cap. xix. in med.) quod in actione non amandus est honor in hac vita, sive potentia. Ergo videtur quod vita activa sit potior quam contemplativa.

2. Præterea. In omnibus habitibus, & actibus præcipere pertinet ad potiores, sicut militaris tamquam potior præcipit frenorum strictici. Sed ad vitam activam pertinet disponere, & præcipere de contemplativa, ut patet per illud quod dicitur Moyse Exod. xix. 21. *Descende, & contesce populum, ne forte velit transcendere propósitos terminos ad videndum Deum.* Ergo vita activa est potior quam contemplativa.

3. Præterea. Nullus debet abstrahi a maiori, ut applicetur minoribus: Apostolus enim dicit I. ad Corinth. xii. 31. *Aemulamini charismata meliora.* Sed aliqui abstrahuntur a statu vitæ contemplativæ, & occupantur circa vitam activam, ut patet de illis qui transferuntur ad statum prælationis. Ergo videtur quod vita activa sit potior quam contemplativa.

Sed contra est quod Dominus dicit Lucæ x. 43. *Maria optimam partem elegit, qua non auferetur ab ea.* Per Mariam autem significatur vita contemplativa. Ergo contemplativa vita potior est quam activa.

Respondendo dicendum, quod nihil prohibet, aliquid secundum se esse excellentius, quod tamen secundum quid ab alio superetur. Dicendum est ergo, quod vita contemplativa simpliciter melior est quam activa.

Quod Philosophus in X. Ethic. (cap. x. 43. cum dicit: *Optimam partem ele-*

vii. & viii.) probat octo rationibus. Quarum prima est, quia vita contemplativa convenit homini secundum illud quod est optimum in ipso, scilicet secundum intellectum, & respectu propriorum obiectorum, scilicet intelligibilium; vita autem activa occupatur circa exteriora. Unde Rachel, per quam significatur vita contemplativa, interpretatur *visum principium*; vita autem activa significatur per Liam, quæ erat lippis oculis, ut Gregorius dicit VI. Moral. (cap. xviii. a princ.) Secunda, quia vita contemplativa potest esse magis continua, licet non quantum ad summum contemplationis gradum, sicut supra dictum est (quæst. cxxx. art. 8. ad 2. & quæst. præc. art. 4. ad 3.) unde & Maria, per quam significatur vita contemplativa, describitur secus pedes Domini assidue sedens. Tertia, quia maior est delectatio vitæ contemplativæ quam activæ: unde Augustinus dicit in Lib. de verbis Dom. (serm. xxvi. cap. ii. ante med.) quod *Maria turbabatur, Maria epulabatur.* Quarta, quia in vita contemplativa est homo magis sibi sufficiens, quia paucioribus ad eam indiget: unde dicitur Luc. x. 41. *Maria, Maria sollicita es, & turbaris erga plurima.* Quinta, quia vita contemplativa magis propter se diligitur, vita autem activa ad aliud ordinatur: Unde in Psal. xxvi. 4. dicitur: *Uram petii a Domino, hanc requiram, ut inhabitem in domo Domini omnibus diebus vitæ meæ, ut videam voluptatem Domini.* Sexta, quia vita contemplativa consistit in quadam vacatione, & quiete, secundum illud Psal. xlv. 11. *Vacate, & videte, quoniam ego sum Deus.* Septima, quia vita contemplativa est secundum divina, vita autem activa est secundum humana: unde Augustinus dicit in Lib. de verbis Dom. (serm. xxvii. cap. ii. cir. med.) *In principio erat Verbum: ecce quod Maria audiebat. Verbum caro factum est: ecce cui Maria ministrabat.* Octava, quia vita contemplativa est secundum id quod est magis proprium homini, scilicet secundum intellectum; in operationibus autem vitæ activæ communicant etiam inferiores vires, quæ sunt nobis, & brutis communes: unde in Psal. xxxv. 8. postquam dictum est, *Homines, & iumenta salvabis Domine,* subditur id quod est hominibus speciale, *In lumine tuo videbimus lumen.*

Nonam rationem addit Dominus Luc. x. 43. cum dicit: *Optimam partem ele-*

git

*Et Maria, quæ non auferetur ab ea:* quod exponens Augullinus in Lib. de verbis Dom. (loc. cit.) dicit: „Non tu malam, sed illa meliorem. Audi, unde meliorem: quia non auferetur ab ea; a te autem auferetur aliquando onus necessitatis: æterna est dulcedo veritatis.“

Secundum quid tamen, & in casu est magis eligenda vita activa propter necessitatem præsentis vitæ; sicut etiam Philoſophus dicit in III. Topic. (cap. 11. in explic. loci xl.) quod *philosophari est melius quam ditari, sed ditari melius est necessitatem patienti.*

Ad primum ergo dicendum, quod ad prælatos non solum pertinet vita activa, sed etiam debent esse excellentes in vita contemplativa: unde Gregorius dicit in Pastoralis (par. 11. cap. 1.) *Sit Præſul actione præcipuus, præ cunctis in contemplatione ſuſpenſus.*

Ad secundum dicendum, quod vita contemplativa in quadam animi libertate consistit. Dicit enim Gregorius super Ezech. (hom. 111. a med.) quod *vita contemplativa ad quandam libertatem mentis transit, temperantia non cogitans, sed æterna:* & Boetius dicit in V. de consolatione (prola 11. cir. med.) *Humanas animas liberiores esse necesse est, cum se in mentis divine speculatione conservant; minus vero, cum dilabuntur ad corpora.* Unde patet quod vita activa non directe præcipit contemplativæ, sed disponendo ad vitam contemplativam præcipit quædam opera vitæ activæ; in quo magis servit vitæ contemplativæ quam dominetur. Et hoc est quod Gregorius dicit super Ezech. (loc. cit.) quod *activa vita servitus, contemplativa autem libertas vocatur.*

Ad tertium dicendum, quod opera vitæ activæ interdum aliquis a contemplatione avocatur propter aliquam necessitatem præsentis vitæ; non tamen hoc modo quod cogatur aliquis totaliter contemplationem deferere. Unde Augullinus dicit XIX. de civ. Dei (cap. xix. in fin.) *Otiū ſanctum querit caritas veritatis; negotium iustum, ſcilicet vitæ activæ, ſuſcipit neceſſitas caritatis: quam ſarcinam ſi nullus imponit, percipiendæ, atque intueudæ vacandum eſt veritati; ſi autem imponitur, ſuſcipienda eſt propter caritatis neceſſitatem. Sed nec ſic omnino veritatis delectatio deſerenda eſt, ne ſubſtrahatur illa ſuavitas, & opprimat iſta neceſſitas.* Et sic patet quod cum aliquis a contemplativa vita ad activam vocatur,

non hoc fit per modum ſubſtractionis, ſed per modum additionis.

## ARTICULUS II. 361

*Utrum vita activa ſit maioris meriti quam contemplativa.*

III. diſt. xxxv. quæſt. 1. art. 4. quæſt. 2.

**A**D secundum sic proceditur. Videtur quod vita activa sit maioris meriti quam contemplativa. Meritum enim dicitur respectu mercedis. Merces autem debetur labori, secundum illud 1. ad Corinth. 111. 8. *Unusquisque propriam mercedem accipiet secundum suum laborem.* Sed vitæ activæ attribuitur labor, contemplativæ vero quies: dicit enim Gregorius super Ezech. (hom. xiv. a med.) *Omnis qui ad Deum convertitur, prius necesse est ut desudet in labore; id est Liam accipiat, ut post ad videndum principium in Rachel amplexibus requiescat.* Ergo vita activa est maioris meriti quam contemplativa.

2. Præterea. Vita contemplativa est quædam inchoatio futuræ felicitatis: unde super illud Ioan. ult. *Sic cum volo manere, donec veniam,* dicit Augullinus (tract. cxxiv. inter med. & fin.) *Hoc apertius dici potest: Perſecta me ſequatur actio informata meæ paſſionis exemplo; inchoata vero contemplatio maneat donec venio, perficienda cum venero:* & Gregorius dicit super Ezech. (loc. sup. cit.) quod *contemplativa vita hic incipit, ut in celeſti patria perficiatur.* Sed in illa futura vita non erit status merendi, sed recipiendi pro meritis. Ergo vita contemplativa minus videtur habere de ratione meriti quam vita activa; sed plus habet de ratione præmii.

3. Præterea. Gregorius dicit super Ezech. (colligitur ex hom. xii. aliquant. ante fin.) quod *nullum ſacrificium eſt Deo magis acceptum quam zelus animarum.* Sed per zelum animarum aliquis se convertit ad studia vitæ activæ. Ergo videtur quod vita contemplativa non sit maioris meriti quam activa.

Sed contra est quod Gregorius dicit in VI. Moral. (cap. xviii. ante med.) *Magna ſunt activæ vitæ merita, ſed contemplativæ potiora.*

Reſpondeo dicendum, quod radix merendi est caritas, sicut supra habitum est (1. 2. quæſt. ult. art. 4.) Cum autem caritas consistat in dilectione Dei,

&

& proximi, sicut supra habitum est (quaest. xxv. art. 1.) Deum diligere secundum se est magis meritorium quam diligere proximum, ut ex supradictis patet (quaest. xxvii. art. 8.) & ideo illud quod directius pertinet ad dilectionem Dei, magis est meritorium ex suo genere, quam id quod directe pertinet ad dilectionem proximi propter Deum. Vita autem contemplativa directe & immediate pertinet ad dilectionem Dei: dicit enim Augustinus XIX. de civit. Dei (cap. xix. in fin.) quod *otium sanctum*, scilicet contemplativae vitae, *querit caritatis veritatis*, scilicet divinae, cui potissime vita contemplativa insitit, sicut dictum est (quaest. praec. art. 4. ad 2.) Vita autem activa directius ordinatur ad dilectionem proximi, quia *satagit circa frequens ministerium*, ut dicitur Lucae x. Et ideo ex suo genere contemplativa vita est maioris meriti quam activa. Et hoc est quod Gregorius super Ezech. (hom. 111. parum ante med.) dicit: *Contemplativa est maior meritis quam activa: quia haec in usu praesentis operis laborat, in quo scilicet necesse est proximis subvenire; illa vero sapore intimo venturam tam requiem degustat*, scilicet in contemplatione Dei.

Potest tamen contingere quod aliquis in operibus vitae activae plus mereatur quam alius in operibus vitae contemplativae; puta si propter abundantiam divini amoris, ut eius voluntas impleatur, propter ipsius gloriam, interdum sustinet a dulcedine divinae contemplationis ad tempus separari; sicut Apostolus dicebat ad Rom. ix. 3. *Optabam ego ipse anathema esse a Christo pro fratribus meis*: quod exponens Chrysostomus in Lib. I. de compunctione (cap. vii. vers. fin.) dicit: „Ita totam mentem eius demerlerat amor Christi, ut etiam hoc quod ei praeter ceteris omnibus amabilius erat, esse cum Christo, rursus idipsum, quia ita placeret Christo, contemneret.“

Ad primum ergo dicendum, quod labor exterior operatur ad augmentum praemii accidentaliter; sed augmentum meriti respectu praemii essentialis consistit principaliter in caritate, cuius quoddam signum est labor exterior toleratus propter Christum; sed multo expressius eius signum est quod aliquis, praetermissis omnibus quae ad hanc vitam pertinent, soli divinae contemplationi vacare delectetur.

Ad secundum dicendum, quod in statu felicitatis futurae homo pervenit ad perfectum: & ideo non relinquatur locus proficiendi per meritum; si tamen relinqueretur, esset efficacius meritum propter maiorem caritatem. Sed contemplatio praesentis vitae cum quadam imperfectione est, & adhuc habet quod proficiat: & ideo non tollit rationem merendi; sed augmentum meriti facit propter maius exercitium caritatis divinae.

Ad tertium dicendum, quod sacrificium spiritualiter Deo offertur, cum aliquid ei exhibetur. Inter omnia autem bona hominis Deus maxime acceptat bonum humanae animae, ut hoc sibi in sacrificium offeratur. Offerre autem debet aliquis Deo, primo quidem animam suam, secundum illud Ecclesi. xxx. 24. *Miserere animae tuae placens Deo*: secundo autem animas aliorum, secundum illud Apoc. ult. 17. *Qui audit, dicat, Veni*. Quanto autem homo animam suam, vel alterius propinquius Deo coniungit, tanto sacrificium est Deo magis acceptum: unde magis acceptum est Deo quod aliquis animam suam, & aliorum applicet contemplationi quam actioni. Per hoc ergo quod dicitur, quod *nullum sacrificium est Deo magis acceptum quam zelus animarum*, non praeteritur meritum vitae activae merito vitae contemplativae; sed ostenditur magis esse meritorium, si quis offerat Deo animam suam, & aliorum, quam quaecumque alia exteriora dona.

### ARTICULUS III. 363

*Utrum vita contemplativa impediatur per vitam activam.*

**A**D tertium sic proceditur. Videtur quod vita contemplativa impediatur per vitam activam. Ad vitam enim contemplativam necessaria est quadam vacatio mentis, secundum illud Psal. xlv. 11. *Vacate, & videte, quoniam ego sum Deus*. Sed vita activa habet inquietudinem, secundum illud Lucae x. 41. *Marta, Marta sollicita es, & turbaris erga plurima*. Ergo vita activa contemplativam impedit.

2. Praeterea. Ad vitam contemplativam requiritur claritas visionis. Sed vita activa impedit visionis claritatem: dicit enim Gregorius super Ezech. (hom. xiv. post med.) quod *Lia sippa est, & secunda: quia activa vita, dum occupatur*

ARTICULUS IV. 863

*Utrum vita activa sit prior quam contemplativa.*

*sur in opere, minus videt. Ergo vita activa contemplativam impedit.*

3. Præterea. Unum contrariorum impeditur per aliud. Sed vita activa, & contemplativa videntur contrarietatem habere ad invicem, quia vita activa occupatur circa plurima, vita autem contemplativa insiluit ad contemplandum unum: unde ex opposito dividuntur. Ergo videtur quod vita contemplativa impediatur per activam.

Sed contra est quod Gregorius dicit in VI. Moral. (cap. xvii. vcl' fi.) *Qui contemplationis arcem tenere desiderant, prius se in campo operis per exercitium probent.*

Respondeo dicendum, quod vita activa potest considerari quantum ad duo. Uno modo quantum ad ipsum studium, & exercitium exteriorum actionum: & sic manifestum est quod vita activa impedit contemplativam, inquantum impossibile est quod aliquis simul occupetur circa exteriores actiones, & divinæ contemplationi vacet.

Alio modo potest considerari vita activa quantum ad hoc quod interiores animæ passionnes componit, & ordinat: & quantum ad hoc vita activa adjuvat ad contemplationem, quæ impeditur per inordinationem interiorum passionum. Unde Gregorius dicit in VI. Mor. (loc. cit.) *Cum contemplationis arcem aliqui tenere desiderant, prius se in campo operis per exercitium probent; ut solite sciant, si nulla iam mala proximis irrogant, si irrogata a proximis æquanimitè portant, si obiectis bonis temporalibus nequaquam mens lætatur solvitur, si subtrahis non nimio dolore sauciatur: ac deinde perpendant, si eum ad semetipsum intrans redunt, in eo quod spiritualia rimantur, nequaquam secum rerum corporalium umbras trabunt, vel fortasse trahat manu discretionis abigunt.* Ex hoc ergo exercitium vitæ activæ confert ad contemplativam, quod quietat interiores passionnes, ex quibus phantasmata proveniunt, per quæ contemplatio impeditur.

Et per hoc patet responsio ad obiecta. Nam rationes illæ procedunt quantum ad ipsam occupationem exteriorum actuum, non autem quantum ad effectum, qui est moderatio passionum.

AD quartum sic proceditur. Videtur quod vita activa non sit prior quam contemplativa. Vita enim contemplativa directe pertinet ad dilectionem Dei; vita autem activa ad dilectionem proximi. Sed dilectio Dei præcedit dilectionem proximi, inquantum proximus propter Deum diligitur. Ergo videtur quod etiam vita contemplativa sit prior quam activa.

2. Præterea. Gregorius dicit super Ezech. (hom. xiv. a. med.) *Sciendum est, quod sicut bonus ordo vivendi est ut ab activa in contemplativam tendatur; ita plerumque utiliter a contemplativa animus ad activam refertur.* Non ergo simpliciter vita activa est prior quam contemplativa.

3. Præterea. Ea quæ diversis competunt, non videntur ex necessitate ordinem habere. Sed vita activa, & contemplativa diversis competunt: dicit enim Gregorius in VI. Moral. (cap. xvii. ante med.) *Sæpe qui contemplari Deum quieti poterant, occupationibus pressi ecciderunt; & sæpe qui occupati bene assibus humanis viverent, gladio suæ quietis extincti sunt.* Non ergo vita activa prior est quam contemplativa.

Sed contra est quod Gregorius dicit super Ezech. (hom. xii. parum ante med.) *Activa vita prior est tempore quam contemplativa: quia ex bono opere tenditur ad contemplationem.*

Respondeo dicendum, quod aliquid dicitur esse prius dupliciter. Uno modo secundum suam naturam: & hoc modo vita contemplativa est prior quam activa, inquantum prioribus, & melioribus insiluit: unde & activam vitam movet, & dirigit. Ratio enim superior, quæ contemplationi deputatur, comparatur ad inferiorem, quæ deputatur actioni, sicut vir ad mulierem, quæ est per virum regenda, ut Augustinus dicit XII. de Trinit. (cap. xii.)

Alio modo est aliquid prius quoad nos, quod scilicet est prius in via generationis: & hoc modo vita activa est prior quam contemplativa, quia disponit ad contemplativam, ut ex supradictis patet (quæst. clxxxii. art. 1. ad 3.) Dispositio enim in via generationis præcedit

dit formam, quæ simpliciter, & secundum suam naturam est prior.

Ad primum ergo dicendum, quod vita contemplativa non oritur ad qualemcumque dilectionem Dei, sed ad perfectam; sed vita activa est necessaria ad dilectionem proximi qualemcumque: unde Gregorius dicit super Ezech. (loc. sup. cit.) *Sine contemplativa vita intrare possunt ad celestem patriam qui bona, quæ possunt, operari non negligunt; sine activa autem intrare non possunt, si negligunt bona operari quæ possunt.* Ex quo etiam patet quod vita activa præcedit contemplativam, sicut id quod est commune omnium, præcedit in via generationis id quod est proprium perfectiorum.

Ad secundum dicendum, quod a vita activa proceditur ad vitam contemplativam secundum ordinem generationis; a vita autem contemplativa reditur ad vitam activam per viam directionis; ut scilicet vita activa per contemplationem dirigatur; sicut etiam per operationes acquiratur habitus, & per habitum acquisitum perfectius aliquis operatur, ut dicitur in II. Ethic. (cap. 1. 11. & 14.)

Ad tertium dicendum, quod illi qui sunt proni ad passionem propter earum impetum ad agendum, sunt simpliciter magis apti ad vitam activam propter spiritus iniquitatem. Unde dicit Gregorius in VI. Moral. (cap. xvii. ante med.) quod nonnulli ita inquirunt, ut si vacationem laboris habuerint, gravius laborent: quia tanto deteriores cordis tumultus tolerant, quanto eis licentius ad cogitationem vacat. Quidam vero habent naturaliter animi puritatem, & quietem, per quam ad contemplationem sunt apti; qui si totaliter actionibus deputentur, detrimentum sustinebunt. Unde Gregorius dicit in VI. Moral. (loc. cit.) quod quorundam hominum ita otiose mentes sunt, ut si eos labor occupationis excipiat, in ipsa operis incoactione succumbant. Sed, sicut ipse postea subdit (ibid. a med.) *Laps & pigra mentes amor ad opus excitat, & inquietas in contemplatione timor refrenat.* Unde & illi qui sunt magis apti ad activam vitam, possunt per exercitium activæ ad contemplativam præparari; & illi nihilominus qui sunt magis ad contemplativam apti, possunt exercitia vitæ activæ subire, ut per hoc ad contemplationem paratiores reddantur.

## QUAESTIO CLXXXIII.

*De officiis, & variis statibus hominum, in generali,*

*in quatuor articulos divisa.*

**C**onsequenter considerandum est de diversitate statuum, & officiorum humanorum: & primo considerandum est de officiis, & statibus hominum in generali; secundo specialiter de statu perfectiorum.

Et circa primum quærentur quatuor.

Primo, quid faciat in hominibus statum.

Secundo, utrum in hominibus debeant esse diversi status, sive diversa officia.

Tertio de differentia officiorum.

Quarto de differentia statuum.

## ARTICULUS I. 864

*Utrum status in sui ratione importet conditionem libertatis, vel servitutis.*

*Inf. art. 4. cor. & quæst. clxxxiv. art. 4. cor. & quæst. clxxxvi. art. 6. cor. & quol. 11. art. 17. corp.*

**A**d primum sic proceditur. Videtur quod status in sui ratione non importet conditionem libertatis, vel servitutis. Status enim a stando dicitur. Sed stare dicitur aliquis ratione rectitudinis; unde dicitur Ezech. 11. 1. *Fili hominis sta super pedes tuos*; & Gregorius dicit in VII. Moral. (cap. xvii. cir. med.) *Ab omni statu rectitudinis depersunt qui per noxia verba dilabuntur.* Sed rectitudinem spirituales acquirunt homo per hoc quod subicit suam voluntatem Deo: unde super illud Psal. xxxii. *Rectos decet collaudatio*, dicit Glossa (ordin. Augustini: ) „Recti sunt qui dirigunt cor suum secundum voluntatem Dei.“ Ergo videtur quod sola obedientia divinatorum mandatorum sufficiat ad rationem status.

2. Præterea. Nomen status videtur importare immobilitatem, secundum illud I. ad Cor. xv. 58. *Stabilis estote, & immobiles*: unde Gregorius dicit super Ezech. (hom. xxi. aliquant. princ.) *Lapis quadrus est, & quasi ex omni latere statum habet, qui cassum in aliqua permutatione non habet.* Sed virtus est quæ im-

immobilitate facit operari, ut dicitur in II. Ethic. (cap. 1. & 11.) Ergo videtur quod ex omni operatione virtuosa aliquis status adificatur.

3. Præterea. Nomen status videtur ad quandam altitudinem pertinere: nam ex hoc aliquis stat quod in altum erigitur. Sed per diversa officia aliquis fit altior altero: similiter etiam per gradus, vel ordines diversos diversimode homines in quadam altitudine constituuntur. Ergo sola diversitas graduum, vel ordinum, vel officiorum sufficit ad diversificandum statum.

Sed contra est quod in Decr. 11. quaest. vi. (cap. xl.) dicitur: *Si quando in causa capitali, vel causa status interpellatum fuerit, non per procuratores, sed per seipsum est agendum: ubi causa status appellatur pertinet ad libertatem, vel servitutem.* Ergo videtur quod non variet statum hominis, nisi id quod pertinet ad libertatem, vel servitutem.

Respondeo dicendum, quod status, proprie loquendo, significat quandam positionis differentiam, secundum quam aliquid disponitur, secundum modum suae naturae, quasi in quadam immobilitate. Est enim naturale homini ut caput eius in superiora tendat, & pedes in terra firmenentur, & cetera membra media convenienti ordine disponantur: quod quidem non accidit, si homo iaceat, vel sedeat, vel accumbat, sed solum quando erectus stat: nec rursus stare dicitur, si moveatur, sed quando quiescit. Et inde est quod etiam in ipsis actionibus humanis dicitur negotium aliquem statum habere secundum ordinem propriae dispositionis cum quadam immobilitate, seu quiete.

Unde & circa homines, ea quae de facili circa eos variantur, & extrinseca sunt, non consuevunt statum; puta quod aliquis sit dives, vel pauper, in dignitate constitutus, vel plebeius, vel si quid aliud est huiusmodi. Unde & in Iure civili (Lib. Cassus et seq. ff. de Senatorib.) dicitur, quod ei qui a senatu amovetur, magis dignitas quam status auferatur. Sed solum id videtur ad statum hominis pertinere quod respicit obligationem personae hominis, prout scilicet aliquis est sui iuris, vel alieni: & hoc non ex aliqua causa levi, vel de facili mutabili, sed ex aliquo permanente: & hoc est quod pertinet ad rationem libertatis, vel servitutis. Unde status pertinet proprie ad libertatem, vel ser-

vitutem sive in spiritualibus, sive in civilibus.

Ad primum ergo dicendum, quod restitudo, in quantum huiusmodi, non pertinet ad rationem status, sed solum in quantum est connaturalis homini, simul addita quadam quiete. Unde in aliis animalibus non requiritur restitudo; ad hoc quod stare dicantur; nec etiam homines stare dicuntur, quantumcumque sint recti, nisi quiescant.

Ad secundum dicendum, quod immobilitas non sufficit ad rationem status: nam etiam sedens, vel iacens quiescit, qui tamen non dicitur stare.

Ad tertium dicendum, quod officium dicitur per comparationem ad alium; gradus autem dicitur secundum ordinem superioritatis, & inferioritatis. Sed ad statum requiritur immobilitas in eo quod pertinet ad conditionem personae.

## ARTICULUS II. 86g

*Utrum in Ecclesia debeat esse diversitas officiorum, seu statuum.*

**A**D secundum sic proceditur. Videtur quod in Ecclesia non debeat esse diversitas officiorum, vel statuum. Diversitas enim unitati repugnat. Sed fideles Christi ad unitatem vocantur, secundum illud Ioan. xvii. 21. *Ut sint unum in nobis, sicut & nos unum sumus.* Ergo in Ecclesia non debet esse diversitas officiorum, sive statuum.

2. Præterea. Natura non facit per multa quod potest facere per unum. Sed operatio gratiae est multo ordinatio quam operatio naturae. Ergo convenientius esset quod ea quae pertinent ad actus gratiae, per eisdem homines administrarentur; ita ut non esset in Ecclesia diversitas officiorum, & statuum.

3. Præterea. Bonum Ecclesiae maxime videtur in pace consistere, secundum illud Psal. cxlviii. 3. *Qui posuit fines tuos pacem: & II. ad Cor. ult. 11. dicitur: Pacem habete, & Deus pacis erit vobiscum.* Sed diversitas est impeditiva pacis, quam similitudo causare videtur, secundum illud Eccli. xiii. 19. *Omne animal diligit simile sibi:* & Philosophus dicit in V. Politic. (cap. 14.) quod *medica differentia facit in civitate dissidium.* Ergo videtur quod non oporteat in Ecclesia esse diversitatem statuum, & officiorum.

Sed contra est quod in Psal. xlv. ad laudem Ecclesiae dicitur, quod est circum-

*eumamiffa varietate*, ubi Glossa (ord Cassiod. sup. illud, *Circumdata varietate*) dicit, quod „doctrina Apostolorum, & confessione Martyrum, & puritate Virginum, & lamento Poenitentium ornatur Regina,“ idest Ecclesia. Respondeo dicendum, quod diversitas statuum, & officiorum in Ecclesia ad tria pertinet.

Primo quidem ad perfectionem ipsius Ecclesiae. Sicut enim in rerum naturalium ordine perfectio, quae in Deo simpliciter, & uniformiter invenitur, in universitate creaturarum inveniri non potest, nisi difformitet, & multipliciter; ita etiam plenitudo gratiae, quae in Christo sicut in capite adunatur, ad membra eius diversimode redundat, ad hoc quod corpus Ecclesiae sit perfectum. Et hoc est quod Apostolus dicit ad Ephes. iv. 11. *Ipsē dedit quosdam quidem Apostolos, quosdam autem Prophetas, alios vero Evangelistas, alios autem Pastores, & Doctores ad consummationem sanctorum*. Secundo autem pertinet ad necessitatem actionum, quae sunt in Ecclesia necessariae. Oportet autem ad diversas actiones diversos homines deputari, ad hoc quod expeditur, & sine confusione omnia peragantur: & hoc est quod Apostolus dicit ad Rom. xii. 4. *Sicut in uno corpore multa membra habemus, omnia autem membra non eundem actum habent*; ita multi unum corpus sumus in Christo. Tertio pertinet ad dignitatem, & pulchritudinem Ecclesiae, quae in quodam ordine consistit: unde dicitur III. Reg. x. 5. quod videns Regina Saba omnem sapientiam Salomonis, & habitacula servorum, & ordines ministrantium, non habebat ultra spiritum. Unde & Apostolus dicit II. ad Timoth. ii. 20. quod in magna domo non solum sunt vasa aurea, & argentea, sed & lignea, & fictilia.

Ad primum ergo dicendum, quod diversitas statuum, & officiorum non impedit Ecclesiae unitatem, quae perficitur per unitatem fidei, & caritatis, & mutuae subordinationis, secundum illud Apostoli ad Ephes. iv. 16. *Ex quo totum corpus est compactum, scilicet per fidem, & connexum, scilicet per caritatem, per omnem iuncturam subordinationis, dum scilicet unus alii servit*.

Ad secundum dicendum, quod sicut natura non facit per multa quod potest facere per unum; ita etiam non coar-

dat in unum id ad quod multa requiruntur, secundum illud Apostoli I. ad Corinth. xii. 17. *Si totum corpus oculus, ubi auditus? Unde & in Ecclesia, quae est corpus Christi, oportuit membra diversificari secundum diversa officia, statum, & gradum*.

Ad tertium dicendum, quod sicut in corpore naturali membra diversa continentur in unitate per virtutem spiritus vivificantis, quo abscedente membra corporis separantur; ita etiam in corpore Ecclesiae conservatur pax diversorum membrorum virtute spiritus sancti, qui corpus Ecclesiae vivificat, ut habetur Ioan. vi. Unde Apostolus dicit ad Ephes. iv. 3. *Solliciti servare unitatem spiritus in vinculo pacis*. Discedit autem aliquis ab hac unitate spiritus, dum quaerit quae sibi sunt propria; sicut etiam in terrena civitate pax tollitur ex hoc quod cives singuli quae sua sunt quaerunt. Alioquin per officiorum, & statuum distinctionem tam mentis, quam civitatis terrenae magis pax conservatur, in quantum per hanc plures sunt qui communicant actibus publicis. Unde & Apostolus dicit I. ad Corinth. xii. 24. quod *Deus temperavit (a) nos, ut non fistissima in corpore, sed pro invicem sollicita sint membra*.

## ARTICULUS III. 866

*Utrum officia distinguantur per actus.*

**A**D tertium sic proceditur. Videtur quod officia non distinguantur per actus. Sunt enim infinitae diversitates humanorum actuum tam in spiritualibus, quam in temporalibus. Sed infinitorum non potest esse certa distinctio. Ergo per diversitates actuum non potest esse humanorum officiorum certa distinctio.

2. Praeterea. Vita activa, & contemplativa secundum actus distinguuntur, ut dictum est (quaest. clxxxix. art. 1.) Sed alia videtur esse distinctio officiorum a distinctione vitarum. Non ergo officia distinguuntur per actus.

3. Praeterea. Ordines etiam ecclesiastici, & status, & gradus per actus distinguuntur. Si ergo officia distinguantur per actus, videtur sequi quod eadem sit distinctio officiorum, graduum, & statuum. Hoc autem est falsum, quia diversimode in suas partes dividuntur.

Non

(a) Ita edit. omnes. In quibusdam mss. deest nos. Vulgata: Deus temperavit corpus ei cui dicitur. . . ut non sit: &c.

Non ergo videtur quod officia distinguantur per actus.

Sed contra est quod Isidorus in Lib. VI. Etym. (cap. xviii. in princ.) dicit, quod officium ab efficiendo est dictum, quasi efficium, propter decorem sermonis; una mutata littera. Sed efficere pertinet ad actionem. Ergo officia per actus distinguuntur.

Respondeo dicendum, quod, sicut dictum est (art. præc.) diversitas in membris Ecclesie ad tria ordinatur, scilicet ad perfectionem, actionem, & decorem; & secundum hæc tria triplex distinctio diversitatis fidelium accipi potest. Una quidem per respectum ad perfectionem; & secundum hoc accipitur differentia statuum, prout quidam sunt aliis perfectiores.

Alia vero distinctio accipitur per respectum ad actionem; & hæc est distinctio officiorum: dicuntur enim in diversis officiis esse qui sunt ad diversas actiones deputati.

Alia autem per respectum ad ordinem pulchritudinis ecclesiasticæ: & secundum hoc accipitur differentia graduum, prout scilicet etiam in eodem statu, vel officio unus est alio superior. Unde & in Psal. xlvii. 3. dicitur secundum aliam litteram (LXX. Interp.) Deus (a) in gradibus eius cognoscitur.

Ad primum ergo dicendum, quod materialis diversitas humanorum actuum est infinita: & secundum hanc non distinguuntur officia, sed secundum formalem diversitatem, quæ accipitur secundum diversas species actuum, secundum quam actus hominis non sunt infiniti.

Ad secundum dicendum, quod vita dicitur absolute; & ideo diversas vitam accipitur secundum diversos actus qui conveniunt homini secundum seipsum. Sed efficientia, a qua sumitur nomen officii, ut dictum est (in arg. sed cont.) importat actionem tendentem in aliud, ut dicitur in IX. Metaphys. (tex. 16.) Et ideo officia distinguuntur proprie secundum actus qui referuntur ad alios; sicut dicitur doctor habere officium, vel iudex, & sic de aliis. Et ideo Isidorus dicit (loc. sup. cit.) quod officium est ut quisque illa agat quæ nulli officiant, id est noceant, sed profint omnibus.

Ad tertium dicendum, quod diversitas statuum, officiorum, & graduum secundum diversa sumitur, ut dictum est (art. 1. hu. quæst. ad 3.) Contingit tamen quod ista tria in eodem concurrent;

pura cum aliquis deputatur ad aliquem actum altiore, simul ex hoc habet & officium, & gradum, & ulterius quendam perfectionis statum propter actus subtilitatem, sicut patet de Episcopo. Ordines autem ecclesiastici specialiter distinguuntur secundum diversa officia. Dicit enim Isidorus in Lib. VI. Etymol. (loc. sup. cit.) Officiorum plurima genera sunt; sed præcipuum illud est quod in sacris, divinisque rebus habetur.

#### ARTICULUS IV. 867

Utrum differentia statuum attendatur secundum incipientes, proficientes, & perfectos.

Sup. quæst. xxiv. art. 7. & Psal. xxiv. & 1/a. xlv.

AD quartum sic proceditur. Videtur quod differentia statuum non attendatur secundum incipientes, proficientes, & perfectos. Diversorum enim generum diversæ sunt & specie differentia. Sed secundum hanc differentiam inchoationis, profectus, & perfectionis dividuntur gradus caritatis, ut supra habitum est (quæst. xxiv. art. 9.) cum de caritate ageretur. Ergo videtur quod secundum hoc non sit accipienda differentia statuum.

2. Præterea. Status, sicut dictum est (art. 1. hu. quæst.) respicit conditionem servitutis, vel libertatis: ad quam non videtur pertinere prædicta differentia incipientium, proficientium, & perfectorum. Ergo inconvenienter status per ista dividitur.

3. Præterea. Incipientes, proficientes, & perfecti distinguuntur secundum magis, & minus; quod videtur magis pertinere ad rationem gradus. Sed alia est divisio graduum, & statuum, ut supra dictum est (art. 2. & 3. præc.) Non ergo convenienter dividitur status secundum incipientes, proficientes, & perfectos.

Sed contra est quod Gregorius dicit in Moral. (Lib. XXIV. cap. vii. aliquant. a princ.) Tres sunt modi conversorum, inchoatio, medietas, atque perfectio: & super Ezech. (hom. xv. aliquant. a princ.) dicit, quod aliud sunt virtutis exordia, aliud profectus, aliud perfectio.

Respondeo dicendum, quod, sicut supra dictum est (art. 1. hu. quæst.) status

Z 2 tus

(\*) *Virgata* in domibus.



tus libertatem respicit, vel servitutem. Invenitur autem in rebus spiritualibus duplex servitus, & duplex libertas: una quidem est servitus peccati; altera vero est servitus iustitiae. Similiter etiam est duplex libertas: una quidem a peccato; alia vero a iustitia, ut patet per Apostolum, qui dicit ad Rom. vi. 20. *Cum servi essetis peccati, liberi sumistis iustitiae; nunc vero liberati a peccato, servi estis facti Deo.*

Est autem servitus peccati, vel iustitiae, cum aliquis vel ex habitu peccati ad malum inclinatur, vel ex habitu iustitiae inclinatur ad bonum: similiter etiam libertas a peccato est, cum aliquis ab inclinatione peccati non superatur: libertas autem a iustitia est, cum aliquis propter amorem iustitiae non retardatur a malo. Verumtamen quia homo secundum naturalem rationem ad iustitiam inclinatur, peccatum autem est contra naturalem rationem, consequens est quod libertas a peccato sit vera libertas: quae coniungitur servituti iustitiae, quia per utrumque tendit homo in id quod est conveniens sibi: & similiter vera servitus est servitus peccati; cui coniungitur libertas a iustitia, quia scilicet per hoc homo impeditur ab eo quod est proprium sibi.

Hoc autem quod homo efficiatur servus iustitiae, vel peccati, contingit per humanum studium, sicut Apostolus dicit ibidem: *Cui exhibetis vos servos ad obediendum, servi eius estis, cui obedistis, sive peccati ad mortem, sive obediuntis ad iustitiam.* In omni autem humano studio est accipere principium, medium, & terminum: & ideo consequens est quod status spiritualis servitutis, & libertatis secundum tria distinguantur, scilicet secundum principium, ad quod pertinet status incipientium; & medium, ad quod pertinet status proficientium; & terminum, ad quem pertinet status perfectiorum.

Ad primum ergo dicendum, quod libertas a peccato sit per caritatem, quae diffunditur in cordibus nostris per Spiritum sanctum, qui datus est nobis, ut dicitur ad Rom. v. Et inde est quod dicitur II. ad Corinth. xii. 17. *Ubi Spiritus Domini, ibi libertas.* Et ideo eadem est divisio caritatis, & statuum pertinentium ad spirituales libertatem.

Ad secundum dicendum, quod incipientes, proficientes, & perfecti, secundum quod per hoc status diversi distin-

guuntur, dicuntur homines non secundum quodcumque studium, sed secundum studium eorum quae pertinent ad spirituales libertatem, vel servitutem, ut dictum est (in corp. art. & ar. 1. huius quæst.)

Ad tertium dicendum, quod, sicut prius dictum est (art. præc. ad 3.) nihil prohibet, id idem concurrere gradum, & statum. Nam & in rebus mundanis illi qui sunt liberi, non solum sunt altius status quam servi, sed etiam sunt altioris gradus.

## QUAESTIO CLXXXIV.

*De his quae pertinent ad statum perfectionis in communi, in octo articulos divisa.*

**D**Einde considerandum est de his quae pertinent ad statum perfectionis, ad quem alii status ordinantur. Nam consideratio officiorum, quantum quidem ad alios actus, pertinet ad legis positores; quantum autem ad sacra ministeria, pertinet ad considerationem ordinum, de quibus in tertia parte agetur.

Circa statum autem perfectiorum triplex consideratio occurrit. Primo quidem de statu perfectionis in communi; secundo de his quae pertinent ad perfectionem Episcoporum; tertio de his quae pertinent ad perfectionem Religiosorum.

Circa primum quaeruntur octo.

Primo, utrum perfectio attendatur secundum caritatem.

Secundo, utrum aliquis possit esse perfectus in hac vita.

Tertio, utrum perfectio huius vitae consistat principaliter in consiliis, vel in præceptis.

Quarto, utrum quicumque est perfectus, sit in statu perfectionis.

Quinto, utrum prælati, & religiosi specialiter sint in statu perfectionis.

Sexto, utrum omnes prælati sint in statu perfectionis.

Septimo, qui status sit perfectior, utrum religiosorum, vel Episcoporum.

Octavo de comparatione religiosorum ad plebanos, & archidiaconos.

ARTICULUS I. 868

*Utrum perfectio christiane vitae attendatur specialiter secundum caritatem.*

III. P. quæst. xlv. art. 3. co. & III. con. cap. cxxxv. & qual. 111. art. 17. & opusc. xviii. cap. 11. & 111. & Philip. 111. lect. 2.

**A**D primum sic proceditur. Videtur quod perfectio christiane vitae non attendatur specialiter secundum caritatem. Dicit enim Apostolus I. ad Corinth. xiv. 20. *Malitia parvuli estote, sensibus autem perfecti*. Sed caritas non pertinet ad sensum, sed magis ad affectum. Ergo videtur quod perfectio christiane vitae non consistat principaliter in caritate.

2. Præterea. Ad Ephes. ult. 13. dicitur: *Accipite armaturam Dei, ut possitis resistere in die malo, & in omnibus perfecti stare*: de armatura autem Dei subiungit, dicens: *Stare succincti lumbos vestros in veritate, & induiti loriceam iustitiæ, in omnibus sumentes scutum fidei*. Ergo perfectio christiane vitae non solum attenditur secundum caritatem, sed etiam secundum alias virtutes.

3. Præterea. Virtutes specificantur per actus, sicut & alii habitus. Sed Iacobi 1. 4. dicitur, quod *patientia opus perfectum habet*. Ergo videtur quod status perfectionis attendatur magis secundum patientiam.

Sed contra est quod dicitur ad Coloss. 111. 14. *Super omnia caritatem habete, quæ est vinculum perfectionis*, quia scilicet omnes alias virtutes quodammodo ligat in unitatem perfectam.

Respondeo dicendum, quod unumquodque dicitur esse perfectum, in quantum attingit proprium finem, qui est ultima rei perfectio. Caritas autem est quæ unit nos Deo, qui est ultimus finis humanæ mentis: quia *qui manet in caritate, in Deo manet, & Deus in eo*, ut dicitur I. Ioan. iv. 16. Et ideo secundum caritatem specialiter attenditur perfectio christiane vitæ.

Ad primum ergo dicendum, quod perfectio humanorum sensuum præcipue in hoc videtur consistere ut in unitatem veritatis conveniant, secundum illud I. ad Corinth. 1. 10. *Sitis perfecti in eodem sensu, & in eadem sententia*. Hoc autem fit per caritatem, quæ consensum in hominibus operatur. Et ideo etiam

S. Tb. Oper. Tom. XXIII.

perfectio sensuum radicaliter in perfectione caritatis consistit.

Ad secundum dicendum, quod dupliciter potest dici aliquis perfectus. Uno modo simpliciter: quæ quidem perfectio attenditur secundum id quod pertinet ad ipsam rei naturam; puta si dicatur animal perfectum, quando nihil ei deficit ex dispositione membrorum, & aliis huiusmodi, quæ requiruntur ad vitam animalis. Alio modo dicitur aliquis perfectus secundum quid: quæ quidem perfectio attenditur secundum aliquid exteriori adiacens, puta in albedine, vel nigredine, vel aliquo huiusmodi. Vita autem christiana specialiter in caritate consistit, per quam anima Deo coniungitur: unde dicitur I. Ioan. 111. 14. *Qui non diligit, manet in morte*. Et ideo secundum caritatem attenditur simpliciter perfectio christiane vitæ, sed secundum alias virtutes secundum quid. Et quia id quod est simpliciter, est principalissimum, & maximum respectu aliorum, inde est quod perfectio caritatis est principalissima respectu perfectionis, quæ attenditur secundum alias virtutes.

Ad tertium dicendum, quod patientia dicitur habere opus perfectum in ordine ad caritatem, in quantum scilicet ex abundantia caritatis provenit quod aliquis patienter toleret adversa, secundum illud ad Rom. viii. 35. *Quis nos separabit a caritate Dei? tribulatio, an angustia?* &c.

ARTICULUS II. 869

*Utrum aliquis in hac vita possit esse perfectus.*

Sup. quæst. xxiv. art. 8. & III. dist. xxix. quæst. 1. art. 8. quæst. 2. & ver. quæst. 2. art. 1. & Eph. vi. lect. 4. & Phil. 111. lect. 2. & lect. 3. princ.

**A**D secundum sic proceditur. Videtur quod nullus in hac vita possit esse perfectus. Dicit enim Apostolus I. Cor. xiii. 10. *Cum venerit quod perfectum est, evacuabitur quod ex parte est*. Sed in hac vita non evacuatur quod ex parte est: manent enim in hac vita fides, & spes, quæ sunt ex parte. Ergo nullus in hac vita est perfectus.

2. Præterea. Perfectum est cui nihil deest, ut dicitur in III. Physic. (tex. 63.) Sed nullus est in hac vita cui non desit aliquid: dicitur enim Iacobi 111. 2. *In multis offendimus omnes: & in*

Z 3

Pial.

*Psal. cxxxviii. 16. dicitur: Imperfectum meum viderunt oculi tui. Ergo nullus est in hac vita perfectus.*

3. Præterea. Perfectio vitæ christianæ, sicut dictum est (art. præc.) attenditur secundum caritatem, quæ sub se comprehendit dilectionem Dei, & proximi. Sed quantum ad dilectionem Dei, non potest aliquis perfectam caritatem in hac vita habere: quia, ut Gregorius dicit super Ezech. (hom. xiv. parum a med.) *amoris ignis, qui hic ardere incipit, cum ipsum quem amat, viderit, amplius in amore ipsius ignescit: neque etiam quantum ad dilectionem proximi, quia non possumus in hac vita omnes proximos æqualiter diligere, etiam habitualiter eos diligamus: dilectio autem habitualis imperfecta est.* Ergo videtur quod nullus in hac vita possit esse perfectus.

Sed contra est quia lex divina non inducit ad impossibile. Inducit autem ad perfectionem, secundum illud Matth. v. 48. *Estote perfecti, sicut & Pater vester cælestis perfectus est.* Ergo videtur quod aliquis in hac vita possit esse perfectus.

Respondeo dicendum, quod, sicut dictum est (art. præc.) perfectio vitæ christianæ in caritate consistit: Importat autem perfectio quamdam universalitatem: quia, ut dicitur in III. Phys. (tex. 63.) perfectum est cui nihil deest. Potest ergo triplex perfectio considerari. Una quidem absoluta, quæ attenditur non solum secundum totalitatem ex parte diligentis, sed etiam ex parte diligibilis, prout scilicet Deus tantum diligitur, quantum diligibilis est: & talis perfectio non est possibilis alicui creaturæ, sed competit soli Deo, in quo bonum integraliter, & essentialiter invenitur.

Alia autem est perfectio quæ attenditur secundum totalitatem absolutam ex parte diligentis; prout scilicet affectus secundum totum suum posse semper actualiter tendit in Deum: & talis perfectio non est possibilis in via, sed erit in patria.

Tertia autem est perfectio quæ neque attenditur secundum totalitatem ex parte diligibilis, neque secundum totalitatem ex parte diligentis, quantum ad hoc quod semper actu feratur in Deum, sed quantum ad hoc quod excludantur ea quæ repugnant motui dilectionis in Deum, sicut Augustinus dicit in Lib. lxxxiii. Q. 9. (quæst. xxxvi. non longe a princ.) quod

*venenum caritatis est cupiditas, perfectio nulla cupiditas.* Et talis perfectio potest in hac vita haberi; & hoc dupliciter. Uno modo inquantum ab affectu hominis excluditur omne illud, quod contrariatur caritati, sicut est peccatum mortale: & sine tali perfectione caritas esse non potest, unde est de necessitate salutis. Alio modo inquantum ab affectu hominis excluditur non solum illud quod est caritati contrarium, sed etiam omne illud quod impedit ne affectus mentis totaliter dirigatur ad Deum: sine qua perfectione caritas esse potest, puta in incipientibus, & proficientibus.

Ad primum ergo dicendum, quod Aristoteli ibi loquitur de perfectione patriæ, quæ non est in via possibilis.

Ad secundum dicendum, quod illi qui sunt in hac vita perfecti, in multis dicuntur offendere secundum peccata venialia, quæ consequuntur ex infirmitate præsentis vitæ: & quantum ad hoc etiam habent aliquid imperfectum per comparisonem ad perfectionem patriæ.

Ad tertium dicendum, quod sicut status præsentis vitæ non patitur ut homo semper actu feratur in Deum; ita etiam non patitur quod actu feratur in omnes proximos singillatim; sed sufficit quod feratur communiter in omnes in universali, & in singulos habitualiter, & secundum animi præparationem. Potest autem etiam circa dilectionem proximi duplex perfectio attendi, sicut & circa dilectionem Dei: una quidem, sine qua caritas esse non potest, ut scilicet homo nihil habeat in affectu quod sit contrarium dilectioni proximi; alia autem, sine qua caritas inveniri potest: quæ quidem attenditur tripliciter. Primo quidem secundum extensionem dilectionis, ut scilicet aliquis non solum diligit amicos, & notos, sed etiam extraneos, & ulterius inimicos: hoc enim, ut dicit Augustinus in Enchirid. (cap. lxxxiii.) *est perfectiorum filiorum Dei.* Secundo secundum intentionem, quæ ostenditur ex his quæ homo propter proximum contemnit, ut scilicet homo contemnat non solum exteriora bona propter proximum, sed etiam afflictiones corporales, & ulterius mortem, secundum illud Ioan. xv. 13. *Maiorem dilectionem nemo habet quam ut animam suam ponat quis pro amicis suis.* Tertio quantum ad effectum dilectionis, ut scilicet homo pro-

proximis impendat non solum temporalia beneficia, sed etiam spiritualia, & ulterius seipsum, secundum illud Apostoli II. ad Corinth. xii. 15. *Ego autem libentissime impendam, & superimpendar ipse pro animabus vestris.*

ARTICULUS III. 870

*Utrum perfectio consistat in praeceptis, an in consiliis.*

III. cont. cap. cxxx. & quoli. II. cap. xxiv. ad 2. & op. xviii. cap. vi.

**A**D tertium sic proceditur. Videtur in praeceptis, sed in consiliis. Dicit enim Dominus Matth. xix. 21. *Si vis perfectus esse, vende, vende omnia quae habes, & da pauperibus, & veni sequere me.* Sed istud est consilium. Ergo perfectio attenditur secundum consilia, & non secundum praecepta.

2. Praeterea. Ad observantiam praeceptorum omnes tenentur, cum sint de necessitate salutis. Si ergo perfectio christianae vitae consistat in praeceptis, sequitur quod perfectio sit de necessitate salutis, & quod omnes ad eam teneantur: quod patet esse falsum.

3. Praeterea. Perfectio christianae vitae attenditur secundum caritatem, ut dictum est (art. I. huius quæst.) Sed perfectio caritatis non videtur consistere in observantia praeceptorum: quia perfectionem caritatis praecedit & augmentum, & inchoatio ipsius, ut patet per Augustinum super Canonic. Ioann. (tract. ix. vers. med.) Non autem potest caritas inchoari ante observationem praeceptorum: quia, ut dicitur Ioan. xiv. 23. *si quis diligit me, sermonem meum servabit.* Ergo perfectio vitae non attenditur secundum praecepta, sed secundum consilia.

Sed contra est quod dicitur Deut. vi. 5. *Diliges Dominum Deum tuum ex toto corde tuo: & Levit. xix. 18. dicitur: Diliges (a) proximum tuum sicut teipsum.* Hæc autem sunt duo praecepta, de quibus Dominus dicit Matth. xxii. 40. *In his duobus praeceptis universa lex pendet, & Propheta.* Perfectio autem caritatis, secundum quam dicitur vita christiana esse perfecta, attenditur secundum hoc quod Deum ex toto corde diligamus, & proximum sicut nos ipsos. Ergo videtur

quod perfectio consistat in observantia praeceptorum.

Respondeo dicendum, quod perfectio dicitur in aliquo consistere dupliciter: uno modo per se, & essentialiter; alio modo secundario, & accidentaliter. Per se quidem, & essentialiter consistit perfectio christianae vitae in caritate; principaliter quidem secundum dilectionem Dei, secundario autem secundum dilectionem proximi, de quibus dantur praecepta principalia divinae legis, ut dictum est (quæst. xlv. art. 2. & 3.) Non autem dilectio Dei, & proximi cadit sub praecepto secundum aliquam mensuram; ita quod id quod est plus, sub consilio remaneat, ut patet ex ipsa forma praecepti, quæ perfectionem demonstrat; ut cum dicitur, *Diliges Dominum Deum tuum ex toto corde tuo*: totum enim, & perfectum idem sunt, secundum Philosophum in III. Phys. (tex. 64) & cum dicitur, *Diliges proximum tuum sicut teipsum*: unusquisque enim seipsum maxime diligit. Et hoc ideo est, quia *finis praeceptis caritas est*, ut Apostolus dicit I. ad Timoth. I. In fine autem non adhibetur aliqua mensura, sed solum in his quæ sunt ad finem, ut Philosophus dicit in I. Politic. (cap. vi. a med.) sicut medicus non adhibet mensuram, quantum sanet, sed quanta medicina, vel diæta utatur ad sanandum. Et sic patet quod perfectio essentialiter consistit in praeceptis: unde Augustinus dicit in Libro de perfectione iustitiæ (cap. viii. vers. fin.) *Cur ergo non præcipitur homini ista perfectio, quamvis eam in hac vita nemo habeat?*

Secundario autem, & instrumentaliter perfectio consistit in consiliis: quæ omnia, sicut & praecepta, ordinantur ad caritatem; sed aliter, & aliter. Nam praecepta alia a praeceptis caritatis ordinantur ad removendum ea quæ sunt caritati contraria, cum quibus scilicet caritas esse non potest; consilia autem ordinantur ad removendum impedimenta actus caritatis, quæ tamen caritati non contrariantur, sicut est matrimonium, occupatio negotiorum secularium, & alia huiusmodi. Unde Augustinus dicit in Enchirid. (cap. cxxi.) *Quaecumque mandat Deus (ex quibus unum est, Non moechaberis) & quaecumque non iubentur, sed speciali consilio monentur (ex quibus unum est, Bonum est homini mulierem non tangere) tunc recte*

*Z 4 sunt,*

(a) *Vulgata amicum.*

*funt, cum referuntur ad diligendum Deum, & proximum propter Deum, & in hoc saeculo, & in futuro.* Et inde est quod in collationibus Patrum (collat. 1. cap. vii. a med.) dicit Abbas Moyses: *Ieiunia, vigiliae, meditatio Scripturarum, nuditas, ac privatio omnium saeculorum, non perfectio, sed perfectionis instrumenta sunt: quia non in ipsis consistit disciplina istius finis, sed per illa pervenitur ad finem: & supra praemittit, quod ad perfectionem caritatis istis gradibus ascendere nitimur.*

Ad primum ergo dicendum, quod in illis verbis Domini aliquid ponitur quasi via ad perfectionem: hoc scilicet quod dicitur, *Vade, vende omnia quae habes, & da pauperibus*; aliud autem lubditur, *in quo perfectio consistit, scilicet quod dicit, Et sequere me.* Unde Hieronymus dicit super Matthaeum (cap. xix. sup. illud, *Ecce nos reliquimus &c.*) quod quia non sufficit tantum relinquere, Petrus adiungit quod perfectum est: *Et secuti sumus te.* Ambrosius autem super illud Lucae v. *Sequere me*, dicit: *Sequi iubet non corporis gressu, sed mentis affectu: quod fit per caritatem.* Et ideo ex ipso modo loquendi apparet quod consilia sunt quaedam instrumenta perveniendi ad perfectionem, dum dicitur: *Si vis perfectus esse, vade, vende &c.* quasi dicat: Hoc faciendo ad hunc finem pervenies.

Ad secundum dicendum, quod, sicut Augustinus dicit in Libro de perfectione iustitiae (cap. viii. ad fin.) *perfectio caritatis homini in hac vita praecipitur: quia non recte curritur, si quo currendum est, nesciatur. Quomodo autem sciretur, si nullis praecipitis ostenderetur?* Cum autem id quod cadit sub praecipito, diversimode possit impleri, non efficitur transgressor praecipii aliquis ex hoc quod non optimo modo implet, sed sufficit quod quocumque modo impleat illud. Perfectio autem divinae dilectionis universaliter quidem cadit sub praecipito; ita quod etiam perfectio patriae non excluditur ab illo praecipito, ut dicit Augustinus (loc. cit.) sed transgressionem praecipii evadit qui quocumque modo perfectionem divinae dilectionis attingit. Est autem infimus divinae dilectionis gradus, ut nihil supra eum, aut contra eum, aut aequaliter ei diligatur: a quo gradu perfectionis qui deficit, nullo modo implet praecipitum. Est autem alius gradus perfectae dilectionis, qui non potest impleri in via, ut dictum est (art. praec.)

a quo qui deficit, manifestum est quod non est transgressor praecipii. Et similiter non est transgressor praecipii qui non attingit ad medios perfectionis gradus, dummodo attingat ad infimum.

Ad tertium dicendum, quod sicut homo habet quandam perfectionem suae naturae, statim cum nascitur, quae pertinet ad rationem speciei; est autem alia perfectio ad quam per augmentum adducitur; ita etiam est quaedam perfectio caritatis pertinet ad ipsam speciem caritatis, ut scilicet Deus super omnia diligatur, & nihil contra eum ametur; est autem alia perfectio caritatis etiam in hac vita, ad quam aliquis per aliquod spirituale augmentum pervenit; ut puta cum homo etiam a rebus licitis abstinet, ut liberius divinis obsequiis vacet.

#### ARTICULUS IV. 871

*Utrum quicumque est perfectus, sit in statu perfectionis.*

*Quod. 1. art. 14. ad 2. & opusc. xviii. cap. xviii.*

**A**D quartum sic proceditur. Videtur quod quicumque est perfectus, sit in statu perfectionis. Sicut enim per augmentum corporale pervenitur ad perfectionem corporalem, ita per augmentum spirituale pervenitur ad perfectionem spirituales, ut dictum est (art. praec. ad 3.) Sed post augmentum corporale aliquis dicitur esse in statu perfectae caritatis. Ergo etiam videtur quod post augmentum spirituale, cum quis iam adeptus est perfectionem, sit in statu perfectionis.

2. Praeterea. Eadem ratione qua aliquid movetur de contrario in contrarium, movetur etiam aliquid de minori ad maius, ut dicitur in V. Physic. (tex. 19.) Sed quando aliquis transmutatur de peccato ad gratiam, dicitur mutare statum, prout distinguitur status culpae a statu gratiae. Ergo videtur quod pari ratione cum aliquis proficit de minori gratia ad maiorem, quousque perveniat ad perfectum adipiscatur perfectionis statum.

3. Praeterea. Statum adipiscitur aliquis ex hoc quod a servitute liberatur. Sed per caritatem aliquis liberatur a servitute peccati: quia *universa delicta operis caritas*, ut dicitur Proverb. x. 12.

Sed

Sed perfectus dicitur aliquis secundum caritatem, ut dictum est (art. i. huius quæstionis.) Ergo videtur quod quicumque habet perfectionem, ex hoc ipso habeat perfectionis statum.

Sed contra est quod aliqui sunt in statu perfectionis qui omnino caritate, & gratia carent, sicut mali Episcopi, aut mali religiosi. Ergo videtur quod e contrario aliqui habent perfectionem vitæ, qui tamen non habent perfectionis statum.

Respondeo dicendum, quod, sicut supra dictum est (quæst. præc. art. i.) status proprie pertinet ad conditionem libertatis, vel servitutis. Spiritualis autem libertas, vel servitus potest in homine attendi dupliciter: uno modo secundum id quod interius agitur; alio modo secundum id quod agitur exterius. Et quia, ut dicitur 1. Reg. xvi. 7. *homines vident ea quæ patent, sed Deus intuetur cor*, inde est quod secundum interiorem hominis dispositionem accipitur conditio spiritualis status in homine per comparationem ad iudicium divinum; secundum autem ea quæ exterius aguntur, accipitur spiritualis status in homine per comparationem ad Ecclesiam. Et sic nunc de status loquimur, prout scilicet ex diversitate statuum quædam Ecclesiæ pulchritudo confurgit.

Est autem considerandum, quod quantum ad homines, ad hoc quod aliquis adipiscatur statum libertatis, vel servitutis, requiritur primo quidem obligatio aliqua, vel absolutio: non enim ex hoc quod aliquis servit alicui, efficitur servus, quia etiam liberi serviunt, secundum illud ad Galat. v. 13. *Per caritatem spiritus servite invicem*: neque etiam ex hoc quod aliquis desinit servire, efficitur liber, sicut patet de servis fugitivis: sed ille proprie est servus qui obligatur ad serviendum, & ille est liber qui a servitute absolvitur. Secundo requiritur quod obligatio prædicta cum aliqua solemnitate fiat, sicut & ceteris quæ inter homines obvenit perpetuam firmitatem, quædam solemnitas adhibetur. Sic ergo in statu perfectionis proprie dicitur aliquis esse, non ex hoc quod habet actum dilectionis perfectæ, sed ex hoc quod obligat se perpetuo cum aliqua solemnitate ad ea quæ sunt perfectionis.

Contingit etiam quod aliqui se obligent ad id quod non servant, & aliqui implent ad quod se non obligaverunt,

ut patet Matth. xxi. 28. de duobus filiis: quorum unus patri dicens, *Operare in vinea, respondit, Nolo, & postea abiit*: alter autem respondens ait, *Ego, & non ivit*. Et ideo nihil prohibet aliquos esse perfectos, qui non sunt in statu perfectionis, & aliquos esse in statu perfectionis, qui tamen non sunt perfecti.

Ad primum ergo dicendum, quod per augmentum corporale proficit aliquis in his quæ pertinent ad naturam; & ideo adipiscitur naturæ statum: præsertim quia quod est secundum naturam, quodammodo immutabile est, inquantum natura determinatur ad unum. Et similiter per augmentum spirituale interius aliquis adipiscitur statum perfectionis quantum ad divinum iudicium; sed quantum ad distinctiones ecclesiasticorum statuum non adipiscitur aliquis statum perfectionis, nisi per augmentum in his quæ exterius aguntur.

Ad secundum dicendum, quod illa etiam ratio procedit quantum ad interiorem statum; & tamen cum aliquis transit de peccato in gratiam, transit de servitute ad libertatem: quod non contingit per simplicem profectum gratiæ, nisi cum aliquis obligat se ad ea quæ sunt gratiæ.

Ad tertium dicendum, quod illa etiam ratio procedit quantum ad interiorem statum; & tamen licet caritas variet conditionem spiritualis servitutis, & libertatis; hoc tamen non facit caritatis augmentum.

## ARTICULUS V. 88a

*Utrum religiosi, & prælati sint in statu perfectionis.*

*Opusc. xviii. cap. xvi.*

**A**D quantum sic proceditur. Videtur quod prælati, & religiosi non sint in statu perfectionis. Status enim perfectionis distinguitur contra statum incipientium, & proficientium. Sed non sunt aliqua genera hominum deputata specialiter statui proficientium, vel etiam incipientium. Ergo videtur quod nec etiam debeant esse aliqua genera hominum deputata statui perfectionis.

2. Præterea. Status exterior debet interiori statui respondere: alioquin incurritur mendacium, quod non solum est in falsis verbis, sed etiam in simulatis operibus, ut Ambrosius dicit in quodam sermone.

ferm. (xlrv. de temp. ante med.) Sed multi sunt praelati, vel religiosi, qui non habent interiorem perfectionem caritatis. Si ergo omnes religiosi, & praelati sint in statu perfectionis, sequitur quod quicumque eorum non sunt perfecti, sint in peccato mortali, tamquam simulatores, & mendaces.

3. Præterea. Perfectio secundum caritatem attenditur, ut supra habitum est (art. 1. hu. quæst.) Sed perfectissima caritas videtur esse in Martyribus, secundum illud Ioan. xv. 13. *Maiorem dilectionem nemo habet, quam ut animam suam ponat quis pro amicis suis*: & super illud ad Hebr. xii. *Nondum enim usque ad sanguinem* &c. dicit Glossa (Aug. serm. xvii. de verb. Apost. cap. 1. cir. med.) „Perfectior in hac vita nulla dilectio est, ea ad quam sancti Martyres pervenerunt, qui contra peccatum usque ad sanguinem certaverunt. Ergo videtur quod magis debeat perfectiois status attribui Martyribus quam religiosi, & Episcopis.

Sed contra est quod Dionysius v. cap. eccles. Hierarch. (cir. med.) attribuit perfectionem Episcopis tamquam perfectioribus: & in vi. cap. eiusdem Libri (ante med.) attribuit perfectionem religiosi, quos vocat *monachos*, vel *desertis therapeutas*, idest Deo famulantes, tamquam perfectis.

Respondetur dicendum, quod, sicut dictum est (art. præc.) ad statum perfectionis requiritur obligatio perpetua ad ea quæ sunt perfectionis, cum aliqua solemnitate. Utrumque autem horum competit religiosi, & Episcopis. Religiosi enim se voto astringunt ad hoc quod a rebus secularibus se abstineant, quibus licite uti poterant, ad hoc quod liberius Deo vacent: in quo consistit perfectio præsentis vitæ. Unde Dionysius dicit vi. cap. eccles. Hierarch. (loc. cit.) de religiosi loquens: *Alii quidem therapeutas, idest famulos Dei, ex puro servitio, & famulatu; alii vero monachos ipsos nominant ex indivisibili, & singulari viâ vivente ipsos ex indivisibili sanctis convolutionibus, idest contemplationibus, ad deiformem unitatem, & amabilem Deo perfectionem.* Horum etiam obligatio fit cum quadam solemnitate professionis, & benedictionis: unde & ibidem subdit Dionysius: *Propter quod perfectam ipsis donans gratiam sancta legislatio, quadam ipsos dignata est sanctificativa invocatione.*

Similiter etiam Episcopi obligant se ad ea quæ sunt perfectionis, pastorale assumens officium; ad quod pertinet ut animam suam ponat pastor pro ovibus suis, sicut dicitur Ioan. x. 15. Unde Apostolus dicit I. ad Timoth. ult. 12. *Confessus bonam confessionem coram multis testibus, idest in sua ordinatione*, ut Glossa (interl.) ibidem dicit. Adhibetur etiam quedam solemnitas consecrationis simul cum professione prædicta, secundum illud II. ad Timoth. 1. 6. *Resuscites gratiam Dei, quæ est in te per impositionem manuum mearum*: quod Glossa (interl.) exponit de gratia episcopali. Et Dionysius dicit v. cap. eccles. Hierarch. (vers. fin.) quod sumus sacerdotes, idest Episcopus, in sua ordinatione habet eloquiorum super caput sanctissimam superpositionem; ut significetur quod ipse est participativus integræ totius hierarchicæ virtutis, & quod ipse non solum fit illuminativus omnium (quod pertinet ad sanctas locutiones, & actiones) sed quod etiam hoc aliis tradat.

Ad primum ergo dicendum, quod inchoatio, & augmentum non quæritur propter se, sed propter perfectionem: & ideo ad solum perfectionis statum aliqui homines cum quadam obligatione, & solemnitate assumuntur.

Ad secundum dicendum, quod homines statum perfectionis assumunt, non quasi proficientes seipsos perfectos esse, sed proficientes se ad perfectionem tendere: unde & Apostolus dicit ad Philip. iiii. 12. *Non quod iam comprehenderim, aut iam perfectus sim; sequor autem, si quo modo comprehendam*: & postea subdit: *Quicumque ergo perfecti sumus, hoc sentiamus.* Unde non committit aliquis mendacium, vel simulationem ex hoc quod non est perfectus, qui statum perfectionis assumit, sed ex eo quod ab intentione perfectionis animam revocat.

Ad tertium dicendum, quod martirium in actu perfectissimo caritatis consistit. Actus autem perfectionis non sufficit ad statum faciendum, ut dictum est (art. præc.)

ARTICULUS VI. 873

*Utrum omnes praelati ecclesiastici sint in statu perfectionis.*

*Opusc. XVIII. cap. XXII. XXIII. XXV. & XXVI.*

**A**D sextum sic proceditur. Videtur in quod omnes praelati ecclesiastici sint in statu perfectionis. Dicit enim Hieronymus super ep. ad Tit. (cap. 1. super illud, *Constituas per civitates &c.*) *Olim idem presbyter, qui & Episcopus*; & post ea subdit: *Sicut ergo presbyteri sciunt, se Ecclesiae consuetudine ei qui sibi praebitus fuerit, esse subditos*; ita Episcopi noverunt, se magis consuetudine quam dispositionis dominicae veritate presbyteris esse maiores. & in communi debere Ecclesiam regere. Sed Episcopi sunt in statu perfectionis. Ergo & presbyteri habentes curam animarum.

2. Praeterea. Sicut Episcopi suscipiunt curam animarum cum consecratione, ita etiam presbyteri curati, & Archidiaconi; de quibus super illud Aët. vi. *Considerate, fratres, viros boni testimonii septem &c.* dicit Glossa (ordin. Bedæ), *Hic discernant Apostoli per Ecclesiam, constitui septem diaconos, qui essent sublimioris gradus, & quali columnae proximi circa aram.* Ergo videtur quod ipsi etiam sint in statu perfectionis.

3. Praeterea. Sicut Episcopi obligantur ad hoc quod animam suam ponant pro ovibus suis, ita & presbyteri curati, & Archidiaconi. Sed hoc pertinet ad perfectionem caritatis, ut supra dictum est (art. 2. huius quæst. ad 3.) Ergo videtur quod etiam presbyteri curati, & Archidiaconi sint in statu perfectionis.

Sed contra est quod Dionysius dicit in v. cap. eccles. Hierar. (cir. med.) *Pontificum quidem ordo consummativus est; & perfectivus; sacerdotum autem illuminativus, & lucidativus; ministrantium vero purgativus, & discretivus.* Ex quo patet quod perfectio solis Episcopis attribuitur.

Respondendo dicendum, quod in presbyteris, & diaconibus curam habentibus animarum duo possunt considerari, scilicet ordo, & cura. Ordo autem ipse ordinatur ad quendam actum in divinis officiis. Unde supra dictum est (quæst. præc. art. 3. ad 3.) quod distinctio ordi-

num sub distinctione officiorum continetur. Unde per hoc quod aliqui suscipiunt sacrum ordinem, accipiunt potestatem in quosdam sacros actus perficiendi; non autem obligantur ex hoc ipso ad ea quæ sunt perfectionis, nisi quatenus ipsud occidentale Ecclesiam in susceptione sacri ordinis emittitur continentia vorum, quod est unum eorum quæ ad perfectionem pertinent, ut infra dicitur (quæst. clxxxvi. art. 4.) Unde patet quod ex hoc quod aliqui accipiunt sacrum ordinem, non ponitur simpliciter in statu perfectionis; quamvis interior perfectio ad hoc requiratur quod aliqui digne huiusmodi actus exerceant.

Similiter etiam nec ex parte curæ quam suscipiunt, ponuntur in statu perfectionis. Non enim obligantur ex hoc ipso vinculo perpetui voti ad hoc quod curam animarum retineant; sed possunt eam deferere, vel transiendo ad religionem, etiam absque licentia Episcopi, ut habetur in Decretis xix. quæst. 11. (cap. *Duae sunt*.) vel etiam cum licentia Episcopi potest aliquis Archidiaconus Archidiaconatum, vel parochiam dimittere, & simplicem praebendam accipere sine cura; quod nullo modo liceret, si esset in statu perfectionis. Nemo enim manum mittens ad aratrum, & respiciens retro, aptus est regno Dei, ut dicitur Luc. ix. 62.

Episcopi autem, quia sunt in statu perfectionis, non nisi auctoritate summi Pontificis, ad quem etiam solum pertinet in votis perpetui dispensare, possunt episcopalem curam deferere, & ex certis causis, ut infra dicitur (quæst. clxxxv. art. 4.) Unde manifestum est quod non omnes praelati sunt in statu perfectionis, sed soli Episcopi.

Ad primum ergo dicendum, quod de presbytero, & Episcopo dupliciter loqui possumus. Uno modo quantum ad nomen; & sic olim non distinguebantur Episcopi, & presbyteri. Nam Episcopi dicuntur ex eo quod *superintendunt*, sicut dicit Augustinus XIX. de civitat. Dei (cap. xix. a med.) Presbyteri autem in Graeco dicuntur quasi seniores. Unde & Apostolus comminiter utitur nomine Presbyterorum quantum ad utroque, cum dicit I. Timoth. vi. 18. *Qui bene praesunt presbyteri, duplici bonore digni habeantur*; & similiter etiam nomine Episcoporum. unde dicit Aët. xx. 28. presbyteris Ephesinae Ecclesiae loquens:

At-



*Attendite vobis, & universo gregi, in quo vos Spiritus sanctus posuit Episcopos regere Ecclesiam Dei.* Sed secundum rem semper inter eos fuit distinctio, etiam tempore Apostolorum, ut patet per Dionysium v. cap. eccl. Hierar. (cir. mod.) & Luc. x. super illud, *Post hæc autem designavit Dominus &c.* dicit Glossa (ord. B.) „Sicut in Apostolis forma est Episcoporum; sic in septuaginta duobus „discipulis forma est presbyterorum secundum ordinis. „Postmodum tamen ad schisma vitandum necessarium fuit ut etiam nomina distinguerentur, ut scilicet maiores dicerentur Episcopi, minores autem Presbyteri. Dicere autem, presbyteros non differre ab Episcopis, inter dogmata hæretica numerat Augustinus in Lib. de hæres. (hæres. 53.) ubi dicit, quod (a) Aciriani dicebant, presbyterum ab Episcopo nulla differentia debere discerni.

Ad secundum dicendum, quod Episcopi principaliter habent curam ovium suæ diocesis; presbyteri autem curati, & Archidiaconi habent aliquas subordinationes sub Episcopis. Unde super illud I. ad Corinth. xii. *Alii opitulationes, alii gubernationes*, dicit Glossa (interl.) „Opitulationes, id est eos qui maioribus „serunt opem, ut Titus Apostolo, vel „Archidiaconi Episcopis gubernationes, „scilicet minorum personarum praelationes, ut presbyteri sunt, qui plebi „documento sunt. „Et Dionysius dicit v. cap. eccl. Hierar. (ante med.) quod sicut universam hierarchiam videmus in Iesu terminatam; ita unamquamque functionem in proprio divino Hierarcha, id est Episcopo. Et xvi. quæst. i. (cap. Cunctis) dicitur: *Omnibus presbyteris, & diaconibus attendendum est, ut nihil absque proprii Episcopi licentia agant.* Ex quo patet quod ita se habent ad Episcopum, sicut balivi, vel præpositi ad Regem: & propter hoc sicut in mundanis potestatis solus Rex benedictionem solemnem accipit, alii vero per simplicem commissionem insinuantur; ita etiam in Ecclesia cura episcopalis cum solemnitate consecrationis committitur; cura autem Archidiaconatus, vel plebanatus cum simplici iniunctione; consecrantur tamen in susceptione ordinis etiam antequam curam habeant.

Ad tertium dicendum, quod sicut plebani, & Archidiaconi non habent principaliter curam, sed administratio-

nem quamdam, secundum quod eis ab Episcopo committitur; ita etiam ad eos non pertinet principaliter pastorale officium, nec obligatio ponendi animam pro ovibus, sed in quantum participant de cura. Unde magis habent quoddam officium ad perfectionem pertinentes, quam obtineant perfectionis statum.

## ARTICULUS VII. 874

*Utrum status religiosorum sit perfectior quam status prælatorum.*

*Inf. quæst. clxxxv. art. 8. cor. & quol. xii. art. 17. cor. & opusc. xviii. cap. xviii. xviii. & xix. & Matth. xix.*

**A**D septimum sic proceditur. Videtur quod status religiosorum sit perfectior quam status prælatorum. Dominus enim dicit Matth. xix. 21. *Si vis perfectus esse, vade, vende omnia quæ habes, & da pauperibus:* quod faciunt religiosi. Non autem ad hoc tenentur Episcopi: dicitur enim xii. quæst. 1. (cap. xix.) *Episcopi de rebus propriis, vel acquisitis, vel quicquid de proprio habent, heredibus suis, si voluerint, derelinquant.* Ergo religiosi sunt in perfectiori statu quam Episcopi.

2. Præterea. Perfectio principalis consistit in dilectione Dei quam in dilectione proximi. Sed status religiosorum directe ordinatur ad dilectionem Dei: unde & ex Dei servitio, & famulatu nominantur, ut Dionysius dicit vi. cap. eccl. Hierar. (ante med.) Status autem Episcoporum videtur ordinari ad dilectionem proximi, cuius curæ superintendunt, unde & nominantur, ut patet per Augustinum XIX. de civit. Dei (cap. xix. a med.) Ergo videtur quod status religiosorum sit perfectior quam status Episcoporum.

3. Præterea. Status religiosorum ordinatur ad vitam contemplativam, quæ potior est quam vita activa, ad quam ordinatur status Episcoporum: dicit enim Gregorius in Pastor. (part. 1. cap. vii. ante med.) quod *per vitam activam prædesse proximis cupiens Iaias, officium predicationis appetit; per contemplativam vero Hieremias amoris Conditoris sedulo inherere desiderans, ne mitti ad prædicandum debeat, contradicit.* Ergo videtur quod status religiosorum sit perfectior quam status Episcoporum.

Sed

(a) Ita optime cod. Alex. & alii qui velutur N'clains, item Theolog. Al. Antiqu.

Sed contra. Nulli licet a maiori statu ad minorem transire: hoc enim etiam retro aspicere. Sed potest aliquis a statu religionis transire ad statum episcopalem: dicitur enim xviii. quæst. 1. (cap. Statutum) quod *sacra ordinatio de monacho Episcopum facit*. Ergo status Episcoporum est perfectior quam status religionis.

Respondendo dicendum, quod, sicut Augustinus dicit xli. super Genes. ad lit. (cap. xvi. a. med.) *semper agens praestantius est patiente*. In genere autem perfectionis secundum Dionysium (cap. v. & vi. cæl. Hier.) Episcopi se habent ut perfectiores, religiosi autem ut perfecti; quorum unum pertinet ad actionem, alterum autem ad passionem. Unde manifestum est quod status perfectionis potior est in Episcopis quam in religiis.

Ad primum ergo dicendum, quod abrenuntiatio propriarum facultatum dupliciter considerari potest. Uno modo secundum quod est in actu: & sic in ea non constituit essentialiter perfectio, sed est quoddam perfectionis instrumentum, sicut supra dictum est (art. 3. h. quæst.). Et ideo nihil prohibet statum perfectionis esse sine abrenuntiatione propriarum; sicut etiam dicendum est de aliis exterioribus observantiis. Alio modo potest considerari secundum præparationem, ut scilicet homo sit paratus, si fuerit opus, omnia dimittere, vel distribuere: & hoc pertinet directe ad perfectionem. Unde Augustinus dicit in Lib. II. de Q. Evangel. (quæst. xi. parum a princ.) *Ostendit Dominus filios sapientie intelligere, non in abstinendo, nec in manducando esse iustitiam, se in aequanimitate tolerandi inopiam*. Unde & Apostolus dicit (Philip. iv. 12.) *Scio & abundare, & penuriam pati*. Ad hoc autem maxime tenentur Episcopi quod omnia sua pro honore Dei, & salute sui gregis continent, cum opus fuerit, vel pauperibus sui gregis largiendo, vel rapinam bonorum suorum cum gaudio sustinendo.

Ad secundum dicendum, quod hoc ipsum quod Episcopi intendunt his quæ pertinent ad proximorum dilectionem, provenit ex abundantia dilectionis divine. Unde Dominus primo a Petro quæsitum eum diligere; & postea ei sui gregis curam commisit: & Gregorius dicit in Pastoralis (par. 1. cap. v. parum ante med.) *Si dilectionis testimonium*

*est cura pastoralis, quisquis virtutibus pollens gregem Dei tenuit pascere, Pastorem summum convincitur non amare*. Hoc autem est maioris dilectionis signum ut homo propter amicum etiam alii serviat, quam si soli amico velit servire.

Ad tertium dicendum, quod, sicut Gregorius dicit in Pastoralis (par. 11. cap. 1.) *fit Praefatus actione præcipuus, præ cunctis contemplatione suspensus*: quia ad ipsos pertinet non solum propter seipsos, sed propter instructionem aliorum contemplari. Unde Gregorius dicit super Ezech. (hom. v. parum a med.) quod de perfectis viris post contemplationem suam redeuntibus dicitur Psal. cxlv. 7. (a) *Memoriam suavitatis tue cruciabantur*.

## ARTICULUS VIII. 875

*Utrum presbyteri curati, & Archidiaconi sint maioris perfectionis quam religiosi.*

Quol. 2. art. 14. ad 2. & quol. 111. art. 17. & opusc. xviii. cap. xx. & xxi. & Matth. xix.

AD octavum sic proceditur. Videtur quod etiam presbyteri curati, & Archidiaconi sint maioris perfectionis quam religiosi. Dicit enim Chrysostomus in suo Dial. (seu Lib. XVI. de sacerdot. cap. iv. implic. & cap. vii. in princ.) *Si talem mihi aliquem adducas monachum, qualis, ut secundum exaggerationem dicam, Helias fuit; non tamen illi comparandus est qui iradit populus, & multorum peccata ferre compulsum, immobilis perseverat, & fortis*: & paulo post dicit (cap. vii. parum a princ.) *Si quis proponeret optionem, ubi mallem placere, in officio sacerdotali, an in solitudine monachorum, sine comparatione eligerem illud quod prius dixi*: & in eodem libro (cap. v. in princ.) dicit: *Si quis bene administrato sacerdotio, illius propositi, scilicet monachalis, sudores conferat, tantum eos dispare reperiet, quantum inter privatum distat & Regem*. Ergo videtur quod facientes habentes curam animarum sint perfectiores religiosi.

2. Præterea. Augustinus dicit in epist. ad Valer. (epist. xxi. al. cxlviii. in prin.) *Cogitet religiosa prudentia tua, nihil esse in hac vita, & maxime hoc tempore, dispendiosius, laboriosius, periculosius Episcopi, aut*

(a) *Paigera*: Memoriam abundantie suavitatis tue cruciabantur.

aut presbyteri, aut diaconi officio; sed apud Deum nihil beatius, si eo modo militetur, quo noster Imperator iubet. Non ergo religiosi sunt perfectiores presbyteris, aut diaconibus.

3. Præterea. Augustinus dicit ad Aurel. (epist. lx. al. lxxvi. in med.) Nihil dolendum est, si ad tam ruinofam superbiam monachos surrigamus, & tam gravem contumeliam clericis dignos putemus, ut scilicet dicatur, quod malus monachus bonus clericus est, cum aliquando etiam bonus monachus vix bonum clericum faciat: & paulo ante præmittit, non esse viam dandam servis Dei, idest monachis, ut se facilius putent eligi ad aliquid melius, scilicet clericatum, si facti fuerint deteriores, scilicet abiectione monachatu. Ergo videtur quod illi qui sunt in statu clericali, sint perfectiores religiosi.

4. Præterea. Non licet de statu maiori ad minorem transire. Sed de statu monastico transire licet ad officium presbyteri curam habentis, ut patet xvi. quæst. i. (cap. xxviii.) ex decreto Gelasii Papæ, qui dicit: Si quis monachus fuerit, qui venerabilis vitæ merito, sacerdotio dignus videatur, & Abbas, sub cuius imperio Regi Christo militat, illum fieri Presbyterum petierit; ab Episcopo debet eligi, & in loco quo iudicaverit, ordinari. Et Hieronymus dicit ad Rusticum monachum (epist. iv. inter med. & fi.) Sic vive in monasterio ut clericus esse merearis. Ergo presbyteri curati, & Archidiaconi sunt perfectiores religiosi.

5. Præterea. Episcopi sunt in statu perfectiori quam religiosi, ut ex supra dictis patet (art. præc.) Sed presbyteri curati, & Archidiaconi ex eo quod habent curam animarum, similiores sunt Episcopis quam religiosi. Ergo sunt maiores perfectionis.

6. Præterea. Virtus consistit circa difficile, & bonum, ut dicitur in II. Ethic. (cap. iiii. cir. fi.) Sed difficilius est quod aliquis bene vivat in officio presbyteri curati, vel Archidiaconi, quam in statu religionis. Ergo presbyteri curati, vel Archidiaconi sunt perfectiores virtutis, quam religiosi.

Sed contra est quod dicitur xix. quæst. 21. cap. Dicitur: Si quis in Ecclesia sua sub Episcopo populum retinet, & seculariter vivit, si assensus Spiritu sancto in aliquo monasterio, vel regulari canonici salutare se voluerit; quia lege privata dicitur, nulla ratio exigit ut lege publica

constringatur. Sed non ducitur aliquis a lege Spiritus sancti, quæ ibi dicitur lex privata, nisi in aliquid perfectius. Ergo videtur quod religiosi sint perfectiores quam Archidiaconi, vel presbyteri curati.

Respondeo dicendum, quod comparatio supereminentiæ non habet locum inter aliquos ex ea parte in qua conveniunt, sed ex ea parte in qua differunt. In presbyteris autem curatis, & Archidiaconis tria est considerare, scilicet statum, ordinem, & officium. Ad statum pertinet quod sæculares sint; ad ordinem, quod sint sacerdotes, vel diaconi; ad officium, quod curam animarum habeant sibi commissam. Si ergo ex alia parte ponamus (a) statu religionis, ordine diaconum, vel sacerdotum, officio curam animarum habentem, sicut perique monachi, & canonici regulares habent; in primo quidem excellit, in aliis autem par erit. Si autem differat secundum a primo statu, & officio, conveniat autem ordine, sicut sunt religiosi sacerdotes, & diaconi curam animarum non habentes; manifestum est quod secundum primo erit statum quidem excellentior, officio autem minor, ordine vero æqualis.

Est ergo considerandum, quæ præminentia potior sit, utrum status, vel officii: circa quod duo attendenda videntur, scilicet bonitas, & difficultas. Si ergo fiat comparatio secundum bonitatem, sic præteritur status religionis officio presbyteri curati, vel Archidiaconi: quia religiosus totam vitam suam obligat ad perfectionis studium; presbyter autem curatus, vel Archidiaconus non obligat totam vitam suam ad curam animarum, sicut Episcopus; nec etiam ei competit principalem curam subditorum habere, sicut Episcopo; sed quædam particularia circa curam animarum eorum officio committuntur, ut ex dictis patet (art. 6. hu. quæst. ad 2.) Et ideo comparatio status religionis ad eorum officium est sicut universalis ad particulare, & sicut holocausti ad sacrificium, quod est minus holocausto, ut patet per Gregorium super Ezech. (hom. xx. post med.) Unde & xix. quæst. 1. cap. 1. dicitur: Clericis qui monachorum propositum appetunt, quia meliorem vitam sequebantur, liberos eis ab Episcopis in monasteriis oportet largiri ingressus. Sed hæc comparatio intelligenda est secundum genus operis: nam secundum

(a) ad statum.

caritatem operantis contingit quandoque magis opus ex genere suo minus existens magis sit meritorium, scilicet si ex maiori caritate fiat.

Si vero attendatur difficultas bene conversandi in religione, & in officio habentis curam animarum; sic difficilius est bene conversari cum cura animarum propter exteriora pericula: quamvis conversatio religionis sit difficilius quantum ad ipsum genus operis, propter arctitudinem observantiae regularis.

Si vero religiosus etiam ordine careat, sicut patet de conversis religionum; sic manifestum est excellere praeminentiam ordinis quantum ad dignitatem: quia per sacrum ordinem aliquis deputatur ad dignissima ministeria, quibus ipsi Christo servitur in sacramento altaris; ad quod requiritur maior sanctitas interior quam requirat etiam religionis status: quia, sicut Dionysius dicit vi. cap. eccles. Hierar. (cir. med.) *monasticus ordo debet sequi sacerdotales ordines, & ad eorum imitationem ad divina ascendere.* Unde gravius peccat, ceteris paribus, clericus in sacris ordinibus constitutus, si aliquid contrarium sanctitati agat, quam aliquis religiosus qui non habet ordinem sacrum; quamvis laicus religiosus teneatur ad observantias regulares, ad quas illi qui sunt in sacris ordinibus, non tenentur.

Ad primum ergo dicendum, quod ad illas auctoritates Chrysostomi breviter responderi posset, quod non loquitur de sacerdote curato minoris ordinis, sed de Episcopo, qui dicitur summus Sacerdos: & hoc convenit intentioni illius libri, in quo consolatur se, & Basilium de hoc quod erant in Episcopos electi. Sed, hoc praetermisso, dicendum est, quod loquitur quantum ad difficultatem. Praemittit enim (cap. vi. in fin.) *Cum fueris gubernator in medijs fustibus, & de tempestate navem liberare potueris, tunc merito testimonium perfecti gubernatoris ab omnibus promeretur.* Et post concludit, quod supra positum est (in arg.) de monacho, qui non comparandus est illi qui traditus populis immobilis perseverat. Et laudat causam: quia *sicut in tranquillitate, ita in tempestate gubernavit seipsum.* Ex quo nihil aliud ostendi potest, nisi quod periculosior est status habentis curam animarum, quam monachi: in maiori autem periculo innocentem se servare, est maioris virtutis indicium. Sed hoc etiam ad magnitudinem virtutis perti-

net quod aliquis vitet pericula religionem intrando: unde non dicit, quod mallet esse in officio sacerdotali quam in solitudine monachorum; sed quod mallet placere in hoc quam in illo, quia hoc est maioris virtutis argumentum.

Ad secundum dicendum, quod etiam illa auctoritas Augustini manifeste loquitur quantum ad difficultatem, quae ostendit magnitudinem virtutis in his qui bene conversantur, sicut dictum est (in solut. praeced.)

Ad tertium dicendum, quod Augustinus ibi comparat monachos clericis quantum ad distantiam ordinis, non quantum ad distantiam religionis, & saecularis vitae.

Ad quartum dicendum, quod illi qui a statu religionis assumuntur ad curam animarum, cum prius essent in sacris ordinibus constituti, assequuntur aliquid quod prius non habebant, scilicet officium curae; non autem deponunt quod prius habebant, scilicet religionis statum. Dicitur enim in Decretis xvi. quaest. 1. (cap. 111.) *De monachis qui diu morantes in monasteriis, si postea ad clericatus ordinem pervenerint, statim non debere eos a priori proposito discedere.* Sed presbyteri curati, vel Archidiaconi, quando religionem ingrediuntur, curam deponunt, ut adipiscantur perfectionem statum. Unde ex hoc ipso excellentia ex parte religionis ostenditur. In hoc autem quod religiosi laici assumuntur in clericatum, & ad sacros ordines, manifeste promoventur ad melius, sicut supra dictum est (in arg. 4.) Et hoc ostenditur ex ipso modo loquendi, cum Hieronymus dicit: *Sic in monasterio vive ut clericus esse merearis.*

Ad quintum dicendum, quod presbyteri curati, & Archidiaconi sunt similiores Episcopis, quam religiosi, quantum ad aliquid, scilicet quantum ad curam animarum, quam secundario habent; sed quantum ad perpetuam obligationem, quae requiritur ad statum perfectionis, similiores sunt Episcopo religioso, ut ex supra dictis patet (art. 5. & 6. huius quaest.)

Ad sextum dicendum, quod difficultas quae est ex arduitate operis, addit ad perfectionem virtutis; difficultas autem quae provenit ex exterioribus impedimentis quandoque quidem diminuit perfectionem virtutis, puta cum aliquis non tantum virtutem amat, ut impedimenta virtutis declinare velit, secundum illud Apostoli

li I. ad Corinth. ix. 27. *Omni qui in agone contendit, ab omnibus se abstinere*: quandoque vero est signum perfectioris virtutis, puta cum alicui ex inopinato, vel ex necessaria causa impedimenta virtutis occurrunt, propter quae tamen a virtute non declinat. In statu autem religionis est maior difficultas ex arduitate operum; sed in his qui in saeculo vivunt qualitercumque, est maior difficultas ex impedimentis virtutis, quae religiosi per omnia provide vitaverunt.

## QUAESTIO CLXXXV.

*De iis quae pertinent ad statum Episcoporum, in octo articulos divisa.*

**D**Einde considerandum est de his quae pertinent ad statum Episcoporum: & circa hoc quaeruntur octo.

Primo, utrum liceat Episcopatum appetere.

Secundo, utrum liceat Episcopatum finaliter recusare.

Tertio, utrum oporteat ad Episcopatum eligere meliorem.

Quarto, utrum Episcopus possit ad religionem transire.

Quinto, utrum liceat ei corporaliter subditos suos deferere.

Sexto, utrum possit habere proprium.

Septimo, utrum peccet mortaliter bona ecclesiastica pauperibus non erogando.

Octavo, utrum religiosi qui ad Episcopatum assumuntur, teneantur ad observantias regulares.

## ARTICULUS I. 876

*Utrum liceat Episcopatum appetere.*

*Quod. 11. art. 11. & quo. 111. art. 9. cor. & quod. v. art. 1. co. & quo. 111. art. 18. & opus. xviii. cap. xix. & I. Tim. 111.*

**A**D primam sic proceditur. Videtur quod liceat Episcopatum appetere. Dicit enim Apostolus I. ad Timoth. 111. *1. Qui Episcopatum desiderat, bonum opus desiderat*. Sed licitum est, & laudabile bonum opus desiderare. Ergo etiam laudabile est desiderare Episcopatum.

2. Praeterea. Status Episcoporum est perfectior quam religiosorum status, ut supra habitum est (quaest. praec. art.

7.) Sed laudabile est quod aliquis desideret ad statum religionis transire. Ergo etiam laudabile est quod aliquis appetat ad Episcopatum promoveri.

3. Praeterea. Proverb. xi. 26. dicitur: *Qui abscondit frumenta, maledicetur in populo; benedictus autem super caput vendentium*. Sed ille qui est idoneus & vicia, & scientia ad Episcopatum, videtur frumenta spiritalia abscondere, si se ab Episcopatu subtrahat; per hoc autem quod Episcopatum accipit, ponitur in statu frumenta spiritalia dispensandi. Ergo videtur quod laudabile sit Episcopatum appetere, & vituperabile ipsum refugere.

4. Praeterea. Facta Sanctorum, quae in sacra Scriptura narrantur, nobis proponuntur in exemplum, secundum illud ad Rom. xv. 4. *Quaecumque scripta sunt, ad nostram doctrinam scripta sunt*. Sed legitur Isa. vi. quod Isaia se obtulit ad officium praedicationis: quod praecipue competit Episcopis. Ergo videtur quod appetere Episcopatum sit laudabile.

Sed contra est quod Augustinus dicit XIX. de civit. Dei (cap. xix. a med.) *Locus superior, sine quo populus regi non potest, nisi ita administretur ut deest, tamen indecenter appetitur*.

Respondeo dicendum, quod in Episcopatu tria possunt considerari. Quorum unum est principale, & finale, scilicet episcopalis operatio, per quam utilitari proximorum intenditur, secundum illud Ioan. ult. 17. *Pasce oves meas*. Aliud autem est altitudo gradus, quia Episcopus super alios constituitur, secundum illud Matth. xxiv. 45. *Fidelis servus, & prudens, quem constituit Dominus super familiam suam*. Tertium autem est, quod consequenter se habet ad ista, scilicet reverentia, & honor, & sufficientia temporalium, secundum illud I. ad Tim. v. 17. *Qui bene praesunt praebiteri, duplici honore digni habentur*. Appetere ergo Episcopatum ratione huiusmodi circumstantium bonorum, manifestum est quod est illicitum, & pertinet ad cupiditatem, vel ambitionem. Unde contra Phariseos Dominus dicit Matth. xxiii. 6. *Amant primos recubitus in caenis, & primas cathedras in synagogis, & salutationes in foro, & vocari ab hominibus Rabbi*.

Quantum autem ad secundum, scilicet ad celsitudinem gradus, appetere Episcopatum est praesumptuosum. Unde Dominus arguit discipulos Matth. xx. 25. pri-

primatum quærentes, dicens: Scitis quia principes gentium dominantur eorum: ubi Chrysostomus (hom. lxxv. in Matth. a med.) dicit, quod „per hoc ostendit quod gentile est primatus cupere; & sic gentium comparatione eorum animam salutem convertit.“

Sed appetere proximis prodesse, est secundum se laudabile, & virtuosum. Verum quia, prout est episcopalis actus, habet annexam gradus celsitudinem, præsumptuosum videtur quod aliquis præesse appetat ad hoc quod subditis prosit, nisi manifesta necessitate immineret; sicut Gregorius dicit in Pastor. (part. r. cap. viii. cir. med.) quod tunc laudabile erat Episcopatum quærere, quando per hunc quemquam dubium non erat ad supplicia graviora pervenire: (unde non de facili inveniebatur qui hoc onus assumeret); præsertim cum aliquis caritatis zelo divinitus ad hoc incitatur; sicut Gregorius dicit in Pastor. (part. r. cap. vii. ante med.) quod Isaias prodesse proximis cupiens, laudabiliter officium prædicationis appetit.

Potest tamen absque præsumptione quilibet appetere talia opera facere, si eum contingeret in tali officio esse, vel etiam le esse dignum ad talia opera exequenda; ita quod opus bonum cadat sub desiderio, non autem primatus dignitatis. Unde Chrysostomus (alius Auctor) dicit super Matth. (hom. xxxv. in oper. imperf. aliquant. a med.) Opus quidem desiderare bonum, bonum est; primatum autem honoris concupiscere, vanitas est. Primatus enim fugientem se desiderat, desiderantem se horret.

Ad primum ergo dicendum, quod, sicut Gregorius dicit in Past. (part. r. cap. viii.) illo tempore hoc dixit Apostolus quo ille qui plebibus præerat, primus ad martyrii tormenta ducebatur: & sic nihil aliud erat quod in Episcopatu appeti posset, nisi bonum opus. Unde Augustinus dicit XIX. de civ. Dei (cap. xix. a med.) quod Apostolus dicens, Qui Episcopatum desiderat, bonum opus desiderat, exponere voluit quid sit Episcopatus, quia nomen operis est, non honoris: Gratum est enim: epi (ἐπί) quippe super, scopos (σκοπός) vero intentio est. Ergo ἐπισκοπός, si velimus, latine superintendere possumus dicere, ut intelligat, non se esse Episcopum qui præesse dilexerit, non prodesse. In actione enim (ut parum ante præmittit) non amandus est honor in hac vita, sive potentia, quoniam o-

mnia vana sunt sub Sole; sed opus ipsum, quod per eundem honorem, vel potentiam fit. Et tamen, ut Gregorius dicit in Pastor. (loc. cit.) Apostolus laudans desiderium, scilicet boni operis, in pavorem vertit protinus quod laudavit, cum subiungit: Oportet autem Episcopum irreprehensibilem esse, quasi dicat: Laudo quod quæritis; sed prius discite quid quæritis.

Ad secundum dicendum, quod non est eadem ratio de statu religionis, & de statu episcopali, propter duo. Primo quidem quia ad statum episcopalem præexigitur vitæ perfectio; ut patet per hoc quod Dominus a Petro quæsit, si cum eum ceteris diligeret, antequam ei committeret pastorale officium: sed ad statum religionis non præexigitur perfectio, sed est via in perfectionem: unde & Dominus Matth. xix. non dicit, Si es perfectus, vade, vende omnia quæ habes, sed, Si vis perfectus esse. Et huius differentie ratio est, quia secundum Dionysium (cap. v. eccles. hierar. cir. med.) perfectio pertinet active ad Episcopum sicut ad perfectiorem, ad monachum autem passive sicut ad perfectum. Requiritur autem quod sit perfectus aliquis, ad hoc quod possit alios ad perfectionem adducere: quod non præexigitur ab eo qui debet ad perfectionem adduci. Est autem præsumptuosum quod aliquis perfectum se reputet, non autem quod aliquis ad perfectionem tendat. Secundo quia ille qui statum religionis assumit, se aliis subicit ad spiritualia capienda; & hoc cuilibet licet. Unde Augustinus XIX. de civitate Dei (cap. xix. a med.) dicit: A studio cognoscenda veritatis nemo prohibetur, quod ad laudabile orium pertinet. Sed ille qui transit ad statum episcopalem, sublimatur ad hoc quod aliis provideat: & hanc sublimationem nullus debet sibi assumere, secundum illud ad Heb. v. 4. Neque quisquam sumit sibi honorem, sed qui vocatur a Deo: & Chrysostomus (alius Auctor) dicit super Matth. (hom. xxxv. in op. imperf. inter med. & fin.) Primatum Ecclesie concupiscere neque iustum est, neque utile. Quis enim sapiens vult ultra se subicere servituti, & periculo tali, ut dei rationem pro omni Ecclesia? nisi forte qui non timet Dei iudicium, abutens primatu ecclesiastico seculariter, ut scilicet convertat ipsum in secularem.

Ad tertium dicendum, quod dispensatio spiritualium frumentorum non est

facienda secundum arbitrium cuiuslibet, sed principaliter quidem secundum arbitrium, & dispositionem Dei, secundario autem secundum arbitrium superiorum praelatorum; ex quorum persona dicitur I. ad Corineth. IV. 1. *Sic nos existimet homo ut ministri Christi; & dispensatores mysteriorum Dei.* Et ideo non intelligitur ille abscondere frumenta spiritualia cui non competit ex officio, nec ei a superiore iniungitur, si ab aliorum correctione, aut gubernatione desistat; sed solum tunc intelligitur abscondere, si dispensationem negligat, cum ei ex officio incumbit; vel si officium, cum ei iniungitur, pertinaciter recipere renuat. Unde Augustinus dicit XIX. de civitate Dei (cap. XIX. cir. fin.) *Otium sanctum queris caritas veritatis; negotium iustum suscipis necessitas caritatis: quam sarcinam si nullus imponis, percipiende, atque inuende vacandum est veritati; si autem imponitur, suscipienda est propter caritatis necessitatem.*

Ad quartum dicendum, quod, sicut Gregorius dicit in Pastoralis (par. I. cap. VII. a med.) *Isaias, qui missi voluit, ante se per altaris calculum purgatum vidit, ne non purgatus adire quisque sacra ministeria audiat. Quia ergo valde difficile est purgatum se quilibet posse cognoscere, predicationis officium tutius declinatur.*

## ARTICULUS II. 377

*Utrum liceat Episcopatum iniunctum omnino recusare.*

*Quol. v. art. 22.*

**A**D secundum sic proceditur. Videtur quod liceat Episcopatum iniunctum omnino recusare. Ut enim Gregorius dicit in Pastor. (par. I. cap. VII. paulo a princ.) *per activam vitam prodesse proximis cupiens Isaias, officium predicationis appetit; per contemplativam vero Hieremias amari. Conditoris sedulo inherere desiderans, ne mitti ad predicationem debeat, contradiicit.* Nullus autem peccat, si meliora nolit deferere, ut minus bonis inhaereat. Cum ergo amor Dei praeemineat dilectioni proximi, & vita contemplativa praeferatur vitae activae, ut ex supradictis patet (quaest. XXV. art. I. & quaest. XXVI. art. 3. & quaest. CLXXXI. art. I.) videtur quod non peccat ille qui omnino Episcopatum refusat.

2. Praeterea. Sicut Gregorius dicit (in Pastoralis par. I. cap. VII. a med.) *valde difficile est ut aliquis se purgatum possit cognoscere: nec debet aliquis non purgatus sacra ministeria adire.* Si ergo aliquis non sentiat se esse purgatum, quantumcumque sibi episcopale iniungatur officium, non debet illud suscipere.

3. Praeterea. De B. Marco Hieronymus dicit in prologo super Marcum (versus fin.) *quod amputasse sibi post hanc pollicem dicitur, ut sacerdotio reprobis haberetur.* Similiter aliqui votum emittunt ut numquam Episcopatum accipiant. Sed eiusdem rationis est ponere impedimentum ad aliud, & omnino recusare illud. Ergo videtur quod absque peccato possit aliquis omnino Episcopatum recusare.

Sed contra est quod Augustinus dicit ad Eudoxium (ep. XLVIII. al. LXXXI. ante med.) *Si quam operam vestram mater Ecclesia desideraverit, nec elatione avida suscipiatis, nec blandiente desidia respiciatis.* Postea subdit: *Neque otium vestrum necessitatibus Ecclesiae praeparatis; cui parturienti si nulli boni ministrare velint, quomodo nasceremini non inveniretis.*

Respondeo dicendum, quod in assumptione Episcopatus duo sunt consideranda: primo quidem quid deceat hominem appetere secundum propriam voluntatem; secundo quid hominem deceat facere ad voluntatem alterius. Quantum ergo ad propriam voluntatem, convenit homini principaliter insistere propriae salutis; sed quod aliorum salutis intendat, hoc convenit homini ex dispositione alterius potestatem habentis, ut ex supra dictis patet (art. praeced. ad 3.) Unde sicut ad inordinationem voluntatis pertinet quod aliquis proprio motu feratur in hoc quod aliorum gubernationi praeficiatur; ita etiam ad inordinationem voluntatis pertinet quod aliquis omnino contra superioris iniunctionem, praedictum gubernationis officium finaliter recuset, propter duo.

Primo quidem quia hoc repugnat caritati proximorum, quorum utilitati se aliquis debet exponere pro loco, & tempore. Unde Augustinus XIX. de civ. Dei dicit (cap. XIX. cir. fin.) *quod negotium iustum suscipis necessitas caritatis.* Secundo quia hoc repugnat humilitati; per quam aliquis superiorum mandatis se subiicit. Unde Gregorius dicit in Past. (par. I. cap. VI.) *Tunc ante Dei oculos vera*

*vera est humilitas, cum ad respondendum hoc quod utiliter subire praecipitur, pertinax non est.*

Ad primum ergo dicendum, quod quamvis simpliciter & absolute loquendo, vita contemplativa potior sit quam activa, & amor Dei quam dilectio proximi; tamen ex alia parte bonum multitudinis praeterendum est bono unius. Unde Augustinus dicit in verbis praemissis: *Neque otium vestrum necessitatibus Ecclesiae praepositis*: praeterit quia & hoc ipsum ad dilectionem Dei pertinet quod aliquis ovis Christi curam pastorem impendat. Unde super illud Ioan ult. *Pasce oves meas*, dicit Augustinus (tract. cxxii. cir. med.) „Sit amoris officium pascere, dominicum gregem, sicut fuit timoris, indicium negare pastorem.“ Similiter etiam praelati non se transferuntur ad vitam activam ut contemplativam deserant: unde Augustinus dicit XIX. de civ. Dei (cap. xix. in fin.) quod si imponatur sarcina pastoralis officii, nec sic deferenda est delectatio veritatis, quae scilicet in contemplatione habetur.

Ad secundum dicendum, quod nullus tenetur obedire praelato ad aliquod illicitum, sicut patet ex his quae supra dicta sunt de obedientia (quaest. civ. art. 5.) Potest ergo contingere quod ille cui iniungitur praelationis officium, in se aliquid sentiat, propter quod non liceat ei praelationem accipere. Hoc autem impedimentum quandoque quidem removeri potest per ipsummet cui pastoralis cura iniungitur; puta si habeat peccandi propositum, quod potest desistere; & propter hoc non excusatur quia finaliter teneatur obedire praelato iniungenti. Quandoque vero impedimentum ex quo fit ei illicitum pastorale officium, non potest ipse remove, sed praelatus qui iniungit; puta si sit irregularis, vel excommunicatus: & tunc debet defectum suum praelato iniungenti ostendere: qui si impedimentum remove voverit, tenetur humiliter obedire. Unde Exod. iv. 10. cum Moyses dixisset, *Obsecro, Domine, non sum loquens ab heri, & nudius tertius*, Dominus respondit ad eum: *Ego ero in ore tuo, doceboque te quid loquaris*. Quandoque vero non potest removeri impedimentum nec per iniungentem, nec per eum cui iniungitur; sicut si Archiepiscopus non possit super irregularitate dispensare: unde subditus non tenetur ei obedire ad suscipiendum Epi-

scopatum, vel etiam sacros ordines, si sit irregularis.

Ad tertium dicendum, quod accipere Episcopatum non est de se necessarium ad salutem, sed fit necessarium ex superioris praeepto. His autem quae sic sunt necessaria ad salutem, potest aliquis impedimentum licite apponere, antequam fiat praeeptum: alioquin non liceret alicui transire ad secundas nuptias, ne per hoc impediretur a susceptione Episcopatus, vel sacri ordinis. Non autem hoc liceret in his quae per se sunt de necessitate salutis. Unde B. Marcus non contra praeeptum egit, sibi digitum amputando; quamvis eum credibile sit hoc ex instinctu Spiritus sancti fecisse, sine quo non licet alicui sibi manum iniicere. Qui autem votum emitte de non suscipiendo Episcopatu, si per hoc intendat se obligare ad hoc quod nec per obedientiam superioris praelati accipiat, illicite vover; si autem intendit ad hoc se obligare ut, quantum est de se, Episcopatum non quærat, nec suscipiat, nisi imminente necessitate, licitum est votum, quia vover se facturum id quod hominem facere decet.

### ARTICULUS III. 378

*Utrum oporteat eum qui ad Episcopatum assumitur, esse ceteris meliorem.*

AD tertium sic proceditur. Videtur quod oporteat eum qui ad Episcopatum assumitur, esse ceteris meliorem. Dominus enim Petrum, cui commissurus erat pastorale officium, examinavit, si se diligeret plus ceteris. Sed ex hoc aliquis melior est quod Deum plus diligit. Ergo videtur quod ad Episcopatum non sit assumendus nisi ille qui est ceteris melior.

2. Praeterea, Symmachus Papa dicit (cap. Viliissimus 1. quaest. 1.) *Vilissimus computandus est, nisi scientia, & sanctitate praeceat qui est dignitate praestantior*. Sed ille qui praecellit scientia, & sanctitate, est melior. Ergo non debet aliquis ad Episcopatum assumi, nisi sit ceteris melior.

3. Praeterea. In quolibet genere minora per maiora reguntur, sicut corporalia reguntur per spiritualia, & inferiora corpora per superiora, ut Augustinus dicit in III. de Trinit. (cap. 14.) Sed Episcopus assumitur ad regi-



men aliorum. Ergo debet esse ceteris melior.

Sed contra est quod Decretalis dicit (cap. Cum dilectus de electione &c.) quod sufficit eligere bonum, neque oportet eligere meliorem.

Respondendo dicendum, quod circa assumptionem alicuius ad Episcopatum aliquid considerandum est ex parte eius qui assumitur, & aliquid ex parte eius qui assumit. Ex parte enim eius qui assumit vel eligendo, vel providendo, requiritur quod talem eligat qui fideliter divina mysteria dispense: quæ quidem dispensari debent ad utilitatem Ecclesiæ, secundum illud I. Corinth. xiv. 12. *Ad edificationem Ecclesiæ querite ut abundetis.* Non autem divina ministeria hominibus committuntur propter eorum remunerationem, quam expectare debent in futuro. Et ideo ille qui debet aliquem eligere in Episcopum, vel de eo providere, non tenetur assumere meliorem simpliciter, quod est secundum caritatem, sed meliorem quoad regimen Ecclesiæ, qui scilicet possit Ecclesiam & instruere, & defendere, & pacifice gubernare. Unde contra quosdam Hieronymus dicit (sup. illud cap. 1. ad Tit. Et constituas eos in civit. &c.) quod quidam non querunt eos in Ecclesia columnas erigere, quos plus cognoscunt Ecclesiæ prodesse; sed quos plus ipsi amant, vel quorum sunt obsequiis delinuti, vel dediti, vel pro quibus maiorem quispiam rogaveris, & ut deteriora faciam, qui ut clerici fiant, muneribus impetrant.

Hoc autem pertinet ad acceptionem personarum, quæ in talibus est grave peccatum. Unde super illud Iacobi 11. *Præter mei, nolite in personarum acceptione &c.* dicit Glossa Augustini (ord. epist. clxvii. al. xxix. ad Hieron. inter med. & fin.) „Si hanc distantiam sedendi, vel standi ad honores ecclesiasticos referamus, non est putandum, „leve esse peccatum in personarum acceptione habere fidem Domini gloriæ. „Quis enim serat, eligi divitem ad sedem honoris Ecclesiæ, contempto „paupere instructiore, & sanctiore? “

Ex parte autem eius qui assumitur, non requiritur quod reputet se aliis meliorem: hoc enim esset superbum, & præsumptuosum; sed sufficit quod nihil in se inveniat per quod illicitum ei reddatur assumere prælationis officium. Unde licet Petrus interrogatus esset, an Dominum plus ceteris diligeret, in sua

responsione non se prætulit ceteris, sed simpliciter respondit, quod Christum amaret.

Ad primum ergo dicendum, quod Dominus in Petro sciebat ex suo munere esse idoneitatem, etiam quantum ad alia, gubernandi Ecclesiam: & ideo eum de ampliori dilectione examinavit; ad ostendendum quod ubi alias invenitur homo idoneus ad Ecclesiæ regimen, præcipue attendi debet in ipso eminentia divinæ dilectionis.

Ad secundum dicendum, quod auctoritas illa est intelligenda quantum ad studium illius qui in dignitate constitutus est: debet enim ad hoc intendere, ut talem se exhibeat ut ceteros & scientia, & sanctitate præcellat. Unde Gregorius dicit in Pastoralis (par. 11. cap. 1.) *Tantum debet actionem populi aditu transcendere præsulis, quantum distare solet a grege vita pastoris.* Non autem ei imputandum est, si ante prælationem excellentior non fuit, ut ex hoc debeat vilissimus reputari.

Ad tertium dicendum, quod, sicut dicitur I. ad Corinth. xii. 4. *divisiones gratiarum, & ministeriorum, & operationum sunt.* Unde nihil prohibet aliquem esse magis idoneum ad officium regiminis, qui tamen non excellit in gratia sanctitatis. Secus autem est in regimine naturalis ordinis, in quo id quod est superius ordine naturæ, ex hoc ipso habet maiorem idoneitatem ad hoc quod inferiora disponat.

#### ARTICULUS IV. 879

*Utrum Episcopus possit licite curam episcopalem deserere, ut ad religionem se transferat.*

*Sup. quæst. clxxxiv. art. 6. cor. fi. & infra quæst. clxxxix. art. 7. cor.*

AD quartum sic proceditur. Videtur quod Episcopus non possit licite curam episcopalem deserere, ut ad religionem se transferat. Nulli enim licet de statu perfectiori ad minus perfectum statu transire: hoc enim est retro respicere; quod est damnabile, secundum Domini sententiam dicentis Lucæ 11. 62. *Nemo mittens manum ad aratrum, & respiciens retro, aptus est regno Dei.* Sed status episcopalis est perfectior quam status religionis, ut supra habitum est (quæst. clxxxiv. art. 7.) Ergo licet non licet

licet de statu religionis redire ad seculum; ita non licet de statu episcopali ad religionem transire.

2. Præterea. Ordo gratiæ est decenior quam ordo naturæ. Sed secundum naturam non movetur idem ad contraria; puta si lapis naturaliter deorsum movetur, non potest naturaliter a deorsum redire in sursum. Sed secundum ordinem gratiæ licet transire de statu religionis ad statum episcopalem. Ergo non licet e converso de statu episcopali redire ad statum religionis.

3. Præterea. Nihil in operibus gratiæ debet esse otiosum. Sed illa qui est solum in Episcopum consecratus, perpetuo retinet spirituales potestates conferendi ordines, & alia huiusmodi faciendi, quæ ad episcopale officium pertinent: quæ quidem potestas otiosa remanere videtur in eo qui curam episcopalem dimittit. Ergo videtur quod Episcopus non possit curam episcopalem dimittere, & ad religionem transire.

Sed contra. Nullus cogitur ad id quod est secundum se illicitum. Sed illi qui petunt cessionem a cura episcopali, ad cedendum compelluntur, ut patet ex tra de renunt. cap. *Quidam*. Ergo videtur quod deferere curam episcopalem non sit illicitum.

Respondeo dicendum, quod perfectio episcopalis status in hoc consistit quod aliquis ex divina dilectione se obligat ad hoc quod saluti proximorum insistant. Et ideo tamdiu obligatur ad hoc quod curam pastorem retinet, quamdiu potest subditis sibi commissis prohibere ad salutem: quam quidem negligere non debet, neque propter divinæ contemplationis quietem; cum Apostolus propter necessitatem subditorum etiam a contemplatione futuræ vitæ se differri patienter toleraret, secundum illud ad Philip. 1. 22. *Ecce quid eligam, ignoro: coarctor autem e duobus; desiderium habens dissolvi, & esse cum Christo multo magis melius; permanere autem in carne necessarium est propter vos; & hoc confidens scio, quia manebo: neque propter quæcumque adversa vitanda, vel lucra conquirenda: quia, sicut dicitur Ioan. x. 11. bonus pastor ponit animam suam pro ovibus suis.*

Contingit tamen quandoque quod Episcopus impeditur procurare subditorum salutem multipliciter. Quandoque quidem propter defectum proprium, vel conscientie, sicut si sit homicida, vel simonia-

cus, vel etiam corporis, puta si sit senex, vel infirmus; vel etiam scientie, quæ sufficiat ad curam regiminis; vel etiam irregularitatis, puta si sit bigamus. Quandoque autem propter defectum subditorum, in quibus non potest proficere. Unde Gregorius dicit in II. Dialog. (cap. 111. a. med.) *Ibi æquanimiter portandi sunt mali, ubi inveniantur aliqui, qui adveniunt, boni; ubi autem omnino fructus de bonis desit, fit aliquando de malis labor supervacuo.* Unde sæpe agitur in animo perfectorum, quod cum laborem suum sine fructu esse considerant, in locum alium ad laborem cum fructu migrant. Quandoque autem contingit ex parte aliorum; puta cum de praelatione alicuius personæ scandalum suscitatur: nam, ut Apostolus dicit I. ad Corinth. VIII. 13. *si esca scandalizat fratrem meum, non manducabo carnes in æternum: dum tamen scandalum non oriatur ex malitia aliquorum volentium fidem, aut iustitiam Ecclesiæ concutere: propter huiusmodi enim scandalum non est cura pastoralis dimittenda, secundum illud Matth. xv. 14. Sinite illos, scilicet qui scandalizabantur de veritate doctrinæ Christi: cæci sunt, & duces cæcorum.*

Oportet tamen quod sicut curam regiminis assumit aliquis per providentiam superioris prælati; ita etiam per eius auctoritatem ex causis prædictis deferat sceptra. Unde extra de renunt. (cap. *Nisi cum pridem* in fin.) dicit Innocentius III. *Esti pennas habeas, quibus satagas in solitudinem evolare, ita tamen adstrictæ sunt nexibus preceptorum, ut liberum non habeas absque nostra permissione volatum.* Soli enim Papæ licet dispensare in voto perpetuo, quo quis se ad curam subditorum adstrinxit, Episcopatum suscipiens.

Ad primum ergo dicendum, quod perfectio religionis. & Episcoporum secundum diversa attenditur. Nam ad perfectionem religionis pertinet studium quod quis adhibet ad propriam salutem; ad perfectionem autem episcopalis status pertinet adhibere studium ad proximorum salutem. Et ideo quamdiu potest esse aliquis utilis proximorum saluti, retrocederet, si ad statum religionis vellet transire, ut solum suæ saluti insisteret, qui se obligavit ad hoc quod non solum suam salutem, sed etiam aliorum procuraret. Unde Innocentius III. dicit in Decretali prædicta (in cor. art.) quod

A a 3

fa-

*facilis indulgetur ut monachus ad Praesulatum ascendat, quam Praesul ad monachatum descendat.* Sed si salutem aliorum procurare non possit, conveniens est ut suae salutis intendat.

Ad secundum dicendum, quod propter nullum impedimentum debet homo prae-terminare studium suae salutis, quod pertinet ad religionis statum. Potest autem esse aliquid impedimentum procurandae salutis alienae. Et ideo monachus potest ad statum Episcopatus assumi, in quo etiam suae salutis curam agere potest. Potest etiam Episcopus, si impedimentum alienae salutis procurandae interveniat, ad religionem transire, & impedimento cessante, potest iterato ad Episcopatum assumi; puta per correctionem subditorum, vel per sedationem scandali, vel per curationem infirmitatis, aut depulsa ignorantia per instructionem sufficientem; vel etiam si simoniae sit promotus, eo ignorante, si se ad regularem vitam Episcopatu dimisso transulerit, poterit iterato ad alium Episcopatum promoveri. Si vero aliquis propter culpam sit ab Episcopatu depositus, & in monasterio detrusus ad poenitentiam peragendam, non potest iterato ad Episcopatum revocari. Unde dicitur VII. quaest. 1. (cap. *Hoc nequaquam*.) *Præcipit sancta Synodus ut quicumque de pontificali dignitate ad monachorum vitam, & poenitentiae descendit locum; nequaquam ad Pontificatum resurgat.*

Ad tertium dicendum, quod etiam in rebus naturalibus propter impedimentum superveniens potentia remanet absque actu, sicut propter infirmitatem oculi cessat actus visionis. Et ita etiam non est inconveniens, si propter impedimentum superveniens potestas episcopalis remaneat absque actu.

#### ARTICULUS V. 830

*Utrum liceat Episcopo propter aliquam persecutionem corporalem deferere gregem sibi commissum.*

*Opusc. XVIII. cap. XIX. & XX. & Io. x. & I. Cor. 1. fin. & II. Cor. 11. fin.*

**A**D quintum sic proceditur. Videtur quod non liceat Episcopo propter aliquam persecutionem temporalem corporaliter deferere gregem sibi commissum. Dicit enim Dominus Ioan. x. 12.

quod ille est mercenarius, & non vere pastor; qui videt lupum venientem, & dimittit oves, & fugit: dicit autem Gregorius in hom. (xv. in Evang. aliquant. a princ.) quod *lupus super oves venit, cum quilibet iniustus, & raptor fideles quosque, atque humiles opprimis.* Si ergo propter persecutionem alicuius tyranni Episcopus gregem sibi commissum corporaliter deferat, videtur quod sit mercenarius, & non pastor.

2. Præterea. Proverb. vi. 1. dicitur: *Fili, si sponderis pro amico tuo, defixisti apud extraneum manum tuam: & postea subdit: Discede, festina, suscita amicum tuum:* quod exponens Gregorius in Pastor. (par. III. cap. 1. admonit. 5. inter princ. & med.) dicit: „Spondere pro amico, est animam alienam in periculo suae conversationis accipere. Quisquis autem ad vivendum aliis in exemplum proponitur, non solum ut ipse vigilet, sed etiam ut amicum suum, scilicet, admonetur.“ Sed hoc non potest facere, si corporaliter deferat gregem. Ergo videtur quod Episcopus non debeat causa persecutionis corporaliter suum gregem deferere.

3. Præterea. Ad perfectionem episcopalis status pertinet quod proximis curam impendat. Sed non licet ei qui est statum perfectionis professus, ut omnino deferat ea quae sunt perfectionis. Ergo videtur quod non liceat Episcopo corporaliter subtrahere ab executione sui officii, nisi forte ut operibus perfectionis in monasterio vacet.

Sed contra est quod Apostolis, quorum successores sunt Episcopi, mandavit Dominus Matth. x. 23. *Si vos persecuti fuerint in una civitate, fugite in aliam.*

Respondetur dicendum, quod in qualibet obligatione præcipue attendi debet obligationis finis. Obligant autem se Episcopi ad exequendum pastorale officium propter subditorum salutem. Et ideo ubi subditorum salus exigit personae pastoris praesentiam, non debet pastor personaliter suum gregem deferere neque propter aliquod commodum temporale, neque etiam propter aliquod personale periculum imminens, cum bonus pastor animam suam ponere teneatur pro ovibus suis.

Si vero subditorum salutis possit sufficienter in absentia pastoris per alium provideri, tunc licet pastori vel propter aliquod commodum Ecclesiae, vel propter

pter personæ periculum corporaliter gregem deferere. Unde Augustinus dicit in epist. ad Honoratum (ccxxviii. al. clxxx. aliquant. a princ.) *Fugiant de civitate in civitate servi Christi, quando eorum quicumque specialiter a persecutoribus queruntur; ut ab aliis, qui non ita queruntur, non deferatur Ecclesia. Cum autem omnium est commune periculum, hi qui aliis indigent, non deferantur ab his quibus indigent.* Si enim perniciosum est proleat in tranquillitate navem deferere, quanto magis in fluitibus? ut dicit Nicolaus Papa I. & habetur vii. quest. 1. (cap. Sciscitaris.)

Ad primum ergo dicendum, quod ille tamquam mercenarius fugit qui commodum corporale, vel etiam salutem corporalem spirituali salutem proximorum præponit. Unde Gregorius dicit in hom. (cit. in arg.) *Stare in periculo ovium non potest qui in eo quod ovibus præstet, non oves diligit, sed lucrum terrenum querit: Et ideo opponere se contra periculum trepidat, ne hoc quod diligit, amittat.* Ille autem qui ad evitandum periculum recedit absque detrimento gregis, non tamquam mercenarius fugit.

Ad secundum dicendum, quod ille qui spondet pro aliquo, si per se implere non possit, sufficit ut per alium impleat. Unde prælati, si habet impedimentum, propter quod non possit personaliter curæ subditorum intendere, suæ sponcioni satisfaciat, si per alium provideat.

Ad tertium dicendum, quod ille qui ad Episcopatum assumitur, assumit statum perfectionis secundum aliquod perfectionis genus; a quo li impediatur, ad aliud genus perfectionis non tenetur, ut scilicet necesse sit eum ad statum religionis transire. Imminet tamen sibi necessitas ut animum retineat intendendi proximorum salutem, si opportunitas adsit, & necessitas requirat.

## ARTICULUS VI. 381

*Utrum liceat Episcopo aliquid proprium habere.*

*Inf. quest. clxxxvi. art. 3. ad 5 & opus. xviii. cap. xvii. & xviii.*

**A**D sextum sic proceditur. Videtur quod Episcopo non liceat aliquid proprium possidere. Dominus enim dicit Matth. xix. 21. *Si vis perfectus esse, va-*

*de, & vende omnia quæ habes, & da pauperibus, & veni, & sequere me:* ex quo videtur quod voluntaria paupertas ad perfectionem requiratur. Sed Episcopi assumuntur ad statum perfectionis. Ergo videtur quod non liceat eis proprium possidere.

2. Præterea. Episcopi in Ecclesia tenent locum Apostolorum, ut dicit Glossa (ord. Bedæ sup. illud, *Designavit etc.*) Lucæ x. Sed Apostolis Dominus præcepit ut nihil proprium possiderent, secundum illud Matth. x. 9. *Nolite possidere aurum, neque argentum, neque pecuniam in zonis vestris:* unde & Petrus pro se, & pro aliis Apostolis dicit: *Eccē nos reliquimus omnia, & secuti sumus te:* Matth. xix. 27. Ergo videtur quod Episcopi teneantur ad huiusmodi mandati observantiam, ut nihil proprium possideant.

3. Præterea. Hieronymus dicit ad Nepotianum (epist. 11. inter princ. & med.) *Cleros græce, latine fors appellatur: propter quod clerici dicuntur, quia de sorte Domini sunt, vel quia ipse Dominus fors, id est pars, clericorum est. Qui autem Dominum possidet, nihil extra Deum habere potest. Si autem aurum, si argentum, si possessiones, si varias supellectilem habet, cum istis partibus non dignatur Dominus fieri pars eius.* Ergo videtur quod non solum Episcopi, sed etiam clerici debeant proprio carere.

Sed contra est quod dicitur xi. quest. 1. (cap. xix.) *Episcopi de rebus propriis, vel acquisitis, vel quicquid de proprio habent, hereditibus suis, si voluerint, derelinquant.*

Respondeo dicendum, quod ad ea quæ sunt supererogationis, nullus tenetur, nisi se specialiter ad illud voto astringat. Unde Augustinus dicit in epist. ad Paulinam, & Armentarium (epist. cxxvii. al. xlv. non remote a h.) *Quia iam voti, iam te obstrinxisti; aliud tibi facere non licet. Priusquam esses voti reus, liberum fuit quo esses inferior.* Manifestum est autem quod vivere absque proprio, supererogationis est: non enim cadit ibi præcepto, sed sub consilio. Unde Matth. xix. 17. cum dixisset Dominus adolescenti, *Si vis ad vitam ingredi, serua mandata*, postea superaddendo subdit: *Si vis perfectus esse, vade, & vende omnia quæ habes, & da pauperibus.* Non autem Episcopi in sua ordinatione ad hoc se obligant ut absque proprio vivant: neque etiam vivere absque proprio ex necessitate.

Ad 4 re-

requiritur ad pastorale officium, ad quod se obligant. Et ideo non tenentur Episcopi ad hoc quod sine proprio vivant.

Ad primum ergo dicendum, quod, sicut supra habitum est (quaest. clxxxiv. art. 3.) perfectio christianae vitae non consistit essentialiter in voluntaria paupertate; sed voluntaria paupertas instrumentaliter operatur ad perfectionem vitae. Unde non oportet quod ubi maior paupertas est, ibi fit maior perfectio; quinimmo potest esse summa perfectio cum magna opulentia: nam Abraham, cui dictum est Gen. xvii. 1. *Ambula coram me, et es perfectus*, legitur fuisse dives.

Ad secundum dicendum, quod verba illa Domini possunt tripliciter intelligi. Uno modo mystice, ut non possideamus neque aurum, neque argentum; idest ut predicatorum non innitatur principaliter sapientiae, & eloquentiae temporali, ut Hieronymus exponit (sup. illud Matth. x. *Nege duas tunicas*.) Alio modo, sicut Augustinus exponit in Lib. II. de consensu. Evang. (cap. xxx. a med.) ut intelligatur, hoc Dominum non precipiendo, sed magis permittendo dixisse. Permisit enim eis ut absque auro, & argento, & aliis sumptibus ad praedicandum irent, accepturi sumptus vitae ab his quibus praedicabant: unde subdit: *Dignus est enim operarius cibo suo*: ita tamen quod si aliquis propriis sumptibus uteretur in praedicatione Evangelii, ad supererogationem perineret; sicut Paulus de seipso dicit I. ad Cor. ix. Tercio modo, secundum quod Chrysostomus exponit (hom. xi. in illud Rom. xvi. *Salutate Priscillam* aliquant. a princ.) ut intelligatur illa Dominum praecipisse discipulis quantum ad illam missionem quam mittebantur ad praedicandum Iudeis; ut per hoc excitarentur ad confidendum de virtute ipsius, qui eis absque sumptibus provideret. Ex quo tamen non obligabantur ipsi, vel successores eorum, ut absque propriis sumptibus Evangelium praedicarent. Nam & de Paulo legitur II. ad Corinth. xii. quod ab aliis Ecclesiae stipendium accipiebat ad praedicandum Corinthiis: & sic patet quod aliquid possidebat ab aliis sibi missum. Stultum autem videtur dicere, quod tot sancti Pontifices, sicut Athanasius, Ambrosius, & Augustinus, illa praecepta transgressi fuissent, si ad ea servanda se crederent obligari.

Ad tertium dicendum, quod omnis

pars est minor toto. Ille ergo cum Deo alias partes habet cuius studium diminuitur circa ea quae sunt Dei, dum intendit his quae sunt mundi. Sic autem non debent nec Episcopi, nec clerici proprium possidere, ut dum curant propria, defectum faciant in his quae pertinent ad cultum divinum.

## ARTICULUS VII. 383

*Utrum Episcopi mortaliter peccent, si bona ecclesiastica quae procurant, pauperibus non largiantur.*

*Quod. vi. art. 12.*

**A**D septimum sic proceditur. Videtur quod Episcopi mortaliter peccent, si bona ecclesiastica quae procurant, pauperibus non largiantur. Dicit enim Ambrosius exponens illud Luc. xii. *Hominis curusdam divitis uberes fructus ager attulit* (term. lxxiv. de temp. vers. fi.) „Nemo proprium dicat quod e communi, plus quam sufficiat, sumptum, & violenter obtentum est: & postea subdit: „Neque minus est criminis habenti tollere, quam cum possis, & abundes, denegare indigentibus.“ Sed violenter tollere alienum, est peccatum mortale. Ergo Episcopi mortaliter peccant, si ea quae eis superfluit, pauperibus non largiantur.

2. Praeterea. Super illud Isa. lxi. *Rapina pauperum in domo vestra*, dicit Glossa Hieronymi (ordin.) quod „bona ecclesiastica sunt pauperum.“ Sed quicumque id quod est alterius, sibi reservat, aut aliis dat, peccat mortaliter, & tenetur ad restitutionem. Ergo si Episcopi bona ecclesiastica quae eis superfluit, sibi retineant, vel consanguineis, vel amicis largiantur, videtur quod teneantur ad restitutionem.

3. Praeterea. Multo magis aliquis potest de rebus Ecclesiae ea quae sibi sunt necessaria, accipere, quam superflua congregare. Sed Hieronymus dicit in epist. ad Damasum Papam (quid simile habet in Regula Monach. Hieron. adscripta cap. de Pauper. a med. Vid. cap. Clericos 1. quaest. 21.) *Clericos illos convenit stipendii Ecclesiae sustentari, quibus parentum, & propinquorum bona nulla suffragantur. Qui autem bonis parentum, & opibus propriis sustentari possunt, si quod pauperum est, accipiunt, sacrilegium committunt, & incurunt.* Unde & Apostolus dicit I. ad

Tim.

Tim. v. 16. *Si quis fidelis habet viduas, subministret illis, & non gravetur Ecclesia; ut his quæ vere viduæ sunt, sufficiat.* Ergo multo magis Episcopi mortaliter peccant, si ea quæ eis superfluum de bonis ecclesiasticis, pauperibus non largiantur.

Sed contra est quod plures Episcopi ea quæ superfluum, non largiuntur pauperibus, sed expendere videntur laudabiliter ad reditus Ecclesie ampliandos.

Respondendo dicendum, quod aliter est dicendum de propriis bonis, quæ Episcopi possidere possunt, & de bonis ecclesiasticis. Nam propriorum bonorum verum dominium habent: unde ex ipsa rerum conditione non obligantur ut ea aliis conferant; sed possunt ea vel sibi retinere, vel etiam aliis pro libito largiri. Possunt tamen in eorum dispensatione peccare propter inordinationem affectus; per quam contingit vel quod sibi plura (a) conferant quam oporteat, vel aliis etiam non subveniant, secundum quod requirit debitum caritatis; non tamen tenentur ad restitutionem, quia huiusmodi res sunt eorum dominio deputatæ.

Sed ecclesiasticorum bonorum sunt dispensatores, vel procuratores. Dicit enim Augustinus ad Bonifacium (epist. clxxxv. al. l. inter med. & fin.) *Si privatum possidemus quæ nobis sufficiant, non illa nostra sunt, sed pauperum, quorum procuracionem quodammodo gerimus, non proprietatem nobis usurpatione damnabili vendicamus.* Ad dispensationem autem requiritur bona fides, secundum illud I. ad Cor. iv. 2. *Hic iam queritur inter dispensatores ut fidelis quis inveniat.* Sunt autem bona ecclesiastica non solum in usus pauperum, sed etiam ad cultum divinum, & necessitates ministrorum expendenda. Unde dicitur xxi. quæst. ii. (cap. xxviii.) *De redditibus Ecclesie, vel oblatione fidelium, sola Episcopo ex his una portio remittatur; due ecclesiasticis fabricis, & erogationi pauperum profutura, a presbytero sub periculo sui ordinis ministrantur; ultima clericis pro singulorum meritis dividatur.* Si ergo distincta sint bona quæ debent in usum Episcopi cedere, ab his quæ sunt pauperibus, & ministris, & cultui Ecclesie eroganda, & aliquis sibi retinuerit Episcopus de his quæ sunt pauperibus eroganda, vel etiam in usum ministrorum, aut in cul-

tum divinum expendenda, non est dubium quin contra fidem dispensationis agat, & mortaliter peccet, & ad restitutionem teneatur.

De his autem quæ sunt specialiter suo usui deputata, videtur esse eadem ratio, quæ est de propriis bonis, ut scilicet propter immoderatum affectum, & usum peccet quidem, si immoderate sibi retineat, & aliis non subveniat, sicut requirit debitum caritatis.

(a)

Si vero non sunt prædicta bona distincta, eorum distributio fidei eius committitur: & si quidem in modico deficiat, vel superabundet, potest hoc fieri absque bonæ fidei detrimento, quia non potest homo in talibus punctualiter accipere illud quod fieri oportet; si vero sit multus excessus, non potest latere: unde videtur bonæ fidei repugnare: & ideo non est absque peccato mortali. Dicitur enim Matth. xxiv. 48. *quod si dixeris malus servus in corde tuo, Moram facis dominus meus venire, quod pertinet ad divini iudicii contemptum, & exasperis percutere servos suos, quod pertinet ad superbiam, manducet autem, & bibat cum ebriis, quod pertinet ad luxuriam; venit dominus servum illius in die quando sperat, & dividet eum, scilicet a societate bonorum, & partem eius ponet cum hypocritis, scilicet in inferno.*

Ad primum ergo dicendum, quod verbum illud Ambrosii non solum est referendum ad dispensationem rerum ecclesiasticarum, sed quorumcumque bonorum, ex quibus tenetur aliquis debito caritatis providere necessitatem patientibus. Non autem potest determinari, quando sit ista necessitas, quæ ad peccatum mortale obliget, sicut nec cetera particularia quæ in humanis actibus considerantur: horum enim determinatio relinquitur humanæ prudentiæ.

Ad secundum dicendum, quod bona Ecclesiasticorum non sunt solum expendenda in usus, pauperum, sed etiam in alios usus, ut dictum est (in cor. art.) Et ideo si de eo quod usui Episcopi, vel alicuius clerici est deputatum, velit aliquis sibi subtrahere, & consanguineis, vel aliis dare, non peccat, dummodo illud faciat moderate, id est ut non indigeant, non autem ut ditiores inde fiant. Unde Ambrosius dicit in Lib. I. de offic. (cap. xxx. cir. med. & hab. cap. E)

(a) Al. congerant, item convenient, (b) *non mfi. & idem, passim. Theologi de his parant non tamen ad restitutionem tenentur.*

*Est probanda, diff. lxxxvi. ) Hæc est ap-  
probanda liberalitas ut proximos. Semi-  
nis tui non desicias, si egere cogno-  
scas; non tamen ut illos ditiores fi-  
ri velis ex eo quod tu potes conferre ino-  
pibus.*

Ad tertium dicendum, quod non omnia bona Ecclesiarum sunt pauperibus largienda; nisi forte in articulo necessitatis, in quo pro redemptione captivorum, & aliis necessitatibus pauperum, etiam vasa cultui divino dicata distrahantur, ut Ambrosius dicit ( Lib. II. de offi. cap. xxviii. a princ. & hab. cap. Aurum, xii. quæst. 11. ) Et in tali necessitate peccaret clericus, si vellet de rebus Ecclesiæ vivere; dummodo haberet patrimonialia bona, de quibus vivere posset.

Ad quartum dicendum, quod bona Ecclesiarum usibus pauperum deservire debent. Et ideo si quis, necessitate non imminente providendi pauperibus, de his quæ superfluum ex proventibus Ecclesiæ, possessiones emat, vel in thesauro reponat in futurum utilitati Ecclesiæ, & necessitatibus pauperum, laudabiliter iacet. Si vero necessitas imminet pauperibus erogandi, superflua cura est, & inordinata; ut aliquis in futurum conservet: quod Dominus prohibet Matth. vi. 34. dicens: *Nolite solliciti esse in crastinum.*

### ARTICULUS VIII. 883

*Utrum religiosi qui promoventur in Episcopos, teneantur ad observantias regulares.*

*Sup. quæst. lxxxviii. art. 11. ad 4. Et IV. diff. xxxviii. quæst. 1. art. 4. quæst. 1. ad 5.*

**A**D octavum sic proceditur. Videtur quod religiosi qui promoventur in Episcopos, non teneantur ad observantias regulares. Dicitur enim xxxviii. quæst. 1. ( cap. Statutum ) quod monachum canonice electio a iugo regule monasticæ professionis absolvit; & sacra ordinatio de monacho Episcoporum facit. Sed observantia regulares pertinent ad iugum regulæ. Ergo religiosi qui in Episcopos assumuntur, non tenentur ad observantias regulares.

2. Præterea. Ille qui ab inferiori ad superiorem gradum ascendit, non vide-

tur teneri ad ea quæ sunt inferioris gradus: sicut supra dictum est ( quæst. lxxxviii. art. 12. ad 1. ) quod religiosus non tenetur ad observanda vota quæ in seculo fecit. Sed religiosus qui assumitur ad Episcopatum, ascendit ad aliquid maius, ut supra habitum est ( quæst. clxxxiv. art. 7. ) Ergo videtur quod non obligetur Episcopus ad ea quæ tenebatur observare in statu religionis.

3. Præterea. Maxime religiosi obligari videntur ad obedientiam, & ad hoc quod absque proprio vivant. Sed Religiosi qui assumuntur ad Episcopatum, non tenentur obedire prælati suarum religionum, quia sunt eis superiores: nec etiam videntur teneri ad paupertatem, quia, sicut in decreto supra inducto ( in arg. 1. ) dicitur, *quem sacra ordinatio de monacho Episcopum facit, velut legitimus heres, paternam sibi hereditatem iure vendicandi potestatem habet.* Interdum etiam conceditur eis testamenta conficere. Ergo multo minus tenentur ad alias observantias regulares.

Sed contra est quod dicitur in Decr. xvi. quæst. 1. ( cap. 111. ) *De monachis qui diu morantes in monasteriis, ( a ) postea ad clericatus ordinem pervenerint, statim, non debere eos a priori proposito discedere.*

Respondeo dicendum, quod, sicut supra dictum est ( quæst. præc. art. 7. ) status religionis ad perfectionem pertinet, quasi quædam via in perfectionem tendendi; status autem episcopalis ad perfectionem pertinet, tamquam quoddam perfectionis magisterium. Unde status religionis comparatur ad statum episcopalem, sicut disciplina ad magisterium, & dispositio ad perfectionem. Dispositio autem non tollitur, perfectione adveniente; nisi forte quantum ad id in quo perfectioni repugnat; quantum autem ad id quod perfectioni congruit, magis confirmatur; sicut discipulo, cum ad magisterium pervenerit, non congruit quod sit auditor; congruit tamen ipsi quod legat, & meditetur etiam magis quam ante. Sic ergo dicendum est, quod si qua sunt in regularibus observantia quæ non impediunt pontificale officium, sed magis valeant ad perfectionis custodiam, sicut est continentia, paupertas, & alia huiusmodi, ad hæc remanet religiosus etiam factus Episcopus obligatus, & per consequens ad potandum habitum suæ religionis, qui est huius obligationis signum.

Si.

(\*) *Id. si postea.*

Si qua vero sunt in observantiis regularibus quæ officio pontificali repugnant, sicut est solitudo, silentium, &c. aliquæ abstinentiæ, vel vigiliæ graves, ex quibus impotens corpore redderetur ad exequendum pontificale officium, ad huiusmodi observanda non tenetur.

In aliis autem potest dispensatione uti, secundum quod requirit necessitas personæ, vel officii, & conditio hominum cum quibus vivit, per modum quo etiam prælati religionum in talibus secum dispensant.

Ad primum ergo dicendum, quod ille qui fit de monacho Episcopus, absolvitur a iugo monachicæ professionis non quantum ad omnia, sed quantum ad illa quæ officio pontificali repugnant, ut dictum est (in corp. art.)

Ad secundum dicendum, quod vota secularis vitæ se habent ad vota religionis, sicut particulare ad universale, ut supra habitum est (quæst. lxxxviii. art. 2. ad 1.) Sed vota religionis se habent ad pontificalem dignitatem sicut dispositio ad perfectionem. Particulare autem superfluit, habito universali; sed dispositio adhuc necessaria est, perfectione obtenta.

Ad tertium dicendum, quod hoc est per accidens quod Episcopi religiosi obediunt prælati suarum religionum non tenentur, quia scilicet subditi esse deservunt, sicut & ipsi prælati religionum; manet tamen adhuc obligatio voti virtualiter; ita scilicet quod si eis legitime aliquis præceretur, obedire tenerentur, inquantum tenentur obedire statutis regulæ per modum prædictum, & suis superioribus, si quos habent. Proprium autem nullo modo habere possunt. Non enim paternam hereditatem vendicant quasi propriam, sed quasi Ecclesiæ debitam: unde ibidem subditur, quod postquam Episcopus ordinatur ad altare, ad quod sanctificatur, & iniungitur, secundum sacros canones, quod acquirere poterit restituat. Testamentum autem nullo modo facere potest: quia sola ei dispensatio committitur rerum ecclesiasticarum, quæ morte finitur, ex qua incipit testamentum valere, ut Apostolus dicit ad Hebr. ix. Si tamen ex concessione Papæ testamentum faciat, non intelligitur ex proprio facere testamentum; sed apostolica auctoritate intelligitur esse ampliata potestas suæ dispensationis, ut eius dispensatio possit valere post mortem.

## QUAESTIO CLXXXVI.

*De his in quibus religionis status præcipue consistit,*

*in decem articulos divisa.*

**D**Einde considerandum est de his quæ pertinent ad statum religionis. Circa quod occurrit quadruplex consideratio. Quarum prima est de his in quibus principaliter consistit religionis status. Secunda de his quæ religiosis licite convenire possunt. Tercia de distinctione religionum. Quarta de religionis ingressu.

Circa primum quaeruntur decem.

Primo, utrum religiosorum status sit perfectus.

Secundo, utrum religiosi teneantur ad omnia consilia.

Tertio, utrum pauperes voluntaria requiratur ad religionem.

Quarto, utrum requiratur continentia.

Quinto, utrum requiratur obedientia.

Sexto, utrum requiratur quod hæc cadunt sub voto.

Septimo de sufficientia horum votorum.

Octavo de comparatione eorum ad invicem.

Nono, utrum religiosus semper mortaliter peccet, quando transgreditur statutum suæ regulæ.

Decimo, utrum, ceteris paribus, in eodem genere peccati plus peccet religiosus quam secularis.

## ARTICULUS I. 384

*Utrum religio importet statum perfectionis.*

*Quol. v. art. 21. cor. & opusc. xviii. cap. xvi.*

**A**D primum sic proceditur. Videtur quod religio non importet statum perfectionis. Illud enim quod est de necessitate salutis, non videtur ad statum perfectionis pertinere. Sed religio est de necessitate salutis: quia per eam uni omnipotenti Deo relinamur, sicut Augustinus dicit in Lib. de vera relig. (cap. ult. vers. fin.) vel religio dicitur ex eo quod Deum relegimus, quem amiseramus

ne-



*negligentes*, ut Augustinus dicit in X. de civit. Dei ( cap. xv. ante med. ) Ergo videtur quod religio non nominet perfectionis statum.

2. Præterea. Religio secundum Tullium ( Lib. II. de invent. aliquant. ante fin. ) est *que naturæ divinæ cultum, & caeremoniam offert*. Sed afferre Deo cultum, & caeremoniam magis videtur pertinere ad ministeria sacrorum ordinum quam ad diversitatem statuum, ut ex supra dictis patet ( implic. quæst. lxxxvi. art. 3. ad 3. & art. 4. ) Ergo videtur quod religio non nominet perfectionis statum.

3. Præterea. Status perfectionis distinguitur contra statum incipientium, & proficientium. Sed etiam in religione sunt aliqui incipientes, & aliqui proficientes. Ergo religio non nominat perfectionis statum.

4. Præterea. Religio videtur esse penitentis locus: dicitur enim in Decretis vii. quæst. 1. ( cap. Hoc nequaquam : ) *Præcipit sancta Synodus ut quicumque de pontificali dignitate ad monachorum vitam, & penitentiam descenderit locum, numquam ad Pontificatum resurgat*. Sed locus penitentis opponitur statui perfectionis: unde Dionysius in vi. cap. eccles. Hierarch. ( parum a princ. ) ponit penitentes in infimo loco, scilicet inter purgandos. Ergo videtur quod religio non sit status perfectionis.

Sed contra est quod in collationibus Patrum ( collat. i. cap. vii. a med. ) dicit Abbas Moyses de religiosi loquens: *Jeuniorum incitiam, vigiliis, labores corporis, nuditatem, lectionem ceterasque virtutes debere nos suscipere noverimus, ut ad perfectionem caritatis istis gradibus possumus ascendere*. Sed ea quæ ad humanos actus pertinent, ab intentione finis speciem, & nomen recipiunt. Ergo religiosi pertinent ad statum perfectionis. Dionysius etiam vi. cap. eccles. Hierarch. ( loc. cit. ) dicit, *eos qui nominantur Dei famuli, ex Dei puro servitio, & famulatu, uniri ad amabilem perfectionem*.

Respondeo dicendum, quod, sicut ex supra dictis patet ( quæst. cxli. art. 2. ) id quod communiter multis convenit, antonomastice attribuitur ei cui per excellentiam convenit; sicut nomen fortitudinis vendicat sibi illa virtus quæ circa difficillima firmitatem animi servat; & temperantiae nomen vendicat sibi illa virtus quæ temperat maximas delectationes. Religio autem, ut supra habi-

tum est ( quæst. lxxxvi. art. 2. ) est quædam virtus, per quam aliquis ad Dei servitium, & cultum aliquod exhibet. Et ideo antonomastice religiosi dicuntur illi qui se totaliter mancipant divino servitio, quasi holocaustum Deo offerentes. Unde Gregorius dicit super Ezech. ( hom. xx. inter med. & fin. ) *Sunt quidam qui nihil sibi metipsum reservant; sed sensum, linguam, vitam, atque substantiam, quam perceperunt, omnipotenti Deo immolant*.

In hoc autem perfectio hominis consistit quod totaliter Deo inhereat, sicut ex supra dictis patet ( quæst. clxxxiv. art. 2. ) & secundum hoc religio perfectionis statum nominat.

Ad primum ergo dicendum, quod exhibere aliqua ad cultum Dei est de necessitate salutis; sed quod aliquis se totaliter, & sua divino cultui deputet, ad perfectionem pertinet.

Ad secundum dicendum, quod, sicut supra dictum est ( quæst. lxxxvi. art. 1. ad 1. & art. 4. ad 1. & 2. ) cum de virtute religionis ageretur, non solum ad religionem pertinent oblationes sacrificialium, & alia huiusmodi, quæ sunt religioni propria; sed etiam actus omnium virtutum; secundum quod referuntur ad Dei servitium, & honorem, efficiuntur actus religionis. Et secundum hoc si aliquis totam vitam suam divino servitio deputet, tota vita sua ad religionem pertinebit: & secundum hoc ex vita religiosa, quam dicunt, religiosi dicuntur qui sunt in statu perfectionis.

Ad tertium dicendum, quod, sicut dictum est ( quæst. clxxxiv. art. 5. & 6. ) religio nominat statum perfectionis ex intentione finis. Unde non oportet quod quicumque est in religione, iam sit perfectus, sed quod ad perfectionem tendat. Unde super illud Matth. xix. *Si vis perfectus esse &c.* dicit Origenes ( tract. viii. in Matth. aliquant. a med. ) *quod ille qui mutavit pro divitiis pauperem, ut fiat perfectus, non in ipso tempore quod tradiderit bona sua pauperibus, fiet omnino perfectus, sed ex illa die incipit speculatio Dei adducere eum ad omnes virtutes*. Et hoc modo in religione non omnes sunt perfecti, sed quidam incipientes, quidam proficientes.

Ad quartum dicendum, quod religionis status principaliter est institutus ad perfectionem adipiscendam per quædam exercitia, quibus tolluntur impedimenta per-

perfectæ caritatis. Sublatis autem impedimentis perfectæ caritatis, multo magis exciduntur occasiones peccati, per quod totaliter tollitur caritas. Unde cum ad poenitentem pertineat causas peccatorum excidere, ex consequenti status religionis est convenientissimus poenitentis locus. Unde in Decr. xxxiii. quest. ii. cap. *Admonere*, consultur cuidam qui uxorem occiderat, ut potius monasterium ingrediatur, quod dicitur esse melius, & leuius, quam quod poenitentiam publicam agat, remanendo in sæculo.

## ARTICULUS II. 885

*Utrum quilibet religiosus teneatur ad omnia consilia.*

*IV. dist. i. quest. ii. art. 6. quest. 2. ad 3.*

**A**D secundum sic proceditur. Videtur quod quilibet religiosus teneatur ad omnia consilia. Quicumque enim proficitur statum aliquem, tenetur ad ea quæ illi statui conveniunt. Sed quilibet religiosus proficitur statum perfectionis. Ergo quilibet religiosus tenetur ad omnia consilia quæ ad perfectionis statum pertinent.

2. Præterea. Gregorius dicit super Ezech. (hom. xx. inter med. & fin.) quod *ille qui præsens sæculum deserit, & agit omnia bona quæ valet, quasi iam Agrippa derelicta, sacrificium præbet in eremo*. Sed deserere sæculum, specialiter pertinet ad religiosos. Ergo etiam eorum est agere omnia bona quæ valent; & ita videtur quod quilibet eorum teneatur ad omnia consilia implenda.

3. Præterea. Si non requiritur ad statum perfectionis quod aliquis omnia consilia impleat, sufficiens esse videtur, si quædam consilia impleat. Sed hoc falsum est: quia multi in sæculari vita existentes aliqua consilia implent, ut patet de his qui continentiam servant. Ergo videtur quod quilibet religiosus, qui est in statu perfectionis, teneatur ad omnia quæ sunt perfectionis. Huiusmodi autem sunt omnia consilia.

Sed contra. Ad ea quæ sunt supererogationis, non tenetur aliquis nisi ex propria obligatione. Sed non quilibet religiosus obligat se ad omnia, sed ad aliqua determinata, quidam ad hæc, quidam ad illa. Non ergo omnes tenentur ad omnia.

Respondeo dicendum, quod ad perfectionem aliquid pertinet tripliciter. Uno modo essentialiter: & sic, sicut supra dictum est (quest. clxxxv. art. 3.) ad perfectionem pertinet perfecta observantia præceptorum caritatis. Alio modo ad perfectionem pertinet aliquid consequenter, sicut illa quæ consequuntur ex perfectione caritatis; puta quod aliquis maledicenti benedicat, & alia huiusmodi impleat: quæ etsi secundum præparationem animi sint in præcepto, ut scilicet impleantur, quando necessitas requirit; tamen ex superabundantia caritatis procedit quodetiam præter necessitatem quandoque talia impleantur. Tertio modo pertinet aliquid ad perfectionem instrumentaliter, & dispositivè, sicut paupertas, continentia, abstinentia, & alia huiusmodi.

Dictum est autem (art. præc.) quod ipsa perfectio caritatis est finis status religionis. Status autem religionis est quedam disciplina, vel exercitium ad perfectionem perveniendi; ad quam quidem aliqui pervenire nituntur exercitiis diversis; sicut etiam medicus ad sanandum uti potest diversis medicamentis. Manifestum est autem quod illi qui operatur ad finem, non ex necessitate convenit quod iam assecutus sit finem, sed requiritur quod per aliquam viam tendat ad finem. Et ideo ille qui statum religionis assumit, non tenetur habere perfectam caritatem; sed tenetur ad hoc tendere, & operam dare ut habeat caritatem perfectam.

Et eadem ratione non tenetur ad hoc quod illa impleat quæ ad perfectionem caritatis consequuntur; tenetur autem ut ad ea implenda intendat: contra quod facit contemnens: unde non peccat, si ea prætermittat, sed si ea contemnat.

Similiter etiam non tenetur ad omnia exercitia quibus ad perfectionem pervenitur, sed ad illa quæ determinate sunt ei taxata secundum regulam quam professus est.

Ad primum ergo dicendum, quod ille qui transit ad religionem, non proficitur se esse perfectum, sed proficitur se adhibere studium ad perfectionem consequendam; sicut etiam ille qui intrat scholas, non proficitur se scientem, sed proficitur se studentem ad scientiam acquirendam. Unde, sicut Augustinus dicit in VIII. de civit. Dei (cap. ii. a princ.) *Pythagoras noluit se sapientem profiteri, sed*

*Ja-*

*sapientie amatorem*. Et ideo religiosus non est transgressor professionis, si non sit perfectus, sed solum si contemnat ad perfectionem tendere.

Ad secundum dicendum, quod sicut diligere Deum ex toto corde tenentur omnes; est tamen aliqua totalitas perfectionis, quæ sine peccato prætermitti non potest, aliqua autem quæ sine peccato prætermittitur, dum tamen delicti contemptus, ut supra dictum est (quæst. clxxxiv. art. 2. ad 3.) ita etiam omnes tam religiosi, quam sæculares tenentur aequaliter facere quicquid boni possunt: omnibus enim communiter dicitur Eccl. ix. 10. *Quodcumque facere potest manus tua, instanter operare*. Est tamen aliquis modus hoc præceptum implendi, quo peccatum vitatur, scilicet si homo faciat quod potest, secundum quod requirit conditio sui status; dummodo contemptus non adsit agendi meliora, per quem animus firmatur contra spirituales profectum.

Ad tertium dicendum, quod quedam consilia sunt quæ si prætermitterentur, tota vita hominis implicaretur negotiis sæcularibus; puta si quis haberet proprium, vel matrimonium uteretur, aut aliquid huiusmodi faceret, quod pertinet ad essentialia vota religionis: & ideo ad omnia talia consilia observanda religiosi tenentur. Sunt autem quedam consilia de quibusdam melioribus particularibus actibus, quæ prætermitti possunt absque hoc quod vita hominis sæcularibus actibus implicetur: unde non oportet quod ad omnia talia religiosi teneantur.

### ARTICULUS III. 886

*Utrum paupertas requiratur ad perfectionem religionis.*

*Inf. art. 4. co. & ad 1. & opusc. xviii. cap. vii. & xviii.*

**A**D tertium sic proceditur. Videtur quod paupertas non requiratur ad perfectionem religionis. Non enim videtur ad statum perfectionis pertinere illud quod illicite fit. Sed quod homo omnia sua relinquat, videtur esse illicitum: Apostolus enim II. ad Corinth. viii. 12. dat formam fidelibus elemosynas faciendi, dicens: *Si voluntas prompta est, secundum id quod habes, accepta est*, idest ut necessaria retineatis: & postea subdit: *Non enim ut aliis sis remissio, vobis au-*

*tem tribulatio*: Glossa (interl.) idest „paupertas.“ Et super illud I. ad Tim. vi. *Habentes alimenta, & quibus tegamur*, dicit Glossa (interl.) „Et si nihil intulerimus, vel ablati sumus; non tamen omnino abiiciendi sunt hæc temporalia.“ Ergo videtur quod voluntaria paupertas non requiratur ad perfectionem religionis.

2. Præterea. Quicumque se exponit periculo, peccat. Sed ille qui omnibus suis relictis, voluntariam paupertatem sectatur, exponit se periculo & spirituali, secundum illud Prov. xxx. 9. *Ne forte egestate compulsus fueris, & perireum nomen Dei mei*: & Eccl. xxvii. 1. *Propter inopiam multi deliquerunt*: & etiam corporali: dicitur enim Eccl. vii. 13. *Sicut protegit sapientia, sic protegit & pecunia*: & Philosophus dicit in IV. Ethic. (cap. 1. paulo a princ.) quod videtur quedam perditio ipsius hominis esse corruptio divitiarum, quia per has homo vivit. Ergo videtur quod voluntaria paupertas non requiratur ad perfectionem religionis vitæ.

3. Præterea. Virtus in medio consistit, ut dicitur in II. Ethic. (cap. vi.) Sed ille qui omnia dimittit per voluntariam paupertatem, non videtur in medio consistere, sed magis in extremo. Ergo non agit virtuosè, & ita hoc non pertinet ad vitæ perfectionem.

4. Præterea. Ultima perfectio hominis in beatitudine consistit. Sed divitiæ conferunt ad beatitudinem: dicitur enim Eccl. xxxi. 8. *Beatus dives qui intentus est sine macula*: & Philosophus dicit in I. Ethic. (cap. v. circa fin. & cap. x.) quod *organice divitiæ deserviunt ad felicitatem*. Ergo voluntaria paupertas non requiritur ad perfectionem religionis.

5. Præterea. Status Episcoporum est perfectior quam status religionis. Sed Episcopi possunt proprium habere, ut supra habitum est (quæst. præc. art. 6.). Ergo & religiosi.

6. Præterea. Dare elemosynam est opus maxime Deo acceptum, & sicut Chrysostomus dicit (hom. ix. in epist. ad Hebr. declinando ad fin.) *medicamentum, quod maxime in paupertate operatur*. Sed paupertas excludit elemosynarum largitionem. Ergo videtur quod paupertas ad perfectionem religionis non pertineat.

Sed contra est quod Gregorius dicit in VIII. Mor. (cap. xv. a princ.) *Sunt nonnulli iustorum, qui ad comprehendendum cul-*

culmen perfectionis accincti, dum aliorum interiorum appetunt, exterius cuncta derelinquunt. Sed accingi ad comprehendendum culmen perfectionis, proprie pertinet ad religiosos, ut dictum est (art. 1. & 2. præc.) Ergo eis competit ut per voluntariam paupertatem cuncta exterius derelinquant.

Respondendo dicendum, quod, sicut supra dictum est (art. præc.) status religionis est quoddam exercitium, & disciplina, per quam pervenitur ad perfectionem caritatis. Ad quod quidem necessarium est quod aliquis affectum suum totaliter abstrahat a rebus mundanis: dicit enim Augustinus in X. Confess. (cap. xxix.) ad Deum loquens: *Minus te amas qui tecum aliquid amat, quod non propter te amas.* Unde in Lib. lxxxiii. Q. q. (quæst. xxxv. cir. princ.) dicit Augustinus, quod *nutrimentum caritatis & diminutio cupiditatis, perfectio nulla cupiditas.* Ex hoc autem quod aliquis mundanitas possidet, allicitur animus eius ad eam amorem. Unde Augustinus dicit in epist. ad Paulinum, & Thera- tiam (xxxix. al. xxxiv. a med.) quod *terrena diliguntur artius adepta quam concupiscit.* Nam unde invenit ille tristis digestus, nisi quia magnas divitias habebat? Aliud est enim nolle incorporare quæ desunt; aliud iam incorporata divellere: illa velut extranea repudiatur; (a) ista velut membra præcinduntur. Et Chrysostomus dicit super Matth. (hom. lxxv. ante med.) quod *apposito divitiarum maiorem accendis flammam, & vehementior fit cupido.*

Et inde est quod ad perfectionem caritatis acquirendam primum fundamentum est voluntaria paupertas, ut aliquis absolute proprio vivat, dicente Domino Matth. xix. ar. *Si vis perfectus esse, vende omnia quæ habes, & da pauperibus, & veni, sequere me.*

Ad primum ergo dicendum, quod, sicut Glossa (interl.) ibid. subdit, „non, ideo dixit Apostolus, scilicet ut vobis, non sit tribulatio, id est paupertas, quin, melius esset omnia dare; sed iustis, timet, quos sic dare monet ut egestatem non patiantur.“ Unde similiter etiam ex Glossa alia non est intelligendum, quod non liceat omnia temporalia abicere, sed quod non ex necessitate requiritur. Unde & Ambrosius dicit in l. de off. (cap. xxx. ante med.) *Domini non vult, scilicet ex necessitate præ-*

*cepti, simul effundi oper, sed dispensari: nisi forte ut Helisæus boves suos occidit, & parvis pauperes ex eo quod habuit, ut nulla cura teneretur domesticæ.*

Ad secundum dicendum, quod ille qui omnia sua dimittit propter Christum, non exponit se periculo neque spirituali, neque corporali. Spirituale enim periculum ex paupertate provenit, quando non est voluntaria: quia ex affectu congregandi pecunias, quem pariuntur illi qui involuntarie sunt pauperes, incidit homo in multa peccata, secundum illud l. ad Tim. ult. 9. *Qui volunt divites fieri, incidunt in tentationem, & in laqueum diaboli.* Ille autem affectus deponitur ab his qui voluntariam paupertatem sequuntur; magis autem dominatur in his qui divitias possident, ut ex supra dictis patet (in cor. ar.) Corporale etiam periculum non imminet illis qui intentione sequendi Christum omnia sua relinquunt, divinarum providentiæ se committentes. Unde Augustinus dicit in Lib. II. de ferm. Domini in monte (cap. xvii. in princ.) *Querentibus primum regnum Dei, & iustitiam eius, non debet subesse sollicitudo, ne necessaria deficiant.*

Ad tertium dicendum, quod medium virtutis, secundum Phil. in II. Ethic. (cap. vi.) accipitur secundum rationem rectam, non secundum quantitatem rei. Et ideo quicquid potest fieri secundum rationem rectam, non est vitiosum ex magnitudine quantitatis, sed magis vitiosum. Esset autem præter rationem rectam, si quis omnia sua consumeret per intemperantiam, vel absque utilitate. Est autem secundum rationem rectam quod aliquis divitias abiciat, ut contemplationi sapientiæ vacet quod etiam Philosophi quidam legunt fecisse. Dicit enim Hieronymus in epist. ad Paulinum: *Crates ille Thibanus, bene quondam ditissimus, cum ad philosophandum Athenas pergeret, magnum antri pondus abiecit; nec putavit se posse simul divitias, & virtutes possidere.* Unde multo magis secundum rationem rectam est ut homo omnia sua relinquat, ad hoc quod Christum perfecte sequatur. Unde Hieronymus dicit in epist. ad Rusticum monachum: *Christum nudum nudus sequere.*

Ad quartum dicendum, quod duplex est beatitudo, sive felicitas: una quidem perfecta, quam expostamus in futura vi-

ta;

(a) Ita mss. Edit. ista vero velut membra præcinduntur.

ta; alia vero imperfecta, secundum quam aliqui dicuntur in hac vita beati. Vitae autem praesentis felicitas est duplex: una quidem secundum vitam activam; alia vero secundum vitam contemplativam, ut patet per Philosophum in X. Ethic. (cap. vii. & viii.) Ad felicitatem autem vitae activae, quae consistit in exterioribus operationibus, instrumentaliter divitiarum coadiuvant: quia, ut Philosophus dicit in I. Ethic. (cap. viii.) *multa operantur per amicos, & per divitias, & per civilem potentiam, sicut per quaedam organa.* Ad felicitatem autem contemplativae vitae non multum operantur; sed magis impediunt, in quantum sua solitudine impediunt animi quietem, quae maxime necessaria est contemplanti. Et hoc est quod Philosophus dicit in X. Ethicor. (cap. viii. ante med.) *quod ad actiones multis opus est; speculanti vero nulla talium, scilicet exteriorum bonorum, ad operationem necessitas, sed impedimenta sunt ad speculationem.* Ad futuram vero beatitudinem ordinatur aliquis per caritatem. Et quia voluntaria paupertas est efficax exercitium perveniendi ad perfectam caritatem, ideo multum valet ad caelestem beatitudinem consequendam. Unde & Dominus Matth. xix. 21. dicit: *Vade, vende omnia quae habes, & da pauperibus, & habebis thesaurum in caelo.* Divitiarum autem habite per se quidem natae sunt perfectionem caritatis impedire principaliter alliciendo animum, & distrahendo: unde dicitur Matth. xiii. 22. *quod sollicitudo saeculi, & fallacia divitiarum suffocant verbum Dei:* quia, ut Gregorius dicit (hom. xv. in Evang. in med.) *dum bonum desiderium ad cor intrare non sinunt, quasi aditum status vitalis necant.* Et ideo difficile est caritatem inter divitias conservare: unde Dominus dicit Matth. xix. *quod dives difficile intrabit in regnum caelorum:* quod quidem intelligendum est de eo qui actu habet divitias: nam de eo qui affectum in divitiis ponit, dicit hoc esse impossibile. secundum expositionem Chrysostomi (hom. lxiv. in Matth. ante med.) cum subdit: *Facilius est camelum per foramen acus transire quam divitem intrare in regnum caelorum.* Et ideo non simpliciter dives dicitur esse beatus, sed qui inventus est sine macula, & post aurum non abiit: & hoc ideo, quia rem difficilem fecit: unde subditur: *Quis est hic, & laudabimus eum? fecit enim mirabilia in vita sua,*

ut scilicet inter divitias positus divitias non amaret.

Ad quintum dicendum, quod status episcopalis non ordinatur ad perfectionem adipiscendam, sed potius ut ex perfectione quam quis habet, alios gubernet, non solum ministrando spiritalia, sed etiam temporalia: quod pertinet ad vitam activam, in qua multa operanda occurrunt instrumentaliter per divitias, ut dictum est (in solut. praec.) Et ideo ab episcopis, qui profitentur gubernationem gregis Christi, non exigitur ut proprio careant, sicut exigitur a religiosis, qui profitentur disciplinam perfectionis acquirendae.

Ad sextum dicendum, quod abrenuntiatio propriarum divitiarum comparatur ad elemosinarum largitionem, sicut universale ad particulare, & holocaustum ad sacrificium. Unde Gregorius dicit super Ezech. (hom. xx. inter med. & fin.) *quod illi qui ex possessis rebus subsidia egentibus ministrant, in bonis quae faciunt, sacrificium offerunt, quia aliquid Deo immolant, & aliquid sibi reservant; qui vero nihil sibi reservant, offerunt holocaustum, quod est maius sacrificium.* Unde etiam Hieronymus contra Vigilantium (cap. v. cir. fin. & incipit, *Multa in orbe*) dicit: *Quod autem afferis, eos melius facere qui utuntur rebus suis, & paulatim fructus possessionum suarum pauperibus dividunt, non a me eis, sed a Domino respondebitur: Si vis perfectus esse &c. & postea subdit: Ille quem tu laudas, secundus & tertius gradus est, quem & nos recipimus; dummodo sciamus prima secundis, & tertiis preferenda.* Et ideo ad excludendum errorem Vigilantii dicitur in Lib. de eccl. dogmatibus (cap. lxxi.) *Bonum est facultates cum dispensatione pauperibus erogare: melius est pro intentione sequendi Dominum infirmis donare, & absolutum solitudine egere cum Christo.*

## ARTICULUS IV. 387

*Utrum perpetua continentia requiratur ad perfectionem religionis.*

Sup. quaest. lxxxviii. art. 11. cor. fi. & opus. xviii. cap. ix. & opus. xix. cap. i. & in prol. super lo. lect. 2.

**A**d quartum sic proceditur. Videtur quod perpetua continentia non requiratur ad perfectionem religionis. Omnis enim vitae christianae perfectio ab

ApO-

Apostolis Christi cœpit. Sed Apostoli continentiam non videntur servasse, ut patet de Petro, qui socium legitur habuisse Matth. viii. Ergo videtur quod ad perfectionem religionis non requiratur perpetua continentia.

1. Præterea. Primum perfectionis exemplar nobis in Abraham ostenditur, cui Dominus dixit Gen. xvii. 1. *Ambula coram me, & esto perfectus*. Sed exemplatum non oportet quod excedat exemplar. Ergo non requiritur ad perfectionem religionis perpetua continentia.

3. Præterea. Illud quod requiritur ad perfectionem religionis, in omni religione invenitur. Sunt autem aliqui religiosi qui uxoribus utuntur. Non ergo religionis perfectio exigit perpetuam continentiam.

Sed contra est quod Apostolus II. ad Cor. vii. 1. dicit: *Mundemus nos ab omni inquinamento carnis, & spiritus, perficientes sanctificationem nostram in timore Dei*. Sed munditia carnis, & spiritus conservatur per continentiam: dicitur enim I. Cor. vii. 34. *Mulier inupta, & virgo cogitat quæ Domini sunt, ut sit sancta spiritu, & corpore*. Ergo perfectio religionis requirit continentiam.

Respondeo dicendum, quod ad statum religionis requiritur lubricatio eorum per quæ homo impeditur ne feratur totaliter in Dei servitium. Usus autem carnalis copulæ retrahit animum ne totaliter feratur in Dei servitium, dupliciter. Uno modo propter vehementiam delectationis, ex cuius frequenti experientia augetur concupiscentia, ut etiam Philosophus dicit in III. Ethic. (cap. ult. a med.) Et inde est quod usus venerorum retrahit animum ab illa perfecta intentione tendendi in Deum. Et hoc est quod Augustinus dicit in I. Soliloquior. (cap. x. ante med.) *Nihil esse sentio quod magis ex arce deiciat animum virilem, quam blandimenta semina, corporumque ille contactus, sine quo uxor haberi non potest*. Alio modo propter sollicitudinem, quam ingerit homini de gubernatione uxoris, & filiorum, & rerum temporalium, quæ ad eorum sustentationem sufficiant. Unde Apostolus dicit (I. Cor. vii. 32.) quod qui sine uxore est, sollicitus est quæ sunt Domini, quomodo placeat Deo; qui autem cum uxore est, sollicitus est quæ sunt mundi, quomodo placeat uxori.

S. Tb. Oper. Tom. XXIII.

Et ideo continentia perpetua requiritur ad perfectionem religionis, sicut voluntaria paupertas. Unde sicut damnatus est Vigilantius, qui adequavit divitias paupertati; ita damnatus est Iovinianus, qui adequavit matrimonium virginitati.

Ad primum ergo dicendum, quod perfectio non solum paupertatis, sed etiam continentia: introducta est per Christum, qui dicit Matth. xix. 12. *Sunt eunuchi qui castraverunt seipsos propter regnum celorum*: & postea subdit: *Qui potest capere capiat*. Et ne alicui spes perveniendi ad perfectionem tolleretur, assumptis ad perfectionis statum etiam illos quos invenit matrimonio iunctos. Non autem poterat absque iniuria fieri quod viri uxores desererent; sicut absque iniuria fiebat quod omnes divitias relinquerent. Et ideo Petrum, quem invenit matrimonio iunctum, non separavit ab uxore; Ioannem tamen volentem nubere a nuptiis revocavit.

Ad secundum dicendum, quod, sicut Augustinus dicit in Lib. de bono coniugali (cap. xxii. ante med.) *melior est castitas calibum quam castitas nuptiarum, quarum Abraham habebat unam in usu, ambas in habitu: caste quippe coniugalter vixit; esse autem castus sine coniugio potuit, sed tunc non oportuit*. Nec tamen quia antiqui patres perfectionem animi simul cum divitiis, & matrimonio habuerunt, quod ad magnitudinem virtutis pertinebat, propter hoc infirmiores quique debent præsumere se tantæ esse virtutis ut cum divitiis, & matrimonio possint ad perfectionem pervenire; sicut nec aliquis præsumit hostes infernis in vadere, quia Sampson cum mandibula asini multos hostium peremit. Nam illi patres, si tempus fuisset continentia, & paupertatis servandæ, studiosius hoc impleverunt.

Ad tertium dicendum, quod illi modi vivendi secundum quos homines matrimonio utuntur, non sunt simpliciter & absolute loquendo religiones, sed secundum quid, inquantum scilicet in aliquo participant quædam quæ ad statum religionis pertinent.

## ARTICULUS V. 888

*Utrum obedientia pertineat ad perfectionem religionis.*

*Opus. xviii. cap. x. & opus. xix. cap. 1.*

**A**D quintum sic proceditur. Videtur quod obedientia non pertineat ad perfectionem religionis. Illa enim videtur ad perfectionem religionis pertinere quæ sunt supererogationis, ad quæ non omnes tenentur. Sed ad obediendum prælati suis omnes tenentur, secundum illud Apostoli ad Hebr. ult. 17. *Obedite præpositis vestris, & subiaccite eis.* Ergo videtur quod obedientia non pertineat ad perfectionem religionis.

2. Præterea. Obedientia pertinere videtur proprie ad eos qui debent regi sensu alieno; quod est indiscretorum. Sed Apostolus dicit ad Hebr. v. 14. quod *perfectorum est solidus cibus, qui pro consuetudine exercitatos habent sensus ad discretionem boni, & mali.* Ergo videtur quod obedientia non pertineat ad statum perfectorum.

3. Præterea. Si obedientia requireretur ad perfectionem religionis, oporteret quod omnibus religiosis conveniret. Non autem omnibus convenit: sunt enim quidam religiosi solitariam vitam agentes, qui non habent superiores, quibus obediunt: prælati etiam religionum ad obedientiam non videntur teneri. Ergo obedientia non videtur pertinere ad religionis perfectionem.

4. Præterea. Si votum obedientiæ ad religionem requireretur, consequens esset quod religiosi tenerentur prælati suis in omnibus obedire, sicut & per votum continentie tenentur ab omnibus veneratoribus abstinere. Sed non tenentur prælati suis obedire in omnibus, ut supra habitum est (quæst. civ. art. 5.) cum de virtute obedientiæ ageretur. Ergo votum obedientiæ non requiritur ad religionem.

5. Præterea. Illa servitia sunt Deo maxime accepta quæ liberaliter, & non ex necessitate sunt, secundum illud II ad Cor. ix. 7. *Non ex tristitia, aut ex necessitate.* Sed illa quæ sunt ex obedientia, sunt ex necessitate præcepti. Ergo laudabilius sunt bona opera quæ sunt propria sponte facit. Votum ergo obedientiæ non competit religioni, per quam homines quærunt ad meliora pervenire.

Sed contra. Perfectio religionis maxime consistit in imitatione Christi, secundum illud Matth. xix. 21. *Si vis perfectus esse &c. sequere me.* Sed in Christo maxime commendatur obedientia, secundum illud ad Philip. ii. 8. *Factus est obediens usque ad mortem.* Ergo videtur quod obedientia pertineat ad perfectionem religionis.

Respondeo dicendum, quod, sicut supra dictum est (art. 2. & 3. huius quæst.) status religionis est quædam disciplina, vel exercitium tendendi in perfectionem. Quicumque autem instruuntur, vel exercitantur, ut perveniant ad aliquem finem, oportet quod directionem alicuius lequantur, secundum cuius arbitrium instruuntur, vel exercitentur, ut perveniant ad illum finem, quasi discipuli sub magistro. Et ideo oportet quod religiosi in his quæ pertinent ad religiosam vitam, alicuius instructioni, & imperio subdantur: unde & vii. quæst. 1. (cap. *Hoc nequaquam*) dicitur: *Monachorum vita subiectionis habet verbum, & disciplinatus.* Imperio autem, & alterius instructioni subiicitur homo per obedientiam: & ideo obedientia requiritur ad religionis perfectionem.

Ad primum ergo dicendum, quod obedire prælati in his quæ pertinent ad necessitatem virtutis, non est supererogationis, sed omnibus commune; sed obedire in his quæ pertinent ad exercitium perfectionis, pertinet proprie ad religiosos: & comparatur ista obedientia ad aliam, sicut universale ad particulare. Illi enim qui in saeculo vivunt, aliquid sibi retinent, & aliquid Deo largiuntur: & secundum hoc obedientiæ prælatorum subduntur. Illi vero qui vivunt in religione, totaliter se, & sua tribuunt Deo, ut ex supra dictis patet (art. 3. huius quæst.) Unde obedientia eorum est universalis.

Ad secundum dicendum, quod, sicut Philosophus dicit in II. Ethic. (cap. 1. & 11.) *homines exercitantes se in operibus perveniunt ad aliquos habitus, quos cum acquisierint, eisdem actus maxime possunt operari.* Sic ergo obediendo, illi qui non sunt perfectionem adepti, ad perfectionem perveniunt; illi autem qui iam sunt perfectionem adepti, maxime prompti sunt ad obediendum, non quasi indigentes dirigi ad perfectionem acquirendam, sed quasi per hoc se conservantes in eo quod ad perfectionem pertinet.

Ad tertium dicendum, quod subiectio

re-

ARTICULUS VI. 889

religiosorum principaliter attenditur ad Episcopos, qui comparantur ad eos, sicut perfectiores ad perfectos, ut patet per Dionysium vi. cap. eccl. Hier. (ante med.) ubi etiam dicit, quod monachorum ordo Pontificum consummationis virtutibus mancipatur, & divinis eorum illuminationibus edocetur. Unde ab Episcoporum obedientia nec eremitæ, nec etiam prælati religionem exculant: & si a diocesanis Episcopis totaliter, vel ex parte sunt exempti, obligantur tamen ad obediendum summo Pontifici, non solum in his quæ sunt communia aliis, sed etiam in his quæ specialiter pertinent ad disciplinam religionis.

Ad quartum dicendum, quod votum obedientiæ ad religionem pertinens, se extendit ad dispositionem totius humanæ vitæ: & secundum hoc votum obedientiæ habet quamdam universalitatem, licet non se extendat ad omnes particulares actus: quorum quidam ad religionem non pertinent, quia non sunt de rebus pertinentibus ad dilectionem Dei, & proximi, sicut confratio barbæ, vel levatio sestucæ de terra, & similia, quæ non cadunt sub voto, nec sub obedientia; quidam vero etiam contrariantur religioni. Nec est simile de voto continentiæ, per quam excluduntur actus omnino perfectioni religionis contrarii.

Ad quintum dicendum, quod necessitas coactionis facit involuntarium, & ideo excludit rationem laudis, & meriti; sed necessitas consequens obedientiam non est necessitas coactionis, sed liberæ voluntatis, inquantum homo vult obedire, licet forte non vellet id quod mandatur, secundum se consideratum implere. Et ideo quia necessitati aliqua faciendi quæ secundum se non placent, per votum obedientiæ homo se subiicit propter Deum, ex hoc ipso ea quæ facit, sunt Deo magis accepta, etiam si sint minora: quia nihil maius potest homo Deo dare quam quod propriam voluntatem propter ipsum voluntati alterius subiiciat. Unde in collationibus Patrum (collat. xviii. cap. vii. parum a princ.) dicitur, deterrimum genus monachorum esse Sarabaitas: quia suas necessitates curantes, absoluti a seniorum iugo, habent libertatem agendi quid libitum fuerit; & tamen magis quam hi qui in cœnobis degunt, in operibus diebus ac noctibus consumuntur.

*Utrum requiratur ad perfectionem religionis quod paupertas, continentia, & obedientia cadant sub voto.*

1. 2. quæst. cviii. art. 3. co. & ill. con. cap. cxxx. & epus. xviii. cap. xi. & xv. & epus. xix. cap. v.

**A**D sextum sic proceditur. Videtur quod non requiratur ad perfectionem religionis quod prædicta tria, scilicet paupertas, continentia, & obedientia, cadant sub voto. Disciplina enim perfectionis assumenda ex traditione Domini est accepta. Sed Dominus dant formam perfectionis March. xix. 21. dicit: *Si vis perfectus esse, vade, vende omnia quæ habes, & da pauperibus, nulla mentione facta de voto.* Ergo videtur quod votum non requiratur ad disciplinam religionis.

2. Præterea. Votum consistit in quadam promissione Deo facta: unde Eccle. v. 3. cum dixisset Sapiens, *Si quid vovisti Deo, ne moreris reddere*, statim subdit: *Dispicet enim ei infidelis, & stultia promissio.* Sed ubi est exhibitio rei, non requiritur promissio. Ergo sufficit ad perfectionem religionis quod aliquis servet paupertatem, continentiam, & obedientiam absque voto.

3. Præterea. Augustinus dicit ad Polentium de adulterinis coniugiis (Lib. I. cap. xiv. in princ.) *Ea sunt in nostris officiis gratiora, quæ cum liceret nobis non impendere, tamen causa dilectionis impendimus.* Sed ea quæ sunt sine voto, licet non impendere; quod non licet de his quæ fiunt cum voto. Ergo videtur gratius esse Deo, si quis paupertatem, continentiam, & obedientiam absque voto servaret. Non ergo votum requiritur ad perfectionem religionis.

Sed contra est quod in veteri lege Nazaræi cum voto sanctificabantur, secundum illud Num. vi. 2. *Vir, sive mulier, cum fecerint votum, ut sanctificentur, & se voluerint Domino consecrare &c.* Per eos autem significantur illi qui ad perfectionis summam pertingunt, ut dicit Glossa Gregorii ibid. (Lib. II. Moral. cap. xxvi. vers. fi.) Ergo votum requiritur ad statum perfectionis.

Respondeo dicendum, quod ad religiosos pertinet quod sint in statu perfectionis, sicut ex supra dictis patet (quæst. Bb 2 clxxiv.



clxxiv. art. 5.) Ad statum autem perfectionis requiritur obligatio ad ea quæ sunt perfectionis: quæ quidem Deo fit per votum. Manifestum est autem ex præmissis (art. 3. 4. & 5. hu. quæst.) quod ad perfectionem christianæ vitæ pertinet paupertas, continentia, & obedientia. Et ideo religionis status requiritur ut ad hæc tria aliquis voto obligetur. Unde Gregorius dicit super Ezech. (hom. xx. inter med. & fi.) *Cum quis omne quod habet, omne quod vivit, omne quod sapit, omnipotenti Deo voverit, hoc locustum est: quod quidem pertinere postea dicit ad eos qui præfens sæculum deserunt.*

Ad primum ergo dicendum, quod ad perfectionem vitæ Dominus pertinere dixit quod aliquis eum sequatur, non qualitercumque, sed ut ulterius retro non abiret. Unde & ipse dicit Lucæ ix. 62. *Nemo mittens manum ad aratrum, & respiciens retro, aptus est regno Dei.* Et quamvis quidam de discipulis eius retrorsum abierint; tamen Petrus loco aliorum Domino interroganti, *Numquid & vos vultis abire?* respondit: *Domine, ad quem ibimus?* Unde & Augustinus dicit in Lib. II. de consensu Evang. (cap. xvii. in fi.) quod sicut *Mattheus, & Marcus narrant, Petrus, & Andreas non subdistinguit ad terram natibus tamquam causa redeundi, secuti sunt eum, sed tamquam iubentem ut sequerentur.* Hæc autem immobilitas sequelæ Christi firmatur per votum. Et ideo votum requiritur ad perfectionem religionis.

Ad secundum dicendum, quod perfectio religionis requiritur, sicut Gregorius dicit (loc. sup. cit.) ut aliquis omne quod vovit Deo exhibeat. Sed homo non potest totam vitam suam Deo actu exhibere, quia non est tota simul, sed successive agitur. Unde non aliter homo potest totam vitam suam Deo exhibere nisi per voti obligationem.

Ad tertium dicendum, quod inter alia quæ licet nobis non impendere, est etiam propria libertas, quam homo ceteris rebus cariorē habet. Unde cum aliquis propria sponte voto sibi admittit libertatem abstinendi ab his quæ ad Dei servitium pertinent, hoc fit Deo acceptissimum. Unde Augustinus dicit in ep. ad Armentar. & Paulinam (cxxxvii. al. xlv. vers. fi.) *Non te vovisse pœniteat; immo gaude iam tibi non licere, quod cum tuo detrimento licuisset. Felix necessitas, quæ in meliora compellit.*

## ARTICULUS VII. 890

*Utum convenienter dicatur, in his tribus votis consistere religionis perfectionem.*

*Inf. quæst. clxxxviii. art. 1. ad 2. & art. 2. ad 2. & ver. quæst. 11. art. 11. ad 5. & opus. xviii. cap. xv.*

**A**D septimum sic proceditur. Videtur quod inconvenienter dicatur, in his tribus votis consistere religionis perfectionem. Perfectio enim vitæ magis consistit in interioribus quam in exterioribus actibus, secundum illud ad Rom. xiv. 17. *Non est regnum Dei esca, & potus, sed iustitia, pax, & gaudium in Spiritu sancto.* Sed per votum religionis aliqui obligantur ad ea quæ sunt perfectionis. Ergo magis deberent ad religionem pertinere vota interiorum actuum (puta contemplationis, dilectionis Dei, & proximi, & aliorum huiusmodi) quam votum paupertatis, continentie, & obedientie, quæ pertinent ad exteriores actus.

2. Præterea. Prædicta tria cadunt sub voto religionis, inquantum pertinent ad quoddam exercitium tendendi in perfectionem. Sed multa alia sunt, in quibus religiosi exercitantur, sicut abstinencia, vigiliæ, & alia huiusmodi. Ergo videtur quod inconvenienter ista tria vota dicantur essentialiter ad statum perfectionis pertinere.

3. Præterea. Per votum obedientie aliquis obligatur ad omnia implenda secundum præceptum superioris, quæ ad exercitium perfectionis pertinent. Ergo sufficit votum obedientie absque aliis duobus votis.

4. Præterea. Ad exteriora bona pertinent non solum divitiæ, sed etiam honores. Si ergo per votum paupertatis religiosi terrenas divitias abdicant, oportet esse etiam aliud votum, per quod honores mundanos contemnant.

Sed contra est quod dicitur extra de statu monach. (cap. Cum ad monasterium) quod *custodia castitatis, & abdicatio proprietatis sunt annexa regula monachali.*

Respondendo dicendum, quod religionis status potest considerari tripliciter. Uno modo, secundum quod est quoddam exercitium tendendi in perfectionem caritatis: alio modo, secundum quod quietat

animum humanum ab exterioribus solitudinibus, secundum illud I. ad Cor. vii. 33. *Volo vos sine solitudine esse*: tertio modo, secundum quod est quoddam holocaustum, per quod aliquis totaliter se, & sua offert Deo. Et secundum hoc ex his tribus votis integratur religionis status.

Primo enim quantum ad exercitium perfectionis requiritur quod aliquis a se removeat illa per quae posset impediri ne totaliter eius affectus tendat in Deum, in quo consistit perfectio caritatis. Huiusmodi autem sunt tria: primum quidem cupiditas exteriorum bonorum, quae tollitur per votum paupertatis; secundum autem est concupiscentia sensibilibus delectationum, inter quas praecellunt delectationes venereae, quae excluduntur per votum continentiae; tertium autem est inordinatio voluntatis humanae, quae excluditur per votum obedientiae.

Similiter autem solitudinis saecularis inquietudo praecipue ingeritur homini circa tria: primo quidem circa dispensationem exteriorum rerum; & haec sollicitudo per votum paupertatis homini auferitur: secundo circa gubernationem uxoris, & filiorum; quae amputatur per votum continentiae; tertio circa dispositionem propriorum actuum; quae amputatur per votum obedientiae, quo aliquis se alterius dispositioni committit. Similiter etiam holocaustum est, cum aliquis totum quod habet, offert Deo, ut Gregorius dicit super Ezech. (hom. xx. inter med. & fi.) *Habet autem homo triplex bonum, secundum Philosophum in I. Ethic. (cap. viii. cir. princ.)* primo quidem exteriorum rerum; quas quidem totaliter aliquis Deo offert per votum voluntariae paupertatis: secundo autem bonum proprii corporis; quod aliquis praecipue offert Deo per votum continentiae; quod abrenuntiat maximis delectationibus corporis: tertium autem bonum est animae; quod aliquis totaliter Deo offert per obedientiam, quae aliquis offert Deo propriam voluntatem, per quam homo utitur omnibus potentiis, & habitibus animae. Et ideo convenienter ex tribus votis status religionis integratur.

Ad primum ergo dicendum, quod sicut supra dictum est (art. i. hu. quest.) votum religionis ordinatur sicut in finem ad perfectionem caritatis, ad quam pertinent omnes interiores actus virtu-

tum, quarum mater est caritas, secundum illud I. ad Corinth. xiii. 4. *Caritas pater est, benigna est &c.* Et ideo interiores actus virtutum (puta humilitatis, patientiae, & huiusmodi) non cadunt sub voto religionis, quod ordinatur ad ipsos sicut ad finem.

Ad secundum dicendum, quod omnes aliae religionum observantiae ordinantur ad praedicta tria principalia vota. Nam si qua sunt instituta in religionibus ad procurandum victum, puta labor, mendicitas, vel alia huiusmodi, referuntur ad paupertatem; ad cuius conservationem religiosi per hos modos victum suum procurant. Alia vero quibus corpus maceratur, sicut vigiliae, ieiunia, & si qua sunt huiusmodi, directe ordinantur ad votum continentiae observandum. Si qua vero in religionibus instituta sunt pertinentia ad humanos actus, quibus aliquis ordinatur ad religionis finem, scilicet ad dilectionem Dei, & proximi (puta lectio, oratio, visitatio infirmorum, vel si aliquid aliud est huiusmodi) comprehenduntur sub voto obedientiae, quod pertinet ad voluntatem, quae secundum dispositionem alterius suos actus ordinat ad finem. Determinatio autem habitus pertinet ad omnia tria vota, tamquam signum obligationis. Unde habitus regularis simul datur, vel benedicuntur cum professione.

Ad tertium dicendum, quod per obedientiam aliquis offert Deo suam voluntatem: cui etiam subiiciantur omnia humana, quaedam tamen sunt quae specialiter sibi tantum subducitur, scilicet actiones humanae: nam passiones pertinent etiam ad appetitum sensitivum. Et ideo ad cohibendum passiones carnalium delectationum, & exteriorum appetibilium impediens perfectionem vitae, necessarium fuit votum continentiae, & paupertatis; sed ad disponendum actiones proprias, secundum quod requirit perfectionis status, requiritur votum obedientiae.

Ad quartum dicendum, quod, sicut Philosophus dicit in IV. Ethic. (cap. iii. cir. med.) honor proprie, & secundum veritatem non debetur nisi virtuti. Sed quia exteriora bona instrumentaliter deserviunt ad quosdam actus virtutum, ex consequenti etiam eorum excellentiae honor aliquis exhibetur, & praecipue a vulgo, quod solam excellentiam exteriorum recognoscit. Honor ergo qui Deo, & Sanctis omnibus exhibetur propter

virtutem, ut dicitur in Psal. cxxxviii. 17. *Mibi autem nimis honorati sunt amici tui, Deus*, abrenuntiare non competit religiosus, qui ad perfectionem virtutis tendunt; honori autem qui exhibetur exteriori excellentiæ, abrenuntiant ex hoc ipso quod secularem vitam derelinquunt: unde ad hoc non requiritur speciale votum.

## ARTICULUS VIII. 891

*Utrum votum obedientiæ sit positissimum inter tria vota religionis.*

*Inf. quæst. clxxxviii. art. 7. ad 3.*

**A**D octavum sic proceditur. Videtur quod votum obedientiæ non sit positissimum inter tria vota religionis. Perfectio enim religiosæ vitæ a Christo sumptis exordium. Sed Christus specialiter dedit consilium de paupertate; non autem invenitur dedisse consilium de obedientia. Ergo votum paupertatis est potius quam votum obedientiæ.

3. Præterea. Eccli. xxvi. 20. dicitur, *quod omnis ponderatio non est digna animæ continentis*. Sed votum dignioris rei est eminentius. Ergo votum continentie est eminentius quam votum obedientiæ.

3. Præterea. Quanto aliquod votum est potius, tanto videtur esse magis indispensabile. Sed vota paupertatis, & continentie sunt: adeo annexa regulæ monachali; ut contra ea nec summus Pontifex possit licentiam indulgere, sicut dicit quædam Decretalis de statu monachorum (cap. *Cum ad monasterium*); qui tamen potest indulgere ut religiosus non obediat suo prælato. Ergo videtur quod votum obedientiæ sit minus voto paupertatis, & continentie.

Sed contra est quod Gregorius dicit in XXXV. Moral. (cap. x. cir. princ.) *Obedientia vobis iure præponitur: quia per videris aliena caro, per obedientiam vero voluntas propria maciatur*. Sed vota religionis sunt quædam holocausta, sicut supra dictum est (art. 1. huius quæst. & art. 3. ad 6.) Ergo votum obedientiæ est præcipuum inter omnia religionis vota.

Respondeo dicendum, quod votum obedientiæ est præcipuum inter tria vota religionis. Et hoc triplici ratione.

Primo quidem quia per votum obedientiæ aliquid maius homo offert Deo, scilicet ipsam voluntatem; quæ est potior quam corpus proprium, quod offert homo Deo per continentiam, & quæ res exteriores, quas offert homo Deo per votum paupertatis. Unde illud quod fit ex obedientia, est magis Deo acceptum quam id quod fit per propriam voluntatem, secundum illud Hieronymi, quod dicit ad Rusticum monachum: *Ad illud sendis oratio, ut doceam, te non tuo arbitrio dimittendum*; & post pauca subdit: *Non facias quod vis; comedas quod iubeas; habeas quantum acciperis; vestiaris quod datur*. Unde & ieiunium non redditur Deo acceptum cum propria voluntate, secundum illud Isa. lvi. 3. *Ecce in diebus ieiunii vestri invenitur voluntas vestra*. Secundo quia votum obedientiæ continet sub se alia vota; sed non convertitur: nam religiosus, etsi teneatur ex voto continentiam servare, & paupertatem; tamen hæc etiam sub obedientia cadunt, ad quam pertinent multa alia præter continentiam, & paupertatem servare. Tercio quia votum obedientiæ proprie se extendit ad actus propinquos fini religionis. Quanto autem aliquid propinquius est fini, tanto melius est.

Et inde etiam est quod votum obedientiæ est religioni essentialius. Si enim aliquis absque voto obedientiæ voluntariam paupertatem, & continentiam etiam voto servet, non propter hoc pertinet ad statum religionis, qui præferatur etiam ipsi virginitati ex voto observatæ: dicit enim Augustinus in Libro de virginitate (cap. xlv. in fin.) *Nemo, quantum puto, ausus fuerit virginitatem præferre (a) monasterio*.

Ad primum ergo dicendum, quod consilium obedientiæ includitur in ipsa Christi sequela: qui enim obedit, sequitur alterius voluntatem. Et ideo magis pertinet ad perfectionem quam votum paupertatis: quia, ut Hieronymus dicit super Matthæum (cap. xix. super illud, *Ecce nos reliquimus &c.*) „id quod perfectionis est, addidit Petrus, cum dixit: *Et secuti sumus te*.“

Ad secundum dicendum, quod ex verbo illo non habetur quod continentia præferatur omnibus aliis actibus virtutis, sed coniugali castitati, vel etiam exterioribus divitiis auri, & argenti, quæ pon-

(a) Ita est. & edid. passim. Augustinus martyro, ut testis S. Thomas ipse supra quæst. cxxv. art. 3. & dist. art. 3.

pondere mensurantur. Vel per continentiam intelligitur universaliter abstinencia ab omni malo, ut supra habitum est ( quæst. clv. art. 4. ad 1. )

Ad tertium dicendum, quod Papa in voto obedientie non potest sic cum religioso dispensare, ut nulli prælato teneatur obedire in his quæ ad perfectionem vite pertinent: non enim potest eum a sua obedientia eximere; potest tamen eum eximere ab inferioris prælati subiectione; quod non est in voto obedientie dispensare.

## ARTICULUS IX. 892

*Utrum religiosus semper peccet mortaliter transgrediendo ea quæ sunt in regula.*

*Sup. quæst. lxxxviii. art. r8. ad 4. & IV. dist. xxxviii. quæst. 1. art. 4. quæst. 1. ad 5. & quod. 1. art. 20.*

**A**D nonum sic proceditur. Videtur quod religiosus semper peccet mortaliter transgrediendo ea quæ sunt in regula. Facere enim contra votum est peccatum damnabile, ut patet per id quod Apostolus dicit I. Thimoth. v. 11. quod *vidua quæ voluit vivere, damnationem habens, quia primam fidem irritam fecerunt.* Sed religiosi voto professionis ad regulam astringuntur. Ergo peccant mortaliter transgrediendo ea quæ in regula continentur.

2. Præterea. Regula imponitur religioso sicut lex quædam. Sed ille qui transgreditur præceptum legis, peccat mortaliter. Ergo videtur quod monachus transgrediens ea quæ sunt in regula, peccet mortaliter.

3. Præterea. Contemptus inducit peccatum mortale. Sed quicumque frequenter aliquid iterat, quod non debet facere, videtur ex contemptu peccare. Ergo videtur quod si religiosus frequenter transgrediatur id quod est in regula, peccet mortaliter.

Sed contra est quod status religionis est securior quam status secularis vite: esse Gregorius in princ. Moral. (in epist. ad Leand. Episc. super expolit. Lib. lob cap. 1. a princ.) comparat vitam sæclarem mari fluctuanti, vitam autem religionis portui tranquillo. Sed si quælibet transgressio eorum quæ in regula continentur, religiosum obligaret ad peccatum mortale, status religio-

nis esset periculosissimus propter multitudinem observantiarum. Non ergo quælibet transgressio eorum quæ in regula continentur, est peccatum mortale.

Respondeo dicendum, quod in regula continentur aliquid dupliciter, sicut ex dictis patet ( art. 7. hu. quæst. ad 1. & 2. ) Uno modo sicut finis regulæ, puta ea quæ pertinent ad actus virtutum: & horum transgressio, quantum ad ea quæ cadunt communiter sub præcepto, obligat ad mortale; quantum vero ad ea quæ excedunt communiter necessitatem præcepti, non obligat ad mortale, nisi propter contemptum: quia, sicut supra dictum est ( art. 2. hu. quæst. ) religiosus non tenetur esse perfectus, sed ad perfectionem tendere; cui contrariatur perfectionis contemptus.

Alio modo continentur aliquid in regula pertinens ad exterius exercitium, sicut sunt omnes exteriores observantie; inter quas sunt quædam ad quas obligatur religiosus ex voto professionis. Vorum autem professionis respicit principaliter tria prædicta, scilicet *paupertatem, continentiam, & obedientiam*; alia vero omnia ad hæc ordinantur. Et ideo transgressio horum trium obligat ad mortale; aliorum autem transgressio non obligat ad mortale: nisi vel propter contemptum regulæ, quia hoc directe contrariatur professioni, per quam aliquis vovit regularem vitam; vel propter præceptum vite oretenus a prælato factum, sive in regula expressum, quia hoc esset facere contra obedientie votum.

Ad primum ergo dicendum, quod ille qui proficitur regulam, non vovet servare omnia quæ sunt in regula; sed vovet regularem vitam, quæ essentialiter consistit in tribus prædictis. Unde & in quibusdam religionibus cautius aliqui profitentur non quidem regulam, sed vivere secundum regulam, id est tendere ad hoc ut aliquis mores suos informet secundum regulam, sicut secundum quoddam exemplar: & hoc tollitur per contemptum. In quibusdam autem religionibus adhuc cautius profitentur obedientiam secundum regulam; ita quod professioni non contrariatur nisi id quod est contra præceptum regulæ; transgressio vero vel omissio aliorum obligat solum ad peccatum veniale: quia, sicut dictum est ( art. 7. hu. quæst. ad 2. ) huiusmodi dispositiones sunt ad principalia vota. Peccatum autem veniale est dispositio ad mortale, ut supra dictum est ( 1. hu. quæst. )

quaest. lxxxviii. art. 3.) inquantum impedit ea quibus aliquis disponitur ad observanda principalia praecepta legis Christi, quae sunt praecepta caritatis. In aliqua tamen religione, scilicet Ordinis Fratrum Praedicatorum, transgressio talis, vel omisio ex suo genere non obligat ad culpam neque mortalem, neque venialem, sed solum ad poenam taxatam sustinendam: quia per hunc modum ad talia observanda obligantur: qui tamen possent venialiter, vel mortaliter peccare ex negligentia, vel libidine, seu contemptu.

Ad secundum dicendum, quod non omnia quae continentur in lege, traduntur per modum praecepti; sed quaedam proponuntur per modum ordinationis cuiusdam, vel statuti obligantis ad certam poenam. Sicut ergo in lege civili non facit semper dignum poena mortis corporalis transgressio legalis statuti; ita nec in lege Ecclesiae omnes ordinationes, vel publica statuta obligant ad mortalem; & similiter nec omnia statuta regulae.

Ad tertium dicendum, quod tunc committit aliquis, vel transgreditur ex contemptu, quando voluntas eius renuit subici ordinationi legis, vel regulae; & ex hoc procedit ad faciendum contra legem, vel regulam: quando autem e converso propter aliquam particularem causam, puta concupiscentiam, vel iram, inducitur ad aliquid faciendum contra statuta legis, vel regulae, non peccat ex contemptu, sed ex aliqua alia causa; etiam si frequenter ex eadem causa, vel alia simile peccatum iteret: sicut & Augustinus dicit in Libro de natura, & gratia (cap. xxi. a med.) quod non omnia peccata committuntur ex contemptu superbia. Frequentia ramen peccati dissipative inducit ad contemptum, secundum illud Proverb. xviii. 3. *Impius cum in profundum venerit peccatorum, contemnit.*

## ARTICULUS X. 393

*Utrum religiosus eodem genere peccati gravius peccet quam secularis.*

*Sup. quaest. clxxxiv. art. 8. cor. fin. & IV. dist. xiv. quaest. 1. art. 5. quaest. 3. ad 3.*

**A**D decimum sic proceditur. Videtur quod religiosus eodem genere peccati non gravius peccet quam secularis.

Dicitur enim II. Paralip. xxx. 18. *Domini bonus propitiabitur cunctis qui in toto corde requirunt Dominum Deum patrum suorum; & non imputabit eis, quod minus sanctificati sunt.* Sed magis videtur Religiosi ex toto corde Dominum Deum patrum suorum sequi quam saeculares, qui ex parte se, & sua Deo dant, & ex parte sibi reservant, ut Gregorius dicit super Ezech. (hom. xx. inter med. & fin.) Ergo videtur quod minus imputetur eis, si in aliquo a sanctificatione deficient.

3. Praeterea. Ex hoc quod aliquis bona opera facit, minus contra peccata eius Deus irascitur: dicitur enim II. Paralip. xix. 2. *Impio praebes auxilium, & his qui oderunt Dominum, amicitia iungitur: & idcirco iram quidem Domini mereris, sed bona opera inventa sunt in te.* Religiosi autem plura bona opera faciunt quam saeculares. Ergo si aliqua peccata faciunt, minus contra eos Deus irascitur.

3. Praeterea. Praesens vita sine peccato non transigitur, secundum illud Iacobi iij. 2. *In multis offendimus omnes.* Si ergo peccata religiosorum essent graviora peccatis saecularium, sequeretur quod religiosi essent peioris conditionis quam saeculares: & sic non esset sanum consilium ad religionem transire.

Sed contra est quod de maiori malo magis videtur esse dolendum. Sed de peccatis eorum qui sunt in statu sanctitatis, & perfectionis, maxime videtur esse dolendum: dicitur enim Hierem. xxxiii. 9. *Contritum est cor meum in medio mei: & postea subdit: Propheta namque, & Sacerdos polluti sunt: & in domo mea invenimus malum eorum.* Ergo religiosi, & alii qui sunt in statu perfectionis, ceteris paribus, gravius peccant.

Respondeo dicendum, quod peccatum quod a religioso committitur, potest esse gravius peccato saecularium eiusdem speciei tripliciter. Uno modo, si sit contra votum religionis; puta si religiosus fornicetur, vel furetur: quia fornicando facit contra votum continentiae, & furando facit contra votum paupertatis, & non solum contra praeceptum divinae legis. Secundo, si ex contemptu peccet: quia ex hoc videtur esse magis ingratus divinis beneficiis, quibus est sublimatus ad statum perfectionis; sicut Apostolus dicit ad Heb. x. quod fidelis graviora meretur supplicia ex hoc quod peccando Filium Dei conculcat per contemptum.

Un-

Unde & Dominus conqueritur Hierem. xi. 15. *Quid est quod dilectus meus facit in domo mea scelera multa?* Tertio modo peccatum religiosi potest esse maius propter scandalum: de quo ad vitam eius plures respiciunt: unde dicitur Hierem. xxiii. 14. *In Prophetis Hierusalem vidi similitudinem adulterantium, & iter mendacis; & confortaverunt manus pessimorum, ut non converteretur unusquisque a malitia sua.*

Si vero religiosus non ex contemptu, sed ex infirmitate, vel ex ignorantia aliquod peccatum quod non est contra votum suae professionis, committat absque scandalo, puta in occulto, levius peccat eodem genere peccati quam secularis: quia peccatum eius si sit leve, quasi absorbetur ex multis operibus bonis quae facit; & si sit mortale, facilius ab eo resurgit. Primo quidem propter intentionem, quam habet rectam ad Deum; quae etiam ad horam interceptur, de facili ad pristina reparatur. Unde super illud Psal. xxxvi. *Cum cecideris, non collidetur, dicit Origenes (hom. iv. in hunc Psal. inter princ. & med.) Insuper si peccaveris, non penites, & peccatum tuum emendare nescis; iustus autem scit emendare, scit corrigere: sicut ille qui dixerat, Nescio hominem, paulo post cum respectus fuisset a Domino, flere scit amarissime; & ille qui de tequila mulierem videbat, & concupiscerat eam, dicere scit: Peccavi, & malum coram te feci. Luvatur etiam a sociis ad resurgendum, secundum illud Eccle. iv. 10. *Si unus ceciderit, ab altero susciatur. Vae soli, quia cum ceciderit, non habet sublevantem se.**

Ad primum ergo dicendum, quod auctoritas illa loquitur de his quae per infirmitatem, vel ignorantiam committuntur, non autem de his quae committuntur per contemptum.

Ad secundum dicendum, quod Iosaphat etiam, cui illa verba dicuntur, non ex malitia, sed ex quadam infirmitate humanae affectionis peccavit.

Ad tertium dicendum, quod iusti non de facili peccant ex contemptu; sed quandoque labuntur in aliquod peccatum ex ignorantia, vel infirmitate, a quo de facili relevantur. Si autem perveniant ad hoc quod ex contemptu peccent, efficiuntur pessimi, & maxime incorrigibiles, secundum illud Hierem. 17. 30. *Conregisti iugum, dirupisti vincula, dixisti, Non serviam. In omni colle sublimi, & sub omni ligno frondoso tu prosternebaris matri. Unde Augustinus dicit in*

*epist. ad plebem Hipponensem (lxxxviii. al. cxxxvii. cir. fin.) Ex quo Deo servare capri, quomodo difficile sum expertus meliores quam qui in monasteriis profecerunt; ita non sum expertus peiores quam qui in monasteriis ceciderunt.*

## QUAESTIO CLXXXVII.

De his quae competunt religiosis,

in sex articulos divisa.

**D**Einde considerandum est de his quae competunt religiosis: & circa hoc quaeruntur sex.

Primo, utrum liceat eis docere, praedicare, & alia huiusmodi facere.

Secundo, utrum liceat eis de negotiis secularibus se intrromittere.

Tertio, utrum teneantur manibus operari.

Quarto, utrum liceat eis de elemosynis vivere.

Quinto, utrum liceat eis mendicare.

Sexto, utrum liceat eis vestimenta ceteris viliora deferre.

## ARTICULUS I. 894

Utrum religiosis liceat docere, praedicare, & alia huiusmodi facere.

Opusc. xviii. cap. ult. & opusc. xix.

**A**D primum sic proceditur. Videtur quod religiosis non liceat docere, praedicare, & alia huiusmodi facere. Dicitur enim vii. quaest. 1. (cap. Hoc nequaquam) in quodam statuto Constantinopolitanae Synodi: *Vita monachorum subiectionis habet verbum, & discipulatus, non docendi, vel praefidendi, vel pascendi alios.* Hieronymus etiam dicit ad Riparium, & Desiderium (Lib. cont. Vigilant. cap. vi. a princ. & incipit, *Multa in orbe*): *Monachus non doctoris, sed oblationis habet officium.* Leo etiam Papa dicit (epist. ad Theodoretum cxx. in Ven. edit. al. lxii. & apud Queln. xciii. in fin.) ut habetur xvi. quaest. 1. (cap. *Adiuvimus*) *Praeter Domini sacerdotes nullus audeat praedicare, sive monachus, sive laicus ille sit, cui cuilibet scientiae nomine gloriatur.* Sed non licet transgredi proprium officium, & statutum Ecclesiae. Ergo videtur quod non liceat religiosis docere, praedicare, & alia huiusmodi facere.

2. Prae-

3. Præterea. In statuto, Nicanæ Synodi, quod ponitur xvi. quæst. 1. (cap. Placuit) sic dicitur: *Firmiter, & indissolubiter omnibus præcipimus ut aliquis monachus penitentiam nemini tribuat, nisi invicem sibi, ut iustum est: mortuum non sepeliat, nisi monachum secum in monasterio commemorantem, vel si fortuito quemquam advenientium fratribus mori contigerit.* Sed sicut ista pertinent ad officium clericorum, ita etiam prædicare, & docere. Ergo cum alia sit causa monachi, & alia clerici, ut Hieronymus dicit ad Heliodorum (epist. 1. a med.) videtur quod non liceat religiosis prædicare, docere, & alia huiusmodi facere.

3. Præterea. Gregorius dicit in Registro (Lib. IV. epist. 1.) *Nemo potest ecclesiasticis obsequiis deservire, & in monastica regula ordinate persistere: & hoc habetur xvi. quæst. 1. (cap. 11.)* Sed monachi tenentur in monastica regula ordinate persistere. Ergo videtur quod non possint ecclesiasticis obsequiis deservire. Docere autem, & prædicare pertinent ad ecclesiasticæ obsequia. Ergo videtur quod non liceat eis prædicare, aut docere, aut aliquid huiusmodi facere.

Sed contra est quod Gregorius dicit, & habetur xvi. quæst. 1. (cap. xxiv.) *Ex auctoritate huiusmodi decreti, quo apostolico moderamine, & pietatis officio a nobis est constitutum, sacerdotibus monachis apostolorum figuram tenentibus liceat prædicare, baptizare, communionem dare, pro peccatoribus orare, penitentiam imponere, atque peccata solvere.*

Respondeo dicendum, quod aliquid dicitur alicui non licere dupliciter. Uno modo quia habet in se quod contrarietur ei quod dicitur non licere; sicut nulli homini licet peccare, quia habet in se quilibet homo rationem, & obligationem ad legem Dei, quibus contrariatur peccatum. Et hoc modo dicitur alicui non licere prædicare, vel docere, vel aliquid huiusmodi facere, quia habet in se aliquid quod his repugnat vel ratione præcepti, sicut his qui sunt irregulares ex statuto Ecclesiæ, non licet ascendere ad sacros ordines; vel propter peccatum, secundum illud Psal. xlii. 16. *Peccatori autem dixit Deus: Quare tu enarras iustitias meas?* Hoc autem modo non est illicitum religiosis prædicare, docere, & huiusmodi facere: cum quia ex voto, & præcepto regulæ non obli-

gantur ad hoc quod ab his abstineant: cum etiam quia non redduntur ad hoc minus idonei ex aliquo peccato commissio, sed magis idonei ex exercitio sanctitatis, quod assumpserunt.

Stultum autem est dicere, quod per hoc quod aliquis in sanctitate promovetur, efficiatur minus idoneus ad spiritualia officia exercenda. Et ideo stulta est quorundam opinio dicentium, quod ipse status religionis impedimentum assert talia exequendi. Quorum errorem Bonifacius Papa IV. rationibus supra dictis excludit dicens, ut habetur xvi. quæst. 1. (cap. xxv.) *Sunt nonnulli nullo dogmate solti, audacissimo quidem zelo magis amaritudinis quam dilectionis inflammati, asserentes, monachos qui mundo mortui sunt, & Deo vivunt, sacerdotalis officii potentia indignos. Sed omnino labuntur.* Quod ostendit primo quidem, quia non contrariatur regulæ: subdit enim: *Neque enim B. Benedictus, monachorum præceptor almius, huiusmodi rei aliquo modo suis interdixit: & similiter nec in aliis regulis hoc prohibetur.* Secundo improbat prædictum errorem ex idoneitate monachorum; cum in fine cap. subdit: *Quanto quisque est excellentior, tanto & in illis, spiritualibus scilicet operibus, potentior.*

Alio modo dicitur aliquid non licere alicui, non propter contrarium quod habeat, sed propter hoc quod deficit ei unde illud possit; sicut diacono non licet Missam celebrare, quia non habet ordinem sacerdotalem; & presbytero non licet sententiam ferre, quia non habet episcopalem auctoritatem. In quibus tamen est distinguendum. Quia ea quæ sunt ordinis, committi non possunt nisi ei qui ordinem habet; sicut diacono non potest committi ut celebret Missam, nisi fiat sacerdos: ea vero quæ sunt iurisdictionis, committi possunt eis qui non habent ordinariam iurisdictionem; sicut prolatione sententiæ committitur ab Episcopo simplici sacerdoti. Et hoc modo dicitur non licere monachis, & aliis religiosis prædicare, docere, & alia huiusmodi facere: quia status religionis non dat eis potestatem huiusmodi faciendi. Possunt tamen ista facere, si ordinem accipiant, vel ordinariam iurisdictionem, aut etiam si eis committantur ea quæ sunt iurisdictionis.

Ad primum ergo dicendum, quod ex verbis illis habetur quod monachi, cum hoc quod sunt monachi, non nanciscun-

tur.

eorum potestatem talia faciendi; non autem quod ex hoc quod sunt monachi, habeant aliquid contrarium executioni talium actuum.

Ad secundum dicendum, quod illud etiam statutum Nicæni Concilii præcipit ut monachi non usurpent sibi, ex hoc quod sunt monachi, potestatem huiusmodi actus exercendi; non autem prohibet quin ista possint eis committi.

Ad tertium dicendum, quod ista duo se non compatiuntur, scilicet quod aliquis ordinarius curam ecclesiasticorum officiorum habeat, & monasticam regulam in monasterio servet; per hoc tamen non excluditur quin monachi, & alii religiosi possint interdum circa ecclesiastica officia occupari ex commissione prælatorum, qui ordinariam curam habent; & præcipue illi quorum religiones ad hoc sunt specialiter institutæ, ut infra dicitur (quæst. clxxxviii. art. 4.)

## ARTICULUS II. 895

*Utrum religiosi liceat secularia negotia tractare.*

*Inf. quæst. clxxxviii. art. 2. ad 2. & opusc. xix. cap. xi. & Rom. xvi. in fin. & II. Timoth. ii.*

**A**D secundum sic proceditur. Videtur quod religiosi non liceat secularia negotia tractare. Dicitur enim in prædicto decreto Bonifacii Papæ IV. (cap. Sunt nonnulli xvi. quæst. i.) quod beatus Benedictus eos secularium negotiorum dixit expertes fore: quod quidem apostolicis documentis, & omnium sanctorum Patrum institutis, non solum monachis, sed etiam canonicis omnibus magnopere imperatur, secundum illud II. ad Tim. ii. 11. Nemo militans Deo implicat se secularibus negotiis. Sed omnibus religiosi imminet quod militent Deo. Ergo non licet eis secularia negotia exercere.

3. Præterea. I. ad Thesal. iv. 1. dicit Apostolus: Operam deis, ut quieti sitis, & ut negotium vestrum agatis: Glossa (interl.), Dimissis alienis, quod vobis, utile est in emendationem vitæ. Sed religiosi specialiter assumunt studium emendationis vitæ. Ergo non debent secularia negotia exercere.

3. Præterea. Super illud Matth. xi. Ecce qui molibus vestiuntur, in domibus Regum sunt, dicit Hieronymus: Ex hoc

ostenditur, rigidam vitam, & austeram prædicationem vitare debere aulæ Regum, & mollium hominum palatia declinare. Sed necessitas secularium negotiorum ingerit hominem ad frequentandum Regum palatia. Ergo non licet religiosi aliqua negotia secularia pertractare.

Sed contra est quod Apostolus dicit ad Rom. ult. 1. Commendo vobis Phæben sororem nostram: & postea subdit: Et assistatis ei in quocumque negotio vestri indigerit.

Respondendo dicendum, quod, sicut supra dictum est (quæst. præc. art. 1. & 7.) status religionis est ordinatus ad perfectionem caritatis consequendam: ad quam quidem principaliter pertinet Dei dilectio, secundario autem dilectio proximi. Et ideo religiosi præcipue, & propter se debent intendere ad hoc quod Deo vacent. Si autem necessitas proximis imminet, eorum negotia ex caritate agere debent, secundum illud ad Galat. vi. 2. Alter alterius onera portans: & sic adimplebitis legem Christi: quia in hoc ipso quod proximis serviunt propter Deum, dilectioni divinæ obsequuntur. Unde dicitur Iacobi 1. 27. Religio munda, & immaculata apud Deum, & Patrem hæc est, visitare pupillos, & viduas in tribulatione eorum: Glossa (interl.), id est succurrere eis qui carent præsidio, in tempore necessitatis. Est ergo dicendum, quod causa cupiditatis secularia negotia nec monachis gerere, nec clericis licet; causa vero caritatis se negotiis secularibus cum debita moderatione ingerere possunt, secundum superioris licentiam, in ministrando, & dirigendo.

Unde dicitur in Decr. dist. lxxxviii. (cap. 1.) Decrevit sancta Synodus, nullum deinceps clericum aut possessiones conducere, aut negotiis secularibus se immiscere, nisi propter curam aut pupillorum, aut orphanorum, aut viduarum, aut si forte Episcopus civitatis ecclesiasticarum rerum sollicitudinem cum habere præcipiat. Eadem autem ratio est de religiosi, ac clericis: quia utrique similiter negotia secularia interdiciuntur, ut dictum est (in cor. art.)

Ad primum ergo dicendum, quod monachis interdicitur secularia negotia tractare propter cupiditatem, non autem propter caritatem.

Ad secundum dicendum, quod non est curiositas, sed caritas, si propter necessitatem



tatem aliquis se negotiis secularibus immisceat.

Ad tertium dicendum, quod frequentare palatia Regum propter delicias, vel gloriam, vel cupiditatem, non competit religiosus; sed ea adire propter pias causas eis competit. Unde dicitur IV. Reg. xv. 13. quod Helisus dixit ad mulierem: *Numquid (a) non habes negotium, & vis ut loquar Regi, vel principi militiae?* Similiter etiam convenit Religiosis adire Regum palatia ad eos arguendos, & dirigendos; sicut Ioannes Baptista arguebat Herodem, ut dicitur Matth. xiv.

### ARTICULUS III. 896

*Utrum religiosi manibus operari teneantur.*

III. dist. xvii. quest. iiii. art. i. quest. 4. & quod. ix. art. 4. & op. xix. cap. iv. & cap. xvii. ad 1.

**A**D tertium sic proceditur. Videtur quod religiosi manibus operari teneantur. Non enim excusantur religiosi ab observantia praeceptorum. Sed operari manibus est in praecepto, secundum illud I. ad Thess. iv. 11. *Operemini manibus vestris, sicut praecepimus vobis: unde & Augustinus in Lib. de operibus monach. (cap. xxx. in princ.) dicit: Ceterum quis ferat homines contumaces, id est religiosos non operantes, de quibus ibi loquitur, saluberrimis Apostoli monitis vestientes, non sicut infirmiores tolerari, sed sicut etiam sanctiores praedicare?* Ergo videtur quod religiosi teneantur manibus operari.

2. Praeterea. II. ad Thess. iii. super illud, *Si quis non vult operari, nec manducet*, dicit Glossa (ord. Aug. in Lib. de op. monach. cap. i. & ii.). Dicunt, quidam, de operibus spiritualibus hoc Apostolum praecepisse, non de opere corporali, in quo agriculae, vel opifices laborant: " & infra (cap. ii. in fin.). Sed superfluo conantur & sibi, & ceteris caliginem obducere, ut quod utiliter monet caritas, non solum facere nolint, sed nec etiam intelligere: " & infra (cap. iii.). Vult servos Dei corporaliter operari, unde vivunt. " Sed praecipue religiosi servi Dei nominantur, utpote se totaliter divino servitio mancipantes, sicut patet per Dionysium vi. cap. eccl. Hierarch. (ante med.). Ergo videtur quod teneantur manibus operari.

3. Praeterea. Augustinus dicit in Lib. de oper. monach. (cap. xvii. in princ.). *Quid agant qui operari corporaliter nolumus, cui rei vacent, scire desidero. Orationibus (inquiunt) vacamus, & psalmis, & lectionibus, & verbo Dei.* Sed quod per ista non excusentur, ostendit per singula. Nam primo de oratione dicit: *Citius exauditur una obediens oratio quam decem millia contemptoris*; illos contemptores intelligens, & indignos exaudiri, qui manibus non operantur. Secundo de divinis laudibus subdit: *Cantica vero divina cantare etiam manibus operantes facile possunt.* Tertio subiungit de lectione: *Qui autem se dicunt lectioni vacare, nonne ibi inveniunt quod praecepit Apostolus? Quae est ergo ista perveritas lectioni nolle obtemperare, dum vult ei vacare?* Quarto subiungit (cap. xviii.). de praedicatione. *Si autem alicui sermo erogandus est, & ita occupatur, ut manibus operari non vacet, numquid in monasterio omnes hoc possunt? Quando ergo non omnes possunt, cur omnes sub hoc obtentu vacare volunt? Quainquam etsi omnes possent, vicissim facere deberent, non solum ut ceteri necessariis operibus occuparentur, sed etiam quia sufficit ut multis audientibus unus loquatur.* Ergo videtur quod religiosi non debeant cessare a manuali opere propter huiusmodi spiritualia opera quibus vacant.

4. Praeterea. Lucæ xii. super illud, *Vendite quae possidetis &c.* dicit Glossa (ord.). "Non tantum cibos vestros communciate pauperibus, sed etiam vendite possessiones vestras; ut omnibus vestris semel pro Domino spretis, possint ea labore manuum vestrarum operari, mini, unde vivatis, vel elemosynam faciat. " Sed ad religiosos pertinet proprie omnia sua relinquere. Ergo videtur quod etiam eorum sit de labore manuum suarum vivere, & elemosynas facere.

5. Praeterea. Religiosi praecipue videntur teneri Apostolorum vitam imitari, quia statum perfectionis proficiunt. Sed Apostoli manibus propriis laborabant, secundum illud I. ad Corinth. iv. 12. *Laboramus operantes manibus nostris.* Ergo videtur quod religiosi teneantur manibus operari.

Sed contra. Ad praecepta observanda quae communiter omnibus proponuntur, eodem modo tenentur religiosi, & seculares. Sed praeceptum de opere manuali communiter omnibus proponitur, ut patet

(a) In Vulgata desit non.

patet II. ad Theff. 111. 6. *Subtrahatis vos ab omni fratre ambulante inordinate &c.* Fratrem autem nominat quemlibet Christianum, sicut & I. ad Corinth. vii. 12. *Si quis frater uxorem habet infidelem &c.* & ibidem (II. Theff. 111. 10.) dicitur: *Si quis non vult operari, nec manducet.* Non ergo religiosi magis tenentur manibus operari quam seculares.

Respondeo dicendum, quod labor manualis ad quatuor ordinatur. Primo quidem & principaliter ad victum quaerendum: unde primo homini dictum est (Genes. 111. 19.) *In sudore vultus tui vesceris pane tuo:* & in Psal. cxxvii. 2. *Labores manuum tuarum quia manducabis &c.* Secundo ordinatur ad tollendum otium, ex quo multa mala oriuntur: unde dicitur Ecclesi. xxxiii. 28. *Mitte (servum tuum) in operationem, ne vacet: multum enim malitiam docuit otiositas.* Tertio ordinatur ad concupiscentiarum refrenationem, in quantum per hoc maceratur corpus: unde II. ad Corinth. vi. 5. dicitur: *In laboribus, in ieiuniis, in vigiliis, in castitate.* Quarto autem ordinatur ad eleemosynas faciendas: unde dicitur ad Eph. iv. 28. *Qui furatur, iam non furetur; magis autem labores operando manibus suis, quod bonum est, ut habeat unde tribuat necessitatem patienti.* Secundum ergo quod labor manualis ordinatur ad victum quaerendum, cadit sub necessitate praecepti, prout est necessarius ad talem finem: quod enim ordinatur ad finem, a fine necessitatem habet, ut scilicet intantum sit necessarium, in quantum finis sine eo esse non potest. Et ideo qui non habet aliunde unde vivere possit, tenetur manibus operari, cuiuscumque sit conditionis.

Et hoc significant verba Apostoli dicentis: *Qui non vult operari, nec manducet;* quasi diceret: Ea necessitate aliquis tenetur ad operandum manibus qua tenetur ad manducandum. Unde si quis absque manducatione posset vitam transigere, non teneretur manibus operari. Et eadem ratio est de illis qui non habent alias unde licite vivere possint. Non enim intelligitur aliquis posse facere quod non licite facere potest. Unde & Apostolus non invenitur opus manuum praecepisse nisi ad excludendum peccatum eorum qui illicite victum acquirerebant. Nam primo quidem praecepit Apostolus opus manuale ad vitandum furtum, ut patet ad Ephes. iv. 28. *Qui furatur, iam non furetur; magis autem labores operan-*

*do manibus suis.* Secundo ad vitandam cupiditatem alienarum rerum: unde dicitur I. ad Theffal. iv. 11. *Operemini manibus vestris, sicut praecepimus vobis, & ut honeste ambuletis ad eos qui foris sunt.* Tertio ad vitanda turpia negotia, ex quibus aliqui victum acquirunt: unde II. ad Theffal. 111. 10. dicit: *Cum essemus apud vos, hoc denunciabamus vobis, quoniam si quis non vult operari, nec manducet. Audivimus enim, quosdam inter vos ambulantes iniquitate, nihil operantes, sed curiosos agentes: Glosia (ordin.)* „qui „sæda cura necessaria sibi provident. “ *His autem qui huiusmodi sunt, denuntiavimus, & obsecramus, ut cum silentio operantes panem suum manducent.* Unde Hieronymus dicit super epistolam ad Gal. (in proem. Libri II. commentar. super hanc epistolam. vers. fin.) quod Apostolus hoc dixit, non tam officio docentis, quam virio gentis.

Sciendum tamen, quod sub opere manuali intelligitur omnia humana officia, ex quibus homines licite victum lucrantur, sive manibus, sive pedibus, sive lingua fiant. Vigiles enim, & curiores, & alii huiusmodi de suo labore viventes, intelliguntur de operibus manuum vivere. Quia enim manus est organum organorum, per opus manuum omnis operatio intelligitur, de qua aliquis victum licite potest lucrari.

Secundum autem quod opus manuale ordinatur ad otium tollendum, vel ad corporis macerationem, non cadit sub necessitate praecepti secundum se consideratum: quia multis aliis modis potest vel caro macerari, vel etiam otium tolli, quam per opus manuale: maceratur enim caro per ieiunia, & vigiliis; & otium tollitur per meditationes sacrarum Scripturarum, & laudes divinas. Unde super illud Psal. cxviii. *Defecerunt oculi mei in eloquium tuum, dicit Glosia (ordin.)* „Non est otiosus qui verbo Dei tantum „studet: nec plurius est qui extra operatur quam qui studium cognoscendæ veritatis exercet. “ Et ideo propter has causas religiosi non tenentur ad opera manualia, sicut nec seculares; nisi forte ad hoc per statuta sui Ordinis obligentur; sicut Hieronymus dicit in epistolam ad Rusticum monachum: *Aegiptiorum monasteria hunc tenent morem, ut nullum absque operis labore suscipiant, non tam propter victus necessitatem, quam propter animæ salutem, ne vageatur perniciosus cogitationibus.*

In-

Inquantum vero opus manuale ordinatur ad eleemosynas faciendas, non cadit sub necessitate praecepti; nisi forte in aliquo casu, in quo ex necessitate aliquis eleemosynas facere teneretur, & non posset alias habere unde pauperibus subveniret: in quo casu obligarentur similiter religiosi, & saeculares ad opera manualia exequenda.

Ad primum ergo dicendum, quod praeceptum illud quod ab Apostolo proponitur, est de iure naturali: unde super illud II. ad Thess. III. *Ut subtrahatis vos ab omni fratre inordinate ambulante*, dicit Glossa (interlin.) „aliter quam ordi-“, do naturae exigit. „Loquitur autem de his qui ab opere manuali cessabant.“ Unde & natura manus homini dedit locum armorum, & tegumentorum, quae aliis animalibus tribuit, ut scilicet per manus haec, & alia omnia necessaria conquirat. Ex quo patet quod communiter ad hoc praeceptum tenentur & religiosi, & saeculares, sicut ad omnia alia legis naturalis praecepta. Non tamen peccant quicumque manibus nun operantur: quia ad illa praecepta legis naturae quae pertinent ad bonum multorum, non tenentur singuli; sed sufficit quod unus vacet huic officio, & alius alii; puta quod quidam sint opifices, quidam agricolae, quidam iudices, quidam doctores, & sic de aliis, secundum illud Apostoli I. ad Cor. XII. 17. *Si totum corpus oculus, ubi audis; & si totum auditus, ubi odoratus? &c.*

Ad secundum dicendum, quod Glossa illa sumitur ab Augustino in Lib. de operibus monachorum, in quo loquitur contra monachos quosdam, qui dicebant, non esse licitum servis Dei manibus operari, propter hoc quod Dominus dicit Matth. VI. 25. *Nec solliciti sitis anime vestrae quid manducetis.* Nec tamen per haec verba inducitur necessitas religiosi manibus operandi, si habent aliunde unde vivere possint. Quod patet per hoc quod subdit: *Vult servos Dei corporaliter operari, unde vivant.* Hoc autem non magis pertinet ad religiosos quam ad saeculares. Quod patet ex duobus. Primo quidem ex ipso modo loquendi quod Apostolus utitur, dicens: *Ut subtrahatis vos ab omni fratre ambulante inordinate.* Fratres enim omnes Christianos vocat: nondum enim erant tunc temporis religiones institutae. Secundo quia religiosi non tenentur ad alia quam saeculares, nisi propter regulae professio-

nem: & ideo si in statutis regulae non continentur aliquid de opere manuali, non tenentur aliter ad operandum manibus religiosi quam saeculares.

Ad tertium dicendum, quod omnibus illis operibus spiritualibus quae ibi tangit Augustinus, potest aliquis vacare dupliciter: uno modo quasi deserviens utilitati communi; alio modo quasi insistenti utilitati privatae. Illi ergo qui praedictis operibus spiritualibus publice vacant, excusantur per huiusmodi opera spiritualia ab opere manuali, duplici ratione: primo quidem quia oportet eos totaliter esse occupatos circa huiusmodi opera; secundo quia huiusmodi opera exercentibus debetur subministratio victus ab his quorum utilitati deserviunt. Illi vero qui praedictis operibus non quasi publicis, sed quasi privatis vacant, non oportet quod per huiusmodi opera a manualibus operibus abstrahantur; nec etiam sit eis debitum ut de stipendiis fideiium vivant: & de talibus loquitur Augustinus. Quod enim dicit: *Cantica divina cantare etiam manibus operantes possunt, exemplo opificum qui fabulis linguas dant, cum tamen manibus ab opere non recedant*; manifestum est quod non potest intelligi de his qui horas canonicas in Ecclesia decantant; sed intelligitur de his qui psalmos, vel hymnos dicunt quasi privatas orationes. Similiter quod dicit de lectione, & oratione, referendum est ad orationes, & lectiones privatas, quas etiam laici interdum faciunt; non autem ad illos qui publicas orationes in Ecclesia faciunt, vel etiam publicas lectiones in scholis legunt. Unde non dicit, *Qui dicunt se vacare doctrinae, vel instructioni*; sed, *Qui dicunt se vacare lectioni*. Similiter etiam de predicatione loquitur, non quae sit publice ad populum, sed quae specialiter sit ad unum, vel ad paucos per modum privatae admonitionis. Unde signanter dicit: *Si alicui sermo erogandus est*. Nam, sicut Glossa (interlin. sup. illud, *Sermo meus, & predicationis*) dicit I. ad Corinth. II. „sermo est qui privatim fit, praedicatio“, tio, quae fit in communi.

Ad quartum dicendum, quod illi qui omnia propter Deum spernunt, tenentur manibus operari, quando alias non habent unde vivant, vel unde eleemosynas faciant, in casu in quo facere eleemosynam cadit sub praecepto; non autem aliter, ut dictum est (in corp. art.) Et secundum hoc loquitur Glossa iudiciali.

Ad quintum dicendum, quod hoc quod Apostoli manibus laboraverint, quandoque quidem fuit necessitatis, quandoque vero supererogationis. Necessitatis quidem, quando ab aliis victum invenire non poterant: unde super illud I. ad Corinth. iv. *Laboramus operantes manibus nostris*, dicit Glossa (interl.) „quia „nemo dat nobis. “ Supererogationis autem, ut patet per illud quod habetur I. ad Corinth. ix. ubi dicit Apostolus, quod non est utilis potestate quam habebat vivendi de Evangelio. Hac autem supererogatione utebatur Apostolus tribus de causis. Primo quidem ut occasionem prædicandi auferret pseudoapostolis, qui propter sola temporalia prædicabant: unde dicit II. ad Corinth. xi. 12. *Quod autem facio, & faciam, ut amputem eorum occasionem* &c. Secundo ad evitandum gravamen eorum quibus prædicabat: unde dicit II. ad Corinth. xii. 13. *Quid minus habuistis præ ceteris Ecclesiis, nisi quod ego ipse non gravavi vos?* Terrio ad dandum exemplum operandi otiosis: unde II. ad Thess. iii. 8. dicit: *Nocte, & die operantes... ut formam daremus vobis ad imitandum nos*. Quod tamen Apostolus non faciat in locis in quibus habebat facultatem quotidie prædicandi, sicut Athenis, ut Augustinus dicit in Lib. de operibus monach. (cap. xviii.) Non autem propter hoc religiosi tenentur Apostolum in hoc imitari, cum non teneantur ad omnes supererogationes. Unde nec alii Apostoli manibus operabantur.

## ARTICULUS IV. 897

*Utrum religiosi liceat de elemosynis vivere.*

*Opusc. xviii. cap. vii.*

**A**D quartum sic proceditur: Videtur quod religiosi non liceat de elemosynis vivere. Apostolus enim I. ad Timoth. v. præcipit ut viduæ quæ possunt aliunde sustentari, non vivant de elemosynis Ecclesiæ, ut *Ecclesia sufficiat illis quæ vere viduæ sunt*. Et Hieronymus dicit ad Damasum Papam (ut cit. quæst. clxxxv. art. 7. arg. 3.) quod *qui bonis parentum, & opibus sustentari possunt, si quod pauperum est, accipiunt, sacrilegium profecto committunt; & per abusionem saltem iudicium sibi manducant, & bibunt*. Sed religiosi possunt de labore manuum sustentari, si sunt vali-

di. Ergo videtur quod peccent, elemosynas pauperum comedendo.

2. Præterea. Vivere de sumptibus fidelium, est merces deputata prædicantibus Evangelium pro suo labore, vel opere, secundum illud Matth. x. 10. *Dignus est operarius cibo suo*. Sed prædicare Evangelium non pertinet ad religiosos, sed maxime ad prælatos, qui sunt pastores, & doctores. Ergo religiosi non possunt licite vivere de elemosynis fidelium.

3. Præterea. Religiosi sunt in statu perfectionis. Sed perfectius est dare elemosynas quam accipere: dicitur enim Act. xx. 35. *Beatius est magis dare quam accipere*. Ergo non debent de elemosynis vivere, sed magis ex operibus manuum suarum elemosynas dare.

4. Præterea. Ad religiosos pertinet impedimenta virtutis, & occasiones peccati vitare. Sed acceptio elemosynarum præbet occasionem peccati, & impedit virtutis actum: unde super illud II. ad Thessalon. ult. 8. *Ut nosmetipsos formam daremus vobis*, dicit Glossa (ordin. Ambrosii:) „Qui frequenter ad alienam mensam comedit otio deditus, „aduletur necesse est pascendi: “ dicitur etiam Exod. xxxiii. 8. *Ne accipias munera, quæ excæcant prudentes, & subvertunt verba iustorum*: & Proverb. xxii. 7. dicitur: *Qui accipit mutuum, servus est feneratoris*: quod est religioni contrarium: unde super illud II. ad Thessalon. ult. *Ut nosmetipsos formam daremus* &c. dicit Glossa: „Religio nostra, ad libertatem homines advocat. “ Ergo videtur quod religiosi non debeant de elemosynis vivere.

5. Præterea. Religiosi præcipue tenentur imitari Apostolorum perfectionem: unde Apostolus dicit ad Philip. iii. 15. *Quicumque perfecti sumus, hoc sentiamus*. Sed Apostolus volebat vivere de sumptibus fidelium, ut occasionem auferret pseudoapostolis, & sic ipse dicit II. ad Corinth. xi. 16. ne scandalum poneretur infirmis, ut patet I. ad Corinth. ix. Ergo videtur quod propter eandem causam religiosi debeant abstinere ne de elemosynis vivant: unde & Augustinus dicit in Libro de oper. monach. (cap. xxviii. in fi.) *Amputetis occasionem rursum nudandum, quibus existimatio vestra leditur, & infirmis offendiculum ponitur; & offendite hominibus, non vos in otio faciemus vicium, sed per angustiam, & arctam viam regnum Dei quaerere*.

Sed

Sed contra est quod, sicut Gregorius dicit in II. Dialog. (cap. 1. cir. med.) *B. Benedictus tribus annis in specu permanens, de his quae a Romano monacho ministrabantur, relictus est, postquam domum, parentisque reliquerat: & tamen validus corpore existens, non legitur de labore manuum quaesivisse victum. Ergo religiosi licite possunt de elemosynis vivere.*

Respondeo dicendum, quod unicuique licet vivere de eo quod suum est, vel sibi debitum. Fit autem aliquid alicuius ex liberalitate donantis. Et ideo religiosi, & clerici, quorum monasteriis, vel Ecclesiis ex munificentia Principum, vel quorumcumque fidelium sunt facultates collatae, ex quibus sustententur, possunt de eis vivere licite, absque hoc quod manibus laborent; & tamen certum est eos de elemosyna vivere. Unde & similiter, si aliqua mobilia religiosi a fidelibus conferantur, possunt de eis licite vivere. Stultum enim est dicere, quod aliquis in elemosynam possit accipere magnas possessiones, non autem panem, vel parvam pecuniam. Sed quia buiusmodi beneficia religiosi videntur esse collata ad hoc quod liberius religiosi actibus insistere possint, quorum cupiunt se fore participes, qui temporalia subministrant, redderetur eis usus praedictorum donorum illicitus, si ab actibus religiosi desisterent: quia sic, quantum est de se, defraudarent intentionem eorum qui talia beneficia contulerunt.

Debitum autem est alicui aliquid dupliciter. Uno modo propter necessitatem, quae facit omnia communia, ut Ambrosius dicit. (Colligitur ex serm. lxxv. de temp. versus fi.) Ideo si religiosi necessitatem patiantur, licite possunt de elemosynis vivere. Quae quidem necessitas potest esse tripliciter. Primo quidem propter corporis infirmitatem; ex qua contingit quod non possint sibi labore manuum victum quaerere. Secundo, si illud quod ex opere manuali conquirunt, eis ad victum non sufficiat: unde Augustinus dicit in Libro de oper. monach. (cap. xvii. a med.) quod bona opera fidelium subsidio supplendorum necessarium desse non debent servis Dei, qui manibus operantur; ut bonis, quibus ad erudendum animum ita vacatur, ut suscipiendae vitae eorum res ipsa communi corporalia opera geri non possint, non opprimant egestate. Tercio propter pri-

stinam conversationem eorum qui non consueverant manibus laborare: unde Augustinus dicit in Lib. de oper. mon. (cap. xxi. in princ.) quod si habebant aliquid in saeculo, quod facile sine opificio sustentarent istam vitam, quod conversi ad Deum indigentibus disperui sunt, & credenda est eorum infirmitas, & ferenda. Solent enim tales delicatius educati, laborem operum corporalium sustinere non posse.

Alio modo efficitur aliquid alicui debitum ex eo quod ipse exhibet, sive sit aliquid temporale, sive spirituale, secundum illud I. ad Cor. ix. 11. *Si nos vobis spiritualia seminavimus, magnum est, si carnalia vestra metamus?* Et secundum hoc quadrupliciter possunt religiosi de elemosynis vivere, quasi sibi debitis. Primo quidem, si praedicant auctoritate praetorum. Secundo, si sint ministri altaris: quia, ut dicitur I. ad Cor. ix. 13. *qui altari deseruiunt, cum altari participant. Ita & Dominus ordinavit his qui Evangelium annuntiant, de Evangelio vivere.* Unde & Augustinus dicit in Lib. de operibus monach. (cap. xxi. in princ.) *Si Evangelistae sunt, sacerdot, habent potestatem vivendi de sumptibus fidelium: si ministri altaris, dispensatores sacramentorum, bene sibi istam non arrogant, sed plane vendicant potestatem: & hoc ideo, quia sacrificium altaris, ubicumque agatur, commune est toti populo fidelium.* Tercio, si insistant studio sacrae Scripturae ad communem utilitatem totius Ecclesiae. Unde Hieronymus dicit contra Vigilantium (cap. v. cir. med. & incipit, *Multa in orbe*): *(a) Haec in Iudaea usque hodie perseverat consuetudo, non solum apud nos, sed etiam apud Hebraeos, ut qui in lege Domini meditantur die ac nocte, & partem non habent in terra, nisi solum Deum, synagogarum, & totius orbis foveantur ministerii.* Quarto, si bona temporalia quae habebant, monasterio largiantur, de elemosynis monasterio factis possunt vivere. Unde Augustinus dicit in Lib. de operibus monach. (cap. xxv. a med.) quod his qui resista, vel distributa sive ampla, sive quaecumque opulenta facultate, inter pauperes Christi pia, & salubri humilitate numerari valuerunt, vicem suscipiendae vitae eorum res ipsa communis, & fraterna caritas debet: qui laudabiliter agunt, si manibus operentur; quod

(a) Ita cum nisi. *Alicuius. Gervasius. & edit, posteriores. Alii.* Haec undique usque hodie &c. & mon: &c. patrum non habent la terra nisi solum Deum, totius orbis foveantur ministeriis.

quod quietem si nolit, quis audeat eoi cogere? Nec est attendendum, ut ibid. subditur, in quibus monasteriis, vel in quolito indigentibus fratribus quisque id quo habebat, impendit: omni enim Christianorum una respublica est.

Si vero aliqui sine religiosi qui absque necessitate, & utilitate quam asserant, velint otiosi de elemosynis quæ dantur pauperibus, vivere, hoc est eis illicitum. Unde Augustinus dicit in Lib. de oper. mon. (cap. xxii.) Plerumque ad hanc professionem servitutis Dei & ex conditione servili aliqui veniunt, & ex vita rusticana, & ex opificio exercitatione, & plebeio labore: de quibus non apparet, utrum ex proposito servitutis Dei venerint, an vitam inopem, & laboriosam fugientes, vacui pasci, atque vestiri voluerint, & insuper honorari ab eis a quibus contemni, conterique consueverant. Tales ergo se, quo minus operentur, de infirmitate corporis excusare non possunt: præterita quippe vitæ consuetudine convincuntur. Et postea subdit (cap. xxv. non procul a h.) Si nolunt operari, non manducant. Neque enim propterea ad pietatem divites humiliantur, ut pauperes ad superbiam extollantur. Nullo enim modo decet ut in eavita, ubi senatores sunt laboriosi, ibi fiant opifices otiosi; & quo veniunt, reliquiis deliciis suis, qui fuerant prædiorum domini, ibi sint rustici delicati.

Ad primum ergo dicendum, quod auctoritates illæ sunt intelligendæ tempore necessitatis, quando scilicet non posset aliter pauperibus subveniri. Tunc enim tenerentur non solum ab elemosynis accipiendis desistere, sed etiam sua, si qua haberent, largiri ad pauperum sustentationem.

Ad secundum dicendum, quod prælati competet prædicatio ex officio; religiosi autem potest competere ex commissione: & ita cum laborant in agro dominico, possunt exinde vivere, secundum illud II. ad Timoth. ii. 6. Laborantem agricolam oportet primum de fructibus percipere: ubi dicit Glossa (ord.) id est prædicatorem, qui in agro Ecclesiæ ligone verbi Dei excolit corda auditorum. Possunt etiam de Evangelio vivere qui prædicatoribus ministrant. Unde super illud ad Rom. xv. Si spiritualium eorum participes facti sunt gentiles, debent & in carnalibus ministrare eis, dicit Glossa (interl.) scilicet lucis, qui miserunt prædicatores ab Hierosolymis, "Sunt & aliæ causæ", S. Th. Oper. Tom. XXIII.

ex quibus alicui deberetur ut de sumptibus fidelium vivat, ut dictum est (in corp. art.)

Ad tertium dicendum, quod, ceteris paribus, dare est perfectius quam accipere; & tamen dare, vel relinquere omnia sua pro Christo, & modica accipere ad sustentationem vitæ, melius est, quam dare aliqua particulariter pauperibus, ut ex supra dictis patet (quæst. elxxxv, art. 3. ad 6.)

Ad quartum dicendum, quod accipere munera ad divitias augmentandas, vel accipere victum ab aliquo sibi non debitum, absque utilitate, & necessitate, præstat occasionem peccati: quod non habet locum in religiosi, ut ex supra dictis patet (in corp. art.)

Ad quintum dicendum, quod quando apparet manifesta necessitas, & utilitas, propter quam aliqui religiosi de elemosynis vivant absque opere manuali, non scandalizantur ex hoc infirmi, sed malitiosi more Phariseorum; quorum scandalum contemnendum Dominus docet Matth. xv. Sed si non esset evidens necessitas, & utilitas, posset exinde generari scandalum infirmis; quod esset vitandum. Idem tamen scandalum imminere potest de his qui facultatibus communibus otiose utuntur.

## ARTICULUS V. 198

Utrum religiosi liceat mendicare.

III. con. cap. cxxxv. & qual. vii. art. 18. ad 7. & opusc. xvii. cap. xiv. xv. & xvi. & opusc. xix. cap. vii.

Ad quintum sic proceditur. Videtur quod religiosi non liceat mendicare. Dicit enim Augustinus in Lib. de oper. monach. (cap. xxviii. ante med.) Tanti multos hypocritas sub habitu monachorum usquequaque dispersis callidissimos hostis, circumvenientes provincias: & postea subdit: Omnes petunt, omnes exigunt aut sumptus lucrosos egessatis, aut simularum pretium sanctitatis. Ergo videtur quod vita religiosorum mendicantium sic reprobanda.

2. Præterea. I. ad Thess. iv. ii. dicitur: Operamini manibus vestris, sicut præcepimus vobis, & ut honeste ambuletis ad eos qui foris sunt, & nullius aliquid desideretis: ubi dicit Glossa (ord. Petri Lomb.) Ideo opus est agendum, & non otandum, quia & honestum est,

est, & quasi lux ad infideles: & non desiderabitis rem alterius, ne dum rogatis, vel tollatis aliquid. Et II. ad Theof.

111. super illud, *Si quis non vult operari &c.* dicit Glossa (ord. Aug. Lib. de oper. monach. cap. 111. in princ.) „Vult servos Dei corporaliter operari, ut habeant unde vivant, ut non compellantur eggestate necessaria petere. Sed hoc est mendicare. Ergo videtur quod illicitum sit, prætermisso opere manuali, mendicare.

3. Præterea. Illud quod est in lege prohibitum, & iustitiae contrarium, non competit religiosis. Sed mendicare est prohibitum in lege divina: dicitur enim Deuter. xv. 4. *Omnino indigens, & mendicus non erit inter vos:* & in Psal. xxxvi. 25. *Non vidi iustum derelictum, nec semen eius querens panem.* Secundum etiam iura civilia punitur validus mendicans, ut habetur Codice de mendicantibus validis. Ergo non competit religiosis mendicare.

4. Præterea. *Verecundia est de turpi actu*, ut Damascenus dicit (Lib. II. orth. fid. cap. xv.) Sed Ambrosius dicit in Lib. I. de offic. (cap. xxx. cir. fi.) quod *verecundia petendi ingenius prodiit natalis.* Ergo mendicare est turpe. Non ergo religiosus competit.

5. Præterea. Maxime de eleemosynis vivere competit prædicantibus Evangelium, secundum Domini statutum, ut supra dictum est (art. præc.) Eis tamen non competit mendicare: quia super illud II. ad Timoth. 11. *Laborantem agricolam &c.* dicit Glossa (ord. super illud, *De fructibus percipere:*) „Vult Apostolus, ut Evangelista intelligat, quod necessaria sumere ab eis in quibus laborat, non est mendicatio, sed potestas. Ergo videtur quod religiosus non competit mendicare.

Sed contra. Religiosis competit vivere ad imitationem Christi. Sed Christus mendicavit, secundum illud Pl. xxxix. 18. *Ego autem mendicus sum, & pauper:* ubi dicit Glossa (ord. Cassiod.) „Hoc dixit Christus de se ex forma servi: & infra: „Mendicus est, qui ab alio petit; & pauper, qui sibi non sufficit. Et in Psal. lxxix. *Ego egenus, & pauper sum:* ubi dicit Glossa (interl. & ord. Cassiod.) „Egenus, idest petens; & pauper, idest insufficientis mihi, quia mundanas copias non habeo. Et Hieronymus dicit in quadam epistola: *Cave ne Domino tuo mendicante, scilicet Christo,*

*alienas divitias congeras.* Ergo conveniens est religiosus mendicare.

Respondeo dicendum, quod circa mendicationem duo possunt considerari. Unum quidem ex parte actus ipsius mendicationis, qui habet sibi quoddam abiectionem coniunctam. Illi enim videntur abiectissimi inter homines esse qui non solum sunt pauperes, sed intantum sunt egentes, quod necesse habent ab aliis victum accipere: & secundum hoc causa humilitatis aliqui laudabiliter mendant; sicut & alia assumunt quæ ad abiectionem quandam pertinent, quasi efficacissimam medicum contra superbiam, quam vel in seipsis, vel etiam in aliis per exemplum extingueri volunt. Sicut enim infirmitas quæ est ex super-excessu caloris, efficacissime sanatur per ea quæ in frigideitate excedunt; ita etiam pronitas ad superbiam efficacissime curatur per ea quæ multum abiecta videntur. Et ideo dicitur in Decr. de pœnit. dist. 11. (cap. *Si quis semel:*) *Exercitia humilitatis sunt, si quis se vilioribus officiis subdat, & ministeriis indignioribus tradat: ita namque arrogantie, & humane gloriæ vitium curari poterit.* Unde Hieronymus in epist. ad Oceanum (parum a princ.) commendat Fabiolam de hoc quod operatur ut *suis divitiis pariter esset pro Christo, siquem acciperet.* Quod etiam beatus Alexius perfecit, qui omnibus suis propter Christum dimissis, gaudebat se etiam a servis suis eleemosynas accepisse. Et de beato Arsenio legitur in Vitis Patrum (Lib. V. libello vi. num. 3.) quod gratias egit de hoc quod necessitate cogente, oportuit cum eleemosynam petere. Unde & in penitentiam pro gravibus culpis iniungitur aliquibus ut peregrinentur mendicantes.

Sed quia humilitas, sicut & ceteræ virtutes, absque discretionem esse non debet; ideo oportet discrete mendicantem ad humiliationem assumere, ut ex hoc homo notam cupiditatis non incurrat, vel cuiuscumque alterius indecentis.

Alio modo potest considerari mendicatio ex parte eius quod quis mendicando acquirit: & sic ad mendicandum potest homo ex duobus induci. Uno modo ex cupiditate habendi divitias, vel victum otiose: & talis mendicatio est illicita. Alio modo ex necessitate, vel utilitate: ex necessitate quidem, sicut cum aliquis non potest aliunde habere unde vivat, nisi mendicet; ex utilitate autem, sicut cum aliquis intendit ad aliquid utile

tile perficiendum, quod sine eleemosynis fidelium facere non potest; sicut petuntur eleemosynae pro constructione pontis, vel Ecclesiae, vel quibuscumque aliis operibus, quae vergunt in utilitatem communem; sicut scholares, ut possint vacare studio sapientiae. Et hoc modo mendicitas est licita sicut saecularibus, ita religiosis.

Ad primum ergo dicendum, quod Augustinus ibi loquitur expresse de his qui ex cupiditate mendicant.

Ad secundum dicendum, quod prima Glossa loquitur de petitione quae sit ex cupiditate, ut patet ex verbis Apostoli; alia autem Glossa loquitur de illis qui absque omni utilitate, (a) quam faciunt, necessaria petunt, ut orisio vivant: non autem otioso vivit qui qualitercumque utiliter vivit.

Ad tertium dicendum, quod ex illo praecepto legis divinae non prohibetur alicui mendicare; sed prohibetur divitiis non tam tenaces sint ut propter hoc alii qui egestate mendicare cogantur. Lex autem civilis imponit poenam validis mendicantibus, qui non propter (b) utilitatem, vel necessitatem mendicant.

Ad quartum dicendum, quod duplex est turpitudine, una inhonestatis, alia exterioris defectus, sicut turpe est homini esse infirmum, vel pauperem. Et talis turpitudine mendicitatis non pertinet ad culpam, sed ad humilitatem pertinere potest, ut dictum est (in corp. art.).

Ad quintum dicendum, quod praedicantibus ex debito debetur victus ab his quibus praedicant; si tamen non quasi sibi debitum, sed quasi gratis dandum mendicando petere velint, ad maiorem humilitatem pertinet.

## ARTICULUS VI. 899

Utrum liceat religiosis vilioribus vestibus uti quam ceteri utantur.

opus. XIX. cap. VIII.

**A**D sextum sic proceditur. Videtur quod non liceat religiosis vilioribus vestibus uti quam ceteris. Quia secundum Apostolum I. ad Thesal. ult. ab omni specie mala abstinere debemus. Sed vilitas vestium habet speciem mali: dicit enim Dominus Matth. XII. 15. *Attendite a falsis prophetis, qui veniunt ad vos in vestimentis ovium: & super illud*

Apocal. VI. *Ecce equus pallidus &c.* dicit Glossa (ord. sup. illud, *Et ecce equus niger*): „Videns diabolus nec per apertas tribulationes, nec per apertas hereses se posse proficere, praemittit falsos fratres, qui sub habitu religionis obtinent naturam nigri, & rufi equi, „pervertendo fidem.“ Ergo videtur quod religiosi non debeant vilibus vestibus uti.

2. Praeterea. Hieronymus dicit ad Nepotianum: *Vestes pulas, idest nigras, & leque vita, ut candidas. Ornatus, ut fordes, pari modo fugiendi sunt: quia alterum delicias, alterum gloriam redolet.* Ergo videtur, cum inanis gloria sit gravius peccatum quam deliciarum usus, quod religiosi, qui debent ad perfectionem tendere, magis debeant vitare vestes viles quam pretiosas.

3. Praeterea. Religiosi maxime intendere debent operibus poenitentiae. Sed in operibus poenitentiae non est utendum exterioribus signis tristitiae; sed magis laetitiae signis: dicit enim Dominus Matth. VI. 16. *Cum ieiunatis, nolite fieri sicut hypocritae tristes: & postea subdit: Tu autem, cum ieiunas, unge caput tuum, & faciem tuam lava.* Quod exponens Augustinus in Lib. II. de serm. Dom. in monte (cap. XII. parum a princ.) dicit: *In hoc capitulo maxime advertendum est, non in solo rerum corporearum nitore, atque pompa, sed etiam in ipsi sordibus luctuosus esse posse iactantiam, & eo periculosiorem, quo sub nomine servitutis Dei decipit.* Ergo videtur quod religiosi non debeant vilioribus vestibus indui.

Sed contra est quod Hebr. XI. 37. Apostolus dicit: *Circueverunt in melotis, & in pellibus caprinis:* Glossa (interl.), ut „Helias, & alii:“ & in Decret. XXI. quæst. IV. (cap. Omnis iactantia) dicitur: *Si inventi fuerint deidentes eos qui vilibus, & religiosis vestibus amicti sunt, corrigantur. Priscus enim temporibus omnis sacratus vir cum mediocri, ac vili veste conversabatur.*

Respondendo dicendum, quod, sicut Augustinus dicit in III. de doctr. christ. (cap. XII. parum a princ.) *in omnibus exterioribus rebus non usus rerum, sed libidinis utentis in culpa est.* Ad quam discernendam attendendum est, quod habitus vilis, & incultus dupliciter potest considerari. Uno modo, prout est signum quoddam dispositionis, vel status humani: quia, ut dicitur Eccl. XIX. 27. *a-*

Cc 2 mi-

(a) An redundat hic quidpiam? (b) Ita cum msi, & edit. vestibus edit. Pat. Nicolai legendum parat habitum, vide corp. art.



*missus . . . hominis enuntiat de illo. Et secundum hoc vilitas habitus est quandoque signum tristitiae : unde & homines in tristitia existentes solent vilioribus vestibus uti, sicut e converso in tempore solemnitatis, & gaudii utuntur cultioribus vestimentis. Unde & poenitentes vilibus vestibus utuntur, ut patet Iona: 311. de Rege, qui indutus est sacco : & III Reg. xxi. de Achab, qui operuit esuio carnem suam.*

Quandoque vero est signum contemptus divitiarum, & mundani fastus. Unde Hieronymus dicit ad Rusticum monachum : *Sordidae vestes candidae mentis indicia sunt; vilis tunica contemptum saeculi probet, ita dumtaxat, ne animus tumeat, ne habitus, sermoque dissensiant.* Et secundum utrumque horum competit religiosus vilitas vestium : quia religio est status poenitentiae, & contemptus mundanae gloriae.

Sed quod aliquis velit hoc aliis significare, contingit propter tria. Uno modo ad sui humiliationem. Sicut enim ex splendore vestium animus hominis elevatur, ita ex humilitate vestium humiliatur : unde de Achab, qui carnem suam cilicio induit, dixit Dominus ad Heliam : *Novne vidisti Achab humiliatum coram me ? ut haberetur III. Reg. xxi. 29.* Alio modo propter exemplum aliorum : unde super illud Matth. 23. *Habebat vestimentum de pilis camelorum.* &c. dicit Glossa (ordin.) „ Qui poenitentiam „ praedicat, habitum poenitentiae praetendit. „ Tertio modo propter inane gloriam, sicut Augustinus dicit (Lib. II. de serm. Dom. in monte cap. xxi. parum a princ.) quod in *ipsis sordibus luctuosus potest esse instantia.* Duobus ergo primis modis laudabile est abiectionis vestibus uti ; tertio vero modo vitiosum est.

Alio autem modo potest considerari habitus vilis, & inultus, secundum quod procedit ex avaritia, vel negligentia : & sic etiam ad vitium pertinet.

Ad primum ergo dicendum, quod vilitas vestium de se non habet speciem mali, immo potius speciem boni, scilicet contemptus mundanae gloriae. Et inde est quod mali sub vilitate vestium suam malitiam occultant. Unde Augustinus dicit in Lib. II. de sermone Domini in monte (cap. xxv. a med.) quod *non ideo debent oves edisse vesti-*

*mentum suum, quia plerumque illo se occultant lupi.*

Ad secundum dicendum, quod Hieronymus ibi loquitur de vestibus vilibus quae deferuntur propter humanam gloriam.

Ad tertium dicendum, quod secundum doctrinam Domini, in operibus sanctitatis nihil homines facere debent propter apparentiam : quod praecipue contingit, quando aliquis aliquid novum facit. Unde Chrysostomus (alius Auctor) dicit super Matth. (hom. x111. in opere imperf.) *Orans nihil novum faciat, quod aspiciant homines, vel clamando, vel pectus percussiendo, vel manus expandendo : quia scilicet ex ipsa novitate homines reddunt intentos ad considerandum. Nec tamen omnis novitas intentos faciens homines ad considerandum, reprehensibilis est : potest enim & bene, & male fieri.* Unde Augustinus dicit in Lib. II. de serm. Dom. in monte (cap. x11. ante med.) quod *qui in professione Christianitatis inusitato squallore, & sordibus intentos in se oculos hominum facit, cum id voluntate faciat, non necessitate patitur, ex ceteris eius operibus potest cognosci, utrum hoc contemptu superflui cultus, an (a) ambitio- ne aliqua faciat.* Maxime autem videtur hoc non ex ambitione facere religiosi, qui habitum vilem deferunt, quasi lignum suae professionis, qua contemptum mundi proferunt.

## QUAESTIO CLXXXVIII.

*De differentia religionum, in octo articulos divisa.*

**D**Einde considerandum est de differentia religionum : & circa hoc quaeruntur octo.

Primo, utrum sint diversae religiones, vel una tantum.

Secundo, utrum aliqua religio institui possit ad opera vitae activae.

Tertio, utrum aliqua religio possit ordinari ad militandum.

Quarto, utrum possit institui aliqua religio ad praedicandum, & huiusmodi opera exercenda.

Quinto, utrum possit aliqua religio institui ad studium scientiae.

Sexto, utrum religio quae ordinatur ad vitam contemplativam, sit prior ea quae ordinatur ad vitam activam.

Se-

(a) *At. ex ambitione.*

Septimo, utrum habere aliquid in communi diminuat de perfectione religionis.

Octavo, utrum religio solitariorum sit praeferrenda religioni in societate viventium.

ARTICULUS I. 900

Utrum sit tantum una religio.

Inf. art. 6. cor.

**A**D primum sic proceditur. Videtur quod non sit nisi una tantum religio. In eo enim quod totaliter, & perfecte habetur, diversitas esse non potest: propter quod non potest esse nisi unum primum summum bonum, ut in l. habitum est (quæst. vi. art. 2. 3. & 4.) Sed, sicut Gregorius dicit super Ezechiel. (hom. xx. inter med. & fi.) cum quis omne quod habet, omne quod vivit, omne quod sapit, omnipotenti Deo venerit, holocaustum est, sine quo religio esse non dicitur. Ergo videtur quod religiones non sint multæ, sed una tantum.

2. Præterea. Ea quæ in essentialibus conveniunt, non diversificantur nisi per accidens. Sed sine tribus votis essentialibus religionis non est aliqua religio, ut supra habitum est (quæst. clxxxvi. art. 6. & 7.) Ergo videtur quod ipsæ religiones specie non diversificentur, sed solum per accidens.

3. Præterea. Status perfectionis convenit & religionis, & Episcopis, ut supra habitum est (quæst. clxxxv. art. 5. & 7.) Sed Episcopatus non diversificatur specie, sed est unus, ubicumque fuerit unde Hieronymus dicit ad Evagrium (a) Episcopum: *Ubicumque fuerit Episcopus, sive Romæ, sive Eugubii, sive Constantinopoli, sive Rhegii, eiusdem meriti est, eiusdem & sacerdotii.* Ergo pari ratione una sola est religio.

4. Præterea. Ab Ecclesia tollendum est omne id quod confusionem inducere potest. Sed ex diversitate religionum videtur quædam posse confusio induci in populo christiano, ut quædam Decretalis dicit (cap. *Ne nimia*, de religiosis domib.) Ergo videtur quod non debeant esse diversæ religiones.

Sed contra est quod in Psal. xlv. ro. scribitur ad ornatum Reginæ pertinere, quod sit circumamicta varietate.

5. Tb. Oper. Tom. XXIII.

Respondeo dicendum, quod, sicut ex supra dictis patet (quæst. præc. art. 2. & quæst. clxxxvi. art. 7.) status religionis est quoddam exercitium, quo aliquis exercetur ad perfectionem caritatis. Sunt autem diversæ caritatis opera, quibus homo vacare potest: sunt etiam diversi modi exercitiorum. Et ideo religiones distinguuntur dupliciter. Uno modo secundum diversitatem eorum ad quæ ordinantur; sicut si una religio ordinetur ad peregrinos hospitio suscipiendos, & alia ad visitandos, vel redimendos captivos. Alio modo potest esse diversitas religionum secundum diversitatem exercitiorum; puta quod in una religione calligatur corpus per abstinencias ciborum, in alia per exercitium operum manualium, vel per nuditatem, aut per aliquid aliud huiusmodi.

Sed quia finis est potissimum in unoquoque, maior est religionum diversitas quæ attenditur secundum diversos fines, ad quos religiones ordinantur, quam quæ attenditur secundum diversæ exercitia.

Ad primum ergo dicendum, quod hoc est commune in omni religione quod aliquis totaliter se debet præbere ad serviendum Deo: unde ex hac parte non est diversitas inter religiones, ut scilicet in una religione aliquis retineat aliquid sui, & in alia aliud; est autem diversitas secundum diversâ in quibus homo Deo servire potest, & secundum quod ad hoc homo se potest diversimode disponere.

Ad secundum dicendum, quod tria essentialia voca religionis pertinent ad exercitium religionis, sicut quædam principalia, ad quæ omnia alia reducuntur, ut supra dictum est (quæst. clxxxvi. art. 7. cor. & ad 2.) Ad observandum autem unumquodque eorum diversimode aliquis se disponere potest; puta ad votum continentiam servandum se disponit aliquis per loci solitudinem, per abstinenciam, per mutuam societatem, & per multa alia huiusmodi. Et secundum hoc patet quod communitas essentialium votorum comparatur diversitatem religionis, tum propter diversas dispositiones, tum etiam propter diversos fines, ut ex supra dictis patet (in corp. & quæst. clxxxvi. art. 7. ad 2.)

Ad tertium dicendum, quod in his quæ ad perfectionem pertinent, Episcopus

Cc 3 pus

(a) Vocem episcopum redundare monent Theologi, nec profecto est in Hieronymo; ne sic habet Decret. dist. xcii, cap. xxi. C. d. Actus ad Eliodorum.

pup se habet per modum agentis, religiosi autem per modum patientis, ut supra dictum est (quaest. clxxxiv. art. 7.). Agens autem, etiam in naturalibus, quanto est superius, tanto est magis unum; ea vero quae patiuntur, sunt diversa. Unde rationabiliter est unus episcopalis status, religiones vero diversae.

Ad quartum dicendum, quod confusio opponitur distinctioni, & ordini. Sic ergo ex multitudine religionum inducitur confusio, si ad idem, & eodem modo diversae religiones essent absque necessitate, & utilitate. Unde, ut hoc non fiat, salubriter institutum est ne nova religio, nisi auctoritate summi Pontificis, instituat.

## ARTICULUS II. 901

*Utrum aliqua religio institui debeat ad opera vitae activae.*

*opus. xxix. cap. 1. princ.*

**A**D secundum sic proceditur. Videtur quod nulla religio institui debeat ad opera vitae activae. Omnis enim religio pertinet ad perfectionis statum, ut ex supra dictis patet (quaest. clxxxiv. art. 5.). Sed perfectio religiosi status consistit in contemplatione divinorum: dicit enim Dionysius vi. cap. ecclesi. Hierarch. (ante med.) quod nominantur ex Dei puro servitio, & famulatu, & indivisibili, & singulari vita uniente eos indivisibilibus sanctis convolutionibus, id est contemplationibus, ad deiformem unitatem, & amabilem Deo perfectionem. Ergo videtur quod nulla religio institui possit ad opera vitae activae.

2. Praeterea. Idem iudicium videtur esse de monachis, & canonicis regularibus, ut habetur extra de postul. cap. Ex parte, & de statu monach. cap. Quod dicit timorem: dicitur enim, quod a sanctorum monachorum consortio non putantur seivandi: & eadem ratio videtur esse de omnibus aliis religiosis. Sed monachorum religio est instituta ad vitam contemplativam: unde Hieronymus dicit ad Paulinum: Si cupis esse quod dicitis monachus, id est solus, quid facis in uribus? Et idem habetur extra de renuntiatione, cap. Nisi cum pridem, & de Regular. cap. Licet quibusdam. Ergo videtur quod omnis religio ordinetur ad vitam contemplativam, & nulla ad activam.

3. Praeterea. Vita activa ad praesens saeculum pertinet. Sed omnes religiosi saeculum deserere dicuntur: unde Gregorius dicit super Ezechiel. (hom. xx. inter med. & fin.) Qui praesens saeculum deserit, & agit bona quae valent, quasi iam Aegypto derelicta, sacrificium praebet in eremo. Ergo videtur quod nulla religio possit ordinari ad vitam activam.

Sed contra est quod dicitur Iacobi 1. 27. Religio munda, & immaculata apud Deum, & Patrem haec est, visitare pauperes, & viduas in tribulatione eorum. Sed hoc pertinet ad vitam activam. Ergo convenienter religio potest ordinari ad vitam activam.

Respondeo dicendum, quod, sicut supra dictum est (art. praec.) religionis status ordinatur ad perfectionem caritatis, quae se extendit ad dilectionem Dei, & proximi. Ad dilectionem autem Dei directe pertinet contemplativa vita, quae soli Deo vacare desiderat; ad dilectionem autem proximi directe pertinet vita activa, quae deservit necessitatibus proximorum: & sicut ex caritate diligitur proximus propter Deum; ita etiam obsequium delatum in proximos redundat in Deum, secundum illud Matth. xxv. 40. Quod uni ex minimis meis fecistis, mihi fecistis. Unde & huiusmodi obsequia proximis facta, inquantum ad Deum referuntur, dicuntur esse sacrificia quaedam, secundum illud ad Hebr. ult. 16. Beneficentiae, & communionis nolite oblivisci: salubris enim hostiis promeretur Deus. Et quia ad religionem proprie pertinet sacrificium Deo offerre, ut supra habitum est (quaest. lxxxv. art. 1. ad 1. & art. 4. ad 1.) consequens est quod convenienter religiones quaedam ad opera vitae activae ordinentur.

Unde & in collationibus Patrum (collat. xiv. cap. xv. cit. princ.) Abbas Nesteros distinguens diversa religionum studia, dicit: Quidam summam intentionis suae erga creata secreta, & cordis consiliunt puritatem; quidam erga institutionem fratrum, & cenobiorum curam; quosdam xenodochii, id est hospitalitatis, delectat obsequium.

Ad primum ergo dicendum, quod Dei servitium, & famulatus salvatur etiam in operibus vitae activae, quibus aliquis servit proximo propter Deum, sicut dictum est (in corp.). In quibus etiam salvatur singularitas vitae, non quantum ad hoc quod homo cum hominibus non converteretur, sed quantum ad hoc quod ho-

homo singulariter his intendat quæ ad divinum obsequium spectant : & dum religiosi operibus vitæ activæ insunt intuitu Dei, consequens est quod in eis actio ex contemplatione divinorum derivetur. Unde non privantur omnino fructu contemplativæ vitæ.

Ad secundum dicendum, quod eadem est ratio de monachis, & omnibus aliis religiosi, quantum ad ea quæ sunt communia omni religioni; puta quod totaliter se dedident divinis obsequiis, & quod essentialia vota religionis observent, & quod a secularibus negotiis se abstineant. Sed non oportet similitudinem esse quantum ad alia quæ sunt propria monasticæ professioni, quæ specialiter ad vitam contemplativam ordinantur. Unde & in prædicta Decretali de postulando non dicitur simpliciter, quod sit idem iudicium de canonicis regularibus, quod de monachis; sed quantum ad supradicta, scilicet quod in forensibus causis officio advocacionis non utantur: & in Decretali inducta de statu monachorum, postquam præmiserat, quod non putantur a consorcio monachorum seu iuncti canonicis regulares, subditur: *Regule tamen inseruiunt laxiori*. Ex quo patet quod non ad omnia tenentur ad quæ monachi.

Ad tertium dicendum, quod dupliciter aliquis potest esse in sæculo: uno modo per præsentiam corporalem; alio modo per mentis affectum. Unde & discipulis suis Dominus dixit (Ioan. xv. 19.) *Ego elegi vos de mundo*: de quibus tamen ad Patrem loquitur dicens (Ioan. xvii. 11.) *In mundo sunt, & ego ad te venio*. Quamvis ergo religiosi qui circa opera vitæ activæ occupantur, sine in sæculo secundum præsentiam corporalem; non tamen sunt in sæculo quantum ad mentis affectum: quia in exterioribus occupantur, non quali quærentes aliquid in mundo, sed solum propter divinum obsequium. *Uruntur enim hoc mundo, tamquam non utentes*, ut dicitur I. ad Cor. vii. Unde Iacobi 1. 27. postquam dictum est: *Religio munda, & immaculata est visitare pupillos, & viduas in tribulatione*: subditur: *Et immaculatam se custodire ab hoc sæculo*, ut scilicet affectus in rebus sæculi non detineatur.

## ARTICULUS III. 903

*Utrum aliqua religio ordinari possit ad militandum.*

*Inf. art. 4. ad 2. & 3.*

**A**D tertium sic proceditur. Videtur quod nulla religio ordinari possit ad militandum. Omnis enim religio pertinet ad statum perfectionis. Sed ad perfectionem vitæ christianæ pertinet quod Dominus dicit Matth. v. 39. *Ego dico vobis, non resistere malo; sed si quis perculserit te in unam maxillam, præbe ei & alteram*: quod repugnat officio militari. Ergo nulla religio potest institui ad militandum.

2. Præterea. Gravior est compugnatio corporaliū præliorum quam concertationes verborum, quæ in advocacionibus fiunt. Sed religiosi interdicitur officio advocacionis uti, ut patet in Decretali de postulando supra inducta (ar. præc. arg. 2.) Ergo videtur quod multo minus aliqua religio possit institui ad militandum.

3. Præterea. Status religionis est status poenitentiae, ut supra dictum est (quæst. præc. art. 6.) Sed poenitentibus secundum iura interdicitur militia: dicitur enim in Decret. de poenit. dist. v. (cap. 111.) *Contrarium omnino est ecclesiasticis regulis, post poenitentiae actionem redire ad militiam secularem*. Ergo nulla religio congrue institui potest ad militandum.

4. Præterea. Nulla religio institui potest ad aliquid iniustum. Sed, sicut Ildorus dicit in Lib. XVIII. Erymol. (cap. 1. cir. princ.) *iustum bellum est quod ex edicto imperiali geritur*. Cum ergo religiosi sint quædam privatæ personæ, videtur quod non liceat eis bellum gerere; & ita ad hoc non potest institui aliqua religio.

Sed contra est quod Augustinus dicit ad Bonifacium (ep. clxxxix. al. ccv. parum ante med.) *Noli existimare, neminem Deo placere posse qui armis bellicis ministrat. In his erat sanctus David, cui Dominus magnum testimonium perhibuit*. Sed ad hoc instituta sunt religiones ut homines Deo placeant. Ergo nihil prohibet aliquam religionem institui ad militandum.

Respondeo dicendum, quod, sicut dictum est (art. præc.) religio institui potest

CC 4. ell

est non solum ad opera vitæ contemplativæ, sed etiam ad opera vitæ activæ, inquantum pertinent ad subventionem proximorum, & obsequium Dei, non autem inquantum pertinent ad aliquid mundanum tenendum. Potest autem officium militare ordinari ad subventionem proximorum, non solum quantum ad privatas personas, sed etiam quantum ad totius reipublicæ defensionem: unde de Iuda Machabæo I. Machab. 111. 2. dicitur, quod *præliabatur prælium Israel cum letitia; & dilatavit populo suo gloriam*. Ordinari etiam potest ad conservationem divini cultus: unde ibidem subditur, Iudam dixisse: *Nos pugnabimus pro animabus nostris, & legibus nostris: & infra cap. xiii. 2. dicit Simon: Vos scitis quanta ego, & fratres mei, & domus patris mei fecimus pro legibus, & pro sanctis præliis*.

Unde convenienter potest institui aliqua religio ad militandum, non quidem propter aliquid mundanum, sed propter defensionem divini cultus, & publicæ salutis, vel etiam pauperum, & oppressorum, secundum illud Psal. lxxx1. 4. *Eripite pauperem, & egenum de manu peccatoris liberate*.

Ad primum ergo dicendum, quod aliquis potest non resistere malo dupliciter. Uno modo, condonando propriam iniuriam: & sic potest ad perfectionem pertinere, quando ita fieri expedit ad salutem aliorum. Alio modo, tolerando patienter iniurias aliorum: & hoc ad imperfectionem pertinet, vel etiam ad vitium, si aliquis potest convenienter iniurianti resistere. Unde Ambrosius dicit in Lib. I. de offic. (cap. xxvii. vers. fin.) *Fortitudo, quæ in bello tuetur a barbaris patriam, vel domum defendit inimicos, vel a latronibus socios, plena est iustitia: quæ etiam ibidem Dominus dicit: Sicut tua sunt, ne repetas*. Et carent si aliquis non repetat ea quæ sunt aliorum, si ad eum pertineat, peccaret: homo enim laudabiliter donat sua, non autem aliena. Et nullo minus ea quæ sunt Dei, non sunt negligenda: quia, ut Chrysostomus (alius Auctor) dicit super Matth. (hom. v. in op. imperf. inter med. & fin.) *iniurias Dei dissimulare nimis est impium*.

Ad secundum dicendum, quod exercere advocacionis officium propter aliquid mundanum, repugnat omni religioni; non autem si hoc aliquis exerceat secundum dispositionem sui prælati pro

monasterio suo, ut in eadem Decret. subditur: neque etiam pro defensione pauperum, aut viduarum. Unde in Decret. dist. lxxxviii. (cap. 1.) dicitur: *Decretis sancta Synodus, nullum deinceps clericum aut possessiones conducere, aut secularibus negotiis se immiscere, nisi propter curam pupillorum &c.* Et similiter militare propter aliquid mundanum, est omni religioni contrarium; non autem militare propter obsequium Dei.

Ad tertium dicendum, quod militia secularis interdicitur poenitentibus; sed militia quæ est propter divinum obsequium, imponitur alicui in poenitentiam; sicut patet de his quibus iniungitur ut militent in subsidium Terræ sanctæ.

Ad quartum dicendum, quod religio non sic instituitur ad militandum quod religiosi propria auctoritate liceat bella gerere, sed solum auctoritate Principum, vel Ecclesiæ.

## ARTICULUS IV. 903

Utrum aliqua religio possit institui ad prædicandum, vel confessiones audiendum.

Oppos. x. cap. iv.

**A**D quartum sic proceditur. Videtur quod nulla religio possit institui ad prædicandum, vel confessiones audiendum. Dicitur enim vii. quest. 1. (cap. Hoc nequaquam:) *Monachorum vita subjectionis habet verbum, & discipulatus, non docendi, vel prædicandi, vel pascendi alios: & eadem ratio esse videtur de aliis religionibus. Sed prædicare, & confessiones audire, est pascere, vel docere alios*. Non ergo ad hoc aliqua religio potest institui.

2. Præterea. Id ad quod religio instituitur, videtur esse maxime proprium religioni, ut supra dictum est (art. 2. & 3. præc.) Sed prædicti actus non sunt proprii religiosorum, sed potius prælatorum. Non ergo ad huiusmodi actus potest aliqua religio institui.

3. Præterea. Inconveniens videtur quod auctoritas prædicandi, & confessiones audiendi infinitis hominibus committatur. Sed non est ceteris numerus eorum qui in aliqua religione recipiuntur. Ergo inconveniens est quod aliqua religio instituitur ad actus prædictos.

4. Præterea. Prædicatoribus debetur victus

visus a fidelibus Christi, ut patet I. ad Corinth. ix. Si ergo committitur praedicationis officium alicui religioni ad hoc instituta, sequitur quod fideles Christi teneantur ad exhibendum sumptus infinis personis: quod cedit in magnum eorum gravamen. Non ergo debet aliqua religio institui ad huiusmodi actus exercendos.

5. Praeterea. Institutio Ecclesiae debet sequi institutionem Christi. Sed Christus primo misit ad praedicandum duodecim Apostolos, ut habetur Luc. ix. & postea misit septuaginta duos discipulos, ut habetur Luc. x. &, sicut Glossa (ordin. Bedæ sup. illud, *Post hæc autem* &c.) ibidem dicit, *Apostolorum formam tenent Episcopi, septuaginta duorum discipulorum minores presbyteri, scilicet curati.* Ergo praeter Episcopos, & presbyteros parochiales, non debet aliqua religio institui ad praedicandum, vel ad confessiones audiendum.

Sed contra est quod in collationibus Patrum (collat. xiv. cap. iv. in fin.) Abbas Neilores de diversitate religionum loquens ait: *Quidam eligentes negotantium curam, alii intercessionem quæ pro miseris, atque oppressis impenditur, exequentes, aut doctrinæ insistentes, aut elemosinas pauperibus largientes, inter magis, atque summas viros pro affectu suo, ac pietate viguerunt.* Ergo sicut ad negotantium curam aliqua religio potest institui; ita etiam ad docendum populum per praedicationem, & alia huiusmodi opera.

Respondet dicendum, quod, sicut dictum est (art. 2. hu. quæst.) convenienter religio institui potest ad opera vitae activæ, secundum quod ordinantur ad utilitatem proximorum, & ad obsequium Dei, & conservationem divini cultus. Magis autem procuratur utilitas proximorum per ea quæ pertinent ad spiritualem animæ salutem, quam per ea quæ pertinent ad subveniendum corporali necessitati, quanto spiritualia corporalibus sunt potiora. Unde supra dictum est (quæst. xxxii. art. 3.) quod elemosinæ spirituales sunt corporalibus potiores. Hoc etiam pertinet magis ad obsequium Dei, cui nullum sacrificium est magis acceptum quam zelus animarum, ut Gregorius dicit super Ezech. (hom. xii. aliquant. ante fin.) Maius etiam est, spiritualibus armis contra errores hæreticorum, & tentationes dæmonum fideles defendere, quam corporalibus armis po-

pulum fidelem tueri. Et ideo convenientissimum est, ad praedicandum, & ad alia huiusmodi quæ pertinent ad salutem animarum, aliquam religionem institui.

Ad primum ergo dicendum, quod ille qui operatur ex virtute alterius, agit per modum instrumenti. Minister autem est sicut instrumentum animatum, ut Philosophus dicit in I. Polit. (cap. iii. ante med. & Lib. VIII. Ethic. cap. xi. ante fin.) Unde quod aliqui auctoritate prælatorum prædicet, vel alia huiusmodi faciat, non supergreditur discipulatus, vel subiectionis gradum, qui competit religionis.

Ad secundum dicendum, quod sicut religiones aliquæ instituuntur ad militandum, non quidem ut militent auctoritate propria, sed auctoritate Principum, vel Ecclesiarum, quibus ex officio competit, sicut dictum est (art. præc. ad 4.) ita etiam religiones instituuntur ad praedicandum, & confessiones audiendum, non quidem auctoritate propria, sed auctoritate prælatorum superiorum, & inferiorum, ad quos ex officio pertinet; & ita subservire prælatis in tali ministerio, est huiusmodi religionis proprium.

Ad tertium dicendum, quod a prælatis non conceditur talibus religionis ut quilibet indifferenter possit prædicare, vel confessiones audire; sed secundum moderationem eorum qui huiusmodi religionibus præficiuntur, vel secundum taxationem ipsorum prælatorum.

Ad quartum dicendum, quod plebs fidelis non tenetur ex debito intrinsece sumptus ministrandos nisi ordinariis prælatis, qui propter hoc decimas, & oblationes fidelium recipiunt, & alios ecclesiasticos redditus. Sed si aliqui in huiusmodi actibus gratis velint fidelibus ministrare, non potestative ab eis sumptus exigentes, non propter hoc gravantur fideles: quia etiam ipsi possunt liberaliter recompenfare temporalem subventionem: ad quam etsi non teneantur ex debito iuris, tenentur tamen ex debito caritatis; non autem ita quod eis sit tribulatio, aliis autem remissio, ut dicitur II. ad Corinth. viii. 13. Si tamen non inventirentur qui gratis se huiusmodi obsequiis manciparent tenerentur ordinarii prælati, si ipsi non sufficerent, alios ad hoc idoneos querere, quibus sumptus ipsi ministrarent.

Ad quintum dicendum, quod formam

se-

septuaginta duorum discipulorum non solum centem presbyteri curati, sed quicumque alii minoris ordinis, qui Episcopis in eorum officio sublevariunt. Non enim legitur, quod septuaginta duobus discipulis Dominus aliquas determinatas parochias assignaret, sed quod mittebat eos binos, ante faciem suam in omnem civitatem, & locum quo erat ipse venturus. Opportunum autem fuit ut præter ordinarios prælatos alii assumerentur ad huiusmodi officia, propter multitudinem fidelis populi, & difficultatem invenendi sufficientes personas distribuendas singulis plebibus; sicut etiam religiones ad militandum necesse fuit institui, propter defectum sæcularium Principum ad resistendum infidelibus in aliquibus terris.

## ARTICULUS V. 904

*Utrum sit instituenda aliqua religio ad studendum.*

**A**D quintum sic proceditur. Videtur quod non sit instituenda aliqua religio ad studendum. Dicitur enim in Psal. lxx. 16. *Quoniam non cognovi litteraturam, introibo in potentias Domini: Gloria (interl.), idest virtutem christianam.* Sed perfectio christianæ virtutis maxime videtur ad religiosos pertinere. Ergo eorum non est studio litterarum insistere.

2. Præterea. Id quod est dissensionis principium, religiosis non competit, qui in unitatem pacis congregantur. Sed studium dissensionem inducit: unde & in Philosophis subsecuta est diversitas sectarum: unde & Hieronymus super epistolam ad Titum (cap. r. sup. illud). *Et constitutas per civitates* dicit: *Antequam diaboli insidius studia in religione fierent, & diceretur in populis, Ego sum Pauli, ego Apollo, ego Cephe, &c.* Ergo videtur quod nulla religio debeat institui ad studendum.

3. Præterea. Professio christianæ religionis differre debet a professione Gentilium. Sed apud Gentiles aliqui Philosophiam profitebantur; & nunc etiam aliqui sæculares dicuntur aliquarum scientiarum professores. Non ergo religiosis competit studium litterarum.

Sed contra est quod Hieronymus in epistola ad Paulin. invitat eum ad discendum in sterno monastico, dicens: *Disceamus in terris, quorum scientia nobis per-*

*severet in talis: & infra: Quicquid quaeris, secum scire conabor.*

Respondetur dicendum, quod, sicut dictum est (art. 2. hu. quest.) religio potest ordinari ad vitam activam, & ad vitam contemplativam. Inter opera autem vitæ activæ principaliora sunt illa quæ ordinantur directe ad salutem animarum, sicut prædicare, & alia huiusmodi. Competit ergo studium litterarum religiosis tripliciter.

Primo quidem quantum ad id quod est proprium contemplativæ vitæ, ad quam studium litterarum dupliciter adjuvat. Uno modo directe coadiuvando ad contemplandum, illuminando scilicet intellectum. Vita enim contemplativa, de qua nunc loquimur, principaliter ordinatur ad considerationem divinorum, ut supra habitum est (quest. clxxx. art. 4.) in qua dirigitur homo per studium ad considerandum divina: unde in laudem viri iusti dicitur in Psal. i. 2. quod *in lege Domini meditabitur die, ac nocte: & Eccl. xxxix. i. dicitur: Sapientiam antiquorum exquirat sapiens, & in Prophetis vacabit.* Alio modo studium litterarum iuvat ad contemplativam vitam indirecte, removendo contemplationis pericula, scilicet errores qui in contemplatione divinorum frequenter accidunt his qui Scripturas ignorant; sicut in collationibus Patrum (collat. x. cap. 117.) legitur, quod Abbas Serapion propter simplicitatem incidit in errorem Anthropomorphitarum, idest eorum qui Deum habere humanam formam arbitrantur. Unde dicit Gregorius in VI. Moral. (cap. xvii ante med.) quod *nonnulli, dum plus exquirunt contemplando quam sapiant, usque ad perversa dogmata erumpunt: Et dum veritatis esse discipuli humiliter negligunt, magistri errorum sunt.* Et propter hoc dicitur Eccl. 11. 3. *Cogitavi in corde meo abstrahere a vino carnem meam, ut animum meum transferrem ad sapientiam, deviareque multatim.*

Secundo necessarium est studium litterarum religiosis instituitur ad prædicandum, & alia huiusmodi exercendum: unde Apostolus dicit ad Tit. 1. 9. de Episcopo, ad cuius officium huiusmodi aſus pertinent: *Amplificentem eum, qui secundum doctrinam est, fidelem sermonem, ut potens sit exhortari in doctrina sana, & eos qui contradicunt, arguere.* Nec obstat quod Apostoli absque studio litterarum ad prædicandum sunt missi: quia, ut

ut Hieronymus dicit in epistola ad Paulinum ( inter princ. & med. ) *quicquid alius exercitatio, & quotidiana in lege Dei meditatio tribuere solet, hoc illis Spiritus sanctus suggererat.*

Tertio studium litterarum religioni congruit quantum ad id quod est omni religioni commune: valet enim ad vitandum carnis lasciviam: unde & Hieronymus dicit ad Rusticum monachum ( cir. med. ) *Am Scripturarum scientiam, & carnis vitia non amabis.* Avertit enim animum a cogitatione lasciviae, & carnem macerat propter studii laborem, secundum illud Eccli. xxxi. 1. *Vigilia bonestatis habefaciet carnes.* Valet etiam ad auferendum cupiditatem divitiarum: unde Sap. vii. 8. dicitur: *Divitias nihil esse duxi in comparatione illius:* & 1. Machab. xii. 8. dicitur: *Nos autem nullo horum indiguimus, scilicet exteriorum subsidiorum, habentes solatio sanctos libros, qui in manibus nostris sunt.* Valet etiam ad obedientiae documentum: unde Augustinus dicit in Lib. de operibus monach. ( cap. xvii. cir. fin. ) *Quae est ista pervertitas, lectiois nolle obtemperare, dum vult ei vacare?* Et ideo manifestum est quod congrue potest institui religio ad studium litterarum.

Ad primum ergo dicendum, quod Glossa ibi exponit illud de littera veteris legis, de qua Apostolus dicit II. Corinth. xii. 6. *Littera occidit.* Unde non cognoscere litteraturam est non approbare litteralem circumcissionem, & ceteras carnales observantias.

Ad secundum dicendum, quod studium ad scientiam ordinatur, quae sine caritate instat, & per consequens dissensionem facit, secundum illud Proverb. xiii. 10. *Inter superbos semper sunt iurgia;* sed cum caritate edificat, & concordiam parit: unde I. ad Corinth. x. 5. Apostolus cum dixisset, *Divites satisfecisti in omni verbo, & in omni scientia,* postmodum subdit: *Idipsum dicatis omnes, & non sint in vobis schismata.* Hieronymus tamen non loquitur ibi de studio litterarum, sed de studiis dissensionum, quae per haereticos, & schismaticos intraverunt in religionem christianam.

Ad tertium dicendum, quod Philosophi profitebantur studia litterarum quantum ad saeculares doctrinas; sed religiosis competit principaliter intendere studio litterarum pertinentium ad doctrinam quae secundum pietatem est, ut dicitur ad Tit. 1. Aliis autem doctrinis

intendere non pertinet ad religiosos, quorum tota vita divinis obsequiis mancipatur, nisi in quantum ordinantur ad sacram doctrinam. Unde Augustinus dicit in fine Musicae: *Nos dum negligendos esse non existimamus, quos haeretici rationis, & scientiae fallaci pollicitatione decipiunt, tardius incedimus consideratione ipsarum viarum: quod tamen facere non auderemus, nisi multos filios Ecclesiae catholicae matris optime pios, eadem reserendorum haereticorum necessitate fecisse videremus.*

## ARTICULUS VI. 903

*Utrum religio quae vacat vitae contemplativa, sit potior ea quae vacat operibus vitae activae.*

*Inf. quæst. clxxxix. art. 8. cor. & ad 2. & opusc. x. cap. xv. fin.*

**A**D sextum sic proceditur. Videtur quod religio quae vacat vitae contemplativae, non sit potior ea quae vacat operibus vitae activae. Dicitur enim extra, de regularib. & transuentibus ad religionem, cap. *Licet*: *Sicut maius bonum minori bono praepositur; ita communis utilitas specialis utilitati praefertur: & in hoc casu recte praepositur doctrina silentio, sollicitudo contemplationi, & labor quieti.* Sed religio est melior quae ad maius bonum ordinatur. Ergo videtur quod religiones quae ordinantur ad vitam activam, sint potiores illis quae ordinantur ad vitam contemplativam.

2. Praeterea. Omnis religio ordinatur ad perfectionem caritatis, ut supra habitum est ( art. 1. & 2. huius quæst. ) Sed super illud ad Hebr. xii. *Nondum usque ad sanguinem resististis,* dicit Glossa ( Augustin. xvii. de verb. Apost. cap. 1. cir. med. ) *Perfector in hac vita dilectio nulla est ea ad quam sancti Martyres pervernerunt, qui contra peccatum usque ad sanguinem certaverunt.* Certare autem usque ad sanguinem competit religionibus quae ad militiam ordinantur, quae tamen pertinent ad vitam activam. Ergo videtur quod huiusmodi religiones sint potissimae.

3. Praeterea. Tanto videtur esse aliqua religio perfectior, quanto est arduior. Sed nihil prohibet aliquas religiones ad vitam activam ordinatas esse arduiores observantiae quam sint illae quae ordinantur ad vitam contemplativam. Ergo sunt potiores.

Sed



Sed contra est quod Dominus Luc. x. dicit, *optimam partem esse Mariæ*; per quam vita contemplativa significatur.

Respondeo dicendum, quod, sicut supra dictum est (art. 1. huius quæstionis) differentia unius religionis ad aliam principaliter quidem attenditur ex parte finis, secundario autem ex parte exercitii. Et quia non potest aliquid dici altero potius, nisi secundum id in quo ab eo differt; ideo excellentia unius religionis super aliam principaliter quidem attenditur secundum religionis finem, secundario autem secundum exercitium. Diversimode tamen utraque comparatio attenditur. Nam comparatio quæ est secundum finem, est absoluta, eo quod finis propter se queritur; comparatio autem quæ est secundum exercitium, est respectiva, quia exercitium non queritur propter se, sed propter finem. Et ideo illa religio alteri præfertur quæ ordinatur ad finem absolute potius, vel quia est maius bonum, vel quia ad plura bona ordinatur. Si vero sit finis idem, secundario attenditur præminencia religionis, non secundum quantitatem exercitii, sed secundum proportionem eius ad finem intentum. Unde & in collationibus Patrum (collat. 11. cap. 11.) introducitur sententia B. Antonii, qui prætulit discretionem, per quam aliquis omnia moderatur, & ieiuniis, & vigiliis, & omnibus huiusmodi observantiis.

Sic ergo dicendum est, quod opus vitæ activæ est duplex. Unum quidem quod ex plenitudine contemplationis derivatur, sicut doctrina, & prædicatio. Unde & Gregorius dicit super Ezech. (hom. v. a med.) quod *de perfectis viris post contemplationem suam redeuntibus dicitur Plal. cxlv. 7. Memoriam (a) iuventutis tuæ erubescunt*. Et hoc præfertur simplici contemplationi. Sicut enim maius est illuminare quam lucere solum; ita maius est contemplata aliis tradere quam solum contemplari. Aliud autem opus est activæ vitæ quod totaliter consistit in occupatione exteriori; sicut eleemosynas dare, hospites recipere, & alia huiusmodi, quæ sunt minora operibus contemplationis, nisi forte in casu necessitatis, ut ex supra dictis patet (quæst. clxxxii. art. 1.) Sic ergo summum gradum in religionibus tenent quæ ordinantur ad docendum, & prædicandum, quæ & propinquissimæ sunt perfe-

ctioni Episcoporum; sicut & in aliis rebus *finis primorum coniunguntur principis secundorum*, ut Dionysius dicit vii. cap. de div. Nom. (a med. lect. 4.) Secundum autem gradum tenent illæ quæ ordinantur ad contemplationem. Tertius est earum quæ occupantur circa exteriores actiones.

In singulis autem horum graduum potest attendi præminencia, secundum quod una religio ordinatur ad altiore actum in eodem genere; sicut inter opera activæ vitæ potius est redimere captivos quam recipere hospites, & in operibus vitæ contemplativæ potior est oratio quam lectio. Potest etiam attendi præminencia, si una earum ad plura horum ordinetur quam alia, vel si convenientiora statuta habeat ad finem propositum consequendum.

Ad primum ergo dicendum, quod Decretalis illa loquitur de vita activa, prout ordinatur ad salutem animarum.

Ad secundum dicendum, quod religiones quæ instituntur propter militiam, directius ordinantur ad hoc quod effundant sanguinem hostium quam ad hoc quod eorum sanguis effundatur: quod proprie Martyribus competit. Nihil tamen prohibet, huiusmodi religiosi in aliquo casu meritum martyrii consequi, & secundum hoc præferri aliis religionibus; sicut & opera activa interdum in aliquo casu præferuntur contemplationi.

Ad tertium dicendum, quod (b) arctitudo observantiarum non est illud quod præcipue in religione commendatur, ut beatus Antonius dicit (in collat. PP. collat. 11. cap. 11. a med. & cap. 117. & 118.) & Isaïa lviii. 5. dicitur: *Numquid tale est ieiunium quod elegi, per diem affligere hominem animam suam?* assumitur tamen in religione ut necessaria ad carnis macerationem; quæ si sine discretionem sit, periculum deficiendi habet annexum, sicut beatus Antonius dicit. Et ideo non est potior religio ex hoc quod habet arctiores observantias, sed ex hoc quod ex maiori discretionem sunt eius observantiae ordinatae ad finem religionis; sicut ad continentiam efficacius ordinatur maceratio carnis per abstinentiam cibi, & potus, quæ pertinent ad famem, & sitim, quam per subtractionem vestium, quæ pertinet ad frigus, & nuditatem, & quam per corporalem laborem.

A R.

(a) *Voluptas* abundantie iuventutis. (b) *Ita mss. & edit. 1. 2. 3. m. 4. arctitudo.*

## ARTICULUS VII. 906

*Utrum habere aliquid in communi diminuat perfectionem religionis.*

*Opus. xvii. cap. xv. & opus. x. cap. vi.*

**A**D septimum sic proceditur. Videtur quod habere aliquid in communi diminuat perfectionem religionis. Dicit enim Dominus Matth. xix. 21. *Si vis perfectus esse, vende, & vende omnia quae habes, & da pauperibus.* Ex quo patet quod carere mundanis divitiis pertineat ad perfectionem christianae vitae. Sed illi qui habent aliquid in communi, non carent divitiis mundanis. Ergo videtur quod non attingant omnino ad perfectionem christianae vitae.

2. Praeterea. Ad perfectionem consiliorum pertinet ut homo mundana solitudine careat: unde & Apostolus I. ad Corinth. vii. 32. dans consilium de virginitate dixit: *Volo vos sine sollicitudine esse.* Sed ad sollicitudinem praesentis vitae pertinet quod aliqui reservent sibi aliquid in futurum: quam quidem sollicitudinem Dominus discipulis prohibet Matth. vi. 34 dicens: *Nolite solliciti esse in crastinum.* Ergo videtur quod habere aliquid in communi diminuat perfectionem christianae vitae.

3. Praeterea. Divitiae communes quodammodo pertinent ad singulos qui sunt in communitate: unde Hieronymus ad Heliodor. Episc. (parum a med. epist.) dicit de quibusdam loquens: *Sunt ditiores monachi quam fuerant saeculares: possident opes sub Christo pauperes, quas sub locuplete diabolo non habuerunt: suspirant eos Ecclesia divites, quos tenuit mundus ante mendicos.* Sed quod aliquis habeat divitias proprias, derogat perfectioni religionis. Ergo etiam perfectioni religionis derogat quod aliquid in communi habeatur.

4. Praeterea. Gregorius in III. Dial. (cap. ix. cir. med.) narrat de quodam sanctissimo viro Isaac, quod cum ei discipuli humiliter innuerent ut pro usu monasterii possessiones suas offerrebantur, acciperet, ille sollicitus suae paupertatis custos sortem sententiam tenebat, dicens: *Monachus qui in terra possessiones quarit, monachus non est: quod intelligitur de communibus possessionibus, quae pro communi usu monasterii ei offerrebantur.* Ergo videtur quod habere aliquid in com-

muni tollat perfectionem religionis. 5. Praeterea. Dominus perfectionem religionis discipulis tradens Matth. x. 9. dicit: *Nolite possidere aurum, neque argentum, neque pecuniam in zonis vestris, non peram in via:* per quod, ut Hieronymus dicit (in hunc loc.) arguit Philopobos, qui vulgo appellantur *Bastroparata*; qui quasi contemptores saeculi, & omnia pro nihilo ducentes cellarium secum debebant. Ergo videtur quod servare aliquid sive in proprio, sive in communi, diminuat perfectionem religionis.

Sed contra est quod Prosper dicit in Lib. II. de vita contemplativa (cap. ix. parum a princ.) & habetur xii. quæst. 1. (cap. Expedit: ) *Satis ostenditur, & propria debere propter perfectionem contemni, & sine impedimento perfectionis Ecclesie posse facultates, quae sunt profecto communes, possideri.*

Respondendo dicendum, quod, sicut supra dictum est (quæst. clxxxiv. art. 3. & quæst. clxxxv. art. 6. ad 1.) perfectionem consistit essentialiter in paupertate, sed in Christi sequela, secundum illud Hieronymi super Matthæum (cap. xix. sup. illud, *Et secuti sumus te:*) „Quia non sufficit omnia relinquere, addit Petrus „quod perfectum est, scilicet, *Secuti sumus te.* „Pauperes autem est sicut instrumentum, vel exercitium perveniendi ad perfectionem. Unde in collationibus Patrum (collat. i. cap. vii. a med.) Abbas Moyses dicit: *Letitia, vigilia, meditatio Scripturarum, nuditas, ac privatio omnium facultatum, non perfectio, sed perfectionis instrumenta sunt.* Est autem privatio omnium facultatum, sive paupertas perfectionis instrumentum, inquantum per remotionem divitiarum tolluntur quædam caritatis impedimenta: quæ sunt præcipue tria. Quorum primum est sollicitudo, quam secum divitiarum afferunt: unde Dominus dicit Matth. xiii. 22. *Quod autem seminatum est in spinis, hic est qui verbum Dei audit: & sollicitudo saeculi iustus, & fallacia divitiarum suffocant verbum.* Secundum autem est divitiarum amor, qui ex divitiis possessis augetur: unde & Hieronymus dicit super Matth. (cap. xix. sup. illud, *Facilius est camelum,*) quod quia divitiarum habitus difficilius contemuntur, non dixit Dominus, *impossibile est divitem intrare in regnum caelorum, sed difficile.* Tertium autem est inanis gloria, vel elatio, quæ ex divitiis nascitur, secundum illud Psal. xlviii. 7. *Qui confidunt in vir-*  
tute

que sua, & in multitudine divitiarum suarum gloriantur.

Horum ergo trium primum a divitiis sepatari non potest totaliter, sive fiat magnæ, sive parvæ. Necessè est enim hominem aliquoties sollicitari de acquirendis, vel conservandis exterioribus rebus. Sed si res exteriores non querantur, vel habeantur nisi in modica quantitate, quantum sufficiunt ad simplicem victum, talis sollicitudo non multum impedit hominem: unde nec perfectioni repugnat christianæ vitæ. Non enim omnis sollicitudo a Domino interdicatur, sed superflua, & nociva: unde super illud Matthæi vi. *Ne solliciti sitis animæ vestræ, quid manducetis* &c. dicit Augustinus in Lib. II. de sermone Domini in monte (implic. cap. xvi. sed expref. in Lib. de op. Monach. cap. xxvi. a princ.) » Non hoc dicit, ut ista non procurentur, quantum necessitatis est; sed ut » non ista intueantur, & propter ista » faciant quicquid in Evangelii prædicatione facere iubentur. « Sed abundans divitiarum possessio abundantioris sollicitudinem ingerit, per quam animus hominis multum distrahitur, & impeditur ne totaliter feratur in Dei obsequium. Alia vero duo, scilicet amor divitiarum, & elatio, seu gloriatio de divitiis, non consequuntur nisi abundantes divitias.

Differt tamen circa hoc, utrum divitiæ abundantes, vel moderatæ in proprio, vel in communi habeantur. Nam sollicitudo quæ circa proprias divitias adhibetur, pertinet ad amorem privatum, quo quis se temporaliter amat; sed sollicitudo quæ adhibetur circa res communes, pertinet ad amorem caritatis, quæ non querit quæ sua sunt, sed communibus intendit. Et quia religio ad perfectionem caritatis ordinatur, quam periclitatur amor Dei usque ad contemptum sui, habere aliquid proprium perfectioni repugnat religionis; sed sollicitudo quæ adhibetur circa bona communia, pertinere potest ad caritatem: licet etiam per hoc impediri possit aliquis altior caritatis actus, puta contemplationis divinæ, aut instructionis proximorum. Ex quo patet quod habere superabundantes divitias in communi, sive in rebus mobilibus, sive in immobilibus, est impedimentum perfectionis; licet non totaliter excludat eam: habere autem de rebus exterioribus in communi, sive mobilibus, sive immobilibus, quantum sufficit ad simpli-

cem victum, perfectionem religionis non impedit, si consideretur paupertas per comparationem ad communem finem religionum, qui est vacare divinis obsequiis.

Si autem consideretur per comparisonem ad speciales fines religionum, sic, præsupposito tali fine, paupertas maior, vel minor est religioni accommodata: & tanto erit unaquæque religio secundum paupertatem perfectior, quanto habet paupertatem magis proportionatam suæ fini. Manifestum est enim quod ad exteriora, & corporalia opera vitæ activæ indiget homo copia exteriorum rerum; ad contemplationem autem pauca requiruntur. Unde Philosophus dicit in X. Ethic. (cap. viii. ante med.) quod *ad actiones multis opus est, & quanto utique maiores sunt, ac meliores, pluribus; speculanti autem nulla talium ad operationem est necessitas, sed solis necessariis indiget: alia vero impedimenta sunt ad speculationem*. Sic ergo patet quod religio quæ ordinatur ad actiones corporales activæ vitæ, puta ad militandum, vel ad hospitalitatem sectandam, imperfecta esset, si communibus careret divitiis; religiones autem quæ ad contemplativam vitam ordinantur, tanto perfectiores sunt, quanto earum paupertas minorem ei sollicitudinem temporalium ingerit. Tanto autem sollicitudo temporalium rerum magis impedit religionem, quanto sollicitudo spiritualium maior ad religionem requiritur.

Manifestum est autem quod maiorem sollicitudinem spiritualium requirit religio quæ est instituta ad contemplandum, & contemplata aliis tradendum per doctrinam, & prædicationem, quam illa quæ est instituta ad contemplandum tantum. Unde talem religionem decet paupertas talis quæ minimam sollicitudinem ingerat. Manifestum est autem quod minimam sollicitudinem ingerit conservare res usus hominum necessarias tempore congruo procuratas. Et ideo tribus gradibus religionum suprapositis triplex gradus paupertatis competit. Nam illis religionibus quæ ordinantur ad corporales actiones activæ vitæ, competit habere abundantiam divitiarum communium: illis autem religionibus quæ sunt ordinatæ ad contemplandum, magis competit habere possessiones moderatas; nisi simul oporteat tales religiosos per se, vel per alios hospitalitatem tenere, & pauperibus subvenire: illis autem quæ

ordinantur ad contemplata aliis tradenda, competit vitam habere maxime ab exterioribus solitudinibus expeditam : quod quidem fit, dum modica quæ sunt necessaria vitæ, congruo tempore procurata conservantur. Et hoc Dominus paupertatis institutor docuit suo exemplo : habebat enim loculos ludæ commissos, in quibus recondebantur ei oblata, ut habetur Ioan. xxi.

Nec oblat quod Hieronymus dicit super Matth. (in fin. comment. ad cap. xvii.) quod si quis obicere voluerit, quomodo ludas pecuniam in loculis portabat, respondemus, quod rem pauperum in usus suos convertere nefas putavit, scilicet solvendo tributum : quia inter illos pauperes præcipue erant eius discipuli, in quorum necessitates pecunia loculorum Christi expendebatur. Dicitur enim Ioan. xv. 8. quod discipuli abierant in civitatem, ut cibos emerent : & Ioan. xiii. 29. dicitur, quod discipuli putabant, quia loculos habebat ludas, quod dimisset ei Iesus, Emne ea quæ opus sunt nobis ad diem festum, aut ut egenis aliquid daret. Ex quo patet quod conservare pecuniam, aut quicumque alias res communes ad sustentationem religiosorum Congregationis eiusdem, vel quorumcumque aliorum pauperum, est perfectioni conformem quam Christus docuit suo exemplo. Sed & discipuli post resurrectionem, a quibus omnis religio sumptit originem, pretia prædiorum conservabant, & distribuabant, prout cuique opus erat.

Ad primum ergo dicendum, quod, sicut dictum est (quæst. clxxxiv. art. 3. in corp. & ad 1.) ex illo verbo Domini non intelligitur, quod ipsa paupertas sit perfectio, sed perfectionis instrumentum : & sicut ostensum est (quæst. clxxxvi. art. 8.) minimum est inter tria principalia instrumenta perfectionis. Nam votum continentie præeminet voto paupertatis, & votum obedientie præfertur utrique. Quia vero instrumentum non propter se queritur, sed propter finem, non tanto aliquid sit melius, quanto maius est instrumentum, sed quanto est magis fini proportionatum ; sicut Medicus non tanto magis sanat, quanto maiorem dat medicinam, sed quanto medicina est magis proportionata morbo. Sic ergo non oportet quod religio tanto sit perfectior, quanto maiorem habet paupertatem, sed quanto eius paupertas est magis proportionata fini communi, & speciali. Et si daretur quod excessus pau-

peratis faceret religionem perfectiorem secundum hoc quod est pauperior, non tamen faceret eam perfectiorem simpliciter : posset enim esse quod alia religio excederet in his quæ pertinent ad continentiam, & obedientiam ; & sic esset simpliciter perfectior : quia quod in melioribus excedit, est simpliciter melius.

Ad secundum dicendum, quod per hoc quod Dominus dicit Matth. vi. 34. Nolite solliciti esse in crastinum, non intelligitur quod nihil reservetur in futurum : hoc enim periculosum esse beatus Antonius in collationibus Patrum (collat. 11. cap. 11. cir. med.) ostendit, dicens, quod privationem omnium facultatum ita festinantes, ut ex ipsis nec quidem unius diei victum sibi met, unumque denarium superesse paterebantur, & alia huiusmodi facientes, ita vidimus repente deceptos, ut arreptum opus non potuerint congruo exitu terminare. Et, ut Augustinus dicit in 1. Lib. de oper. monach. (cap. xxiii. a med.) si hoc verbum Domini, Nolite solliciti esse in crastinum, ita intelligatur, ut nihil in crastinum reponatur, non poterunt ista servare qui se per multos dies a conspectu hominum separatos includebant, viventes in magna intentione orationum. Et postea subdit : An forte quæ sunt sanctiores, eo sunt volucris dissimiliores ? Et postea subdit (cap. xxiv. in princ.) Si enim urgeantur ex Evangelio ut nihil reponant in crastinum, rectissime respondent : Cur ergo ipse Dominus loculos habuit, ubi pecuniam collectam reponeret ? Cur tanto ante, fame imminente, frumenta sanctorum missa sunt ? Cur Apostoli indigentis sanctorum necessaria procurarunt ? Quando ergo dicitur, Nolite solliciti esse in crastinum, secundum Hieronymum (in hunc loc.) sic exponitur : Sufficit nobis presentis temporis cogitatio : futura, quæ incerta sunt, Deo relinquamus : secundum Chrysostomum (alium Auctorem hom. xvi. in op. imperf. cir. fi.) sic : Sufficit labor quem pateris propter necessaria : noli superflue pro superfluis laborare : secundum Augustinum (Lib. 11. de ser. Dom. in mon. cap. xvii. aliquant. a princ.) sic : Cum aliquid boni operamur, non temporalia, quæ significantur per crastinum, sed æterna cogitemus.

Ad tertium dicendum, quod verbum Hieronymi habet locum ubi sunt superabundantes divitiæ, quæ habentur quasi propriæ, vel per quantum abusus etiam singuli de communitate superbiunt, & lascivunt ; non autem habet locum in di-

divitiis moderatis, communiter conservatis ad solam sustentationem vitæ, quæ singuli indigent. Eadem enim est ratio quod singuli utantur his quæ pertinent ad necessaria vitæ, & quod communiter conserventur.

Ad quartum dicendum, quod Isaac possessiones renuebat accipere, quia timebat ne per hoc ad superfluas divitias veniretur, per quarum abusum impediretur religionis perfectio. Unde Gregorius ibid. subdit: *Sic metuebas paupertatis suæ securitatem perdere, sicut avari divites solent perituras divitias custodire.* Non autem legitur, quod renuerit recipere aliqua necessaria ad vitæ sustentationem communiter conservanda.

Ad quintum dicendum, quod Philosophus in 1. Politic. (cap. v. & vi.) dicit, panem, & vinum, & alia huiusmodi esse divitias naturales; pecunias vero divitias esse artificiales. Et inde est quod quidam Philosophi volebant uti pecunia, sed aliis rebus, quasi secundum naturam viventes. Et ideo Hieronymus ibidem per sententiam Domini, qui similiter utrumque interdicit, ostendit quod in idem redit habere pecuniam. & alias res vitæ necessarias. Et tamen licet Dominus huiusmodi non portare in via ab his qui ad prædicandum mittentur, ordinaverit; non tamen ea in communi conservari prohibuit. Qualiter tamen illa verba Domini intelligenda sint, supra ostensum est (quæst. cxxxv. art. 6. ad 2. & 1. 2. quæst. cviii. art. 2. ad 3.)

#### ARTICULUS VIII. 907

*Utrum perfectior sit religio in societate viventium quam agentium solitariam vitam.*

**A**D octavum sic proceditur. Videtur quod perfectior sit religio in societate viventium, quam agentium solitariam vitam. Dicitur enim Eccle. iv. 9. *Melior est duos esse simul quam unum: habent enim emolumentum societatis suæ.* Igitur videtur perfectior esse religio in societate viventium.

2. Præterea. Matth. xviii. 20. dicitur: *Ubi fuerint duo, vel tres congregati in nomine meo, ibi sum ego in medio eorum.* Sed nihil potest esse melius quam Christi societas. Ergo videtur quod vivere in congregatione sit melius quam ducere solitariam vitam.

3. Præterea. Inter alia religionis vota votum obedientie excellentius est, & humilitas est maxime Deo accepta. Sed obedientia, & humilitas magis observantur in conversatione quam in solitudine: dicit enim Hieronymus ad Rusticum monachum (ante med. epist. iv.) *In solitudine cito subrepsit superbia, dormit quantum voluerit, facit quod voluerit: e contrario autem ipse docet eum qui in societate vivit, dicens: Non facias quod vis, comedas quod iuberis, habeas quantum acceperis, subiiciaris cui non vis, servias fratribus, præpositum monasterii timeas ut Deum, diligas ut parentem.* Ergo videtur quod religio in societate viventium sit perfectior ea quæ solitariam vitam agit.

4. Præterea. Dominus dicit Lucæ xi. 33. *Nemo accendit lucernam, & in abscondito ponit, neque sub modio.* Sed illi qui solitariam vitam agunt, vitæ virtutes in abscondito positi, nihil utilitatis hominibus afferentes. Ergo videtur quod eorum religio non sit perfectior.

5. Præterea. Id quod est secundum naturam hominis, videtur ad perfectionem virtutis pertinere. Sed homo est naturaliter animal sociabile, ut Philosophus dicit in 1. Politicor. (cap. ii. a princ.) Ergo videtur quod agere solitariam vitam non sit perfectius quam agere vitam socialem.

Sed contra est quod Augustinus in Lib. de operibus monachorum (cap. xxiii. a med.) illos sanctiores esse dicit qui a conspectu hominum separati, nulli ad se præbent accessum, viventes in magna intentione orationum.

Respondeo dicendum, quod solitudo, sicut & ipsa paupertas, non est ipsa essentia perfectionis, sed perfectionis instrumentum. Unde & in collationibus Patrum (collat. i. cap. vii. in princ.) dicit Abbas Moyses, quod *pro puritate cordis solitudo sectanda est*, sicut & ieiunia, & alia huiusmodi. Manifestum est autem quod solitudo non est instrumentum congruum actioni, sed contemplationi, secundum illud Osæ ii. 14. *Ducam eam in solitudinem, & loquar ad cor eius.* Unde non congruit religionibus quæ sunt ordinatæ ad opera vitæ activæ live corporalia, sive spiritualia; nisi forte ad tempus, exemplo Christi, qui, ut dicitur Lucæ vi. 12. *exiit in montem solus orare, & erat pernoctans in oratione Dei.*

Competit autem religionibus quæ sunt ad

ad contemplationem ordinatæ. Considerandum est tamen, quod id quod est solitarium, debet esse sibi per se sufficiens. Hoc autem est cui nihil deest, quod pertinet ad rationem perfecti. Et ideo solitudo competit contemplanti, qui iam ad perfectum pervenit. Quod quidem contingit dupliciter. Uno modo ex solo divino munere; sicut patet de Ioanne Baptista, qui fuit repletus Spiritu sancto adhuc ex utero matris sue: unde cum adhuc puer esset, erat in desertis, ut dicitur Lucæ i. Alio modo per exercitium virtuosi actus, secundum illud ad Hebr. v. 14. *Perfectorum est solidus ci- bus, eorum qui pro consuetudine exercitia- zos habent sensus ad discretionem boni ac mali.*

Ad exercitium autem huiusmodi iuva- tur homo ex aliorum societate dupliciter. Uno modo quantum ad intellectum, ut instruat in his quæ sunt contem- planda: unde Hieronymus dicit ad Ru- stic. monach. (ante med. epist.) *Mibi placet ut habeas sanctorum consubernium, nec ipse te doceas.* Secundo quantum ad affectum, ut scilicet noxiæ affectiones hominis reprimantur exemplo, & cor- rectione aliorum: quia, ut dicit Gregorius XXX. Moral. super illud, *Cui dedi in solitudinem domum* (cap. xxi. cir. med.) "quid prodest solitudo corporis, si soli- tudo defuerit cordis?" Et ideo vita socialis necessaria est ad exercitium per- fectionis. Solitudo autem competit iam perfectis: unde Hieronymus dicit ad Ru- sticum monach. (loc. cit.) *Solitariam vitam reprehendimus? minime: quippe quam sæpe laudavimus: sed de ludo mo- nasteriorum huiusmodi volumus egredi- milites, quos eremi rudimenta dura non terream, qui specimen conversationis sue multo tempore dederint.*

Sicut ergo id quod iam perfectum est, præminet ei quod ad perfectionem exer- cetur; ita vita solitaria, si debite assumatur, præminet vitæ sociali. Si autem absque præcedenti exercitio talis vita assumatur, est periculosissima, nisi per divinam gratiam suppleatur quod in aliis per exercitium acquiritur; sic- ut patet de beatis Antonio, & Bene- dicto.

Ad primum ergo dicendum, quod Sa- lomon ostendit, melius esse quod sint duo simul quam unus, propter auxi- lium quod unus habet ab alio, vel ad sub- levandum, vel ad fovendum, vel ad spiritaliter calefaciendum: quo quidem

auxilio iam non indigent qui sunt per- fectionem assecuti.

Ad secundum dicendum, quod dicitur I. Ioan. iv. 16. *Qui manet in caritate, in Deo manet, & Deus in eo.* Sicut ergo Christus est in medio eorum qui si- bi invicem per dilectionem proximi so- ciantur; ita habitat in corde eius qui divinæ contemplationi insinit per dile- ctionem Dei.

Ad tertium dicendum, quod actu obe- dire est necessarium his qui indigent ex- exerceri secundum directionem aliorum ad perfectionem capiendam; sed illi qui iam perfecti sunt, spiritu Dei insincent aguntur, ut non indigeant actuali obedi- re; habent tamen obedientiam in præparatione animi.

Ad quartum dicendum, quod, sicut Augustinus dicit in XIX. de civitate Dei (cap. xrx. a med.) *a studio cognoscende veritatis nemo prohibetur, quod ad lau- dabile pertinet otium.* Quod autem ali- quis super candelabrum ponatur, non pertinet ad ipsum, sed ad eius superio- res. *Quæ sarcina si non imponatur, ut Augustinus ibidem subdit, contemplande veritati vacandum est, ad quam pluri- mum valet solitudo.* Et tamen illi qui solitariam vitam agunt, multum utiles sunt generi humano. Unde Augustinus dicit in Libro de moribus Ecclesiæ (cap. xxxi. paulo a princ.) de his loquens: *Pane solo, qui eis per certa intervalla temporum affertur, & aqua contenti, de- servissimas terras incolunt, perscrutantes col- loquio Dei, cui puris mentibus inhaere- runt. Videntur autem nonnullis res hu- manas, plusquam oporteret, deseruisse, non intelligentibus quantum nobis eorum animus in orationibus proficiat, & vita ad exemplum, quorum corpora videre non sinimus.*

Ad quintum dicendum, quod homo non potest solitarius vivere dupliciter. Uno modo quasi societatem humanam non ferens propter animi sevitiam: & hoc est bestiale. Alio modo per hoc quod totaliter divinis rebus inhæret: & hoc est supra hominem. Et ideo Philo- sophus dicit in I. Polit. (cap. ii. a med.) quod ille qui aliis non commu- nicat, est bestia, aut Deus, id est divi- nus vir.

## QUAESTIO CLXXXIX.

*De religionis ingressu,  
in decem articulos divisa.*

**D**Einde considerandum est de ingressu religionis: & circa hoc quaeruntur decem.

Primo, utrum illi qui non sunt exercitati in observantia praeceptorum, debeant ingredi religionem.

Secundo, utrum liceat aliquos voto obligari ad religionis ingressum.

Tercio, utrum illi qui voto obligantur ad religionis ingressum, teneantur votum implere.

Quarto, utrum illi qui vovent religionem intrare, teneantur ibi perpetuo remanere.

Quinto, utrum pueri sint recipiendi in religione.

Sexto, utrum propter parentum obsequium aliqui debeant retrahi a religionis ingressu.

Septimo, utrum presbyteri curati, vel Archidiaconi possint ad religionem transire.

Octavo, utrum de una religione possit aliquis transire ad aliam.

Nono, utrum aliquis debeat alios inducere ad religionis ingressum.

Decimo, utrum requiratur magna deliberatio cum consanguineis, & amicis ad religionis ingressum.

## ARTICULUS I. 908

*Utrum illi qui non sunt in praeceptis exercitati, debeant ingredi religionem.*

*Quolib. 1v. art. 2. & op. xvii. cap. 11. usque ad x. inclusive.*

**A**D primum sic proceditur. Videtur quod non debeant religionem ingredi nisi illi qui sunt in praeceptis exercitati. Dominus enim consilium perfectionis dedit adolescenti, qui dixerat se praecepta a iuventute servasse. Sed a Christo sumptum initium omnis religio. Ergo videtur quod non sint ad religionem admitteendi nisi qui sunt in praeceptis exercitati.

2. Præterea. Gregorius dicit super Ezech. (hom. xv. aliquant. a princ. & Lib. XXII. Moral. cap. xiv. parum a princ.) *Nemo repente fit summus; sed in bona conversatione a minimis quis incipiat, ut ad magna perveniat.* Sed magna sunt consilia, quæ pertinent ad perfectionem vitæ; minora autem præcepta sunt, quæ pertinent ad communem iustitiam. Ergo videtur quod non debeant aliqui ad observantiam consiliorum religionem intrare, nisi prius fuerint in præceptis exercitati.

3. Præterea. Sicut ordines sacri habent quandam excellentiam in Ecclesia, ita & religionis status. Sed, sicut Gregorius scribit (a) Siagrio Gallorum Episcopo (Lib. IX. Registr. epist. cvr. a med.) & habetur in Decret. dist. xlviii. (cap. *Sicut Neophyto*) *ordinate ad ordines (b) ascendendum est.* Nam casum appetit qui ad summi loci fastigia, postpositis gradibus, per abrupta querit ascensum. Scimus autem quod edificat parietes non prius signorum pondus accipiunt, nisi a novitiis suæ humere secernantur; ne si ante pondera, quam solidentur, accipiant, curatam simul fabricam deponant. Ergo videtur quod non debeant aliqui ad religionem transire, nisi in præceptis sint exercitati.

4. Præterea. Super illud Psalmi cxxx. *Sicut ablatus est super matre sua, dicit Glossa (ord.).* In utero matris Ecclesie primo concipimur, dum fidei rudimentis instruimur; inde quasi in utero eiusdem alimur, in iisdem primordiis proficientes; deinde in lucem educimur, dum per baptismum regeneramur; deinde quasi manibus Ecclesie portamur, & lacte nutrimur, dum post baptismum in bonis operibus informamur, & lacte simplicis doctrinæ nutrimur proficiendo, donec iam grandisculi a lacte matris accedamus ad mensam patris, idest a simplici doctrina, ubi prædicatur Verbum caro factum, accedamus ad Verbum in principio apud Deum. Et postea subdit: Quia nuper baptizati in Sabbato sancto quasi manibus Ecclesie gestantur, & lacte nutriuntur usque ad Pentecosten; quo tempore nulla difficultas indicuntur, non ieiunatur, non media nocte surgitur: postea Spiritu Paracleti confirmati, quasi ablatis, incipiunt

(a) Ita optime ex Gregorii textu repavit N'euaine. M. in edit. Anglorum Episcopo, item Argentinensi Anglorum Episcopo, item Gallorum Episcopo. In Mss. est *Lucana* loco nominis. In Decretis S. g'io &c. (b) M. accedendum.

„piunt ieiunare, & alia difficulta servare. Multi vero hunc ordinem pervertunt, ut hæretici, & schismatici, se ante tempus a lacte separantes: unde extinguuntur. “ Sed hunc ordinem pervertere videntur illi qui religionem intrant, vel alios ad intrandum inducunt, antequam sint in faciliori observantia præceptorum exercitati. Ergo videtur quod sint hæretici, vel schismatici.

5. Præterea. A prioribus ad posteriora est transeundum. Sed præcepta sunt priora consiliis, quia sunt communiora, utpote a quibus non convertitur essendi consequentia: quicunque enim servat consilia, servat & præcepta; sed non convertitur. Congruus autem ordo est ut a prioribus ad posteriora transeat. Ergo non debet aliquis transire ad observantiam consiliorum in religione, nisi prius sit exercitatus in præceptis.

Sed contra est quod Dominus Matthæum publicanum, qui in observantia præceptorum exercitatus non erat, advocavit ad consiliorum observantiam: dicitur enim Lucæ v. 31. quod *reliquit omnibus, secutus est eum*. Non ergo est necessarium quod ante aliquis exerceatur in observantia præceptorum, quam transeat ad perfectionem consiliorum.

Respondeo dicendum, quod, sicut ex supra dictis patet (quæst. præc. art. 1.) status religionis est quoddam spirituale exercitium ad consequendam caritatis perfectionem: quod quidem fit, inquantum per religionis observantias auferuntur impedimenta perfectæ caritatis. Hæc autem sunt quæ implicant affectum hominis ad terrena. Per hoc autem quod affectus hominis implicatur ad terrena, non solum impeditur perfectio caritatis, sed interdum etiam ipsa caritas perditur, dum per inordinatam conversionem ad bona temporalia homo avertitur ab incommutabili bono, mortaliter peccando. Unde patet quod religionis observantia sicut tollunt impedimenta perfectæ caritatis, ita etiam tollunt occasionem peccandi; sicut patet quod per ieiunium, vigiliis, & obedientiam, & alia huiusmodi retrahitur homo a peccatis gulæ, & luxuriæ, & quibuscunque aliis peccatis.

Et ideo religionem ingredi non solum expedit his qui sunt exercitati in præceptis, ut ad maiorem perfectionem perveniant; sed etiam his qui non sunt ex-

ercitati, ut facilius peccata vitent, & perfectionem assequantur.

Ad primum ergo dicendum, quod Hieronymus dicit super Matth. (cap. xix. sup. illud, *Hæc omnia servavi*: ) „Mentitur adolescens, dicens: *Hæc omnia servavi a iuventute mea*. Si enim hoc quod positum est in mandatis, *Diliges proximum tuum sicut teipsum*, opere compleisset; quomodo postea audiens, *Vade, vende omnia quæ habes, & da pauperibus*, tristis recessisset? “ Sed intelligendum est, eum mentitum fuisse quantum ad perfectam observantiam huius præcepti. Unde Origenes super Matth. (tract. viii. ante med.) dicit, quod scriptum est in Evangelio secundum Hebræos, quod cum Dominus dixisset ei, *Vade, vende omnia quæ habes*, cepit dives scalpere caput suum: & dixit ad eum Dominus: *Quomodo dicis, Feci legem, & Prophetas, cum scriptum sit in lege, Diliges proximum tuum sicut teipsum?* & ecce multi fratres tui filii Abraham amici sunt stercore, morientes præ fame, & domus tua plena est multis bonis, & non egreditur aliquid omnino ex ea ad eos. Itaque Dominus redarguens eum dicit: *Si vis perfectus esse, vade*. Et. Impossibile est enim implere mandatum, quod dicit, *Diliges proximum tuum sicut teipsum, & esse divitem*, & maxime tantas possessiones habere. “ Quod est intelligendum de perfecta impletione huius præcepti. Imperfecte autem, & communi modo verum est eum observasse præcepta. Perfectio enim principaliter in observantia præceptorum caritatis consistit, ut supra habitum est (quæst. clxxxiv. art. 3.) Ut ergo Dominus ostenderet, perfectionem consiliorum utilem esse & innocentibus, & peccatoribus, non solum vocavit adolescentem innocentem, sed etiam Matthæum peccatorem. Sed tamen Matthæus secutus est vocantem, non autem adolescens: quia facilius convertuntur ad religionem peccatores quam illi qui de sua innocentia præsumunt: quibus dicit Dominus Matth. xxi. 31. *Publicani, & meretrices præcedent vos in regnum Dei*.

Ad secundum dicendum, quod summum, & infimum tripliciter accipi possunt. Uno modo in eodem statu, & in eodem homine: & sic manifestum est quod nemo renente sit summus: unusquisque recte vivens, toto corde



vita suae proficit, ut ad summum perveniat. Alio modo per comparisonem ad diversos status : & sic non oportet ut quicumque vult ad superiorem statum pervenire, a minori incipiat; sicut non oportet ut quicumque vult esse clericus, prius in laicali vita exerceatur. Tertio modo quantum ad diversas personas: & sic manifestum est quod unus statim incipit non solum ab altiori statu, sed etiam ab altiori gradu sanctitatis, quam sit summum ad quod alius pervenit per totam vitam suam. Unde Gregorius dicit in II. Dialog. ( cap. 1. parum a princ. ) *Omnes agnoscant, a quanta Benedictus puer conversationis gratia, & perfectione capisset.*

Ad tertium dicendum, quod, sicut supra dictum est ( implic. quaest. clxxxiv. art. 6. ) ordines sacri praerogunt sanctitatem; sed status religionis est exercitium quoddam ad sanctitatem assequendam. Unde pondus ordinum imponendum est parietibus iam per sanctitatem defecatis; sed pondus religionis defeccat parietes, idest homines, ab humore vitiatorum.

Ad quartum dicendum, quod, sicut manifeste ex verbis illius Glossae apparet, principaliter loquitur de ordine doctrinae, prout transeundum est a facilioribus ad difficiliora. Unde quod dicit, *quosdam haereticos, & schismaticos hunc ordinem pervertere*, manifestum est ex sequentibus ad ordinem doctrinae pertinere. Sequitur enim: *Hic vero se servasse, scilicet praedictum ordinem, dicit, constringens se maledicto. Sic non modo in aliis sui humilis, sed etiam in scientia, quia humiliter sentiebam: quia prius nutritus fui lacte, quod est Verbum caro factum, ut sic crescerem ad panem Angelorum, idest ad Verbum quod est in principio apud Deum.* Exemplum autem quod in medio interponitur, quod noviter baptizatis non indicitur ieiunium usque ad Pentecosten, ostendit quod non sunt ex necessitate ad difficultatem cogendi, antequam per Spiritum sanctum interius ad hoc intelligentur, ut difficultia propria voluntate assumant. Unde & post Pentecosten post receptionem Spiritus sancti ieiunium celebrat Ecclesia. Spiritus autem sanctus, sicut Ambrosius dicit super Lucam ( cap. 1. sup. illud *Et Spiritui sancto replebitur* ) non coarctetur aetatibus, non obitu extinguatur, non excluditur ab eo matris. Et Gregorius dicit in hom. Pentecosten ( xxx. in

Evang. inter med. & fin. ) *Implet ciborum puerum, & Psalmistam facit: implet puerum abstinentem, & iudicem senum facit: & postea subdit: Nulla ad discendum mora agitur, in omne quod volueris: mox enim ut tetigeris, mentem docet.* Et, sicut dicitur Eccle. viii. 8. *non est in hominibus potestate prohibere Spiritum: & Apostolus I. ad Thesal. v. 19. monet Spiritum nolite extinguere: & Act. vii. 51. contra quosdam dicitur: Vos semper Spiritui sancto resistitis.*

Ad quintum dicendum, quod praceptorum quaedam sunt principalia, quae sunt quasi fines praceptorum, & consiliorum, scilicet praepcepta caritatis, ad quae consilia ordinantur, non ita quod sine consiliis servari non possint, sed ut per consilia perfectius observentur. Alia vero sunt praepcepta secundaria, quae ordinantur ad praepcepta caritatis, ut sine quibus praepcepta caritatis observari non possint omnino. Sic ergo perfecta observantia praceptorum caritatis praedicat intentione consilia, sed interdum tempore sequitur. Hic est enim ordo sine respectu eorum quae sunt ad finem. Observantia vero praceptorum caritatis secundum communem modum, & similiter alia praepcepta comparantur ad consilia, sicut commune ad proprium: quia sine consiliis; sed non convertitur. Sic ergo observantia praceptorum communiter sumpta praedicat ordine naturae consilia; non tamen oportet quod tempore: quia non est aliquid prius in genere quam sit in aliqua specierum. Observantia vero praceptorum sine consiliis ordinatur ad observantiam praceptorum cum consiliis, sicut species imperfecta ad perfectam, sicut animal irrationale ad rationale. Perfectum autem naturaliter prius est imperfecto. Natura enim, ut Boetius dicit ( Lib. III. de consolat. profa x. parum a princ. ) *a perfectis sumit initium.* Nec tamen oportet quod prius observentur praepcepta sine consiliis, & postea cum consiliis; sicut non oportet quod aliquis prius sit alius quam homo, vel quod prius sit coniugatus quam sit virgo. Et similiter non oportet quod aliquis prius servet praepcepta in saeculo quam transcat ad religionem: praesertim quia conversatio saecularis non disponit ad perfectionem religionis, sed magis impedit.

## ARTICULUS II. 909

*Utrum debeant aliqui voto obligari ad religionis ingressum.*

*Sup. quæst. clxxxviii. & quod. lxi.  
art. II. & opusc. xvii. cap.  
xi. xii. & xiii.*

**A**D secundum sic proceditur. Videtur quod non debeant aliqui voto obligari ad religionis ingressum. Per professionem enim aliquis voto religionis astringitur. Sed ante professionem conceditur annus probationis, secundum regulam beati Benedicti (cap. lviii.) & secundum statutum (a) Innocentii III. (cap. Nullus de regularib. & transf. &c.) qui etiam prohibuit, ante annum probationis completum eos per professionem religioni altringi. Ergo videtur quod multo minus adhuc in sæculo existentes debeant voto ad religionem obligari.

2. Præterea. Gregorius in Regist. (Lib. XI. epist. xv.) dicit, & habetur in Decret. dist. xlv. (cap. de Iudeis) quod Iudei non vi, sed libera voluntate, ut convertantur suadendi sunt. Sed implere id quod voverunt, necessitatis est. Ergo non sunt aliqui obligandi ad religionis ingressum.

3. Præterea. Nullus debet alteri præbere occasionem ruinæ: unde Exodi xxi. 33. dicitur: *Si quis aperuerit cisternam, cecideritque bos, vel asinus in eam, dominus cisternæ reddet pretium iumentorum.* Sed ex hoc quod aliqui obligantur ad religionem per votum, frequenter aliqui ruunt in desperationem, & in diversa peccata. Ergo videtur quod non sint aliqui ad religionis ingressum voto obligandi.

Sed contra est quod in Psal. lxxv. 23. dicitur: *Vovete, & reddite Domino Deo vestro: ubi dicit Glossa (ord. Aug.) quod quedam sunt vota propria singulorum, ut castitas, virginitas, & huiusmodi.* Ad hæc ergo vovenda invitat nos sacra Scriptura. Sed sacra Scriptura non invitat nisi ad id quod est melius. Ergo melius est quod aliquis voto se obliget ad religionis ingressum.

Respondeo dicendum, quod, sicut supra dictum est (quæst. lxxxviii. art. 6.) cum de voto ageretur, unum & idem

*S. Tb. Oper. Tom. XXIII.*

opus ex voto factum, est laudabilius quam si sine voto fiat: tum quia vovere est actus religionis, quæ habet quandam excellentiam inter virtutes: tum quia per votum firmatur voluntas hominis ad bonum faciendum: & sicut peccatum est gravius ex hoc quod procedit ex voluntate obstinata in malum; ita bonum opus est laudabilius ex hoc quod procedit ex voluntate firmata in bonum per votum. Et ideo obligari voto ad religionis ingressum, est secundum se laudabile.

Ad primum ergo dicendum, quod duplex est religionis votum. Unum solenne, quod hominem facit monachum, vel alterius religionis fratrem, quod vocatur professio: & tale votum debet præcedere annum probationis, ut probat obiectio. Aliud autem est votum simplex, ex quo aliquis non fit monachus, vel religiosus, sed solum obligatus ad religionis ingressum: & ante tale votum non oportet præcedere probationis annum.

Ad secundum dicendum, quod auctoritas illa Gregorii intelligitur de violentia absoluta. Necessitas autem quæ ex obligatione voti requiritur, non est necessitas absoluta, sed necessitas ex fine, quia scilicet post votum non potest aliquis finem salutis consequi, nisi impleat votum. Talis autem necessitas non est vitanda; quinimmo, ut Augustinus dicit ad Armentarium, & Paulinam (ep. cxxvii. al. xlv. non procul a fin.) *felix est necessitas quæ in meliora compellit.*

Ad tertium dicendum, quod vovendo religionis ingressum, est quedam confirmatio voluntatis ad meliora: & ideo, quantum est de se, non dat homini occasionem ruinæ, sed magis subtrahit. Sed si aliquis voti transgressor gravius ruat, hoc non derogat bonitati voti; sicut nec derogat bonitati baptismi, quod aliqui post baptismum gravius peccant.

*De 3*

*A R-*

(a) Ita passim. Cod. Alcan. & edit. veteres Innocentii IV. a quo idem decretum prohibuit Theologi Lasciofferi, & Ducenti.

## ARTICULUS III. 910

*Utrum ille qui obligatus est voto ad religionis ingressum, teneatur intrare religionem.*

*Sup. quaest. lxxxviii. art. 3. ad 2. & quod. liii. art. 11.*

**A**D tertium sic proceditur. Videtur quod ille qui obligatus est voto ad religionis ingressum, non teneatur intrare religionem. Dicitur enim in Dec. xvii. quaest. 11. (cap. 1.) *Gonsaldus Presbyter quondam infirmitate, ac fervore passionis pressus, monachum se fieri promisit; non tamen monasterio, aut Abbatui se tradidit, nec promissionem scripti, sed beneficium Ecclesiae in manu advocati recusavit: ac postquam convalescit, monachum se negavit fieri.* Et postea subditur: *iudicamus, & auctoritate apostolica praecipimus ut praefatus presbyter beneficium, & altaria recipiat, & quiete retineat.* Hoc autem non esset, si teneatur religionem intrare. Ergo videtur quod non teneatur aliquis implere votum, quo se ad religionis ingressum obligavit.

2. Praeterea. Nullus tenetur facere id quod non est in potestate ipsius. Sed quod aliquis religionem ingrediatur, non est in potestate ipsius; sed requiritur ad hoc assensus eorum ad quos debet transire. Ergo videtur quod non teneatur aliquis implere votum, quo se ad religionis ingressum obligavit.

3. Praeterea. Per votum minus utile non potest derogari voto magis utili. Sed per impletionem voti religionis impediri posset impletio voti crucis in subsidium terrae sanctae: quod videtur esse utilius, quia per hoc votum consequitur homo remissionem peccatorum. Ergo videtur quod votum quo quis se obligavit ad religionis ingressum, non sit ex necessitate implendum.

Sed contra est quod dicitur Eccl. v. 3. *Si quid voveris Deo, ne moreris reddere: displicet enim ei infidelis, & stultus promissio.* Et super illud Psal. lxxv. *Vovete, & reddite Domino Deo vestro, dicit Glossa (colligitur ex interl. & hab. cap. Licet de voto, & voti redempt.)* „Vovere voluntarii consulitur; sed post „voti promissionem redditio necessario „exigitur.“

Respondendo dicendum, quod, sicut su-

pra dictum est (quaest. lxxxviii. art. 1.) cum de voto ageretur, votum est promissio Deo facta de his quae ad Deum pertinent. Ut autem Gregorius dicit in epistola ad Bonifatium (id hab. Innocen. 1. epist. 11. ad Victorium can. xiii. to. 11. Concil. & Zacharias Pp. epist. vii. ad Pipin. cap. xxi. to. vi. Vid. cap. Viduas 11. xxvii. quaest. 1.) *si inter homines bona fidei solens contractus nulla ratione dissolvitur; quanto magis ista pollicitatio, quam cum Deo pepigit, solvi sine vindicta non poterit?* Et ideo ad implendum id quod homo vovit, ex necessitate tenetur; dummodo sit aliquid quod ad Deum pertineat.

Manifestum est autem quod ingressus religionis maxime ad Deum pertinet: quia per hoc homo totaliter se mancipat divinis obsequiis, ut ex supra dictis patet (quaest. clxxxvi. art. 1.) Unde relinquitur quod ille qui se obligat ad religionis ingressum, teneatur religionem ingredi secundum quod se voto obligare intendit; ita scilicet quod si intendit se absolute obligare, tenetur quam citius poterit, ingredi, legitimo impedimento cessante; si autem ad certum tempus, vel sub certa conditione, tenetur religionem ingredi tempore adveniente, vel conditione existente.

Ad primum ergo dicendum, quod ille presbyter non fecerat votum solemne, sed simplex. Unde non erat monachus effectus, ut cogi deberet de iure in monasterio remanere, & Ecclesiam dimittere. Tamen in foro conscientiae esset sibi consulendum, quod omnibus dimissis, religionem intraret. Unde extra de voto, & voti redemptione, cap. *Per tuas*, consulitur Episcopo Gratianopolitano, qui post votum religionis Episcopatum assumpserat, voto non impleto, ut *si suam sanare desideraret conscientiam, regimen Ecclesiae resignaret, & redderet Altissimo vota sua.*

Ad secundum dicendum, quod, sicut supra dictum est (quaest. lxxxviii. art. 3. ad 2.) cum de voto ageretur, illi qui se voto obligavit ad certae religionis ingressum, tenetur facere quantum in se est, ut in illa religione recipiatur: & si quidem intendit se simpliciter ad religionem obligare, si non recipitur in una religione, tenetur ire ad aliam; si vero se intendit specialiter obligare ad unam solum, non tenetur nisi secundum modum obligationis suae.

Ad tertium dicendum, quod votum re-

li-

ligionis, cum sit perpetuum, est maius quam votum peregrinationis terræ sanctæ, quod est temporale: & sicut Alexander III. dicit, & habetur extra de voto, & voti redempt. cap. *Scriptura, reus fracti voti aliquatenus non habetur, nisi temporale obsequium in perpetuum noscitur religionis observantiam commutare*. Rationabiliter autem dici potest, quod etiam per ingressum religionis aliquis consequatur remissionem omnium peccatorum. Si enim aliquibus elemosinis factis, homo potest statim satisfacere de peccatis suis, secundum illud Daniel. iv. 24. *Peccata tua elemosinis redime*; multo magis in satisfactionem pro omnibus peccatis sufficit quod aliquis se totaliter divinis obsequiis mancipet per religionis ingressum, quæ excedit omne genus satisfactionis, etiam publicæ penitentia, ut habetur in Decr. xxxiii. quæst. 1. cap. *Admonere*: sicut etiam holocaustum excedit sacrificium, ut Gregorius dicit super Ezech. (hom. xx. a med.) Unde legitur in vitis Patrum (Lib. VI. libello 1. num. 9.) quod eandem gratiam consequuntur religionem intrantes quam consequuntur baptizati. Si tamen non abolverentur per hoc ab omni reatu peccæ, nihilominus ingressus religionis utilis est quam peregrinatio terræ sanctæ, quantum ad promotionem in bonum, quæ præponderat absolutioni a peccata.

## ARTICULUS IV. 911

*Utrum ille qui vovet religionem ingredi, teneatur perpetuo in religione permanere.*

**A**D quartum sic proceditur. Videtur quod ille qui vovet religionem ingredi, teneatur perpetuo in religione permanere. Melius est enim religionem non ingredi quam post ingressum exire, secundum illud II. Petr. 11. 21. *Melius erat illis veritatem non cognoscere, quam post agnitam retroire*: & Luc. 1x. 62. dicitur: *Nemo mittens manum ad aratrum, & respiciens retro, aptus est regno Dei*. Sed ille qui voto se obligavit ad religionis ingressum, tenetur ingredi, ut dictum est (art. præc.) Ergo etiam tenetur perpetuo remanere.

2. Præterea. Quilibet debet vitare id ex quo scandalum sequitur, & aliis datur malum exemplum. Sed ex hoc quod aliquis post religionis ingressum egredi-

tur, & ad sæculum redit, malum exemplum, & scandalum aliis generatur, qui retrahuntur ab ingressu, & provocantur ad exitum. Ergo videtur quod ille qui ingreditur religionem, ut votum impleat quod prius fecit, teneatur ibi perpetuo remanere.

3. Præterea. Votum religionis reputatur votum perpetuum: & ideo temporalibus votis præferetur, ut dictum est (art. præc. ad 3. & quæst. lxxxviii. art. 12. ad 1.) Hoc autem non esset, si aliquis, voto religionis emissio, ingrederetur cum proposito exundi. Videtur ergo quod ille qui vovet religionis ingressum, teneatur in religione etiam perpetuo remanere.

Sed contra est quod votum professionis, propter hoc quod obligat hominem ad hoc quod perpetuo in religione remaneat, præexigit annum probationis; qui non præexigit ad votum simplex, quo aliquis se obligat ad religionis ingressum. Ergo videtur quod ille qui vovet religionem intrare, propter hoc non teneatur perpetuo ibi remanere.

Respondendo dicendum, quod obligatio voti ex voluntate procedit. Nam *vovere voluntatis est*, ut Augustinus dicit (simplic. sup. Plal. lxxv. a med. & etiam cap. *Lices*, de voto, & voti redempt.) In tantum ergo fertur obligatio voti, in quantum se extendit voluntas, & intentio vovens. Si ergo vovens intendit se obligare non solum ad ingressum religionis, sed etiam ad perpetuo remanendum, tenetur perpetuo remanere. Si autem intendit se obligare ad ingressum religionis causa experiendi, cum libertate remanendi, vel non remanendi, manifestum est quod remanere non tenetur. Si vero in vovendo simpliciter de ingressu religionis cogitavit, absque hoc quod cogitaret de libertate exitus, vel de perpetuitate remanendi, videtur obligari ad ingressum religionis secundum formam iuris communis; quæ est ut ingredientibus detur annus probationis. Unde non tenetur perpetuo in religione permanere.

Ad primum ergo dicendum, quod melius est intrare religionem animo probandi quam penitus non intrare, quia per hoc disponitur ad perpetuo remanendum. Nec tamen intelligitur aliquis retroire, vel respicere, nisi quando prætermittit id ad quod se obligavit: alioquin quicumque per aliquod tempus facit aliquid bonum opus, si non semper id fa-

ciat, esset ineptus regno Dei: quod patet esse falsum.

Ad secundum dicendum, quod ille qui religionem ingreditur, si exeat, praesertim ex aliqua rationabili causa, non generat scandalum, nec dat malum exemplum; & si alius scandalizatur, erit scandalum passivum ex eius parte, non autem activum ex parte exeuntis: quia fecit quod licitum erat facere, & quod excedebat ei propter rationabilem causam, puta inirmitatem, aut debilitatem, aut aliquid huiusmodi.

Ad tertium dicendum, quod ille qui intrat ut statim exeat, non videtur satisfacere voto suo, quia ipse in votendo hoc non intendit: & ideo tenetur mutare propositum, ut saltem velit experiri an ei expediat in religione remanere; non autem tenetur ad perpetuo remanendum.

#### ARTICULUS V. 912

*Utrum pueri sint recipiendi in religione.*

*Sup. quaest. lxxxviii. art. 8. ad 2. & art. 9. corp. & quod. 111. art. 11. & quod. 12. art. 2. & episc. xvii. cap. 111.*

**A**D quintum sic proceditur. Videtur quod pueri non sint recipiendi in religione. Quia extra, de regularibus, & transseuntibus ad religionem dicitur (cap. 1.) Nullus spondeatur, nisi legitima aetate, & spontanea voluntate. Sed pueri non videntur habere legitimam aetatem, nec spontaneam voluntatem, quia non habent perfectum usum rationis. Ergo videtur quod non sint in religione recipiendi.

2. Praeterea. Status religionis videtur esse status poenitentiae: unde & religio dicitur a religando, vel a reeligendo, ut Augustinus dicit X. de civit. Dei (cap. xv. ante med. & Lib. de vera relig. sub fin.) Sed pueris non convenit poenitentia. Ergo videtur quod non debeant religionem intrare.

3. Praeterea. Sicut aliquis obligatur iuramento, ita & voto. Sed pueri ante annos quatuordecim non debent obligari iuramento, ut habetur in Decr. xxxi. quaest. v. cap. Pueri, & cap. Honestum. Ergo videtur quod nec etiam sint voto obligandi.

4. Praeterea. Illicitum videtur obligare aliquem tali obligatione quae possit su-

ste irritari. Sed si aliqui impuberes obligant se religioni, possunt retrahi a parentibus, vel tutoribus: dicitur enim in Decr. xx. quaest. 11. (cap. 11.) quod si puella ante duodecim aetatis annos sponte sua sacrum velamen assumpserit, possunt statim parentes eius, vel tutores id factum irritum facere, si voluerint. Illicitum est ergo pueros, praesertim ante annos pubertatis, ad religionem recipere, vel obligare.

Sed contra est, quod dicit Dominus Matth. xix. 14. *Sinite parvulos, & nolite eos prohibere ad me venire*: quod exponens Origenes super Matth. (traff. vii. versus fin.) dicit, quod „discipuli le-  
„ su, priusquam discant rationem iusti-  
„ tiae, reprehendunt eos qui pueros, &  
„ infantes offerunt Christo. Dominus au-  
„ tem exhortatur discipulos suos conde-  
„ scendere utilitatibus puerorum. Hoc  
„ ergo attendere debemus, ne aestima-  
„ tione sapientiae excellentiores conte-  
„ mnamus, quasi magni, pusillos Eccle-  
„ siae, prohibentes pueros venire ad le-  
„ sum.“

Respondendo dicendum, quod, sicut supra dictum est (art. 2. hu. quest. ad 1.) duplex est religionis votum. Unum simplex, quod constituit in sola promissione Deo facta, quae ex interiori mentis deliberatione procedit: & hoc votum habet efficaciam ex iure divino. Quod tamen dupliciter impeditur potest. Uno modo per defectum deliberationis; ut patet in iuriosis, quorum vota non sunt obligatoria, ut habetur extra, de regularibus, & transseuntibus ad religionem, cap. Si-  
ut tenor. Et eadem est ratio de pueris qui nondum habent debitum usum rationis, per quem sint doli capaces: quem quidem pueri habent ut frequentius circa quatuordecimum annum, puellae vero circa duodecimum, qui dicuntur anni pubertatis: in quibusdam tamen anticipatur, & in quibusdam tardatur secundum diversam dispositionem naturae. Alio modo impeditur efficacia simplicis voti, si aliquis Deo voveat qui non est propriae potestatis; puta si servus etiam usum rationis habens voveat se religionem intrare, aut etiam ordinem ignorante domino: potest enim hoc dominus revocare, ut habetur in Decr. dist. 11v. cap. Si servus. Et quia pueri, vel puellae infra pubertatis annos naturaliter sunt in potestate patris quantum ad dispositionem suae vitae, poterit pater votum eorum revocare, vel acceptare, si  
libi

sibi placuerit, ut expresse dicitur de muliere Num. xxx.

Sic ergo si puer ante annos pubertatis simplex votum emittat, antequam habeat plenum usum rationis, non obligatur ex voto; si autem habeat usum rationis ante annos pubertatis, obligatur quidem, quantum in se est, ex tunc voto; tamen potest obligatio removeri per auctoritatem patris, in cuius potestate adhuc existit: quia ordiatio legis, qua unus homo subditur alteri, respicit id quod in pluribus accidit. Si vero annos pubertatis excedat, non potest revocari auctoritate parentum; si tamen nondum haberet plenum usum rationis, non obligaretur quoad Deum.

Aliud autem est votum solemne, quod facit monachum, vel religiosum: quod quidem subditur ordinationi Ecclesiae propter solemnitatem, quam habet annexam. Et quia Ecclesia respicit id quod in pluribus est, professio ante tempus pubertatis facta, quantumcumque aliquis habeat usum rationis plenum, vel sit doli capax, non habet suum effectum, ut faciat profitemem iam esse religiosum. Et tamen licet ante pubertatis annos profiteri non possint, possunt tamen cum voluntate parentum in religione recipi, ut nutriantur ibidem; sicut de Ioanne Baptista legitur Luca 1. 80. quod puer crecebat, & confortabatur spiritu, & erat in desertis. Unde, sicut Gregorius dicit in II. Dialog. (cap. 111. in fin.) B. Benedicto Romani nobiles suos filios omnipotenti Deo nutriendos dare ceperunt: quod est valde expediens, secundum illud Thren. 111. 27. Bonum est viro, cum portaverit iugum ab adolescentia sua. Unde & communi consuetudine pueri applicantur illis officiis, vel artibus in quibus sunt vitam acturi.

Ad primum ergo dicendum, quod legitima aetas ad hoc quod aliquis condeatur cum voto solemni religionis, est tempus pubertatis, in quo homo potest uti spontanea voluntate; sed ante annos pubertatis potest esse legitima aetas ad hoc quod aliquis condeatur in religione nutriendus.

Ad secundum dicendum, quod religionis status principaliter ordinatur ad perfectionem consequendam, ut supra habitum est (quaest. clxxxvi. art. 1. ad 4.) & secundum hoc convenit pueris, qui de facili inducuntur: ex consequenti autem dicitur esse status penitentiae, in quantum per observantiam religionis pecca-

torum occasiones tolluntur, ut supra dictum est (quaest. clxxxvii. art. 6.)

Ad tertium dicendum, quod pueri sic ut non coguntur ad iurandum, sicut Canon dicit, ita non coguntur ad votendum. Si tamen voto, vel iuramento se adstrinxerint ad aliquid faciendum, obligantur quoad Deum, si habeant usum rationis; sed non obligantur quoad Ecclesiam ante quatuordecim annos.

Ad quartum dicendum, quod Num. xxx. non reprehenditur mulier in puellarum aetate constituta, si voveat absque consensu parentum; potest tamen revocari a parentibus: ex quo patet quod non peccat vovendo; sed intelligitur se voto obligare, quantum in se est, absque prauiudicio auctoritatis paternae.

## ARTICULUS VI. 913

*Utrum propter obsequium parentum debeat aliquis retrahi ab ingressu religionis.*

*Sup. quaest. ci. art. 4. ad 3. & 4. & III. dist. xxxviii. quaest. 11. art. 4. quaest. 2. ad 2. & quol. 111. art. 16. & quol. x. art. 9. & Matth. xv.*

**A**D sextum sic proceditur. Videtur quod propter obsequium parentum debeant aliqui retrahi ab ingressu religionis. Non enim licet praetermittere id quod est necessitatis, ut fiat id quod est liberum voluntati. Sed obsequi parentibus cadit sub necessitate praecepti, quod datur de honoratione parentum Exod. xx. unde & Apostolus dicit I. ad Tim. v. 4. Si qua vidua filios, aut nepotes habet, discat primum domum suam regere, & mutuum vicem reddere parentibus. Ingredi autem religionem est liberum voluntati. Ergo videtur quod non debet aliquis praetermittere parentum obsequium propter religionis ingressum.

2. Praeterea. Maior videtur esse subiectio filii ad patrem quam servi ad dominum: quia filiatio est naturalis, servitus autem ex maledictione peccati, ut patet per Gen. ix. Sed servus non potest praetermittere obsequium domini sui, ut religionem ingreditur, aut sacrum ordinem assumat, sicut habetur in Decr. dist. liv. cap. Si servus. Ergo multo minus potest filius obsequium patris praetermittere, ut ingreditur religionem.

3. Praeterea. Maiori debito obligatur aliquis

aliquis parentibus quam his quibus debet pecuniam. Sed illi qui debent pecuniam aliquibus, non possunt religionem ingredi: dicit enim Gregorius in Regist. (Lib. VII. indist. 1. epist. xi.) & habetur in Decr. dist. lxxx. (cap. Legem,) quod hi qui sunt rationibus publicis obligati, quando petunt monasterium, nullo modo suscipiendi sunt, nisi prius a negotiis publicis fuerint absoluti. Ergo videtur quod multo minus filii possunt religionem ingredi, praetermissa paterno obsequio.

Sed contra est quod Matth. iv. 22. dicitur, quod Iacobus, & Ioannes, reliquitis, & patre, secuti sunt Dominum. Ex quo, ut Hilarius dicit (can. 111. in Matth. non procul a fin.) docemur Christum secuti, & secularis vitae solitudine, & paternae domus consuetudine non teneri.

Respondetur dicendum, quod, sicut supra dictum est (quaest. ci. art. 2. ad 2.) cum de pietate ageretur, parentes habent rationem principii, inquantum huiusmodi: & ideo per se eis convenit ut filiorum curam habeant. Et propter hoc non licet alicui filios habenti religionem ingredi, omnino praetermissa cura filiorum, idest non proviso qualiter educari possint. Dicitur enim 1. ad Tim. v. 8. quod si quis suorum curam non habet, fidem negavit, & est infideli deterior.

Per accidens tamen parentibus convenit ut a filiis adiuventur, inquantum scilicet sunt in necessitate aliqua constituti. Et ideo dicendum est, quod parentibus in necessitate existentibus, ita quod eis commode aliter quam per obsequium filiorum subveniri non possit, non licet filiis, praetermissa parentum obsequio, religionem intrare. Si vero non sint in tali necessitate ut filiorum obsequio multum indigeant, possunt, praetermissa parentum obsequio, filii religionem intrare etiam contra praecceptum parentum: quia post annos pubertatis quilibet ingenuus libertatem habet quantum ad ea quae pertinent ad dispositionem sui status, praesertim in his quae sunt divini obsequii: & (a) magis est obtemperandum Patri spirituum, ut vivamus, quam parentibus carnis, ut Apostolus dicit ad Hebr. xii. 9. Unde Dominus, ut legitur Matth. vii. & Luc. ix. reprehendit discipulum, qui volebat eum statim sequi intuitu paternae sepulturae: erant

enim alii per quos illud opus impleri poterat, ut Chrysostomus dicit (hom. xlviii. in Matth. a med.)

Ad primum ergo dicendum, quod praecceptum de honoratione parentum non solum se extendit ad corporalia obsequia, sed etiam ad spiritualia, & ad reverentiam exhibendam. Et ideo etiam illi qui sunt in religione, implere possunt praecceptum de honoratione parentum, pro eis orando, & eis reverentiam, & auxilium impendendo, secundum quod religiosus decet: quia etiam illi qui in saeculo vivunt, diversimode parentes honorant secundum eorum conditionem.

Ad secundum dicendum, quod quia servitus est in penam peccati inducta, ideo per servitutem aliquid admittitur homini quod alias ei competere, ne scilicet libere de sua persona possit disporre: servus enim id quod est, domini est. Sed filius non patitur detrimentum ex hoc quod subiectus est patri, quin possit de sua persona libere disporre, transferendo se ad obsequium Dei: quod maxime pertinet ad hominis bonum.

Ad tertium dicendum, quod ille qui est obligatus ad aliquid certum, non potest illud licite praetermittere, facultate existente. Et ideo si aliquis sit obligatus ut alicui rationem ponat, vel ut certum debitum reddat, non potest hoc licite praetermittere, ut religionem ingredatur. Si tamen debeat aliquam pecuniam, & non habeat unde reddat, tenetur facere quod potest, ut scilicet cedat bonis suis creditori. Propter pecuniam autem persona liberi hominis secundum iura civilia (Lib. Obes, cap. de actionib. & obligation. in Syntagmae Iuris, Lib. XIV. cap. 111. num. 12.) non obligatur, sed solum res: quia persona liberi hominis superat omnem estimationem pecuniae. Unde licite potest, exhibitis rebus suis, religionem intrare: nec tenetur in saeculo remanere, ut procuret unde debitum reddat. Filius autem non tenetur ad aliquod speciale debitum patri, nisi forte in casu necessitatis, ut dictum est (in corp. art.)

A-R-

(a) Valgata: Non multo magis obtemperabimus Patri spirituum, & vivemus 2

## ARTICULUS VII. 914

*Utrum presbyteri curati possint licite religionem ingredi.*

*Sup. quaest. clxxxiv. art. 3. & opusc. xviii. cap. xxv.*

**A**D septimum sic proceditur. Videtur quod presbyteri curati non possint licite religionem ingredi. Dicit enim Gregorius in Pastor. (par. iiii. cap. i. admonit. 5. parum a princ.) quod ille qui curam animarum suscipit, terribiliter admonetur, cum dicitur: *Fili mi, si spondideris pro amico tuo, deficiisti apud extraneum manum tuam: & subdit: Spondere namque pro amico, est alienam animam in periculo suae conversationis accipere.* Sed ille qui obligatur homini pro aliquo debito, non potest intrare religionem, nisi solvat id quod debet, si possit. Cum ergo sacerdotes possint curam animarum agere, ad quam se obligavit in periculo animae suae, videtur quod non liceat ei, praetermissa cura animarum, religionem intrare.

2. Præterea. Quod uni licet, pari ratione omnibus similibus licet. Sed si omnes presbyteri habentes curam animarum religionem intrarent, remaneret plebes absque cura pastorum: quod esset inconveniens. Ergo videtur quod presbyteri curati non possint licite religionem intrare.

3. Præterea. Inter actus ad quos religiones ordinantur, præcipui sunt illi quibus aliquis contemplata aliis tradit. Huiusmodi autem actus competunt presbyteris curatis, & Archidiaconis, quibus ex officio competit prædicare, & confessiones audire. Ergo videtur quod non liceat presbytero curato, vel Archidiacono transire ad religionem.

Sed contra est quod in Decc. xix. quaest. ix. cap. *Due sunt leges*, dicitur: *Si quis clericorum in Ecclesia sua sub Episcopo populum retinet, & seculariter vivit, si afflatus Spiritu sancto in aliquo monasterio, vel regulari canonica se salvare voluerit, etiam Episcopo suo contradicente, eat liber nostra auctoritate.*

Respondendo dicendum, quod, sicut supra dictum est (art. 3. huius quaest. ad 3. & quaest. lxxxviii. art. ix. ad i.) obli-

gatio voti perpetui præfertur omni alii obligationi. Obligari autem voto perpetuo, & solemniter ad vacandum divinis obsequiis, competit proprie Episcopis, & religiosis. Presbyteri autem curati, & Archidiaconi non obligantur voto perpetuo, & solemniter ad curam animarum retinendam, sicut ad hoc obligantur Episcopi. Unde Episcopi præstaturum non possunt deserere quacumque occasione, absque auctoritate Romani Pontificis, ut habetur extra de reg. & transmissibus ad relig. cap. *Licet*. Archidiaconi autem, & presbyteri curati possunt libere abrenuntiare Episcopo curam eis commissam, absque speciali licentia Papæ, qui solus potest in votis perpetuis dispensare. Unde manifestum est quod Archidiaconis, & presbyteris curatis licet ad religionem transire.

Ad primum ergo dicendum, quod presbyteri curati, & Archidiaconi obligaverunt se ad curam agendam subditorum, quamdiu retinent Archidiaconatum, vel parochiam; non autem obligaverunt se ad hoc quod perpetuo Archidiaconatum, vel parochiam teneant.

Ad secundum dicendum, quod, sicut Hieronymus dicit contra Vigil. (cap. vi. in princ. & incipit, *Multa in ore*), *Quamvis a te lingue viperæ morsus sacrissimos patientur, scilicet Religiosi, quibus argumentaris, & dicis: Si omnes se clausierint, & fuerint in solitudine, quis celebrabit Ecclesias? quis seculares homines lucrifaciet? quis peccantes ad virtutes poterit exhortari? Hoc enim modo si omnes tecum satui sint, sapiens esse quis poterit? Et virginitas non erit approbanda: si enim virgines omnes fuerint, & nuptia non fuerint, interibit genus humanum. Rara est virtus, nec a pluribus appetitur.* Patet ergo quod hic timor stultus est; puta si aliquis timeret haurire aquam, ne flumen deliceret. (a)

**A R-**

(a) Deß solutio ad tertium in mss. & edit. omnibus, Edit. Latav. Ad tertium patet solutio ex dictis 2 quod verissimum est.



## ARTICULUS VIII. 915

*Utrum liceat de una religione transire ad aliam.*

*IV. dist. xxvii. quest. 1. art. 3. quest. 1. & III. dist. xxxviii. quest. 1. art. 4. quest. 3. ad 2.*

**A**D octavum sic proceditur. Videtur quod non liceat de una religione transire ad aliam, etiam arctiorem. Dicit enim Apostolus ad Hebr. x. 25. *Non deferentes collectionem nostram, sicut est consuetudinis quibusdam* (Glossa (interl.)) „qui scilicet vel timore persecutionis cedunt, vel propria praesumptione a peccatoribus, vel imperfectis, ut iusti videantur, recedunt.“ Sed hoc videtur facere qui de una religione transiunt ad aliam perfectiorem. Ergo videtur hoc esse illicitum.

2. Præterea. Professio monachorum est arctior quam professio regularium canonicorum, ut habetur extra, de statu monach. & can. reg. cap. *Quod Dei timorem*. Sed non licet alicui transire de statu canonicorum regularium ad statum monachorum: dicitur enim in Decr. xix. quest. 111. (cap. 11.) *Mandamus, & universaliter interdicens, ne quis canonicus regulariter professus, nisi (quod abbi) publice lapsus fuerit, monachus efficiatur*. Ergo videtur quod non liceat alicui transire de una religione ad aliam maiorem.

3. Præterea. Tamdiu obligatur aliquis ad implendum quod vovit, quamdiu potest licite illud implere; sicut si aliquis vovit continentiam servare, etiam post contractum matrimonium per verba de presenti, ante carnalem copulam teneatur implere votum, quia hoc potest facere religionem intrando. Si ergo aliquis licite potest transire de una religione ad aliam, tenebitur hoc facere, si ante hoc voverit existens in sæculo: quod videtur esse inconveniens, quia ex hoc plerumque scandalum generari posset. Ergo non potest aliquis religiosus de una religione transire ad aliam arctiorem.

Sed contra est quod dicitur in Decr. xx. quest. 1v. (cap. 1.) *Virgines sacre si pro lucro animæ suæ propter districtiorem vitam ad aliud monasterium pergere disposuerint, ibique commanere decreverint, sancta Synodus concedit: & eadem ratio*

videtur esse de quibuscunque religiosis. Ergo potest aliquis licite transire de una religione ad aliam.

Respondeo dicendum, quod transire de religione, ad religionem, nisi propter magnam utilitatem, vel necessitatem, non est laudabile: tum quia ex hoc plerumque scandalizantur illi qui relinquuntur: tum etiam quia facilius proficit aliquis in religione quam consuevit, quam in illa quam non consuevit, ceteris paribus. Unde in collationibus Patrum (collat. xiv. cap. v. in princ.) Abbas Nesteros dicit: *Umicunque utile est secundum propositum quod elegit, ut summo studio, ac diligentia ad operis arripit perfectionem pervenire festinet, & nequaquam a sua, quam elegit semel, professione discedat. Et postea subdit (cap. vi.) rationem assignans: Impossibile namque est unum & eundem hominem simul universis fulgere virtutibus: quas si quis voluerit pariter affectare, in id incidere eum necesse est, ut dum omnes sequitur, nullam integre consequatur. Diverse enim religiones præziment securum diversa virtutum opera.*

Potest tamen aliquis laudabiliter de una religione transire ad aliam, explici ex causa. Primo quidem zelo perfectioris religionis: quæ quidem excellentia, ut supra dictum est (quest. præc. art. 6.) non attenditur secundum solam (a) arctitudinem, sed principaliter secundum id ad quod religio ordinatur, secundario vero secundum discretionem observantiarum debito fini proportionatarum. Secundo propter declinationem religionis a debita perfectione; puta si in aliqua religione arctiori incipiant religiosi remissius vivere, laudabiliter transit aliquis ad religionem etiam minorem, si melius observetur. Unde in collationibus Patrum (collat. xix. cap. 111. v. & vi.) Abbas Ioannes de seipso dicit, quod a vita solitaria, in qua professus fuerat, transit ad minorem, scilicet eorum qui vivunt in societate, propter hoc quod vita eremitica cõperat declinare, & laxius observari. Tertio propter infirmitatem, vel debilitatem; ex qua interdum provenit quod non potest aliquis arctiori religionis statuta servare, posset autem servare statuta religionis laxioris.

Sed in his tribus casibus potest esse differentia. Nam in primo casu debet quidem propter humilitatem licentiam petere, quæ tamen ei negari non potest,

(a) Ita mss. & edici possim. Al. alitudoem,

est, dummodo constet illam religionem esse antiquiorem. Si vero de hoc probabiliter dubitetur, est in hoc superioris iudicium requirendum, ut habetur extra, de regularibus, & transeuntibus ad religionem, cap. *Licet*. Similiter requiratur superioris iudicium in secundo casu. In tertio vero casu (a) etiam est necessaria dispensatio.

Ad primum ergo dicendum, quod illi qui ad antiquiorem religionem transeunt, non faciunt hoc presumptuose, ut illi videantur, sed devote, ut iustiores fiant.

Ad secundum dicendum, quod utraque religio, scilicet monachorum, & canonicorum regularium, ordinatur ad opera vite contemplative: inter quae praecipua sunt ea quae aguntur in divinis mysteriis: ad quae ordinatur directio canonice regularium, quibus per se competit quod sint clerici religiosi. Sed ad religionem monachorum non per se competit ut sint clerici, ut habetur in Decr. xvi. quæst. 1. (cap. *Nemo potest*, & cap. *Alia causa*.) Et ideo quamvis ordo monachorum sit antiquior observantie, si monachi essent laici, liceret transire ab ordine monachorum ad ordinem canonicorum regularium, secundum illud Hieronymi ad Rusticum monachum (epist. xv. aliquant. a med.) *Sic vivo in monasterio, ut clericus esse merearis*: non autem e converso, ut habetur in Decr. xvi. quæst. 1. in decr. indulto. Sed si monachi sint clerici sacris mysteriis obsequentes, habent id quod est canonicorum regularium cum maiori antiquitate: & ideo transire licitum erit de ordine canonicorum regularium ad ordinem monachorum, petita tamen superioris licentia, ut dicitur xix. quæst. 111. cap. *Statuimus*.

Ad tertium dicendum, quod votum solemne, quo quis obligatur minori religioni, est fortius quam votum simplex, quod quis astrigitur maiori religioni. Post votum enim simplex si contraheret aliquis matrimonium, non dirimeretur, sicut post votum solemne. Et ideo ille qui iam professus est in minori religione, non tenetur implere votum simplex, quod emisit de intrando religionem maiorem.

*Utrum aliquis debeat alios inducere ad religionem intrandam.*

*Quod. 111. art. 11. & 14.*

**A**D nonum sic proceditur. Videtur quod nullus debeat alios inducere ad religionem intrandam. Mandat enim beatus Benedictus in regula sua (cap. lxxiii.) quod *venientibus ad religionem non sit facilis praebendus ingressus; sed probandum est, an spiritus ex Deo sint*: & hoc etiam docet Cassianus in IV. Lib. de institutis cœnobiorum (cap. 111.) Multo ergo minus licet aliquem ad religionem inducere.

2. Præterea. Matth. xxi. 15. Dominus dicit: *Vae vobis, qui circuitis mare, & aridam, ut faciatis unum profectum, & cum factus fuerit, faciatis eum filium gehennae duplo quam vos*. Sed hoc videtur facere qui homines ad religionem inducunt. Ergo videtur hoc esse vituperabile.

3. Præterea. Nullus debet aliquem inducere ad id quod pertinet ad eius detrimentum. Sed illi qui inducuntur ad religionem, quandoque ex hoc incurrunt detrimentum, quia quandoque sunt obligati ad maiorem religionem. Ergo videtur quod sit laudabile aliquos inducere ad religionem.

Sed contra est quod dicitur Exod. xxvi. *Cortina cortinam trahet*. Debet ergo unus homo alium trahere ad Dei obsequium.

Respondetur dicendum, quod inducentes alios ad religionem non solum non peccant, sed magnum præmium merentur. Dicitur enim Iacobi ult. 20. *Qui conversi fuerit peccatorem ab errore via sua, salvabit animam eius a morte, & operiet multitudinem peccatorum*: & Dan. xii. 13. dicitur, quod qui ad iustitiam erudiunt plurimos, erunt quasi stellæ in perpetuas æternitates.

Possent tamen contingere circa huiusmodi inductionem triplex inordinatio. Primo quidem, si violenter aliquis alium ad religionem cogeret: quod prohibetur in Decr. xx. quæst. 111. (cap. *Præsumptus*.) Secundo, si aliquis simoniace alium ad religionem trahat, muneribus datis, ut prohibetur in Decr. ibidem, quæst. 111. cap. *Quam pius*. Nec tamen ad hoc per-

(a) Ita mss. & ceteri potius, al. dicit illam.

tinet.

tinet, si aliquis alicui pauperi necessaria subministrat in sæculo nutriendum ad religionem; vel si sine pacto aliqua munuscula tribuat ad familiaritatem captandam. Tertio, si mendacius eum alliciat: imminet enim sic indulto periculum ne cum se deceptum invenerit, retrocedat; & sic fiant novissima illius hominis peiora prioribus, ut dicitur Lucæ x. 26.

Ad primum ergo dicendum, quod illis qui ad religionem inducuntur, nihilominus reservatur probationis tempus, in quo difficultates religionis experiuntur: & sic non facilis aditus ei datur ad religionis ingressum.

Ad secundum dicendum, quod secundum Hilarium (can. xxv. in Marth. cir. med.) verbum illud Domini prænuntiavum fuit perverſi studii Iudæorum, quo post Christi prædicationem Gentiles, vel etiam Christianos ad Iudaicum ritum trahendo faciunt dupliciter gehennæ filios: quia scilicet peccata pristina, quæ commiserunt in Iudaismo, eis non dimittuntur, & nihilominus incurrunt Iudaicæ peridiæ reatum: & secundum hoc non facit ad propositum. Secundum Hieronymum autem (in hunc loc. Matth.) hoc refertur ad Iudæos etiam pro statu illo in quo legalia observari licebat, quantum ad hoc quod ille qui ab eis ad Iudaismum convertebatur, dum esset Gentilis, simpliciter errabat; videns autem magistrorum vitia revertitur ad votum suum, & Gentilis factus, quasi prævaricator, maiori pœna fit dignus. Ex quo patet quod trahere alios ad cultum Dei, vel ad religionem non est vituperabile, sed hoc solum quod aliquis ei qui convertitur, det malum exemplum, unde peior efficiatur.

Ad tertium dicendum, quod in maiori includitur minus. Et ideo ille qui est obligatus voto, vel iuramento ad ingressum minoris religionis, potest licite induci ad hoc quod ad maiorem religionem transeat; nisi sit aliquod speciale quod impediatur, puta infirmitas, vel spes maioris profectus in minori religione. Ille vero qui est obligatus voto, vel iuramento ad ingressum maioris religionis, non potest licite induci ad minorem religionem, nisi ex aliqua speciali causa evidenti; & hoc cum dispensatione superioris.

*Utrum sit laudabile quod aliquis religionem ingrediatur absque multorum consilio, & diuturna deliberatione præcedente.*

**A**d decimum sic proceditur. Videtur quod non sit laudabile quod aliquis religionem ingrediatur absque multorum consilio, & diuturna deliberatione præcedente. Dicitur enim I. Ioan. iv. 1. *Nolite credere omni spiritui, sed probate spiritus, si ex Deo sint.* Sed quandoque propositum religionem intrandi non est ex Deo, cum frequenter per exitum religionis dissolvatur: dicitur enim Act. v. 39. *Si est hoc consilium ex Deo, non poteritis dissolvere illud.* Ergo videtur quod magna examinatione præcedente debeant aliqui religionem intrare.

2. Præterea. Proverb. xxv. 9. dicitur: *Causam tuam trahita cum amico tuo.* Sed maxime videtur hominis esse causa quæ pertinet ad mutationem status. Ergo videtur quod non debeat aliquis religionem intrare, nisi prius cum amicis suis tractet.

3. Præterea. Dominus Lucæ xiv. 29. inducit similitudinem de homine, qui vult turrim ædificare, quod prius sedens computat sumptus qui sunt ei necessarii, si habeat ad perficiendum; ne insultetur ei: *Quia hic homo cepit ædificare, & non potuit consummare.* Sumptus autem ad turrim ædificandam, ut Augustinus dicit in epist. ad Lærum (ccxliiii. al. xxxviii. aliquant. a princ.) nihil est aliud quam: *ut renuntiet unusquisque omnibus quæ sunt eius.* Contingit autem quandoque quod hoc multi non possunt, & similiter alias religionis observantias portare: in cuius figura I. Reg. xvii. dicitur, quod David non poterat incedere in armis Saulis, quia non habebat usum. Ergo videtur quod non debeat aliquis religionem intrare, nisi diuturna deliberatione præmissa, & multorum consilio habito.

Sed contra est quod dicitur Matth. xv. quod ad vocationem Domini Petrus, & Andreas, reliſtis retibus, continuo secuti sunt eum: ubi Chrysostomus dicit super Matthæum (hom. xiv. antemed.), *»Talem obedientiam Christus quærit a nobis, ut neque instanti temporis moreremur.*

Respondeo dicendum, quod diuturna delib.

deliberatio, & multorum consilia requiruntur. in magnis dubiis, ut Philosophus dicit in III. Ethic. (cap. 111.) In his autem quæ sunt certa, & determinata, non requiritur consilium. Circa ingressum autem religionis tria possunt considerari. Primo quidem ipse religionis ingressus secundum se: & sic certum est quod ingressus religionis est melius bonum: & qui de hoc dubitat, quantum est in se, derogat Christo, qui hoc consilium dedit. Unde Augustinus dicit in Lib. de verbis Dom. (serm. vii. cap. 11. parum a princ.) *Vocat te Oriens, idest Christus, & tu attendis Occidentem, idest ad hominem mortalem, & errare poterentem.*

Alio modo potest considerari religionis ingressus per comparisonem ad vires eius qui est religionem ingressurus: & sic etiam non est locus dubitationis de ingressu religionis: quia illi qui religionem ingrediuntur, non confidunt in sua virtute se posse subsistere, sed auxilium virtutis divinæ, secundum illud Isa. xl. 31. *Qui sperant in Domino, mutant fortitudinem, assumunt pennas, sicut aquilæ, current, & non laborabunt, ambulabunt, & non deficient.* Si tamen sit aliquod speciale impedimentum (puta infirmitas corporalis, vel onera debitorum, vel aliqua huiusmodi) in his requiritur deliberatio, & consilium cum his de quibus speratur quod profine, & non impediunt. Unde dicitur Eccle. xxxvii. 12. *Cum viro irreligioso trahas de sanctitate, & cum iniusto de iustitia: quasi dicat, non: unde sequitur: Non attendas his in omni consilio, sed cum viro sancto assiduus esto.* In quibus tamen non est diuturna deliberatio habenda. Unde Hieronymus dicit in epist. ad Paulin. (ciii. prope fin.) *Festina, quæso te, & herenti in solo navicula: funem magis præcinde quam solve.*

Tertio autem modo considerari potest modus religionem intrandi, & quam religionem aliquis ingredi debeat: & de talibus potest haberi etiam consilium cum his qui non impediunt.

Ad primum ergo dicendum, quod cum dicitur, *Probate spiritus, si ex Deo sint*, locum habet in his quæ dubia sunt, utrum spiritus Dei sint: sicut dubium potest esse in his qui iam sunt in religione, utrum illi qui religioni se offerunt, spiritui Dei ducatur, an simulate accedat. Et ideo debent accedentem probare, utrum divino spiritu moveatur. Sed

illi qui ad religionem accedunt, non potest esse dubium, an propositum de ingressu religionis in corde eius exortum sit a spiritu Dei, cuius est ducere hominem in terram rectam. Nec propter hoc ostenditur non esse ex Deo quod aliqui retrocedunt: non enim omnequod a Deo est, est incorruptibile: alioquin creaturæ corruptibiles non essent ex Deo, ut Manichæi dicunt; neque etiam aliqui qui habent a Deo gratiam, possent illam amittere; quod etiam est hæreticum. Sed consilium Dei est indissolubile, quo etiam corruptibilia, & mutabilia facit, secundum illud Isa. xlv. 10. *Consilium meum habet, & omnis voluntas mea fiet.* Et ideo propositum de ingressu religionis non indiget probatione, utrum sit a Deo, quia certa discussione non eget, ut dicit Glossa (interl.) super illud I. ad Thessal. ult. *Omnia probate.*

Ad secundum dicendum, quod sicut caro concupiscit adversus spiritum, ut dicitur ad Galat. v. 17. ita etiam frequenter amici carnales adversantur profectui spirituali, secundum illud Michæ. vii. 6. *Inimici hominis domestici eius.* Unde Cyrillus exponens illud Luc. ix. 6. *Permite me renuntiare bis qui domi sunt*, dicit: (hab. in Cat. aut. D. Thom.) *Querere renuntiare his qui domi sunt, ostendit quod utcumque divinus sit. Nam communicare proximis, & consulere nolentes æqua sapere, indicat adduc utcumque languentem, & retrocedentem. Propter quod audit a Domino: Nemo, cum posueris manum ad aratrum, & aspexeris retro, habilis est ad regnum Dei. Aspicit enim retro qui dilationem querit occasione redeundi domus, & cum proximis conferendi.*

Ad tertium dicendum, quod per ædificationem turris significatur perfectio christianæ vitæ. Abrenuntiatio autem propriorum est sumptus ad ædificandam turrim. Nullus autem dubitat, vel deliberat, an velit habere sumptus, vel an possit turrim ædificare, si sumptus habeat; sed hoc sub deliberatione ponitur, in aliquis sumptus habeat. Similiter sub deliberatione cadere non oportet, utrum aliquis debeat abrenuntiare omnibus quæ possidet, vel si hoc faciendo, ad perfectionem pervenire possit; sed hoc cadit sub deliberatione, utrum hoc quod facit, sit abrenuntiare omnibus quæ possidet: quia nisi abrenuntiaverit (quod est sumptus habere) non potest (ut ibidem subditur)

Chri-

*Christi esse discipulus; quod est turrim non se subtrahet, ut cadas: proice te se-*  
*edificare. Timor autem eorum qui tre-*  
*pidant, an per religionis ingressum pos-*  
*sint ad perfectionem pervenire, esse ir-*  
*rationabilis ex multorum exemplo con-*  
*vincitur. Unde Augustinus dicit VIII.*  
*Confess. (cap. xr. a med.) Aperiebatur*  
*ab ea parte, qua intenderam faciem, &*  
*quo transire trepidabam, casta dignitas*  
*continentiae, honeste blandiens ut venirem,*  
*neque dubitarem, & extendens ad me su-*  
*scipiendum, & amplectendum pius man-*  
*us. Ibi tot pueri, & puella, ibi iuven-*  
*tus multa, & omnis aetas, & graves vi-*  
*duae, & virgines anus. Et irridebat me*  
*irrisione exhortatoria, quasi diceret: Tu*  
*non peteris quod isti, & iste? An isti,*  
*& ista in semetipsis possunt, & non in*  
*Domino Deo suo? Quid in te fias, & non*  
*fias? Proice te in eum: noli meture la-*

*curus, excipiet te, & sanabit te.*  
*Exemplum autem illud quod inducitur*  
*de David, non facit ad propositum:*  
*quia arma Saulis, sicut Glossa (interl.*  
*sup. illud I. Reg. xvii. Et deposuit ea)*  
*dicit, sunt legis sacramenta, tamquam*  
*onerantia; religio autem est suavia iugum*  
*Christi: quia, ut Gregorius dicit in IV.*  
*Moral. (cap. xxx. parum a princ.) quid*  
*grave mentis nostrae cervicibus imponit,*  
*qui vitari omne desiderium quod pertur-*  
*bat, praecipit, qui destinari laboriosa*  
*mundi huius itinera monet? Quod quidem*  
*suave iugum super se tollentibus, refe-*  
*ctionem divinae fruitionis repromittit,*  
*& sempiternam requiem animarum: ad*  
*quam nos perducatur ipse qui promisit,*  
*IESUS Christus Dominus noster, qui est*  
*super omnia Deus benedictus in saecu-*  
*la. Amen.*

FINIS TOMI XXIII.

11. 1 81

005659084

